


Chyoiyúng
chyumlaiká:
dangshikaq asik; Zaiwa



New Testament in Zaiwa

Chyoiyúng chyumlaiká: dangshikaq asik; Zaiwa New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
23f9fc55-a8a4-59ef-9513-707ec336b0ee

Contents

Mahte	1
Markuq	67
Lukaq	110
Yohan	181
Lagyo	234
Romaq	298
1 Korinhtuq	328
2 Korinhtuq	356
Galatiq	375
Ehpesu	385
Hpilipi	395
Kolose	402
1 Htesaloni	409
2 Htesaloni	415
1 Timohti	419
2 Timohti	427
Tituq	433
Hpilemon	437
Hebre	439
Yakuq	461
1 Petruq	469
2 Petruq	477
1 Yohan	482
2 Yohan	490
3 Yohan	491
Yude	492
Shing-rán	495

MAHTE é Gabú Danglù Laiká (The Gospel of Matthew)

Yesuq É Byùxik Shap Kyô É Hkyô
Luk 3:23-38

¹ Abraham é awut ashín, Dawiq é yhangzo yhangshu,* Yesuq Hkrisduq é byùxik labaù gi, a-ô mâ é eq rajung za nghut lhê.

² Abraham gi, Isak lé hkû;

Isak gi, Yakup lé hkû;

Yakup gi, Yudaq eq yhanggu yhangmâng pé lé hku é nghut lhê;

³ Yudaq gi, Hparet eq Zera lé hkû, haù nhik é yhângnu gi, Tamar nghut ri.

Hparet gi, Hesrun lé hkû;

Hesrun gi, Ram lé hkû;

⁴ Ram gi, Aminada lé hkû;

Aminada gi, Nashon lé hkû;

Nashon gi, Salamun lé hkû;

⁵ Salamun gi, Buaq lé hkû;

Buaq é yhângnu gi, Rahap nghut ri.

Buaq gi, Obet lé hkû;

Obet é yhângnu gi, Ruhtaq nghut ri.

Obet gi, Yese lé hkû;

⁶ Yese gi, Hkohlâm Dawiq lé hkû;

Dawiq gi, Sholumon lé hkû; Sholumon é yhângnu gi, Uriaq yhangmyi dut wú sú nghut ri.

⁷ Sholumon gi, Rehoboam lé hkû;

Rehoboam gi, Abiyaq lé hkû;

Abiyaq gi, Asa lé hkû;

⁸ Asa gi, Yehoshaphat lé hkû;

Yehoshaphat gi, Yoram lé hkû;

Yoram gi, Uzi-aq lé hkû;

⁹ Uzi-aq gi, Yohtam lé hkû;

Yohtam gi, Ahaza lé hkû;

Ahaza gi, Hezekiaq lé hkû;

¹⁰ Hezekiaq gi, Manase lé hkû;

Manase gi, Amon lé hkû;

Amon gi, Yosiaq lé hkû;

¹¹ Yosiaq gi, Babelon má shúm dut hui é hkûn, Yehkoniasq eq yhanggu yhangmâng pé lé hku é nghut ri.

¹² Babelon má shúm dut hui é htâng má,

Yehkoniasq gi, Shalahtila lé hkû;

Shalahtila gi, Zerubelaq lé hkû;

¹³ Zerubelaq gi, Abiut lé hkû;

Abiut gi, Eliakim lé hkû;

Eliakim gi, Azor lé hkû;

* **1:1** Awut ashín eq yhangzo yhangshu gâ é lé, Chyúmdang ra-am má, "yhangzo" ga le bo tô lhê.

14 Azor gi, Zaduk lé hkû;
Zaduk gi, Ahkim lé hkû;
Ahkim gi, Eliut lé hkû;

15 Eliut gi, Eliaza lé hkû;
Eliaza gi, Mahtan lé hkû;
Mahtan gi, Yakup lé hkû;

16 Yakup gi, Mariq é yhanglâng Yosep lé hku é nghut ri;
Mariq gi, Hkrisduq gâ é Yesuq lé hku é sù nghut ri.

17 Haù mù, Abraham é pyat mai Dawiq é pyat jé shoq gi, byùxik raxe myi xik; Dawiq pyat mai Babelon má shúm dut huí é hkûn jé shoq gi, byùxik raxe myi xik; shúm dut huí é hkûn mai Hkrisduq† é pyat jé shoq gi, byùxik raxe myi xik nghut ri.

Yesuq Hku Lé Lo É Hkyô

Luk 2:1-7

18 Yesuq Hkrisduq hku lé lo é hkyô gi, a-ô mâ é eq rajung za nghut ri: Yesuq é yhângnu Mariq gi, Yosep èq dúng tô é sù nghut ri; nghut kôlhang, yhangnhik a zùm shì má, yhang gi, Chyoiyúng Woi-nyí mai zogúng dut bê nghut ri.

19 Yhâng é yhumsing hpó Yosep gi, dingmán sù nghut lui, yhang lé byu pé hí má hoq a kâm lhoq hpu nau é yanmai, tsik za lhoq kâng pyám rà dà ri.

20 Nghut kôlhang, yhang haù su myit nyi é hkûn, yhupmoq má, haù Yhumsing é maumang lagyo gi, yhang lé, lé htoq shit lui, "Dawiq é yhangzo yhangshu Yosep é, haù nàng é yhumsing myhí Mariq lé hâng yù rà hkyô lé, hkâ-myit chiq; haí mù gâ le, yhang wun tô é zoshâng gùng gi, Chyoiyúng Woi-nyí dông lo é nghut lhê.

21 Yhang gi, yuqzo rayuq hkû rà nghut lui, nàng gi, zoshâng haù lé, Yesuq nghù mying myhíng byi ra rà nghut lhê; hkâsu mù gâ le, Yhang gi, Yhâng é byu pé lé, yhangmoq é yubak mara mai hkyi yù rà sù nghut lhê." ga taí ri.

22 Shí hkyô banshoq gi, Garai Gasâng èq, haù myiqhtoi dông taí é dang lé lhoq dik é nghut ri.

23 Myiqhtoi dang haù gi, "Haù zomyi gyíng gi, zogúng dut lui, yuqzo rayuq hkû rà nghut lhê; Yhâng é mying lé gi, Emanuelaq ga kó rà nghut lhê." gâ ri. Hau é lichyúm gi, "Garai Gasang gi, nga-nhúng eq rahá nghut nyi lhê." gâ é nghut lhê.

24 Yosep gi, yhup bûn lo é hkûn, haù Yhumsing é maumang lagyo taí é eq rajung za, Mariq lé, yhangmyi dông yhúm má shuí yù bê nghut ri.

25 Nghut kôlhang, yhang gi, yuqzo haù hku é hkûn jé shoq, Mariq eq gungsho a zùm nghut ri. Yuqzo haù lé, yhang gi, Yesuq ga myhíng byi ri.

2

Buihtoq Hkyam Má É Hpaqchyí Bò Bang

1 Herut hkohkâm up nyi é u lé, Yuda mau má é Betlehem và má Yesuq lé hku é nghut ri. Hau htâng, buihtoq hkyam má é hpaqchyí bò bang gi, Yerusalem và mó má jé lé kômù,

2 "Haù hku lé lô bê Yudaq byu pé é Hkohkâm gi, hkâmá nghut lhê lú? Yhâng é kyí lé, buihtoq hkyam má ngamoq myàng lui, Yhang lé noq rà matú jé lé é nghut lhê." ga lui, myí akò nghut ri.

† 1:17 Grik dong *Hkrisduq* gâ é gi, xù but hui Sù gâ é lichyúm nghut mù, Hebre dong *Mesaia* gâ é eq rajung za nghut lhê. ✨ 1:23 Esai 7:14

³ Herut hkohkâm gi, haú hkyô lé wó gyo jáng myit myô nyi ri; hau htoq agó, Yerusalem wà mó má é lhunglhâng bang le, myit myô bum akô nghut ri.

⁴ Haú mù luí, yang gi, byu pé é hkyangjong agyi pé eq tarâ sará pé banshoq lé, ji tsíng yù mù, haú Hkrisduq hkámá hku lé lô râ nghut é hkyô lé myí ri.

⁵ Haú hkûn, yangmoq gi, "Yuda mau Betlehem wà má nghut lhê. Hkâsu mù gà le, shí hkyô eq séng luí, haú myiqhtoi kâ tô é má,

⁶ Yudaq mau má é Betlehem wà ê, nàng gi, Yudaq mau má é wà pé má, je tiq sù a nghut;

hkâsu mù gà le, ngá é Israelaq byu pé lé upzúng râ Zau gi, náng chyáng mai htoq lô râ nghut lhê.*

ga bo tô ri." ga tù taí akô.

⁷ Hau htâng, Herut gi, haú hpaqchyí bò bang lé haq ji yù mù, kyí lé htoq shit é ahkyíng lé, yangmoq chyáng mai hkyak wó myí sê yù bê nghut ri.

⁸ Haú mù, yang gi, "Nungmoq, zoshâng haú lé rago ê ho wú keq. Ngò le, Yang lé ê wó noq râ matú, Yang lé nungmoq ê myâng eq yang, ngo lé lo shit kyo keq." ga taí luí, haú bang lé Betlehem wà shut nhang kat bê nghut ri.

⁹ Yangmoq gi, haú hkohkam é dang lé gyô yu é htâng má, htoq e ló bekô nghut ri. Haú buihtaq hkyam má yangmoq myang é kyí gi, haú zonú nyi é ahtaq ang ang má ló nô é jé shoq, yangmoq é hí má e ló byí ri.

¹⁰ Yangmoq gi, kyí haú lé myàng jáng, gyai yang gabú bum akô nghut ri.

¹¹ Yangmoq gi, haú yhùm má wang e ló kô é hkûn, zonú eq yhângnu Mariq lé myàng kômù, hkyihput htuq luí, haú zonú lé noqkuq akô; hau htâng, yangmoq é sutdek pé lé le hpóng luí, hîng, namngón jung loban eq mura* pé lé yù mù, Yang lé chyunghuq byí akô nghut ri.

¹² Yangmoq gi, Herut chyáng a dum taú ló râ matú, yhupmoq má, yangmoq lé sidiq byí é hui kômù, hkyô gó hkat đông yangmoq é mau shut taú ló bekô nghut ri.

Egutuaq Ming Shut Hpaq E É Hkyô

¹³ Yangmoq ló byuq é htâng má, haú Yhumsing é maumang lagyo rayuq gi, Yosep lé yhupmoq má htoq shit mù, "Toq aq! Haú zoshâng eq yhângnu lé, Egutuaq ming shut shuí hpaq é aq. Ngò, nang lé dum ji yu é ahkyíng jé shoq, haú má nyi nyi keq. Haí mù gà le, Herut gi, zoshâng haú lé sat râ matú, ho nyi bê nghut ri." ga taí ri.

¹⁴ Haú mù, yang gi, toq luí, myín lé yang, zôshang me lé shuí chùng mù, Egutuaq ming shut e ló bê nghut ri.

¹⁵ Yangmoq gi, Herut shí é jé shoq, haú má nyi nyi akô. Haú gi, "Ngá zo lé, ngò, Egutuaq ming mai wut htoq yù bê nghut lhê.* ga, haú Yhumsing èq myiqhtoi đông taí é dang lé lhoq dik é ru nghut lhê.

¹⁶ Herut gi, yang lé, hpaqchyí bò bâng èq mhaú pyâm tô é lé sé jáng, nhikmo-yo bê nghut ri; haú mù, yang gi, haú hpaqchyí bò bâng chyáng mai wó sê yu é ahkyíng lé sôn wú mù, Betlehem wà eq hau é awui ayâm má é wà pé má nyi é, í zân mai a-ô má é yuqzo pé banshoq lé, sat pyám nhang ri.

¹⁷ Haú gi,

"Ramaq gâ é jowò má, yón kuq é eq ngau garû é htê lé wó gyô ri;

* 2:6 Mihka 5:2 * 2:11 Mura gi, chí wó kut jung xù nghut lhê. * 2:15 Hos 11:1

Rahkelaq gi, yhang zô pé a nyi byuq lo kô é yanmai, ngau nyi é eq nhik a wó títg dut ri."[☆]

ga luí,

¹⁸ myiqhtoi Yeremiaq dông taí tô é dang lé lhoq dik é nghut ri.

Nazaret Wà Má Dum Taú Lo É Hkyô

¹⁹ Herut shi byuq é htâng, Egotuq ming má, haú Yhumsing é maumang lagyo gi, Yosep chyáng yhupmoq dông lé htoq shit mù,

²⁰ "Toq aq, haú zôshang me lé shuí chùng mù, Israelaq ming má taú ló aq; hkâsu mù gâ le, haú zoshâng lé sat naú bang shi byuq bekô nghut ri." ga taí ri.

²¹ Haú mù, Yosep gi, zôshang me lé shuí chùng mù, Israelaq ming shut taú ló bê nghut ri.

²² Nghut kôlhang, yhang gi, Yuda mau má, Arhkela-uq, yhângwa Herut é hkó má xoq up nyi é hkyô lé wó gyo jáng, haú má a wám ló lo nghut ri. Yhupmoq má sidiq byí é huí é eq rajung za, yhang gi, Galile mau shut e ló mù,

²³ Nazaret gâ é wà má ló nyi nyi bê nghut ri. Haú mù, "Yhang lé, Nazaret wà byù ga râ nghut lhê." ga luí, haú myiqhtoi pé dông taí tô é dang lé lhoq dik é nghut ri.

3

Wui-myhup Sará Yohan Shui Hen É Hkyô

Mrk 1:1-8; Luk 3:1-18; Yhn 1:19-28

¹ Haú yoq má, Wui-myhup Sará Yohan htoq lô mù, Yuda mau mâ é yoso má hko kyô é gi,

² "Myit lhíng keq; hkâsu mù gâ le, mauhkúng mingdán gi, chyâng lò bê* nghut ri." gâ ri.

³ Haú yuq gi,

"Haú yoso má, byù rayuq garú taí é htê gi,

'Haú Yhumsing é matú, hkyô hen to keq; Yhâng é matú, hkyô lhoq nyhang to keq.' gâ ri."[☆]

ga myiqhtoi Esai-aq taí tô é sú yuq nghut ri.

⁴ Yohan gi, gola-uq shomaú eq saí é mebu wut mù, yhâng é hpyidum má gi, shokuq hpyihit hit ri. Yhâng é zoshuq gi, dítgám eq yosô byo-í pé nghut ri.

⁵ Yerusalem wà mó mâ é bang, Yuda mau banshoq mâ é bang eq Yodan làng awai ayám lhunglháng má é bang gi, yhâng chyáng htoq e bum akô.

⁶ Yhangmoq gi, yhumsing é mara lé yin yú kôluí, yhâng chyáng mai Yodan làng má wui-myhup hkâm yu bum akô nghut ri.

⁷ Nghut kôlhang, yhang gi, yhang wui-myhup hkám byí é jang má, Hparishe pé eq Saduke pé myo myo lé lo nyi kô é lé myàng jáng, yhangmoq lé taí é gi, "Duq htân lhangmui amyû pé ê, jé lô râ yubak dam mai wó hpang lut kó sháng gaq ga, nungmoq lé ó yuq taí pún é lúh?"

⁸ Myit lhíng hkyô eq gingdán é ashi pé zui keq.

⁹ 'Ngamoq gi, Abraham é yhangzo yhangshú pé nghut lhê.' nghú luí, yhumsing é i-myt unghkaú má hkâlum to kó. Hkâsu mù gâ le, ngò, nungmoq lé taí kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê.

☆ 2:17 Yer 31:15 * 3:2 Mauhkúng mingdán gi, chyâng lò bê gâ é lichyúm gi, Garai up râ ahkýing chyâng lò bê gâ é nghut lhê. ☆ 3:3 Esai 40:3

¹⁰ Ahkuí lhang, Garai Gasang gi, Yhâng é wazung lé haû sikhâm wang pé má tô to bê nghut ri; haû mù, ge é ashi a zuí é agàm hkanmó lé gi, htuq lheng pyám mù, myi má dú kat pyám râ nghut lhê.

¹¹ Ngò gi, nungmoq myit lhang kó sháng gaq nghû, wui èq za wui-myhup hkám byi lhê. Nghut kôlhang, ngá htoq má wum-o a-tsam je bo é sù rayuq, ngá htâng má jé lé lô shirà nghut luí, ngò gi, Yhâng é hkyí-tsung chûng byi râ lhang a gingdân; Yhang gi, Chyoiyúng Woi-nyí má le, myi má le, nungmoq lé wui-myhup hkám byi râ nghut lhê.

¹² Yhang gi, loq má byò chung to mù, guq chyarâng má é guq bùm lé hik sân pyám luí, já é guq cham lé gi, guqchyí má tsing kat to mù, guqsôm lé kúm gi, hkâ-nhám le shi byuq a sê é myí èq nyhê hkyô pyám râ nghut lhê." gâ ri.

Yesuq, Wui-myhup Hkâm Yu É Hkyô

Mrk 1:9-11; Luk 3:21-22

¹³ Haû hkûn, Yesuq gi, Yohan chyáng wui-myhup hkâm yù râ ga, Galile mau mai Yodan làng má jé lé lo ri.

¹⁴ Nghut kôlhang, Yohan gi, "Ngò sheq Náng chyáng wui-myhup hkâm yù râ sù ru nghut lhê nhîng! Nàng sheq ngá chyáng lé lo lhê lhu?" ga luí, lhom taí hkûm ri.

¹⁵ Haû hkûn, Yesuq gi, "Dingmán hkyô banshoq lé, nga-nhúng lhoq dik râ é yanmai, Ngo lé wui-myhup hkám byi laq." ga tù taí ri. Haû mù, Yohan le, gyo byi bê nghut ri.

¹⁶ Yesuq gi, wui-myhup hkâm yù eq yhang, wui mai htoq lo ri. Haû hkûn, mauhkûng bóng lô mù, Garai Gasâng é Woi-nyí gi, hpûngkyui gunghkyâng sù é dòng mai, Yhâng ahtoq má lé gyó nô tô é lé, Yhang myang kat ri.

¹⁷ Haû hkûn, "Shí yuq gi, Ngò chyitdap é Ngá zo nghut lhê; Yhâng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

4

Yesuq, Gúnglaú Huí É Hkyô

Mrk 1:12-13; Luk 4:1-13

¹ Hau htâng má, Chyoiyúng Woi-nyí gi, Yesuq lé, nat Tsadán èq gunglaú é hui nhâng râ matú, yoso shut shuí è ri.

² Yesuq gi, zoshuq gám é myi xê nyí myi xê myìn jé jáng, zòmut hui bê nghut ri.

³ Haû hkûn, gunglaú sù gi, Yhâng chyáng lé mù, "Nàng, Garai Gasâng é Yhangzo nghut le gi, luqgok shí pé lé muk dut nhâng aq." ga taí ri.

⁴ Haû jáng, Yesuq gi, "Byù gi, muk èq za asak duí râ a nghut; Garai Gasâng é nhut mai htoq lo é mungdang hkanmó èq sheq asak duí râ nghut lhê."* ga luí, Chyúmdang má kê tô ri." ga yhang lé tù taí ri.

⁵ Haû hkûn, nat Tsadán gi, Yesuq lé, chyoiyúng myuq* má shuí è mù, noqquq yhum je myhang é shúhtâng htoq má yap nhang to luí,

⁶ "Nàng, Garai Gasâng é Yhangzo nghut le gi, byam gyó kat wú aq. Hkâsù mù gâ le,

'Náng é matú, Garai Gasang gi, Yhâng é maumang lagyó pé lé taí to râ nghut mù,

luqgok má Náng é hkyí a ló htung shoq, yhangmoq é loq èq Nang lé lhom bún yù kó râ nghut lhê.'*

* 4:4 Tarâ Pun 8:3 * 4:5 chyoiyúng myuq gi, Yerusalem lé gâ lhê. ✧ 4:6 Hkya-on 91:11-12

ga luí, Chyúmdang má kê tô ri." ga tai ri.

⁷ Nghut kôlhang, Yesuq gi, "Haú Yhumsing, nungmoq é Garai Gasang lé, wó chyam wú rà a nghut."* ga luí le, Chyúmdang má kê tô ri." ga, yhang lé tú tai ri.

⁸ Nat Tsadán gi, Yesuq lé, gyai yhang myhang é bùm htoq má shuí doq lô mù, mingkan má joq é mingdán pé banshoq eq haú pé é hkikhkâm hkyô lé tân shit ri.

⁹ Hau htâng, yhang gi, "Nàng hkyihput htuq mù, ngo lé noq é nghut jáng, shí pé banshoq, Nang lé ngo byi rà." ga, Yesuq lé tai ri.

¹⁰ Haú hkûn, Yesuq gi, "Tsadán nàng, ló byuq aq! Hkâsu mù gâ le, 'Haú Yhumsing nàng é Garai Gasang lé za, nàng noqkuq dojaú ra rà nghut lhê.'* ga luí, Chyúmdang má kê tô ri." ga, yhang lé tai ri.

¹¹ Haú mù, nat Tsadán gi, ló byuq bê nghut luí, maumang lagyô pé gi, Yesuq lé, lé dojaú nyi akô nghut ri.

Yesuq Mungdang Hko Hi Lô É Hkyô
Mrk 1:14-15; Luk 4:14-15

¹² Yesuq gi, Wui-myhup Sará Yohan htóng gyô é hkyô lé wó gyo jáng, Galile mau shut dum taú lô bê nghut ri.

¹³ Yhang gi, Nazaret wà mai htoq lô mù, Zebulun eq Nahtali mau má é nhông yàm má joq é Kaperna-um wà má lô nyi nyi ri.

¹⁴ Haú gi, myiqhtoi Esai-aq laiká má,

¹⁵ "Zebulun mau eq Nahtali mau, wuimau má é hkyô, Yodan làng yàm, túngbaù pé nyi é Galile mau é,

¹⁶ mauchut hkaú má nyi nyi é bang, maubó mó lé myàng bê nghut ri; shí wup hkaú má nyi to bâng é matú, maubó lô bê nghut ri."*

ga kê tô é dang lé lhoq dik rà matú nghut ri.

¹⁷ Haú hkûn mai, Yesuq gi, "Myit lhing keq! Mauhkûng mingdán gi, chyâng lô bê nghut ri." ga, mungdang hko hi e lô bê nghut ri.

Yesuq É Chángzo Hí Dut Bang

¹⁸ Yesuq gi, Galile nhông yàm má hkyô sô wún é hkûn, Petruq gâ é Simun eq yhanggu Yohan nhiktâng lé myang ri. Yhangnhik tâng gi, ngozo kóng zo su nhik nghut mù luí, nhông má gùn dú nyi akô nghut ri.

¹⁹ Haú mù, Yhang gi, haú nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng rà nghut lhê." ga tai ri.

²⁰ Haú hkûn, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.

²¹ Yesuq gi, jowò haú mai xoq sô e lô le, Zebedi é yhangzo, Yakuq eq yhanggu Yohan nhiktâng lé myang ri. Yhangnhik gi, yhangnhik é yhângwa Zebedi eq rahá, lhai hkaú má gùn hpo nyi akô. Yhangnhik lé, Yesuq wut kat jáng,

²² yhangnhik gi, radá dâm, yhangnhik é yhângwa eq lhai haú lé, tô pyâm to kôluí Yesuq htâng cháng bekô nghut ri.

Nò Bang Lé, Yesuq Lhoq Gê Byí É Hkyô
Luk 6:17-19

²³ Yesuq gi, Galile mau ramau gón má htoq ê mù, tarajong pé má, mhoqshit luí, mauhkûng mingdán eq sêng é gabú danglù lé, hko kyo uchyang, byu pé

chyang mâ é nòhpyo ajung jung hui bang eq noli nojàng amyú myú dap bang lé, lhoq gê byí wún ri.

²⁴ Yesuq eq sêng é hkyô ludang gi, Suriq ramau gón má byo myín ló mù, byu pé gi, awáng nòhpyo ajung jung huí é bang, hkê-nhò jamjaû nyi é bang, nat gang wang jung é bang, mhúngtuq tuq é bang, gùngium shi é bang lé, shuí lé lô kôluí, Yhang gi, haú bang lé lhoq gê byí ri.

²⁵ Galile mau, Dekapoli,[†] Yerusalem, Yuda mau eq, Yodan làng tú tap mâ é byù moq mó gi, Yesuq htàng châng bum akò nghut ri.

5

Hkungsô Wó É Tará

Luk 6:20-23

¹ Yesuq gi, byù moq mó lé myàng jáng, bùm má doq ló luí, ló zung tô ri. Haú hkún, Yhàng é chángzô pé gi, Yhàng chyang lé lô kôjáng,

² Yhang nhut hkum hpóng luí, yhangmoq lé mhoqshit é gi:

³ "Woi-nyí má, asho awui dut é bang gi, hkungsô wó nyi ri; hkâsu mù gà le, mauhkúng mingdán gi, yhangmoq é mingdán nghut nyi ri.

⁴ Myit iyon huí é bang gi, hkungsô wó nyi ri; hkâsu mù gà le, yhangmoq gi, nhik lhoq ting é hui kó rà nghut lhê.

⁵ I-myt nú-nhâm é bang gi, hkungsô wó nyi ri; hkâsu mù gà le, yhangmoq gi, mingkan lé wó sng kó rà nghut lhê.

⁶ Dingmán hkyô lé mut shit nyi é bang gi, hkungsô wó nyi ri; hkâsu mù gà le, yhangmoq gi, nhik dik shoq myàng zo kó rà nghut lhê.

⁷ Shogyo nhikmyin myit bo é bang gi, hkungsô wó nyi ri; hkâsu mù gà le, yhangmoq gi, shogyo nhikmyin yu é hui kó rà nghut lhê.

⁸ Myit sansêng é bang gi, hkungsô wó nyi ri; hkâsu mù gà le, yhangmoq gi, Garai Gasang lé myàng kó rà nghut lhê.

⁹ Nguingón hkyô sô xoq byí é bang gi, hkungsô wó nyi ri; hkâsu mù gà le, yhangmoq gi, Garai Gasang é yhangzô pé gà é hui kó rà nghut lhê.

¹⁰ Dingmán hkyo é yanmai zing-ri huí é bang gi, hkungsô wó nyi ri; hkâsu mù gà le, mauhkúng mingdán gi, yhangmoq é nghut nyi ri.

¹¹ Ngá é yanmai, byu pé eq, nungmoq lé rhoi é, zing-rí é, a teng a mán é dng agè ashop é dang amyú myú tái tso kô é hkún, nungmoq hkungsô wó nyi ri.

¹² Nguingón gabú nyí keq, hkâsu mù gà le, nungmoq é matú kô é chyunghuq gi, mauhkúng mingdán má joq tô ri. Nungmoq é hí lhê é myiqhtoí pé lé le, yhangmoq gi, haú dng zing-rí lai lo wú bekô nghut ri.

Xo Eq Maubó

Mrk 9:50; Luk 14:34-35

¹³ Nungmoq gi, myidàm htoq mâ é xo nghut nyi lhê. Nghut kôlhang, xo gi, màn kân byuq jáng, haú lé hai eq dum wó lhoq ngam yù rà lúhú? Shinggan shut dú pyám mù, byu pé eq nâng pyeq pyâm é mai lai luí, hai akyú le bò rà a nghut lo.

¹⁴ Nungmoq gi, mingkân é maubó nghut akô; bùm htoq mâ é myuq lé gi, wó nghop to rà a nghut.

¹⁵ Myibung lé tap mù, mung eq nghop tô é ó a kut wú kó; haú su kut rà malaí, yhúmhaú má lúng tô é bang yuq hkangmó myoq wó myâng rà matú, tsungjang má kúm tsung to rà nghut lhê.

[†] 4:25 Dekapoli gà é gi, Grik dng myuq raxé lé gà lhê.

16 Haù eq rajung za, byu pé gi, nungmoq é ge é muzó pé lé byu-myàng luí, mauhkúng htoq mã é nungmoq é Íwa lé hkya-on kó sháng gaq, nungmoq é maubó lé yhangmoq é hí má duq nhang to keq.

Tarâ Lhoq Dik É Hkyô

17 Ngò gi, myiqhtoi pé é dang eq jep é tarâ lé lhoq hpyoq pyám rà matú, jé lé é nghut nhô hkâ-ngâm kó; haù pé lé lhoq dik rà matú sheq jé lé é ru nghut lhê.

18 Ngò, nungmoq lé teng za tái kôlé, mauhkúng eq myigùng byuq byuq le lhang, haù pé a ban lhoq dik dik gi, jep é tarâ mã é tiq dik é dangjí eq myihkyet zo ralhun lhang byuq byuq rà a nghut.

19 Jep é tarâ shí pé mã é tiq dik é dang rahkun lé lu lai luí, góbang lé le, haù su kut rà matú mhoq byí é sù ó yuq nghut kôle, mauhkúng mingdán má tiq dik sù gâ é hui rà nghut lhê; nghut kôlhang, jep é tarâ shí pé lé châng kut luí, mhoq byí sù kúm gi, mauhkúng mingdán má, hkik sù gâ é hui rà nghut lhê.

20 Ngò, nungmoq lé tái kôlé, nungmoq dingmán é hkyô má, haù Hparishe pé eq tarâ sará pé dingmán é htoq je a gyaù le gi, mauhkúng mingdán má, nungmoq wó wâng kó rà a nghut.

Byù Hkâsat

21 'Byù hkâsat, ☆ sat é sù gi, jéyáng é hui rà nghut lhê' ga, hí hpyang lhê é bang lé tái tô é dang, nungmoq wó gyô wú bê nghut lhê.

22 Nghut kôlhang, Ngò, nungmoq lé tái kôlé, gumang rayuq yuq lé nhikjum yô é sù gi, jéyáng é hui rà nghut lhê. Hau htoq agó, gumang hpó lé, 'Byù gang'* ga tái é sù gi, Yudaq byin tú wapdoq má jéyáng é hui rà nghut lhê; 'Byù bam ê' ga wut é sù gi, ngaraí myi eq gingdán nyi ri.

23 Haù mù, hkungga gyap mã, nàng hkungga nhông rà dâ é hkùn, náng é gumang rayuq yuq, nang lé mara hun é hkyô rajung jung joq é lé, myit bún kat é nghut jáng,

24 náng é hkungga lé, haù hkungga gyap hí má tô pyâm to mù, náng é gumang hpó haù yuq eq hí nguingón hkyô ló yù luí sheq, hkungga lé nhông byi aq.

25 Nang lé yui tsuq sù gi, nang lé tarâ rùng mã dé e ló é hkùn, hkyô mã ru nghut nyi ashí u lé, yhang eq nguingón hkyô hí hân yù aq. Haù a nghut jáng, haù yuq gi, nang lé, tarâ agyi chyáng é ap pyám mù, haù tarâ agyi gi, nang lé htóng hkyô pyám rà matú, htóng suwún hpó é loq mã ap pyám rà nghut lhê.

26 Ngò, nang lé teng za tái lé, yuichyín haù a ban xap xap gi, htóng haù mai nàng wó htoq ló rà a nghut.

Su-myi Sulàng Lú É Hkyô Eq Séng Luí Mhoqshit É Dang

27 'Su-myi sulàng hkâlú'* gâ é dang lé, nungmoq wó gyo wú bê nghut lhê.

28 Nghut kôle, Ngò, nungmoq lé tái kôlé, myiwe rayuq lé shut nau é myit èq wú é sù gi, yhâng é myit hkaù mã, myiwe haù yuq eq su-myi sulàng lú hkyô kut é sù nghut bê.

29 Haù mù, náng é loqyo myoq èq, nang lé mara kut shut nhang é nghut le gi, haù lé lap choq yù mù, dú pyám aq. Hkâsu mù gâ le, náng é ragùngdu gón ngaraí ming gyó rà htoq mã, náng é gungsho rajung jung za htên byuq é nghut le gi, náng é matú je ge ri.

☆ 5:21 Htoq Ló 20:13 * 5:22 Byù gang gâ é lé, Grik đông "Raka" gâ lhê. ☆ 5:27 Htoq Ló 20:14

³⁰ Haù eq rajung za, náng é loqyo loq èq, nang lé mara kut shut nhang é nghut le gi, haù lé hpyit yú mù, dù pyám aq. Hkâsu mù gà le, náng é ragùngdu gôn ngaraí ming gyó râ htoq má, náng é gungsho rajung jung za htên byuq é nghut le gi, náng é matú je ge ri.

Myi Làng Gâng É Hkyô Eq Séng Luí Mhoqshit É Hkyô
Mht 19:9; Mrk 10:11-12; Luk 16:18

³¹ Yhumsing é yhangmyi lé kâng é sù gi, lhoq kang laiká byi râ dut lhê. ✱ gà é dang joq lhê.

³² Nghut kôlhang, Ngò, nungmoq lé taí kôlé, myiwe đông mai làng shut é a nghut é za, yhumsing é yhangmyi lé kâng é sù gi, myiwe haù lé sulàng lú sù dut nhâng bê nghut ri; hau htoq agó, yhumsing yhanglàng eq gang bê myiwe lé hâng yu é sù le, su-myi lú é sù dut bê nghut ri.

Danggidiq

³³ Hau htoq agó, 'Danggidiq a zùng hkâmú; Yhumsing lé byi tô é danggidiq eq rajung za cháng aq.' ga luí, hí hpyang lhê é bang lé, taí tô é dang lé nungmoq wó gyô wú bê nghut lhê.

³⁴ Nghut kôlhang, Ngò, nungmoq lé taí kôlé, hai èq le hkâdakâm kó: mauhkùng lé lang luí le, hkâdakâm kó; hkâsu mù gà le, haù gi, Garaí Gasâng é zùng tanghkuq nghut lhê;

³⁵ myigùng lé lang luí le, hkâdakâm kó; hkâsu mù gà le, haù gi, Garaí é hkyí nang jang nghut lhê; Yerusalem lé lang luí le, hkâdakâm kó; hkâsu mù gà le, haù gi, Hkohkâm mó é myuq nghut lhê.

³⁶ Hau htoq agó, yhumsing é ulhùm èq le, hkâdakâm kó; hkâsu mù gà le, xâm rahkat lé lhang hpyú shoq noq shoq, nang wó kut é a nghut.

³⁷ Náng é dang lé, 'nghut lhê' lé gi, 'nghut lhê' nghú, 'a nghut é' lé gi, 'a nghut' nghú, taí aq; haù mai lai é gi, haù agé ashop su chyáng mã é nghut ri.

Lató Hpuq É Hkyô
Luk 6:29-30

³⁸ Myoqjí matú myoqjí xap, zui matú zui xap ✱ gà é dang lé, nungmoq wó gyô wú bê nghut lhê.

³⁹ Nghut kôlhang, Ngò, nungmoq lé taí kôlé, agé ashop kut é sù lé lató hkâhpuq. Náng é loqyo bowâm má pyuq byi sù lé, loqpaí hkyam le hkâm byi shi aq.

⁴⁰ Byù rayuq yuq, nang lé mara tsuq mù, náng é buzo lé yu pyám byi é nghut jáng, bumó lé le, hkyut byi shi aq.

⁴¹ Byù rayuq yuq, nang lé zik mù, radéng é nhâng jáng, yhang eq rahá í déng châng é byi aq.

⁴² Nang lé dung sù lé, byi aq; náng chyáng mai chyí naù sù lé le, nunghtáng hkâlhik pyám.

Gyè Lé Chyitdap Râ É Hkyô
Luk 6:27-28, 32-36

⁴³ Náng é chyangnâm mã é bang lé gi, chyitdap mù, náng é gyè lé gi, a jú kut aq ✱ gà é dang lé, nungmoq wó gyô wú bê nghut lhê.

⁴⁴ Nghut kôlhang, Ngò, nungmoq lé tái kôlé, nungmoq gi, mauhkûng htoq mâ é nungmoq é Íwâ é yhangzô pé wó dut kó sháng gaq, nungmoq é gye pé lé chyttdap mù, nungmoq lé zing-ri bâng é matú kyûdung byi keq;

⁴⁵ hkâsu mù gâ le, Yhang gi, agê ashop bâng é ahtoq má le, gè bâng é ahtoq má le, bui tsô byi nhâng mù, dingmán bâng é ahtoq má le, a dingmán bâng é ahtoq má le, mau wô byi nhâng Sû nghut ri.

⁴⁶ Nungmoq lé chyttdap é bang lé za chyttdap kô le gi, nungmoq é matú hai chyunghuq wó kó râ lúhú? Kang guq bang lhang, haú su kut lhê a nghut kó lúhú?

⁴⁷ Hau htoq agó, nungmoq é gumang wui lé za shi-kyám kô le gi, nungmoq kut é muzó gi, góbâng htoq má hai wá laklai râ lúhú? Tungbaù pé lhang haú su kut lhê a nghut kó lúhú?

⁴⁸ Haú mù, mauhkûng htoq mâ é nungmoq é Íwa gumjup é su, nungmoq le gumjup nyi keq.

6

Alu Byi É Hkyô

¹ Nungmoq dingmán é hkyô lé, byu pé myàng sháng gaq nghû, byu pé hí má a kut shit loshoq, sidiq nyi keq. Haú su kut é nghut jáng, mauhkûng htoq mâ é nungmoq é Íwâ chyáng mai, chyunghuq wó yú kó râ a nghut.

² Haú mù, haú gegùn labyoq kut bang gi, byu pé èq shigyau é hui sháng gaq ga, tarajong pé hká, hkyô pé hká kut é su, nang gi, alu byi é hkûn, tut htê su hkálhoq htoq. Ngò, nungmoq lé teng za tái kôlé, haú bang gi, yhangmoq é chyunghuq lé hkùm shoq wó yú bekô nghut lhê.

³ Ra châ to bang lé nang alu byi é hkûn, náng é loqyo loq kut é hkyô lé, loqpai loq lé lhang hkâsé nhâng.

⁴ Haú hkûn, nang alu byi é lé, ó a châng sé râ nghut lhê. Haú jáng sheq, ó a sé loshoq kut é hkyô lé myang é sù, náng é Íwa gi, nang lé chyunghuq shigyau râ nghut lhê.

Kyûdung É Hkyô

Luk 11:2-4

⁵ Nungmoq kyûdung le, gegùn labyoq kut bang su hkâkut kó; hkâsu mù gâ le, yhangmoq gi, byu pé byu-myàng shoq ga, tarajong pé eq hkyô kang pé má yap mù, kyûdung râ ô nau akò. Ngò, nungmoq lé teng za tái kôlé, haú bang gi, yhangmoq é chyunghuq lé wó yú bekô nghut ri.

⁶ Nghut kôlhang, nang kyûdung le, náng é gok hkaú má wang ló mù, hkum myhî pyám luí, a byu-myang é náng é Íwâ chyáng dung aq. Haú jáng, ó a byu-myang é lé myàng sù, náng é Íwa gi, nang lé jeju dum tau byi râ nghut lhê.

⁷ Haú mù, kyûdung le, tungbaù pé su kut luí, dang puq hkâhtau kó; hkâsu mù gâ le, yhangmoq gi, dang hng chín luí dung jáng sheq, gyo byi nhô ngam akò nghut ri.

⁸ Haú bang su hkâkut kó; hkâsu mù gâ le, nungmoq é Íwa gi, nungmoq rá é hkyô lé, nungmoq a dung shi mai sé to Sû nghut lhê.

⁹ Haú mù, nungmoq kyûdung le,

'Mauhkûng htoq tsáng myhâng mâ é ngamoq é Âwa ê,
Náng é mying gi, chyoiyúng nyi sháng gaq,

¹⁰ Náng é mingdán jé lô sháng gaq,

Nàng ô nau é hkyô, mauhkûng htoq má dik é su, myigùng htoq má le dik sháng gaq ô.

¹¹ Ngamoq nyí wuî râ é zoshuq lé, ngamoq lé hkû-nyí byi laq.

¹² Ngamoq lé shut é bâng é mara lé ngamoq hkyut pyám byí é su, ngamoq é mara lé le hkyut pyám byi laq.

¹³ Ngamoq lé, agúng alaú hkyô má a wàng nhang é za, agè ashop jang mai hkyi yù laq ô.

(Hkâsu mù gà le, kô dik é up sîng hkyô, a-tsam eq hpungwup shingkang gi, pyat dedu ahtum abyuq Náng chyáng ru joq nyi ri ô! Amen.)^{*}
nghû dung keq.

¹⁴ Supè èq, nungmoq lé kut shut é mara lé, nungmoq hkyut pyám byí é nghut le gi, mauhkûng htoq má é nungmoq é Íwa le, nungmoq lé mara hkyut pyám byi râ nghut lhê.

¹⁵ Nghut kôlhâng, haú bâng é mara lé, nungmoq a hkyut pyám byí é nghut le gi, nungmoq é Íwa le, nungmoq é mara lé hkyut pyám byi râ a nghut.

Zoshuq Gám É Hkyô

¹⁶ Nungmoq gi, zoshuq gám é hkûn, gegùn labyoq kut bang su myoqdong hkâlhoq nyhui kó; hkâsu mù gà le, haú bang gi, yhangmoq zoshuq gám é hkyô lé, tún shit râ matú myoqdong lhoq nyhui shit akò nghut ri. Ngò, nungmoq lé teng za taí kôlé, haú bang gi, yhangmoq é chyunghuq wó yù bekò nghut ri.

¹⁷ Nungmoq kúm gi, zoshuq gám é hkûn, nungmoq zoshuq gám é hkyô lé, byu pè hí má de de a dut é za, nungmoq a byu-myang é Íwa za myàng sháng gaq, myoq chî pyám luí, u xû but keq;

¹⁸ haú jáng sheq, ó a sé loshoq kut é hkyô lé myang é Sù, nungmoq é Íwa gi, nungmoq lé chyunghuq shigyaú râ nghut lhê.

Mauhkûng Htoq Mâ É Sutzè

Luk 12:33-34

¹⁹ Jângkon, jogyik èq wó lhoq htên pyâm é eq hkaú su èq le wó wang hkaú yu pyám byí é myigùng htoq má, nungmoq é matú, sutzè lé hkâhkong to kó.

²⁰ Jângkon, jogyik èq le a wó lhoq htên pyâm é eq, hkaú su èq le a wó wang hkaú yu pyám byí é mauhkûng htoq má sheq, nungmoq é matú sutzè hkong to keq.

²¹ Hkâsu mù gà le, náng é sutzè joq jang má, náng é i-myt le jé nyi râ nghut lhê.

²² Myoqjí gi, gungdû é myibung nghut nyi ri. Náng é myoqjí ge é nghut le gi, náng é gungdu gón má maubó byíng muí to râ nghut lhê.

²³ Nghut kôlhâng, náng é myoqjí a ge é nghut le gi, náng é gungdu gón gi, mauchut tuq dut nyi râ nghut lhê. Náng chyáng bo é maubó gi, mauchut byuq é nghut jáng, mauchut haú gi, hkâ-í yhang htû râ lhâ!

²⁴ Ó yuq nghut kôle, yhumsîng í yuq lé wó dojaú râ a nghut. Hkâsu mù gà le, yhang gi, rayuq lé a jú kut mù, rayuq lé gi, chyítap râ nghut lhê; haú a nghut jáng, rayuq lé lhumzui mù, rayuq lé gi, hpau a tap kut râ nghut lhê. Nungmoq gi, Garaí Gasang lé le, ngunzè lé le, radá dâm wó dojaú kó râ a nghut.

Hkâ-myt Chiq Kó

Luk 12:22-31

^{*} 6:13 Chyúmlaík ra-am má, shí túm a bo é nghut lhê.

²⁵ Haû mù luí, Ngò, nungmoq lé tai kôlé, nungmoq é asak matú haí zo haí shuq râ eq nungmoq é gungdú matú haí wut haí tsang râ lé, hkâ-myt chiq kó. Asak gi, zoshuq htoq má, gungdu gi, mebú htoq má, je ahkyak lhê a nghut kó lúh?

²⁶ Maulat má é nghoqzô pé lé wú wú keq; yhangmoq gi, kyô hkyó kyô shu a kut é htoq agó, chyí pé má le haí a tsing kat to kô é nghut le lhang, mauhkung htoq má é nungmoq é Iwa gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpaudap nyi lhê a nghut kó lúh?

²⁷ Nungmoq má, ó yuq wá, myit chiq é èq, yhumsing é asak lé radung kô wó jat yù kó râ lúh?

²⁸ Haû nghut le nhing, haí mù, mebú matú myit chiq akô lúh? Myigùng má yuq tô é htutbó ban pé hkâsu kut kô lo é lé, myit wú keq. Haú pé gi, mù le a zui, hkying le a dui kó nghut ri.

²⁹ Nghut kôlhang, Ngò, nungmoq lé tai kyo kôlé, hkôhkâm Sholumon hpung kô dik u lé wut é mebu lhang, ban haú rabó lé a hkyit nghut ri.

³⁰ Lumjing myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lhang, Garai Gasang haú su kut hut é nghut le gi, nungmoq lé je riyhang hut râ a nghut kó lúh?

³¹ Haû mù, 'Haí zo râ lhi?' 'Haí shuq râ lhi?' 'Haí wut râ lhi?' nghú hkâ-myt chiq myhing kó.

³² Tungbaù pé kúm gi, haú pé banshoq lé châng hkat ho nyi akô; nghut kôlhang, mauhkung htoq má é nungmoq é Iwa gi, haú pé lé nungmoq râ é hkyô, sé byí nyi lhê.

³³ Nghut kôlhang, Yhâng é mingdán eq dingmán hkyô lé hí hô keq, haú jáng, haú pé banshoq, nungmoq lé puq byi râ nghut lhê.

³⁴ Haû mù, napmá lhê é matú hkâ-myt chiq kó; hkâsu mù gâ le, napmá gi, yhâng é yhang myit chiq râ nghut lhê. Hkû-nyí é wuñke hkyô gi, hkû-nyí é matú gé bê nghut ri.

7

A Jéyáng Râ Hkyô

Luk 6:37-38, 41-42

¹ Nungmoq jéyáng é a hui kó sháng gaq, ó lé le, hkâjéyáng kó.

² Hkâsu mù gâ le, nungmoq jéyáng é su, nungmoq le, jéyáng é hui kó râ nghut é htoq agó, nungmoq lik byí é bung èq, nungmoq lé dum lik byi râ nghut lhê.

³ Yhumsing myoq hkaú má lúng tô é siktúm lé lhang a myit wú é nhing, haí mù luí, nunggu nungmâng é myoqwàng lé myang lhê lúh?

⁴ Yhumsing é myoq má siktúm lhung to luí nhing, 'Náng myoq má lúng tô é myoqwàng lé, ngò choq pyám byi lé.' nghú luí, náng é gumang hpó lé hkâsu wó tai râ lúh?

⁵ Gegùn labyoq kut sù ê, náng é myoq má lúng tô é siktúm lé hí choq pyám aq. Haú jáng sheq, nunggu nungmâng é myoq má wang tô é myoqwàng choq pyám byi râ matú, nàng san za myàng râ nghut lhê.

⁶ Hkuí pé lé, yunglô é zê hkâbyi kó; waq pé hí má, nungmoq é palhé wuizo lé hkâdú byi kó. Haú su kut jáng, haú bang gi, zè haú pé lé náng pyeq pyám mù, nungmoq lé dum taù ngat lò râ nghut lhê.

*Dung Keq, Hô Keq, Hkum Má Kok Keq**Luk 11:9-13*

⁷ Dung keq, haû jáng, nungmoq lé byi râ nghut lhê; hô keq, haû jáng, nungmoq myàng kó râ nghut lhê; hkum má kok keq, haû jáng, nungmoq lé hpóng byi râ nghut lhê.

⁸ Hkâsu mù gâ le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

⁹ Nungmoq má, ó yuq wá, yhumsing yhangzo muk dúng le, luqgok byi kó râ lúh?

¹⁰ Ngozo dúng le, lhangmui* byi kó râ lúh?

¹¹ Agê ashop é bang nungmoq lhang gi, nungmoq é zo wuí lé, ge é chynghuq dat byi kô le nhing, mauhkúng htoq tsáng myhàng mã é nungmoq é lwa gi, Yhang lé dúng é bang lé, je riyhang ge é chynghuq byi râ nghut lhê!

¹² Haû mù, hai hkyô má nghut kôlhang, nungmoq gi, yhumsing ô nau é dông supé lé kut nhàng nau é su, yhangmoq lé le kut byi keq. Hai mù gâ le, haû gi, jep é tará eq myiqhtoi pé é dang lo jup tô é nghut ri.

*Chyap É Hkúmdong Eq Lam É Hkúmdong**Luk 13:24*

¹³ Chyap é hkúmdong mai wàng keq. Hkâsu mù gâ le, lam é hkúmdong eq hkyô mó gi, htên byoq hkyô shut shuí é é nghut mù luí, haû dông wàng bang gi, myô akô nghut ri.

¹⁴ Chyap é hkúmdong eq hkyô zo kúm gi, asak hkyô shut shuí é é nghut mù luí, haû lé myang ho é bang gi, shaû akô nghut ri.

*Agàm Eq Ashi**Luk 6:43-45*

¹⁵ Nungmoq chyáng jé lé lo é myiqhtoi pyoq pé lé, sidiq nyi keq; yhangmoq gi, sau-kuq wut mù, nungmoq chyáng jé lé kôlhang, myaq zo myaq shuq nau é wamhkuí pé nghut akô.

¹⁶ Yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê. Zubyp mai tsibiyiq shi, zugâm mai maihpáng-shi wó yu wú akô lúh?

¹⁷ Ge é agàm gi, ge é ashi zui mù, a ge é agàm gi, a ge é ashi za dat zui ri.

¹⁸ Ge é agàm gi, a ge é ashi a wó zui, a ge é agàm le, ge é ashi a wó zui nghut ri.

¹⁹ Ge é ashi a zui é shigâm hkangmó lé gi, htuq pyám mù, myi má dú kat pyám râ nghut lhê.

²⁰ Haû mù, yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê.

²¹ Ngo lé, 'Yhumsing ê, Yhumsing ê,' ga, wut é bang yuq hkangmó gi, mauhkúng mingdán mã myang wàng kó râ a nghut; haû mauhkúng htoq mã é Ngá Wa ô nau é dông kut sù za sheq, myang wàng râ nghut lhê.

²² Haû buinyi má, byù myo myo gi, 'Yhumsing ê, Yhumsing ê, Náng é mying mai, ngamoq gi, myiqhtoi le htoi bê; nat gang lé hkat htoq bê; laklai kumlhá ajung jung lé, kut bê a nghut lúh?' ga luí, Ngo lé myi kó râ nghut lhê.

²³ Haû hkún, Ngò gi, 'Nungmoq lé, Ngò hkâ-nhám le a sé; agê ashop hkyô kut é bang nungmoq, Ngá chyáng mai gâng ló byuq keq.' nghú, yhangmoq lé san za tù tai kat râ nghut lhê.

* **7:10** Garai Gasang gi, lhangmui a zo râ matú, Yudaq byu pé lé hkunmó hkyô tô é nghut lhê.

*Hpaqchyî Bò Sû Eq Ngok Sû**Luk 6:47-49*

²⁴ Haû mù, Ngá é dang shí pé lé wó gyô yù luí, châng kut é sù gi, hpaqchyî bò mù, lunghtân htoq má, yhùm sai é sù eq wuî nyi ri.

²⁵ Mau wô, wuî je, laidun lò mù, yhùm haú lé lo htung kôlhang, yhùm haú gi, a htên byoq byuq râ nghut lhê; hkâsu mù gà le, yhùm haú gi, lunghtân htoq má tsuq tô é yanmai nghut ri.

²⁶ Nghut kôlhang, Ngá é dang lé, wó gyô yù mù, a châng sù gi, semuî-jàng má, yhùm sai é byù ngok eq wuî nyi râ nghut lhê.

²⁷ Mau wô, wuî je, laidun wò yup dut lò mù, yhùm haú lé lo htung jáng, yù whuî a mù loshoq htên byoq byuq râ nghut lhê." gà ri.

²⁸ Yesuq mungdang ban tai é hkûn, shiwa byu pé gi, Yhang mhoqshit é hkyô lé maúhong bum akó;

²⁹ hkâsu mù gà le, Yhang gi, yhangmoq é tarâ sará pé eq a pung é za, ahkáng ayá wó sù rayuq su, mhoqshit é yanmai nghut ri.

8*Manggâm Dap É Byù Rayuq**Mrk 1:40-45; Luk 5:12-16*

¹ Yesuq gi, bùm htoq mai gyó lo é hkûn, byù moq mó gi, Yhâng htâng châng bum akó nghut ri.

² Haú hkûn, manggâm dap é byù rayuq gi, Yhâng é hí má, lé mù, hkyihput htuoq luí, "Yhumsing ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga tai ri.

³ Yesuq gi, loq lhâm kat mù, haú yuq lé é záng luí, "Ngò dóng lhê, sân-yúng aq hkoi." ga tai kat ri. Haú hkûn jáng, haú yuq é manggâm gi, ge byuq bê nghut ri.

⁴ Haú hkûn, Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tún shit mù, yhangmoq é matú saksé dut sháng gaq, Mosheq tai tô é eq rajung za, hkungga ló nhông byi aq." ga haú yuq lé tai kat ri.

*Gyezau Hpô É Lumjîng Myit**Luk 7:1-10; Yhn 4:43-54*

⁵ Yesuq, Kaperna-um wà má wang e ló le, Romaq gyezau hpó rayuq gi, Yhâng chyáng lé jé mù,

⁶ "Yhumsing ê, ngá é dui-nhâng zoshâng gi, gùngium shi é htoq agó, yhùm má gyaí no jamjaù leq tô ri." ga garúm lé dung ri.

⁷ Haú hkûn, Yesuq gi, yhang lé, "Ngò, lé lhoq gê byi râ." ga tai kat ri.

⁸ Gyezau hpó haú, Yhang lé dum tú tai é gi, "Yhumsing ê, Nàng, ngá é laishîn-htâng má, lé nang râ lhâng ngò má a gingdán. Nàng, dang rahkun za tai kat laq; haú hkûn, ngá é dui-nhâng zoshâng ge ló râ nghut lhê.

⁹ Hkâsu mù gà le, ngò le ahkáng ayá wó é zau rayuq é a-ô mâ é zau nghut lhê; ngá é a-ô má le gyezô pé nyi lhê; rayuq lé, 'Ê aq!' nghu le, yhang e ló lhê; góyuq lé, 'Lò aq!' nghu le, yhang lo lhê; ngá jùn lé le, 'Shí kut aq!' nghu le, yhang kut lhê." gà ri.

¹⁰ Yesuq gi, dang haú lé wó gyo jáng, mau byuq luí, Yhâng htâng cháng bang lé, "Ngò, nungmoq lé teng za tai kôlé, Israelaq amyù má lháng, shí í lumjîng é sù lé, Ngò, rayuq lé le a myàng wú é nghut lhê.

11 Ngò, nungmoq lé tái kôlê, buihuoq buiwàng hkyam mâ é byu pé myo myo gi, mauhkông mingdán má, Abraham, Isak, Yakup pé eq rahá, zoshuq poi mó má myang zùng kó rã nghut lhê.

12 Nghut kôlhang, mingdán haú má wàng âng é bang kúm gi, shinggan mauchut hkaú shut dú pyám é hui lui, haú jowò má ngaubi nguà nhap eq zui kyik kyik shoq hpuzò nyi bùm bekò rã nghut lhê." ga tái ri.

13 Hau htâng, Yesuq gi, gyezau lé, "Ló aq hkoi! Nàng lumjìng é eq rajung za, dut rã nghut lhê." ga tái ri. Haú-u má yhang, haú dui-nhâng zoshâng gi, ge byuq bê nghut ri.

Byù Myo Myo Lé Lhoq Gê Byí É Hkyô

Mrk 1:29-34; Luk 4:38-41

14 Yesuq gi, Petruq é yhùm má jé wang e é hkùn, Petruq é yhâng-aumó gyai yhang no leq tô é lé, ê myang ri.

15 Yesuq gi, yhâng é loq má é záng kat é hkùn, Petruq yhâng-aumó gi, nõhpyo ge byuq mù, toq lui, Yhang lé wó gáí tso gáí huq bê nghut ri.

16 Myinhâng mauchut lô jáng, nat gang wang júng nyi é bang myo myo lé, Yhâng chyáng shui lé lo akô. Yhang gi, agê ashop é nat gâng pé lé dâng èq hkat htoq pyám mù, nõhpyo huí é bang banshoq lé lhoq gê byí ri.

17 Haú gi,

"Yhang gi, nga-nhùng é noli nojàng lé yu pyám byi mù, nga-nhùng é noli nojàng lé, wùn waq pyám byi bê nghut ri."[☆]

ga, myiqhtoi Esai-aq tái tô é dang lhoq dik rã matú nghut ri.

Yesuq Htâng Cháng Rã Bang

Luk 9:57-62

18 Yesuq gi, Yhâng é lìnhkhyuq má byù moq mó zup míng nyi é lé myàng jáng, Yhâng é chángzô pé lé, nõhng hé hpoq shut gú dap é sháng gã ri.

19 Haú hkùn, tarã sará rayuq gi, lé lò mù, "Sarã ê, ngò gi, Nàng hkã e le hkã cháng rã nghut lhê." ga Yhang lé tái tái ri.

20 Haú jáng, Yesuq gi, "Wamhkuí pé gi, hkyùng wó akô; ngoq pé le, nghoqst wó akô. Nghut kôlhang, haú Byu Yhangzô gi, u nghê jowò lhang a wó nghut ri." ga lhom tái kat ri.

21 Haú hkùn, chángzô rayuq gi, "Yhumsìng ê, ngá wa lé lò yhùm pyám rã ahkáng hí byi shilaq." ga tái kat ri.

22 Nghut kôlhang, Yesuq gi, "Shí bê bang gi, shí bê bang yhangchang yhùm lhum kó sháng gaq, nàng gi, Ngá htâng cháng aq." ga dum tái tái ri.

Laidun Lhoq Zim É Hkyô

Mrk 4:35-41; Luk 8:22-25

23 Hau htâng, Yesuq lhai hkaú má wàng mù, Yhâng é chángzô pé le, Yhâng htâng châng wàng bekò nghut ri.

24 Haú hkùn, nõhng má byodan-htik laidun mó lò mù, wuìhêng pé gi, lhai má bat ùm lò bê nghut ri. Nghut kôlhang, Yesuq gi, yhup myhì tô ri.

25 Chángzô pé gi, Yhâng chyáng jé é mù, Yhang lé nhau pun lui, "Yhumsìng ê, hkyi yù laq ô! Nga-nhùng myup ló nyi ri." ga tái akô.

26 Yhang gi, "Lumjìng myit shaú é bang ê! Haí mù, haú-í gyuq bum akô lhu?" ga tái kat ri. Hau htâng, Yhang gi, toq lui, laidun eq wuìhêng pé lé tân kat jáng, banshoq zim byuq bê nghut ri.

☆ 8:17 Esai 53:4

²⁷ Byù háu bang gi, maúhong byuq kômù, "Shí yuq gi, hkasû é byù làh? Lai eq wuùlhêng pé lhang gi, Yhâng é dang lé gyo byí ri myhi-nhung!" ga lui, rayuq eq rayuq myí lhum bum akô nghut ri.

Nat Wang Júng Su Njik Lé, Lhoq Gê Byí É Hkyô

Mrk 5:1-20; Luk 8:26-39

²⁸ Yesuq gi, Gadara byu pè é mau hpoq má jé dap ló jáng, nat gang wang júng é byù í yuq gi, lupdùng mai htoq lé lo kômù, Yhang lé lé hui akô. Háu njik gi, háu hkyô mai ó lhang a wám lai loshoq wui é su njik nghut akô.

²⁹ Yhangnhik gi, Yesuq lé, "Garai Yhangzo ê, Nang, ngamoq eq hái sêng lè lú? Ahkying a jé shimá, ngamoq lé zing-ri rá matú jé lé lo é nghut lè lú?" ga tái garú akô.

³⁰ Háu mai a lúm wê é jowò má, waq rajùm mó gi, myi dù but zô nyi bum akô nghut ri.

³¹ Nat gâng pé gi, Yesuq lé, "Nang, ngamoq lé hkat htoq rá nghut jáng, hê waq pé chyáng wàng nhâng laq." ga dùng akô.

³² Yesuq gi, "Htoq ló keq!" ga tái kat ri. Háu mù, yhangmoq gi, htoq ló lui, waq pé chyáng wàng mù, waq háu jùm gi, gampyoq mai nhông hkaú shut din yán wang ló kôlui, wui hkaú má myup shi byuq bekô nghut ri.

³³ Waq zúng bang gi, myuq hkaú shut hpang din wang ló kômù, dut lai lo é hkyô banshoq lé le, nat gang wang júng hui su njik hkâsu dut é hkyô lé le, ló tái kyo akô nghut ri.

³⁴ Háu mù, rawa bang gi, Yesuq lé hui rá matú htoq lé lo bùm kômù, Yhang lé myàng jáng, yhangmoq é mau mai htoq ló byuq rá matú, chòm dùng tóngbán akô nghut ri.

9

Gungjum Shí Sù Lé Lhoq Gê Byí É Hkyô

Mrk 2:1-12; Luk 5:17-26

¹ Yesuq gi, lai má wàng mù, yhumsing é wà shut jì dap ló bê nghut ri.

² Byù ra-am gi, gùngjum shí sù rayuq lé, taphkang mai Yhâng chyáng waq lé lo akô. Yesuq gi, yhangmoq é lumjing myit lé byu-myàng jáng, háu gùngjum shí sù lé, "Ngá zo ê, njik hkâ-ngê; náng é yubak mara lé hkyut pyám byi bê." ga tái ri.

³ Háu hkûn, tarâ sará pé ra-am gi, yhangmoq é i-myit hkaú má, "Byù shí yuq gi, Garai Gasang lé rhoi dang tái nyi ri." ga myit nyi bum akô nghut ri.

⁴ Yesuq gi, yhangmoq myit nyi é hkyô lé sé mù, "Nungmoq é i-myit hkaú má, háu su agê ashop é đông hái mù myit nyi akô lú?"

⁵ "Náng é yubak mara lé hkyut pyám byi bê." ngû tái rá eq 'Toq lui, hkyô so aq.' ngû tái rá má, hká hkun je tái lui lè lú?"

⁶ Nghut kôlhàng, háu Byu Yhangzo gi, mingkan htoq má, mara hkyut byi rá ahkáng wó Sù nghut é lé, nungmoq lé sé nhâng nau lè." ga tái lui, háu gùngjum shí sù lé, "Toq aq, náng é taphkang yu chùng lui, yhum taú ló aq hkoi." ga tái kat ri.

⁷ Háu mù, háu yuq gi, toq mù, yhum shut ló byuq bê nghut ri.

⁸ Byù hpúng mó gi, háu hkyô lé myàng kôjáng, gyuq mau kômù, byu pé lé háu su é ahkáng ayá byi tô é Garai Gasang lé hkya-on kungton bum akô nghut ri.

Mahte lé shuî yu é hkyô**Mrk 2:13-17; Lúk 5:27-32**

⁹ Yesuq gi, haú jowò mai sô e ló é hkûn, kang guq zúm má zung tô é Mahte ga sú lé myàng mù, "Ngá htâng cháng aq." ga tai jáng, haú yuq gi, toq luí, Yhâng htâng cháng bê nghut ri.

¹⁰ Yesuq gi, Mahte é yhûm má myinzang zô nyi é hkûn, kang guq bang myo myo eq yubak dap bang myo myo lé jé kômù, Yhang eq Yhâng é chángzô pé eq rahá zo shuq bum akô.

¹¹ Haú lé, Hparishe pé myàng kôjáng, Yhâng é chángzô pé lé, "Nungmoq é sará gi, haí mù luí, kang guq bang eq yubak dap bang eq rahá zo shuq nyi lhê lhú?" ga myî akô.

¹² Yesuq gi, haú su ga kô é lé wó gyo jáng, "Wángzán bang gi, chi sará a ra kó; nòhpyo hui bang za sheq ru râ lhê.

¹³ 'Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê.* gá é lichyúm lé mhoq yú keq. Hkâsu mù gá le, Ngò gi, dîngmán bang lé wut yù râ matú jé lé é a nghut, yubak dap bang lé jì yù râ matú sheq jé lé é ru nghut lhê." ga tù tai kat ri.

Zoshuq Gám É Eq Sêng É Hkyô**Mrk 2:18-22; Lúk 5:33-39**

¹⁴ Hau htâng, Wui-myhup Sará Yohan é chángzô pé gi, Yesuq chyáng jé lé kômù, "Ngamoq eq Hparishe pé gi, zoshuq gám gám kut lhê; nghut kôle, Náng é chángzô pé gi, haí mù a gám kô é lhú?" ga luí, lé myî akô.

¹⁵ Haú mù, Yesuq tù tai é gi, "Bíng pé gi, lusik eq rahá nghut nyi to ashí hkûn, hkâsu ge yón kó râ lhú? Lusik lé, yhangmoq chyáng mai shuî yu pyâm é hkyíng jé râ nghut lhê; haú hkûn kúm gi, yhangmoq zoshuq gám kó râ nghut lhê.

¹⁶ Ó yuq le, mebu xau má pán sik èq a lhaq hpo wú kó; hkâsu mù gá le, pán sik kun byuq jáng, mebu xau le je lhoq cheq pyâm râ nghut lhê.

¹⁷ Tsibiyiq wing asik lé le, shokuq htúng axau má ó a kat wú kó. Kat é nghut jáng, tsibiyiq wing asik soq htân luí, htúng buq goq byuq mù, tsibiyiq wing le yui shun byuq, htúng le htên byuq, dut râ nghut lhê. Haú mù, tsibiyiq wing asik lé, shokuq htúng sik má kat jáng sheq, haú í jûng é a hten râ nghut lhê." gâ ri.

Shî Bê Myiwe Zo Eq No É Myiwe Myhí**Mrk 5:21-43; Lúk 8:40-56**

¹⁸ Yesuq haú su ga tai nyi é hkûn, suwún rayuq jé lé lô mù, Yhâng é hí má hkyihput htuq luí, "Ngá zo byizo gi, ahkuí za shí byuq bê. Nghut kôlhang, Náng lé mù, yhâng é ahtoq má loq lé ke byi laq, haú jáng, yhang, asak dum dui lò rà nghut lhê." ga tai ri.

¹⁹ Yesuq gi, toq mù, Yhâng é chángzô pé eq rahá, haú yuq htâng cháng e ló akô.

²⁰ Haú hkûn, raxe í zân yhang, suí yui nyi é myiwe myhí rayuq gi, Yhâng é nunghtáng má huí lé mù. Yhâng é bushi htâng má ê záng kat ri.

²¹ Myiwe myhí haú gi, yhang gûng yhang, "Ngò, Yhâng é buhtâng má ê wó záng jáng gi, ge byuq râ nghut lhê." ga, wó myit é yanmai nghut ri.

²² Yesuq gi, lhing wú kat luí, yhang lé myàng jáng, "Ngá zo ê, nhik hkâ-ngê, náng é lumjing myit gi, nang lé lhoq gê byi bê nghut ri." ga tai ri. Haú hkûn jáng yhang, myiwe myhí haú gi, ge byuq bê nghut ri.

* 9:13 Hos 6:6

²³ Yesuq gi, suwún hpô é yhûm má jé wang ló é hkûn, sampyí mut bang eq garu garín dut nyi é bang lé, é myâng mù,

²⁴ yhangmoq lé, "Hui keq. Myiwe zo gi, shi byuq é a nghut, yhup myhî tô é sheq ru nghut lhê." ga tái jáng, yhangmoq gi, Yhang lé wuizui kut pyâm byî akô.

²⁵ Yesuq gi, byù hpûng lé, shinggan shut htoq ló nhâng mù, Yhang wang é luí, myiwe zo háu lé loq èq zui kat jáng, myiwe zo háu gi, dum dui toq lo ri.

²⁶ Háu hkyô é danglù gi, ramau gón yhang jam ló byuq bê nghut ri.

Myoqjit Í Yuq Eq Nhut Jit Sû Rayuq Lé, Lhoq Gê Byî É Hkyô

²⁷ Yesuq gi, háu jowò mai xoq e ló nyi le, Yhâng é htâng má, myoqjit í yuq gi, châng ãn uchyang, "Dawiq é Yhangzo é, ngá-nhik lé shogyô yù laq ô!" ga wut tái akô.

²⁸ Yesuq gi, yhûmhkaû má jé wang ló é hkûn, myoqjit su nhik châng wang lò kômù, háu nhik lé, "Ngò wó kut byî é lé, nungnhik lumjúng akô luq?" ga myî ri.

Háu hkûn, yhangnhik gi, "Lumjúng lhê ô, Yhumsing ê." ga tú tái akô.

²⁹ Háu htâng, Yhang gi, háu nhik é myoqji má é záng htung luí, "Nungnhik lumjúng é eq rajung za dut sháng gaq." ga tái ri.

³⁰ Háu mù, yhangnhik gi, myoq wó myâng bekô nghut ri. Yesuq gi, "Shí hkyô, ó lé le hkásé nhâng kô." ga, yhangnhik lé htân htân sidiq byî ri.

³¹ Nghut kôlhang, yhangnhik gi, háu hkyô lé, háu mau ramau gón yhang tái pyo ló bekô nghut ri.

³² Háu nhik htoq ló nyi kô é hkûn, nat gang wang júng luí, dang a wó nyô sù rayuq lé, Yesuq chyáng shui lé lo akô.

³³ Nat gang lé hkat htoq pyâm é hkûn, nhutjit sù háu gi, dang wó nyô bê nghut ri. Byù hpûng mó gi, háu lé wú mau byuq kômù, "Shí su dut é hkyô lé, Israelaq amyú má radâm lhâng a myang wú." ga tái bum akô.

³⁴ Nghut kôlhang, Hparishe pé kúm gi, "Nat gâng pé é zaú é wum-o a-tsam èq za, nat gâng pé lé hkat htoq pyâm é nghut ri." ga tái bum akô nghut ri.

Mú Zui Byù Shaû Ri

³⁵ Yesuq gi, myuq pé eq wà pé banshoq má wàng luí, háu pé má é tarajong pé má mhoqshit é eq, mauhkúng mingdán hkyô eq sêng é gabú danglù lé hko kyo uchyang, nõhpyo ajung jung eq noli nojàng hui bang yuq hkanmó lé, lhoq gê byî wún ri.

³⁶ Yesuq gi, byù moq mó lé myàng jáng, wú shogyô nyi ri. Hkásu mù gà le, yhangmoq gi, sau zúng sù a nyi é sau pé su, awui ahke dut é eq byo myín bùm kô é yanmai nghut ri.

³⁷ Háu mù, Yhang gi, Yhâng é chángzô pé lé, "Kyôshù yù rã myo shoq joq kôlhang, mù zui rã byù gi, shaû nyi ri.

³⁸ Háu mù, háu kyô Yhumsing lé, Yhâng é kyô yô má, kyô shu byù myo myo nhâng byi rã matú, dung keq." ga tái ri.

10

Raxe Í Yuq Lé Nhang Htoq Kat É Hkyô

Mrk 3:13-19; 6:7-13; 9:41; 13:9-13; Luk 6:12-16; 9:1-6; 12:2-9, 51-53; 14:26-27; 21:12-17

¹ Yesuq gi, Yhâng é chángzo raxe í yuq lé wut yù mù, agè ashop é nat pé lé wó hkat htoq râ eq, noli nojàng eq nòhpyo ajung jung lé wó lhoq gè râ ahko ahkáng yhangmoq lé byí ri.

² Haú lagyo raxe í yuq é myìng gi, (Petruq ga sù) Simun eq yhanggu Andre; Zebedi é yhangzò nhiktang Yakuq eq yhanggu Yohan;

³ Hpilip eq Barhtolume; Htomaq eq kang guq sù Mahte; Alhpe é yhangzo Yakuq, Htade,

⁴ Zelutuq* dut é Simun eq, Yesuq lé ap pyám râ sù, Yudaq Iskarut pé nghut akò.

⁵ Yesuq gi, haú bang raxe í yuq lé dangsâng mù, nhang htoq kat ri. Yhang sang kat é dang gi, "Tùngbaù pè chyáng le hkâ-ê kó; Samariq wà rawà má le hkâwâng kó.

⁶ Haú byuq byuq é sau pé su nghut nyi é Israelaq byu pè chyáng sheq é keq.

⁷ Nungmoq gi, é mù, 'Mauhkúng mingdán gi, chyáng lò bê nghut ri.' nghu é danglù lé hko kyo keq.

⁸ Nò bang lé lhoq gè byi, shí bê bang lé lhoq dui toq, manggâm dap bang lé lhoq san lhoq yúng byi, nat gâng pé lé hkat htoq pyám, kut keq. Laí laí wó é lé, laí laí byi keq.

⁹ Nungmoq é hpyihit má, hng, ngùn eq gyi pé hkâkat chùng kó;

¹⁰ Hkyowui é matú, etap, mebu htaí, hkyí-tsung eq dumbáng pé hkâyü chùng kó; hkâsu mù gà le, mù zui sù gi, zoshuq wó gíng lhê.

¹¹ Hká wâ hká dum má jé wang ló le le, haú mâ é gingdán é byù lé hô mù, haú mai htoq ló é hkùn jé shoq, haú yuq é yhùm má za nyi nyi keq.

¹² Haú yhùm má wang é hkùn, shichyên yù keq.

¹³ Haú yhùm gi, gingdán é nghut jáng, nungmoq shimân byí é hkyô, yhangmoq chyáng joq nyi sháng gaq; a gingdán é nghut jáng, nungmoq chyáng dum taù lò sháng gaq.

¹⁴ Nungmoq lé a lhom hap yu é eq nungmoq é dang lé a lhom gyo byi kò é nghut jáng, haú yhùm haú wâ mai htoq ló é hkùn, nungmoq é hkyiwa má dap é hpuilhaù lé ko hkyô pyâm to keq.

¹⁵ Ngò, nungmoq lé teng za taí kòlé, tarà jéyáng é buinyi má, haú wâ gi, Sodom eq Gomoraq myuq htoq má je hpuzo râ nghut lhê.

¹⁶ Wamhkui hpúng má nhang hâng kat é sau pé lé su, Ngò, nungmoq lé nhang kat é nghut lhê. Haú mù, lhangmui su hpaqchyí bò luí, hpúngkyui su nú-nhâm nyi keq.

¹⁷ Byu pé lé sidiq keq; hkâsu mù gà le, yhangmoq gi, nungmoq lé, tarà rúng pé má é ap pyám kó râ nghut é htoq agó, yhangmoq é tarajong pé má, nungmoq lé nhuq bat kó râ nghut lhê.

¹⁸ Nungmoq gi, Ngá é yanmai, mauzau wui eq hkohkam pè é hí má shuí jé é hui luí, yhangmoq é hí má le, tùngbaù pè é hí má le, saksé myang hkám kó râ nghut lhê.

¹⁹ Nghut kòlhang, nungmoq lé ap pyám kò é hkùn, nungmoq hkâsu taí râ eq haí taí râ lé, hkâ-myt chiq kó. Haú hkùn taí râ dang, nungmoq wó kó râ nghut lhê.

²⁰ Hkâsu mù gà le, haú gi, nungmoq é dang a nghut, nungmoq é Yhângwâ é Woi-nyí sheq, nungmoq òng taí râ ru nghut lhê.

* **10:4** Zelutuq gà é lichyúm gi, yhumsing zui saí é hkyô má gyai yhang myit lòm shirong é sù lé ga lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gà lhê.

²¹ Nhiktâng gi, nhiktâng yhangchang, îwa gi, yhangzo lé, shí shoq ap pyâm lhum kó rá nghut lhê; zo wuî gi, mó wuî lé gumlau toq mù, sat pyám nhâng kó rá nghut lhê.

²² Byù lhunglhang bang gi, Ngá é yanmai, nungmoq lé a nguî kut kó rá nghut lhê; nghut kôlhang, jìhtùm jé shoq wó hkam jân nyi é sù gi, hkyi yu é hui rá nghut lhê.

²³ Rawò má zing-ri é hui jáng, rawò shut h pang é keq. Ngò, nungmoq lé teng za tai kôlé, Israelaq byu pê é myuq pé má, nungmoq a ban wang ngap shimá, haù Byu Yhangzo jé rá nghut lhê.

²⁴ Jongzo gi, sará htoq, dui-nhâng zoshâng gi, yhumsing htoq, gyaú rá a nghut.

²⁵ Jongzo gi, yhâng é sará su, dui-nhâng zoshâng gi, yhâng é yhumsing su, wó dut jáng gé bê. Yhumsing hpó lé lhang Bezebulaq† ga kô le gi, Yhâng é yhumbyù wuî lé gi, je riyhang nghú kó rá a nghut l hú?

²⁶ Haù mù, yhangmoq lé hkâgyuq kó. A byông htoq loshoq wó zaù nghop tô é hai le a joq rá nghut lhê; a sé loshoq wó haq tô é le, hai a joq rá nghut lhê.

²⁷ Ngò, nungmoq lé mauchut hkaù má tai é hkyô lé, myoq myàng maubó má tai kyo keq; Ngò, nungmoq lé dangsoq soq kyo é hkyô lé, yhumhkung htoq mai tai pyô keq.

²⁸ Gungdu lé za wó sat pyám mù, woi-nyí lé a wó sat bang lé, hkâgyuq kó. Woi-nyí lé le, gungdu lé le, ngaraî ming má wó lhoq htên é Sù lé sheq, gyuq nyi keq.

²⁹ Johkyáng í du lé, gyi htingchap rachap èq wó ùng pyâm lhê a nghut kó l hú? Nghut kôlhang, haù radu lhang, nungmoq é Íwá é myit èq a nghut jáng, myigùng má wó byit gyó rá a nghut.

³⁰ Nungmoq é ulhum mâ é xâm banshoq lé lhang, nghap to gù nghut lhê.

³¹ Haù mù, hkâgyuq kó; nungmoq gi, haù johkyáng myo myô htoq má lhang gù je bo é bang nghut lhê.

³² Byu pê hí má, Ngo lé lhom yín yu é sù ó yuq lé nghut kôle, mauhkung htoq mâ é Ngá Wá é hí má, Ngò lhom yín yú rá nghut lhê.

³³ Byu pê é hí má, Ngo le he-ngik pyâm é sù ó yuq lé nghut kôle, mauhkung htoq mâ é Ngá Wá é hí má, Ngò he-ngik pyám rá nghut lhê.

³⁴ Ngo lé, haù myidàm htoq má simsaq hkyô byi rá matú lé lo é sù su hkângâm kó. Ngò gi, simsaq hkyô byi rá matú lé lo é a nghut, sâm byi rá matú sheq lé lo é ru nghut lhê.‡

³⁵ Hkâsu mù gâ le,

'Yuqzo gi, yhangwa eq, byizo gi, yhangnu eq, dumó gi, yhangmhoí eq, byoq lhum kó rá nghut lhê.

³⁶ Yhumsing é yhumbyù wuî gi, yhumsing é gye taù dut rá nghut lhê.'*
gâ tô é matú sheq, Ngò jé lé é ru nghut lhê.

³⁷ Ngo lé chyit é htoq yhumsing é ìnu îwa lé je chyit é sù ó yuq nghut kôle, Ngá é chángzo kut rá gingdán sù a nghut; Ngo lé chyit é htoq yhumsing é zo wuî lé je chyit é sù ó yuq nghut kôle, Ngá é chángzo kut rá gingdán sù a nghut;

³⁸ Yhumsing é tapzîng lé a waq é za, Ngá htâng châng é sù ó yuq nghut kôle, Ngá é chángzo kut rá gingdán sù a nghut.

† 10:25 Bezebulaq gâ é gi, Tsadán é myíng raja nghut lhê. ‡ 10:34 Yesuq gi, simsaq hkyô byi sù nghut lhê. Nghut kôlhang, Yhang é yanmai, byu pé mabyoq htoq rá nghut é hkyô lé sé mù, haù su ga tai é nghut lhê. * 10:36 Mihka 7:6

³⁹ Yhumsing é asak lé ha bûn é sù ó yuq nghut kôle, asak sum râ nghut lhê; Ngá é yanmai, yhumsing é asak sùm pyâm é sù ó yuq nghut kôle, asak wó râ nghut lhê.

⁴⁰ Nungmoq lé hap yù sù gi, Ngo lé hap yu é sù nghut bê; Ngo lé hap yù sù gi, haù Ngo lé nhang kat Sù lé hap yu é sù nghut bê.

⁴¹ Myiqhtoi rayuq lé, myiqhtoi đông lhom hap yu é sù ó yuq nghut kôle, myiqhtoi rayuq é chyunghuq lé wó yù râ nghut lhê; dingmán sù rayuq lé, dingmán sù đông lhom hap yu é sù ó yuq nghut kôle, dingmán sù rayuq é chyunghuq lé wó yù râ nghut lhê.

⁴² Shí, tiq bang mã é rayuq yuq lé, Ngá é chángzo nghut é yanmai, uchyam ragóm byi huq é sù gi, Ngò, nungmoq lé teng za taí kôlé, yhâng é chyunghuq lé hkyak myang hkam yù râ za nghut lhê." gâ ri.

11

Yesuq Eq Wui-myhup Sará Yohan *Luk 7:18-35*

¹ Yesuq gi, Yhâng é chángzo raxe í yuq lé dang ban pying é htâng má, Galile mau mã é wà pé má mhoqshit râ matú eq hko kyo râ matú, haù jowò mai htoq e ló bê nghut ri.

² Wui-myhup Sará Yohan gi, Hkrisduq kut nyi é hkyô lé, htóng hkaù mã wó gyo jáng,

³ "Nàng gi, haù jé lé lô râ Sù nghut lhê lú? Haù a nghut jáng, ngamoq gi, góyuq lé lánq ra shirâ lú?" ga, yhâng é chángzô pé lé myi nhang kat ri.

⁴ Yesuq tú taí é gi, "Nungmoq wó gyo wó myang é hkyô, Yohan lé ló taí kyo keq;

⁵ myoqjit bang, myoq wó myâng bekô; hkyi hten bang le, wó so bekô; manggâm dap bang le, lhoq gê byi é hui bekô; nojit bang le, wó gyo bekô; shí bê bang le, lhoq dui toq é hui bekô; myùng bãng é matú, gabú danglù hko kyô nyi bê nghut lhê.

⁶ Ngá é yanmai, Ngo lé lum shut é hkyô a bò sù gi, hkungsô wó nyi ri." ga taí ri.

⁷ Yohan é chángzô pé taù ló kô é u lé, Yohan eq séng luí, byù moq mó lé Yesuq taí é gi; "Nungmoq gi, haì lé hpuq wú râ matú, haù yoso shut e akô lú? Laì eq hik nhùn é jamgâm lé wú râ matú nghut akô lú?"

⁸ Haù a nghut jáng, haì lé wú râ matú e akô lú? Nú-nhâm é mebu wut sù lé wú râ matú e akô lú? A nghut. Nú-nhâm é mebu wut bang gi, hkohkâm-wâng pé mã sheq rù nyi lhê.

⁹ Haù nghut lé gi, haì lé wú râ matú ê kô é lú? Myiqhtoi rayuq lé lú? Haù kúm nghut ri; Ngò, nungmoq lé taí kôlé, Yohan gi, myiqhtoi htoq lhang gyaù sù nghut lhê.

¹⁰ Haù yuq é hkyô lé, Chyúmdang mã kâ tô é gi, "Wú aq, Nàng é hkyô lajang lánq râ matú, Ngá é lagyo lé, Nàng é hí mã Ngò nhang kat rá nghut lhê."*

gâ ri.

¹¹ Ngò, nungmoq lé teng za taí kôlé, myiwe wui mai hku kat é bang mã, Wui-myhup Sará Yohan htoq je kô é rayuq lhang a htoq wú shi; nghut kôlhang, Garai Gasáng é mauhkúng mingdán mã je tiq dik sù gi, Yohan htoq je kô lhê.

* 11:10 Mal 3:1

12 Wui-myhup Sará Yohan é buinyi mai ahkuí jé shoq, mauhkúng mingdán gi, lú chyín wang nyi é hui mù, sarhé pé gi, haú lé wó yú bekò nghut ri.

13 Hkâsu mù gâ le, Yohan é ahkyíng jé shoq, haú myiqhtoí pé banshoq eq tarâ gi, haú hkyô eq séng luí, myiqhtoí htoí to gù nghut lhê.

14 Nungmoq hap yù nau é nghut jáng, Yohan gi, haú jé lé lô râ ga sù Eliyaq nghut lhê.*

15 Gyô yù râ nohkyap dap sù gi, gyô yù sháng gaq.

16 Shí ipyat lhê é byu pé lé, Ngò, hai eq taí kè wú râ lúhú?

17 Yhangmoq gi,

'Nungmoq é matú, ngamoq sampyí mut byi kôlhang, nungmoq gi, a gó kó; ngamoq, ngaù hkyangsang kôlhang, nungmoq gi, a ngaù kó.'

ga luí, gai pé má zùng mù, góbang lé wut taí lúm nyi é zoshâng wui eq wui akò.

18 Hkâsu mù gâ le, Yohan gi, jé lé mù, a zo a shuq kut jáng le, yhangmoq gi, yhang lé, 'Yhang gi, nat gang dap sù nghut ri.' ga taí akò.

19 Haú Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taí akò. Nghut kôlhang, hpaqchyí byéng-yá gi, yhâng é muzó eq saksé tún shit nyi ri." gâ ri.

Myit A Lhîng É Wà Mó Pé Hkyô

Luk 10:13-15

20 Hau htâng, Yesuq gi, laklaí kumlhá pé je myo kut shit bê nghut kôlhang, myit a lhîng é myuq pé lé tân é gi,

21 "Kurazin wà mó ê! Nàng dingnyé wó ri! Bet-saida wà mó ê! Nàng dingnyé wó ri! Nungmoq chyáng lé kut shit é laklai kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhîng mù, jimê tù wut lhê, myiwap kyaq gyún lhê kut bekò râ nghut lhê.

22 Ngò, nungmoq lé taí kôlé, tarâ jéyáng é buinyi má, nungmoq gi, Turuq myuq eq Sidun myuq htoq má je hpuzo kó râ nghut lhê.

23 Dum mù, Kaperna-um wà nàng ê, nàng gi, mauhkúng jé shoq waq toq é hui râ lúhú? A nghut, mosumhkung má sheq gyó râ nghut lhê. Náng chyáng kut shit é laklai kumlhá lé, haú Sodom wà má kut shit é ru nghut le gi, myuq haú hkû-nyí jé shoq joq nyi râ nghut lhê.

24 Ngò, nungmoq lé taí kôlé, tarâ jéyáng é buinyi má, Sodom wà hpuzô é gi, náng htoq shau râ nghut lhê." gâ ri.

Ngú Nyí Bâng É Matú Bánno Jang

Luk 10:21-22

25 Haú u lé, Yesuq taí é gi, "Mauhkúng eq myigung é Yhumsing, Áwa ê, Nàng gi, haú pé lé, hpaqchyí byéng-yá bò bang eq myit hpaqchyí sé bâng é hí má nghop to luí, zoshâng wui lé tún shit bê nghut é yanmai, Ngò, Nang lé hkyan-lhê ô.

26 Nghut bê, Áwa ê, haú gi, Nàng ô nau é hkyô nghut ri.

27 Ngá Wa gi, lhunglhâng lé Ngá é loq má ap byí to bê. Haú Zo lé, Áwa mai lai luí ó le a sé; Áwa lé le, haú Zo eq haú Zo mai sé nhâng râ matú hkyin yu é bang mai lai luí ó a sé.

28 Ngú é eq wòlai wun é lhunglhâng bang ê, Ngá chyáng lé keq; Ngò, nungmoq lé bánno nhâng râ nghut lhê.

²⁹ Ngò gi, myit nú-nhâm é eq myit lhoq nyhum é sù nghut é yanmai, Ngá é kandang lé waq keq; Ngá chyáng mai mhoq yú keq; haú hkún, nungmoq é asak woi-nyí bánno kó rá nghut lhê.

³⁰ Haí mù gâ le, Ngá é kandang gi, waq lui é htoq agó, Ngá é wò le sôm lhê." gâ ri.

12

Bánno Buinyi É Yhumsing

Mrk 2:23-28; 3:1-6; Luk 6:1-5, 6-11

¹ Haú yoq lhê é Bánno buinyi ra-nyí má, Yesuq gi, Yhâng é chángzô pé eq rahá yò hkaú mai sô lai ló nyi ri. Yhâng é chángzô pé gi, zòmut é yanmai, kyôshi ratsuí langshap yú mù, zô akò nghut ri.

² Hparishe pé gi, haú lé myàng kôjáng, "Wú aq! Náng é chángzô pé gi, Bánno buinyi má a ge kut jung lé kut nyi akò." ga tái kat akò.

³ Haú hkún, Yesuq tũ taí é gi, "Dawiq lháng gi, yhâng htâng châng é bang eq rahá zòmut hui é hkún hkásu kut é hkyô lé, nungmoq a nghap wú kó lúh?"

⁴ Dawiq gi, Garai Gasâng é yhúmhmaú má wang é mù, hkyangjông pé mai lai lui, ó le a ge zô é, kyâng tò é muk lé, yhang eq yhâng htâng châng é bang yú zô kó é a nghut kó lúh?

⁵ Hau htoq agó, Bánno buinyi má, hkyangjông pé gi, noqkuq yhúmhmaú má Bánno buinyi é tará lé shut kôlhang mara a wó é lé, haú tará laiká má nungmoq a nghap wú kó lúh?

⁶ Ngò, nungmoq lé tái kôlé, haú noqkuq yhúm htoq je ko sù gi, shí má nghut nyi lhê.

⁷ Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê" gâ é lichyúm lé nungmoq sé kô é ru nghut le gi, mara a bò bang lé mara hún kó rá a nghut.

⁸ Hkásu mù gâ le, haú Byu Yhangzo gi, haú Bánno buinyi é Yhumsing nghut lhê." gâ ri.

⁹ Hau htâng, Yhang gi, haú jowò mai e ló mù, yhangmoq é tarajong má wang e ló ri.

¹⁰ Loq rahkyam ajum shi byuq é byù rayuq le, haú má nyi tô ri. Yhangmoq gi, Yesuq lé, "Bánno buinyi má, nõhpyo lhoq gê byi le, tará wang lhê lúh?" ga myi é dong, Yhang lé mara hún rá hkyô ho akò nghut ri.

¹¹ Haú hkún, Yesuq gi, "Nungmoq chyáng mâ é ó yuq wá, yhumsing é sau radu, Bánno buinyi má dong gyó tò le, a xe htoq yu é nyi kó rá lúh?"

¹² Byù gi, saú htoq má hpaudap dik é nghut lhê! Haú mù, Bánno buinyi má ge é hkyô kut le, tará wang lhê." ga yhangmoq lé tũ taí ri.

¹³ Hau htâng, Yhang gi, haú loq jum shí sù lé, "Náng é loq nyhang kat aq." ga tái kat jáng, haú yuq gi, loq nyhang kat jáng, loq haú gi, a no é loq su ge byuq bê nghut ri.

¹⁴ Hparishe pé kúm gi, htoq ló kômù, Yesuq lé hkásu kut wó sat pyám rá hkyô lé, chòm hpyê lhúm bum akò nghut ri.

Garai Hkyin Tô É Dui-nhâng Zoshâng

¹⁵ Yesuq gi, haú hkyô lé sé jáng, haú jowò mai htoq ló bê nghut ri. Byù myo myo le, Yhâng htâng châng bùm kômù, Yhang gi, nõhpyo hui bang banshoq lé lhoq gê byi lui,

16 Yhang ó yuq nghut é hkyô lé, a taí byông htoq râ matú, yhangmoq lé taí hkúm tô ri.

17 Haú gi, myiqhtoi Esai-aq é nhut đông mai taí tô é dang lé lhoq dik râ matú nghut ri. Dang haú pé gi,

18 "Shí yuq gi, Ngò chyit, Ngò myit nguì luí, hkyin tô é Ngá é dui-nhâng zoshâng nghut lhê;

Ngò gi, Ngá é Woi-nyí, Yhang lé kat byi râ nghut mù,

Yhang gi, tarâ dingmán é hkyô lé byù myù banshoq pé má taí kyo râ nghut lhê.

19 Yhang gi, haí a hpuq tù é htoq agó, a garu râ nghut lhê; Yhâng é htê lé, hkyô mó pé má wó gyo râ a nghut.

20 Yhang gi, tarâ dingmán é hkyô lhoq ung é hkùn jé shoq,

nâng chap pyám bê jàm gàm lé le, lhoq hkyui râ a nghut, myihkau za htoq nyí bê myi lé le, lhoq sat pyám râ a nghut.

21 Byù myù chângiup gi, Yhâng é myíng má myit myoqbyù kó râ nghut lhê.*[☆]
gâ ri.

Yesuq Eq Bezebulaq

Mrk 3:20-30; Luk 11:14-23; 12:10; 6:43-45

22 Hau htâng, agè ashop é nat gang wang júng luí, myoqjit nhutjit é byù rayuq lé, Yesuq chyáng shuí lé lô kôjáng, Yesuq gi, haú yuq lé lhom lhoq gè byí ri; haú mù, haú yuq gi, dang le wó nyô, myoq le wó myâng dut bê nghut ri.

23 Byù hpúng mó gi, haú lé wú maú byuq kômù, "Shí yuq, Dawiq é Yhangzo za gi, nghut lhê laq?" ga taí bum akô.

24 Nghut kôlhang, Hparishe pé gi, haú lé wó gyo kôjáng, "Shí yuq gi, nat gâng pé é zau Bezebulaq* é wum-o a-tsam èq za nat gâng pé lé wó hkat htoq é nghut ri." ga taí bum akô nghut ri.

25 Yhangmoq myit nyi é hkyô lé Yesuq sé mù, yhangmoq lé taí é gi, "Hká mingdán nghut kôle, ahkaú má byoq gâng lhùm nyi kô é nghut jáng, htên byoq byuq râ za nghut lhê; haú eq rajung za, myuq ralhùm nghut nghut, yhumhtu ralhùm nghut nghut, yhangchang byoq lhùm nyi kô é nghut jáng, haú gi, wó gíng nyi râ a nghut.

26 Tsadán gi, Tsadán lé hkat htoq pyám é nghut jáng, yhumsing gùng yhumsing lhoq hpyoq nyí gù bê nghut ri. Haú su nghut jáng, yhâng é mingdán gi, hkâsu kut wó gíng to râ lú?

27 Haú mù luí, Ngò gi, Bezebulaq é wum-o a-tsam èq za nat gâng pé lé hkat htoq é nghut jáng, nungmoq é byu pé gi, ó yuq é wum-o a-tsam èq hkat htoq pyám kô é nghut lhê lú? Haú su nghut jáng, haú bang gi, nungmoq lé tará jéyáng bang dut kó râ nghut lhê.

28 Nghut kôlhang, Ngò gi, Garai Gasâng é Woi-nyí èq nat gâng pé lé hkat htoq pyám é nghut jáng, Garai Gasâng é mingdán gi, nungmoq chyáng jé bê nghut ri.

29 Ó yuq nghut kôle, wum-o bò sù lé hí tuí zing pyám é a nghut le gi, yhâng é yhùm má lú wàng mù, yhâng é sutzè lé hkâsu wó lú yú râ lú? Haú yuq lé hí tuí zing pyám jáng sheq, yhâng é sutzè lé wó lú yú râ nghut lhê.

☆ 12:21 Esai 42:1-4 * 12:24 Bezebulaq gâ é gi, Tsadán é myíng rajà nghut lhê.

³⁰ Ngá hkyam shut a dap sù gi, Ngo lé gyè kut sù nghut lhê; Ngò eq rahá a shúm tsing sù gi, lhoq pyo pyâm é sù nghut nyi ri.

³¹ Haù mù, Ngò, nungmoq lé taí kôlé, byu pê é yubak mara hkangmó eq Garai Gasang lé rhoi dang taí pyâm é lhunglhang gi, mara hkyut byí é wó hui rá nghut lhê. Nghut kôlhang, haù Chyoiyúng Woi-nyí lé rhoi dang taí pyâm é gi, mara hkyut byí é hui rá a nghut.

³² Haù Byu Yhangzo lé dang dông shut é sù gi, mara hkyut byí é wó hui rá nghut lhê; nghut kôlhang, haù Chyoiyúng Woi-nyí lé dang taí shut é sù gi, shí ipyat má le, htang pyat má le, mara hkyut byí é hui rá a nghut.

³³ Ashi lé wú luí, agàm lé sé rá nghut é yanmai, agàm lé lhoq gè jáng, ashi le gè rá nghut lhê; agàm lé a lhoq gè jáng, ashi le gè rá a nghut;

³⁴ Duq htân lhangmui amyû ê, nungmoq gi, agè ashop é bang nghut to kôluí nhúng, dang gè hkâsu wó taí kó rá lúh? Hkâsu mù gâ le, i-myit unghkaú má bying múi tò é lé za, nhut mai taí htoq lo é nghut lhê.

³⁵ Ge é sù gi, yhumsing é i-myit unghkaú mã é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myit unghkaú mã é agè ashop é sutdò mai, agè ashop é zè pé lé lhoq htoq shit lhê.

³⁶ Ngò, nungmoq lé taí kôlé, byù gi, yhumsing taí kat é akyû a bo é dang pé é matú, tará jéyáng é buinyi má taí sân kyo ra kó rá nghut lhê.

³⁷ Hkâsu mù gâ le, yhumsing mara lut rá le, ó le ó taí é dang pé mai; mara byí é hui rá le, ó le ó taí é dang pé mai, nghut rá nghut lhê." gâ ri.

Limik Kumhá Lé Dung Kô É Hkyô

Mrk 8:11-12; Luk 11:29-32; 11:24-26

³⁸ Hau htâng má, Hparishe pé eq tará sará pé ra-am gi, "Sará ê, ngamoq gi, Nàng, limik kumhá kut shit rá lé myàng nau ri." ga Yhang lé dúng akò.

³⁹ Haù mù, Yhang tû taí é gi, "Agè ashop é eq lhum a zuí é ipyat shí gi, limik kumhá dung nyi ri myhi-nhung! Myiqhtoi Yonaq é kumhá mai lai luí, gotú hái le tûn shit rá a nghut.

⁴⁰ Hkâsu mù gâ le, Yonaq gi, ngo mó é wamdau hkaú má sum nyí sum myîn lúng é su, haù Byu Yhangzo le, myigùng káng má sum nyí sum myîn lúng rá nghut lhê.

⁴¹ Ninewe wà byù wui gi, Yonaq mungdang hko kyô é hkûn myit lhing kô é nghut mù, tará jéyáng é buinyi má, ipyat shí mã é bang eq rahá toq lò luí, ipyat shí mã é bang lé mara hún kó rá nghut lhê; haù Yonaq htoq ko sù gi, ahkuí shí má jé nyi to bê.

⁴² Maupyí mã é hkohkâm myhí gi, maumyí ló htâng é mai lé lô mù, Sholumon é hpaqchyí dang lé, lé gyò yù bê nghut mù, haù tará jéyáng é buinyi má, ipyat shí mã é bang eq rahá toq lò luí, ipyat shí mã é bang lé mara hún rá nghut lhê; haù Sholumon htoq ko sù gi, ahkuí shí má jé nyi to bê.

⁴³ Haù agè ashop é nat gi, byù rayuq chyáng mai htoq lò mù, kyuq huí é jowò pé má sô yông e ló luí, no rá jowò hkat ho wú le, a myang hô nghut ri.

⁴⁴ Haù hkûn, yhang gi, 'Ngò nyi lai lo é yhûm má dum taú ló wú rá.' ga taí ri. Yhang dum taú jé ló wú le, yhûm haú lé, ó le a sing yu hpyuq é htoq agó, san za rago dut to lág é lé ló myang ri.

⁴⁵ Haù jáng, yhang gi, dum taú é mù, yhâng htoq je wuí é nat nyhit nat lé shuí lò luí, haù má lò wang nyi to bekô. Haù mù, haù yuq é nyi yap sâmlai gi, hí lhê htoq má je wuí lò bê nghut ri; agè ashop é ipyat shí le, haù eq rajung za dut rá nghut lhê." gâ ri.

*Yesuq É Yhângnu Eq Yhanggû Pé**Mrk 3:31-35; Luk 8:19-21*

⁴⁶ Yesuq, shiwa byu pé lé dang rû nyo nyi ashí hkún, yhângnu eq yhanggu pé gi, Yhang lé nyò nàu kômù, shinggan má lé yap tô akô nghut ri.

⁴⁷ Haù mù, Yesuq lé, "Náng nu eq nunggu pé gi, Nang lé nyò nàu mù, shinggan má láng yap bum akô." ga tái kyô akô.

⁴⁸ Haù hkún, Yhang gi, "Ô pé gi, Ngá nu eq Ngá gu pé nghut akô l hú?" ga tú tái kat ri.

⁴⁹ Hau htâng, Yhang gi, Yhâng é chángzô pé lé loq tun luí, "Wú keq, shí bang gi, Ngá nu eq Ngá é gumang wui nghut bê.

⁵⁰ Hkâsu mù gâ le, mauhkûng htoq má é Ngá Wa ô nau é hkyô châng é sù ó yuq nghut kôle, Ngá gu Ngá mang, Ngá gu Ngá nhá, Ngá nu chyat nghut bê." ga xoq tái ri.

13*Kyôshi Sân É Dangtú**Mrk 4:1-20; Luk 8:4-15*

¹ Haù nyí má yhang, Yesuq gi, yhúm hkaù mai htoq lô mù, wui nhông yàm má é zung tô ri.

² Byù hpûng mó gi, Yhâng é lhîngkyuq má zup zîng lé bûm kô é yanmai, Yhang gi, lhai hkaù má doq zùng tô ri. Shiwa byu pé kúm gi, gin-gau htoq má yap tô bum akô.

³ Hau htâng, Yhang gi, haù bang lé, dangtú pé dông myo myo tái é má, "Kyô hkyô sù rayuq gi, kyôshi san râ ga htoq e lô ri.

⁴ Yhang, kyôshi sân kat é hkún, ra-am gi, hkyô má gyó ang mù, nghoq pé èq lé hte zô pyám ri.

⁵ Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq lô kôle,

⁶ amyit a wó chin hîng é nghut mù, bui htoq lô jáng, lhap kyuq pyám bê nghut ri.

⁷ Dum ra-am gi, zugyóm hkaù má gyó ang lui, zubyap haù pé kô lò mù, wup pyám ri.

⁸ Ra-am dum nghut jáng, myihpún bo é jang má gyó ang lui, ashi zui lo é gi, sân kat é htoq rashô tú, hkyuq xê tú, sum xê tú, myô jat lo é nghut ri.

⁹ Gyô yù râ nohkyap dap sù gi, gyô yù sháng gaq." ga le tái ri.

¹⁰ Haù hkún, chángzô pé gi, Yhâng chyáng lé mù, "Nàng gi, haù mù, shí bang lé, dangtú dông tái l hú?" ga myí akô.

¹¹ Haù jáng, Yhang tái tái é gi, "Mauhkûng mingdán eq sêng é sê gyo wui é hkyô pé lé sê gyo râ ahko ahkáng, nungmoq lé byí to bê, nghut kôlhang, yhangmoq lé gi, a byi shí é nghut l hú.

¹² Wó to sù lé gi, yhang agùn agó wó râ matú, jat byi shirâ nghut l hú. A wó su chyáng mai kúm gi, yhang wó tô é lé l háng yu pyám byi shirâ nghut l hú.

¹³ Yhangmoq gi, wú to kôlhang, a myàng kó; gyô nyi kôlhang, a wó gyo, a sê gyo kó nghut é yanmai, yhangmoq lé Ngó dangtú dông tái râ é nghut l hú.

¹⁴ Haù gi,

'Nungmoq gi, wó gyô tô nyi kôlhang, sê gyo kó râ a nghut;
myang tô nyi kôlhang, wú sé kó râ a nghut.

¹⁵ Hkâsu mù gâ le, byù shí bang gi, myit nhikshi jit byuq bê;
yhangmoq é nohkyap gi, a wó gyo kó,

myoqjí le chûm byuq bekô nghut ri.

Haû su a nghut le gi, yhangmoq, myoq myàng no gyo mù,
i-myt bun bóng luí, lêng lò kômù,

Ngò, yhangmoq lé yà gè byi berá nghut lhê.¹⁶

gâ é, Esai-aq é myiqhtoi dang lé lhoq dik é nghut ri.

¹⁶ Nghut kôlhang, nungmoq é myoq gi, wó myâng mù, nungmoq é nohkyap gi, wó gyô é yanmai, nungmoq gi, hkungsó wó nyi ri.

¹⁷ Hkâsu mù gâ le, Ngò, nungmoq lé teng za taí kôlé, nungmoq wó myâng, wó gyô é pé lé, myiqhtoi pé eq dingmán bang myo myo gi, myàng nau gyo nau kôlhang, a wó myâng, a wó gyo kó nghut ri.

¹⁸ Ahkuí, kyôshi san sù eq sêng é dangtú é lichyúm lé rago gyô wú keq;

¹⁹ Hkyô má gyô âng é kyôshi gi, mauhkûng mingdán eq sêng é danglú lé wó gyo kôlhang, a sê gyô é yanmai, haû agè ashop sù lé lô mù, yhâng é i-myt hkaú má san kat tô é kyôshi lé, lé yu pyám byí é hui sù lé gá nau é nghut lhê.

²⁰ Luqgok yò pé má gyô âng é kyôshi gi, mungdang lé wó gyo jáng, radá dâm gabú myit èq hap yù kôlhang,

²¹ amyit a wó chîn é yanmai, razup zo za yuq mù, mungdâng é yanmai, wuîhké é eq zing-ri é hui kôjáng, hân hân htaq ló byuq é sù lé gá nau é nghut lhê.

²² Zugyóm má gyô âng é kyôshi gi, haû mungdang lé wó gyô yù kôlhang, shí ipyat lhê é myit wui myit hke hkyô pé eq hkyô shuí nghoq jung ngùn hng zèhkoq èq hup pyám é yanmai, ashi a wó zuí é sù lé gá nau é nghut lhê.

²³ Nghut kôlhang, myihpún bo é jang má gyô âng é kyôshi kúm gi, mungdang lé wó gyo mù, sê gyô yu é sù lé gá nau é nghut lhê. Haû yuq ashi zuí é gi, san kat é htoq rashô tú, hkyuq xê tú, sum xê tú, myô jat lo é nghut ri.

Myoqgàm Dangtú

²⁴ Yesuq, yhangmoq lé dangtú dông xoq taí kyô é gi, "Mauhkûng mingdán gi, ge é kyôshi lé, yò má san kat sù rayuq eq du ri.

²⁵ Byu pé yhup myhí tô bum é u lé, yhâng é gye gi, lé jé mù, guq gàm gyoro má, myoqshi lé sân to hkó luí, taú ló byuq bê nghut ri.

²⁶ Guq gàm yuq lò mù, guq nhâm htoq lo é hkûn, myoqgàm le bo yuq htoq lo ri.

²⁷ Yhumsing hpô é dui-nhâng zoshâng wui gi, yhâng chyáng lé jé mù, "Yhumsing ê, ge é kyôshi lé za yò má sân tô é a nghut lhú? Myoqgàm pé gi, hkâmai htoq lo é lhú?' ga myi kôjáng,

²⁸ haû yhumsing hpó gi, 'Gumlau gye èq kut é nghut ri.' ga tú taí ri.

Haû jáng, dui-nhâng zoshâng wui gi, 'Ngamoq, myoq haû pé lé é nut pyám râ lé, nàng ô nau ri lhú?' ga myí akó.

²⁹ Haû hkûn, yhang gi, 'Hká nut pyám kó; hkâsu mù gâ le, nungmoq, myoq haû pé lé nut é hkûn, guq gàm pé lé le bo záng nut pyám kó râ nghut lhê.

³⁰ Kyôshu yoq jé shoq rahá yuq to kó shâng gaq; haû hkûn, myoqgàm pé lé hí hkyin tsing yù mù, nyhê hkyô pyám râ matú hkyom ding to luí, guq lé kúm gi, shù yù mù, ngá é chyí má tsing kat to râ matú, kyô shu bang lé ngò taí râ nghut lhê.' ga tú taí ri." gâ ri.

Angshi Cham Eq Munchi Dangtú *Mrk 4:30-34; Luk 13:18-21*

³¹ Hau htâng, Yesuq gi, yhangmoq lé gotú dangtú ralhú dum xoq taí é gi; "Mauhkúng mingdán gi, byù rayuq èq, yhâng hkyâm má hô tô é angshi cham eq wuí ri.

³² Angshi cham haù gi, kyômyui jí banshoq htoq má je tiq é nghut kôle, yuq kô lò jáng, hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq pé má, maulat nghoq zô pé lé wó zung nô bum lhê." gâ ri.

³³ Yhang, gotú dangtú dum xoq taí é gi, "Mauhkúng mingdán gi, myiwe rayuq èq sungso mún sum búng má yu nyhó luí, haù pé banshoq lé wó lhoq dau nhang é múnchi eq wuí ri." gâ ri.

³⁴ Yesuq gi, byù moq mó lé, haù pé banshoq dangtú dông mai chyat taí ri; yhangmoq lé, dangtú a bo é hai háng a taí wú nghut ri.

³⁵ Haù gi,

"Ngá nhut lé hpóng mù, dangtú dông mai taí râ; mingkan lé sâng-hi hpan é mai zaù tô é hkyô pé lé taí sân kyo râ nghut lhê."[☆] ga, myiqhtoi dông taí tô é dang lo dik é nghut ri.

Myoqgàm Dangtú Lé Taí Sân Kyô É Hkyô

³⁶ Hau htâng má, Yesuq gi, byù moq mó mai htoq ló mù, yhúmhkaù má wang ló ri. Haù hkún, Yhâng é chángzô pé gi, Yhâng chyáng lé lô kômù, "Yò má é myoqgàm dangtú eq séng é hkyô lé taí sân kyo laq." ga taí akô.

³⁷ Haù jáng, Yhang tú taí é gi, "Ge é kyôshi san sù gi, haù Byu Yhangzo nghut ri.

³⁸ Yò gi, mingkan nghut ri; ge é kyôshi gi, mauhkúng mingdán é yhangzô pé nghut akô. Myoqgàm pé kúm gi, haù Tsadán é yhangzô pé nghut akô;

³⁹ haù lé châng hkat sân é gumlau gyè gi, nat Tsadán nghut ri. Kyôshu yoq gi, mingkan htúm é ahkyíng nghut ri; kyô shu bang gi, maumang lagyó pé nghut akô.

⁴⁰ Haù myoqgàm pé lé, nut yù mù, myi má nyhê pyâm é su, haù mingkan htúm é ahkyíng má dut râ nghut lhê.

⁴¹ Haù Byu Yhangzo gi, Yhâng é maumang lagyó pé lé nhâng râ nghut lhê; haù mù, haù bang gi, hkyô lhoq nghoq nhang é bang banshoq eq agè ashop hkyô kut é bang lhunglháng lé, Yhâng é mingdán mai hkyin she htoq yù mù,

⁴² gyúng nyi é myibung hkyúng hkaù má dú kat pyám kó râ nghut lhê; hau má, ngaubyi ngaù nhap eq zui kyik kyik shoq hpuzô nyi kó râ nghut lhê.

⁴³ Haù hkún, dingmán bang gi, yhangmoq Yhângwâ é mingdán má bùi su duqbó nyi kó râ nghut lhê. Nohkyap dap sù gi, gyô yù sháng gaq.

Haq Tô É Sutzè Dangtú

⁴⁴ Mauhkúng mingdán gi, yò má haq tô é sutzè eq wuí ri. Sutzè haù lé myang é sù gi, haù lé sai haq to mù, gabú myit èq taù ló luí, yhang wó é banshoq lé úng pyám mù, yò haù lé wui yu ri.

⁴⁵ Dum, mauhkúng mingdán gi, réng é palhé lé châng ho wún é hpugá hpó eq wuí ri.

⁴⁶ Yhang gi, gyai hpaù é palhé lé myàng jáng, yhang wó é banshoq lé ló úng pyám mù, haù lé wui yu ri.

Gùn Lé Dangtú Yu É Hkyô

⁴⁷ Mauhkûng mingdán gi, nhông má, ngozo ajà jà lé wó dú nghop yu é gùn eq le wuí ri.

⁴⁸ Gùn haú má ngozo byíng jáng, ngo kóng bang gi, wuí yàm má she htoq yú mù, zung to luí, ge é pé lé gi, ngo-pyap má guq kat yú luí, a ge é pé lé gi, dú pyám akò.

⁴⁹ Haú eq rajung za, mینگkan htúm é ahkyíng má le, maumang lagyô pé gi, gyó lé lô mù, agè ashop é bang lé, dingmán báng chyáng mai gam htoq yú luí,

⁵⁰ ngaubyi ngaù nhap eq zuì kyik kyik shoq hpuzô nyi rà nghut é, gyúng nyi é myibung hkyúng hkaú má dú kat pyám kó rà nghut lhê.

⁵¹ Shí hkyô banshoq lé nungmoq sê gyo bekô lúh?" gá ri.

Haú hkún, yhangmoq gi, "Sê gyo bê." ga tù tai akò nghut ri.

⁵² Hau htàng, Yesuq gi, yhangmoq lé, "Mauhkûng mingdán eq séng luí mhoq yú bê é tarâ sará ó nghut kòle, yhang mhoq é hkyô gi, yhumsing é sut-púnglhung hkaú mai zè sik zè xau lé yu htoq é yhumsing hpó rayuq eq wuí ri." ga dum tai ri.

Myiqhtoi, Myoqdong A Wó Dut É Jang

Mrk 6:1-6; Luk 4:16-30

⁵³ Yesuq gi, dangtú haú pé lé ban tai jáng, haú jowò mai htoq e lô bê nghut ri.

⁵⁴ Yhang gi, Yhâng é yhummau má jé lô jáng, byu pé lé, yhangmoq é tarajong má mhoqshit ri; haú hkún, yhangmoq gi, gyô maú byuq kòluí, "Byù shí yuq gi, hpaqchyí byéng-yá shí eq hpungwup a-tsam mó shí pé lé, hkâmai wó yu é nghut lhê là?"

⁵⁵ Yhang gi, laksíma hpô é yhangzo a nghut lúh? Yhângnú é myíng gi, Mariq gá lhê a nghut lúh? Yhanggú pé gi, Yakuq, Yosep, Simun eq Yudaq gá é bang a nghut kó lúh?

⁵⁶ Yhâng nhammó pé le, nga-nhung eq rahá nghut nyi lhê a nghut kó lúh? Haú su nghut le nhíng, haú pé banshoq lé, Yhang hkâmai wó yu é nghut lhê là?" ga myí bùm kômù,

⁵⁷ Yesuq lé myit a gón dut bùm bekô nghut ri.

Yesuq kúm gi, yhangmoq lé, "Myiqhtoi rayuq gi, yhumsing é yhummau eq yhumsing é yhúm má za, myoqdong a lhaq wó wú é nghut lhê." ga tù tai kat ri.

⁵⁸ Yhangmoq lumjíng myit a bò kô é yanmai, Yesuq gi, haú má, laklai kumlhá myo myo a kut shit lo nghut ri.

14

Wui-myhup Sará Yohan Shi Byuq É Hkyô

Mrk 6:14-29; Luk 9:7-9

¹ Haú hkún, mauzau Herut gi, Yesuq eq sêng é ludang lé wó gyo jáng,

² yhâng a-ô mâ é bang lé, "Shí yuq gi, Wui-myhup Sará Yohan nghut ri-nhung; Yhang gi, shi é mai dum dui toq lo é nghut mù, hpungwup a-tsam haú pé lé wó kut é nghut ri." ga tai ri.

³ Herut haú su gá é gi, yhanggu Hpilip é yhangmyi Herudiaq é yanmai, Yohan lé chyup tui yú mù, htóng hkyô pyám é yanmai nghut ri.

⁴ Hkâsu mù gá le, Yohan gi, yhang lé, "Nàng, myiwe haú lé hâng yu é gi, tará a wang é nghut lhê." ga tai byí nyi é yanmai nghut ri.

⁵ Herut gi, Yohan lé sat pyám naù kôlhang, mingbyû wui lé gyuq é yanmai, a wám sat nghut ri; haí mù gâ le, yhangmoq gi, Yohan lé myiqhtoi tsuq nyí kô é yanmai nghut ri.

⁶ Nghut kôlhang, Herut é hkû ladu hkyûm buinyi má, Herudiaq é yhangzo byizo gi, yhangmoq é hí má gó shit é lé, Herut gi, gyai yhang wú myit ngui mù,

⁷ byizo haù lé, yhang haí dung le haí byi rà ga dakam é danggidiq byí ri.

⁸ Byizo haù gi, yhângnu hpaqchyí byí é lé gyô yù mù, "Shí, bó má, Wui-myhup Sará Yohan é ulhum lé, kat byi laq." ga, Herut lé dúng ri.

⁹ Mauzau hpó gi, myit a ngón dut byuq kôlhang, yhang dakam tô é danggidiq é yanmai le, bíng pé é myoqdong lé tê nau é yanmai le, yhang dúng é lé, byi rà matú,

¹⁰ htóng hkaù má lúng tô é Yohan é ulhum lé hpyit rà hkunmó hkyô kat bê nghut ri.

¹¹ Yohan é ulhum lé bó má kat luí, myiwe zo haù lé byi jáng, myiwe zo haù gi, haù lé yhângnú chyáng yu ló byí ri.

¹² Haù mù, Yohan é chángzô pé gi, yhâng é mâng lé lé yù luí, myhup pyám bekô nghut ri. Hau htâng, yhangmoq gi, Yesuq lé ló taí kyô akô nghut ri.

Byù Ngo Hkyîng Lé Byi Tsô É Hkyô

Mrk 6:30-44; Luk 9:10-17; Yhn 6:1-14

¹³ Yesuq gi, haù hkyô lé wó gyo jáng, haù mai lhai ji mù, tsím tsâm é jowò shut Yhang baù e ló ri. Haù lé, byu pé wó gyô bùm kôjáng, wà mó pé mai htoq lé lô kômù, hkyí hkyô Yhâng htâng châng e ló akô nghut ri.

¹⁴ Yesuq gi, lhai mai gyó dap ló é hkûn, byù moq mó nyi to lánng é lé myàng jáng, yhangmoq lé wú shogyo luí, nò bang lé lhoq gê byí ri.

¹⁵ Myinhântang jé lô jáng, haù chángzô pé gi, Yhâng chyáng lé kômù, "Shí má gi, tsím tsâm é jowò nghut é htoq agó, bui le gyum ló bê nghut mù, shiwa byu pé gi, wà pé shut ló luí, yhangmoq é matú zôjung ló wó wui kó sháng gaq, yhangmoq lé nhang kat aq hkoi." ga taí akô.

¹⁶ Haù hkûn, Yesuq gi, "Yhangmoq ló a ra. Nungmoq, yhangmoq lé rajung jung byi tso keq." ga tû taí kat ri.

¹⁷ Haù su ga jáng, yhangmoq gi, "Muk ngo long eq ngozo í du za ru wó lhê." ga dum tû taí akô.

¹⁸ Haù jáng, Yesuq gi, "Yu lò keq." ga tû taí mù,

¹⁹ shiwa byu pé lé, wàhu yò má zùng nhang ri. Hau htâng, Yhang gi, haù muk ngo long eq ngozo í du lé yù mù, mauhkúng shut tu wú to luí, jeju ban hkya-on jáng, muk lé hpé gàm mù, chángzô pé lé byí ri. Haù chángzô pé gi, shiwa byu pé lé gàm byí akô nghut ri.

²⁰ Yhangmoq banshoq bang zô gyí bùm kô é htâng má, haù chángzô pé gi, zô myhit tô é pé lé, raxe í mung byíng shoq wó guq tsíng yu ashí kô nghut ri.

²¹ Haù má zô é bang gi, myiwe wui eq zoshâng wui lé a nghap lhôm é za, yuqgè baù ngo hkyîng kô bo ri.

Yesuq, Wui Htoq Má Sô É Hkyô

Mrk 6:45-56; Yhn 6:15-21

²² Yesuq gi, haù shiwa byu pé lé byo ló nhang nyi é hkûn jáng, chángzô pé lé lhai má wang ji nhâng mù, tû tap shut dap ló lánng nhang ri.

²³ Shiwa byu pé lé nhang pyâm é htâng má, Yhang gi, kyûdung râ ga, Yhang baú bùm shut doq e ló ri. Myinhêng chutshúm zó jé shoq, Yhang baú háu má nyi nyi ri.

²⁴ Háu u lé, lhai gi, gin-gau mai tsómra wê é jowò má jé é hkûn, lai tau mut é yanmai, wuilheng êq gyai yhang lo bat nhûn é hui zô ri.

²⁵ Htang napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq chyáng lé lo ri.

²⁶ Háu mù, chángzô pé gi, Yesuq nhông htoq má sô nyi é lé myàng kôjáng, gyuq dân kômù, "Sobyô ô!" ga gyuq nán é êq tai garû akò nghut ri.

²⁷ Háu jáng yhang, Yesuq gi, yhangmoq lé, "Hkâgyuq kó! Ngò ru nghut lhê; myit wum lhoq kíng keq." ga nyo kat ri.

²⁸ Háu hkûn, Petruq gi, "Yhumsing ê, Nang yhang ru nghut le gi, ngo lé, wui htoq mai sô lé lô nhâng laq." ga tai kat ri.

²⁹ Háu jáng, Yesuq gi, "Lé lô aq." ga tú tai kat ri.

Háu mù, Petruq gi, lhai mai gyó mù, wui htoq mai Yesuq chyáng sô e ló ri.

³⁰ Nghut kôlháng, yhang gi, laidun htan é lé myang kat jáng, wú gyuq lui, wui má nop ló nyi mù, "Yhumsing ê, ngo lé hkyi yù laq." ga wut garû kat ri.

³¹ Yesuq gi, radá dâm yhâng é loq lhâm kat lui, Petruq lé lêng zing to mù, "Lumjing myit shau sù ê, nang hai mù úng-âng lhê lú?" ga tai ri.

³² Yhangnhik, lhai má wàng kôjáng, laidun le zim byuq bê nghut ri.

³³ Hau htâng, háu lhai má lúng tô é bang gi, Yhang lé pai gop mù, "Nang gi, gè gè yhang, Garai Gasâng é Yhangzo nghut bê." ga tai akò nghut ri.

³⁴ Yhangmoq gi, gù dap ló kômù, Genesarat mau má jé wang ló bekò nghut ri.

³⁵ Háu mau má é bang gi, Yesuq lé wú sé kôjáng, awui ayàm má é bang banshoq lé kyô kat akò. Háu mù, byu pé gi, nõhpyo hui bang lhungháng lé, shui lé lô kômù,

³⁶ nõhpyo hui bang lé, Yhâng é bushi htâng má za lháng záng nhâng râ matú dúng tóngbán akò; Yhang lé záng é lhungháng bang gi, lhoq gè byí é hui bekò nghut ri.

15

Sansêng É Hkyô Eq A Sansêng É Hkyô

Mrk 7:1-23

¹ Hau htâng má, Hparishe pé eq tarâ sará pé ra-am gi, Yerusalem wà mó mai Yesuq chyáng jé lé lô kômù,

² "Náng é chángzô pé gi, hai mù lui, ichyí iwa pé é htungli lé a cháng kut akò lú? Yhangmoq gi, loq hí a chí é zang zô akò nghut ri." ga, lé tai akò.

³ Háu jáng, Yesuq tú tai é gi, "Nungmoq gi, hai mù, nungmoq é htungli é yanmai, Garai Gasâng é hkunmó lé a cháng kô é lú?"

⁴ Hkâsu mù gâ le, Garai Gasang gi, 'Nungmoq é ñnu iwa lé, hkungga keq.'* ga le, 'Ñnu iwa lé, nhing é sù ó yuq nghut kôle, sat pyâm é hui râ lhê.'* ga le, tai tô é nghut lhê.

⁵ Nghut kôlháng, nungmoq tai é gi, 'byù rayuq yuq, yhumsing é yhângnu yhângwa lé byi âng é zè lé, Garai Gasang lé byi rá chyunghuq nghut lhê ga tai é nghut jáng,

⁶ haú yuq gi, yhangwa lé hkungga nó a ra.' gâ akô nghut ri. Haú đông mai, nungmoq gi, nungmoq é htunglí é yanmai, Garai Gasang é mungdang lé he-ngik pyâm akô nghut ri.

⁷ Gegùn labyoq kut bang é! Nungmoq eq séng luí, myiqhtoi Esai-aq htoí tô é dang gi, têng ri.

⁸ Myiqhtoi dang haú gi,

'Byù shí bang gi, nhut htoq mai za Ngo lé hkunggâ akô;
yhangmoq é myit nhiklhum gi, Ngò eq wê gâng nyi akô.

⁹ Yhangmoq, Ngo lé noqkuq nyi kô é gi, akôm má za nghut nyi ri;
hkâsu mù gâ le, yhangmoq é mhoqshit hkyô pé gi, byù đông mai
mhoqshit é hkyô pé za nghut nyi ri.*

gâ é nghut lhê." gâ ri.

¹⁰ Hau htâng, Yesuq gi, shiwa byu pé lé, Yhâng chyáng wut yù luí, "Gyô yù mù, sé lo keq.

¹¹ Nhut má wang lo é haí jung le, byù lé a sanséng dut nhang é a nghut, nhut mai htoq lo é pé sheq, byù lé a sanséng dut nhang é ru nghut lhê." ga taí ri.

¹² Haú hkún, haú chángzô pé gi, Yhâng chyáng lé lô kôluí, "Hparishe pé gi, shí hkyô lé wó gyo mù, nhik-yô nyi bùm kô é lé, Nang sé lhê lhu?" ga myi kôjáng,

¹³ Yhang gi, "Mauhking htoq tsáng myhâng mã é Ngá Wa a hô tô é agàm hkangmó gi, apùn eq roq nut pyâm é hui rã nghut lhê.

¹⁴ Yhangmoq é yanmai, myit hkâ-myo kó; yhangmoq gi, myoqjit bang nghut kôle, myoqjit é bang lé hkyô-u she é bang nghut akô. Myoqjit yhangchang hkyô-u she lhum é nghut le gi, í yuq é yhang donghkong má byit gyó kó rã za nghut lhê." ga tù taí ri.

¹⁵ Haú hkún, Petruq gi, "Ngamoq lé, dangtú hau é lichyúm taí sân kyo laq." ga taí jáng,

¹⁶ Yesuq gi, "Nungmoq, ahkuí le haú-í yhang go nyi ashi kô luq?

¹⁷ Nhut má wang lo é haí jung le, wamdau hkaú má jé wang ló mù, gungdu mai dum htoq ló é nghut lhê.

¹⁸ Nghut kôlhang, nhut mai htoq lo é gi, myit nhiklhum mai htoq lo é nghut mù, byù lé a sanséng dut nhang ri.

¹⁹ Hkâsu mù gâ le, myit nhiklhum mai htoq lo é gi, agè ashop é đông myit é hkyô pé, byù sat é hkyô, su-myi sulàng lú hkyô, ashop é đông gungsho zùm yap é hkyô, hkaú é hkyô, a tengmán é saksé hkâm é hkyô, lumù gansang é hkyô pé nghut ri.

²⁰ Haú pé gi, byù lé a sanséng dut nhang é hkyô pé nghut ri; loq a chí e za zo shuq é gi, byù lé a sanséng a dut nhang é nghut lhê." ga taí ri.

Hkanan Myiwe Myhí Rayuq É Lumjáng Myit

Mrk 7:24-30

²¹ Hau htâng, Yesuq gi, haú mai Turuq eq Sidun mau shut htoq e ló bê nghut ri.

²² Haú hkún, haú mau má nyi é Hkanan myiwe myhí rayuq gi, Yhâng chyáng lé jé mù, "Dawiq é Yhangzo, Yhumsing é, ngo lé shogyô yù laq ô! Ngá byizo gi, nat gang wang júng mù, gyai yhang nò gyn nyi ri." ga taí garú ri.

²³ Nghut kôlhang, Yesuq gi, dang rahkun le a tù taí nghut ri. Haú mù, Yhâng é chángzô pé gi, Yhâng chyáng lé jé kômù, "Myiwe myhí haú lé ló nhang pyâm

* 15:9 Esai 29:13

aq; haí mù gà le, yhang gi, nga-nhông é htâng má châng garû nyi ri." ga tai akô.

²⁴ Yesuq gi, "Byuq byuq é sau pé su nghut nyi é Israelaq byu pé chyáng sheq, Ngo lé nhang kat é ru nghut lhê." ga tai ri.

²⁵ Haú hkûn, myiwe myhí haú gi, Yhâng é hí má lé mù hkyihput htuq luí, "Yhumsîng ê, ngo lé garúm yû laq ô!" ga tai ri.

²⁶ Yesuq gi, "Zô wui chyáng mã é zoshuq lé yù mù, hkuí pé lé byi tsô é jung a nghut." ga tù tái jáng,

²⁷ myiwe myhí haú gi, "Yhumsîng ê, haú kúm nghut ri; nghut kôlhâng, hkuí pé lhâng, yhumsîng hpô é zohpoq mai gyó é zang cham zang htâng lé, zô akô mhai." ga dum tái ri.

²⁸ Haú mù, Yesuq gi, "Myiwe zo ê, náng é lumjîng myit gi, kô nyi ri! Nàng dúng é hkyô lé gyo byi bê nghut lhê." ga tù tái ri. Haú hkûn jáng, myiwe myhí hau é byizo le ge byuq bê nghut ri.

Byù Myi Hkyîng Lé Byi Tsô É Hkyô

Mrk 8:1-10

²⁹ Yesuq gi, haú mai htoq ló luí, Galile nhông yàm má é jé mù, bùm shut doq ló luí, ló zung nyi ri.

³⁰ Haú hkûn, byù moq mó gi, hkyí hten bang, myoqjit bang, gung-yùn bang, nhut jit bang eq nò bang gotú myo myo lé shui lé lô kômù, Yhâng é hkyî wang má lé nyhi to kô é nghut luí, Yhang gi, haú bang lé lhoq gê byí ri.

³¹ Haú shiwa byu pé gi, nhut jit bang dang wó nyò kô é lé le, gung-yùn bang ge byuq é lé le, hkyí hten bang hkyô wó sô é lé le, myoqjit bang myoq wó myang é lé le, myàng kôjáng, wú maú kômù, Israelaq é Garai Gasang lé hkya-ôn bum akô nghut ri.

³² Yesuq gi, Yhâng é chángzô pé lé wut yù mù, "Ngò, shí bang lé wú shogyô ri; yhangmoq gi, Ngò eq rahá nghut nyi é sum nyí bò bê, haí le a myàng zo kó nghut ri. Yhangmoq, hkyolat má mut yut ló yut kó abe, yhangmoq zòmut to gũ lé, Ngò a nhang kat naù." ga tai ri.

³³ Haú hkûn, Yhâng é chángzô pé gi, "Isù é yoso má nhîng, byù shí myhò bang lé luq shoq byi tso râ zoshuq gi, hkarâ é wó râ lúh?" ga myí akô.

³⁴ Yhang gi, "Nungmoq, muk hkâ-myhó long wó akô lúh?" ga tau myi jáng, yhangmoq gi, "Muk nyhit long eq ngo-nú zo ratsuí wó lhê." ga tù tái akô.

³⁵ Haú mù, Yhang gi, byù hpûng lé, myigùng htoq má zùng nhang ri.

³⁶ Hau htâng, Yhang gi, haú muk nyhit long eq ngozo lé yù mù, jeju ban hkya-on jáng, myhik hpé luí, haú chángzô pé lé byi jáng, yhangmoq gi, byù hpûng lé gàm byí akô nghut ri.

³⁷ Yhangmoq lhunglhâng bang zô gyí bùm kô é htâng má, haú chángzô pé gi, amyit ahtâng lé nyhit mung byíng shoq wó guq tsîng yu ashí kô nghut ri.

³⁸ Haú hkûn zô é bang má, myiwe wui eq zoshâng wui lé a nghap lhôm é za, yuggè wui baú myi hkyîng yuq bo ri.

³⁹ Yesuq gi, byù hpûng lé ló nhang pyâm é htâng má, lhai má wang ji mù, Magadan mau shut dap e ló bê nghut ri.

¹ Hparishe pé eq Saduke pé gi, Yesuq chyáng lé jé kômù, Yhang lé chyam wú é dông, mauhkúng má é kumlhá kut shit rá matú, dúng akô.

² Haú mù, Yhang gi, yhangmoq lé, "Nungmoq gi, myinhâng jé jáng, 'Mau hpong rá nghut lhê, hkâsu mù gâ le, mauhkúng ne ri.' ga le,

³ napkyó lé nghut jáng, 'Hkû-nyí laidun lò rá nghut lhê, hkâsu mù gâ le, mauhkúng nè mù, noq ri.' ga le, lhaq taí akô. Nungmoq gi, mauhkúng é isâm lé wú mù sê gam hkoq yú kô é nghut kôlhâng, shí ipyat lhê é kumlhá lé gi, a sê gam hkoq yú kó nghut ri.

⁴ Agê ashop é eq lhum a zuí é ipyat shí gi, limik kumlhá lé ho nyi akô; nghut kôlhâng, Yonaq é kumlhá mai lai luí, gotú hai le tún shit rá a nghut." ga taí ri. Hau htâng, Yesuq gi, yhangmoq chyáng mai htoq ló bê nghut ri.

Hparishe Pé Eq Saduke Pé É Múnchi
Mrk 8:14-21

⁵ Yhangmoq, nhông hé hpoq shut gû dap ló kô é hkûn, haú chángzô pé gi, muk yu chûng rá lé tô-myhí pyâm akô.

⁶ Haú hkûn, Yesuq gi, "Hparishe pé eq Saduke pé é múnchi lé, sidiq luí, koi pyâm nyí keq." ga, yhangmoq lé taí kat ri.

⁷ Yhangmoq gi, "Nga-nhúng, muk a yu chung é yanmai, haú su ga taí é nghut ri." ga luí, taí lhum bum akô nghut ri.

⁸ Yhangmoq haú su taí lhum nyí kô é lé Yesuq sé jáng, yhangmoq lé, "Lumjáng myit shaú é bang ê, muk a bo é hkyô lé, hai mù taí lhum nyi akô lúhú?

⁹ Ahkuí jé shoq, nungmoq gi, a sê gyo shi kó lúhú? Muk ngo lông èq byù ngo hkyíng lé byi tsô é htâng, nungmoq hkâ-myhó mung wó dum guq tsíng yú kô é lé le,

¹⁰ muk nyhit lông èq byu myi hkyíng lé byi tsô é htâng, nungmoq hkâ-myhó mung wó dum guq tsíng yú kô é lé le, nungmoq a myit bun kó lúhú?

¹¹ Ngò gi, muk eq séng luí taí é a nghut é lé, nungmoq, hkâsu mù a sê gyo kô é lúhú? Hparishe pé eq Saduke pé é múnchi lé koi pyâm keq nghu taí é ru nghut lhê." ga taí ri.

¹² Haú hkûn sheq, Yhang taí é gi, muk má chung é múnchi lé koi pyâm rá matú taí é a nghut e za, Hparishe pé eq Saduke pé é mhoqshit hkyô lé koi pyâm rá matú taí é ru nghut é lé, yhangmoq sê gyô akô nghut ri.

Yesuq Lé, Petruq Yín Yu É Hkyô
Mrk 8:27-30; Luk 9:18-21

¹³ Yesuq gi, Kesare-Hpilipi wà mó nâm má é mau má jé é hkûn, Yhâng é chángzô pé lé, "Haú Byu Yhangzo gi, ó yuq nghut lhê ga, byu pé taí akô lúhú?" ga myí ri.

¹⁴ Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, Yeremiaq, a nghut jáng, gotú myiqhtoi rayuq yuq nghut ri ga, taí akô." ga tú taí kôjáng,

¹⁵ Yhang gi, "Haú jáng, nungmoq gi, Ngo lé ó yuq nghut lhê nghu akô lúhú?" ga, yhangmoq lé xoq myí ri.

¹⁶ Haú hkûn, Simun Petruq gi, "Nàng gi, rú dui nyi é Garai Gasâng é Yhangzo, Hkrisduq nghut ri." ga tú taí ri.

¹⁷ Haú mù, Yesuq tú taí é gi, "Yonaq é yhangzo Simun ê, nàng gi, hkungsô wó nyi ri; hkâsu mù gâ le, nang lé haú hkyô tún shit é gi, byù mai a nghut, mauhkúng htoq má nyi é Ngá é Íwa mai tún shit é ru nghut lhê.

18 Ngò, nang lé tái lé, nàng gi, Petruq* nghut lui, luqgok shi má, Ngò, Ngá é noqkuq hpúng lé xuq to rá nghut mù, haú moming hkúmdong pé gi, hpúng haú lé wó ùng rá a nghut.

19 Mauhkung mingdán é zoqshi pé lé, Ngò, nang lé ap byi rá nghut lhê; myigùng htoq má, nàng tuí to má tuí to lé, mauhkung htoq má le, tuí to rá nghut lhê; myigùng htoq má, nàng lhoq lhut má lhoq lhut lé, mauhkung htoq má le, lhoq lhut byi rá nghut lhê." gâ ri.

20 Hau htàng, Yhang Hkrisduq nghut é hkyô lé, ó lé le a tái kyo rá matú, Yhàng é chángzô pé lé tái hkúm kat ri.

Yesuq Gi, Yhang Shi Rá Lé Hí Te Tai É Hkyô

Mrk 8:31–9:1; Luk 9:22-27

21 Yesuq gi, Yhang Yerusalem wá mó má ló mù, suwún wui, hkyangjong agyi pé eq tará sará pé é loq má, zing-ri é myo myo hui zo lui, sat pyâm é hui rá rá nghut kôle, sum nyí nghù rá buinyi má, lhoq toq yu é hui rá nghut é hkyô lé, haú hkún mai, Yhàng é chángzô pé lé tái kyo hi ló bê nghut ri.

22 Haú mù, Petruq gi, Yhang lé rahkyam shut shui htoq yu mù, "Yhumsing é, haú hkyô Náng chyáng hkâ-nhám le a dut sháng gaq." ga Yhang lé tân ri.

23 Yesuq gi, lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut mù, Ngá é matú myit leqbat jowò nghut ri." ga tái ri.

24 Hau htàng, Yhang gi, Yhàng é chángzô pé lé, "Ngá htàng cháng nàu sù ó yuq nghut kôle, yhumsing gùng yhumsing he-ngik pyâm mù, yhumsing é tapzing lé waq chùng lui, cháng ra rá nghut lhê.

25 Hkâsu mù gâ le, yhumsing é asak lé hkyi yù nàu sù ó yuq nghut kôle, asak sum rá nghut lhê; nghut kôlhang, Ngá é yanmai, yhumsing é asak sùm pyâm é sù kúm gi, asak wó yù rá nghut lhê.

26 Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, hai akyù bò rá lhu? Byù gi, yhumsing é asak woi-nyí lé, hai eq wó htaí yù rá lhu?

27 Haú Byu Yhangzo gi, Yhàng Wá é hpungwup shingkang bo é eq, Yhàng Wá é maumang lagyô pé eq rahá jé lé ló rá nghut lhê; haú hkún, Yhang gi, yuq hkgámó lé, yhumsing kut lai bê eq rajung za akyù byi rá nghut lhê.

28 Ngò, nungmoq lé teng za tái kôlé, ahkuí shi má yap to bang ra-am gi, haú Byu Yhangzo, Yhàng é mingdán eq jé lé lo é lé, a myang é za shi kó rá a nghut." ga tái ri.

17

Yesuq, Isâm Htaí Lo É Hkyô

Mrk 9:2-13; Luk 9:28-36

1 Hkyuq nyí lai htàng má, Yesuq gi, Petruq lé le, Yakuq eq yhanggu Yohan nhiktàng lé le, shui chùng mù, yhangmoq baú myhang é bùm ralhùm má doq ló akó.

2 Haú má, yhangmoq é myoq hí tề má, Yesuq é ihpyô isâm htaí byuq mù, Yhàng é myoqdong gi, bui su duqbó tồ é eq, Yhàng é mebu gi, maubó su hpyu zan tồ ri.

3 Haú hkún jáng, Mosheq eq Eliyaq gi, yhangmoq é hí má htoq shit mù, Yesuq eq dáng nyo lhùm nyi akó.

* 16:18 Grik đông Petruq gâ é gi, luqgok lé gâ é nghut lhê.

4 Haù mù, Petruq gi, Yesuq lé, "Yhumsîng ê, shí jowò má nga-nhúng nyi le ge ri. Nàng ô nau é nghut le gi, Náng é matú ralhùm, Mosheq é matú ralhùm, Eliyaq é matú ralhùm kut, ngò zúm sùm lhum saí bá." ga taí ri.

5 Petruq dang ru taí nyi ashí le, duqbó é mhut gi, yhangmoq lé htup zíng lô mù, mhut hkaù mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhang má Ngò myit dik nyi lhê. Yhâng é dang gyo keq." gâ ri.

6 Haù su gâ é htê lé, chángzô pé wó gyo kôjáng, yhangmoq gi, gyuq nán mù, myigùng má gop bùm bekô nghut ri.

7 Nghut kôlhang, Yesuq gi, yhangmoq chyáng jé lé lô mù, yhangmoq lé loq èq záng kat luí, "Toq keq, hkâgyuq kó." ga taí ri.

8 Yhangmoq tu wú kat kô le, Yesuq mai lai luí, ó lé le a myàng lo kó nghut ri.

9 Bùm mai taù gyó lô kô é hkùn, Yesuq gi, "Ahkuí nungmoq myang é hkyô lé, haù Byu Yhangzo shi é mai lhoq dui toq yu é a hui hui gi, ó lé le hkâtaí kyo kó." ga, yhangmoq lé taí hkùm tô ri.

10 Haù jáng, chángzô pé gi, "Eliyaq hí lé ra rà nghut lhê ga, tarâ sará pé haì mù taí kô é lú?" ga, Yesuq lé myí akó.

11 Haù hkùn, Yesuq gi, "Eliyaq hí lé luí, lhunglhang lé hen lajâng to rà gâ é gi, têng lhê.

12 Nghut kôlhang, Ngò, nungmoq lé taí kôlé, Eliyaq gi, jé lé bê nghut lhê; nghut kôle, yhangmoq gi, yhang lé a lhom wú sé kômù, yhangmoq ô nau é dông banshoq kut bekô nghut ri. Haù eq rajung za, haù Byu Yhangzo le, yhangmoq é loq má hpuzo rà nghut lhê." ga tú taí ri.

13 Haù hkùn sheq, Yhang taí nyi é gi, Wui-myhup Sará Yohan eq sêng é hkyô nghut é lé, haù chángzô pé sê gyô akó nghut ri.

Nat Wang Júng Sù Lé Lhoq Gê Byi É Hkyô

Mrk 9:14-32; Luk 9:37-45

14 Yhangmoq, byù moq mó pé chyáng dum taù jé lô kô é hkùn, byù rayuq gi, Yesuq chyáng lé jé mù, hkyihput htuq luí,

15 "Yhumsîng ê, ngá é yuqzo lé shogyô yù laq; yhang gi, mhúngtuq tuq luí, gyai yhang jamjaù nyi ri. Myihkyóm má le, wui má le, anum num lêng wàng wàng dut nyi ri.

16 Yhang lé, Náng é chángzô pé chyáng shuí ê kôlhang, yhangmoq a wó lhoq gê byi kó nghut ri." ga taí ri.

17 Haù mù, Yesuq gi, "Lumjíng myit a bo é eq agè ashop é amyù pé ê, Ngò gi, hkâ-myháng jé shoq nungmoq eq rahá nyi mù, wó jân nyi rà lú? Yuqgè zo haù lé, Ngá chyáng shuí lé lô keq." ga tú taí kat ri.

18 Yesuq gi, nat gang lé tân kat jáng, nat gang haù gi, yuqgè zo haù yuq chyáng mai htoq lò byuq bê nghut mù, haù hkùn jáng, yuqgè zo haù gi, ge byuq bê nghut ri.

19 Hau htâng, chángzô pé gi, ó a nyi é u má, Yesuq chyáng lé lô kômù, "Nngamoq gi, haì mù, nat haù lé a wó hkat htoq é lú?" ga, lé myi kôjáng,

20 Yhang gi, "Nungmoq é lumjíng myit shaù é yanmai nghut ri. Ngò, nungmoq lé teng za taí kôlé, nungmoq é lumjíng myit anghsi cham í za hkâlhang bò kô é nghut le gi, bùm shí lé, 'Hé shut htot lò aq.' ga taí le, htot rà nghut lhê. Nungmoq a wó kut é haì lhang joq rà a nghut.

²¹ Shí jung gi, kyûdung é eq zoshuq gám é dông za a nghut jáng, a htoq ló é nghut lhê.*" ga dum tâi ri.

²² Yhangmoq, Galile mau má rahá zup nyi kô é hkûn, Yesuq gi, yhangmoq lé, "Haû Byu Yhangzo gi, byu pê é loq má ap pyâm é hui zo râ nghut lhê.

²³ Haû bang gi, Yhang lé sat pyâm kô râ nghut lhê; nghut kôlhâng, Yhang gi, shi é htâng sum nyi nghû râ nyi má lhoq dui toq é hui râ nghut lhê." ga tâi ri. Haû mù, haû chángzô pé gi, gyai yhang gyô yón nyi bekô nghut ri.

Noqkuq Yhûm Hkansê Kat É Hkyô

²⁴ Yesuq eq Yhâng é chángzô pé gi, Kaperna-um wà má jé kô é hkûn, noqkuq yhûm hkansê hkyû bang gi, Petruq chyáng lé jé kômù, "Nungmoq é sará gi, noqkuq yhûm hkansê a kat lú?" ga myi akô.

²⁵ Petruq gi, "Kat lhê." ga tâi ri.

Hau htâng, Petruq yhûmhkaû má wang ló le, Yesuq hí lhom taí é gi, "Simun é, mingkan hkohkam pé gi, kang eq hkansê pé lé, ô pê chyáng mai guq yu akô lú? Yhumsing byu pê chyáng mai lú? Haû a nghut jáng, gôbâng chyáng mai lú? Nang, hkâsu wó myit lhê lú?" gâ ri.

²⁶ Haû mù, Petruq gi, "Gôbâng chyáng mai nghut ri." ga tâi jáng, Yesuq gi, "Haû su nghut le gi, yhumsing byu pé gi, lut akô nghut ri.

²⁷ Nghut kôlhâng, yhangmoq é i-myt a ngón a dut kó sháng gaq, nhông má é mù, ngo-nhe é hkyô aq. Sâng-hi wó nhê yu é ngozô é nhut lé lêng há kat jáng, ngùn htêngchap rachap lé myàng râ nghut lhê. Haû lé yù mù, Ngá é matú eq náng é matú, yhangmoq lé ló byi aq." ga tâi ri.

18

Kô Dik Sû Gi, Ó Yuq Nghut Lhê Lú?

Mrk 9:33-37, 42-48; Luk 9:46-48; 17:1-2

¹ Haû hkûn, haû chángzô pé gi, Yesuq chyáng lé jé kômù, "Mauhkûng mingdán má, kô dik sû gi, ó yuq nghut lhê lú?" ga myi akô.

² Yesuq gi, zoshâng zo rayuq lé wut yù mù, yhangmoq é gung gung má shap to lui,

³ taí é gi, "Ngò, nungmoq lé teng za taí kôlé, nungmoq gi, myit htaí lhik lui, zoshâng zo wui su dut kô é za a nghut jáng, mauhkûng mingdán má hkâ-nhám le wó wâng kô râ a nghut.

⁴ Haû mù, zoshâng zo shí yuq su, yhumsing é i-myt wó lhoq nyhum é sû ó yuq nghut kôlé, mauhkûng mingdán má, kô dik sû nghut ri.

⁵ Shí sû é zoshâng lé, Ngá é mying mai hap yu é sû ó yuq nghut kôlé, Ngo lé hap yu é sû nghut bê.

⁶ Nghut kôlhâng, Ngo lé lumjing é zoshâng wui mà é rayuq yuq lé, mara kut shut nhang é sû gi, yhâng é lingzing má luqluí long mó tuí hut byi lui, nik é wuimau má, dú hkyô pyâm é hui é nghut le gi, yhâng é matú je gè râ nghut lhê.

⁷ Haû mingkan gi, byu pé lé mara kut shut nhang jang joq é yanmai, dingnyé wó ri. Haû mara kut shut nhang hkyô gi, htoq lugù bê; nghut kôlhâng, haû lé lhoq htoq sû gi, dingnyé wó ri.

⁸ Náng é loq eq, a nghut jáng, náng é hkyi eq, nang lé mara kut shut nhang é nghut le gi, haû lé hpyit dú pyâm aq. Ahtum abyuq é myi má, hkyi hkúm loq

* 17:21 Chyûmbun shí gi, chyûmding myo myo má a bo é nghut lhê.

hkúm gû dú hkyô pyâm é hui râ htoq má, hkyî loq a hkúm é za, asak wó yu é nghut le gi, náng é matú je ge ri.

⁹ Náng é myoqjí eq, nang lé mara kut shut nhang é nghut le gi, haú lé lap choq yù mù, dú pyám aq; myoqjí í jí dap gû ngaraí myi má dú hkyô pyâm é hui râ htoq má, myoq rají eq za, asak wó yu é nghut le gi, náng é matú je ge ri.

Byuq Byuq É Sau
Luk 15:3-7

¹⁰ Shí sù é zoshâng zo wuî mã é rayuq lé lháng a wú tiq râ matú, sidiq nyi keq. Hkâsu mù gà le, Ngò, nungmoq lé taí kôlé, mauhkûng mã é yhangmoq é maumang lagyô pé gi, mauhkûng htoq mã é Ngá Wâ é myoqdong lé, hkâ-nhám le myang nyi akò.

¹¹ (Hkâsu mù gà le, haú Byu Yhangzo gi, byuq byuq bê bang lé hkyi yù râ matú, jé lé é nghut lhê.)*

¹² Byù rayuq gi, sau rashô du wó é nghû sháng, sau haú gû mã é radu byuq byuq é nghut jáng, haú gaú xe gaú du lé, bùm pé má nyhi pyâm to luí, byuq byuq é sau lé a châng ho é nyi râ lúhú? Haú lé, nungmoq hkâsu wó myit ngam akò lúhú?

¹³ Ngò, nungmoq lé teng za taí kôlé, yhang gi, haú byuq byuq é sau haú lé myang ho é hkún, a lám byuq é sau gaú xe gaú dù é matú gabú é htoq má, haú dú matú je riyhang gabú ri.

¹⁴ Haú eq rajung za, mauhkûng htoq mã é nungmoq é Íwa gi, shí tiq bang mã é rayuq htên byoq byuq râ lé lháng, ô nau é a nghut.

Mara Kut Shut É Gumang Hpó Lé Hkâsu Kut Râ Hkyô

¹⁵ Náng é gumang hpó, nang lé mara kut shut é nghut jáng, yhâng chyáng ê mù, nungnhik baú za nghut é hkún, yhâng é mara lé tún shit aq. Yhang, náng é dang lé gyô é nghut jáng, nang gi, gumang rayuq dum wó bê nghut ri.

¹⁶ Nghut kôlhâng, yhang, náng é dang lé a gyô é nghut jáng, 'Mara hun é hkyô hkangmó lé, saksé í yuq sum yuq lôm jáng, wó lhoq teng sháng gaq.'*¹⁶ gâ tô é eq rajung za, nang, gotú byù ra-í yuq lé shuí chûng aq.

¹⁷ Yhang gi, haú bâng é dang lé le a lhom yu é nghut jáng, haú hkyô lé, noqkuq hpûng má shit kyo aq; hpûng é dang lé le a gyô é nghut jáng, yhang lé, a lumjîng é byù rayuq dông le, kang guq sù rayuq dông le sôn pyám aq.

¹⁸ Ngò, nungmoq lé teng za taí kôlé, myigùng htoq má, nungmoq tuí to má tuí to lé, mauhkûng htoq má le, tuí to râ nghut lhê; myigùng htoq má, nungmoq lhoq lhut má lhoq lhut lé, mauhkûng htoq má le, lhoq lhut byi râ nghut lhê.

¹⁹ Ngò, nungmoq lé dum taí kôlé, myigùng htoq má, nungmoq mã é í yuq myit hui luí, haí lé dung kôlhâng, mauhkûng htoq mã é Ngá Wa gi, haú nhik lé gyo byi râ nghut lhê.

²⁰ Hkâsu mù gà le, Ngá myîng lé lang luí, í yuq sum yuq zup zîng é jang hkâmá nghut kôlhâng, haú bâng é gyoro má Ngò nyi lhê." gâ ri.

Shogyo Nhikmyin A Sê É Jùn Hpô É Dangtú

²¹ Haú hkún, Petruq gi, Yesuq chyáng hui é mù, "Yhumsîng ê, ngá é gumang, ngo lé mara kut shut é nghut le, yhang lé hkâ-myhó dâm mara hkyut byi ra râ lúhú? Nyhit dâm jé shoq hkyut byi ra râ lúhú?" ga myi ri.

* **18:11** Bun zo shí gi, chyúmding myo myo má a bo é nghut lhê. * **18:16** Tará Pun 19:15

²² Haù jáng, Yesuq tù taí é gi, "Ngò, nang lé taí lé, nyhit dâm za a nghut, nyhit xe nyhit tú dâm hkyut byi râ lê.

²³ Mauhkúng mingdán gi, yhumsing é dui-nhâng zoshâng wui é jihpán lé jep nau é hkohkâm rayuq eq du ri.

²⁴ Yhang gi, jihpán lé jep hi lô é u lé, yhâng chyáng ngùn wan myo myo chyín dap to sù lé shuí lé lo akô.

²⁵ Haù yhumsing hpó gi, haù yuq chyín a wó xap é yanmai, chyín wó yú râ matú, yhang lé le, yhangmyi lé le, yhangzo banshoq eq yhang wó é zèhkoq banshoq lé le, ùng pyám râ hkunmó hkyô kat ri.

²⁶ Haù mù, dui-nhâng zoshâng haù yuq gi, yhâng é hí má hkyihput htuq luí, 'Ngo lé myit hìng byi shi laq; banshoq lé, ngò xap rà.' ga dúng tôngbán ri.

²⁷ Haù dui-nhâng zôshang é yhumsing hpó gi, haù yuq lé wú shogyo luí, chyín banshoq lhut pyám byi mù, nhang kat ri.

²⁸ Nghut kôhlang, dui-nhâng zoshâng haù gi, htoq lô mù, yhang lé, denari† rashô chyín dap tô é dui-nhâng zoshâng luzúm rayuq lé myàng jáng, haù yuq é lingzing má gyaq myhik zing to mù, 'Ngo lé dap tô é chyín hân xap aq!' ga taí ri.

²⁹ Haù hkùn, yhâng é luzúm dui-nhâng zoshâng haù gi, yhâng é hí má hkyihput htuq luí, 'Ngo lé myit hìng byi shi laq; ngò xap rà.' ga dúng tôngbán ri.

³⁰ Nghut kôhlang, yhang gi, a gyo byí e za, yhâng é chyín dum wó xap é hkùn jé shoq, haù yuq lé htóng hkyô pyám nhâng ri.

³¹ Gotú dui-nhâng zoshâng wui gi, haù hkyô lé myàng kôjáng, i-myt wú nô kôluí, yhangmoq é yhumsing hpó lé, haù hkyô banshoq lô taí kyô akô.

³² Haù mù, haù yhumsing hpó gi, dui-nhâng zoshâng haù lé wut hâng yù mù, 'Agè ashop é dui-nhâng zoshâng è, nang, ngo lé dúng tôngbán é yanmai, nang, ngo lé dap é chyín banshoq lé, ngò lhut pyám byi bê nghut lê mhai.

³³ Haù su é nhìng, ngò, nang lé shogyô yu é su, náng é luzúm dui-nhâng zoshâng lé, nang ge shogyô yu lê a nghut lúhú?" ga taí luí,

³⁴ yhang gi, nhikjum yo mù, yhâng é chyín ban xap é hkùn jé shoq, jamjau hui zo râ matú, yhang lé, htóng suwún pè chyáng ap byí pyám bê nghut ri.

³⁵ Nungmoq é gumang wui lé, nungmoq é myit mai mara a wó hkyut byi kô é nghut jáng, mauhkúng htoq tsáng myhâng mã é Ngá Wa le, nungmoq lé haù dông kut râ nghut lê." gâ ri.

19

Myi Làng Gâng É Hkyô

Mrk 10:1-12

¹ Yesuq gi, mhogshit é dang haù pé lé ban taí jáng, Galile mau mai htoq lô mù, Yodan làng tù tap mã é Yuda mau mã é jé ri.

² Byù moq mó gi, Yhâng htàng cháng kô é nghut mù, Yhang gi, haù bang mã é nòhpyo hui bang lé, haù má lhoq gè byí ri.

³ Haù hkùn, Hparishe pé ra-am gi, Yhâng chyáng lé jé kômù, Yhang lé chyam wú é dông, "Byù rayuq gi, hai hkyô mai nghut nghut, yhumsing é yhangmyi lé lhoq kang pyâm le, tarâ wang lê lúhú?" ga myí akô.

⁴ Haù jáng, Yhang tù taí é gi, "A-nham sâng-hi lé, Hpân Sù, 'byu hpan é hkùn, yuqgè eq myiwe lé hpan é nghut lê."*

† 18:28 Denari rachap gi, ra-nyí lhè é byù rayuq é zuihpau eq wui ri. * 19:4 Apùn 1:27

⁵ 'Hau é yanmai, yuqgè gi, yhumsing é înu îwâ chyáng mai htoq luí, yhangmyi eq rahá rading ralhum za kut nyí mù, yhangnhik gi, gungsho ralhum za dut byuq kó râ nghut lhê.[✧] ga kâ tô é lé, nungmoq a nghap wú kó lúhú?

⁶ 'Hau mù luí, yhangnhik gi, í yuq a nghut lô e za, rayuq za dut bê nghut ri. 'Hau mù luí, Garai Gasang lhoq tsúm tô é lé, byù gi, a lhoq kang sháng gaq." gâ ri.

⁷ 'Hau hkûn, yhangmoq gi, "Hau lé nhing, yuqgè rayuq gi, lhoq kang laiká za ká byi mù, yhangmyi lé wó nhang pyâm lhê ga, haí mù, Mosheq, hkunmó hkyô tô lhê lúhú?" ga, Yhang lé dum taú myí akô.

⁸ 'Hau mù, Yesuq gi, "A-nham sâng-hi mai gi, hau dông a nghut. Nghut kôhang, nungmoq é myit nhikhlum htân kô é yanmai, nungmoq é yhangmyí pé lé lhoq kang râ ahkáng, Mosheq byí tô é ru nghut lhê.

⁹ 'Ngò, nungmoq lé taí kôlé, sulàng lú é za a nghut jáng, yhumsing é yhangmyi lé kâng pyâm mù, myiwe gotú dum hâng yu é sú ó yuq nghut kôle, su-myi lú é sú dut bê." ga, yhangmoq lé dum tû taí ri.

¹⁰ 'Hau hkûn, hau chángzô pé gi, "Myi làng hkyô má hau dông ru nghut le gi, a yu le hâng je ge nyo ri." ga taí akô.

¹¹ 'Hau mù, Yesuq gi, "Yuq hkangmó gi, dang hau lé wó hap yu é a nghut, wó hkâm râ jeju wó é bang za sheq, wó hap yu é nghut lhê.

¹² 'Byù ra-am gi, înu unghkaú mai yhang, yuqgè a jé gú hku lé lo é bang nghut akô; ra-am gi, góbâng èq kut é yanmai, yuqgè a jé dut byuq akô; ra-am nghut jáng, mauhkung mingdán é matú, yuqgè a jé râ dông kut yu pyâm akô nghut ri. Shí hkyô lé wó hap yu sú gi, hap yù sháng gaq." ga dum taí ri.

Zoshâng Wui Eq Yesuq

Mrk 10:13-16; Luk 18:15-17

¹³ 'Hau htâng, Yesuq mai zoshâng wui htoq má loq ke mù, shimân byi sháng gaq ga, zoshâng wui lé Yhâng chyáng shuí lé lo akô. 'Hau chángzô pé kúm gi, hau shuí lé lô bang lé lhom tân hkûm akô nghut ri.

¹⁴ 'Nghut kôhang, Yesuq gi, "Hau zoshâng wui lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, mauhkung mingdán gi, hau sú é bâng é mingdán ru nghut lhê." ga taí kat ri.

¹⁵ 'Yhang gi, zoshâng wui htoq má loq ke shimân byi mù, hau jowò mai htoq lô bê nghut ri.

Sùt Wó É Zorâm Rayuq É Hkyô

Mrk 10:17-31; Luk 18:18-30

¹⁶ 'Byù rayuq gi, Yesuq chyáng lé jé mù, "Sarâ ê, ahtum abyuq é asak wó yú râ matú, ge é muzó haí kut ra râ lúhú?" ga myí ri.

¹⁷ 'Hau jáng, Yesuq gi, "Ge é hkyô eq séng luí, haí mù Ngo lé myí lhê lúhú? Ge é Sù gi, rayuq za nyi lhê. Nang, asak dui é má wàng nau é nghut le gi, jep é tará pé lé cháng aq." ga tû taí ri.

¹⁸ 'Hau yuq gi, "Hká gú lé lúhú?" ga dum myi jáng, Yesuq gi, "'Byù hkâsat, su-myi hkâlú, hkânkau, a teng a mán é saksé hkâhkám,

¹⁹ 'nángnu nángwa lé hkungga aq,[✧] ga le, 'náng gung lé náng chyitdap e su, náng é chyangnâm má é bang lé le chyitdap aq.[✧] ga le bo tô ri." ga taí kat ri.

²⁰ 'Hau hkûn, zorâm hpó hau gi, "Hau pé banshoq lé, ngò cháng bê nghut lhê; haí kut râ ashí lúhú?" ga dum taú myí ri.

²¹ Yesuq gi, "Nàng, gumjup sủ dut nau le gi, ló mù, nàng wó é sutzè pé lé ùng pyám luí, myùng bang lé byí pyám aq; haù jáng, nàng, mauhkúng htoq má sutzè wó rà nghut lhê; haù mù, Ngá htàng lé cháng aq." ga tũ tai ri.

²² Zorâm hpó haù gi, sutzè gyai wó sủ nghut é yanmai, dang haù lé wó gyo jáng, gyai yhang myit a ngón é èq ló byuq bê nghut ri.

²³ Hau htàng, Yesuq gi, Yhâng é chángzô pé lé, "Ngò, nungmoq lé teng za tai kôlé, sutzè wó bang gi, mauhkúng mingdán wó wàng rà gyai yhang wui ri.

²⁴ Hau htoq agó, Ngò, nungmoq lé tai kôlé, sutzè wó sủ rayuq, Garai Gasâng é mingdán má wó wàng rà htoq, gola-uq radu âpno mai wó wang lai rá gi, je lui rá nghut lhê." ga tai ri.

²⁵ Haù chángzô pé gi, haù su gâ é lé wó gyo kôjáng, haù ru nghut le gi, ó yuq za hkyi yu é hui rá nghut lhê lúhú?" ga Yhang lé myí akò nghut ri.

²⁶ Haù hkùn, Yesuq gi, yhangmoq lé wú kat mù, "Haù hkyô lé byù mai gi, wó kut rá a nghut; nghut kôhang, Garai Gasang gi, lhunglhang lé wó kut é Sủ nghut lhê." ga tai ri.

²⁷ Haù hkùn, Petruq gi, Yhang lé, "Ngamoq gi, wó é gủ lhunglhang lé tô pyâm to lui, Nàng htàng cháng bê nghut lhê. Ngamoq, haù wá wó rà nghut lhê lúhú?" ga myí kat ri.

²⁸ Haù mù, Yesuq tũ tai é gi, "Ngò, nungmoq lé teng za tai kôlé, lhunglhang lé asik dum sai dut nhang é má, haù Byu Yhangzo gi, Yhâng é hpungwup bo é hkohkâm-tanghkuq má zùng tô é hkùn, Ngá htàng châng é bang nungmoq le, hkohkâm-tanghkuq raxe í lhùm htoq má zùng to kômù, Israelaq amyù raxe í hủ lé jéyâng kó rà nghut lhê.

²⁹ Ngá é yanmai, yhumsing é yhùm, nhiktàng wui, ìnu ìwa, zo dù wui eq yò pé rajung jung lé tô pyâm tô é sủ ó yuq nghut kôle, rashô tú akyù myo jat shoq wó rà nghut é htoq agó, ahtum abyuq é asak le, wó yủ rá nghut lhê.

³⁰ Nghut kôhang, hí nghut nyi é bang myo myo gi, htàng gyó byuq kó rá nghut mù, htàng gyó nyi bang yuq gi, hí bekô rá nghut lhê.

20

Tsibiyiq Hkyâm Mủ Zui Bang Lé Dangtũ Yu É Hkyô

¹ Hkâsu mù gâ le, mauhkúng mingdán gi, yhumsing é tsibiyiq hkyâm má mù zui nhâng rà langchyâng é lúng rà ga, napsùn noq le htoq e ló é hkyâm yhumsing eq du ri.

² Yhang gi, ra-nyí é matũ denari rachap byi rá đông, haù bang eq myit huí yù mù, yhangmoq lé, yhâng é tsibiyiq hkyâm má nhang hâng kat ri.

³ Napkyó gau hkyíng* kô má, yhang gi, htoq e ló le, hai mù le a kut é za, gai má yap tô é bang ra-am lé ê myang ri.

⁴ Haù mù, yhang gi, haù bang lé, 'Nungmoq le, ngá é hkyâm má mù é zui keq; byi âng é ahpau, nghut, nungmoq lé byi rá nghut lhê.' ga tai jáng, yhangmoq gi, e ló bekò nghut ri.

⁵ Hau htàng, yhang gi, raxe í hkyíng má le, myinhtàng sum hkyíng kô má le, dum htoq é mù, haù eq rajung za langchyâng pé é lung kat ri.

⁶ Myinhtàng ngo hkyíng kô má, yhang dum htoq e ló wú le, góbang ra-am le yap tô bum é lé, ê myâng mù, haù bang lé, 'Nungmoq gi, haù le a kut é za, ra-nyí buí haù mù shí má yap tô bum akò lúhú?' ga myi jáng,

* **20:3** Chyúmdang ra-am má, sum hkyíng ga chung tô é gi, Yudaq byu pé é ahkyíng nghut lhê. Yudaq byu pé é ahkyíng gi, napkyó hkyuq hkyíng mai ngaph hí lhê.

⁷ haú bang gi, 'Ngamoq lé, ó yuq èq le a lùng kô é yanmai nghut lhê.' ga taí ri. taí akô.

Haú hkún, yhang gi, 'Nungmoq le, ngá é hkyâm má mú ê zui keq.' ga taí ri.

⁸ Myinhâng jé jâng, tsibiyiq hkyâm yhumsing gi, yhâng é mú shuí u sù lé, 'Haú langchyang pé lé ji yù mù, je htâng má lung yu é bang mai hí luí, sâng-hi lung yu é bang jé shoq, mú zui hpau byi aq.' ga taí ri.

⁹ Myinhâng ngo hkyíng má mú wàng bang le, denari rachap chap wó yu bum akô.

¹⁰ Haú mù, je hí má mú wàng bang gi, yhangmoq je myo wó nhô ngam akô. Nghut kôlhâng, yhangmoq le, rayuq denari rachap chap za wó akô nghut ri.

¹¹ Yhangmoq gi, haú myhó za wó yu bùm kô é yanmai, haú hkyâm yhumsing lé,

¹² 'Shí bang gi, je htâng má mú lé wàng mù, nayí rahkum za mú zui kôlhâng, nàng gi, ra-nyí buigyùm chap bui htân yò má mú zuí é bang ngamoq eq rajung za byí ri.' ga mara hùn dang taí akô.

¹³ Nghut kôlhâng, haú hkyâm yhumsing gi, haú bang má é rayuq lé, 'Buinùm hpó ê, ngò, nang lé a tará é dông kut é a nghut. Denari rachap byi rá nghú, nàng eq ngò myit huí to bê a nghut lúhú?

¹⁴ Nàng wó àng é lé yu chùng mù, ló aq. Je htâng má mú lé wang é sù lé le, nang lé byí é myhó, ngò byi nau ri.

¹⁵ Ngá é ngùn lé, ngò kut nau é su a ge kut lúhú? Ngò, ge é kut le, nàng manôn ri lúhú?' ga taí ri.

¹⁶ Haú mù luí, htâng gyó nyí bang gi, hí bekô rá nghut mù, hí nghut nyí bang gi, htâng gyó byuq kó rá nghut lhê." gâ ri.

Yesuq Gi, Yhang Shí Râ Hkyô Lé Dum Tai Ri

Mrk 10:32-34; Luk 18:31-34

¹⁷ Ahkuí, Yesuq gi, Yerusalem wà mó shut doq ló nyi é u lé, haú chángzo raxe í yuq lé, gotú kut wut yù mù,

¹⁸ "Nga-nhúng gi, Yerusalem wà mó shut doq ló nyi lhê; haú Byu Yhangzo gi, hkyangjong agyi pé eq tarâ sará pê é loq má ap byí pyâm é hui rá nghut lhê; haú bang gi, Yhang lé, shí rá mara byi kó rá nghut é htoq agó,

¹⁹ jóng pyâm é, nhuq bat é eq tapzîng má jén sat pyâm é hui rá matú, haú tungbaù pé é loq má ap pyâm kó rá nghut lhê. Nghut kôlhâng, Yhang gi, sum nyí nghú rá buinyi má, lhoq dui toq é dum hui rá nghut lhê." ga taí ri.

Zô Nhk Matú Ínu Èq Dung Byí É Hkyô

Mrk 10:35-45

²⁰ Hau htâng má, Zebedi é yhangzô nhiktang é yhângnu gi, yhangzô nhik eq rahá jé lé lô kômù, rajung dung rá matú, Yesuq é hí má hkyihput htuq nyi ri.

²¹ Haú mù, Yesuq gi, "Nàng, hai ô nau ri lúhú?" ga yhang lé myi jâng, yhang gi, "Náng é mingdán má, shí ngá zô nhiktang lé, Náng é loqyò hkyam má rayuq, loqpaí hkyam má rayuq kut, zùng rá ahkáng byi laq." ga taí ri.

²² Haú hkún, Yesuq gi, "Nungnhik hai dúng nyi é lé, nungnhik a sé kó nghut ri. Ngò shuq rá góm[†] lé, nungnhik wó shuq kó rá lúhú?" ga myi jâng, yhangnhik tang gi, "Wó shuq lhê." ga tú taí akô nghut ri.

²³ Haú mù, Yesuq gi, yhangnhik lé, "Ngò shuq rá góm lé, nungnhik shuq ra kó rá za nghut lhê. Nghut kôlhâng, Ngá é loqyò, loqpaí hkyam má zùng rá

[†] 20:22 Góm gâ é gi, Yesuq, jamjau hui rá hkyô eq shí rá hkyô lé, taí nau é nghut lhê.

ahkáng lé gi, Ngò byi jung a nghut. Jowò háu pé gi, Ngá Wa hen to byi bâng é matú za ru nghut lhê." ga taí ri.

²⁴ Gotú chángzo raxê yuq gi, háu hkyô lé wó gyo kôjáng, háu nhiktâng lé nhik-yô akò nghut ri.

²⁵ Háu mù, Yesuq gi, yhangmoq banshoq bang lé wut tsíng yù luí, "Túngbaù pé lé uphkanq é ga bang gi, túngbaù pé lé up zô nyi kô é hkyô lé le, háu eq rajung za, yhangmoq é ming up suwún wuí le, yhumsing é ahkáng ayá lé chúng mù, up zô nyi kô é hkyô lé le, nungmoq sê lhê.

²⁶ Nungmoq chyáng gi, háu su a dut kó sháng gaq; háu Byu Yhangzo lháng gi, dojaú é lé hkam yù rá matú jé lé é a nghut é za, dojaú rá matú eq byù myo myô é matú, shíhtaí gunglik hkungga đông, Yhâng é asak lé byi pyám rá matú sheq, jé lé é ru nghut é su,

²⁷ nungmoq má, byù mó dut naù sù ó yuq nghut kôle, nungmoq é dui-nhâng zoshâng dut ra rá nghut lhê.

²⁸ Háu htoq agó, nungmoq má ushuq dut naù sù ó yuq nghut kôle, nungmoq é jùn dut ra rá nghut lhê." ga taí ri.

Myoqjit Í Yuq Myoq Dum Myang É Hkyô

Mrk 10:46-52; Luk 18:35-43

²⁹ Yesuq eq Yhâng é chángzô pé gi, Yeriho myuq mai htoq ló nyi kô é hkún, byù moq mó gi, yhangmoq é htâng má châng e ló bum akò.

³⁰ Háu hkyô yám má zung tô é myoqjit í yuq gi, Yesuq lai ló nyi é hkyô lé wó gyo kôjáng, "Dawiq é Yhangzo, Yhumsing ê, ngá-nhik lé shogyô yù laq ô!" ga, wut garú kat akò nghut ri.

³¹ Byù moq mó gi, yhangnhik zím byuq rá matú tân hkúm kôlhang, yhangnhik gi, "Dawiq é Yhangzo, Yhumsing ê, ngá-nhik lé shogyô yù laq ô!" ga, je riyhang htê mó eq wut garú kat akò nghut ri.

³² Háu mù, Yesuq gi, yap kat mù, "Ngò, nungnhik lé hái kut byi rá ô nau akò lhú?" ga, yhangnhik lé wut myí kat ri.

³³ Háu hkún, yhangnhik gi, "Yhumsing ê, ngá-nhik myoq myàng nau ri." ga tũ taí akò.

³⁴ Yesuq gi, yhangnhik lé wú shogyo luí, yhangnhik é myoqjí má ê záng byi ri. Háu hkún jáng, yhangnhik gi, myoq wó myâng kômù, Yhâng htâng cháng bekò nghut ri.

21

Yesuq, Yerusalem Wà Mó Má Wang E Ló É Hkyô

Mrk 11:1-11; Luk 19:28-38; Yhn 12:12-19

¹ Yesuq eq Yhâng é chángzô pé gi, Yerusalem wà mó eq chyâng lo nyi kô é hkún, Tsanlun Bùm má é Bethpage wà má jé ló kôjáng, Yesuq gi, chángzo í yuq lé,

² "Nungnhik, hí má é wà má ê keq; wà háu má, logúng zing radu lé, logúng zo eq rahá tuí to lánq é lé, ê myàng kó rá nghut lhê; háu lé hpyi yù mù, Ngá chyáng she lò keq.

³ Byù rayuq yuq, nungnhik lé rajung jung gâ lò jáng, 'Shí í du lé, háu Yhumsing chúng rá ri.' gâ nghú tũ taí keq; háu jáng, yhang, radá dâm nhâng byi rá nghut lhê." ga Yesuq taí luí, nhang kat ri.

⁴ Háu gi, myiqhtoi dang lhoq dik rá matú dut lo é nghut ri.

⁵ Myiqhtoi dang háu gi,

"Zi-un byizo* lé, shí su nghú keq; 'Wú aq, náng é hkohkâm gi, nú-nhâm é myit eq logúng htoq má ji mù, nghut bê, logúng zo htoq má ji mù, náng chyáng lé lô bê nghut ri.'"[✱]

gâ ri.

⁶Haú chángzô nhik gi, e ló mù, Yesuq taí kat é eq rajung za ê kut bekô nghut ri.

⁷Yhangnhik gi, logúng me lé she lò mù, yhangnhik é buhíng pé lé, haú logúng mê é htoq má ke byi kôjáng, Yesuq gi, doq jî ri.

⁸Byù moq mó mâ é myo myo gi, yhangmoq é buhíng lé, hkyô má hkyut hkang byí akô; ra-am gi, mhandíng pé lé zân hkyô yù mù, hkyô má hkang byí akô nghut ri.

⁹Yhâng é hí má htâng má châng sô nyi bum é bang gi,

"Dawiq é Yhangzo gi, hosana† nghut nyí sháng gaq ô!"

"Haú Yhumsing é myìng mai jé lé lô Sû gi, hkungsô wó nyí sháng gaq ô!"[✱]

"Htoq tsáng myhâng má, hosana nghut nyí sháng gaq ô!"

ga luí, taí garú bum akô nghut ri.

¹⁰Yesuq, Yerusalem wà mó má wang ló é hkún, rawà gón é bang gi, gabyông lo bum kômù, "Shí yuq gi, ó wá nghut lhê làh?" ga luí, myi lhùm bum akô.

¹¹Haú hkún, byù moq mó gi, "Shí yuq gi, Galile mau, Nazaret wà byù Yesuq gâ é myiqhtoi nghut lhê." ga taí akô nghut ri.

Yesuq, Noqkuq Yhùm Lé Lhoq Sansêng Pyâm É Hkyô

Mrk 11:15-19; Luk 19:45-48; Yhn 2:13-22

¹²Yesuq gi, noqkuq yhùm má wang ê mù, haú mâ é zè ung zè wui kut nyi é bang banshoq lé, hkat htoq pyám luí, ngùn htaí zo bâng é siboi pé eq hpúngkyui ung zo bâng é tanghkuq pé lé, tu mhuq pyám byí ri.

¹³Haú hkún, Yhang gi, "'Ngá yhùm gi, kyúdung yhùm ga rà nghut lhê.'"[✱] ga kâ to kôhang, nungmoq gi, jowò shí lé 'damaq hkyúng'[✱] kut nyi akô." ga, yhangmoq lé taí ri.

¹⁴Yesuq, noqkuq yhùm má nyi tô é hkún, myoqjit bang eq hkyí hten bang Yhâng chyáng lé lô kômù, Yhang gi, haú bang lé lhom lhoq gè byí ri.

¹⁵Nghut kôhang, hkyangjong agyi pé eq tará sará pé gi, Yhang kut é mauhpo muzó pé lé le, "Dawiq é Yhangzo gi, hosana nghut sháng gaq." ga, noqkuq yhùm má zoshâng wui garú nyi bum kô é lé le, myàng kôjáng, wú nhik-yô bum akô nghut ri.

¹⁶Haú mù, yhangmoq gi, "Zoshâng shí bang haí taí nyi kô é lé, Nàng wó gyô lhê lhu?" ga, Yesuq lé myi kôjáng, Yhang gi, "Wó gyô ri. Nungmoq gi,

"Zoshâng wui eq nyheqnú pé é nhut mai hkya-on kungtôn rá matú, nàng lajâng to bê nghut ri."[✱]

ga kâ tô é lé, Chyúmdang má a nghap wú kó lhu?" ga yhangmoq lé taí ri.

¹⁷Hau htâng má, Yhang gi, haú bang lé nyhi to luí, wà hkaú mai htoq ló mù, Behtani wà má é jé luí, haú myîn, haú má bíng yu ri.

Maihpáng Gâm Nyhuí Kyuq Shi Byuq É Hkyô

Mrk 11:12-14, 20-24

* 21:5 Zi-un byizo gâ é lichyúm gi, Yerusalem byu pé gâ é nghut lhê. ✱ 21:5 Zhk 9:9 † 21:9 Hebre dang má, hosana gâ é gi, "ahkuí hkyi yù laq" gâ é nghut lhê. Nghut kôhang, bun zo 9 má gi, hkya-on dang dông chung é nghut lhê. ✱ 21:9 Hkya-on 118:26 ✱ 21:13 Esai 56:7 ✱ 21:13 Yer 7:11

✱ 21:16 Hkya-on 8:2

18 Yhang gi, htang napkyó noq le, Yerusalem wà mó shut dum taû ló é hkûn, hkyô má zòmut hui bê nghut ri.

19 Haû mù, Yhang gi, hkyô yàm má yuq tô é maihpáng gâm lé myang kat mù, chyâng e wú le, ahaq mai lai luí, haí lé le a myàng nghut ri. Haû mù, Yhang gi, shigâm haû lé, "Nàng má, hkâ-nhám le ashí a zui sháng gaq." ga taí kat ri. Haû hkûn jáng, agâm haû gi, nyhuí kyuq shí ló byuq bê nghut ri.

20 Haû chángzô pé gi, haû lé myàng kôjáng, maú byuq kômù, "Maihpáng gâm shí gi, haí mù haû-í hân nyhuí kyuq shí ló lhê là?" ga myí akô.

21 Yesuq gi, "Ngò, nungmoq lé teng za taí kôlé, nungmoq, úng-âng é myit a bo é za, lumjǐng kô é nghut le gi, maihpáng gâm má Ngò kut é muzó lé, nungmoq wó kut kó rã nghut é htoq agó, bùm shí lé, 'Htot mù, wuimau má ló gyó wàng aq.' ga taí jáng, taí é eq rajung za dut rã nghut lhê.

22 Nungmoq, lumjǐng myit eq dung kô é nghut jáng, haí dǔng le le wó yú kó rã nghut lhê." ga tũ taí ri.

Yesuq É Ahkáng Ayá Lé Myí Chyam É Hkyô

Mrk 11:27-33; Luk 20:1-8

23 Yesuq gi, noqkuq yhùm wàng hkaû má wang é mù, mhoqshit nyi é hkûn, hkyangjong agyi pé eq mingbyu é suwún wuí gi, Yhâng chyáng lé jé kômù, "Hai ahko ahkáng eq, Nàng, shí pé lé kut nyi lhê lú? Ahko ahkáng shí, Nàng lé ó yuq byí é lú?" ga myí akô.

24 Haû hkûn, Yesuq gi, "Ngò le, nungmoq lé rajung myí wú kôlé, nungmoq wó tũ taí kô é nghut jáng, hai ahko ahkáng eq, Ngò, shí pé kut é hkyô lé taí kyo rã nghut lhê.

25 Yohan byí é baptisma gi, ó yuq é ahko ahkáng mai nghut lhê lú? Mauhkúng mai lú? A nghut jáng, byu chyáng mai lú?" ga tũ myí kat ri.

Haû hkûn, yhangmoq, chôm hpyê lhum kô é gi, "Mauhkúng mai nghut lhê.' nghũ, nga-nhúng taí jáng le, 'Haû nghut le nhĩng, haí mù, yhang lé a lumjǐng kô é lú?' ga rã nghut;

26 'Byu chyáng mai nghut lhê.' nghũ jáng le, yhangmoq lhunglhâng bang gi, Yohan lé, myiqhtoi rayuq ga lumjǐng bũm kô é nghut lhê yanmai, haû bang lé, nga-nhúng gyuq rã lhê nghut." gâ akô.

27 Haû mù, yhangmoq gi, Yesuq lé, "Ngamoq a sé." ga tũ taí akô.

Haû hkûn, Yesuq gi, "Haû jáng, Ngò le, hai ahko ahkáng eq shí pé kut é hkyô lé, nungmoq lé a taí kyo." ga, yhangmoq lé taí ri.

Yuqzô Nhiktâng Lé Dangtũ Yu É Hkyô

28 Yesuq xoq taí é gi, "Nungmoq hkâsu wó myit akô lú? Byù rayuq gi, yuqzo í yuq wó ri. Yhang gi, ko sũ yuq chyáng é mù, 'Ngá zo ê, nàng, hkũ-nyí tsibiyiq hkyâm má mù é zui aq.' ga taí jáng,

29 yuqzo haû gi, 'Ngò a kâm ê.' ga tũ taí ri; nghut kôlhang, htâng má, yhang gi, myit dum lhĩng mù, ê bê nghut ri.

30 Hau htâng, yhângwa gi, yhang zo tiq sũ yuq chyáng é mù, rajung za ga é dum taí jáng, yuqzo haû gi, 'Ê rã, âwa!' ga yín yú kôlhang, a é kut ri.

31 Haû nhiktâng má é hká yuq sheq, yhângwa ô nau é hkyô lé kut sũ nghut ri lú?" gâ ri.

Haû hkûn, yhangmoq gi, "Ko sũ nghut ri." ga tũ taí akô.

Haù mù, Yesuq gi, yhangmoq lé, "Ngò, nungmoq lé teng za tái kôlé, kang guq bang eq shiwa myhì pé gi, Garai Gasâng é mingdán má, nungmoq a wàng shimá, wang ló nyi bùm kó rà nghut lhê.

³² Hkâsu mù gâ le, Yohan gi, nungmoq chyáng lé jé mù, dingmán hkyô lé tún shit kôlhang, nungmoq gi, yhang lé a jing kut akô nghut ri; nghut kôlhang, haù kang guq bang eq shiwa myhì pé gi, yhang dang lé jing akô nghut ri. Nungmoq gi, haù hkyô lé myang é nghut kôlhang, myit a lhang kô é htoq agó, yhang lé a lumjing shi kó nghut ri.

Tsibiyiq Hkyâm Sai Bang Lé Dangtú Yu É Hkyô
Mrk 12:1-12; Luk 20:9-19

³³ Gotú dangtú lé gyô wú shi keq; hkyâm yhumsing rayuq gi, tsibiyiq hkyâm ralhum sai to mù, lhanghkyuq kyâm to luí, tsibiyiq wing pyik htoq rá dongkong dù to mù, machya ralhum sai tô ri. Hau htang, yhang gi, hkyâm haù lé, hkyâm sai zo bang chyáng ngho byí to mù, gó ming shut e ló byuq bê nghut ri.

³⁴ Kyôshu yoq jé jáng, yhang gi, yhang eq sêng é tsibiyiq shi é yú rá matú, yhang é dui-nhang zoshang wui lé, haù hkyâm sai zo bang chyáng nhang kat ri.

³⁵ Haù hkyâm sai zo bang gi, dui-nhang zoshang wui lé, lhom chyp yú kômù, rayuq lé gi, lhom nhuq bat, rayuq lé gi, lhom sat pyám, rayuq lé gi, luggok èq lhom dù sat pyám, kut akô nghut ri.

³⁶ Hau htang má, yhang gi, hí dam lhê htoq je myo shoq gotú dui-nhang zoshang wui lé dum nhang kat le, haù hkyâm sai zo bang gi, hí lhê bang lé su lhom dum kut akô nghut ri.

³⁷ Ló htang má, yhang gi, 'Ngá zo lé gi, yhangmoq lhom hkungga kó rà nghut lhê.' ga, yhang zo lé, haù bang chyáng nhang kat ri.

³⁸ Nghut kôlhang, haù hkyâm sai zo bang gi, yhang zo lé myàng kôjáng, 'Shí yuq gi, silí wunlí sing yú rá sù nghut lhê; lé keq, yhang lé sat pyám mù, yhang é silí wunlí lé yu pyám byi sháng.' ga, rayuq eq rayuq tái lhum bum akô nghut ri.

³⁹ Haù mù, yhangmoq gi, yhang lé, chyp yú luí, hkyâm shinggan shut dú htoq kômù, sat pyám bekô nghut ri.

⁴⁰ Haù mù luí, tsibiyiq hkyâm yhumsing lé jé é hkún lé, haù hkyâm sai zo bang lé hkâsu kut nhỏ ngam akô lú?" ga Yesuq myí ri.

⁴¹ Haù hkún, haù hkyangjong agyi pé eq suwún wui gi, "Haù agè ashop bang lé gi, agè ashop é đông sat pyám rà nghut lhê. Haù tsibiyiq hkyâm lé gi, kyô shu yoq má, yhang é gambum lé byi rá bang lé, htot ngho byí pyám rà nghut lhê." ga, tú tái akô nghut ri.

⁴² Haù jáng, Yesuq dum tái é gi, "Chyúmdang má, 'Yhùm sai bang èq hkyin htoq pyám é luggok gi, htungchyûn mâ é ahkyak dik é luggok dut bê.

Shí hkyô gi, haù Yhumsing kut é nghut luí, nga-nhung é myoq hí má mauhpo dut bê nghut ri.'*

ga bo tô é lé, nungmoq a nghap wú kó lú?"

⁴³ Haù mù, Ngò, nungmoq lé tái kôlé, Garai Gasâng é mingdán lé, nungmoq chyáng mai yú mù, hau é ashí wú zui rá byuhú lé byí pyám rà nghut lhê.

* 21:42 Hkya-on 118:22-23

⁴⁴ Luqgok haú má gyó záng é sù gi, gyuî gyop byuq râ nghut lhê. Luqgok hau eq gyó nhê záng é sù le, nhê pyeq pyâm é hui râ nghut lhê." gâ ri.

⁴⁵ Hkyangjong agyi pé eq Hparishe pé gi, haú Yesuq taí é dangtú pé lé wó gyo kôjáng, yhangmoq lé taí nyi é hkyô lé, sê gyô akô nghut ri.

⁴⁶ Haú mù, yhangmoq gi, Yhang lé chyup yû râ hkyô ho nyi akô; nghut kôlhang, byu pé gi, Yhang lé, myiqhtoi rayuq ga myit lum to kô é yanmai, yhangmoq gi, haú bang lé gyuq akô nghut ri.

22

Myiháng Poî Dangtú Pé

Luk 14:15-24

¹ Yesuq, dangtú pé dông yhangmoq lé dum taí é gi,

² "Mauhkûng mingdán gi, yhumsing yhangzô é matú myiháng poî hen lajâng to byí é hkohkâm rayuq eq du ri.

³ Hkohkâm hpó haú gi, yhang ji tô é bang, haú poî má lé lô râ matú, yhâng é dui-nhâng zoshâng wui lé é tsing taí nhang ri; nghut kôlhang, haú bang gi, a lé kut akô nghut ri.

⁴ Hau htâng má, yhang gi, gotú dui-nhâng zoshâng wui lé, 'Ngò haí le hen to bê; ngá é no eq xu-myum é gau-nyhaú pé lé sat mù, jung hkangmó rì ri nghut to bê. Myiháng poî má lé lò keq hkoi nghû, haú ji tô é bang lé é taí keq.' ga pyíng luí, nhang kat ri.

⁵ Nghut kôlhang, haú ji to huí é bang gi, dang haú lé haí su a gyô ngàm kômù, rayuq gi, yohtung shut, rayuq gi, hpugá dinggá hkyô shut é byuq bekô nghut ri.

⁶ Ra-am dum nghut jáng, yhâng é dui-nhâng zoshâng wui lé lhom chyup yû kômù, nghuq bat luí, sat pyám byí akô nghut ri.

⁷ Haú mù, hkohkâm gi, nhikjum yo luí, yhâng é gyezô pé lé, haú byù sat bang lé sat pyám nhâng mù, yhangmoq é myuq lé nyhê hkyô pyám nhang ri.

⁸ Hau htâng má, yhang gi, yhâng é dui-nhâng zoshâng wui lé, 'Myiháng poî gi, rì rì nghut to bê; nghut kôlhang, haú ji to huí é bang gi, lé rà a gingdán kó nghut ri.

⁹ Haú mù, hkyô kang pé má é luí, myang é yuq hkangmó lé, poî má lé rà matú é jì keq.' ga taí ri.

¹⁰ Haú jáng, dui-nhâng zoshâng haú bang gi, hkyô kang pé má htoq é luí, myang é byù gè byù gang lunglhang lé ji tsing yù kô é nghut mù, myiháng poî gi, bíng pé zung byíng bùm bê nghut ri.

¹¹ Nghut kôlhang, bíng haú bang lé, hkohkâm hpó, lé wang wú é hkûn, myiháng poî wàng hkíng a wut tô é byù rayuq lé, yhang byu-myang ri.

¹² Haú mù, yhang gi, haú yuq lé, 'Buinùm hpó é, nàng gi, myiháng poî wàng hkíng le a wut é nhîng, shí má hkâsu kut wang lo é lhú?' ga myi jáng, haú yuq gi, haí le a dat tú taí lo nghut ri.

¹³ Haú hkûn, hkohkâm hpó gi, yhâng é dui-nhâng zoshâng wui lé, 'Yhâng é hkyí loq má tui luí, haú ngaubyi ngaù nhap eq zui kyik kyik shoq hpuzô nyi râ nghut é shínggan mauchut hkaú má, dú htoq pyám keq.' gâ ri.

¹⁴ Hkâsu mù gâ le, byù myo myo gi, ji yu é hui kôlhang, hkyin yù huí é bang gi, shaú ri." gâ ri.

Kehtaq Lé Kang Kat Byí É Hkyô

Mrk 12:13-17; Luk 20:20-26

¹⁵ Hau htâng má, Hparishe pé gi, htoq ló kômù, Yhâng é dang pé má mara chyup rà hpaqchyí dâ akô nghut ri.

¹⁶ Yhangmoq gi, Herut é byu pé eq rahá, yhangmoq é chángzô pé lé, Yesuq chyáng nhang kat akô. Haú bang gi, Yesuq chyáng lé jé kômù, "Sarâ é, Nàng gi, tengmán sù nghut é eq, Garai Gasâng é hkyô lé, tengmán é đông mhoqshit é sù nghut é lé le, Nàng gi, ó haí ga rà lé le haí su a ngám sù nghut é yanmai, ó yuq é myoqdong lé le a té byi sù nghut é hkyô lé le, ngamoq sê lhê.

¹⁷ Haú mù, hkoséng Kehtaq lé kang kat byí le gi, ge lhê lú? A gè lú? Nàng, hkâsu wó myit é hkyô taí kyô wú aq." ga taí akô nghut ri.

¹⁸ Yesuq kúm gi, yhangmoq é agè ashop hkyô lé sé byi mù, "Gegùn labyoq kut bang é, nungmoq gi, haí mù, Ngo lé lé chyam wú akô lú?"

¹⁹ Kang kat rà ngùn htíngchap rachap, Ngo lé byí wú keq." ga taí kat ri. Haú hkún, yhangmoq gi, denari rachap yù byí akô.

²⁰ Haú mù, Yhang gi, yhangmoq lé, "Shí má, ó yuq é alhô eq masat laiká dap tó ri lú?" ga myi jáng,

²¹ yhangmoq gi, "Kehtaq é nghut ri." ga tú taí akô. Haú mù, Yhang gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga taí kat ri.

²² Haú su gâ é lé, wó gyo kôjáng, haú bang gi, maú byuq kômù, Yhâng chyáng mai htoq ló byuq bekô nghut ri.

Saduke Pé, Yesuq Lé Myí Chyam É Hkyô

Mrk 12:18-27; Lúk 20:27-40

²³ Haú nyí má yhang, haú dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myí akô.

²⁴ Yhangmoq myi kô é gi, "Sarâ é, 'Myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashún xoq byi rà matú, yhâng rhat lé chui gon ra rà nghut lhê.' ga, nga-nhúng lé, Mosheq taí tó é nghut lhê.

²⁵ Hí hpyang lé, ngamoq chyáng, gumang nhiktâng wui nyhit yuq nyi akô. Lagám yuq gi, myiwe yù luí, zo dù a dap é za yhangmyi lé shi lhuí pyâm to bê nghut ri.

²⁶ Haú eq rajung za, Lanong, Lalaq mai Lahká jé shoq, chuimó haú lé gon luí, ó le zo dù a dap é za shi ló byuq bùm bekô nghut ri.

²⁷ Ló htáng má, myiwe myhí haú le châng shi ló byuq bê nghut ri.

²⁸ Haú mù luí, haú dum dui toq é buinyi má, myiwe myhí haú gi, haú nhiktâng wui nyhit yuq má é hká yuq é yhangmyi nghut rà lú? Hkâsu mù gâ le, yhang gi, haú nhiktâng wui banshoq bâng é yhangmyi dut wú bê sù nghut ri." gâ akô.

²⁹ Haú hkún, Yesuq gi, yhangmoq lé, "Nungmoq gi, Chyúmdang eq Garai Gasâng é wum-o a-tsam lé a sé kô é yanmai, hkyô nghoq akô nghut ri.

³⁰ Haú dum dui toq é buinyi má gi, myi byi myi yù hkyô joq lo rà a nghut; yhangmoq gi, mauhkúng htoq má é maumang lagyô pé su dut byuq kó rà nghut lhê.

³¹ Shi é mai dum dui toq bang eq séng luí,

³² Garai Gasang gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.'* ga, nungmoq lé taí tó é lé, nungmoq a

nghapus wú kó lúh? Yhang gi, shi to bâng é Garai Gasang a ngutus; dui nyi bâng é Garai Gasang sheq ru ngutus lhê." ga tai ri.

³³ Byù moq mó gi, dang haù wó gyo kôjáng, Yhang mhoqshit é hkyô lé maù byuq bum akò ngutus ri.

Ahkyak Dik É Jep É Tarâ

Mrk 12:28-34; Luk 10:25-28

³⁴ Saduke pé lé, Yesuq lhoq zím pyâm é hkyô lé, Hparishe pé wó gyo kôjáng, yhangmoq gi, Yesuq chyáng zup zing lé bum akò.

³⁵ Yhangmoq má bo é tarâ sará rayuq gi, Yesuq lé chyam wú é dông,

³⁶ "Sarâ é, jep é tarâ má, hká lhum gi, je ahkyak dik lhê lúh?" ga myi ri.

³⁷ Haù mù, Yesuq gi, "'Haù Yhumsing náng é Garai Gasang lé, náng é myit nhikhum banshoq, náng é asak woi-nyi lhum gón, náng myit é hkyô banshoq èq, chyitdap rá lhê.'* gâ é ngutus lhê.

³⁸ Tarâ haù gi, je hí lhum eq je ahkyak dik é lhum ngutus lhê.

³⁹ Hau htang lhum le haù eq du é ngutus mù, 'Náng gùng lé náng chyitdap é su, náng é chyangnâm mâ é bang lé le chyitdap aq.'* gâ é ngutus lhê.

⁴⁰ Tarâ haù í lhum gi, jep é tarâ banshoq eq myiqtoi laiká banshoq é dangchyung ngutus lhê." ga, yhang lé tai kat ri.

Hkrisduq Gi, Ô Yuq É Yhangzo?

Mrk 12:35-37; Luk 20:41-44

⁴¹ Hparishe pé zup zing to kô é hkún, Yesuq gi, yhangmoq lé,

⁴² "Nungmoq gi, Hkrisduq eq séng lui hkásu myit ngam akò lúh? Yhang gi, ó yuq é yhangzo ngutus lhê lúh?" ga myi jáng, yhangmoq gi, "Dawiq é yhangzo ngutus ri." ga tù tai akò.

⁴³ Haù mù, Yhang gi, yhangmoq lé, "Haù hkún, Dawiq gi, Woi-nyi dông mai, Yhang lé, 'Yhumsing' ga, haù mù wut lhê lúh? Hkásu mù gâ le, Dawiq tai é gi,

⁴⁴ 'Haù Yhumsing Garai gi, ngá é Yhumsing lé, "Ngò, náng é gumlau gye pé lé, náng é hkyiwa ô má tô pyâm é hkying jé shoq,

Ngá é loqyo hkyam shut zung nyi shi aq." ga tai ri.* gâ ri.

⁴⁵ Haù mù, Dawiq yhang lhang, Hkrisduq lé, 'Yhumsing' gâ é ngutus le gi, yhangzo za hkásu ge ngutus rá lúh?" ga tai ri.

⁴⁶ Haù mù, ó yuq le, dang rahkun lhang a wó tù tai lo kô é ngutus mù lui, haù nyi mai, ó yuq lhang Yhang lé dangmyi a wám myi lo kó ngutus ri.

23

Tarâ Sará Pé Eq Hparishe Pé Lé Sidiq Râ Hkyô

Mrk 12:38-40; Luk 11:37-52; 20:45-47

¹ Hau htang, Yesuq gi, byù moq mó eq Yhang é chángzô pé lé tai é má,

² "Tarâ sará pé eq Hparishe pé gi, Mosheq é tanghkuq má zung akò.

³ Haù mù, yhangmoq mhoqshit é hkyô chângiup lé, nungmoq châng kut ra kó rá ngutus lhê. Ngutus kôlhang, yhangmoq kut é dông gi, hkâkut kó; hkásu mù gâ le, yhangmoq gi, yhangmoq tai é dông a kut kó ngutus ri.

⁴ Yhangmoq gi, byu pé é goqsân má wôlai ke byi kôlhang, yhangmoq yhang gi, wò haù pé lé bo waq rá matú, loqnyhui lhang a kâm lhoq tuí kó ngutus ri.

5 Yhangmoq kut é hkyô lunglhang gi, byu pé myàng râ matú za kut shit é nghut akô; haú chyúmbun bo é showuí-htúng pé lé lhoq kô yù kômù, buhíng pé má é banbyaú pé lé lhoq hìng yu akô nghut ri;

6 yhangmoq gi, poí pé má é reng é jowò pé eq tarajong pé má é ahkyak dik é zùng jang pé má, myang zùng râ lé ô nau nyi akô;

7 yhangmoq gi, gai pé má lhom shi-kyâm yù kó râ eq, byu pé mai, yhangmoq lé, 'Rabai'* ga lhom wut kó râ lé ô nau nyi bum akô.

8 Nungmoq kúm gi, 'Rabai' ga wut râ lé hkâ-ô nau kó; hkâsu mù gà le, nungmoq gi, sará rayuq za wó lhê nghut é htoq agó, nungmoq banshoq bang gi, gumang chyat ru nghut lhê.

9 Haú mù, myidàm htoq má, ó yuq lé le, 'âwa' hkâ-nghû kó; hkâsu mù gà le, mauhkúng htoq má é Íwa rayuq za, nungmoq é Íwa nghut lhê.

10 Hau htoq agó, 'sará' ga wut râ lé, hkâ-ô nau kó; hkâsu mù gà le, Hkrisduq za, nungmoq é Sará nghut lhê.

11 Nungmoq má é je gyaú sù gi, nungmoq é dui-nhâng zoshâng dut râ nghut lhê.

12 Hkâsu mù gà le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lhê, yhumsing gùng lé lhoq nyhùm sù kúm gi, waq toq é hui râ nghut lhê.

13 Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, byu pé hí má, mauhkúng mingdán hkyô lé xaú tô akô; nungmoq yhang le a wàng kó, wàng nau nyi bang lé le a wàng nhâng kó nghut ri.

14 (Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, chuimó pé é yhùm-yò pé lé hpyoq zo hpyoq shuq é eq kyû hìng hìng dúng shit mhaú é bang nghut akô; haú mù, dam byí é je myo hui zo kó râ nghut lhê.)*

15 Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, byù rayuq lé nungmoq é noqkuq htúng má wó lhoq lhik yù râ matú, myi hkyô, wui hkyô, châng jón wún kômù, wó lhoq lhik yù é sù lé gi, nungmoq su ngaraí byù í tú shuí dut akô nghut ri.

16 Hkyô-u she é myoqjit pé ê, nungmoq gi, dingnyé wó ri. Nungmoq gi, 'Noqkuq yhùm lé lang luí dakam é sù gi, haí a ra; noqkuq yhùm má é hìng lé lang mù dakam é sù kúm gi, cháng ra bê.' ga lhaq taí akô.

17 Myoqjit é byù nâ pé ê! Haú hìng eq hìng lé lhoq yúnglhô é noqkuq yhùm gi, hká lhum je ahkyak lhê lúh?

18 Hau htoq agó, nungmoq gi, 'Haú hkungga gyap lé lang luí dakam é sù gi, haí a ra, nghut kôlhang, haú hkungga zè lé lang mù dakam é sù gi, cháng ra bê.' ga le, lhaq taí akô nghut ri.

19 Myoqjit pé ê! Haú hkungga zè eq hkungga zè lé lhoq yúnglhô é hkungga gyap gi, hká lhum je ahkyak lhê lúh?

20 Haú mù, haú hkungga gyap lé lang luí dakam é sù gi, haú hkungga gyap eq hau é ahtoq má ke tô é zè banshoq lé lang luí dakam é sù dut bê nghut ri.

21 Noqkuq yhùm lé lang luí dakam é sù gi, haú noqkuq yhùm eq haú má nyi é Sù lé lang luí dakam é sù dut bê nghut ri.

* 23:7 Aramaik dang dòng *rabai* gà é gi, sará gà é lichyúm nghut lhê. † 23:14 Chyúmding ra-am má gi, bun zo 14 shí a bo é nghut lhê.

²² Hau htoq agó, mauhkûng lé lang luí dakam é sù gi, Garai Gasâng é tanghkuq eq haú má zung é Sù lé lang luí dakam é sù dut bê nghut ri.

²³ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, xunmân nghut é gau-tsáng shingtón, bantsái, hpakkyí pé mâ é xê gambùm ragambùm lé gi, byí nyi kômù, je ahkyak é tarâ nghut é, tarâ rap-rá hkyô, shogyo nhikmyin hkyô eq lhumzui hkyô pé lé gi, lhaí pyâm tô akò nghut ri. Hí lhum lé kut é su, htang lhum lé le kut râ lhê.

²⁴ Hkyô-u she é myoqjit pé ê! Nungmoq, pyup lé gi, jân pyám kômù, gola-uq lé gi, myui pyâm akò nghut ri.

²⁵ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, zo hkoq shuq góm pé lé ahtoq shut za chí yúng mù, ahte má gi, lú zo lú shuq é eq yhumsing maiwáng zat é myit byíng zan tô ri.

²⁶ Hparishe myoqjit pé ê! Zo hkoq shuq góm é ahte lé hí chí yúng pyám keq, haú jáng, ahtoq le sân-yúng râ nghut lhê.

²⁷ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, but hpyu tô é lup pé eq du akò; hau pé gi, ahtoq má wú yúng kôhlang, ahkaú má gi, mâng bup showui pé eq achauq achyut é chângjup byíng tô é nghut ri.

²⁸ Haú eq rajung za, nungmoq gi, byu pé hí má, ahtoq pyâm dingmán é su kut shit kôhlang, ahkaú má gi, gegùn labyoq kut é eq agè ashop é hkyô pé byíng zan tô ri.

²⁹ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, myiqhtoi pé é lup lé luptsuq tsuq kômù, dingmán bâng é lup pé lé mhón byi kôluí,

³⁰ 'Ngamoq gi, ngamoq é íchyí îwa pé é ipyat má nyi âng é ru nghut le gi, haú myiqhtoi pé é sui lhoq shun é bang má, ngamoq bo lòm râ a nghut.' ga lhaq tai akò.

³¹ Haú su mù, nungmoq gi, haú myiqhtoi pé lé sat pyám bâng é awut ashín pé nghut é hkyô lé, nungmoq gùng nungmoq saksé hkam yu nyi akò nghut ri.

³² Haú mù, nungmoq é íchyí îwa pé hí tô é muzó lé, banshoq châng kut pán keq!

³³ Lhangmui pé ê, duq htân lhangmui amyú pé ê! Ngarai mîng é dam byi hkyô mai, hkâsu wó hpang lut kó râ l hú?

³⁴ Hau é yanmai, myiqhtoi pé, hpaqchyí bò bang eq chyúm sará pé lé, Ngò, nungmoq chyáng nhang kat râ nghut lhê. Haú bang má é ra-am lé gi, nungmoq lhom sat pyám mù, tapzîng má jén pyám kó râ nghut lhê; ra-am lé gi, nungmoq é tarajong pé má, nhuq bat kômù, ra-myuq htàng ra-myuq châng hkat zing-rí wún kó râ nghut lhê.

³⁵ Hau é yanmai, haú dingmán sù Abelaq é sui mai hí luí, noqkuq yhùm eq hkungga gyap gyoro má nungmoq sat pyám é, Berehkiaq é yhangzo Zahkariq é sui jé shoq, myidàm htoq má shun pyám é dingmán bang banshoq é sui gi, nungmoq é ahtoq má jé lô râ nghut lhê.

³⁶ Ngò, nungmoq lé teng za tai kôlé, shí hkyô banshoq gi, ipyat shi é ahtoq má jé râ nghut lhê.

³⁷ Yerusalem ê, Yerusalem ê, myiqhtoi pé lé sat pyám pyám kut mù, náng chyáng nhang kat é bang lé luqgok eq dú sat sat kut é myuq nàng ê, woqzîng

gi, yhangzô pé lé, yhâng é dùng hkaû má tsing lhung yu é su, nungzô pé lé, Ngò, hkâ-myhó dâm shuí tsing yù naù kôlhang, nàng a dóng nghut ri.

³⁸ Wú keq, nungmoq é yhùm gi, nungmoq é matú chamchuyiuyi dut pyâm to berâ nghut lhê.

³⁹ Hkâsu mù gà le, Ngò, nungmoq lé taí kôlé, 'Yhumsing é mying mai jé lé lo é Sù gi, hkungsô wó nyí sháng gaq.'* ga, nungmoq a taí taí gi, Ngo lé wó myâng kó rà a nghut lo." gà ri.

24

Ló Htâng Buinyi Má Dut Lò Râ Hkyô

Mrk 13:1-31; Luk 21:5-33

¹ Yesuq gi, noqkuq yhùm mai htoq e ló é u lé, Yhâng é chángzô pé gi, Yhâng é nàm má huí lé lô kômù, haù noqkuq yhum é loqmú pé lé tûn shit akô.

² Haù hkûn, Yesuq gi, yhangmoq lé, "Haù pé banshoq lé, nungmoq myang lhê a nghut kó lú? Ngò, nungmoq lé teng za taí kôlé, luqgok haù pé gi, rachâm htoq racham lhang a kê lhum loshoq, hpyoq hpyi pyâm é hui rà nghut lhê." ga taí ri.

³ Yesuq gi, Tsanlun Bùm má zung tô é hkûn, haù chángzô pé gi, yhangmoq baù Yhâng chyáng lé jé kômù, "Haù hkyô pé gi, hkâ-nhâm dut lò rà lú? Nàng gyó lé rà hkûn eq ló htâng buinyi má, hkâsù é kumlhá htoq lò rà nghut lhê lú? Ngamoq lé taí kyô wú laq." ga, Yhang lé myí akô.

⁴ Haù hkûn, Yesuq, yhangmoq lé tù taí é gi, "Nungmoq lé, ó yuq èq le a wó shuí nghoq sháng gaq, sidiq nyi keq.

⁵ Hkâsu mù gà le, 'Ngò gi, haù Hkrisduq nghut lhê.' ga, Ngá mying lé llang é byù myo myo pò htoq lò mù, byù myo myo lé hkyô shuí nghoq kó rà nghut lhê.

⁶ Nungmoq gi, majan dut nyi é hkyô eq majan eq sêng é danglám pé lé, wó gyo kó rà nghut lhê; nghut kôlhang, hkâgyuq dàn kó. Haù hkyô pé gi, dut lò rà za nghut lhê; nghut kôlhang, ló htâng é buinyi gi, a nghut shí.

⁷ Byù ra-myù eq ra-myù, mingdán ralhum eq ralhum majan zân lhum lò kó rà nghut lhê. Jowò myo myo má, mutmó gyó é pé eq layàng nún é pé dut lò rà nghut lhê.

⁸ Haù pé gi, wuîlke jamjau hkyo é apûn awang za ru nghut ashí.*

⁹ Haù hkûn, nungmoq gi, zing-ri é eq sat pyâm é hui zo rà matú, ap pyâm é hui kó rà nghut lhê. Byù myù lhunglhang bang gi, Ngá é yanmai, nungmoq lé a ngui kut kó rà nghut lhê.

¹⁰ Haù u lé, byù myo myo gi, lumjín myit lé tô pyám kômù, rayuq eq rayuq a ngui lhum dut é htoq agó, rayuq eq rayuq ap pyâm lhum kó rà nghut lhê.

¹¹ Haù htoq agó, myiqhtoi pyoq pé myo myo pò htoq lò kômù, byù myo myo lé hkyô shuí nghoq kó rà nghut lhê.

¹² Agè ashop é hkyô myò jat lo é yanmai, byù myo myô é chyitdap myit gi, kân lò byuq rà nghut lhê;

¹³ nghut kôlhang, jiltùm jé shoq wó hkam jân nyi é sù gi, hkyi yu é hui rà nghut lhê.

¹⁴ Byù myù banshoq má saksé dut rà matú, haù mingdán eq sêng é gabú danglù lé, mingkan gón má hko kyo rà nghut lhê. Haù htâng má sheq, ló htum buinyi jé rà nghut lhê.

15 Haù mù luí, myiqhtoi Danielaq đông mai taí tô é eq rajung za, 'haù lhoq hten lhoq hpyoq é achag achyut hkyô[✧] gi, chyoiyúng jowò má shap tô é lé, nungmoq myàng kó rà nghut lhê. (Chyúmlaiká nghap sú gi, sê gyo sháng gaq).

16 Haù hkún, Yuda mau má nyi é bang gi, bùm pé shut hpang doq ló kó sháng gaq.

17 Yhumhkúng htoq má nyi tô é sú gi, yhúmhaù mã é zè hai lé le, a ló gyó wang yù lo sháng gaq.

18 Yò má nyi tô é sú gi, yhâng é buhíng lé a ló taù yu nyi lo sháng gaq.

19 Haù buinyi pé má, zogúng dut é myiwe eq naú huq ashí nghut é ínu wui gi, gyai yhang wuihke jamjau kó rà nghut lhê.

20 Haù nungmoq hpâng rà buinyi gi, gyoqmyò,* a nghut jáng, Bánno buinyi má a ang rà matú, kyúđung nyi keq.

21 Hkâsu mù gà le, mingkan lé joq é hkún mai ahkuí jé shoq, hkâ-nhám le a dut wú shí é wuihke jamjau mó gi, haù buinyi pé má dut lò rà nghut lhê; haù sú é hkyô gi, htângnùng má hkâ-nhám le dum dut lo rà a nghut.

22 Buinyi haù pé lé lhoq shaù pyâm é za a nghut le gi, ó yuq le asak wó lut rà a nghut; nghut kôlhag, Garai Gasang èq hkyin yù hui bâng é matú gi, buinyi haù pé lé, lhoq shaù pyâm byi rà nghut lhê.

23 Haù ahkyíng má, byù rayuq yuq mai, nungmoq lé, 'Wú keq, shí má Hkrisduq nyi ri.' ga, haù a nghut jáng, 'Wú keq, Yhang hê má nyi ri.' ga taí jáng, nungmoq hkâjíng kó.

24 Hkâsu mù gà le, Hkrisduq pyoq pé eq myiqhtoi pyoq pé pò htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá mó pé eq laklaí kumlhá pé lé kut shit kó rà nghut lhê.

25 Gyo keq, shí hkyô a dut shimá, Ngò, nungmoq lé taí kyô nyi gù nghut lhê.

26 Haù mù, rayuq yuq èq, nungmoq lé, 'Yhang gi, yoso má nyi ri.' gà jáng le, hkâ-é kó; 'Yhang gi, shí gok hkaù má lúng tô ri.' ga jáng le, hkâjíng kó.

27 Hkâsu mù gà le, bui htoq hkyam má lhap hpyat é gi, bui wang hkyam má lhang jé shoq duqbó é su, haù Byu Yhangzo jé lé é hkún le, dut rà nghut lhê.

28 Màng leq é jang má, langdâ pé, lé zíng bùm rà nghut lhê.

29 Buinyi haù pé mã é wuihke jamjau lai eq yhang,

'Bui gi, noq byuq mù, lhamó gi, a tsò dut byuq rà nghut lhê;

kyí pé gi, mauhkúng mai byit gyó lo bùm mù, mauhkúng mã é wum-o a-tsam pé gi, lhoq nhún é huí bùm kó rà nghut lhê.[✧]

30 Haù hkún, haù Byu Yhangzô é kumlhá gi, mauhkúng mã htoq shit lò rà nghut mù, myidàm htoq mã é byù myú lhunglhang gi, yón ngau bùm kó rà nghut lhê. Haù Byu Yhangzo gi, mauhkúng mai, mhut ji mù, hpungwup a-tsam mó eq le, hpungwup shíngkang eq le, gyó lé lo é lé, yhangmoq byu-myàng kó rà nghut lhê.

31 Hau htâng má, Yhang gi, Yhâng é maumang lagyô pé lé, tut htê mó èq nhang kat luí, yhangmoq gi, maumyí chyún myi chyún eq mauhkúng rahkyam mai, gó hkyam htum shoq mã é, Yhang hkyin yu tô é bang lé shuí tsíng yù kó rà nghut lhê.

32 Maihpáng gâm lé wú mù, mhoq yú keq; agàm mai a-nyuq nyún lô mù, ahaq htut lò jáng, bui nyé nám chyáng lò bê lé, nungmoq sê lhê.

✧ 24:15 Dan 9:27; 11:31; 12:11 * 24:20 Israelaq mau má gi, gyoqmyò lé hkyô htoq le gyai wuihke é ahkyíng nghut lhê. ✧ 24:29 Esai 13:10; 34:4

³³ Haù eq rajung za, shí hkyô banshoq† lé, nungmoq myàng kôjáng, Yhang gi, chyáng bê nghut mù, hkúmdong má lhang nghut nyí bê hkyô lé, nungmoq sé lo keq.

³⁴ Ngò, nungmoq lé teng za taí kôlé, shí pyat mâ é byu pé a ban shi byuq shimá, haù hkyô pé‡ banshoq dut byuq rà nghut lhê.

³⁵ Mauhkúng eq myigùng gi, a joq lo dut byuq rà nghut lhê; nghut kôlhang, Ngá é dang gi, ru joq nyí rà nghut lhê.

Haù Buinyì Eq Ahkyíng Lé, Ó Le A Sé

Mrk 13:32-37; Luk 17:26-30, 34-36; 12:35-48

³⁶ Buinyì eq ahkyíng haù lé gi, ó yuq le a sé; mauhkúng htoq mâ é maumang lagyô pé lhang a sé; haù Zo le a sé; haù Íwa za ru sê lhê.

³⁷ Noaq é tsín pyat má dut é su, haù Byu Yhangzo lé lo é hkún le, dut rà nghut lhê.

³⁸ Hkâsu mù gâ le, dowuí a dítg shí é buinyì pé má, byu pé gi, Noaq, wui-sanghpo mó hkaù má wang é hkún jé shoq, zo zo shuq shuq, myí byi myí yú, kut nyi bum akô nghut ri;

³⁹ yhangmoq gi, dowuí dítg lô mù, yhangmoq banshoq lé úm sat pyâm é hkún jé shoq, haù dut lò rà lé, a sé kó dut bùm é su, haù Byu Yhangzo lé lo é hkún le, dut rà nghut lhê.

⁴⁰ Haù hkún, yò má rahá nyi tô é byù í yuq mâ é rayuq gi, shuí yu é hui mù, rayuq gi, myit gyó to rà nghut lhê.

⁴¹ Luqluí chôm llang nyi é myiwe í yuq mâ é rayuq gi, shuí yu é hui mù, rayuq gi, myit gyó pyâm to rà nghut lhê.

⁴² Haù su mù, haù nungmoq é Yhumsíng gi, hká nyí jé lé lò rà lé, nungmoq a sê kô é yanmai, sidiq machya nyi keq.

⁴³ Myín hká u má hkau sù jé lé lò rà lé, yhumsíng sê é ru nghut le gi, yhang é yhùm má a wò hput wàng nhâng loshoq, yhang machya nyi rà nghut é lé, nungmoq sê gyô nyi keq.

⁴⁴ Haù mù, nungmoq le rì rì nghut nyi keq; hkâsu mù gâ le, haù Byu Yhangzo gi, a bün nùng má jé lé lò rà nghut lhê.

⁴⁵ Yhumsíng hpó é dui-nhâng zoshâng wui lé, uphkâng rà eq ahkyíng jé jáng zoshuq gàm byi rà matú, yhumsíng hpó èq mù nhang tô é, lhumsuz lui, hpaqchyí bo é dui-nhâng zoshâng gi, ó yuq nghut rà lú?

⁴⁶ Yhumsíng hpó dum taù lo é hkún, haù su kut nyí llang é dui-nhâng zoshâng gi, hkungsô wó nyi ri.

⁴⁷ Ngò, nungmoq lé teng za taí kôlé, yhumsíng hpó haù gi, yhang é sutzè banshoq, dui-nhâng zoshâng haù yuq lé ap to rà nghut lhê.

⁴⁸ Nghut kôlhang, laqmá mù, dui-nhâng zoshâng haù yuq gi, agè ashop sù nghut lui, 'Ngá é yhumsíng hpó jé lò rà gyai myáng ashí.' ga, yhang é i-myit unghkaù má myit yù mù,

⁴⁹ gotú dui-nhâng zoshâng luzúm wui lé nhuq bat é htoq agó, í shuq wut bang eq rahá zo zo shuq shuq kut nyi é nghut le gi,

⁵⁰ dui-nhâng zoshâng hau é yhumsíng hpó gi, yhang a myitngam tô é buinyì eq yhang a sê tô é ahkyíng má jé lò mù,

† 24:33 Shí hkyô banshoq gâ é gi, Yesuq jé lé rà hí má dut rà hkyô pé lé taí é nghut lhê. ‡ 24:34 Haù hkyô pé gâ é gi, Yerusalem noqkuq yhùm htên byoq rà lé taí é nghut lhê.

⁵¹ yhang lé jap pyám luí, gegùn labyoq kut bang hkâm zô é, ngaubyi ngaú nhap eq zui kyik kyik shoq hpuzô nyi rá jowò má hkyô pyám rá nghut lhé.

25

Zomyi Raxê Yuq Lé Dangtú Yu É Hkyô

¹ Haú hkún, mauhkúng mingdán gi, myibung yu chùng mù, lusik lé te yù rá ga, htoq e ló é zomyi raxê yuq eq púng rá nghut lhé.

² Haú bang má, ngo yuq gi, nhik a gyíng kó; ngo yuq gi, nhik gyíng akô nghut ri.

³ Haú nhik a gyíng é bang gi, myibung yu chùng kôlháng, xú a yu chùng kó nghut ri.

⁴ Nghut kôlháng, haú nhik gyíng é bang kúm gi, yhangmoq é myibung lé le, xú bo é bòng lé le yu chung akô nghut ri.

⁵ Lusik jé lé lô rá myáng nyi é yanmai, yhangmoq banshoq bang gi, yhup mui lò kômù, yhup myhí byuq bekô nghut ri.

⁶ Myín gunggám jé jáng, 'Lusik jé bê ô! Yhang lé te yù rá matú, htoq lé lô keq hkoí ô!' ga, garú é hté htoq lo ri.

⁷ Haú hkún, zomyi haú bang banshoq gi, toq lô mù, yhangmoq é myibung lé hen lajáng akô nghut ri.

⁸ Haú nhik a gyíng bang gi, 'Ngamoq lé, xú ratsuí byi kó laq; hkâsu mù gâ le, ngamoq é myibung shi lô nyi ri.' ga, haú nhik gyíng bâng chyáng dúng akô.

⁹ Haú hkún, haú nhik gyíng bang gi, 'Nungmoq eq ngamoq é matú ga jáng, luq rá a nghut. Haú mù, nungmoq é matú, xú ung bâng chyáng ê wui yù keq.' ga tú taí kat akô.

¹⁰ Yhangmoq, xú wui e ló kô é hkún, lusik gi, jé lé lô mù, haú rì rì hen tô é zomyi wui gi, yhang eq rahá myiháng poí má wang ló bekô. Hkum le myhí byuq bê nghut ri.

¹¹ Hau htâng má, hau htâng gyô tô é zomyi wui gi, tau jé lô kômù, 'Yhumsíng ê! Yhumsíng ê! Ngamoq lé, hkum hpóng byi laq ô!' ga taí akô.

¹² Nghut kôlháng, haú lusik gi, 'Ngò, nungmoq lé teng za taí kôlé, nungmoq lé ngò a sé.' ga tú taí kat ri.

¹³ Haú mù luí, haú Byu Yhangzo jé lé rá buinyi eq ahkyíng lé, nungmoq a sé kô é yanmai, sidiq machya nyi keq.

Dui-nhâng Zoshâng Sum Yuq Lé, Dangtú Yu É Hkyô

Luk 19:11-27

¹⁴ Mauhkúng mingdán gi, byù rayuq byìn we htoq rá hen nyi é nghut mù, yhâng é dui-nhâng zoshâng wui lé wut yù luí, yhâng é sutzé lé ap byi to sù eq pung ashí nghut ri.

¹⁵ Yhang gi, yhangmoq é a-tsam má cháng luí, rayuq lé gi, ngùn ngo jói, rayuq lé gi, í jói, htâng rayuq lé gi, rajoí kut byi to mù, byìn we shut htoq ló byuq bê nghut ri.

¹⁶ Ngùn ngo jói wó yù sù gi, haú hkún jáng htoq ló mù, hpugá gá luí, ngùn ngo jói wó myat yù bê nghut ri.

¹⁷ Haú eq rajung za, ngùn í jói wó yù sù le, í jói wó myat yù bê nghut ri.

¹⁸ Nghut kôlháng, rajoí za wó yù sù gi, htoq e ló mù, myigùng má du luí, yhâng yhumsíng hpô é ngùn lé haq myhup tô ri.

¹⁹ Hau htâng tsómra myáng jáng, dui-nhâng zoshâng haú bâng é yhumsíng hpô gi, dum taú jé lô mù, yhangmoq é ngùn chyaráng lé, lo jep ri.

²⁰ Ngùn ngo joi wó yú sù gi, amyat ngo joi lé le yu lé lô mù, 'Yhumsing ê, nàng, ngo lé, ngùn ngo joi ap tô é nghut lhê. Wú aq, amyat ngo joi wó ho jat yù bê.' ga tai ri.

²¹ Haú hkûn, haú yhumsing hpó gi, 'Arâ! Nghut bê. Nàng gi, kyet é eq lumging é dui-nhâng zoshâng nghut ri! Tiq é mú má lhang wó lum é sù nghut é yanmai, ngò, nang lé, kô é mú lé le ap byi râ nghut lhê. Náng yhumsing hpó é gabú hkyô má bo wang lòm aq hkoil!' ga tù tai ri.

²² Haú eq rajung za, í joi wó yú sù le, lé lô mù, 'Yhumsing ê, nàng, ngo lé ngùn í joi ap tô é nghut lhê. Wú aq, amyat í joi wó ho jat yù bê.' ga, lé tai ri.

²³ Haú hkûn, haú yhumsing hpó gi, 'Arâ! Nghut bê. Nàng gi, kyet é eq lumging é dui-nhâng zoshâng nghut ri! Tiq é mú má lhang wó lum é sù nghut é yanmai, ngò, nang lé, kô é mú lé le ap byi râ nghut lhê. Náng yhumsing hpó é gabú hkyô má bo wang lòm aq hkoil!' ga tù tai ri.

²⁴ Hau htang, rajoi wó yú sù le, lé lô mù, 'Yhumsing ê, nàng gi, byù wui nghut mù, yhumsing a hô tô é jang mâ é shù yù nau é htoq agó, yhumsing, kyôshi a sân hkyô tô é jang mâ é tsing yù nau sù nghut é lé, ngò sê lhê.

²⁵ Haú mù, ngò gi, gyuq luí, htoq é mù, náng é ngùn lé, myigùng má ê haq myhup tô é nghut lhê. Wú aq, shí gi, nàng é ngùn nghut lhê.' ga tai ri.

²⁶ Haú mù, yhumsing hpó gi, yhang lé, 'Agè ashop é eq lagôn é dui-nhâng zoshâng ê! Ngò gi, yhumsing a hô tô é jang mâ é shù yù nau é eq, yhumsing, kyôshi a sân hkyô tô é jang mâ é tsing yù nau sù nghut é lé, nàng sê to gù nghut le nhing,

²⁷ ngá é ngùn lé, ngò dum taù jé lô jáng, aráng eq amyat wó yú shoq, ngùn hpún kat jang má, haí mù a kat tô é lhu?

²⁸ Haú mù, haú ngùn rajoi lé, náng chyáng mai yù luí, raxê joi wó to sù lé, byi pyám nhâng râ nghut lhê.

²⁹ Hkâsu mù gà le, wó sù ó yuq lé nghut kôle, yhang agùn agó wó râ matú, jat byi râ nghut lhê. A wó su chyáng mai kúm gi, yhang wó tô é lé lhang yu pyám byi shirâ nghut lhê.

³⁰ Haú mù, haú akyú a bo é dui-nhâng zoshâng lé gi, ngaubyi ngaù nhap eq zuí kyik kyik shoq hpuzô nyi râ jowò nghut é, shinggan mauchut hkaú má dú htoq pyám keq.' ga ri.

Sau Eq Bainám

³¹ Haú Byu Yhangzo gi, Yhâng é hpungwup shingkang mai, maumang lagyo lhunglhang bang eq rahá jé lé lo é hkûn, Yhâng é hpungwup shingkang bo é hkohkâm-tanghkuq htoq má zùng râ nghut lhê.

³² Haú hkûn, byù myù chángjup gi, Yhâng é hí má zing lé lo bùm kó râ nghut mù, Yhang gi, sau zúng sù mai, sau eq bainám lé gotú tù kut gam hkoq é su, byu pé lé gam hkoq pyám râ nghut lhê.

³³ Yhang gi, sau pé lé, loqyo hkyam shut, bainám pé lé, loqpaí hkyam shut kut, nyhi to râ nghut lhê.

³⁴ Hau htang má, haú Hkohkâm gi, Yhâng é loqyo hkyam shut mà é bang lé, 'Ngá Wá chyáng má é shimân jeju hkam yu é hui bang ê, lé keq; mingkan lé hpan é hkûn mai, nungmoq é matú ga hen lajâng tô é muí mingdán má wang ló keq.

³⁵ Hkâsu mù gà le, Ngò zòmut é u lé, nungmoq, Ngo lé byi tso kô é nghut lhê; Ngò wuishit é u lé, nungmoq, Ngo lé byi huq kô é nghut lhê; Ngò bíng kut wún é u lé, nungmoq, Ngo lé lhom hkulum yù kô é nghut lhê;

³⁶ Ngò gùngchîn dut é u lé, nungmoq, Ngo lé byi hut kô é nghut lhê; Ngò nõhpyo huí é u lé, nungmoq, Ngo lé wú gon kô é nghut lhê; Ngò htóng lúng é u lé, nungmoq, Ngo lé lé kum kô é nghut lhê.' ga tai rá nghut lhê.

³⁷ Háu hkûn, háu dingmán bang gi, Yhang lé, 'Yhumsing ê, Nang zòmut huí é lé, ngamoq, hkâ-nhám myàng luí, byi tsò wú é lúh? Nang wuishit é lé, ngamoq, hkâ-nhám myàng luí, byi huq wú é lúh?

³⁸ Nang bíng kut wún é lé, ngamoq, hkâ-nhám myàng luí, lhom hkulum wú é lúh? Nang gùngchîn dut é hkûn, ngamoq, hkâ-nhám byi hut wú é lúh?

³⁹ Nang nõhpyo huí é lé le, htóng lúng é lé le, ngamoq, hkâ-nhám myàng luí, lé gon lé kûm wú é lúh?' ga myi kó rá nghut lhê.

⁴⁰ Háu hkûn, háu hkohkâm gi, 'Ngò, nungmoq lé teng za tai kôlé, shí, Ngá gumang wui má é je tiq sù lé, nungmoq kut byí é hkyô hái le, Ngo lé kut byí é nghut bê.' ga tú tai rá nghut lhê.

⁴¹ Hau htâng má, Yhang gi, Yhâng é loqpaí hkyam shut má é bang lé, 'Dingnyé wó é bang ê, Ngá chyáng mai gâng ló mù, nat Tsadán eq yhâng é maumâng pé é matú hen tô é, ahtum abyuq é myi má wang ló keq.

⁴² Hkâsu mù gà le, Ngò zòmut é u lé, nungmoq, Ngo lé a byi tso kó; Ngò wuishit é u lé, nungmoq, Ngo lé a byi huq kó;

⁴³ Ngò bíng kut wún é u lé, nungmoq, Ngo lé a lhom hkulum yù kó; Ngò gùngchîn dut é u lé, nungmoq, Ngo lé, mebu a byi hut kó; Ngò nõhpyo huí é eq htóng lúng é u lé, nungmoq, Ngo lé a gon kó nghut ri.' ga tai rá nghut lhê.

⁴⁴ Háu hkûn, yhangmoq gi, 'Yhumsing ê, nang zòmut wuishit é, bíng kut wún é, gùngchîn dut é, nõhpyo huí é eq htóng lúng é lé, ngamoq, hkâ-nhám myàng luí, a wú gon kut wú é lúh?' ga tau myi kó rá nghut lhê.

⁴⁵ Háu hkûn, Yhang gi, 'Ngò, nungmoq lé teng za tai kôlé, shí bang má é je tiq sù lé, nungmoq, a kut byí é hkyô hái le, Ngo lé a kut byí é nghut bê.' ga, yhangmoq lé tú tai rá nghut lhê.

⁴⁶ Háu mù luí, háu bang gi, ahtum abyuq mara dam byí é má wang ló kó rá nghut lhê; háu dingmán bang kúm gi, ahtum abyuq é asak má wang ló kó rá nghut lhê." ga Yesuq tai ri.

26

Yesuq Lé, Sat Râ Da Kô É Hkyô

Mrk 14:1-2; Luk 22:1-2; Yhn 11:45-53

¹ Yesuq gi, háu hkyô pé lé ban tai é htâng má, Yhâng é chángzò pé lé,

² "Nungmoq sê tô é eq rajung za, í nyí lai é htâng má, Lhoqlhai Poi jé rá nghut mù, háu Byu Yhangzo gi, tapzing má jén sat é hui rá matú, ap pyám é hui rá nghut lhê." ga tai ri.

³ Háu u lé, hkyangjong agyi pé eq suwún wui gi, Kayahpaq gá é hkyangjong mó rayuq é yhumwàng má zup zing to kômù,

⁴ Yesuq lé haq chyup yú rá eq sat pyám rá hkyô lé, hpyê lhúm bum akò nghut ri.

⁵ Nghut kôlhang, yhangmoq gi, "Byu pé gabyông lò kó abe, poi gyoro má gi, a kut shi sháng." ga, tai lhúm akò nghut ri.

Yesuq, Xú Hut Gyun Huí É Hkyô

Mrk 14:3-9; Yhn 12:1-8

⁶ Yesuq gi, Behtani wà má nyi é manggâm dap wú sù Simûn é yhúm má nyi tô é hkûn,

⁷ myiwe myhí rayuq gi, gyai hpaù é namngón xú bo é luq hpyû bông yu lé lô mù, Yesuq zo shuq nyi é hkûn, namngón xú háu lé, Yhâng é ulhum má hut gyun byí ri.

⁸ Háu hkyô lé, háu chángzô pé myàng kôjáng, wú nhik-yo kômù, "Hái mù luí, háu lé aha agó kut pyâm lhê lhú?"

⁹ Xú háu lé, ahpaу myo myô èq ùng pyám mù, myùng bang lé byí le ge lhê mhai!" ga tai kat akò.

¹⁰ Yesuq gi, háu hkyô lé sé luí, "Hái mù, myiwe zo háu lé, i-myt lhoq myô nyi akò lhú? Yhang gi, Ngá é ahtoq má ge é hkyô kut bê nghut ri.

¹¹ Háu myùng bang gi, nungmoq eq rahá hkâ-nhám le nyi rá nghut lhê; nghut kôlhang, Ngò gi, nungmoq eq rahá ayang nyi nyi rá sù a nghut.

¹² Yhang, Ngá gùng má namngón xú hut gyûn é gi, Ngá gùng lé yhum rá matú, hen lajáng é hkyô nghut ri.

¹³ Ngò, nungmoq lé teng za tai kôlé, háu gabú danglù lé, mingkan gón hko kyô é jowò hkangmó má, yhang lé myit bûn é dông, yhang kut é hkyô shí lé, tai kyo bekò rá nghut lhê." ga tai kyo ri.

Yesuq Lé, Yudaq Èq Ung Zô Pyâm É Hkyô

Mrk 14:10-11; Luk 22:3-6

¹⁴ Hau htâng, háu chángzo raxe í yuq má bo é Yudaq Iskarut ga sù gi, hkyangjong agyi pé chyáng é mù,

¹⁵ "Ngò, Yesuq lé nungmoq é loq má ap byí é nghut jáng, nungmoq, ngo lé hai byi kó rá lhú?" ga myí ri. Háu mù, yhangmoq gi, yhang lé ngùn denggá sum xê chap nghap byí akò.

¹⁶ Háu hkûn mai, Yudaq gi, Yesuq lé ap pyám rá hkyô ho nyi bê nghut ri.

Yhumsing É Myinzang

Mrk 14:12-26; Luk 22:7-23; Yhn 13:21-30

¹⁷ Múnchi a kat é Muk Zo Poí sâng-hi nyí má, háu chángzô pé gi, Yesuq chyáng lé lô kômù, "Nàng zo rá Lhoqlhai Poí zoshuq lé, ngamoq hkámá món to rá lhú?" ga myí akò.

¹⁸ Háu mù, Yhang gi, "Myuq hkaù shut wang ló mù, byù rayuq chyáng é luí, háu yuq lé, 'Ngá é ahkyíng chyáng bê; Ngá é chángzô pé eq rahá, Ngò, náng é yhúm má Lhoqlhai Poí kut rá nghut lhê.' gá Sará tai ri nghú, è tai keq." ga pying kat ri.

¹⁹ Háu mù, háu chángzô pé gi, Yesuq pying kat é eq rajung za è tai kômù, Lhoqlhai Poí lé món to bekò nghut ri.

²⁰ Myinhântang jé lô jáng, Yesuq gi, háu chángzo raxe í yuq eq rahá, zohpoq má zung tô ri.

²¹ Yhangmoq zô nyi bùm kô é u lé, Yesuq gi, "Ngò, nungmoq lé teng za tai kôlé, nungmoq má é rayuq sù gi, Ngo lé ap pyám rá nghut lhê." ga tai ri.

²² Háu hkûn, yhangmoq gi, gyai gyô yón kômù, rayuq htâng rayuq, "Yhumsing è, ngò a nghut hkaí?" ga, Yhang lé chôm myí akò.

²³ Háu hkûn, Yesuq gi, "Ngò eq rahá, hkoq shí má loq lap bê sù gi, Ngo lé ap pyám rá sù nghut lhê.

²⁴ Háu Byu Yhangzo gi, Yhang eq séng luí kâ tô é eq rajung za, shí rá za nghut lhê. Nghut kôlhang, háu Byu Yhangzo lé ap pyám é sù gi, dingnyé wó ri; háu yuq gi, a hku lé le lháng, je ge ri." ga dum tai kat ri.

²⁵ Hau htâng, Yhang lé ap pyám rá sù, Yudaq gi, "Rabai è, ngò a nghut hkaí?" ga myí jáng, Yesuq gi, "Nàng nghut ri." ga tù tai kat ri.

²⁶ Yhangmoq zô nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, "Shí gi, Ngá é gungsho nghut lhê; yù mù zo keq." ga tai uchyang, Yhâng é chángzô pé lé gàm byi ri.

²⁷ Hau htâng, Yhang gi, góm lé le, yù mù, jeju hkya-on luí, yhangmoq lé byi mù, tai é gi, "Nungmoq banshoq bang, shuq keq.

²⁸ Shí gi, yubak mara hkyut pyám byi rá, byù myo myô é matú htoq pyám é, dangshikaq eq sêng é Ngá sui nghut lhê.

²⁹ Ngò, nungmoq lé tai kôlé, ahkuí mai gi, Ngò, Ngá Wâ é mingdán má, nungmoq eq rahá tsibiyiq wing asik lé shuq é buinyi a jé jé, tsibiyiq wing lé dum shuq rá a nghut lo." ga tai ri.

³⁰ Yhangmoq gi, hkya-on mahkôn ralhú ban hkôn jáng, Tsanlun Bùm shut htoq é ló bekô nghut ri.

Petruq He-ngik Râ Lé, Te Tai É Hkyô

Mrk 14:27-31; Luk 22:31-34; Yhn 13:36-38

³¹ Hau htâng má, Yesuq gi, yhangmoq lé, "Nungmoq lhunglhâng bang gi, hkû-myín yhang jáng, Ngá é yanmai, myit lingbat kó rá nghut lhê; hkâsu mù gâ le,

'Hau sau zúng sù lé, Ngò bat sat pyám mù, sau hpúng má é sau pé gi, lhoq pyo pyám é hui kó rá nghut lhê.'^{*}
ga kâ tô ri.

³² Nghut kôlhâng, Ngò gi, lhoq dui toq é huí htâng má, Galile mau shut, nungmoq é hí má e ló láng rá nghut lhê." gâ ri.

³³ Hau hkûn, Petruq gi, "Náng é yanmai, góbang banshoq myit lingbat kôlhâng, ngò gi, hkâ-nhám le myit lingbat rá a nghut." ga tù tai ri.

³⁴ Yesuq gi, "Ngò, nang lé teng za tai lé, hkû-myín yhang jáng, woq a tûn shimá, nang, Ngo lé sum dâm he-ngik pyám rá nghut lhê." ga tù tai ri.

³⁵ Nghut kôlhâng, Petruq gi, "Ngò, Nang eq rahá shí rá dut kôlhâng, Nang lé ngò he-ngik pyám rá a nghut." ga sai tai ri. Hau chángzô pé góbang banshoq le, hau su ga châng tai bum akò nghut ri.

Get-samane Gà É Jowò Má Kyûdûng É Hkyô

Mrk 14:32-42; Luk 22:39-46

³⁶ Hau htâng má, Yesuq gi, Yhâng é chángzô pé eq rahá Get-samane gà é jowò má é kômù, yhangmoq lé, "Ngò, hé má é mù, kyûdûng nyi é u lé, nungmoq shí má zùng láng keq." ga tai ri.

³⁷ Yesuq gi, Petruq eq Zebedi yhangzô nhik lé shuí chûng ri. Yhang gi, myit gyai a ngón é eq myit wui nhik hkyik dut lò bê nghut ri.

³⁸ Hau htâng, Yhang gi, yhangmoq lé, "Ngò gi, shí rá í yhang myit yón nyi ri; nungmoq gi, Ngò su machyâ luí, shí má láng nyí keq." ga tai ri.

³⁹ Yesuq gi, hau mai ratsuí zo sô é mù, myigùng má ngóm gop to luí, "Áwa é, wó dut é nghut le gi, góm^{*} shí lé, Ngá chyáng mai lhai pyám byi laq. Nghut kôlhâng, Ngò ô nau é dông a nghut, Nang ô nau é dông sheq nghut sháng gaq." ga kyûdûng ri.

⁴⁰ Hau htâng, Yhang gi, Yhâng é chángzô pé chyáng dum taù lo le, yhangmoq yhup myhî to kô é lé lo myàng ri. Hau mù, Yhang gi, Petruq lé, "Nungmoq gi, hkyíng hkum rahkum za lháng, Ngò eq rahá a wó machya nyi kó lúh?

^{*} 26:31 Zhk 13:7 ^{*} 26:39 Góm gâ é gi, Yesuq, jamjai hau rá hkyô eq shí rá hkyô lé, tai nau é nghut lhê.

41 Gunglaú é a hui sháng gaq, machyâ luí, kyúđung nyi keq. Haú woi-nyí gi, kâm nyi kôlhang, gungsho gi, wum nyhôm nyi ri." ga taí ri.

42 Yhang gi, radâm dum é mù, "Áwa ê, góm shí lé, Ngò a shuq é a wó lai rá nghut jáng gi, Nàng ô nau é đông nghut sháng gaq hkoi." ga kyú dum đung ri.

43 Yhang dum taú lo le, yhangmoq gi, myoqkuq lai kô é yanmai, yhup myhí to láng kô é lé, lo dum myàng ri.

44 Haú mù, Yhang gi, yhangmoq lé tô pyâm to mù, sum dâm nghú rá dâm dum é luí, hí lé đung é dang lé roq é dum đung ri.

45 Haú mù, Yhang gi, haú chángzô pê chyáng dum taú jé lô mù, yhangmoq lé, "Nungmoq gi, ahkuí jé shoq yhup ngón nyi ashí kó lúh? Wú keq! Haú ahkying gi, jé bê nghut luí, haú Byu Yhangzo gi, yubak dap bâng é loq má ap pyâm é hui rá nghut bê.

46 Toq keq! Ló losháng hkoi! Ngo lé ap pyâm rá sù gi, jé lé bê nghut ri." ga taí ri.

Yesuq, Chyup Yú Huí É Hkyô

Mrk 14:43-50; Luk 22:47-53; Yhn 18:3-12

47 Yesuq, dáng nyo nyi ashí u lé, haú chángzo raxe í yuq má bo é Yudaq gi, jé lé lo ri; haú hkyangjong agyi pé eq mingbyu é suwún wui chyáng mai nhang kat é bang nghut é, shâm eq dumbáng pé chung tô é byù moq mó le, yhang eq rahá nghut akô.

48 Yesuq lé ap pyâm rá sù gi, haú bang lé, "Ngò, bopuq puq é sù gi, haú yuq nghut bê; Yhang lé chyup yú keq." ga kumlhá byí tô ri.

49 Yudaq gi, Yesuq chyáng hkyê za é mù, "Rabai ê, wángzán nyi lhê lúh?" ga taí luí, Yhang lé bopuq puq byí ri.

50 Haú hkún, Yesuq gi, "Buinùm hpó ê, nàng kut rá muzó lé kut aq hkoi." ga tú taí kat ri.

Hau htàng, yhangmoq gi, hí shut huí é luí, Yesuq lé chôm zuí zing mù, chyup yú bekô nghut ri.

51 Haú mù, Yesuq eq rahá nyi bang má é rayuq gi, shâm she htoq yú mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

52 Haú jáng, Yesuq gi, haú yuq lé, "Náng é shâm lé, xâng pyám aq; hkâsu mù gâ le, shâm shê sù gi, ó yuq nghut kôle, sham eq shí rá nghut lhê.

53 Ngò gi, Ngá Wa lé dung jáng, Yhang gi, radá dâm, maumang lagyo dap pé raxe í dap htoq myo shoq nhang kat byi rá nghut é lé, nungmoq a sé kó lúh?

54 Nghut kôlhang, haú su nghut é nghut jáng, shí hkyô dut lò rá nghut lhê ga Chyúmdang pé má bò tô é hkyô gi, hkâsu wó dik lò rá lúh?" ga taí kat ri.

55 Hau htàng, Yhang gi, byù moq lé, "Nungmoq gi, damyaq rayuq lé chyup é su, Ngo lé chyup rá matú, shâm eq dumbáng pé chùng mù, lé lo akô lúh? Ngò gi, nyi wui, noqkuq yhùm má zùng mù, mhoqshit nyí kôlhang, nungmoq, Ngo lé a chyup yú kô é nghut lhê.

56 Nghut kôlhang, shí su dut é hkyô pé banshoq gi, haú myiqhtoí pé kâ tô é hkyô pé lo dik rá matú dut é nghut ri." ga taí ri. Haú hkún, haú chángzô pé banshoq gi, Yesuq lé tô pyâm to kôluí, hpang byo byuq bekô nghut ri.

Yudaq Byin Tú Wapdoq Má Jep Huí É Hkyô

Mrk 14:53-65; Luk 22:54-55, 63-71; Yhn 18:13-14, 19-24

57 Yesuq lé chyup yu é bang gi, haú tará sará pé eq suwún wui zup zing nyi é jang, hkyangjong mó Kayahpaq é yhùm má, Yhang lé shuí e akô.

⁵⁸ Petruq gi, hkyangjong mó é yhumwàng hkaû má châng jé wâng shoq, we we mai Yesuq htâng châng tô ri. Yhang gi, hkâsu dut lò râ lé myàng naù luí, wâng hkaû má wang é mù, zúng bang eq rahá zung tô ri.

⁵⁹ Haù hkyangjong agyi pé eq Yudaq byìn tú wapdoq mã é góbang gi, Yesuq lé sat pyám nhâng râ matú, a têng é saksé ho nyi akô.

⁶⁰ A têng é saksé myo myo htoq lô kôlhang, wó sat râ î é saksé a myàng kó nghut ri.

Ló htáng má, byù í yuq gi, lé lô kômù,

⁶¹ "Shí yuq gi, 'Ngò gi, haù Garai Gasâng é noqkuq yhùm lé lhoq hten pyám mù, sum nyí gyoro má dum wó sai lhê,' ga tai sú nghut ri." ga tai akô.

⁶² Haù hkûn, haù hkyangjong mó gi, toq yap mù, "Nàng, hai le a tú tai luq? Shí bang, Nàng lé mara hun nyi é saksé gi, hká đông nghut lhê lú?" ga, Yesuq lé myí ri.

⁶³ Nghut kôlhang, Yesuq gi, jit le a ga nyi tô ri.

Haù mù, hkyangjong mó gi, Yhang lé, "Haù rú dui nyi é Garai Gasâng é myìng lé lang luí, ngò, Nàng lé myí wú lé: Nàng gi, Garai Gasâng é Yhangzo, Hkrisduq nghut lhê luq, ngamoq lé tai kyô wú aq." ga tai jáng,

⁶⁴ Yesuq gi, "Nàng tai é eq rajung za nghut lhê. Ngò, nungmoq banshoq lé tai kôlé, nungmoq gi, ahkuí mai htâng hpyang má, haù Byu Yhangzo gi, a-tsam bo dik Su é loqyo hkyam má zung tô é lé le, mhuthtui ji mù, mauhkúng mai lé lo é lé le, nungmoq myàng kó rá nghut lhê." ga tai ri.

⁶⁵ Haù hkûn, hkyangjong mó gi, yhâng é bu lé lêng cheq pyám mù, "Yhang gi, Garai Gasang lé rhoi dang tai bê nghut ri! Nga-nhúng, hai saksé rá ashí lú? Yhang, Garai Gasang lé rhoi dang tai é lé, nungmoq, ahkuí wó gyo bekô nghut lhê.

⁶⁶ Nungmoq hkâsu wó myit akô lú?" ga myi jáng, yhangmoq gi, "Yhang gi, shí gíng sú nghut lhê." ga tú tai akô nghut ri.

⁶⁷ Haù htâng má, yhangmoq gi, Yesuq é myoqdong má sôkan byé gyun luí, loqtsup eq htui byí akô nghut ri. Góbang gi, Yhang lé bo-pyuq pyuq byi luí,

⁶⁸ "Hkrisduq Nàng, Nàng lé bat sú ó yuq nghut é lé, myiqhtoí htoí wú aq." ga tai akô.

Yesuq Lé, Petruq He-ngik Pyâm É Hkyô
Mrk 14:66-72; Luk 22:56-62; Yhn 18:15-18, 25-27

⁶⁹ Petruq gi, wâng hkaû má nyi tô é u lé, dui-nhâng zoshâng myhí rayuq gi, yhâng chyáng lé jé mù, "Nàng le, haù Galile byù Yesuq eq rahá nyi sú nghut ri." ga tai ri.

⁷⁰ Nghut kôlhang, Petruq gi, haù bang banshoq é hí má yhang, "Nàng hai tai nyi é lé, ngò a sé." ga he kat ri.

⁷¹ Haù htâng má, yhang gi, wâng hkúmdong shut htoq e ló le, haù jowò má, dui-nhâng zoshâng myhí góyuq le, yhang lé myàng mù, "Shí yuq gi, Nazaret wà byù Yesuq eq rahá nyi sú nghut ri." ga, haù mã é bang lé tai kat ri.

⁷² Haù hkûn, yhang gi, "Byù haù yuq lé, ngò a sé!" ga dakam é đông he pyâm ri.

⁷³ Haù htâng razup zo má, haù jowò má yap to bang gi, Petruq chyáng huí é kômù, "Nàng le, haù bang má bò sú yhang nghut ri; náng é danghté lé sê gyô ri." ga tai akô.

⁷⁴ Haù hkûn, yhang gi, yhânggùng yhang nhing luí, "Haù yuq lé, ngò a sé." ga dakâm dang tai ri.

Haú-u yhang, woq tún bê nghut ri.

⁷⁵ Haú mù, Petruq gi, "Woq a tún shi má, nàng, Ngo lé sum dâm he pyám rá nghut lhê." ga, Yesuq, yhang lé taí é dang lé, myit bún kat mù, shinggan shut htoq é luí, gyai yhang é ngau ri.

27

Yudaq Juíshi É Hkyô

Mrk 15:1; Luk 23:1-2; Yhn 18:28-32

¹ Napsûn noq le, hkyangjong agyi pé banshoq bang eq mingbyu é suwún wui gi, Yesuq lé sat pyám nhâng rá matú chôm myit hpyit yû bekô nghut ri.

² Haú mù, yhangmoq gi, Yhang lé tuí yù luí, shuí htoq é kômù, mauzau Pilat chyáng é ap byí akô nghut ri.

³ Yesuq lé ap pyâm é sù Yudaq gi, Yesuq lé jéyáng doqdân é hkyô lé myang sé jáng, nungngham wò mù, haú ngùn sum xê chap lé, hkyangjong agyi pé eq suwún wui chyáng ló dum taú byí ri.

⁴ Haú mù, yhang gi, "Mara a bò Su é sui lé, ngò ap pyám bê nghut é yanmai, ngò mara wó bê." ga taí jáng, yhangmoq gi, "Haú hkyô, ngamoq eq haí sêng lhê lhu? Haú gi, nàng eq sheq ru sêng lhê." ga lhom taí kat akô nghut ri.

⁵ Haú mù, Yudaq gi, ngùn haú lé, noqkuq yhúmhmaú má dú pyâm to luí, htoq ló mù, yhang gũng yhang é juíshi byuq bê nghut ri.

⁶ Haú hkyangjong agyi pé gi, ngùn chap haú pé kui yù luí, "Shí gi, sui hpau ngùn nghut lhê yanmai, alu sidek má a ge kat." ga taí akô.

⁷ Haú mù, yhangmoq gi, tũngbaù pé é lupdùng kut rá matú, au saí zo su é maumyí lé, ngùn hau èq wui hpyit yû rá dông, chôm myit hpyit to bekô nghut ri.

⁸ Hau é yanmai, ahkuí jé shoq, haú jowò lé, sui myigùng ga myhíng tô akô nghut ri.

⁹ Haú gi, "Haú Israelaq byu pé mai, Yhang lé gù hpyit tô é ngùn sum xê chap lé, yhangmoq yù mù, haú Yhumsíng Garai, ngo lé pyíng tô é eq rajung za,

¹⁰ haú au saí zo su é maumyí lé, yhangmoq wui yù bekô nghut ri." ga myiqhtoi Yeremiaq taí tô é dang lo dik é nghut ri.

Yesuq Lé, Pilat Myí Jep Wú É Hkyô

Mrk 15:2-15; Luk 23:3-5, 13-26; Yhn 18:33-19:16

¹¹ Haú u lé, Yesuq gi, mauzau hpô é hí má yap tô é nghut mù, haú mauzau hpó gi, Yhang lé, "Nàng gi, Yudaq byu pé é hkohkâm nghut lhê lhu?" ga myi jáng, Yesuq gi, "Nàng taí é eq rajung za nghut lhê." ga tú taí ri.

¹² Haú hkyangjong agyi pé eq suwún wui gi, Yhang lé, mara hùn kôjáng, Yhang gi, haí le a tú taí nghut ri.

¹³ Haú hkûn, Pilat gi, Yhang lé, "Yhangmoq, Nang lé mara hùn saksé haú-í hkâm nyi kô é lé, Nàng a wó gyo lhu?" ga saí myí ri.

¹⁴ Nghut kôlhang, Yesuq gi, dang rahkun lháng a tú taí é yanmai, haú mauzau hpó gi, gyai maú byuq bê nghut ri.

¹⁵ Haú Lhoqlhai Poí u lé, mingbyú wui ô nau é má cháng luí, haú mauzau hpó gi, htóng byú rayuq yuq lé nhâng byí é htung joq ri.

¹⁶ Haú u lé, a gè myíng htoq é htóng byú, Barabaq ga sù rayuq nyi ri.

¹⁷ Haú mù, byú moq mò zup zíng lò kô é hkûn, Pilat gi, yhangmoq lé, "Nungmoq é matú, hká yuq lé lhut byi nhâng nau akô lhu? Barabaq luq? Haú a nghut jáng, Hkrisduq gá é Yesuq lé luq?" ga myí ri.

18 Yhang haù su ga myí é gi, yhangmoq, Yesuq lé manôn kôluí, yhâng chyáng lé ap byi kô é hkyô lé sé é yanmai nghut ri.

19 Pilat gi, tarâ jéyáng tingnyâng htoq má zung tô ashí hkùn, yhangmyi gi, "Haù mara a bò Sù lé, haí le hkâkut; hkâsu mù gà le, hkù-nyí za lhang, yhupmoq má, haù yuq é yanmai, ngò tsómra hpuzô pyám bê nghut lhê." ga, yhâng chyáng dang pyíng kat ri.

20 Nghut kôhlang, haù hkyangjong agyi pé eq suwún wuí gi, Barabaq lé dùng htoq yú rà eq Yesuq lé sat pyám nhâng rà matú, shiwa byu pé lé wum byi bekô nghut ri.

21 Haù mauzau hpô gi, "Shí í yuq má é hká yuq lé, nhâng byi nhâng nau akô lú?" ga myi jáng, yhangmoq gi, "Barabaq!" ga tú taí akô nghut ri.

22 Haù mù, Pilat gi, "Haù jáng gi, Hkrisduq gà é Yesuq lé, ngò hkâsu kut rà lú?" ga dum myí kat jáng, yhangmoq banshoq bang gi, "Yhang lé tapzîng má jén sat pyám aq!" ga dum tú taí akô nghut ri.

23 Nghut kôhlang, yhang gi, "Haí mù lú lú? Yhang gi, hai mara kut shut bê lú?" ga dum myi jáng, yhangmoq gi, htê mó èq, "Yhang lé tapzîng má jén sat pyám aq!" ga je riyhang garú lo bum akô nghut ri.

24 Pilat gi, hká dòng le a dat kut lô é eq byu pé gabyông lò kó rà nghut é hkyô lé myàng lú, uchyam yù mù, shiwa byu pé hí má loq chí lú, taí é gi, "Shí yuq é sui gi, ngò eq haí a séng; nungmoq eq za ru sêng lhê." gà ri.

25 Haù shiwa byù lhunglhang bang gi, "Yhâng é sui gi, ngamoq eq ngamoq é yhangzo yhangshù pé htoq má joq nyí sháng gaq." ga, dum tú taí kat akô nghut ri.

26 Haù hkùn, Pilat gi, Barabaq lé nhâng byi bê nghut ri. Yesuq lé kúm gi, nhuq bat nhâng mù, tapzîng má jén sat pyám rà matú ap byi kat bê nghut ri.

Yesuq Lé, Gyezô Pé Rhoi É Hkyô

Mrk 15:16-21; Yhn 19:2-3

27 Hau htâng, mauzau hpô é gyezô pé gi, Yesuq lé, mauzau hpô é yhumwàng mó hkaù má shuí wang ló kômù, Yhâng é lhînghkyuq má, gyedap gón lé jì tsîng tô akô.

28 Yhangmoq gi, Yesuq é mebu hkyut pyám byi kôluí, zam zam ne é buhîng hut byi kômù,

29 zujanmaù ralhum saí yù kôluí, Yhâng é ulhum má tsung byí akô nghut ri. Yhangmoq gi, jàm-yang rahkat lé, Yhâng é loqyo loq má kat byi kômù, Yhâng é hí má hkyihput htuq kôluí, "Yudaq byu pé é hkohkâm hpô é! Chyung hîng xê hîng nyí sháng gaq ô!" ga, jihpoi dang taí akô.

30 Yhangmoq gi, Yhang lé sôkan byé gyun lú, Yhâng é loq mai jàm-yang lú yù mù, Yhâng é ulhum má dum bat bat kut akô nghut ri.

31 Yhangmoq gi, Yhang lé rhoi jihkyoi ban kut yù kôjáng, Yhang wut tô é buhîng lé hkyut yù kômù, Yhâng é mebu lé dum hut byi lú, tapzîng má jén sat pyám rà matú, Yhang lé shuí htoq e ló bekô nghut ri.

Yesuq Lé Jén Pyám É Hkyô

Mrk 15:22-32; Luk 23:27-43; Yhn 19:17-27

32 Yhangmoq htoq e ló nyi le, Kuruni myuq byù nghut é Simun ga sù lé myàng kômù, yhang lé, zik lú tapzîng waq nhang akô nghut ri.

33 Yhangmoq gi, Golgahta gà é jowò má jé e ló bekô nghut ri. Golgahta gà é lichyúm gi, ugyap joq é jowò lé gà é nghut lhê.

³⁴ Haú má jé jáng, yhangmoq gi, Yesuq lé, hkô jung eq nyhò tô é tsibiyiq wing lé byi huq akô; nghut kôlhang, Yhang gi, haú lé chyam wú mù, a shuq byi kut pyâm ri.

³⁵ Yhangmoq gi, Yesuq lé tapzîng má jén tap tô é htâng, Yhâng é mebu lé lhâng, hkyîn shosé shé é dông gam yu pyâm byi akô.

³⁶ Hau htâng, yhangmoq gi, haú jowò má zung to mù, Yhang lé zúng nyi akô nghut ri.

³⁷ Yhâng é u htoq má, "SHÍ YUQ GI, YUDAQ BYU PÊ É HKOHKÂM, YESUQ NGHUT LHÊ." ga, Yhang lé mara hun é laiká kâ tap tô akô.

³⁸ Haú hkûn, Yhang eq rahá, damyaq í yuq lé le, Yhâng é loqpaí hkyam shut rayuq, loqyo hkyam shut rayuq kut, tapzîng htoq má jén tap tô akô nghut ri.

³⁹ Hkyô sô lai ló é bang gi, nyhap é dông u-ngut nut mù, tai kô é gi,

⁴⁰ "Noqkuq yhûm lé hpyoq pyâm lui, sum nyi gyoro má dum wó sai lhê ga Sû ê! Nàng, Garai Gasâng é Yhangzo nghut le gi, Náng gûng nàng hkyi yù lui, tapzîng mai gyó lo wú aq mhai!" ga akô nghut ri.

⁴¹ Haú eq rajung za, hkyangjong agyi pé, tarâ sará pé eq suwún wui le, Yhang lé rhoi jihkyoi kut mù, tai kô é gi,

⁴² "Shí yuq gi, góbang lé hkyi yù sù nghut kôlhang, Yhânggung yhang gi, a wó hkyi yù nghut ri myhi-nhung! Yhang gi, Israelaq byu pé é hkohkâm nghut lhê! Ngamoq wó lumjîng rã matú, Yhang, tapzîng mai gyó lo wú sháng gaq.

⁴³ Yhang gi, Garai Gasang lé lumhkaú sù nghut lhê mù, Garai ô nau é sù nghut le gi, ahkuí Yhang lé hkyi yù sháng gaq; hkâsu mù gà le, Yhang gi, Ngò, Garai Gasâng é Yhangzo nghut lhê.' ga tai ri." ga bum akô nghut ri.

⁴⁴ Haú eq rajung za, Yhang eq rahá tapzîng má jén to huí é damyaq í yuq le, Yhang lé rhoi dang tai akô nghut ri.

Yesuq Soqkâng Byit É Hkyô

Mrk 15:33-41; Luk 23:44-49; Yhn 19:28-30

⁴⁵ Nyí-káng raxe í hkyíng mai myinhêng sum hkyíng jé shoq, ramau gón mauchut tuq dut byuq bê nghut ri.

⁴⁶ Myinhêng sum hkyíng kô má, Yesuq gi, "Eloi, Eloi, lama sabakhtani?" ga, htê mó eq garú kat ri. Hau é lichyúm gi, "Ngá Garai ê, Ngá Garai ê, Nàng, hai mù, Ngo lé tô pyâm tô lhê lhu?" gà é nghut ri.*

⁴⁷ Haú nâm má yap tô é bang ra-am gi, haú lé wó gyo kôjáng, "Yhang gi, myiqhtoi Eliyaq lé wut nyi ri." ga tai akô.

⁴⁸ Haú hkûn jáng, yhangmoq má é rayuq gi, din e ló mù, wuimaù lé é yu ri. Yhang gi, haú lé tsibiyiq wing chyîn má jum yù lui, jam-yang má tuí tap mù, Yesuq shuq rã matú yhun byi ri.

⁴⁹ Góbang gi, "Yhang lé, Eliyaq, lé hkyi yu lhê laq, nga-nhung chôm láng wú sháng." ga tai akô nghut ri.

⁵⁰ Haú hkûn, Yesuq gi, htê mó eq dum garú kat lui, Yhâng é soqkâng byit bê nghut ri.

⁵¹ Haú u lé, haú noqkuq yhûm má é pán-gyang gi, ahtoq mai a-ô í hkyam byáng goq byuq bê nghut ri. Myigùng le nún lô mù, luqgok pé le goq byuq bê nghut ri.

⁵² Lup pé gi, bóng lô mù, shi byuq bê é chyoiyúng bang myo myo gi, lhoq dui é hui akô.

* 27:46 Hkya-on 22:1

⁵³ Haú bang gi, Yesuq dum dui toq é htâng, lup mai htoq lô kômù, chyoiyúng myuq* má wang é luí, byù myo myô hí má htoq shit akô nghut ri.

⁵⁴ Shô up gyezau hpó eq, yhang eq rahá Yesuq lé zúng nyi é bang gi, layàng nún é eq dut lo é hkyô banshoq lé myàng kôjáng, gyuq dân kômù, "Yhang gi, gè gè yhang, Garai Gasâng é Yhangzo nghut ri-nhung!" ga taí akô nghut ri.

⁵⁵ Myiwe wui myo myo le, we we mai wú nyi bum akô. Haú bang gi, Yesuq rá é má garúm rá matú, Galile mau mai Yhang htâng châng lé é bang nghut akô.

⁵⁶ Haú bang má, Magadalaq wà mã é Mariq, Yakuq eq Yose nhiktâng é yhângnu Mariq eq Zebedi é yhangzô nhiktang é yhângnú pé le bo akô nghut ri.

Yesuq Lé, Myhup Pyâm É Hkyô

Mrk 15:42-47; Luk 23:50-56; Yhn 19:38-42

⁵⁷ Myinhâng jé lô jáng, Yesuq é chángzo dut bê nghut é, sùt wó sù, Aramahti myuq byù Yosep ga sù lé lo ri.

⁵⁸ Yhang gi, Pilat chyáng ê mù, Yesuq é gungsôm lé ê dung jáng, Pilat gi, yhang lé byi rá matú hkunmó hkyô kat bê nghut ri.

⁵⁹ Yosep gi, gungsôm lé yù mù, pán yúng eq htup yup luí,

⁶⁰ luqgok lé kyúng tô é, yhâng é lup sik hkaú má é kat tô ri. Hau htâng, yhang gi, luphkum má, luqlông eq lhêng chí pyâm to luí, lô byuq bê nghut ri.

⁶¹ Magadalaq wà mã é Mariq eq goyuq Mariq gi, lup hí má zung tô akô nghut ri.

Lup Zúng É Hkyô

⁶² Haú Hên Lajang Buinyi lai é htâng nyi lé, hkyangjong agyi pé eq Hparishe pé gi, Pilat chyáng ê mù,

⁶³ "Yhumsing ê, Yhang, asak dui nyi ashí hkùn, 'Sum nyi nghú rá buinyi má, Ngò dum dui toq lô rá.' ga, haú byù mhaú taí é dang lé, ngamoq bún nyi lhê.

⁶⁴ Haú mù, haú sum nyi nghú rá buinyi jé shoq, lup lé rago za zúng nhang to aq. Haú a nghut jáng, Yhâng é chángzô pé, mâng lé lé hkaú yu lô mù, Yhang shi é mai dum dui toq lô bê ga, byu pé lé taí kó rá nghut lhê. Shí, lô htâng dàm mhaú é hkyô gi, sâng-hi dàm htoq je wui rá nghut lhê." ga, lé taí akô nghut ri.

⁶⁵ Haú hkùn, Pilat gi, "Nungmoq sê é dông, lup lé haí a dut loshoq, gyezô pé lé zúng nhang to keq." ga tù taí kat ri.

⁶⁶ Haú mù, yhangmoq gi, ê luí, lup lé gau shoq ga, luqgok má dizik htung mù, lup zúng byù nyhi to bekô nghut ri.

28

Dum Dui Toq Lo É Hkyô

Mrk 16:1-8; Luk 24:1-12; Yhn 20:1-10

¹ Banno buinyi lai jáng, rabat é sâng-hi nyi maubó zó má, Magadalaq wà mã é Mariq eq goyuq Mariq gi, lup má é wú rá ga, e lô akô.

² Haú hkùn, layàng mó nún lo ri; hkâsu mù gâ le, Yhumsing Garaí é maumang lagyo rayuq gi, mauhkung mai gyó lé lô mù, lup má é luí, haú luqlong lé tu lheng mù, hau ahtoq má zung tô ri.

³ Yhâng é isâm gi, lhaph su duqbó mù, Yhâng é mebu gi, gyo su hpyu zan tô ri.

* 27:53 Chyoiyúng myuq gâ é gi, Yerusalem wà mó lé gâ é nghut lhê.

⁴ Zúng nyi é bang gi, yhang lé lúm wú gyuq kômù, pyik pyik nán luí, shí gùng su dut bùm bekô nghut ri.

⁵ Haú maumang lagyo gi, myiwe haú nhik lé, "Hkâgyuq kó! Haú tapzîng má jén sat huí é Yesuq lé, nungnhik ho nyi kô é lé, ngò sê lhê.

⁶ Yhang gi, shí má a nyi lo; Yhang taí tô é eq rajung za, lhoq dui toq é hui bê nghut ri. Yhang lé lheq é jowò lé, lé wú keq.

⁷ Haú mù, hân taú ló luí, Yhâng é chángzô pé lé, 'Yhang, shi é mai lhoq dui toq é hui bê nghut ri; nungmoq é hí má, Galile mau shut ló láng berá. Nungmoq, Yhang lé, haú má ló myâng kó rá nghut lhê.' nghú ló taí kyo keq. Nungnhik lé, ngò taí é lé matsing chùng keq." ga taí kat ri.

⁸ Haú mù luí, myiwe myhí haú nhik gi, gyuq kôlhang, gyai gabú é myit eq lup mai hân taú ló mù, Yhâng é chángzô pé lé ló taí kyo rá matú, din ló bê nghut ri.

⁹ Haú hkùn, Yesuq gi, radá dâm yhangnhik lé lhom tê mù, "Wángzán nyi kó sháng gaq." ga taí ri. Haú mù, yhangnhik gi, huí ê luí, Yhâng é hkyí má po zing to mù, Yhang lé noqkuq akô.

¹⁰ Haú hkùn, Yesuq gi, yhangnhik lé, "Hkâgyuq kó. Ngá é gumang wui lé, Galile mau shut e ló keq nghú ló taí kyo keq; haú má, yhangmoq, Ngo lé myâng kó rá nghut lhê." ga taí kat ri.

Zúng Nyi É Gyezô Pé Taí É Danglù

¹¹ Myiwe haú nhik hkyô má ru nghut nyi ashí le, lup zúng é gyezô pé ra-am gi, myuq hkaú má wang ló mù, dut lai lo é hkyô banshoq lé, haú hkyangjong agyi pé lé ló taí kyo akô nghut ri.

¹² Haú hkyangjong agyi pé gi, suwún wuí eq huí lhum luí, hpyê lhúm é htâng má, haú gyezô pé lé, ngùn myo myo tsup byi mù,

¹³ "'Myín lé, ngamoq yhup myhí tô é hkùn, Yhâng é chángzô pé lé lô mù, mâng lé, lé hkaú yu ló bekô nghut ri.' nghú taí keq.

¹⁴ Shí hkyô lé, haú mauzau hpó wó gyô é nghut jáng, yhang myit ngón shoq, ngamoq taí rá nghut lhê; haú hkùn, nungmoq gi, hai manghkáng a htoq rá nghut lhê." ga taí kat ri.

¹⁵ Haú mù, gyezô pé gi, ngùn haú pé lé yù luí, yhangmoq lé taí kat é eq rajung za kut bekô nghut ri. Haú su mù, haú hkyô gi, Yudaq byu pé má taí pyo myhín ló bê nghut mù, ahkuí jé shoq taí nyi bum akô nghut ri.

Chángzô Pé Kut Râ Sasana Muzó

Mrk 16:14-18; Luk 24:36-49; Yhn 20:19-23; Lagyo 1:6-8

¹⁶ Hau htâng má, haú chángzo raxe rayuq gi, yhangmoq lé, Yesuq é nhang tô é Galile mau mã é bùm shut e ló bekô nghut ri.

¹⁷ Yhangmoq gi, Yesuq lé myâng kôjáng, noqkuq akô; nghut kôlhang, ra-am gi, a dê jíng kó nghut ri.

¹⁸ Hau htâng, Yesuq gi, yhangmoq chyáng lé lô mù, "Mauhkúng eq myigùng htoq mã é ahkáng ayá banshoq, Ngo lé byí to bê nghut lhê.

¹⁹ Haú mù, nungmoq gi, htoq é luí, byù myú chângjup lé, Ngá é chángzô pé dut nhâng mù, haú Íwa, Yhangzo, Chyoiyúng Woi-nyí é myìng lang luí, wui-myhup hkám byi mù,

²⁰ nungmoq lé, Ngò hkunmó hkyô tô é lunglhang lé châng kut rá matú, yhangmoq lé mhochit keq. Ngò gi, mingkan pyat htúm é hkùn jé shoq lhang, nungmoq eq rahá ru nghut nyi rá nghut lhê." ga pying tô ri.

MARKUQ é Gabú Danglù Laiká (The Gospel of Mark)

Yesuq É Matú Hkyô Htong Byí É Hkyô
Mht 3:1-12; Luk 3:1-18; Yhn 1:19-28

¹ Haú Garai Gasâng é Yhangzo, Yesuq Hkrisduq eq sêng é gabú danglù hi é hkyô gi,

² haú myiqhtoi Esai-aq laiká má:

"Náng é hkyô lajang láng râ matú, Ngá é lagyo lé, Náng é hí má Ngò nhang kat râ nghut lhê."^{*}

ga luí le,

³ "Haú yoso má, byù rayuq garû taí é htê gi,

'Haú Yhumsing é matú, hkyô hen to keq; Yhâng é matú hkyô lhoq nyhang to keq."^{*}

ga luí le, kê tô é eq rajung za nghut lhê.

⁴ Haú mù, Wui-myhup Sará Yohan gi, yoso hkaú má jé lé luí, wui-myhup hkám byí nyi é eq, yubak mara hkyut pyám byí é hui râ matú myit lhing mù, wui-myhup hkám yù râ hkyô lé, hko kyô nyi ri.

⁵ Haú hkûn, Yuda mau jowò hkangmó má é bang eq Yerusalem wà mó má é banshoq bang gi, yhâng chyáng htoq e bum akô. Yhangmoq gi, yhumsing é mara lé yín yù kôluí, yhâng chyáng mai Yodan làng má wui-myhup hkám yu bum akô nghut ri.

⁶ Yohan gi, gola-uq shomaú èq saí é mebu wut mù, yhâng é hpyidum má gi shokuq hpyihit hit ri; yhang gi, dinggám eq yosô byo-i pé lé zo sù nghut ri.

⁷ Yhang taí kyô é dang gi, "Ngá htoq má wum-o a-tsam je bo é sù rayuq, ngá htâng má jé lé râ nghut lhê; ngò gi, yhâng é hkyî-tsung tui lé hpyî râ lháng a gingdán é nghut lhê.

⁸ Ngò gi, nungmoq lé, wui èq za wui-myhup wó hkám byi lhê; nghut kôlhang, Yhang gi, Chyoiyúng Woi-nyí má nungmoq lé wui-myhup hkám byi râ nghut lhê." gâ ri.

Yesuq, Wui-myhup Hkám Yu É Hkyô Eq Gunlaú Huí É Hkyô
Mht 3:13-17; 4:1-11; Luk 3:21-22; 4:1-13

⁹ Haú yoq má, Yesuq gi, Galile mau Nazaret wà mai lé jé mù, Yohan chyáng Yodan làng má wui-myhup hkám yu ri.

¹⁰ Yesuq gi, wui mai htoq lo é u lé, mauhkûng bóng lo é lé le, Woi-nyí gi, hpúngkyui gunghkyâng sù é dông mai, Yhang ahtoq má gyó lé lo é lé le, Yhang myang kat ri.

¹¹ Haú hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

¹² Haú hkûn jáng, Woi-nyí gi, Yhang lé yoso shut wang e ló nhang ri.

¹³ Haú mù, Yhang gi, yoso má myi xê nyí nyi luí, Tsadán èq gunlaú é hui ri; tân jung yosô zè pé le, Yhang eq rahá nghut nyi ri; maumang lagyo pé gi, Yhang lé, lé dojaú nyi akô nghut ri.

Sâng-hi Lhê É Chángzô Pé
Mht 4:12-22; Luk 4:14-15; 5:1-11

¹⁴Yohan htông gyó é htâng má, Yesuq gi, Galile mau má ló jé mù,

¹⁵"Ahkyíng gi, jé bê; Garai Gasâng é mùngdán gi, chyâng lò bê nghut ri; myit lhing mù, haù gabú danglù lé lumjìng keq hkoi." ga luí, Garai Gasâng é gabú danglù lé hkò kyo wún ri.

¹⁶Yesuq gi, Galile không yàm mai sô lai ló le, Simun eq yhanggu Andre nhiktâng, không má gùn dù nyí kô é lé, myang ri; haù nhik gi, ngozo kóng zo su nhik nghut akò.

¹⁷Haù mù, Yesuq gi, haù nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng rã nghut lhê." ga tai ri.

¹⁸Haù hkùn, yhangnhik gi, radá dâm, gùn pé lé tô pyâm to luí, Yhang htâng cháng bekò nghut ri.

¹⁹Yesuq gi, radun zo dum sô e ló é hkùn, Zebedi é yhangzo, Yakuq eq yhanggu Yohan nhiktâng, lhai hkaù má gùn hpo nyi kô é lé, myang ri.

²⁰Haù hkùn, Yhang gi, radá dâm, yhangnhik tâng lé wut kat jáng, yhangnhik tâng gi, yhangnhik é yhângwa Zebedi eq langchyâng pé lé, lhai hkaù má nyhi pyâm to kôluí, Yhang htâng cháng bekò nghut ri.

Nat Lé, Yesuq Hkat Htoq Pyâm É Hkyô
Luk 4:31-37

²¹Yhangmoq gi, Kaperna-um wà má e akò; Bánno buinyi nyí jé jáng, Yesuq gi, tarajong má wang ê mù, mhoqshit hi ló bê nghut ri.

²²Shiwa byu pé kúm gi, Yhang mhoqshit é hkyô lé mauhong bum akò; hkâsu mù gâ le, Yhang gi, tarã sarã pé eq a pung é za, ahkáng ayá wó sù rayuq su, yhangmoq lé mhoqshit é yanmai nghut ri.

²³Haù u lé, agè ashop é nat wang júng é byù rayuq tarajong má bo lom nyi luí, wut garũ kat é gi,

²⁴"Nazaret wà byù Yesuq ê, ngamoq gi, Nàng eq haì sêng lhê lhu? Ngamoq lé lhoq hten rã matú, Nàng jé lé é nghut lhê lhu? Nàng gi, Garai Gasâng é Chyoiyúng Sù nghut é lé, ngò sê lhê." gâ ri.

²⁵Haù hkùn, Yesuq gi, "Hkâjop, yhâng chyáng mai htoq ló aq." ga yhang lé tân kat ri.

²⁶Haù hkùn, agè ashop é nat haù gi, byù haù yuq lé wum kat langhtân nhâng luí, htê mó èq garu uchyang htoq ló byuq bê nghut ri.

²⁷Shiwa byù banshoq bang gi, gyai yhang maù byuq kômù, rayuq eq rayuq, "Shí yuq é dang gi, hkasú é dang wá nghut lhê lhu? Ahko ahkáng bo é đông mhoqshit é hkyô asik nghut ri-nhung! Yhang gi, agè ashop é nat pé lé hkunmó hkyó jáng, haù bang lhang gyo byí akò nghut ri." ga luí, tai lhum bum akò nghut ri.

²⁸Yesuq eq sêng é ludang gi, Galile mau jàm shoq, yang é đông byo myín ló bê nghut ri.

Byù Myo Myo Lé, Yesuq Lhoq Gê Byí É Hkyô
Mht 8:14-17; Luk 4:38-41

²⁹Yhangmoq gi, tarajong mai htoq luí, haù hkùn jáng, Yakuq eq Yohan nhik le mù, Simun eq Andre nhiktâng é yhum má wang e ló bekò nghut ri.

³⁰Simùn é yhâng-aumó gi, gyai yhang nò leq tô é nghut mù luí, yhangmoq gi, Yesuq lé haù yuq no é hkyô lhom tai kyô akò nghut ri.

³¹ Haú mù luí, Yesuq gi, yhâng chyáng huí ê mù, yhâng é loq má zui luí tu tsung ri; haú hkûn jáng, nò ge byuq luí, yhang gi, yhangmoq lé gaí tso gaí huq bê nghut ri.

³² Haú nyí buiwang é htâng má, byu pé gi, no é bang eq nat gang wang júng nyí é bang banshoq lé, Yesuq chyáng shuí lé lo bum akò nghut ri.

³³ Rawa bang, hkúmdong nàm má lé zup zing tô akò.

³⁴ Haú mù, Yesuq gi, awáng nòhpyo ajung jung huí é bang myo myo lé lhoq gê byí ri; nat gang myo myo lé le, hkat htoq pyám ri; nghut kôlháng, Yhang ó nghut é lé nat gang haú bang sé kô é yanmai, nat gang haú bang lé dang a tái nhâng nghut ri.

³⁵ Yesuq gi, htang napkyó mau lháng a bó shimá, toq mù, gaú é jowò ralthum má htoq ê luí, kyú é dúng ri.

³⁶ Simun eq yhâng é luzúm wuí kúm gi, Yhang lé châng hô kômù,

³⁷ Yhang lé myang hô kôjáng, "Yuq hkangmó gi, Nang lé châng hkat ho nyi akò." ga luí, tái kyô akò nghut ri.

³⁸ Haú hkûn, Yesuq gi, yhangmoq lé, "Awui ayám mã é wà pé má le, ngò, mungdang wó hkô rá matú é sháng, hau é matú ngò lé é ru nghut lhê." ga tái ri.

³⁹ Haú mù luí, Yhang gi, Galile mau ramau gón, tarajong pé má mungdang hkat hko wún é htoq agó, nat gâng pé lé le hkat htoq pyám byí wún ri.

Manggâm Dap Sû Lé, Yesuq Lhoq Gê Byí É Hkyô
Mht 8:1-4; Luk 5:12-16

⁴⁰ Manggâm dap é byù rayuq gi, Yesuq chyáng lé mù, hkyihput htuq luí, "Nàng dóng é nghut le gi, ngò lé Nàng wó lhoq sân-yúng byi rá nghut lhê." ga dúng wut ri.

⁴¹ Haú hkûn, Yesuq gi, yhang lé wú shogyo luí, loq lhâm kat mù, haú yuq lé é záng luí, "Ngò dóng lhê, sân-yúng aq hkoi." ga tái ri.

⁴² Haú hkûn jáng, manggâm ana byuq byuq luí, yhang gi, gè bê nghut ri.

⁴³⁻⁴⁴ Yesuq gi, "Nàng, shí hkyô ó lé le hkâtaí kyo. Nghut kôlháng, náng é gungdu lé, hkyangjong hpò chyáng ló tân shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé gyai yhang sidiq byi mù, radá dâm nhang kat bê nghut ri.

⁴⁵ Nghut kôlháng, haú yuq gi, htoq ló mù, haú hkyô lé je tái pyo myhîn ló bê nghut ri. Hau é yanmai, Yesuq gi, wà hkaú má de de a ge wang ló lo mù, shinggan mã é chamchyuiyui dut é jowò má za nyi nyi ri. Nghut kôlháng, byu pé gi, jowò hkangmó mai Yhâng chyáng ru zing lé nyi bum ashí kó nghut ri.

2

Gùngjum Shí Sû Lé, Yesuq Lhoq Gê Byí É Hkyô
Mht 9:1-8; Luk 5:17-26

¹ Buinyí hkâ-myháng a myáng má, Yesuq gi, Kaperna-um wà má dum wang lò jáng, Yhang yhùm dum taú jé lô bê gâ é hkyô lé, byu pé wó gyô bum akò nghut ri.

² Haú mù, byù myo myo zing lé lô kôluí, yhúmhkaú má jowò a joq lô é htoq agó, hkumtot má lháng a joq lo nghut ri; Yesuq gi, yhangmoq lé mungdang hko kyô nyi ri.

³ Haú hkûn, byù myi yuq gi, gùngjum shî sù rayuq lé chôm dang waq luí, Yhâng chyáng lé lo akô.

⁴ Yhangmoq gi, byù lûm myô chyîn chyap to mù, byù haú yuq lé Yesuq chyáng a wó shuí jé é kô é yanmai, Yesuq é u htoq mâ é yhumhkûng lé dong htông yù luí, gùngjum shî sù lé taphkang eq roq hkyô kat akô nghut ri.

⁵ Yesuq gi, yhangmoq é lumjing myit lé byu-wyàng jáng, gùngjum shî sù lé, "Ngá zo é, náng é yubak mara lé hkyut pyám byi bê." ga tai ri.

⁶ Haú hkûn, tarâ sará pé ra-am gi, haú má zung to kôluí, yhangmoq é i-myyit unghkaú má,

⁷ "Byù shí yuq gi, haí mù luí haú su gâ lhê laq? Yhang gi, Garai Gasang lé rhoi dang tai nyi ri; Garai Gasang mai lai luí, ó yuq wá mara wó hkyut byi rá lhú?" ga luí, myit són wuí nyi bum akô nghut ri.

⁸ Yesuq gi, yhangmoq é unghkaú má myit wú nyi kô é hkyô lé, radá dâm Yhang é myit mai sé mù, "Nungmoq é i-myyit hkaú má, haí mù haú su nghú myit són wuí nyi bum akô lhú?"

⁹ Haú gùngjum shî sù lé, 'Náng é yubak mara lé hkyut pyám byi bê.' nghú tai é dang eq, 'Toq aq, náng é taphkang lé yù mù, hkyô so aq.' nghú tai rá má, hká hkun je tai lui lhê lhú?

¹⁰ Nghut kôlhang, haú Byu Yhangzo* gi, mingkan htoq má, mara hkyut byi rá ahkáng wó Sù nghut é lé, nungmoq lé sé nhâng nau lhê." ga, yhangmoq lé tai kat ri.

¹¹ Hau htâng, Yhang gi, haú gùngjum shî sù lé, "Ngò, nang lé tai bá, toq aq, náng é taphkang lé yu chûng luí, yhûm taú lô aq hkoí." ga tai ri.

¹² Haú yuq gi, toq mù, yhâng é taphkang lé yu chûng luí, yhangmoq banshoq bang wú tsuq tô é myoq hí mai sô htoq ló byuq bê nghut ri. Hau é yanmai, yuq hkangmó gi, mauhong bùm kômù, "Isù é hkyô gi, hkâ-nhám lháng a myàng wú shí." ga, Garai Gasang lé hkya-on kungton bum akô nghut ri.

Lewiq (Mahte) Lé Wut Yu É Hkyô

Mht 9:9-13; Luk 5:27-32

¹³ Yesuq gi, nhông yàm má radám dum htoq e ri. Haú hkûn, byù moq mó gi, Yhâng chyáng jé lé lo bùm kômù, Yhang gi, haú bang lé lhom mhoqshit nyi ri.

¹⁴ Yhang gi, sô yông ló nyi é hkûn, kang guq zúm má zung tô é, Alhpe yhangzo Lewiq lé myang kat luí, "Ngá htâng cháng aq." ga tai ri. Haú hkûn, Lewiq gi, toq luí, Yhang htâng cháng bê nghut ri.

¹⁵ Yesuq gi, Lewiq é yhûm má myinzang é zô nyi é hkûn, kang guq bang myo myo eq yubak dap bang le, Yhang eq Yhâng é chángzô pé eq rahá zo shuq bum akô. Hkâsu mù gâ le, Yhang htâng châng é bang gi, ajùm ayò nghut é yanmai nghut ri.

¹⁶ Tarâ sará nghut é Hparishe pé ra-am gi, yubak dap bang eq kang guq zo bang le mù rahá, Yesuq zang zô nyi é lé myàng kôjáng, Yhâng é chángzô pé lé, "Yhang gi, haí mù luí, kang guq bang eq yubak dap bang eq rahá zo shuq nyi lhê lhú?" ga myi bum akô nghut ri.

¹⁷ Haú su ga myi kô é lé Yesuq wó gyo jáng, Yhang gi, yhangmoq lé, "Wángzán bang gi, chi sará a ra kó, nõhpyo hui bang za sheq ru rá lhê. Haú eq rajung za, Ngò gi, ðingmán bang lé wut yù rá matú jé lé é a nghut, yubak dap bang lé ji yù rá matú sheq jé lé é ru nghut lhê." ga tai kat ri.

* **2:10** Byu Yhangzo gâ é gi, Yesuq Yhânggùng yhang lé le tai é nghut lhê, Mesaia lé le tai é nghut lhê.

*Zoshuq Gám É Eq Sêng É Hkyô**Mht 9:14-17; Luk 5:33-39*

¹⁸Yohan é chángzô pé eq Hparishe pé gi, zoshuq gám nyi akô nghut ri. Haú mù, ra-am gi, Yesuq chyáng jé lé kômù, "Wui-myhup Sará Yohan é chángzô pé eq Hparishe pé é chángzô pé gi, zoshuq gám akô; nghut kôlhang, náng é chángzô pé gi, haí mù a gám kô é lúhú?" ga luí, myí akô nghut ri.

¹⁹Haú hkûn, Yesuq tú taí é gi, "Bíng pé gi, lusik eq rahá nghut nyi tô ashí hkûn, zoshuq hkâsu wó gám rá lúhú? Yhangmoq gi, lusik eq rahá nghut nyi é u lé, zoshuq gám kó rá a nghut.

²⁰Nghut kôlhang, lusik lé yhangmoq chyáng mai shuí yu pyâm é hkyíng jé rá nghut lhê; haú buinyi pé má kúm gi, yhangmoq, zoshuq gám kó rá nghut lhê.

²¹Ó yuq le, mebu xau má pán sik èq a lhaq hpo wú kó; haú su kut é nghut jáng, pán sik gi, kun byuq mù, mebu xau le je lhoq cheq pyám rá nghut lhê.

²²Haú eq rajung za, tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng luí, tsibiyiq wing eq shokuq htûng htên byuq rá nghut lhê. Haú mù, tsibiyiq wing asik gi, shokuq htûng sik má za ge kat é nghut lhê.

*Bánno Buinyi É Yhumsíng**Mht 12:1-14; Luk 6:1-11*

²³Bánno buinyi ra-nyí má, Yesuq gi, Yhâng é chángzô pé eq rahá yò hkaú mai sô lai ló é hkûn, Yhâng é chángzô pé gi, kyôshi ratsuí langshap yu akô nghut ri.

²⁴Haú mù, Hparishe pé gi, Yesuq lé, "Wú aq, Bánno buinyi má a ge kut jung lé, haí mù, náng é chángzô pé kut nyi akô lúhú?" ga taí akô.

²⁵Haú hkûn, Yesuq gi, yhangmoq lé, "Dawiq lháng gi, yhâng htâng châng é bang eq rahá zòmut hui luí, zoshuq rá tô é hkûn, hkâsu kut é hkyô lé, nungmoq hkâ-nhâm le a nghap wú kó lúhú?

²⁶Abiahta, hkyangjong mó kut nyi é u lé, Dawiq gi, Garai Gasâng é yhúmhaú má wang é mù, hkyangjông pé mai lai luí, ó le a ge zô é, kyâng tô é muk lé yù zo mù, yhang htâng châng é bang lé le ratsuí tsuí byi tso é nghut lhê." ga tú taí ri.

²⁷Hau htâng, Yhang gi, yhangmoq lé, "Bánno buinyi gi, byù é matú kut tô é nghut lhê; byù gi, Bánno buinyi é matú a nghut.

²⁸Haú mù, haú Byu Yhangzo gi, haú Bánno buinyi é Yhumsíng lháng nghut lhê." ga xoq taí ri.

3

¹Yesuq gi, tarajong má radàm dum wang e le, loq raloq ajum shi byuq é byù rayuq nyi to láng ri.

²Haú hkûn, haú má nyi tô é bang ra-am gi, Bánno buinyi má, Yesuq mai haú yuq lé lhoq gè byi rá lúhú ga, mara hùn rá matú gyám wú nyi akô nghut ri.

³Yesuq gi, haú loq jum shí sù lé, "Banshoq bâng é hí má, toq yap shit aq." ga taí kat ri.

⁴Hau htâng, Yhang gi, haú má nyi tô é bang lé, "Bánno buinyi má, ge é muzó kut rá, a ge é muzó kut rá, byù asak hkyí rá eq byù sat rá hkyô pé má, hká lhum kut le sheq tará wang lhê lúhú?" ga myí kat jáng, yhangmoq kúm gi, jit le a ga kó nghut ri.

⁵ Haù mù, Yhang gi, nhik-yô nau é myit èq haù bang lé lhîng wú mù, yhangmoq myit htan é hkyô lé, wú yón luí, haù loq jum shí sù lé, "Náng é loq nyhang kat aq." ga taí kat jáng, haù yuq gi, loq nyhang kat luí, yhâng é loq gi, shoq za ge byuq bê nghut ri.

⁶ Hau htâng má, Hparishe pé gi, htoq ló kômù, Yesuq lé hkâsu kut wó sat pyám rà hkyô lé, Herut é byu pé eq chôm hpyê lhùm bum akô nghut ri.

Byù Ajùm Ayò, Yesuq Htâng Cháng Kô É Hkyô

⁷ Yesuq gi, Yhâng é chángzô pé eq rahá, nhông shut dum e ló le, Galile mau mâ é byù ajùm ayò gi, Yhang htâng châng e ló bum akô nghut ri.

⁸ Hau htoq agó, Yuda mau mâ é bang, Yerusalem wà mó mâ é bang, Idumia mau mâ é bang, Yodan làng hé hpoq mâ é bang, Turuq myuq eq Sidun myuq awui ayàm jé shoq mã é bang, ajùm ayò gi, Yhang kut nyi é hkyô banshoq lé wó gyo kôjáng, Yhâng chyáng jé lé bum akô nghut ri.

⁹⁻¹⁰ Yesuq gi, byù myo myo lé lhoq gè byí é yanmai, nòhpyo hui to bang gi, Yhang lé wó záng shoq ga, chyín chyap wang ló bum akô. Byù lùm myo luí, Yesuq gi, Yhang lé a nhê pyet pyám sháng gaq ga, Yhâng é chángzô pé lé lhai ralhum hen to nhang ri.

¹¹ Agè ashop é nat pé gi, Yhang lé myàng hkangmó, Yhâng é hí má lêng ngop to luí, "Nàng gi, Garai Gasâng é Yhangzo nghut ri." ga luí, taí garú akô.

¹² Nghut kôlhang, Yesuq gi, Yhang ó yuq nghut é hkyô lé a taí byông htoq rà matú, tân hkúm kat ri.

Lagyo Kut Râ Byù Raxe Í Yuq Hkyin Yu É Hkyô *Mht 10:1-4; Luk 6:12-16*

¹³ Yesuq gi, bùm shut doq ló mù, Yhang ô nau é bang lé ji kat luí, haù bang gi, Yhâng chyáng jé lé lo bum akô nghut ri.

¹⁴ Haù hkùn, Yesuq gi, byù raxe í yuq lé hkyin yù luí, lagyo ayá byí ri; haù bang gi, Yhang eq rahá nyi rà matú le, mungdang hkô rà matú Yhang nhang htoq kat rà eq,

¹⁵ nat gâng pé lé hkat htoq rà ahko ahkáng wó rà matú le, nghut akô nghut ri.

¹⁶ Haù raxe í yuq gi, Simun (Yesuq mai Petruq ga myìng myhíng byi sù);

¹⁷ Zebedi é yhangzô nhiktâng Yakuq eq yhanggu Yohan (Yháng nhiktâng lé Yesuq mai Buanerga ga myìng myhíng byí ri; hau é lichyúm gi, maugum zô nhik gâ é nghut lhê);

¹⁸ Andre, Hphilip, Barhtolume, Mahte, Htomaq, Alhpe é yhangzo Yakuq, Htade, Zelutuq* dut é Simun eq,

¹⁹ Yhang lé ap pyám rà sù, Yudaq Iskarut pé nghut akô.

Yesuq Eq Bezebulaq

Mht 12:22-32; Luk 11:14-23; 12:10

²⁰ Hau htâng, Yesuq gi, yhùm má wang ló le, byù ajùm ayò dum zîng lé lô kômù, Yhang eq Yhang é chángzô pé gi, zang zo hkyíng lháng a wó kó nghut ri.

²¹ Yhâng é yhumbyù wui gi, haù hkyô lé wó gyo kôjáng, "Yhang, myit a gying lo nghut ri." ga luí, Yhang lé hung shuí yù rà matú, e akô nghut ri.

* **3:18** Zelutuq gâ é lichyúm gi, yhumşing zui sai é hkyô má gyai yhang myit lòm shirong é sù lé gâ lhê. Haù u lé, Israelaq byu pé gi, mingdán luthkyô wó rà matú shikut nyi é hpúng bang lé, Zelutuq gâ lhê.

²² Yerusalem wà mó mai gyó lé lo é tarâ sará pé gi, "Shí yuq gi, Bezebulaq gâ é nat gâng pê é zau lúng sù nghut ri-nhung! Yhang gi, nat zaú é wum-o a-tsam èq za, nat gâng pé lé hkat htoq pyâm é nghut ri." ga taí bum akô nghut ri.

²³ Haù mù luí, Yesuq, yhangmoq lé wut yù mù, dangtú dong taí é gi, "Tsadán gi, Tsadán lé hkâsu kut wó hkat htoq râ l hú?"

²⁴ Mingdán ralhùm gi, ahkaù má byoq gâng lhùm nyi kô é nghut jáng, mingdán haù wó gĩng nyi râ a nghut.

²⁵ Yhumhtu ralhùm má le, ikun byù yhangchang byoq gâng lhùm nyi é nghut le gi, yhumhtu haù wó gĩng nyi râ a nghut.

²⁶ Haù eq rajung za, Tsadán le, yhânggùng yhang lhoq hpyoq luí, gam hkoq nyi é nghut le gi, yhang wó nyi nyi râ a nghut, htùm byuq râ za nghut lhê.

²⁷ Ó yuq nghut kôle, wum-o bò sù lé hí tui zing pyâm é a nghut le gi, yhâng é yhùm má lú wàng mù, yhâng é sutzè lé wó lú yú râ a nghut: Haù yuq lé hí tui zing pyám jáng sheq, yhâng é sutzè lé wó lú yú râ nghut lhê.

²⁸ Ngò, nungmoq lé teng za taí kôlé, byu pé kut shut é mara banshoq eq rhoi dang taí pyâm é pé lé gi, mara wó hkyut pyám byi lhê.

²⁹ Nghut kôlhang, haù Chyoiyúng Woi-nyí lé rhoi dang taí pyâm é sù gi, hkâ-nhám le, mara hkyut byí é wó hui râ a nghut; haù yuq gi, ahtum abyuq yubak wó sù nghut nyi ri." gâ ri.

³⁰ Yhang haù su ga taí é gi, yhangmoq mai, "Yhang gi, agè ashop é nat wó sù nghut ri." ga kô é yanmai nghut ri.

Yesuq É Yhângnu Eq Yhanggu Pé

Mht 12:46-50; Luk 8:19-21

³¹ Hau htâng, Yesuq é yhângnu eq yhanggu pé gi, jé lé mù, yhùm hkun má yap to kôluí, Yesuq htoq lô râ matú, byù rayuq lé wang taí nhang akô nghut ri.

³² Byù ajùm ayò gi, Yhâng é lhĩnghkyuq má zung tô akô; haù bang gi, Yhang lé, "Wú aq, náng nu eq nunggu pé gi, nang lé hui naù luí, shinggan má láng bum akô." ga taí kyô akô nghut ri.

³³ Haù hkùn, Yhang gi, "Ó pé gi, Ngá nu eq Ngá gu pé nghut akô l hú?" ga myi kat ri.

³⁴ Hau htâng, Yhang gi, Yhâng é lhĩnghkyuq má zung hkyuq tô é bang lé wú mù, taí é gi, "Shí bang gi, Ngá nu eq Ngá é gumang wui nghut bê!"

³⁵ Garai Gasang ô nau é hkyô châng é sù ó yuq nghut kôle, Ngá gu, Ngá mang, Ngá nhá, Ngá nu chyat nghut bê." gâ ri.

4

Kyôshi Sân É Dangtú

Mht 13:1-23; Luk 8:4-15

¹ Yesuq gi, nhông yàm má radàm dum mhoqshit hi ló bê nghut ri. Haù hkùn, Yhâng é lhĩnghkyuq má byù moq mó lùm yán zĩng lé lo bùm kô é yanmai, Yhang gi, nhông hkaù mã é lhaí mã wang zung tô ri; haù u lé, byù moq mó gi, nhông yàm gin-gau htoq má nyi ming bum akô nghut ri.

² Yhang gi, haù bang lé, dangtú pé dõng myo myo mhoqshit byí nyi ri; Yhang mhoqshit é má,

³ "Gyo wú keq! Kyô hkyó sù rayuq gi, kyôshi san râ gâ htoq e ló ri.

4 Yhang, kyôshi sân kat é hkûn, ra-am gi, hkyô má gyó ang mù, ngoq pê èq lé hte zô pyám ri.

5 Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq lô kôle,

6 amyit a wó chin hing é nghut mù, bui htoq lô jáng, lhap kyuq pyám bê nghut ri.

7 Dum ra-am gi, zugyóm hkaû má gyó ang lui, zubyap haú pé kô lò mù, wup pyám é yanmai, ashi a wó zui nghut ri.

8 Nghut kôlhang, ra-am gi, myihpún bo é jang má gyó âng é yanmai, yuq kô lò mù, ashi sum xê tú, hkyuq xê tú, rashô tú lhang, zui myô lo é nghut ri." gâ ri.

9 Hau htâng, Yesuq dum tai é gi, "Gyo yù râ nohkyap dap sù gi, gyô yù sháng gaq." gâ ri.

10 Yhang baú za nghut nyi é hkûn, haú lagyo raxe í yuq eq Yhang nàm má nyi tô é bang gi, dangtú haú eq sêng é hkyô lé, lé myí akô.

11 Haú hkûn, Yhang, yangmoq lé tai kyô é gi, "Garai Gasâng é mingdán eq sêng é sê gyo wui é hkyô lé sé gyo râ ahko ahkáng, nungmoq lé byí to lugù nghut bê. Nghut kôlhang, góbâng é matú gi, jung hkangmó lé dangtú dng chyat tai é nghut lhê.

12 Haú mù lui,
"Yhangmoq gi, myang nyi kôlhang, a wú sé kó, gyô nyi kôlhang, a sê gyo kó; sé wú sê gyo kô é ru nghut le gi, lhing taú lò mù, mara hkyut pyám byí é hui kó râ nghut lhê!"[☆]
gâ ri." ga tô ri.

13 Hau htâng, Yhang, yangmoq lé dum xoq tai é gi, "Nungmoq, dangtú shí lé a sê gyo kô é nghut le gi, gotú dangtú pé lé hkâsu kut ung sê gyo kó râ lúh?

14 Yò mù zui sù san kat é kyôshi gi, mungdang nghut lhê.

15 Byù ra-am gi, hkyô má gyó âng é kyôshi eq wui akô; yangmoq gi, mungdang lé wó gyô yu é hkûn yang, Tsadán gi, lé mù, yangmoq chyáng mà é mungdang lé lé yù pyám byí ri.

16 Ra-am gi, luqgok yò pé má gyó âng é kyôshi eq wui akô; yangmoq gi, mungdang lé wó gyô jáng, radá dâm gabú myit eq hap yù akô.

17 Nghut kôlhang, yangmoq gi, amyit a wó chin é yanmai, razup zo za yuq kômù, mungdang é yanmai, wuihke é eq zing-rí é pé hui kôjáng, hân hân htak lô byuq kó râ nghut lhê.

18 Dum ra-am nghut jáng, zugyóm hkaû má gyó âng é kyôshi eq wui akô; yangmoq gi, mungdang lé wó gyô yù kôlhang,

19 shí ipyat lhê é myit wui myit hke hkyô, hkyô shuí ngoq jung ngùn hing zèhkoq eq gotú zè pé lé ô nau é hkyô pé, yangmoq chyáng wang lò jáng, haú mungdang lé hup pyám é yanmai, ashi a wó zui dut kó râ nghut lhê.

20 Ra-am kúm gi, myihpún bo é jang má gyó âng é kyôshi eq wui akô; yangmoq gi, haú mungdang lé gyô yù mù, lhom yù lui, sân kat é htoq sum xê tú, hkyuq xê tú, rashô tú lhang myo shoq ashi zui lò kó râ nghut lhê." gâ ri.

Myibung Htûn É Hkyô
Luk 8:16-18

21 Yesuq, yhangmoq lé xoq taí é gi, "Nungmoq gi, myibung lé yù mù, tsungjang má a tsung e za, mùng èq nghop tô é, a nghut jáng, yhupchong ó má tsung tô é, ó yuq wá kut wú akô lúhú?

22 Hkâsu mù gâ le, haq tô é zè haí jung le htoq ze lò râ eq, zaú tô é pé haí jung le byông htoq lô râ nghut lhê.

23 Gyô yù rà nohkyap dap sù ó yuq nghut kôle, gyô yù sháng gaq." gâ ri.

24 Hau htoq agó, Yhang dum taí é gi, "Nungmoq gi, wó gyô yu é hkyô lé rago myit wú keq; nungmoq lik byi é bung èq, nungmoq lé dum lik byi rà nghut lhê; hau htoq lháng myo shoq wó kó rà nghut lhê.

25 Hkâsu mù gâ le, wó to sù lé gi, jat byi shirâ, a wó su chyáng mai kúm gi, yhang wó tô é lé lháng yu pyâm byi shirâ nghut lhê." gâ ri.

Kyôshi Yuq Kô Lo É Dangtú

26 Hau htâng, Yhang dum xoq taí é gi, "Garai Gasâng é mingdán gi, byù rayuq mai, myigùng má sân kat é kyôshi eq wú ri.

27 Byù haú yuq gi, myín lé yhup tô é nghut nghut, nyí lé toq lo é nghut nghut, kyôshi gi, zú htoq lô mù, yuq kô lo nyi ri; nghut kôlháng, yhang gi, hkâsu kut yuq lo nyi é hkyô lé a sé nghut ri.

28 Myigùng gi, yhang baú yhang, kyôshi lé, sâng-hi má abum bum nhâng, hau htâng má a-nhâm htoq nhâng mù luí, ashí zui shoq kut é nghut lhê.

29 Kyôshi myhíng jáng, kyô shu yoq jé bê nghut é yanmai, yhang gi, zaiyik èq yâm yù rà nghut lhê." gâ ri.

Angshi Cham Lé Dangtú Yu É Hkyô

Mht 13:31-32; Luk 13:18-19

30 Yesuq dum xoq taí é gi, "Garai Gasâng é mingdán lé, hai èq lhoq whuí wú rà lúhú? Haí jung dangtú yù mù, shit wú rà lúhú?

31 Garai Gasâng é mingdán gi, angshi cham eq wú ri. Angshi cham haú gi, myigùng má hô é kyômyui jí pé má je tiq é nghut lhê.

32 Nghut kôlháng, ho mù, yuq kô lô jáng, xun hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq kô lò luí, hau é buishúm hkaú má, maulat nghoq zô pé lé wó zung nô nyi é nghut lhê." gâ ri.

33 Haú sù é dangtú myo myo dông mai, Yesuq gi, yhangmoq wó sê gyô é myhó, mungdang hko kyô nyi ri.

34 Yhang gi, yhangmoq lé, dangtú a bo é haí lháng a taí wú nghut ri; nghut kôlháng, Yhang eq chángzô pé baú nghut nyi é hkûn kúm gi, jung hkanmó é lichyúm lé taí sân kyô ri.

Laidun Mó Lé, Yesuq Lhoq Zim Pyâm É Hkyô

Mht 8:23-27; Luk 8:22-25

35 Haú nyí, myinhâng lé, Yesuq gi, Yhâng é chángzô pé lé, "Nga-nhúng nhông hé hpoq shut dap e ló sháng." ga taí ri.

36 Haú hkûn, chángzô pé gi, byù moq mó lé nyhi pyâm to luí, Yhang zung tô é lhai mai yhang, Yhang lé shuí gú dap ló bekô; gotú lhai pé le, yhangmoq eq rahá bo gú dap ló akô nghut ri.

37 Haú u lé, laidun mó jé lò mù, wuìlhêng hta toq lò luí, lhai má lo bat hâng é yanmai, wuì byíng lò bê nghut ri.

38 Haú hkûn, Yesuq gi, lhai htâng má uhkuq hkuq mù yhup myhí tô ri; hau chángzô pé gi, Yhang lé nhaú pun luí "Sarâ è, nga-nhúng myup shi ló rà dut é lé, nàng a chíq byi lúhú?" ga taí akô nghut ri.

39 Yesuq gi, toq mù, laidun lé tan luí, wuilhêng lé, "Zim aq." ga tai kat jáng, hau laidun num ló byuq luí, banshoq zím byuq bê nghut ri.

40 Hau htâng, Yhang gi, Yhâng é chángzô pé lé, "Hai mù, hau-í gyuq bum akò lú? Nungmoq gi, lumjǐng myit a bò shì kó lú?" ga tai ri.

41 Yhangmoq gi, gyai yhang gyuq dan bùm kômù, "Shí yuq gi, hkasú é byù nghut lhê là? Lai eq wuilhêng pé lháng gi, Yhâng é dang lé gyo byí ri-nhung!" ga luí, rayuq eq rayuq myí lhum bum akò nghut ri.

5

Nat Gang Hkat Htoq Pyâm É Hkyô

Mht 8:28-34; Luk 8:26-39

1 Yhangmoq gi, nhông hé hpoq mâ é Gerase byu pé é mau má jé dap e ló akò.

2 Yesuq lhai mai htoq ló é hkùn, agè ashop é nat wang júng é byù rayuq gi, lupdùng mai htoq lé lô mù, Yhang lé lhom huí ri.

3 Hau yuq gi, lupdùng má za nyi é sù nghut ri; yhang lé, ó yuq èq le, shamtoq-tuì èq lháng a wó tuì zing wú kó nghut ri.

4 Hkásu mù gà le, adàm dàm, yhâng é loq eq hkyí má shamtoq-tuì èq tuì tô wú kôhang, yhang gi, loq mâ é shamtoq-tuì pé lé lǎng hpyit pyám pyám kut mù, hkyí má é shamtoq kyum lé lhoq hkyop pyám pyám kut ri. Yhang lé, ó yuq èq le a wó hkuq yù kó nghut ri.

5 Yhang gi, nyí myín aga lupdùng eq bùm pé má puk garu uchyang, yhumsing gùng lé luqgok èq dùn cheq wún ri.

6 Yhang gi, Yesuq lé, we mai myang kat jáng, din e ló mù, Yhâng é hí má hkyihput htug nop luí,

7 htê mó èq, "Myhang htâng é Garaí Yhangzo Yesuq ê! Nàng gi, ngò eq hai sêng lhê lú? Nàng gi, ngo lé a zing-ri râ matú, Garaí Gasâng hí má danggidiq byi laq." ga tai garú ri.

8 Hai mù gà le, Yesuq gi, yhang lé, "Agè ashop é nat nàng ê, byù shí yuq chyáng mai htoq ló aq." ga tai kat é yanmai nghut ri.

9 Hau htâng, Yesuq gi, "Náng myíng hai gà lhê?" ga, yhang lé myi jáng, yhang gi, "Ngamoq gi, myo myo nghut é yanmai, Legio gà lhê." ga tũ tai ri.

10 Hau htâng, yhang gi, hau jowò mai yhangmoq lé a kôn pyám râ matú, Yesuq lé dum dung dung kut nyi ri.

11 Hau u lé, waq rajùm mó gi, bùm yám má dù but zô nyi bum akò nghut ri.

12 Hau mù luí, nat gǎng pé gi, "Ngamoq lé, waq pé chyáng nhang kat luí, yhangmoq chyáng wàng nhâng laq." ga luí, Yesuq lé dung akò.

13 Hau hkùn, Yesuq gi, yhangmoq lé ahkáng byí kat jáng, hau agè ashop é nat pé gi, hau yuq chyáng mai htoq ló kôluí, waq pé chyáng wang ló byuq bekò nghut ri. Hau mù, hau í hkyíng kô bo é waq hpúng gi, gampyoq mai nhông hkaú shut rut din yán wang ló kôluí, myup shì byuq bekò nghut ri.

14 Waq zúng bang gi, hpang din wang ló kômù, myuq hkaú má é bang eq awui ayám mâ é bang lé, hau hkyô ló shit kyo kô é yanmai, byù hau bang gi, dut lai lò bê hkyô lé, è htoq wú akò nghut ri.

15 Yhangmoq gi, Yesuq chyáng jé lé kô é hkùn, nat gang myo myo wang júng wú é sù, mebu wut luí, byù gè rayuq su zung to lǎng é lé myàng kômù, gyuq dan bùm bekò nghut ri.

16 Hau hkyô lé myang é bang gi, nat gǎng pé wang júng sù eq waq pé chyáng hkásu dut é hkyô, góbang lé tai kyo akò nghut ri.

17 Hau htâng, byu pé gi, Yesuq lé yhangmoq é mau mai htoq lò byuq râ matú, chôm dúng tóngbán akò nghut ri.

18 Yesuq lhai hkaù má wang lò é u lé, haù nat gâng pé wang júng lai lò bê sù gi, Yesuq htâng cháng râ matú, Yesuq lé dung tóngbán ri.

19 Nghut kôhlang, Yesuq gi, yhang lé ahkáng a byi e za, "Nàng, yhùm shut sheq lò mù, haù Yhumsing, nang lé hkâ-í kut byi bê hkyô eq hkâsu kut shogyo nhikmyin yu é hkyô lé, náng é yhumbyù buinùm ji-myi wui lé lò taí kyo aq." ga taí kat ri.

20 Haù mù, byù haù yuq gi, lò luí, yhang lé Yesuq hkâ-í kut byi bê hkyô lé, Dekapoli* mau bang lé lò taí kyô ri. Haù hkûn, wó gyô é bang banshoq gi, mauhong bum akò nghut ri.

*Shi Byuq Bê Myiwe Zo Eq No É Myiwe Myhi Rayuq É Hkyô
Mht 9:18-26; Luk 8:40-56*

21 Yesuq gi, lhai ji mù, nhông he hpoq shut dum dap jé lò mù, Yhang, nhông yàm má nyi tô é u lé, byù ajùm ayò gi, Yhâng é lhinghkyuq má lé zing bum akò nghut ri;

22 haù hkûn, Ya-iruq gâ é, tarajong má up bang mâ é rayuq gi, haù má lé luí, Yesuq lé myang kat jáng, Yhâng é hkyí wang má paí gop to mù,

23 "Ngá zo byizo gi, kâng byit lò nyi ri; yhang ge lò mù asak dum dui shi sháng gaq, náng lé mù, yhâng é ahtoq má loq lé ke byi laq." ga, wum kat dúng tóngbán nyi ri.

24 Haù mù, Yesuq gi, haù yuq htâng châng e lò ri; byù ajùm ayò le, Yhâng é awui ayàm má châng chyín chyap wún bum akò.

25 Haù hkûn, raxe í zân suí yui nyi é myiwe myhí rayuq le haù hpúng má bo tô ri.

26 Yhang gi, chi sará myo myô pê chyáng yhang wó é ngunzè banshoq lhoq pán mù, nò hkâm luí yâ wú kôhlang, ge é hkyô a joq é htoq agó, je lháng wuihke lò ri.

27 Yhang gi, Yesuq é hkyô lé wó gyo jáng, byù hpùng mai Yesuq é nunghtáng má huí lé mù, Yhâng é bu má ê záng kat ri.

28 Hai mù luí gâ le, yhang gi, "Ngò, Yhang é bu má za lháng é wó záng é nghut le gi, ge byuq râ nghut lhê." ga wó myit é yanmai, haù su kut é nghut ri.

29 Haù hkûn jáng, yhâng chyáng suí yui é kân byuq luí, yhang gi, hpuzò nyi é mai wó lut bê hkyô lé, yhânggùng má sê gyô kat bê nghut ri.

30 Yesuq gi, Yhâng é gùng mai hpungwup a-tsam htoq lò é lé, radá dâm châng sê kat luí, byù moq mó shut lhing wú mù, "Ngá é bu má ó yuq záng bê lú?" ga myi kat ri.

31 Haù hkûn, Yhâng é chángzò pé gi, "Náng é lhinghkyuq má byù ajùm ayò chyín chyap nyi é lé, myang to luí nhing, 'Ngo lé, ó yuq záng bê lú?' nghù myi lhê lú?" ga tú taí kat akò.

32 Nghut kôhlang, Yesuq gi, Yhang lé lé záng sù lé myàng râ matú, ho lhing wú nyi ashí nghut ri.

33 Haù hkûn, myiwe myhí haù gi, yhâng chyáng hkâsu dut lai lò bê hkyô lé sê é yanmai, Yesuq é hí má lé mù, gyuq nán é eq Yhang é hkyí wang má ngóm gop to luí, yhâng chyáng dut lai lò bê hkyô banshoq lé taí kyô ri.

* 5:20 Dekapoli gâ é gi, Grik đông myuq raxê lé gâ lhê.

³⁴ Haù mù, Yesuq gi, myiwe myhí haù lé, "Byizo ê, náng é lumjínq myit gi, náng lé lhoq gê byi bê nghut ri; náng é nôhpyo ge byuq bê nghut ri; ngón za ló aq hko!" ga taí ri.

³⁵ Yesuq gi, dang ru taí nyi ashí hkún, tarajong má up sù Ya-iruy é yhúm mai byù ra-am jé lé mù, "Nang é byizo gi, shi byuq bê; haù mù luí, haù sará lé lhoq hkyik nyi lhê lú?" ga luí, lé taí kat akô.

³⁶ Yesuq gi, haù bang taí é dang lé gyô lhai pyám mù, "Hkâgyuq, za lumjínq aq." ga, haù tarajong má up sù lé taí kat ri.

³⁷ Hau htâng, Yhang gi, Petruq, Yakuq eq Yakuq é yhanggu Yohan pé mai lai luí, ó yuq lé le, Yhang htâng a cháng nhâng nghut ri.

³⁸ Yhangmoq, haù tarajong má up sù é yhúm má jé lé kô é hkún, Yesuq gi, byu pé garu garín ga yón ngau gabyông nyi bum é lé, myàng ri.

³⁹ Yhang gi, yhúmhaù shut wang ló mù, haù bang lé, "Haù mù, yón ngau gabyông nyi bum akô lú? Haù zoshâng gi, shi byuq é a nghut, yhup myhí tô é sheq ru nghut lhê." ga taí ri.

⁴⁰ Nghut kôlhâng, yhangmoq gi, Yhang lé wuizui kut pyám byi akô.

Yhang kúm gi, haù bang banshoq lé hkat htoq pyám mù, zoshâng é yhângnu yhângwa nhik eq Yhâng é chángzô pé lé za shui luí, zoshâng lé lheq tô é gok má wang e akô nghut ri.

⁴¹ Yesuq gi, myiwe zo hau é loq má zuí to mù, "Talihta ku-mi" (haù é lichyúm gi, "Myiwe zo ê, ngò, nang lé taí bá, toq aq." gâ é nghut lhê.) ga taí ri.

⁴² Myiwe zo haù gi, haù hkún jáng, toq luí, sô wún ri (yhang gi, asak raxe í zân bò bê sù nghut ri.). Yhangmoq gi, haù sù dut é hkyô lé gyai yhang maú byuq bùm bekô nghut ri.

⁴³ Yhang gi, haù hkyô ó lé le a sé nhâng râ matú, yhangmoq lé taí hkúm kat luí, myiwe zo haù lé, zô jung byi tso râ matú le, yhangmoq lé taí ri.

6

Yhumsing Wà Má Myoqdong A Wó É Hkyô

Mht 13:53-58; Luk 4:16-30

¹ Yesuq gi, haù jowò mai htoq e ló mù, Yhâng é yhum mau shut taù ló ri; Yhâng é chángzô pé le, Yhang eq rahá bo châng ló akô nghut ri.

² Bánno buinyi jé jáng, Yhang gi, tarajong má mhoqshit hi ló ri; wó gyô é bang myo myo gi, gyô maú byuq kôluí, "Byù shí yuq gi, haù pé lé hkámá mhoq yu é lhá? Yhang wó yu é hpaqchyl byéng-yá gi, hkasú é wá nghut mù luí, laklai kumlhá lé lháng kut lhê laq?"

³ Shí yuq gi, Mariq é yhangzo, laksíma hpó nghut lhê, a nghut lú? Yhang gi, Yakuq, Yose, Yudaq, Simun pé é yhangmang nghut lhê, a nghut lú? Yhâng nhammó pé le, nga-nhúng eq rahá nghut nyi lhê, a nghut kó lú?" ga luí, Yhang lé myit a ngón dut bùm bekô nghut ri.

⁴ Yesuq, yhangmoq lé taí é gi, "Myiqhtoi rayuq gi, yhumsing é yhum mau, yhâng é buinùm ji-myi wui eq yhumsing é yhúm má za, myoqdong a lhaq wó wú é nghut lhê." gâ ri.

⁵ Yhang gi, nô byù ra-am lé loq ke byi mù, lhoq gê byi é mai lai luí, gotú laklai kumlhá haù le, haù má a wó kut shit nghut ri.

⁶ Haù mù, Yesuq gi, yhangmoq lumjínq myit a bò kô é hkyô lé, maú nyi ri. Hau htâng, Yhang gi, Nazaret wà mai htoq ló mù, rawà htâng rawà má châng mhoqshit wún ri.

Lagyo Raxe Í Yuq Lé Nhang Htoq Kat É Hkyô
Mht 10:5-15; Luk 9:1-6

⁷ Yesuq gi, haú lagyo raxe í yuq lé wut yù mù, agè ashop é nat pé lé ùng rà a-tsam byi luí, í yuq yuq kut nhang htoq kat ri.

⁸ Yhang, yhangmoq lé châng pying kat é dang gi, "Hkyowui é matú má, dumbáng mai lai luí, zoshuq le, etap le, ngùn le, gotú haí le, hkâyü chùng kó;

⁹ hkyî-tsung kúm gi, tsúng chùng keq; nghut kôlhang, bu í dung hkâwut chùng kó.

¹⁰ Hká má nghut kôlhang, rayhùm yhùm má nungmoq wang bíng kô é nghut le gi, haú wâ mai dum htoq ló é buinyi jé shoq, haú yhùm má za nyi nyi keq.

¹¹ Jowò rawò wò mâ é bang, nungmoq lé a lhom hap yù, a lhom gyo byi kô é nghut jáng, nungmoq lé yhangmoq a lhom hap yu é saksé dut sháng gaq, nungmoq é hkyiwa má dap é hpuilhau lé ko hkyô pyâm to mù, haú jowò mai htoq ló keq." gâ ri.

¹² Haú mù, yhangmoq gi, htoq e ló luí, myit lhing rà é hkyô, byu pé lé hkô kyô akô.

¹³ Hau htoq agó, yhangmoq gi, nat gâng pé myo myo lé hkat htoq pyâm byi mù, no é bang myo myo lé le xù but byi luí, lhoq ge byi akô nghut ri.

Yohan, Ulhum Hpyit Huí é Hkyô
Mht 4:1-12; Luk 9:7-9

¹⁴ Yesuq é mying hù lo é yanmai, Herut hkohkâm gi, Yesuq é hkyô lé wó gyo bê nghut ri. Byù ra-am gi, "Shí yuq gi, haú shi byuq bê Wui-myhup Sará Yohan dum dui toq lo é nghut lhê abe, hau é yanmai, yhang gi, hpungwup a-tsam haú pé lé wó kut é nghut ri." ga luí, tai bum akô nghut ri.

¹⁵ Ra-am gi, "Yhang gi, Eliyaq nghut ri." ga tai akô nghut ri.

Dum, ra-am tai kô é gi, "Yhang gi, hí hpyang lhê é myiqhtoí pé su, myiqhtoí rayuq nghut ri." gâ ri.

¹⁶ Herut kúm gi, haú lé wó gyo jáng, "Ngò, ulhum hpyit pyâm byi é Yohan gi, shi é mai dum dui toq bu-nhung!" ga tai ri.

¹⁷ Herut gi, yhanggu Hpilip é yhangmyi Herudiaq lé hâng yu pyâm é hkyô é yanmai, Yohan lé chyup tuí yù nhâng mù, htóng hkyô pyâm nhang wú é sù nghut lhê.

¹⁸ Hkâsu mù gâ le, Yohan gi, Herut lé, "Nàng, nunggu é yhangmyi lé hâng yu é gi, tará a wang é nghut lhê." ga luí, tai byi nyi é yanmai nghut ri.

¹⁹ Haú mù, Herudiaq gi, Yohan lé gyai a jú dut byuq luí, sat pyâm naú kôlhang, a wó sat dut nyi ri.

²⁰ Haí mù gâ le, Herut gi, Yohan, dingmán chyoyúng é sù nghut é lé sé mù luí, yhang lé gyuq hkungga mù, yhang lé búng nyi é yanmai nghut ri. Yhang gi, Yohan é dang pé lé wó gyo jáng, gyô nhúng nhâng byuq kôlhang, yhang tai é dang pé lé ru gyô nau nyi ashí nghut ri.

²¹ Nghut kôlhang, Herut gi, yhâng é hkú ladu hkyúm buinyi má, byù mó pé, gyezau pé, Galile mau suwún wui pé lé, ji yù mù zoshuq poi mó kut é yanmai, haú nyi gi, Herudiaq é matú, buinyi gè dut bê nghut ri.

²² Herudiaq é yhangzo byizo gi, wang lé lô mù, gó shit é hkûn, Herut eq yhâng é bíng pé gi, myit ngón bum akô nghut ri.

Haú mù, hkohkâm gi, myiwe zo haú lé, "Nàng ô nau é haí nghut kôle, dung aq, ngò nàng lé byi rà nghut lhê." ga, dakam é danggidiq byi ri.

²³ Hau htoq agó, yhang gi, myiwe zo haú lé, "Nàng dung é haí nghut kôle, ngò byi râ; ngá é mingdán rawuí gú lhang, byi râ nghut lhê." ga, dakam é danggidiq byí ri.

²⁴ Haú hkún, myiwe zo haú gi, htoq ló mù, yhang nu lé, "Haí dung le gè râ laq?" ga myi jáng, yhangnu gi, "Wui-myhup Sará Yohan é ulhum dung aq." ga tú taí kat ri.

²⁵ Myiwe zo haú gi, radá dâm hân hân wang ló mù, hkohkâm lé, "Ahkuí yhang, Wui-myhup Sará Yohan é ulhum lé, bó má kat mù byi laq." ga, dung tóngbán ri.

²⁶ Haú su ga jáng, hkohkâm gi, myit gyai yhang a ngón dut byuq kôlhang, yhang dakam tô é danggidiq é yanmai le, bíng pè é myoqdong lé tè nau é yanmai le, myiwe zo haú taí é dang lé a kâm he pyám lo nghut ri.

²⁷ Haú mù, hkohkâm gi, zúng é gyezo rayuq lé, Yohan é ulhum é hpyit lô râ matú, radá dâm hkunmó hkyó mù nhang kat ri. Haú mù, haú yuq gi, htóng hkaú má é luí, Yohan é ulhum lé, é hpyit mù,

²⁸ bó má kat luí, myiwe zo haú lé lo byí ri; myiwe zo haú gi, ulhum haú lé, yhangnú chyáng yu ló byí ri.

²⁹ Yohan é chángzô pé gi, haú hkyô lé wó gyo kôjáng, yhang é màng lé lé yú luí, lup má ló myhup pyám bekô nghut ri.

Byù Ngo Hkying Lé Byi Tsô É Hkyô
Mht 14:13-21; Luk 9:10-17; Yhn 6:1-14

³⁰ Lagyo pé gi, Yesuq chyáng dum jé zing lò kômù, yhangmoq kut lai lo é hkyô pé eq mhoqshit bê hkyô pé banshoq, Yhang lé taí kyô akô nghut ri.

³¹ Hau htâng, byù myo myo gi, yhangmoq chyáng htoq htoq wàng wàng kut nyí kô é yanmai, yhangmoq gi, zang zo ahkying lhang a wó kó nghut ri. Haú mù, Yesuq gi, chángzô pé lé, "Nga-nhung, tsím tsâm é jowò ralhum má é mù, é nô yù sháng." ga taí ri.

³² Haú mù, yhangmoq gi, yhangmoq baú lhai racham má ji mù, tsím tsâm é jowò shut e ló akô nghut ri.

³³ Nghut kôlhang, yhangmoq e ló é lé châng myang é bang myo myo gi, yhangmoq lé wú sé kôluí, wà hkanmó mai hkyí hkyô châng đin é kômù, yhangmoq é hí má jé to lánng akô nghut ri.

³⁴ Yesuq gi, lhai mai gyó dap ló é hkún, byù moq mó nyi to lánng lé myàng jáng, yhangmoq gi, zúng sù a nyi é sau pé su dut kô é yanmai, yhangmoq lé wú shogyo luí, myo myo mhoqshit byí hi ló bê nghut ri.

³⁵ Bui gyum ló yâm jé jáng, Yhang é chángzô pé gi, lé lò kômù, Yhang lé, "Shí má gi, tsím tsâm é jowò nghut é htoq agó, bui le gyum ló bê;

³⁶ yhangmoq gi, awui ayám má é yhùm pé eq wà pé má, zoshuq ló ho wui zo kó sháng gaq, yhangmoq lé ló nhâng aq hkoí." ga taí akô nghut ri.

³⁷ Haú hkún, Yhang gi, "Nungmoq, yhangmoq lé rajung jung byi tso keq." ga tú taí jáng, yhangmoq gi, "Shí myhó é bang zo râ matú, ngamoq gi, é luí, denari* í sho eq muk é wui byi ra râ luq?" ga dum taú myí akô nghut ri.

³⁸ Nghut kôlhang, Yhang gi, "Nungmoq chyáng muk hkâ-myhó wó akô? Ê wú wú keq." ga myí ri. Haú mù, yhangmoq gi, myang hô jáng, "Muk ngo long eq ngozo í du wó lhê." ga, dum tú taí akô nghut ri.

* **6:37** Denari rchap gi, byù rayuq é ra-nyí lhê é zuihpau eq wui ri.

³⁹ Hau htâng, Yesuq gi, banshoq bang lé ahpúng hpúng kut wàhu yò má zùng nhâng rã matú, Yhâng é chángzô pé lé tai kat ri.

⁴⁰ Haù mù, shiwa byu pé gi, rashô shô kut le, ngo xê xê kut le, ahpúng hpúng zung tô bùm bekô nghut ri.

⁴¹ Yesuq gi, haù muk ngo long eq ngozo í du lé yù mù, mauhkùng shut tu wù to luí, jeju ban hkyá-on jáng, muk lé hpê gam ri. Hau htâng, Yhang gi, byu pé hí má châng hkat to byi rã matú, Yhâng é chángzô pé lé byí ri. Ngozo í du lé le, Yhang yù mù, banshoq bang lé gàm byí ri.

⁴² Yhangmoq banshoq bang gi, zô gyí bùm bekô nghut ri.

⁴³ Hau htâng, haù chángzô pé gi, zô myhit tô é muk eq ngozo lé, raxe í mung byíng shoq wó guq tsíng yu ashí kó nghut ri.

⁴⁴ Haù hkùn, zô é bang gi, yuqgè wuì baú lhang, byù du ngo hkyíng nghut ri.

Yesuq, Wuì Htoq Má Sô É Hkyô
Mht 14:22-33; Yhn 6:15-21

⁴⁵ Yesuq gi, haù shiwa byu pé lé byo ló nhang nyi é hkùn jáng, Yhâng é chángzô pé lé lhai má wang jí nhâng mù, tú tap má é Bet-saida wà mó shut dap ló lhang nhang ri.

⁴⁶ Yhangmoq lé shi-kyâm kat é htâng, Yhang gi, kyùdung rã ga, Yhang baú bùm shut doq é ló bê nghut ri.

⁴⁷ Buigyum htâng, lhai gi, nhông gùng má jé tô é u lé, Yesuq gi, Yhang baú za myi htoq má nyi tô ashí nghut ri.

⁴⁸ Lai tau mut é yanmai, haù chángzô pé gi, lhai lhu wuìhkê nyi kô é lé, Yesuq myang ri. Napsún maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq shut é ló luí, yhangmoq é nàm mai lai ló rã dâ ri.

⁴⁹ Nghut kôlhang, yhangmoq gi, Yhang, nhông htoq má sô nyi é lé myang kôjáng, sobyô su ngàm kômù, kyek garú bum akô nghut ri.

⁵⁰ Hkâsu mù gâ le, yhangmoq banshoq bang gi, Yhang lé myàng kôluí, gyuq dân kô é yanmai nghut ri.

Nghut kôlhang, Yhang, radá dâm yhangmoq lé dáng nyo kat é gi, "Hkâgyuq kó. Ngò ru nghut lhê; zim za nyi keq." gâ ri.

⁵¹ Hau htâng, Yhang gi, lhai htoq má yhangmoq eq rahá ê doq jí jáng, lai gi, zim byuq bê nghut ri; haù mù, yhangmoq gi, gyai yhang mauhong byuq bùm bekô nghut ri.

⁵² Hkâsu mù gâ lé, yhangmoq gi, muk gam é laklai kumlhá eq séng luí a sê gyô kô é htoq agó, myitbun a bóng kô é yanmai nghut ri.

⁵³ Yhangmoq gi, gù dap ló kômù, Genesarat mau má jé wang lò jáng, lhai lé haù má ló shap tô akô nghut ri.

⁵⁴ Yhangmoq lhai mai gyó é hkùn jáng, byu pé gi, Yesuq lé lhom wú sê akô nghut ri.

⁵⁵ Haù mù, yhangmoq gi, haù mau ramau gón má din jón mù, nò bang lé taphkang mai waq luí, Yesuq nyi rí gâ é jowò hkanmó má, shuí lé lo bum akô nghut ri.

⁵⁶ Yesuq jé é wà hkanmó, myuq hkanmó, awui ayàm mã é wà hkanmó pé má, yhangmoq gi, nò byù lé gai pé má lé lhez to kôluí, Yhâng é bushi htâng má za lhang, haù bang lé byi záng nhâng rã matú, Yhang lé dùng tôngbán akô. Yhang lé záng é lhunglhang bang gi, lhoq gè byí é huì akô nghut ri.

7

A Sanséng Dut Nhang É Hkyô Pé
Mht 15:1-20

¹ Haú Hparishe pé eq tarâ sará pé ra-am gi, Yerusalem wà mó mai jé lé lô kômù, Yesuq é nàm má lé zup zing bum akô.

² Haú hkún, Yhâng é chángzô pé ra-am gi, htúngli dông a chí pyâm é, a sanséng é loq èq zo shuq nyí kô é lé, yhangmoq myang akô nghut ri.

³ (Hparishe pé eq Yudaq byù banshoq bang gi, yhangmoq é íchyl íwâ pé é htúngli lé châng é bang nghut lhê mù luí, loq hí a chí é gi, haí le a zô wú kó nghut ri.

⁴ Yhangmoq gi, gài pé mai taú lò jáng le, gùng hí a chí pyâm é, zojung a zo kó nghut é htoq agó, góm pé, hkoq pé, gyi chòkon pé lé chí é htúngli gotù pé lé le, châng akô nghut ri.)

⁵ Haú mù, Hparishe pé eq tarâ sará pé gi, Yesuq lé, "Náng é chángzô pé gi, haí mù luí, íchyl íwâ pé é htúngli lé a châng e za, a sanséng é loq èq zo shuq nyí akô lhú?" ga myí akô.

⁶ Haú hkún, Yesuq gi, yhangmoq lé, "Gegùn labyoq kut bang é, nungmoq eq séng luí myiqhtoi Esai-aq htoí tó é dang má, 'Byù shí bang gi, nhut htoq mai za Ngo lé hkunggâ akô; yhangmoq é myit nhiklum gi, Ngò eq wè gâng nyí akô.

⁷ Yhangmoq gi, akóm má za, Ngo lé noqkuq nyí akô; hkâsu mù gâ le, yhangmoq é mhoqshit hkyô pé gi, byù dông mai mhoqshit é hkyô pé za nghut nyí ri.*

ga kâ tó é gi, têng ri.

⁸ Nungmoq gi, Garai Gasang tó tó é hkunmó lé tó pyâm luí, byu é htúngli lé za, myhik zing tó akô nghut ri." ga luí tù taí ri.

⁹ Hau htâng, Yhang xoq taí é gi, "Nungmoq gi, yhumsing é htúngli lé za cháng râ matú, Garai Gasâng é hkunmó lé he-ngik pyâm é má, hpaqchyí gyaí bo akô nghut ri.

¹⁰ Hkâsu mù gâ le, Mosheq gi, 'Nungmoq é ìnu íwâ lé, hkungga keq.* ga le, 'ìnu íwâ lé, nhíng é sù ó yuq nghut kòle, sat pyâm é hui râ lhê.* ga le, kâ tó é nghut lhê.

¹¹ Nghut kòlhang, nungmoq taí é gi, byù rayuq yuq, yhumsing é yhângnu yhângwa lé byi âng é zè lé, Korban za (Garai Gasang lé byi râ chyunghuq) nghut lhê gâ nhang akô.

¹² Haú mù, haú yuq lé, yhângnu yhângwâ é matú, haí a kut byi nhâng lô é dông dut bè nghut ri.

¹³ Haú dông mai, nungmoq gi, nungmoq chung gyó lo é htúngli é yanmai, Garai Gasâng é mungdang lé he-ngik pyâm akô; haú sù é hkyô myo myo lé le, nungmoq kut akô nghut ri." gâ ri.

¹⁴ Yesuq gi, shiwa byu pé lé Yhâng chyáng dum wut yù mù, taí é gi, "Nungmoq banshoq bang, ngò taí é lé gyó yù mù, sé lo keq;

¹⁵ Shinggan mai wang lo é haí jung le, byù lé a sanséng dut nhang é a nghut, nghut kòlhang, byu é unghkaú mai htoq ló é zè kúm gi, byù lé a sanséng dut nhang lhê." gâ ri.

¹⁶ (Gyo râ nohkyap dap é sù gi, gyô yù sháng gaq.)" ga taí ri.*

* 7:7 Esai 29:13 * 7:10 Htoq Ló 20:12 * 7:10 Htoq Ló 21:17 * 7:16 Bun zo shí gi, Chyúmlaiká ra-am má bo lhê, ra-am má a bò.

17 Yhang gi, byù moq mó mai htoq ló mù, yhúm hkaû má jé wang ló é hkûn, Yhâng é chángzô pé gi, dangtú haû eq séng luí, Yhang lé lhom myí akô nghut ri.

18 Haû mù, Yhang gi, yhangmoq lé, "Nungmoq gi, haû-í yhang go akô luq? Shinggan mai wang lo é haí jung le, byù lé a sanséng nhâng wó dut rá a nghut é hkyô lé, a sé kó lúh?"

19 Hkâsu mù gà lé, haû gi, byu é myit nhiklum hkaû má wang ló é a nghut e za, wamdau hkaû má sheq wang ló é nghut mù, shinggan shut dum lhoq htoq pyâm é nghut lhê." ga taí ri. (Yhang isu ga taí é gi, zoshuq lhunglhang sanséng lhê gá nau é dông nghut ri.)

20 Hau htoq agó, Yhang xoq taí é gi, "Byù mai htoq ló é haí jung le, byù lé a sanséng nhâng wó dut é nghut lhê.

21 Hkâsu mù gà lé, ahkaû mai htoq lo é gi, byu pé é myit mai htoq ló é nghut mù, agè ashop é dông myit é hkyô pé, ashop é dông gungsho zùm yap é hkyô, hkaû é hkyô, byù sat é hkyô, su-myi sulàng lú hkyô,

22 myoqnoq é hkyô, agè ashop é hkyô, mhaú zô é hkyô, achay achyut zùm yap lhùm é hkyô, manon é hkyô, lumù gansang é hkyô, gumrong é hkyô eq ngha é hkyô pé htoq lò é nghut lhê;

23 Agè ashop é hkyô shí pé banshoq gi, byu é unghkaû mai htoq lo é nghut mù, byù lé a sanséng dut nhang ri." gà ri.

Tùngbaù Myiwe Myhí Rayuq É Lumjng Myit

Mht 15:21-28

24 Yesuq gi, haû jowò mai htoq ló mù, Turuq eq Sidun maukyo shut e ló luí, yhùm ralhùm má wang ê ri; Yhang nyi é hkyô lé, ó yuq lé lé a sé nhâng nau kôlhang, a wó zaú to nghut ri.

25 Haû mù, agè ashop é nat wang júng tô é myiwe zo rayuq é yhângnu gi, Yhang nyi tô é hkyô lé wó gyô é hkûn jâng, Yhâng chyáng jé lé mù, Yhâng é hkyí wang má lé paí gop to lui,

26 yhang zô chyáng mai nat gang lé hkat htoq pyâm byi rá matú, Yhang lé dúng tóngbán ri. Myiwe haû gi, Suru-Hpiniki mau má é Grik byuhú nghut ri.

27 Yesuq gi, "Zo wui† hí zô gyi kó sháng gaq; haí mù gà le, zô wui chyáng má é zoshuq lé yù mù, hkuí pé‡ lé byi tsô é jung a nghut." ga yhang lé taí kyô ri.

28 Haû hkûn, yhang gi, "Yhumsing ê! Haû kúm nghut ri; nghut kôlhang, siboi ô má é hkuí lhang, zô wui é zô myhit shuq htâng lé, ge zo lhê a nghut lúh?" ga dum tú taí ri.

29 Haû mù, Yesuq gi, yhang lé, "Nàng tú taí é dang hau é yanmai, ló lo aq hkoí; haû nat gang gi, nung zô chyáng mai htoq ló byuq bê nghut ri." ga taí kat ri.

30 Myiwe myhí haû gi, yhùm má dum taú jé lo é hkûn, yhang zo chong htoq má leq to lóng é lé le, nat gang htoq byuq bê nghut é lé le, lo myang ri.

Nojit É Eq Dang A Hkyang É Sù Lé Lhoq Gê Byí É Hkyô

31 Yesuq gi, Turuq mau mai dum htoq ló mù, Sidun mai sô lai ló luí, Dekapoli mau hkaû dông lai byit mù, Galile nhông shut gyô jé ló ri.

32 Haû hkûn, byù ra-am gi, nojit é eq dang a hkyang é byù rayuq lé, Yhâng chyáng shuí lé lô kômù, haû yuq é ahtoq má loq ke byi rá matú, Yhang lé dúng tóngbán akô nghut ri.

† 7:27 Zo wui gá é gi, Yudaq byu pé lé gá é nghut lhê. ‡ 7:27 Hkuí pé gá é gi, tủngbaù pé lé gá é nghut lhê.

³³ Yesuq gi, haú yuq lé baú za byù hpúng mai shuí htoq yú mù, yhâng é nohkyûng má loqnyhui htaú háng byi luí, sôkan byé tik yú mù, haú yuq é shô má htaú byí ri.

³⁴ Hau htâng, Yhang gi, mauhkûng shut tu wú mù, soq mó shê luí, "Eh-pahta!" (Lichyûm gi, "Bóng aq hko!") ga luí, haú yuq lé taí kat ri.

³⁵ Haú hkûn, haú yuq é nohkyap le bóng byuq luí, shô le nyhôm byuq mù, balang hkyâng hkyâng dang wó nyô bê nghut ri.

³⁶ Yesuq gi, haú hkyô ó lé le a taí kyo râ matú, yhangmoq lé hkúm kôlhang, yhangmoq gi, je hkúm le, je taí pyo akô nghut ri.

³⁷ Byu pé gi, gyai yhang mauhong byuq bùm kôluí, "Yhang gi, haí lé le, ge é dông chyat kut ri; nojit sù lé, wó gyo shoq, dang a hkyâng sù lé, wó nyô shoq, kut byi bê nghut ri." ga luí, taí bum akô nghut ri.

8

Byù Myi Hkyûng Lé Byi Tsô É Hkyô

Mht 15:32-39

¹ Haú yoq má, gotú byù moq mó gi, lé zîng bum akô; haú bang zoshuq langhpyut to kô é yanmai, Yesuq gi, Yhâng é chángzô pé lé wut yù mù,

² "Ngò, shí bang lé wú shogyo ri; yhangmoq gi, Ngò eq rahá nghut nyi é sum nyi bò bê, haí le a myàng zo kô nghut ri.

³ Yhangmoq chyáng má é ra-am gi, mau we mai lé é bang nghut é yanmai, yhangmoq lé, zòmüt gũ yhûm shut nhang kat é nghut le gi, hkyolat má mutyut yut é ló lui kó râ nghut lhê." ga taí ri.

⁴ Haú hkûn, Yhâng é chángzô pé gi, Yhang lé, "Ísu é yoso má nhîng, shí myhò bang lé luq shoq byi tso râ zoshuq gi, hkâmá é yú râ lúhú?" ga taí akô.

⁵ Yesuq gi, "Nungmoq, muk hkâ-myhó long wó akô lúhú?" ga taú myi jáng, yhangmoq gi, "Nyhit long." ga, dum tû taí akô nghut ri.

⁶ Haú mù, Yhang gi, byù hpúng lé myigûng htoq má zûng nhang to luí, muk haú nyhit long lé yù mù, jeju ban hkya-on jáng, myhik hpé luí, haú bang lé gàm byi râ matú, Yhâng é chángzô pé lé byí kat ri; haú mù, yhangmoq gi, haú bang lé gàm byí akô nghut ri.

⁷ Yhangmoq gi, ngo-nú zo ratsuí le wó akô nghut ri; haú mù, Yhang gi, ngozo haú pé é matú jeju hkya-on luí, chángzô pé lé dum gàm byí nhang ri.

⁸ Yuq hkanmó zô gyí bùm kô é htâng má, haú chángzô pé gi, amyit ahtâng lé nyhit mung byíng shoq wó guq tsîng yu ashî kó nghut ri.

⁹ Zô é bang gi, byù myi hkyíng kô nghut ri; Yesuq gi, haú bang lé, nhang kat luí,

¹⁰ Yhâng é chángzô pé eq rahá, lhaí má wang ji mù, Dalamanuhta mau má é je akô nghut ri.

¹¹ Hparishe pé gi, lé mù, Yesuq eq dang htîng htîng lhûm akô; hau htoq agó, yhangmoq gi, mauhkûng má é kumlhá lé dúng é dông, Yhang lé chyam wú akô nghut ri.

¹² Yesuq gi, myit nò-kying kying luí, yhangmoq lé taí é gi, "Haí mù luí, shí ipyat lhê é byu pé gi, limik kumlhá dúng akô lúhú? Ngò teng za taí kôlé, shí ipyat má é bang lé, hai kumlhá le tûn shit râ a nghut." gâ ri.

¹³ Hau htâng, Yhang gi, yhangmoq lé pyâm to mù, lhaí má dum taú wang ló luí, tû tap shut gũ dap e ló bê nghut ri.

Hparishe Pé Eq Herut É Múnchi
Mht 16:5-12

14 Haú chángzô pé gi, muk yu chùng râ lé tô-myhí pyám kôluí, lhai hkaú má muk ralong za ru wó akô nghut ri.

15 Yesuq gi, yhangmoq lé, "Nungmoq gi, Hparishe pé eq Herut é múnchi* lé, sidiq luí, koi pyâm nyi keq." ga taí ri.

16 Haú hkûn, yhangmoq gi, "Nga-nhùng chyáng muk a bo é yanmai, haú su ga taí é nghut ri." ga luí, rayuq eq rayuq taí lhûm bum akô nghut ri.

17 Haú su ga taí lhûm nyi kô é lé Yesuq sé jáng, yhangmoq lé, "Nungmoq gi, muk a bo é hkyô lé, haí mù taí lhûm nyi akô lú? Ahkuí jé shoq, nungmoq gi, a byu-myàng, a sê gyo shi kó lú? Nungmoq é myit nhikhum gi, ru htan nyi ashí kó lú?"

18 Myoq dap to kôluí nhing, a myàng kó lú? Nohkyap dap to kôluí nhing, a wó gyo kó lú?"

19 Ngò, muk ngo long lé myhik hpé mù, byù ngo hkying lé byi tsô é hkûn, zô myhit shuq htàng lé, nungmoq hkâ-myhó mung wó guq tsing yu é lé, bun ashí kó lú?" ga myi jáng, yhangmoq gi, "Raxe í mung." ga tù taí akô.

20 Dum, Yesuq gi, "Ngò, muk nyhit long lé myhik hpé mù, byù myi hkying lé byi tsô é hkûn, zô myhit tô é ajap azo lé, nungmoq hkâ-myhó mung wó guq tsing yù kô é lú?" ga myi jáng, yhangmoq gi, "Nyhit mung." ga dum tù taí akô.

21 Haú hkûn, Yesuq gi, "Haú nghut le nhing, ahkuí le, a sê gyo shi kó lú?" ga, yhangmoq lé myí ri.

Myoqjit Sû Rayuq Lé Lhoq Gê Byí É Hkyô

22 Yhangmoq gi, Bet-saida và mó má jé lò kô é hkûn, byù ra-am gi, myoqjit é byù rayuq lé, Yesuq chyáng shuí lé lò mù, haú yuq lé záng byi râ matú, dúng tôngbán akô.

23 Yesuq gi, myoqjit sû haú yuq é loq lé zui mù, và shinggan shut shuí htoq ló luí, yhâng é myoq má sôkan byé tik byi mù, loq ke byi luí, "Nàng, rajung jung lé myang ri lú?" ga myí kat ri.

24 Haú jáng, yhang gi, tu wú kat luí, "Byu pé gi, sikgâm su dut luí, hkyô sô wún é lé, ngò myang ri." ga taí ri.

25 Hau htàng, Yesuq gi, haú yuq é myoq má Yhâng é loq dum ke byí ri; haú hkûn, haú yuq é myoq gi, bóng lô mù, ge byuq luí, haí lé le san za myàng bê nghut ri.

26 Yesuq gi, haú yuq lé, "Wà hkaú má hkâwang ló lo." ga taí luí, yhâng é yhùm shut ló nhang kat bê nghut ri.

Hkrisduq Ga, Petruq Yín Yu É Hkyô
Mht 16:13-20; Luk 9:18-21

27 Yesuq eq Yhâng é chángzô pé gi, Kesare-Hpilipi và mó awui ayàm mâ é và pé shut e ló é hkûn, hkyô má, Yesuq gi, chángzô pé lé, "Byu pé gi, ngo lé ó yuq nghut lê ga, taí akô lú?" ga myí ri.

28 Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, myiqhtoi rayuq yuq nghut ri ga taí akô." ga, Yhang lé tù taí akô.

* 8:15 Shí má taí é múnchi gi, Hparishe pé eq Herut é mhoqshit hkyô lé, lhoq pyo é lé gâ lhê.

²⁹ Yesuq gi, "Nungmoq gi, ngo lé ó yuq nghut lhê nghu akô lhú?" ga, yhangmoq lé xoq myi jáng, Petruq gi, "Nàng gi, Hkrisduq† nghut ri." ga tú taí ri.

³⁰ Yesuq gi, haú hkyô ó lé le a taí kyo râ matú, yhangmoq lé taí hkúm ri.

Byu Yhangzo Gi, Sat Pyâm É Hui Luí, Dum Dui Toq Râ Hkyô
Mht 16:21-28; Luk 9:22-27

³¹ Hau htâng, Yhang gi, yhangmoq lé mhoqshit é má, "Haú Byu Yhangzo gi, zing-rí é myo myo hui zo lui, suwún wuí, hkyangjong agyi pé, tarâ sará pé èq he-ngik pyâm é hui mù, sat pyâm é hui ra râ nghut lhê; nghut kôlhang, sum nyí nghú râ buinyi má, dum dui toq râ nghut lhê." gâ ri.

³² Yesuq gi, haú hkyô lé san za dut shoq taí nyi é yanmai, Petruq gi, Yhang lé rahkyam shut shuí htoq yú mù, Yhang lé tân ri.

³³ Nghut kôlhang, Yesuq gi, Yhâng é chángzô pé lé lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sú nghut ri." ga tân kat ri.

³⁴ Hau htâng, Yhang gi, byù moq mó eq Yhâng é chángzô pé lé wut yù mù, taí é gi, "Ngá htâng cháng nau sú ó yuq nghut kôle, yhumsing gùng yhumsing he-ngik pyâm mù, yhumsing é tapzîng lé waq chùng lui, cháng ra râ nghut lhê.

³⁵ Hkâsu mù gâ le, yhumsing é asak lé hkyi yù nau sú ó yuq nghut kôle, asak sum râ nghut lhê; nghut kôlhang, Ngá é yanmai le, haú gabú danglù é yanmai le, yhumsing é asak sùm pyâm é sú kúm gi, asak hkyi yu é hui râ nghut lhê.

³⁶ Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhâng é matú, hai akyù bò râ lhú?

³⁷ Byù gi, yhumsing é asak woi-nyí lé, hai èq wó htaí yù râ lhú?

³⁸ Yubak mara myô é eq su-myi sulàng shut é ipyat shí má, Ngò eq Ngá é dang lé hoq pyâm é sú ó yuq lé le, haú Byu Yhangzo gi, Yhâng Wá é hpungwup shing kang bo é èq, haú chyoiyúng maumang lagyô pé eq rahá jé lé é hkún, hoq pyâm râ nghut lhê.* gâ ri.

9

¹ Hau htâng, Yesuq gi, yhangmoq lé, "Ngò, nungmoq lé teng za taí kôlé, shí má yap tô é bang ra-am gi, Garai Gasang é mingdán, hpungwup a-tsâm èq jé lé lo é lé, a myang é za shí kó râ a nghut." ga taí ri.

Yesuq É Ihpyô Isâm Htaí Lo É Hkyô
Mht 17:1-13; Luk 9:28-36

² Hkyuq nyí lai htâng má, Yesuq gi, Petruq lé le, Yakuq eq Yohan lé le, shuí chùng mù, yhangmoq baú myhang é bùm ralhú má doq ló akô; haú hkún, yhangmoq é myoq hí tê má, Yesuq é ihpyô isâm htaí lo ri.

³ Hau htoq agó, Yhâng é mebu gi, wik wik duq hpyu zan lo ri; myidàm htoq má, ó yuq le haú-í hpyú shoq a wó xaú hpyu wú é nghut lhê.

⁴ Eliyaq eq Mosheq gi, yhangmoq é hí má htoq shit mù, Yesuq eq dáng nyo lhùm nyi akô.

⁵ Haú mù, Petruq gi, Yesuq lé, "Rabai è, shí jowò má nga-nhúng nyi le ge ri; haú mù, Náng é matú ralhú, Mosheq é matú ralhú, Eliyaq é matú ralhú kut, ngamoq lé, zúm sùm lhum saí nhâng laq." ga taí ri.

† 8:29 Grik dong *Hkrisduq* gâ é gi, xú but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê. * 8:38 Yer 3:8; Ezk 23:37; Hos 2:2-10

⁶ Hkâsu mù gâ le, yhangmoq gi, gyai yhang gyuq dan bùm kô é yanmai, Petruq gi, haî taî râ le a sé mù, haû su gâ é nghut ri.

⁷ Hau htâng, mhut htoq lô luî, yhangmoq lé htup zîng lô mù, mhut hkaû mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhâng é dang gyô keq." gâ ri.

⁸ Haû hkûn jáng, chángzô pé gi, lhîngkhyuq má wú kat le, Yesuq za yhangmoq eq rahá nghut nyi é mai lai luî, ó lé le, a myàng lo kó nghut ri.

⁹ Yhangmoq, bùm mai taû gyó lô kô é hkûn, Yesuq gi, haû Byu Yhangzo shi é mai a dum dui toq toq gi, yhangmoq myang é hkyô lé, ó lé le a taî kyo rá matú taî hkûm tô ri.

¹⁰ Chángzô pé gi, dang haû lé myit má kat to kôluî, "Shi é mai dum dui toq rá." gâ é lichyúm lé, rayuq eq rayuq myî lhùm bum akô nghut ri.

¹¹ Hau htâng, yhangmoq gi, "Eliyaq hí lé ra rá nghut lhê ga, tarâ sará pé haî mù taî kô é lhú?" ga, Yesuq lé myî akô.

¹² Haû hkûn, Yesuq gi, "Eliyaq hí jé lé é gi, teng bê nghut luî, lhunglhâng lé dum lajâng tô é nghut ri. Nghut kôlhâng, haû Byu Yhangzo gi, myo myo hpuzo luî, he-ngik pyâm é hui ra nghut lhê ga le, Chyúmdang má kâ to ashí, a nghut kó lhú?"

¹³ Ngò, nungmoq lé taî kôlé, Eliyaq gi, jé lé bê nghut mù, yhang eq séng luî Chyúmdang má kâ tô é eq rajung za, yhangmoq gi, ô nau é dông banshoq kut bekô nghut ri." ga tû taî ri.

Nat Dap É Yuqgè Zo Rayuq Lé Lhoq Gê Byí É Hkyô

Mht 17:14-20, 22-23; Luk 9:37-45

¹⁴ Yhangmoq gi, chángzô pé chyáng dum taû jé lô kô é hkûn, haû bâng é lhîngkhyuq má byù moq mó zîng lé é lé le, tarâ sará pé, haû bang eq dang htîng htîng lhùm nyi kô é lé le, myang akô.

¹⁵ Haû má nyi tô é lhunglhâng bang gi, Yesuq lé myang kat é eq, maú byuq kôluî, din ê mù, ê shi-kyâm akô nghut ri.

¹⁶ Haû hkûn, Yesuq gi, yhangmoq lé, "Nungmoq gi, yhangmoq eq haî lé dang htîng htîng lhùm nyi akô lhú?" ga myî ri.

¹⁷ Byù hpúng hkaû má é rayuq tû taî kat é gi, "Sará ê! Nhut jit nhang é nat wang júng tô é ngá é yuqzo lé, Náng chyáng shuí lé lo lhê.

¹⁸ Nat haû gi, yhâng chyáng wàng hkangmó, yhang lé myi htoq má lhoq leqbat nhang ri; haû mù, yhang gi, nhut mai guttsú htoq lhê, zuî kyik kyik lhê, langhtan lo lhê, dut ri; hau é yanmai, nat haû lé hkat htoq pyám byí rá matú, Náng é chángzô pé lé dúng wú kôlhâng, yhangmoq a wó dut kó nghut ri." gâ ri.

¹⁹ Haû hkûn, Yesuq gi, "Lumjîng myit a bo é amyù pé ê, Ngò gi, hkâ-myhâng jé shoq nungmoq eq rahá nyi mù, wó jân nyi rá lhú? Yuqgè zo haû lé, Ngá chyáng shuí lé lô keq." ga taî kat ri.

²⁰ Haû mù, yhangmoq gi, yuqgè zo haû lé shuí lé lo akô; nat haû gi, Yesuq lé myang kat é eq yhang, yuqgè zo haû lé langhtân nhang ri; yuqgè zo haû gi, myigùng má lêng leq lui goleng leng mù, nhut mai tsû-myup htoq nyi ri.

²¹ Haû hkûn, Yesuq gi, yhângwa lé, "Yhang, isu dut é hkâ-myhâng myáng bê lhú?" ga myi jáng, yhâng wa gi, "Zoshâng hkûn mai nghut bê.

²² Nat haû gi, yhang lé lhoq sat pyám nau mù, myi má le, wui má le, anum num lêng wàng nhang wú bê nghut lhê; nghut kôlhâng, Náng, rajung jung wó kut byí é nghut le gi, ngá hpe lé shogyo yù laq, garúm yù laq." ga tû taî ri.

23 Yesuq gi, "'Nàng, wó kut byí é nghut le gi,' nghũ, haí mù tái lê lú? Lumjǐng myit bò su é matú gi, haí le wó dut lê.'" ga, yang lé tái ri.

24 Haú zôshang é yhangwa gi, radá dâm, "Ngò lumjǐng lê; nghut kôlhang, ngá é lumjǐng myit gi, shaú ashí nghut é yanmai garúm yú laq." ga tái garú ri.

25 Yesuq gi, byù hpúng din zǐng lé lô kô é lé, myàng jáng, haú agè ashop é nat lé, "Nojit, nhutjit nhang é nat é! Ngò, nang lé hkunmó hkyô lê, yhang chyáng mai htoq lô aq; hkâ-nhâm le, yhang chyáng hkâdum wàng lo." ga tân kat ri.

26 Haú hkûn, nat haú gi, garu mù, zoshâng haú lé wum kat langhtân nhâng lui, htoq lô byuq bê. Zoshâng haú gi, shí mâng gùng su dut byuq é yanmai, byù myo myo gi, "Yhang shí bê nghut ri." ga tái akô.

27 Nghut kôlhang, Yesuq gi, zôshang é loq má zui lui, tu toq kat ri; haú mù, zoshâng gi, yap to bê nghut ri.

28 Yesuq, yhúmhaú má wang lô é htâng, Yhâng é chángzô pé gi, "Ngamoq gi, haí mù, nat haú lé a wó hkat htoq é lú?" ga, tsik za Yhang lé myí akô.

29 Yesuq gi, "Haú jung nat lé gi, kyúdûng é đông za a nghut jáng, wó hkat htoq rã a nghut." ga, yangmoq lé tú tái ri.

30 Yhangmoq gi, haú jowò mai htoq lô mù, Galile mau mai lai lô akô; nghut kôlhang, Yesuq gi, ó lé le a sê nhâng naù nghut ri.

31 Haí mù gà le, Yhang gi, "Haú Byu Yhangzo gi, byu pê é loq má ap pyâm é hui rã nghut lê; haú bang gi, Yhang lé sat pyâm kó rã nghut lê; nghut kôlhang, Yhang gi, shí é htâng sum nyí nghũ rã nyí má, dum dui toq rã nghut lê." ga, Yhâng é chángzô pé lé mhoqshit byí nyí é yanmai nghut ri.

32 Yhâng é chángzô pé gi, dang haú lé a sê gyo kôlhang, Yhâng chyáng a wám myi kó nghut ri.

Kô Dik Sũ Gi, Ó Yuq Nghut Lê Lú?

Mht 18:1-5; Luk 9:46-48

33 Yhangmoq gi, Kaperna-um wà má jé e akô nghut ri. Yesuq gi, yhúmhaú má nyí tô é hkûn, chángzô pé lé, "Hkyô má, nungmoq, hai hkyô lé dang chyin chyin lhum kô é lú?" ga myí ri.

34 Nghut kôlhang, yangmoq gi, zim za nyí tô akô; hkâsu mù gà le, ko dik sũ gi, ó yuq nghut lê nghũ é hkyô lé, hkyolat má, yangmoq dang chyin chyin lhum kô é yanmai nghut ri.

35 Yesuq gi, zùng mù, haú chángzo raxe í yuq lé, wut yú lui, "Kô dik naù sũ ó yuq nghut kôle, tiq dik sũ eq banshoq bâng é dui-nhâng zoshâng dut ra rã nghut lê." ga tái ri.

36 Hau htâng, Yhang gi, zoshâng rayuq lé shuí yú mù, yangmoq é gung gung má shap to lui, dum bún yú mù, yangmoq lé tái é gi,

37 "Shí sũ é zoshâng lé, Ngá é myìng mai hap yu é sũ ó yuq nghut kôle, Ngo lé hap yu é sũ nghut bê; Ngo lé hap yu é sũ ó yuq nghut kôle, Ngo lé za hap yu é a nghut, Ngo lé nhang kat é Sũ lé hap yu é le nghut lê." gà ri.

Nga-nhúng Lé Gyè A Kut É Sũ Gi, Nga-nhúng É Hkyam Shut Nghut Lê Gà É Hkyô

Luk 9:49-50

38 Haú hkûn, Yohan gi, "Sarà é! Náng é myìng lang lui, nat gâng pé lé hkat pyâm byí wún é byù rayuq lé, ngamoq myang ri. Yhang gi, nga-nhúng chyáng a lòm sũ nghut é yanmai, yang lé ngamoq hkûm pyâm é nghut lê." ga tái ri.

39 Yesuq kúm gi, "Yhang lé hkâhkúm kó; Ngá myìng lé lang lui, laklai kumlhá kut é sũ gi, razup za má, Ngò eq séng lui, a ge é hkyô pé lé tái rã a nghut;

⁴⁰ Hkâsu mù gâ le, nga-nhúng lé gyè a kut é sù gi, nga-nhúng é hkyam shut nghut lhê.

⁴¹ Ngò, nungmoq lé teng za taí kôlé, nungmoq gi, Hkrisduq eq sêng é bang nghut lhê gâ é yanmai, ngá é myìng lé lang luí, nungmoq lé, uchyam ragóm byi huq é sù ó yuq nghut kôle, zuihpau lé hkyak myang hkam yù rà za nghut lhê.

Mara Shut Nhang É Hkyô
Mht 18:6-9; Luk 17:1-2

⁴² Ngo lé lumjìng é zoshâng wuì mã é rayuq lé, mara kut shut nhang é sù gi, yhâng é lingzing má luqluí long mó tuí hut byi luí, wuìmau mã é dù hkyó pyâm é huí é nghut lé gi, yhang é matú je gè rà nghut lhê.

⁴³ Náng é loq èq, nang lé mara kut shut nhang é nghut le gi, haú lé hpyit dú pyám aq; loq í loq dap luí, hkâ-nhám le, myiduq a dat shum é ngaraí ming wàng rà htoq má, loq raloq eq za ahtum abyuq é asak wó rà shut wàng le gi, náng é matú je ge ri.

⁴⁴ (Haú ngaraí ming gi, 'yhangmoq lé hkê nyi é luq le a shí, myiduq le a shúm' é jowò nghut lhê.)*

⁴⁵ Náng é hkyí èq, nang lé mara kut shut nhang é nghut le gi, haú lé hpyit dú pyám aq; hkyí í hkyí dap luí, hkâ-nhám le, myiduq a dat shum é ngaraí ming má dù hkyó pyâm é huí rà htoq má, hkyí rahkyí za dap luí, ahtum abyuq é asak wó rà shut wang le gi, náng é matú je ge ri.

⁴⁶ (Haú ngaraí ming gi, 'yhangmoq lé hkê nyi é luq le a shí, myiduq le a shúm' é jowò nghut lhê.)

⁴⁷ Náng é myoqjí èq, nang lé mara kut shut nhang é nghut le gi, haú lé lap choq pyám aq; myoqjí í jí dap gú, ngaraí ming má dù hkyó pyâm é huí rà htoq má, myoq rají eq za, Garai Gasâng é mingdán má wang le gi, náng é matú je ge ri.

⁴⁸ (Haú ngaraí ming gi, 'yhangmoq lé hkê nyi é luq le a shí, myiduq lé a shúm' é jowò nghut lhê.)[☆]

⁴⁹ Hkâsu mù gâ le, hkungga sho lé xo kat luí lhoq sansêng é su, myi gi, yuq hkangmó lé lhoq sanséng rà nghut lhê.[☆]

⁵⁰ Xo gi, ge lhê. Nghut kôlhang, xomân kân byuq jáng gi, hkâsu kut dum wó lhoq ngam yù rà lúh? Nungmoq gi, xo su ngam nyì mù, rayuq eq rayuq nguóngón nyí keq." ga taí ri.

10

Myi, Làng Gâng É Hkyô
Mht 19:1-12; Luk 16:18

¹ Hau htâng mã, Yesuq gi, Kaperna-um mai htoq ló mù, Yuda mau mã é maukyo mã é jé luí, Yodan làng tù tap mã dap ló bê nghut ri; byù myo myo gi, Yhâng chyáng dum zìng lé lô kôluí, Yesuq gi, Yhang lhaq kut nyi é eq rajung za, haú bang lé mhoqshit byí ri.

² Hparishe pé ra-am gi, lé jé kômù, "Byù rayuq, yhumsing é yhangmyi lé lhoq kâng pyâm le, tarà wang lhê lúh?" ga myí é dong, Yhang lé chyam wú akô.

³ Yesuq gi, "Mosheq gi, nungmoq lé, hkâsu ga hkunmó hkyó tô é lúh?" ga taú myí ri.

* 9:44 Bun zo 44, 46, gi, Chyúmlaiká myo myo mã a bo é nghut lhê. ☆ 9:48 Esai 66:24 ☆ 9:49 Nhung 2:13

4 Haú hkûn, yhangmoq gi, "Yuqgè rayuq gi, lhoq kang laiká ká mù, yhangmyi lé wó nhang pyám lhê ga, Mosheq, ahkáng byi tô ri." ga tú taí akô.

5 Yesuq dum tú taí é gi, "Nungmoq é myit nhikhlum htân kô é yanmai, Mosheq gi, tarâ haú lé kâ tô é nghut lhê.

6 Nghut kôlhâng, mau htoq xâng hkun lé, Garai Gasang gi, 'yuqgè eq myiwe lé hpan é nghut lhê'.^{*}

7 'Hau é yanmai, yuqgè gi, yhumsing inu íwâ chyáng mai htoq luí, yhangmyi eq rahá rading ralhú za kut nyi mù,

8 yhangnhik gi, gungsho ralhú za dut byuq kó rá nghut lhê.^{*} Haú mù luí, yhangnhik gi, í yuq a nghut lo é za, rayuq za dut bê nghut ri.

9 Haú mù luí, Garai Gasang lhoq tsûm tô é lé, byù gi, a lhoq kang sháng gaq." gâ ri.

10 Yhumhkaú má, yhangmoq nyi tô é hkûn lé, chángzô pé gi, haú hkyô eq séng luí, Yhang lé dum sai myi akô.

11 Haú hkûn, Yhang gi, "Yhumsing é yhangmyi lé kâng pyám mù, myiwe gotú dum hâng yu é sù ó yuq nghut kôle, su-myi lú é sù dut bê nghut mù, yhangmyi lé shut é sù nghut bê.

12 Myiwe rayuq le, yhumsing é yhanglâng lé kâng pyám mù, yuqgè góyuq eq dum hâng é nghut le gi, sulàng lú é hkyô lé kut bê nghut ri." ga tú taí ri.

Zoshâng Wuí Eq Yesuq É Hkyô

Mht 19:13-15; Luk 18:15-17

13 Byu pé gi, zoshâng wuí lé Yesuq záng byi sháng gaq ga, Yesuq chyáng shuí lé lo akô; nghut kôlhâng, chángzô pé gi, yhangmoq lé lhom tân hkûm akô nghut ri.

14 Haú lé Yesuq myàng jáng, Yhang gi, wú nhik-yo naú luí, "Haú zoshâng wuí lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, Garai Gasâng é mingdán gi, haú su é bâng é mingdán ru nghut lhê.

15 Ngò, nungmoq lé teng za taí kôlé, ó yuq nghut kôle, Garai Gasâng é mingdán lé, zoshâng su kut a lhom hap yu é nghut le gi, mingdán haú má wó wâng rá a nghut." ga yhangmoq lé taí ri.

16 Hau htâng, Yesuq gi, zoshâng wuí lé bún yú mù, yhangmoq ahtoq má loq ke luí, shimân byi ri.

Sùt Wó É Zorâm Rayuq É Hkyô

Mht 19:16-30; Luk 18:18-30

17 Yesuq gi, hkyô dum so xoq e ló é hkûn, byù rayuq gi, din lé lô mù, Yhâng é hí má hkyihput htuq luí, "Ge é Sará ê, ahtum abyuq é asak wó yú rá matú, ngò haí kut ra rá lhú?" ga myi ri.

18 Haú mù, Yesuq gi, "Haí mù, Ngo lé ge é Sará nghu lhê lhú? Garai Gasang mai lai luí, ge é ó yuq le a nyi.

19 Jep e tarâ má, 'Byù hkâsat, su-myi sulàng hkâlú, hkâhkau, a teng a mán é saksé hkâhkám, hkâmô zo, nángnu nángwa lé hkungga aq!'^{*} ga bo tô é lé, nàng sê lhê." ga tú taí ri.

20 Haú hkûn, haú yuq gi, "Sará ê, haú pé banshoq lé, ngò, zoshâng hkûn mai cháng bê nghut lhê." ga taí ri.

21 Yesuq gi, haú yuq lé wú tsuq to mù, yhang lé chytidap luí, taí é gi, "Nàng kut rá rajung rá tô ashí; lô mù, nàng wó miwó lé ùng pyám luí, myùng bang lé

byí pyám aq; haú jáng, nàng, mauhkûng htoq má sutzè wó râ nghut lhê; haú mù, Ngá htâng lé cháng aq." gâ ri.

²² Haú yuq gi, dang haú lé wó gyo jáng, sutzè gyai wó sù nghut é yanmai, myoqdong shum byuq mù, gyai yhang myit a ngón é eq ló byuq bê nghut ri.

²³ Yesuq gi, lînhkhyuq byu wú mù, Yhâng é chángzô pé lé, "Sutzè wó bang gi, Garai Gasâng é mingdán má wàng râ matú, haú-í yhang wuî ri-nhung!" ga tai ri.

²⁴ Chángzô pé gi, Yhang tai é dang é yanmai, mauhong bum akô nghut ri. Nghut kôhang, Yesuq dum xoq tai é gi, "Zo wuî ê, Garai Gasâng é mingdán má wàng râ matú, haú-í yhang wuî ri-nhung!"

²⁵ Sutzè wó sù rayuq, Garai Gasâng é mingdán má wó wàng râ htoq, gola-uq radu âpno mai wó wang lai râ gi, je lui râ nghut lhê." gâ tai ri.

²⁶ Haú hkûn, chángzô pé gi, je riyhang maú byuq kômù, rayuq eq rayuq, "Haú su ru nghut le gi, ó yuq za hkyi yu é hui râ nghut lhê lú?" ga, tai lûm bum akô nghut ri.

²⁷ Haú hkûn, Yesuq gi, yhangmoq lé wú kat mù, "Haú hkyô lé, byù mai gi, wó kut râ a nghut; nghut kôhang, Garai Gasang gi, wó dut lhê; hkâsu mù gâ le, Garai Gasang gi, lunglhang lé wó kut é Sù nghut lhê." ga tai ri.

²⁸ Haú hkûn, Petruq gi, Yhang lé, "Ngamoq gi, wó é gû lunglhang lé tô pyâm to lui, Náng htâng cháng bê nghut lhê." ga tai ri.

²⁹ Haú mù, Yesuq tù tai é gi, "Ngò, nungmoq lé teng za tai kôlé, Ngá é yanmai le, gabú danglu é yanmai le, yhumsing é yhûm, gumang gu-nhá, înu îwa, zo dù wuî eq yò pé lé tô pyâm tô é sù ó yuq nghut kôle,

³⁰ shí pyat lhê é yhûm pé, gumang gu-nhá wuî, înu pé, zo dù wuî eq yò pé lé, rashô tú wó hkam yù lui, zing-rî é hkyô pé lé le hui kó râ nghut é htoq agó, htang pyat má le, ahtum abyuq é asak wó yù râ nghut lhê.

³¹ Nghut kôhang, hí nghut nyi é bang myo myo gi, htâng gyó byuq kó râ nghut mù, htâng gyó nyi bang yuq gi, hí bekô râ nghut lhê." gâ ri.

*Yesuq, Yhang Shi Râ Hkyô Lé Dum Tai É Hkyô
Mht 20:17-19; Luk 18:31-34*

³² Yhangmoq gi, Yerusalem wà mó shut doq ló nyi kô é u lé, Yesuq gi, yhangmoq é hí má sô tô ri; haú hkûn, htâng má sô é bang gi, gyuq nyi bùm kô é u lé, haú chángzô pé gi, maú byuq bum akô nghut ri; Yesuq gi, haú chángzo raxe í yuq lé gotú kut dum wut yù mù, Yhâng chyáng dut lò râ hkyô, yhangmoq lé tai kyô é gi,

³³ "Wú keq, nga-nhung gi, Yerusalem wà mó shut doq ló nyi lhê; haú Byu Yhangzo gi, hkyangjong agyi pé eq tará sará pé é loq má ap byí pyám é hui râ nghut lhê; haú bang gi, Yhang lé, shí râ mara byi lui, tungbau pé é loq má ap byí pyám kó râ nghut lhê.

³⁴ Haú bang gi, Yhang lé, wuizui kut pyâm é, sôkan byé gyûn é, nhuq bat é kut yù mù, sat pyám kó râ nghut lhê. Hau htâng sum nyí má, Yhang dum dui toq lò râ nghut lhê." gâ ri.

*Yakuq eq Yohan nhik dung é hkyô
Mht 20:20-28*

³⁵ Hau htâng má, Zebedi é yhangzo Yakuq eq Yohan nhik gi, Yesuq chyáng lé kômù, "Sarâ ê, ngá-nhik dúng é gû banshoq, Nàng kut byi râ lé, ngá-nhik ô nau ri." ga tai akô.

36 Haú hkûn, Yhang gi, "Ngò, nungnhik lé hái kut byi râ ô naú akò lúhú?" ga myí ri.

37 Yhangnhik gi, "Náng é hpungwup shing kang hkaú má, ngá-nhik tâng lé, Náng é loqyò hkyam má rayuq, loqpaí hkyam má rayuq kut, zùng nhâng laq." ga tù tái akò.

38 Nghut kôlhang, Yesuq gi, "Nungnhik hái dúng nyi é lé, nungnhik a sé kó nghut ri. Ngò shuq râ góm* lé, nungnhik wó shuq kó râ lúhú? Ngò hkam yù râ baptisma lé, nungnhik wó hkam yù kó râ lúhú?" ga yhangnhik lé tù tái ri.

39 Haú hkûn, yhangnhik gi, "Nga-nhik wó dut lhê." ga tù tái kôjáng, Yesuq gi, "Ngò shuq râ góm lé, nungnhik shuq kó râ nghut lhê; ngò hkam yù râ baptisma lé le, nungnhik hkam yù kó râ nghut lhê.

40 Nghut kôlhang, Ngá é loqyò, loqpaí hkyam má zùng râ ahkáng lé gi, Ngò byí jung a nghut. Jowò haú pé gi, hen to byí é hui bâng matú za nghut lhê." ga yhangnhik lé tái ri.

41 Haú su gâ é hkyô lé, haú gotú chángzo raxê yuq wó gyo kôjáng, yhangmoq gi, Yakuq eq Yohan nhik lé nhik-yô akò nghut ri.

42 Yesuq gi, yhangmoq banshoq bang lé wut tsing yù luí, "Tùngbau pé lé uphkang é ga bang gi, tưngbau pé lé up zô nyi kô é hkyô lé le, haú eq rajung za, yhangmoq é ming up suwún wuí le, yhumsing é ahkáng ayá lé chùng mù, up zô nyi kô é hkyô lé le, nungmoq sê lhê.

43 Nghut kôlhang, nungmoq chyáng gi, haú su a dut kó sháng gaq, nungmoq má, byù mó dut naú sù ó yuq nghut kôle, nungmoq é dui-nhâng zoshâng dut ra râ nghut lhê.

44 Hau htoq agó, nungmoq má ushuq dut naú sù ó yuq nghut kôle, banshoq bâng é jùn dut ra râ nghut lhê.

45 Hkâsu mù gâ le, haú Byu Yhangzo lháng gi, dojaú é lé hkam yù râ matú jé lé é a nghut e za, dojaú râ matú eq byù myo myô é matú, shíhtái gunglik hkungga đông, Yhâng é asak lé byi pyám râ matú sheq, jé lé é ru nghut lhê." ga, yhangmoq lé tái ri.

Myoqjit Sù Barateme, Myoq Dum Myang É Hkyô
Mht 20:29-34; Luk 18:35-43

46 Hau htâng, yhangmoq gi, Yerihko và má jé ló akò nghut ri. Yesuq eq Yhâng é chángzô pé gi, byù moq mó eq rahá, và mai htoq ló nyí kô é hkûn, Barateme (Teme é yhangzo) gâ é myoqjit sù rayuq gi, hkyô yàm má dung zô zung tô ri.

47 Yhang gi, Nazaret và byù Yesuq lai ló é lé wó gyo jáng, "Dawiq é Yhangzo Yesuq ê, ngo lé shogyo yù laq ô!" ga garú kat ri.

48 Haú mù, byù myo myo gi, zim za nyi râ matú yhang lé tân hkûm akò; nghut kôlhang, yhang gi, "Dawiq é Yhangzo ê, ngo lé shogyo yù laq ô!" ga, je riyhang garú kat ri.

49 Haú mù luí, Yesuq gi, yap nô kat mù, "Yhang lé ji kat keq." ga tái jáng, yhangmoq gi, "Myit ngón aq hkoi; Yhang, nàng lé ji nyi ri; toq aq." ga myoqjit sù haú lé tái akò.

50 Haú hkûn, haú yuq gi, yhâng é buhíng lé hkyut pyám mù, byam chyu luí, Yesuq chyáng lé jé ri.

51 Yesuq gi, yhang lé, "Ngò, nang lé hái kut byi râ ô nau ri lúhú?" ga myi jáng, yhang gi, "Sarà ê, ngò myoq myàng nau ri." ga tù tái ri.

* 10:38 Góm eq baptisma gâ é gi, jamjau hui râ eq shí râ lé, tái nau é nghut lhê.

⁵² Yesuq gi, "Ló aq hkoi, náng é lumjǐng myit gi, nàng lé lhoq gê byi bê nghut ri." ga tai kat é hkûn jáng, yhang gi, myoq wó myàng mù, Yesuq e ló é hkyô shut cháng e ló bê nghut ri.

11

Yesuq, Yerusalem Wà Mó Má Wang Ló É Hkyô
Mht 21:1-11; Luk 19:28-40; Yhn 12:12-19

¹ Yesuq eq Yhâng é chángzô pé gi, Yerusalem wà mó eq chyâng lo nyi kô é hkûn, Tsanlun Bùm mã é Bethpage wà eq Behtani wà mã jé ló kôjáng, Yesuq gi, Yhâng é chángzo í yuq lé,

² "Nungnhik, hí mã é wà mã é keq; wà haú mã wang é hkûn jáng, ó le a jǐ wú shǐ é logúng zo tuí to lánng é lé, é myàng kó rá nghut lhê; haú lé hpyi yù mù, Ngá chyáng she lô keq.

³ Byù rayuq yuq mai, 'Haí mù, haú su kut nyi akô lúh?' ga nungnhik lé lhom myi jáng, 'Shí du lé, haú Yhumsǐng rá ri ga, razup mã dum taú dé byi rá nghut lhê.' nghú tú tai keq." ga pyǐng luí, nhang kat ri.

⁴ Haú nhik gi, e ló mù, hkyô mó yâm mã é hkumdong nàm mã tuí tô é logúng zo radu lé, é myàng kôluí, haú lé tuí hpyi nyi akô.

⁵ Haú hkûn, haú mã yap tô é bang ra-am gi, "Haí mù, logúng tuí hpyi nyi akô lúh?" ga myí akô.

⁶ Haú jáng, yhangnhik gi, Yesuq pyǐng kat é eq rajung za tai kyo kôjáng, yhangmoq gi, she ló rá ahkáng byí kat akô nghut ri.

⁷ Yhangnhik, logúng zo haú lé Yesuq chyáng she jé lo é hkûn, logúng hau é gǔng htoq má, yhangmoq é buhǐng pé buí jáng, hau é ahtoq má, Yesuq doq jǐ ri.

⁸ Byù myo myo gi, yhangmoq é buhǐng pé lé, hkyô má hkyut hkang byí akô; ra-am gi, yò pé mã zân yu é mhandǐng lé hkang byí akô nghut ri.

⁹ Hí mã so bang eq htàng mã châng é bang gi,

"Hosana!"*

Haú Yhumsǐng é myǐng mai jé lé lô Sû gi, hkungsô wó nyí sháng gaq ô!

¹⁰ Jé lé lô rá nghut é, nga-nhǔng é íwa Dawiq é mingdán gi, hkungsô wó nyí sháng gaq ô!

Htoq tsáng myhàng mã hosana nghut sháng gaq ô!*

¹¹ Yesuq gi, Yerusalem wà mó mã jé mù, noqkuq yhùm mã wang é luí, lhǐnghkyuq mã é jung hkangmó lé wú ri; nghut kôlháng, buí gyum ló bê nghut é yanmai, Yhâng é chángzo raxe í yuq eq rahá, Behtani wà shut htoq e ló bekô nghut ri.

Maihpáng Gâm Ashi A Zui Râ Matú Tai É Hkyô

Mht 21:18-19

¹² Hau htang nyí, yhangmoq, Behtani wà mai htoq ló kô é hkûn, Yesuq gi, zo mut bê nghut ri.

¹³ Yhang gi, ahaq wúm é maihpáng gâm ragàm lé, we we mai byu-myang kat jáng, agàm haú mã ashí zui lhê laq ga é jé wú le, ahaq mai lai luí, haí le a myàng nghut ri. Haí mù gá le, maihpáng-shi zui yâm a nghut é yanmai nghut ri.

* **11:9** Hebre dang má, *hosana* gâ é gi, "ahkuí hkyi yù laq" gâ é nghut lhê. Nghut kôlháng, bun zo 9, 10 má gi, hkya-on dang dǒng chung é nghut lhê. ☆ **11:10** Hkya-on 118:25-26

14 Haù mù, Yesuq gi, shigâm haù lé, "Ahkuí mai gi, náng chyáng mâ é ashi, ó yuq le a myàng zo lo kó sháng gaq." ga taí ri. Yhâng é chángzô pé gi, haù su ga taí é dang lé wó gyô yu akò nghut ri.

Yesuq, Noqkuq Yhûm Lé Lhoq Sansêng Pyâm É Hkyô
Mht 21:12-17; Luk 19:45-48; Yhn 2:13-22

15 Yhangmoq, Yerusalem wà mó má jé é hkûn, Yesuq gi, noqkuq yhûm má wang ê mù, haù mâ é zè ung zè wui kut nyi é bang lé, hkat htoq pyám luí, ngùn htaí zo bâng é siboí pé eq hpûngkyui ung zo bâng é tanghkuq pé lé tu mhuq pyám byi ri.

16 Hau htoq agó, Yhang gi, ó yuq lé nghut kôle, ung zè lé noqkuq yhûm mai a waq lai nhâng kut pyâm ri.

17 Yesuq, yhangmoq lé mhoqshit é gi,

"Ngá yhûm gi, byù myù lhunglhâng bâng é matú, kyûdung yhûm ga râ nghut lhê."[☆]

ga kâ tô é a nghut kó lhu? Nghut kôlhang, nungmoq gi, 'damaq hkyûng' kut pyám bekô nghut ri." gâ ri.[☆]

18 Hkyangjong agyi pé eq tará sará pé gi, haù lé wó gyo kômù, Yhang lé hkâsu kut wó sat pyám râ hkyô ho nyi akò; nghut kôlhang, shiwa byu pé gi, Yhang mhoqshit é hkyô má, myit zìng zuq bùm kô é yanmai, yhangmoq gi, Yhang lé gyuq bum akò nghut ri.

19 Myinhâng jé jáng, Yesuq eq Yhâng é chángzô pé gi, wà hkaù mai htoq ló bekô nghut ri.

Maihpáng Gâm Nyhuí Shi Byuq É Hkyô
Mht 21:20-22

20 Htang napkyó, yhangmoq sô lai ló le, maihpáng gâm gi, amyit mai yhang nyhuí kyuuq shi byuq é lé myang akò.

21 Petruq gi, myit bún kat luí, "Rabai é, wú aq! Nàng nhîng pyâm é maihpáng gâm gi, nyhuí shi byuq bê nghut ri." ga luí, Yesuq lé taí ri.

22 Haù hkûn, Yesuq gi, "Garai Gasang lé lumjîng keq.

23 Ngò, nungmoq lé teng za taí kôlé, ó yuq nghut kôle, i-myit má úng-âng é hkyô a bo é za, yhumsîng taí é hkyô gi, dut lò râ nghut lhê ga lumjîng kô é nghut le gi, bùm shí lé, 'Htot mù, wuimau má ló gyó wàng aq.' ga taí le lhâng, haù hkyô dut byi râ nghut lhê.

24 Haù mù luí, Ngò, nungmoq lé taí kôlé, nungmoq haí dîng le le wó yù râ nghut lhê nghù lumjîng kô é nghut le gi, wó yù kó rà za nghut lhê.

25 Mauhkûng htoq má é nungmoq é Íwa gi, nungmoq é mara lé hkyut pyám byi sháng gaq, nungmoq gi, kyûdung yap tô é hkûn lé, rayuq yuq, nungmoq lé shut é mara bo é nghut jáng, mara hkyut pyám byi keq;

26 (Nghut kôlhang, nungmoq mai mara a hkyut pyám byi é nghut le gi, mauhkûng htoq má é nungmoq é Íwa le, nungmoq é mara lé hkyut pyám byi rà a nghut.)" ga tù taí ri.[†]

Yesuq É Ahko Ahkáng Lé Myi Chyam É Hkyô
Mht 21:23-27; Luk 20:1-8

²⁷ Yhangmoq, Yerusalem wà mó má dum jé mù, Yesuq gi, noqkuq yhùm wàng hkaũ má sô yông wún é u lé, hkyangjong agyi pé, tarâ sará pé eq suwún wuĩ gi, Yhâng chyáng lé jé kômù,

²⁸ "Hai ahko ahkâng èq, Nàng, shí pé lé kut nyi lê lú? Haũ su kut râ ahko ahkâng, Nang lé ó yuq byĩ é lú?" ga myĩ akô.

²⁹ Haũ jáng, Yesuq gi, "Ngò le, nungmoq lé rajung myĩ wú kôlé, tũ taĩ wú keq; haũ hkũn, hai ahko ahkâng èq, Ngò, shí pé kut é hkyô lé taĩ kyo râ nghut lê.

³⁰ Yohan byĩ é baptisma gi, mauhkũng mai lú? A nghut jáng, byu chyáng mai lú? Taĩ wú keq!" ga taũ myĩ kat ri.

³¹ Haũ hkũn, yhangmoq chôm hpyè lhum kô é gi, "'Mauhkũng mai nghut lê' nghũ nga-nhúng taĩ jáng le, 'Haũ nghut le nhing, hai mù, yhang lé a lumjǐng kô é lú?' ga râ nghut;

³² 'Byu chyáng mai nghut lê.' nghũ jáng le..." gâ ri. (Yohan gi, myiqhtoi rayuq gè gè nghut lê ga, lhunglhâng bang lumjǐng bũm kô é yanmai, yhangmoq gi, haũ byu pé lé gyuq bum akô nghut ri.)

³³ Haũ mù, yhangmoq gi, Yesuq lé, "Ngamoq a sé." ga tũ taĩ akô.

Haũ hkũn, Yesuq gi, "Haũ jáng, Ngò le, hai ahko ahkâng èq shí pé kut é hkyô lé, nungmoq lé a taĩ kyo." ga, yhangmoq lé taĩ ri.

12

Tsibiyiq Hkyâm Saĩ Bang Lé Dangtú Yu É Hkyô Mht 21:33-46; Luk 20:9-19

¹ Hau htâng, Yesuq, dangtú dông yhangmoq lé taĩ é gi, "Byũ rayuq gi, tsibiyiq hkyâm rahkyam saĩ to mù, lhinghkyuq kyâm to luĩ, tsibiyiq wing pyik htoq râ donghkong dú to mù, machya ralhum saĩ tô ri. Hau htâng, yhang gi, hkyâm haũ lé, hkyâm saĩ zo bâng chyáng ngho byĩ to mù, gó ming shut e ló byuq bê nghut ri.

² Kyôshu yoq jé jáng, yhang gi, yhang yũ âng é tsibiyiq shi ê yũ râ matú, dui-nhâng zoshâng rayuq lé, hkyâm saĩ zo bâng chyáng nhang kat ri.

³ Nghut kôlhâng, haũ bang gi, haũ yuq lé lhom chyup bat luĩ, loq kôm taũ nhang kat akô.

⁴ Haũ mù, yhang gi, gotũ dui-nhâng zoshâng rayuq lé, yhangmoq chyáng dum nhang kat ri; yhangmoq gi, haũ yuq lé le, ulhum má lhom bat cheq byi kôluĩ, hoq lhoq hpũ kat akô nghut ri.

⁵ Hau htâng, rayuq lé dum nhang kat jáng, haũ yuq lé gi, lhom sat pyâm akô; Yhang gi, góbang myo myo lé le, yhangmoq chyáng nhang kat ashĩ nghut ri; yhangmoq kúm gi, ra-am lé lhom bat, ra-am lé lhom sat pyám, kut akô nghut ri.

⁶ Ló htáng má, yhang gi, yhang chyitdap é zo lé nhang kat râ za ru nghut alô; haũ mù, yhang gi, 'Ngá zo lé gi, yhangmoq lhom hkungga kó râ nghut lê.' ga, yhangzo lé nhang kat ri.

⁷ Nghut kôlhâng, haũ bang gi, 'Shí yuq gi, silí wunlí sing yũ râ sũ nghut lê; lé keq, yhang lé sat pyám sháng, haũ jáng sheq, silí wunlí pé lé nga-nhúng wó yũ râ nghut lê.' ga rayuq eq rayuq taĩ lhum bum akô.

⁸ Haũ mù, yhang lé chyup yũ luĩ, sat pyám mù, hkyâm shinggan shut dú htoq pyâm akô nghut ri.

⁹ Haù jáng, tsibiyiq hkyâm yhumsîng gi, yhangmoq lé hkâsu kut râ lúh? Yhang gi, é mù, haù hkyâm saí zo bang lé sat pyâm luí, hkyâm haù lé, góbang lé htot ngho byí pyâm râ nghut lhê.

¹⁰ Chyúmdang má,

'Yhùm saí bâng èq hkyin htoq pyâm é luqgok gi, htungchyûn mâ é ahkyak dik é luqgok dut bê.

¹¹ Shí hkyô gi, haù Yhumsîng kut é nghut luí, nga-nhûng é myoq hí má mauhpo dut bê nghut ri.' ga bò tò é lé, nungmoq a nghap wú kó lúh?''[☆] gâ ri.

¹² Hau htâng, yhangmoq gi, dangtú haù, yhangmoq lé lhoq ang luí taí é hkyô lé, sé kô é yanmai, Yhang lé chyup yú râ matú hkyô ho nyi akô. Nghut kôhang, yhangmoq gi, byù moq mó lé gyuq kô é yanmai, Yhang lé nyhi pyâm to luí, htoq ló byuq bekô nghut ri.

*Kehtaq * Lé Kang Kat Byí É Hkyô*

Mht 22:15-22; Luk 20:20-26

¹³ Hau htâng má, yhangmoq gi, Yesuq é dang má mara hô luí Yhang lé chyup yú râ matú, Hparishe pé ra-am eq Herut é byu pé ra-am lé, Yesuq chyáng nhang kat akô.

¹⁴ Haù bang gi, Yhâng chyáng lé jé kômù, "Sarâ é, Nàng gi, tengmán sù nghut é lé, ngamoq sê lhê. Nàng gi, ó haí ga râ lé le haí su a ngàm sù nghut é yanmai, ó yuq é myoqdong lé le a tê byí é za, Garai Gasâng é hkyô lé, tengmán é dông mhqshít é sù nghut ri. Haù mù, Kehtaq lé kang kat byí le gi, ge lhê lúh?

¹⁵ Ngamoq kat ra râ lúh? A kat ra râ lúh?" ga Yhang lé taí akô.

Yesuq kúm gi, yhangmoq, gegùn labyoq kut nyí kô é lé sé mù, "Nungmoq gi, haí mù, Ngo lé lé chyam wú akô lúh? Denari ngùn rachap yu lé keq, ngó wú wú bá." ga taí kat ri.

¹⁶ Haù hkûn, yhangmoq yu jé lô jáng, Yhang gi, "Shí má, ó yuq é alhô eq masat laiká dap tô ri lúh?" ga myí ri.

Yhangmoq gi, "Kehtaq é nghut ri." ga tû taí akô.

¹⁷ Haù mù, Yesuq gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga taí jáng, yhangmoq gi, maú byuq bùm bekô nghut ri.

Saduke Pé, Yesuq Lé Myí Chyam É Hkyô

Mht 22:23-33; Luk 20:27-40

¹⁸ Haù dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myí akô.

¹⁹ Yhangmoq myí kô é gi, "Sarâ é, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmang é awut ashín xoq byi râ matú, yhâng rhat lé chui gon ra râ nghut lhê ga, nga-nhûng lé, Mosheq kâ to byí ri.

²⁰ Hí hpyang lé, gumang nhiktâng wui nyhit yuq nyi akô. Lagám yuq gi, myiwe yù luí, zo dù a dap é za shi ló byuq bê nghut ri.

²¹ Lanong yuq gi, yhangmang mó é chui lé gon mù, zo dù a dap é za shi ló byuq bê. Lalaq yuq le, haù eq rajung za dut byuq bê nghut ri.

²² Haù nhiktâng wui nyhit yuq gi, zo dù a dap é chyat shi ló byuq bùm bekô nghut ri. Htâng má, myiwe myhí haù le châng shi ló byuq bê nghut ri.

☆ 12:11 Hkya-on 118:22-23

* 12:12 Kehtaq gâ é gi, "hkoséng" gâ é nghut lhê.

23 Haù mù luí, haù dum dui toq é buinyì má, myiwe myhí haù gi, hká yuq é yhangmyi nghut rá lúh? Hkâsu mù gâ le, yhang gi, haù nyhit yuq é yhangmyi dut wú bê sù nghut ri." gâ akô.

24 Yesuq gi, yhangmoq lé, "Nungmoq hkyô nghoq é gi, Chyúmdang eq Garai Gasâng é wum-o a-tsam lé, a sé kô é yanmai nghut lhê, a nghut kó lúh?"

25 Haù shi byuq bê bang dum dui toq é hkûn gi, myi byi myi yú hkyô joq lo rá a nghut; yhangmoq gi, mauhkûng htoq má é maumang lagyô pé su dut byuq kó rá nghut lhê.

26 Shi é mai dum lhoq dui toq é hkyô eq séng luí, Mosheq kâ tô é laiká má lhang, haù nyé duq nyi é mhanpúng mai, Garai Gasang gi, yhang lé, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.'* ga kâ tô é lé, nungmoq a nghap wú kó lúh?

27 Garai Gasang gi, shi bê bâng é Garai Gasang a nghut, dui nyi bâng é Garai Gasang sheq ru gi nghut lhê. Nungmoq gi, shut dik bekô nghut ri." ga taí ri.

Ahkyak Dik É Jep É Tarâ

Mht 22:34-40; Luk 10:25-28

28 Tarâ sará rayuq gi, lé lô mù, yhangmoq taí htíng lhum nyi kô é lé, lé wó gyô ri. Yhang gi, haù bang lé, Yesuq rago tú taí nyi é lé myàng jáng, Yesuq lé, "Jep é tarâ banshoq má, hká lhum gi, ahkyak dik lhê lúh?" ga myí ri.

29 Haù jáng, Yesuq gi, "Ahkyak dik é jep é tarâ gi, 'Israelaq byu pé é, gyo wú keq! Nga-nhúng é Yhumsíng Garai Gasang za, Garai Gasang nghut lhê.

30 Haù Yhumsíng náng é Garai Gasang lé, náng é myit nhiklhum banshoq, náng é asak woi-nyí lhum gón, náng myit é hkyô banshoq, náng é wum-o banshoq èq, chyitdap rá lhê.* gâ é nghut lhê.

31 Hau htang lhum gi, 'Náng gùng lé náng chyitdap é su, náng é chyangnâm má é bang lé le chyitdap aq.* gâ é nghut lhê. Shí í lhùm htoq kô é tarâ gotú a joq lo." ga yhangmoq lé tú taí ri.

32 Haù hkûn, tarâ sará haù yuq gi, "Gyo naù bê, Sará é! Garai Gasang rayuq za nghut lhê, gotú a nyi lo ga náng taí é gi, têng ri.

33 Garai Gasang lé, náng é myit nhiklhum banshoq èq le, náng é sê gyo é nyan banshoq èq le, náng é wum-o banshoq èq le, chyitdap rá lhê gâ é eq, náng gùng lé náng chyitdap é su, náng é chyangnâm má é bang lé le chyitdap rá lhê gâ é gi, myi nyhé hkungga eq gotú hkungga pé banshoq htoq má, je ahkyak lhê." ga taí ri.

34 Yesuq gi, yhang hpaqchyí bo é dông tú taí nyi é lé myàng jáng, "Nàng gi, Garai Gasâng é mingdán eq a we lo nghut ri." ga yhang lé taí kat ri. Haù hkûn mai gi, ó yuq le, Yhang lé dangmyi a wám myi lo kó nghut ri.

Hkrisduq Gi, Ó Yuq É Yhangzo?

Mht 22:41-46; Luk 20:41-44

35 Yesuq, noqkuq yhùm má mhoqshit nyi é hkûn lé taí é dang gi, "Haí mù, haù tarâ sará pé gi, Hkrisduq lé, Dawiq é yhangzo za nghut lhê gâ akô lúh?"

36 Dawiq gi, Chyoiyúng Woi-nyí èq taí nhang é má, 'Haù Yhumsíng Garai gi, ngá é Yhumsíng lé, "Ngò, náng é gumlau gye pé lé, náng é hkyiwa ô má tô pyâm é hkyíng jé shoq, Ngá é loqyo hkyam shut zung nyi shi aq." ga taí ri.* gâ ri.

37 Haù mù, Dawiq yhang lhang, Hkrisduq lé, Yhumsing gà é nghut le gi, yhangzo za hkásu ge nghut râ lú?" gà ri.

Byù hpung mó gi, Yhang é dang lé, gabú myit eq gyô nyi bum akô nghut ri.

38 Yesuq gi, mhoqshit uchyang tai é má, "Tarâ sará pé lé sidiq nyi keq. Yhangmoq gi, réng é buhng wut chng mù, sô yong wún lui, gai pé má lhom shi-kyâm yù râ lé le,

39 tarajong pé má é ahkyak dik é zung jang pé eq poi pé má é réng é zung jowò pé má myang zung râ lé le, ô nau nyi bum akô.

40 Yhangmoq gi, chuimó pé é yhum-yò pé lé hpyoq zo hpyoq shuq kôlui, kyù hing hing dung shit mhaù é bang nghut akô. Haù su é bang gi, dam byi é je riyhang hui zo kô râ nghut lhê." gà ri.

Chuimó Myhi Kat É Alu Ngùn *Luk 21:1-4*

41 Yesuq gi, alu sidek nam má zung to mù, noqkuq yhum mâ é alu sidek haù má, byù moq mó ngùn kat nyi é lé wú nyi ri. Sút wô bang myo myo gi, ngùn ga-myhó myhó kat bum akô.

42 Haù hkùn, myung é chuimó myhi rayuq gi, lé mù, gyi htingchap ngùn zo í chap lé kat ri.

43 Yesuq gi, Yhang é changzô pé lé wut yù mù, "Ngò, nungmoq lé teng za tai kôlé, shi myung é chuimó myhi gi, góbang banshoq htoq má je myo kat bê nghut ri.

44 Haù góbang banshoq gi, yhumsing agùn agó wó é má é lé, lé kat akô; yhang kúm gi, myung sù nghut kôle, yhang é asak lé baù râ ngùn banshoq lé, kat bê nghut ri." ga tai ri.

13

Ló Htang Buinyi Má Dut Lò Râ Hkyô *Mht 24:1-21, 29-35; Luk 21:5-33*

1 Yesuq, noqkuq yhum mai htoq lô é hkùn, Yhang é changzo rayuq gi, "Sarâ ê, wú aq; hkâ-í ko é luqgok pé! Hkâ-í hkik é yhum pé!" ga Yhang lé tai kat ri.

2 Haù hkùn, Yesuq gi, "Nàng, yhum mó shi pé lé myang lhê a nghut lú? Luqgok shi pé gi, rachâm htoq racham lhang a kê lhum loshoq, hpyoq hpyi pyâm é hui râ nghut lhê." gà tú tai ri.

3 Yesuq gi, Tsanlun Bùm má, noqkuq yhum shut hù mù zung tô é hkùn, Petruq, Yakuq, Yohan eq Andre pé gi, Yhang chyáng lé je kômù,

4 "Haù hkyô pé gi, hkâ-nhâm dut lò râ lú? Haù dut lò râ hkùn, hkasù é kumlhá htoq lô râ nghut lhê lú? Ngamoq lé tai kyô wú laq." ga Yhang lé baù myi akô nghut ri.

5 Haù mù, Yesuq gi, yhangmoq lé, "Nungmoq lé, ó yuq eq le a wó shui nghoq shang gaq, sidiq nyi keq.

6 Hkásu mù gà le, 'Ngò gi, haù yuq* nghut lhê.' ga, Ngá mying lé lang é byù myo myo pô htoq lô mù, byù myo myo lé shui nghoq kô râ nghut lhê.

7 Nungmoq gi, majan dut nyi é hkyô eq majan eq sêng é danglám pé lé, wó gyo kôjáng, hkâgyuq dân kô. Haù hkyô pé gi, dut lò râ za nghut lhê; nghut kôlhang, lò htang é buinyi gi, a nghut shi.

* 13:6 Haù yuq gà é gi, Hkrisduq lé gà é nghut lhê.

⁸ Byù ra-myû eq ra-myû, mingdán ralhùm eq ralhùm majan zân lhùm lò kó rà nghut lhê. Jowò myo myo má, layàng nún é, mutmó gyó é pé dut lò rà nghut lhê. Haú pé gi, wuîhke jamjau hkyo é apûn awang za ru nghut ashî.

⁹ Nungmoq giing nungmoq sidiq nyi keq. Hkâsu mù gà le, yhangmoq gi, nungmoq lé, tarâ rûng pé má ê ap pyám kó rà nghut é htoq agó, tarajong pé má nungmoq lé nhuq bat kó rà nghut lhê. Hau htoq agó, nungmoq gi, Ngá mying é yanmai, mauzau wuî eq hkohkam pé é hí má, saksé dõng yap ra kó rà nghut lhê.

¹⁰ Haú gabú danglù gi, amyû banshoq lé hí hko kyo ra rà nghut lhê.

¹¹ Nungmoq gi, chyup yu é hui luî, jep huî é hkûn, haî taí rá lé, hkâ-myit chiq kó. Ahkyíng jé jáng, nang lé myit htoq lô nhang é dong za taí aq; hkâsu mù gà le, dang haú pé gi, nungmoq taí é a nghut, haú Chyoiyúng Woi-nyí èq taí nhang é ru nghut lhê.

¹² Nhiktâng gi, nhiktâng yhangchang, îwa gi, yhangzo lé, shî shoq ap pyâm lhùm kó rà nghut lhê; zo wuî gi, mó wuî lé gumlau toq mù, sat pyám nhâng kó rà nghut lhê.

¹³ Byù lhunglhâng bang gi, Ngá é yanmai, nungmoq lé a nguì kut kó rà nghut lhê; nghut kôlhâng, jihtûm jé shoq wó hkam jân nyi é sù gi, hkyi yu é hui rá nghut lhê.

¹⁴ 'Haú lhoq hten lhoq hpyoq é achao achyut hkyô'✧ gi, yhang a nyi âng é jowò má yap tô é lé, nungmoq myàng kôjáng (laiká nghap é sù gi, sê gyo sháng gaq), Yuda mau má nyi é bang gi, bùm pé shut hfang doq lô kó sháng gaq.

¹⁵ Yhumhkûng htoq má nyi tô é sù gi, yhúmhaû mã é zè haî lé le, a ló gyó wang yù lo sháng gaq.

¹⁶ Yò má nyi tô é sù gi, yhâng é buhîng lé a ló taû yu nyi lo sháng gaq.

¹⁷ Haú buinyi pé má, zogùng dut é myiwe wuî eq naú huq ashî nghut é ìnu wuî gi, hkâ-í yhang wuîhke bekó nghut ri myhi-nhung.

¹⁸ Haú hkyô gi, gyoqmyò má a dut sháng gaq, kyûdùng nyi keq.

¹⁹ Hkâsu mù gà le, Garai Gasang, mingkan lé hpan tô é hkûn mai ahkuî jé shoq, hkâ-nhám le a dut wú shí é wuîhke jamjau mó gi, haú buinyi pé má dut lò rà nghut lhê; haú su é hkyô gi, htàngnùng mã hkâ-nhám le dum dut lo rà a nghut.

²⁰ Buinyi haú pé lé, haú Yhumsing Garai mai a lhoq shaû é nghut le gi, ó yuq le asak wó lut rá a nghut. Nghut kôlhâng, Yhang hkyin yù bê nghut é, hkyin yù hui bâng é matú gi, buinyi haú pé lé, Yhang lhoq shaû pyám byi bê nghut ri.

²¹ Haú ahkyíng má, byù rayuq yuq mai, nungmoq lé, 'Wú keq, shî má Hkrisduq nyi ri.' ga le, 'Wú keq, Yhang hê má nyi ri.' ga le, taí jáng, nungmoq hkâjáng kó.

²² Hkâsu mù gà le, Hkrisduq apyoq pé eq myiqhtoi pyoq pé pò htoq lô mù, wó dut é nghut jáng, hkyin yù hui bang lé lháng, wó lhoq nghoq shoq ga, kumlhá pé eq laklaí kumlhá pé lé kut shit kó rà nghut lhê.

²³ Haú mù, nungmoq sidiq nyi keq; ahkyíng a jé shi mai, ngò, nungmoq lé, jung hkangmó taí kyô nyi gù nghut lhê.

²⁴ Buinyi haú pé má, wuîhke jamjau haú pé lai é htàng, 'Buî gi, noq byuq mù, lhamó gi, a tsô dut byuq rá nghut lhê;

✧ 13:14 Dan 9:27; 11:31; 12:11

²⁵ kyí pé gi, mauhkûng mai byit gyó lo bùm mù, mauhkûng mâ é wum-o a-tsam pé gi, lhoq nhûn é huí bùm kó rá nghut lhê.^{1*}

²⁶ Haú hkûn, haú Byu Yhangzo gi, mhut ji mù, hpungwup a-tsam mó eq le, hpungwup shingkang eq le, gyó lé lo é lé, byu pé byu-myàng kó rá nghut lhê.

²⁷ Hau htâng má, Yhang gi, Yhâng é maumang lagyô pé lé nhang kat mù, maumyí chyûn hkgangmó eq myigùng htum shoq, mauhkûng htâng shoq mai, Yhang hkyin yu tô é bang lé shuí tsing yù nhâng rá nghut lhê.

²⁸ Maihpáng gâm lé wú mù, mhoq yú keq; agàm mai a-nyuq nyún lô mù, ahaq htut lô jáng, bui nyé nám chyâng lò bê lé, nungmoq sê lhê.

²⁹ Haú eq rajung za, shí hkyô pé dut nyi é lé, nungmoq myàng kôjáng, Yhang gi, chyáng bê nghut mù, hkúmdong má lháng nghut nyí bê hkyô lé, nungmoq sé lo keq.

³⁰ Ngò, nungmoq lé teng za taí kôlé, shí pyat má é byu pé a ban shi byuq shimá, haú hkyô pé banshoq dut byuq rá nghut lhê.

³¹ Mauhkûng eq myigùng gi, a joq lo dut byuq rá nghut lhê; nghut kôlhang, Ngá é dang gi, ru joq nyí rá nghut lhê.

Haú Buinyi Eq Ahkyíng Lé, Ó Le A Sé

Mht 24:36-44

³² Buinyi eq ahkyíng haú lé gi, ó yuq le a sé; mauhkûng htoq mâ é maumang lagyô pé lháng a sé; haú Zo le a sé; haú Íwa za ru sê lhê.

³³ Haú mù, nungmoq gi, ahkyíng haú hkâ-nhám jé rá lé, a sé kô é yanmai, sidiq nyi keq! Machya nyi keq!

³⁴ Haú gi, byù rayuq, yhâng é dui-nhâng zoshâng wui lé, ó le ó eq sêng é mù lé gâm byí to mù, hkum zúng sù lé le, machya nyi rá matú pying to luí, yhâng yhûm lé, haú dui-nhâng zoshâng wui chyáng ap pyám to mù, byin we shut htoq ló byuq é sù eq pung ri.

³⁵ Haú mù, haú Yhumsing hpó gi, myinhâng laq, myín gunggàm laq, woqtún hkun laq, maubó zó laq, hkâ-nhám jé lô rá lé nungmoq a sê kô é yanmai, sidiq machya nyi keq.

³⁶ Haú a nghut jáng, Yhang, dân loq tung tau jé lo é hkûn, nungmoq yhup myhí tô é lé, lo myang pyám rá nghut lhê.

³⁷ Ngò, nungmoq lé, 'sidiq machya nyi keq,' nghú taí é eq rajung za, yuq hkgangmó lé le, taí é nghut lhê." ga taí ri.

14

Yesuq, Xú But Byi Huí É Hkyô

Mht 26:1-16; Luk 22:1-6; Yhn 11:45-53; 12:1-8

¹ Ahkuí, haú Lhoqlhai Poí eq múnchi a kat é Muk Zo Poí jé rá í nyi za ru ra alò hkûn, hkyangjong agyi pé eq tará sará pé gi, Yesuq lé hkâsu kut wó haq chyup yú mù, sat pyám rá matú, hkyô ho nyi akò nghut ri.

² Nghut kôlhang, yhangmoq gi, "Byu pé gabyông lô kó abe, poí gyoro má gi, a kut shi sháng." ga taí akò.

³ Yesuq gi, Behtani wà má nyi é manggâm dap wú sù Simûn é yhûm, siboi má nghe zung tô é hkûn, myiwe myhí rayuq gi, nardu amyit mai za saí yu é, gyai hpaú é namngón xú bo é alabasta (luq hpyú) bòng yu lé lô mù, bòng haú lé llang hkyui luí, namngón xú haú lé Yesuq é ulhum má hut gyun byí ri.

* 13:25 Esai 13:10; 34:4

4 Haú má nyi tô é bang ra-am gi, wú nhik-yô é myit èq, rayuq eq rayuq tai lhum kô é gi, "Hái mù, namngón xù lé aha agó kut pyâm lê laq?

5 Haú namngón xù lé, denari* sùm sho èq ung luí, myùng bang lé byí le ge lê mhai!" gâ akô. Yhangmoq gi, myiwe myhí hau lé le, gyai chôm tân akô.

6 Nghut kôlhang, Yesuq gi, yhangmoq lé, "Myiwe zo haú lé, hkâtân nyi kô; hái mù, yhang lé i-myt lhoq myo nhang nyi akô lúh? Yhang gi, Ngá é ahtoq má ge é hkyô kut bê nghut ri.

7 Haú myùng bang gi, nungmoq eq rahá hkâ-nhám le nyi rá nghut lê mù, nungmoq garúm nau é hkûn, yhangmoq lé wó garúm lê. Nghut kôlhang, ngò gi, shí má nungmoq eq rahá ayang nyi nyi rá sù a nghut.

8 Yhang gi, yhang wó dut é í kut bê nghut ri. Yhang, Ngá gùng má, namngón xù hut gyún é gi, Ngá gùng lé yhum rá matú, hí hen lajáng tô é ru nghut lê.

9 Ngò, nungmoq lé teng za tai kôlé, haú gabú danglù lé mingkan gón hko kyô é jowó hkangmó má, yhang lé myit bûn é dông, yhang kut é hkyô shí lé, tai kyo bekô rá nghut lê." ga tai kyo ri.

10 Hau htâng, haú chángzo raxe í yuq má bo é Yudaq Iskarut gi, Yesuq lé ap pyâm rá ga, hkyangjong agyi pê chyáng e ri.

11 Haú bang gi, haú hkyô lé lhom wó gyo kôjáng, gyô gabú luí, yhang lé ngùn byi rá ga, danggidiq byí akô. Haú mù, yhang gi, Yesuq lé ap pyâm rá hkyô ho nyi bê nghut ri.

Yhumsing É Myinzang

Mht 26:17-30; Luk 22:7-23; Yhn 13:21-30

12 Haú htungli joq é eq rajung za, Lhoqlhai Poí hkungga sauzo jaú byí é, múmchi a kat é Muk Zo Poí sâng-hi nyí má, Yesuq é chángzô pé gi, Yesuq lé, "Nàng zo rá Lhoqlhai Poí lé, ngamoq hkâmá é món to rá lúh?" ga myí akô.

13 Haú mù, Yhang gi, chángzo í yuq lé, "Nungnhik, myuq hkaú shut wang ló keq, wui yambú waq é byú rayuq lhom hui rá nghut lê; haú hkûn, nungnhik gi, yhâng htâng cháng keq.

14 Haú yuq, wang ló é yhùm mâ é yhumsing lé, 'Ngò, Ngá é chángzô pé eq rahá, Lhoqlhai Poí lé zo rá bíng wap hkâmá nghut lê lúh ga, Sará myí nhang kat ri.' nghú tai keq.

15 Haú hkûn, hen to gú nghut é, ahtoq má é wap mó lé lhom tân shit rá nghut lê. Wap haú má, nga-nhùng é matú ê hen to keq." ga tai luí, nhang kat ri.

16 Chángzo haú nhik gi, htoq e ló mù, myuq hkaú má wang e ló le, Yesuq tai kat é eq roq za é myâng kômù luí, Lhoqlhai Poí lé, món to bekô nghut ri.

17 Myinhâng jé lô jáng, Yesuq gi, haú chángzo raxe í yuq eq rahá, haú má lé jé bekô nghut ri.

18 Yhangmoq gi, siboí má nghê mù, zô nyi bùm kô é u lé, Yesuq gi, "Ngò, nungmoq lé teng za tai kôlé, Ngò eq rahá zô nyi é bang nungmoq má é rayuq sù gi, Ngò lé ap pyâm rá nghut lê." ga tai ri.

19 Haú hkûn, yhangmoq gi, gyô yón kômù, rayuq htâng rayuq, "Ngò, a nghut hkaí?" ga Yhang lé myí akô.

20 Haú hkûn, Yhang gi, "Haú yuq gi, haú raxe í yuq má é rayuq nghut lê. Ngò eq rahá, hkoq shí má muk jùmzo sù nghut lê.

* 14:5 Denari rchap gi, byú rayuq é ra-nyí lê é zuihpau eq wui ri.

²¹ Haú Byu Yhangzo gi, Yhang eq séng luí kâ tô é eq rajung za, shí râ za nghut lhê. Nghut kôlhang, haú Byu Yhangzo lé ap pyâm é sù gi, dingnyé wó ri; haú yuq gi, a hku lé le lhang, je ge ri.

²² Yhangmoq zo nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, "Shí gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byí ri.

²³ Hau htâng, Yhang gi, góm lé le, yù mù, jeju hkya-on luí, yhangmoq lé byí ri; yhangmoq banshoq bang gi, haú lé yù shuq akô nghut ri.

²⁴ Yesuq gi, yhangmoq lé, "Shí gi, byù myo myô é matú htoq pyâm é, dangshikaq eq séng é Ngá sui nghut lhê.

²⁵ Ngò, nungmoq lé teng za taí kôlé, Ngò, Garai Gasâng é mingdán má, tsibiyiq wing asik lé shuq é buinyi a jé jé, tsibiyiq wing lé dum shuq râ a nghut lo." ga taí ri.

²⁶ Yhangmoq gi, hkya-on mahkôn ralhüm ban hkôn jáng, Tsanlun Bùm shut htoq é ló bekô nghut ri.

Petruq He-ngik Râ Hkyô Lé, Te Taí É Hkyô
Mht 26:31-35; Luk 22:31-34; Yhn 13:36-38

²⁷ Yesuq gi, yhangmoq lé, "Nungmoq lhunglhang bang gi, myit lingbat kó râ nghut lhê; hkâsu mù gâ le,

'Haú sau zúng sù lé, Ngò bat sat pyám mù, sau pé gi, lhoq pyo pyâm é hui kó râ nghut lhê.'*
 ga kâ tô ri.

²⁸ Nghut kôlhang, Ngò gi, lhoq dui toq é huí htâng má, Galile mau shut, nungmoq é hí má é ló lánng râ nghut lhê." ga taí ri.

²⁹ Haú hkún, Petruq gi, "Góbang banshoq myit lingbat kôlhang, ngò gi, myit lingbat râ a nghut." ga taí kat ri.

³⁰ Haú mù, Yesuq gi, "Ngò, nàng lé teng za taí lé, hkû-nyí, hkû-myín yhang jáng, woq í dâm a tún shimá, nàng, Ngo lé sum dâm he-ngik pyám râ nghut lhê." ga tú taí ri.

³¹ Nghut kôlhang, Petruq gi, "Ngò, Nàng eq rahá shí râ dut kôlhang, Nang lé ngò he-ngik pyám râ a nghut." ga zuq zuq taí ri. Góbang banshoq le, haú su ga châng taí bum akô nghut ri.

Get-samane Gâ é Jowò Má Kyûdûng É Hkyô
Mht 26:36-46; Luk 22:39-46

³² Yhangmoq gi, Get-samane gâ é jowò má jé ló kômù, Yesuq gi, Yhâng é chángzô pé lé, "Ngò, kyû é dúng nyi é u lé, shí má zùng lánng keq." ga taí ri.

³³ Yesuq gi, Yhang eq rahá Petruq, Yakuq, Yohan pé lé, shuí chùng ri. Haú hkún, Yhang gi, myit gyai a ngón é eq myit wuîhke é hui mù,

³⁴ yhangmoq lé, "Ngò gi, shí râ í yhang myit yón nyi ri; nungmoq gi, machyâ luí, shí má lánng nyí keq." ga taí ri.

³⁵ Yesuq gi, haú mai ratsuí zo sô ê mù, myigùng má gop byên to luí, ahkyíng haú lé ge lhoq lhai pyám byí le gi, Yhâng chyáng mai lhoq lhai pyám byí râ matú,

* 14:27 Zhk 13:7

³⁶ "Aba, † Áwa ê, Nàng gi, haì le wó dut é Sû nghut lhê. Góm‡ shí lé, Ngá chyáng mai yu pyám byi laq. Nghut kôhang, Ngò ô nau é đông a nghut, Nàng ô nau é đông sheq nghut sháng gaq." ga kyûdùng ri.

³⁷ Hau htâng, Yhang gi, Yhâng é chángzô pê chyáng dum taù lo le, yhangmoq yhup myhî to kô é lé lo myang ri. Haù mù, Yhang gi, Petruq lé, "Simun, nàng yhup ngón nyi lhê lúhú? Razup za lháng a wó machya nyi lúhú?"

³⁸ Gunglaù é a hui sháng gaq, machyâ luí, kyûdùng nyi keq. Haù woi-nyí gi, kâm nyi kôhang, gungsho gi, wum nyhôm nyi ri." ga taí ri.

³⁹ Yesuq gi, radàm dum é mù, hí lé dùng é dang lé za, ê dung ri.

⁴⁰ Yhang dum taù lo le, yhangmoq gi, myoqkuq lai kô é yanmai, yhup myhî to lánq kô é lé, lo dum myang ri. Yhangmoq gi, Yhang lé haì taí râ a sé dut byuq akò nghut ri.

⁴¹ Yesuq gi, sum dâm nghû râ lhing má, yhangmoq chyáng dum taù jé lô mù, yhangmoq lé, "Nungmoq gi, ahkuí jé shoq yhup ngón nyi ashí kó lúhú? Gé bê! Haù ahkying gi, jé bê nghut luí, haù Byu Yhangzo gi, yubak dap bâng é loq má ap pyám é hui râ nghut bê.

⁴² Toq keq! Ló losháng hkoi! Ngo lé ap pyám râ sù gi, jé lé lô bê nghut ri." ga taí ri.

Yesuq, Chyup Yû Hui É Hkyô

Mht 26:47-56; Luk 22:47-53; Yhn 18:3-12

⁴³ Yesuq, dang nyo nyi ashí u lé, haù chángzo raxe í yuq má bo é Yudaq gi, haù hkyangjong agyi pé, tarâ sará pé eq suwún wui chyáng mai nhang kat é bang nghut é, shâm eq dumbáng pé chung tô é byù moq mó eq rahá jé lé lo ri.

⁴⁴ Yesuq lé ap pyám râ sù gi, yhangmoq lé, "Ngò bopuq puq é sù gi, haù yuq nghut bê; Yhang lé chyup yû mù, zúng shuí ló keq." ga kumlhá byí to bê nghut ri.

⁴⁵ Yudaq gi, Yesuq chyáng hkyê za ê mù, "Rabai ê." ga taí luí, Yhang lé bopuq puq byí ri.

⁴⁶ Haù hkûn, yhangmoq gi, Yesuq lé chôm zuí zing mù, chyup yû bekò nghut ri.

⁴⁷ Haù mù, nàm má yap tô é byù rayuq gi, yhâng é shâm lé she htoq yû mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁴⁸ Yesuq gi, yhangmoq lé, "Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chùng mù, lé lo akò lúhú?"

⁴⁹ Ngò gi, nyí wui, nungmoq eq rahá nyi luí, noqkuq yhûm má mhoqshit byí nyi kôhang, nungmoq, Ngo lé a chyup yû kô é nghut lhê. Nghut kôhang, Chyúmdang pé gi, dik ra râ nghut lhê." ga taí ri.

⁵⁰ Haù hkûn, haù chángzô pé gi, Yesuq lé tô pyám to kôluí, h pang byo byuq bekò nghut ri.

⁵¹ Buhing za wut é zorâm rayuq gi, Yesuq htâng cháng wún ri. Yhangmoq gi, haù yuq lé, wó kyaq zuí kô é hkûn,

⁵² yhang gi, buhing lé hkyut hkyô pyám to mù, gùngchîn h pang ló byuq bê nghut ri.

Yudaq Byin Tú Wapdoq Má Jéyáng Hui É Hkyô

Mht 26:57-68; Luk 22:54-55, 63-71; Yhn 18:13-14, 19-24

† 14:36 *Aba* gâ é gi, Aramaik dang đông "Áwa" gâ é lichyúm nghut lhê. ‡ 14:36 *Góm* gâ é gi, Yesuq, jamjau hui râ hkyô eq shí râ hkyô lé, taí nau é nghut lhê.

⁵³ Yhangmoq gi, Yesuq lé, hkyangjong mó chyáng shuí e akô; haú hkyangjong agyi pé lhunglhâng bang, suwún wuí eq tarâ sará pé le, lé zup zîng bum akô.

⁵⁴ Petruq gi, hkyangjong mó é yhumwàng hkaú má châng jé wâng shoq, we we mai Yesuq htâng châng tô ri. Yhang gi, haú má, zúng bang eq rahá, myihkyóm yâm má gyoq gang zung tô ri.

⁵⁵ Haú hkyangjong agyi pé eq Yudaq byìn tú wapdoq gón gi, Yesuq lé sat râ saksé hô kôlhâng, haú le a myàng kó nghut ri.

⁵⁶ Byù myo myo gi, a têng é saksé hkám kôlhâng, yhangmoq é dang gi, a tsûng lhum kó nghut ri.

⁵⁷ Hau htâng, ra-am gi, toq yap mù, a têng é saksé hkám kô é gi,

⁵⁸ "Yhang gi, 'Byu loq èq saí é noqkuq yhùm shí lé, Ngò hpyoq hpyi pyám mù, sum nyí gyo ro má, byu loq èq a saí é, gotú ralhum dum saí râ nghut lhê.' ga taí é lé, ngamoq wó gyô ri." ga akô.

⁵⁹ Nghut kôlhâng, yhangmoq é saksé gi, a tsûng lhum kó nghut ri.

⁶⁰ Hau htâng má, hkyangjong mó gi, yhangmoq é hí má toq yap mù, "Nàng, haú le a tú taí luq? Shí bang, Nang lé mara hun nyí é saksé gi, hká dông nghut lhê lú?" ga luí, Yesuq lé myí ri.

⁶¹ Nghut kôlhâng, Yesuq gi, jit le a ga nyi tô ri.

Haú mù, hkyangjong mó gi, Yesuq lé, "Nàng gi, hkungsô wó Su é yhangzo, Hkrisduq nghut lhê lú?" ga dum myí ri.

⁶² Haú hkún, Yesuq gi, "Nghut lhê; haú ngò Byu Yhangzo gi, a-tsam bo dik Su é loqyo hkyam^S má zung tô é lé le, mhuthtui ji mù, mauhkûng mai lé lo é^{*} lé le, nungmoq myàng kó râ nghut lhê." ga taí ri.

⁶³ Haú hkún, hkyangjong mó gi, yhâng é bu lé lâng cheq pyám mù, "Nga-nhúng, hai saksé râ ashí lú?"

⁶⁴ Yhang, Garai Gasang lé rhoi dang taí é lé nungmoq wó gyo bê nghut lhê. Nungmoq hkâsu wó myit akô lú?" ga myí ri; yhangmoq banshoq bang gi, shí gîng sù nghut ri ga, chòm myit huí akô.

⁶⁵ Haú mù, ra-am gi, Yhang lé sôkan byé gyun é eq, myoq má nghop pyám byi luí, loqtsup èq htui byí lhê kut mù, "Nang lé ó yuq htui é, myiqhtoi htoí wú aq." ga taí akô. Haú zúng bang gi, Yhang lé shuí yù mù, nhuq bat akô nghut ri.

Yesuq Lé, Petruq He-ngik Pyâm É Hkyô

Mht 26:69-75; Luk 22:56-62; Yhn 18:1-18, 25-27

⁶⁶ Petruq gi, wàng hkaú má nyi tô é u lé, haú hkyangjong mó é dui-nhâng zoshâng myí rayuq jé lé lo ri.

⁶⁷ Haú yuq gi, Petruq gyoq gang nyi é lé myàng jáng, yhang lé rago wú mù, "Nàng le, Nazaret wà byù Yesuq eq rahá nyi sù nghut ri." ga taí ri.

⁶⁸ Nghut kôlhâng, yhang gi, "Nàng taí é hkyô lé, ngò, sé le a sé, gyo le a sé gyo." ga he pyám luí, wâng hkúmdong shut htoq e ló bê nghut ri.[†]

⁶⁹ Dui-nhâng zoshâng myí haú gi, Petruq lé, haú má dum myàng jáng, awui ayám má yap tô é bang lé, "Shí yuq le, haú hpúng má lom é sù rayuq nghut ri." ga dum taí ri.

^S 14:62 Loqyo hkyam gâ é gi, ahko ahkáng wó é jowò lé gâ é nghut lhê. ^{*} 14:62 Mhuthtui ji mù, mauhkûng mai lé lo é gâ é gi, Danielaq 7:14 má bò lhê. [†] 14:68 Chyúmding ra-am má Haú hkún jáng, woq tân bê nghut ri gâ é bo ri.

⁷⁰ Petruq gi, radàm dum he pyâm ri; hau htâng razup zo má, haû nàm má yap tô é bang gi, Petruq lé, "Nàng gi, Galile byù rayuq nghut é yanmai, haú hpúng mã é byù rayuq hkyak nghut lhê." ga taí akô.

⁷¹ Haú hkûn, yhang gi, yhânggùng yhang nhing luí, "Haú nungmoq taí é byù lé, ngò a sé." ga dakam ri.

⁷² Haú u yhang, woq radàm dum tun kat bê nghut ri. Haú mù, Petruq gi, "Woq í dâm a tûn shimá, nàng, Ngo lé sum dâm he-ngik pyám râ nghut lhê." ga, Yesuq, yhang lé taí é dang lé, myit bûn kat mù, wum kat ngau ri.

15

Pilat Hí Má Yesuq Jé Nyi É Hkyô

Mht 27:1-2, 11-26; Luk 23:1-5, 13-25; Yhn 18:28-19:16

¹ Haú napkyó noq za má, hkyangjong agyi pé gi, suwún wuí, tarâ sará pé, Yudaq byìn tú wapdoq gón bang eq rahá kut, chôm bóng yû kômù, Yesuq lé tuí yû luí, shuí htoq é kômù, mauzau Pilat chyáng é ap byí akô nghut ri.

² Pilat gi, Yesuq lé, "Nàng gi, Yudaq byu pé é hkohkâm nghut lhê lú?" ga myi jáng, Yesuq gi, "Nàng taí é eq rajung za nghut lhê." ga, tú taí ri.

³ Haú hkyangjong agyi pé gi, Yhang lé mara gyai myo shoq chôm hun akô.

⁴ Haú mù, Pilat gi, Yesuq lé, "Wú aq, yhangmoq, nàng lé mara haú myhó hun nyi le, nàng, haí le a tú taí lú?" ga myí ri.

⁵ Nghut kôlháng, Yesuq gi, haí le a tú taí kut jáng, Pilat gi, maú byuq bê nghut ri.

⁶ Haú Lhoqlhai Poí u lé, mingbyû wuí dúng é htóng byû rayuq yuq lé, mauzau mai lhaq lhoq htoq byi byi kut é htúng joq ri.

⁷ Haú hkûn, Barabaq gâ é byù rayuq gi, gumlau gabyông é hkûn, byù sat é gumlau bang eq rahá, htóng gyó tô ri.

⁸ Byù hpúng mó gi, doq lé lô mù, mauzau Pilat lé, yhang lhaq kut é eq rajung za, yhangmoq lé kut byi râ matú, dúng akô.

⁹ Haú mù, yhang gi, "Yudaq byu pé é hkohkâm lé nhang htoq kat byi râ lé, nungmoq ô nau akô lú?" ga myí ri.

¹⁰ Pilat, haú su ga myí é gi, haú hkyangjong agyi pé, Yesuq lé manôn kôluí, yhâng chyáng lé ap byi kô é hkyô lé sê é yanmai nghut ri.

¹¹ Nghut kôlháng, haú hkyangjong agyi pé gi, Barabaq lé sheq nhâng byi râ matú, Pilat chyáng dung kó sháng gaq ga, haú byù moq mó lé i-myit lhoq toq byi akô.

¹² Pilat gi, "Haú jáng, nungmoq mai Yudaq byu pé é hkohkâm ga sù yuq lé, ngò hkâsu kut râ lú?" ga yhangmoq lé myí ri.

¹³ Haú hkûn, yhangmoq gi, "Yhang lé tapzîng má jén sat pyám aq." ga chôm garu akô.

¹⁴ Haú jáng, Pilat gi, "Haí mù luí lú? Yhang haí kut shut bê lú?" ga dum myi jáng, yhangmoq gi, htê mó èq, "Yhang lé tapzîng má jén sat pyám aq." ga je riyhang garú lo bum akô nghut ri.

¹⁵ Pilat gi, haú byù moq mó lé nhik dik nhâng nau é yanmai, Barabaq lé gi, nhang kat byi mù, Yesuq lé gi, nhuq bat nhâng mù, tapzîng má jén sat pyám râ matú, ap byí kat bê nghut ri.

Gyezô Pé Gi, Yesuq Lé Rhoi É Hkyô

Mht 27:27-30; Yhn 19:2-3

16 Gyezô pé gi, Yesuq lé, Pretori yhumwàng (mauzau hpô é yhumwàng) mó hkaú má shuí wang ló kômù, gyedap gón lé ji tsing yu akò.

17 Hau htâng, yhangmoq gi, Yesuq lé buhîng nè radung hut byi mù, zujanmaú saí yù kôluí, Yhâng é ulhum má tsung byí akò.

18 Hau htâng, yhangmoq gi, "Yudaq byu pé é hkohkâm hpó é! Chyung hîng xê hîng nyí sháng gaq ô!" ga wut garú akò.

19 Hau htoq agó, yhangmoq gi, Yhâng é ulhum má dumbáng èq adàm dàm bat kômù, sôkan byé gyun luí, Yhâng hí má hkyihput htuq mù, paí mhaú akò nghut ri.

20 Yhangmoq gi, Yhang lé rhoi jihkyoi ban kut yù kôjáng, Yhang wut tô é buhîng nè lé hkyut yù kômù, Yhâng é mebu lé dum hut byi luí, tapzîng má jén sat pyám rà matú, Yhang lé shuí htoq e ló bekò nghut ri.

Yesuq Lé Jén Pyâm É Hkyô

Mht 27:31-44; Luk 23:27-43; Yhn 19:17-27

21 Alesander eq Ruhpu nhiktang é yhângwa, Kuruni myuq byú nghut é Simun ga sù gi, yosô wà mai lò mù, haú jowò mai lai ló ri. Haú hkùn, gyezô pé gi, yhang lé, tapzîng waq nhang akò nghut ri.

22 Yhangmoq gi, Yesuq lé, Golgahta gâ é jowò má shuí e akò (Golgahta gâ é gi, ugyap joq é jowò lé gâ é nghut ri).

23 Hau htâng, yhangmoq gi, Yhang lé, mura* eq nyhò tô é tsibiyiq wing huq akò; nghut kôlhang, Yhang gi, a lhom shuq byi nghut ri.

24 Hau htâng má, yhangmoq gi, Yhang lé tapzîng má jén tap to kôluí, Yhâng é mebu pé lé, hkyin shosé shé mù, âng é đông gam yu pyám byí akò nghut ri.

25 Yhangmoq, Yesuq lé tapzîng má jén tap pyám é hkùn gi, napkyó gau hkying nghut bê nghut ri.

26 Hau htoq agó, Yhang lé mara hun é đông kê tap to kô é gi, "YUDAQ BYU PÊ É HKOHKÂM" gâ ri.

27 Yhangmoq gi, damaq í yuq lé le, Yhâng é loqyo hkyam shut rayuq, loqpaí hkyam shut rayuq kut, tapzîng htoq má jén tap tô akò nghut ri.

28 (Haú gi, "Yhang gi, yubak dap bâng chyáng nghap lhôm é hui bê nghut ri."* gâ é Chyúmdang lé lhoq dik é nghut ri.)†

29 Hkyô sô lai ló é bang gi, nyhap é đông u-ngut ngut mù, tai kô é gi, "Noqkuq yhúm lé hpyoq pyám luí, sum nyí gyoro má dum wó saí lhê ga Sù é!

30 Náng gùng náng hkyi yù luí, tapzîng mai gyó lò wú aq mhaí!" ga akò nghut ri.

31 Haú eq rajung za, hkyangjong agyi pé eq tará sará pé le, yhangmoq hkaú má, "Shí yuq gi, góbang lé hkyi yù sù nghut kôlhang, Yhânggùng yhang gi, a wó hkyi yù nghut ri myhi-nhung!

32 Nga-nhúng wó myâng mù, lumjîng rà matú, shí, Israelaq byu pé é hkohkâm, Hkrisduq gi, tapzîng mai gyó lo wú sháng gaq." ga, Yhang lé rhoi dang tai akò. Yhang eq rahá tapzîng má jén tap to hui é su nhik le, Yhang lé rhoi dang tai akò nghut ri.

Yesuq, Shi É Hkyô

Mht 27:45-56; Luk 23:44-49; Yhn 19:28-30

33 Nyí-káng raxe í hkying mai myinhântang sum hkying jé shoq, ramau gón mauchut tuq dut byuq bê nghut ri.

* 15:23 Mura gi, chi wó kut jung xù nghut lhê. ✧ 15:28 Esai 53:12 † 15:28 Bun zo shí gi, chyúmding axau ra-am pé má za bo é nghut lhê.

³⁴ Myinhâng sum hkyíng jé é hkún, Yesuq gi, "Eloi, Eloi, lama sabakhtani." ✧ ga, hté mó èq garû kat ri. Haú é lichyúm gi, "Ngá Garai ê, Ngá Garai ê, Nàng, hái mù, Ngo lé tô pyâm tô lhê l hú?" gâ é nghut ri.

³⁵ Haú nâm má yap tô é bang ra-am gi, haú lé wó gyo kôjáng, "Gyô wú keq. Yhang gi, myiqhtoi Eliyaq lé wut nyi ri." ga, taí akô.

³⁶ Haú hkún, byù rayuq gi, din é ló mù, wuimaù lé tsibiyiq wíng chyín má jum yù luí, jàm-yang má tuí tap mù, Yesuq shuq sháng ga yhun byi luí, "Eliyaq gi, lé lô mù, Yhang lé lé lhoq hkyô yù abe, nga-nhúng chôm láng wú sháng." ga taí ri.

³⁷ Yesuq gi, hté mó èq garû kat luí, kâng byit byuq bê nghut ri.

³⁸ Noqkuq yhùm mã é pán-gyang gi, ahtoq mai a-ô í hkyam byáng dut byuq bê nghut ri.

³⁹ Yesuq é hí má yap tô é shô up gyezau hpó gi, Yesuq é garu hté lé wó gyo mù, Yhang hkâsu kut shi é lé myàng jáng, "Shí yuq gi, gè gè yhang, Garai Gasâng é Yhangzo nghut ri-nhung!" ga taí ri.

⁴⁰ Myiwe wuì ra-am gi, we we mai wú nyi bum akô. Haú bang má, Magadalaq wà mã é Mariq, Yakuq tiq sù yuq eq Yose nhiktang é yhângnu Mariq eq Salome pé le bo akô nghut ri.

⁴¹ Haú bang sum yuq gi, Galile mau má, Yesuq htâng cháng mù, Yhâng rà é hkyô pé lé châng kut byí é bang nghut akô. Yesuq eq rahá, Yerusalem wà mó má doq lé lo é myiwe wuì, góbang myo myo le haú má nyi tô bum akô nghut ri.

Yesuq Lé, Myhup Pyâm É Hkyô

Mht 27:57-61; Luk 23:50-56; Yhn 19:38-42

⁴² Haú nyí gi, Hên Lajang Buinyi (Bánno buinyi é hí nyi) nghut ri. Haú mù, myinhâng jé ló jáng,

⁴³ Yudaq uphkâng hpúng má bo é, aróng wó é, Garai Gasâng é mingdán lé láng nyi é sù, Aramahti wà byù Yosep gi, myit wum lhoq kíng yù mù, Pilat chyáng wàng luí, Yesuq é gungsôm lé é dúng ri.

⁴⁴ Pilat gi, Yesuq shí bê gâ é hkyô lé wó gyo jáng, maú byuq ri; haú mù, yhang gi, shô up gyezau lé wut yù mù, Yesuq shí teng bê l hú ga myí ri.

⁴⁵ Shí teng bê hkyô lé, shô up gyezaù chyáng mai wó sê yù jáng, Pilat gi, Yesuq é gungsôm lé yù rà ahkáng, Yosep lé byi kat ri.

⁴⁶ Haú mù, Yosep gi, pán yúng lé wui yù luí, gungsôm lé yu hkyó mù, htup yup luí, luqgok lé kyúng tô é lup hkaù má é kat tô ri. Hau htâng, yhang gi, luphkum má, luqlóng èq lhêng chí pyâm tô ri.

⁴⁷ Magadalaq wà mã é Mariq eq Yose é yhângnu Mariq gi, Yesuq lé, hkâmá lheq tô é lé, é myang akô nghut ri.

16

Dum Dui Toq Lo É Hkyô

Mht 28:1-8; Luk 24:1-12; Yhn 20:1-10

¹ Bánno buinyi lai jáng, Magadalaq wà mã é Mariq, Yakuq é yhângnu Mariq eq Salome pé gi, Yesuq é gùng má, é but byi rà matú namngón jung é wui akô.

² Bánno buinyi htang napkyó bui htoq lo é hkún yhang, yhangmoq gi, lup shut é ló akô.

³ Yhangmoq gi, "Luphkum mã é luqgok lé, ó yuq chyún lhêng pyám byi rà l hú?" ga, rayuq eq rayuq taí lhum akô.

⁴ Nghut kôlhang, yhangmoq tu wú kat kô é hkûn, luqlong haú gi, lhoq lhêng to lánq é lé, myàng akô nghut ri; luqlong haú gi, gyai kô é nghut lhê.

⁵ Yhangmoq gi, lup hkaú má wang é kô é hkûn, hpyu é buhîng wut é zorâm rayuq, loqyo hkyam má zung tô é lé, myàng kôjáng, gyuq dan bum akô.

⁶ Haú hkûn, haú yuq gi, "Hkâgyuq dân kó! Nungmoq gi, haú tapzîng má jén sat huí é, Nazaret wà byù Yesuq lé ho akô, a nghut lhú? Yhang dui toq ló bê! Yhang gi, shí má a nyi lo. Yhang lé, lheq tô é jowò lé wú wú keq.

⁷ Ahkuí, nungmoq gi, ló mù, 'Yesuq gi, nungmoq hí má, Galile mau shut so lánq râ nghut lhê. Nungmoq lé, Yhang taí tô é eq rajung za, nungmoq gi, Yhang lé haú má ló myàng kó râ nghut lhê.' nghú, Yhâng é chángzô pé eq Petruq lé ló taí kyo keq." ga lhom taí kat ri.

⁸ Haú mù, myiwe myhí haú bang gi, byòdàn gyuq nán é eq, lup mai hpang htoq ló akô; yhangmoq gi, lúm gyuq byuq kô é yanmai, ó yuq lé lé, haí le a taí kô nghut ri.

(Bun zo 9 mai 20 jé shoq gi, chyúmding axau ra-am pé má a bo é nghut lhê.)

Yesuq Htoq Shít É Hkyô

Mht 28:9-10, 16-20; Luk 24:13-53; Yhn 20:11-23; Lagyo 1:6-11

⁹ Yesuq gi, Bánno buinyi htang napsûn lé, Yhang dui toq é htâng, Yhang mai nat gang nyhit du hkat htoq pyám byi bê sù, Magadalaq wà mà é Mariq lé hí htoq shít ri.

¹⁰ Mariq haú gi, ló mù, haú Yesuq eq nyi lai lò bê bang, yón ngau nyi kô é hkûn, haú hkyô lé ló taí kyô ri.

¹¹ Yhangmoq gi, Yesuq dum dui bê gá é hkyô lé le, Yhang lé, Mariq myang é gá é hkyô lé le, wó gyo kôlhang, a jîng kó nghut ri.

¹² Hau htâng má, Yesuq gi, yosô wà shut htoq e ló nyi é chángzo í yuq lé, gotú gunghkyâng dong htoq shít ri.

¹³ Haú nhik gi, taú lò mù, gotú chángzô pé lé haú hkyô lò shít kyo akô; nghut kôlhang, yhangmoq gi, haú lé le a jîng byi kó nghut ri.

¹⁴ Hau htâng má, Yesuq gi, haú chángzo raxe rayuq baú za zang zô nyi kô é hkûn, yhangmoq chyáng lé htoq shít ri. Yhangmoq chyáng lumjîng myit a bò kô é yanmai le, Yhang dui toq é htâng má, Yhang lé myang é bang taí kyo kô é dang lé, a jîng é za myit htan to kô é yanmai le, Yhang gi, yhangmoq lé tân ri.

¹⁵ Hau htoq agó, Yesuq gi, yhangmoq lé, "Mingkan jàm shoq htoq é mù, waxâng zo wui lhunglhang lé, haú gabú danglù hko kyo keq.

¹⁶ Lumjîng mù, wui-myhup hkâm yu é sù ó yuq nghut kôle, hkyi yu é hui râ nghut lhê. Nghut kôlhang, a lumjîng é sù ó yuq nghut kôle, mara byi é hui râ nghut lhê.

¹⁷ Lumjîng é bang wó kut shít râ kumlhá pé gi, Ngá é myîng lé lang luí, nat gâng pé lé wó hkat htoq kó râ eq laklai é myîng pé lé dat nyò kó râ nghut lhê;

¹⁸ yhangmoq gi, lhangmui pé lé le, wó kui zui kó râ nghut lhê; muí shi jung duq lé, shuq kôlhang, haí dut kó râ a nghut. Nò bâng é htoq má, yhangmoq é loq ke byi jáng, nò bang ge byuq kó râ nghut lhê." ga taí ri.

¹⁹ Haú Yhumsîng Yesuq gi, yhangmoq lé dang ban taí é htâng má, mauhkûng shut shuí toq yu é hui luí, Garaí Gasâng é loqyo hkyam má zung to bê nghut ri.

²⁰ Hau htâng, haú chángzô pé gi, htoq é mù, jowò hkangmó má mungdang é hko kyô akô nghut ri; haú Yhumsîng gi, yhangmoq eq rahá nghut nyí mù

luî, Yhâng é mungdang têng é hkyô lé tân shit râ matú, yhangmoq lé, kumlhá pé wó kut é a-tsam byî é nghut ri. Amen.

LUKAQ

é Gabú Danglù Laiká

(The Gospel of Luke)

¹ Aróng wó dik é sù Htohpilug ê, ngamoq chyáng dut lai lò bê hkyô pé lé, sâng-hi mai yhumsing myoq eq yhang, myang é bang eq, mungdang wùn waq é bang mai shap kyô gyô lò mù luí,

² byù myo myo gi, shikut luí kâ to bekô nghut ri.

³⁻⁴ Ngò le haú pé banshoq lé awang mai ahpyo hpyot jihkúm nuqguq ho myí yù luí, nàng wó sê yu to bê hkyô pé gi, je lhoq gíng é dut sháng gaq nghù, nàng é matú banshoq tok za kâ kat byi rà lé, ngò wó myit ri.

Wui-myhup Sará Yohan Hku Lé Lô Râ Gà Ê Hkyô

⁵ Yuda mau má Herut hkohkâm up é u lé, Abiyaq hkyangjong hpúng má Zahkariq ga sù hkyangjong rayuq nyi ri. Yhang myi gi, Arun amyû má é, Elizabet ga sù nghut ri.

⁶ Haú nhik gi, Yhumsing Garaí é jep é tarâ eq htúngtarâ banshoq lé, rago za cháng mù, Garaí Gasâng é hí má dingmán é su nhik nghut akô.

⁷ Nghut kôlhang, Elizabet gi, baùdung dung sù nghut é yanmai, yháng nhâm gi, zo dù a dap kó. Yhangnhik gi, asak ipyat le ko bekô nghut ri.

⁸ Ahkuí, Zahkariq gi, dum lhing hkyuq lo é hkyangjong mù lé, yhâng é hpúng eq rahá, Garaí Gasâng é hí má lé zui le,

⁹ haú Yhumsing é noquq yhùm ahkaú má namngón hkungga é wang nyhé rà matú, hká yuq nghut rà lé hkyangjong pé é htúngli eq rajung za byù hkyîn shosé she wú é hkûn, yhâng chyáng âng ri.

¹⁰ Haú mù yhang namngón hkungga lé nyhé é u lé, shiwa byù banshoq gi, yhumpán má, kyúdung nyi akô.

¹¹ Haú hkûn, Yhumsing Garaí é maumang lagyo gi, namngón jung nyhé é hkungga gyap é loqyo hkyam má, Zahkariq lé, lé yap shit ri.

¹² Zahkariq gi, maumang lagyo haú lé myàng jáng, dan gyuq nyi ri.

¹³ Nghut kôlhang, maumang lagyo gi, "Zahkariq ê, hkágyuq, náng é kyúdung dang lé Garaí Gasang gyo byi bê. Haú mù luí, náng é yhumsing myí Elizabet gi, náng é matú yuqzo rayuq bau byi berâ nghut lhê; nàng gi, yhang lé Yohan nghù myhíng byi rà nghut lhê.

¹⁴ Yhang gi, náng é matú gabú hpo eq nguóngón é hkyô dut berâ nghut lhê. Yhang lé baù lo é yanmai, byù myo myo le gabú lo bùm berâ nghut lhê.

¹⁵ Hkâsu mù gâ le, yhang gi, haú Yhumsing Garaí é hí má ahko ahkáng wó mù luí, byù mó dut rà sù nghut lhê. Yhang gi, tsibiyiq wing eq ihpe lé ge shuq rà sù a nghut; yhâng nû é unghkaú mai yhang, Chyoiyung Woi-nyí eq byíng nyí rà sù nghut lhê.

¹⁶ Yhang gi, Israelaq yhangzo yhangshù pé myo myo lé, Yhumsing yhang-moq é Garaí Gasang chyáng lhing lò nhâng rà sù nghut lhê.

¹⁷ Íwâ pé é myit nhikhum lé gi, zô wui shut, nyo é a gyo bang lé gi, dingmán bâng é hpaqchyí hkyô shut lhing lò nhâng luí, haú Yhumsing jé lé rà matú hen tô é byù myú dut nhâng rà matú, Yohan gi, Eliyaq é woi-nyí wum-o wó é eq, Yhumsing é hí má e ló rà nghut lhê." ga luí, yhang lé tai ri.

18 Haú hkûn, Zahkariq gi, "Haú hkyô lé ngò hkâsu kut wó sé rá lhú? Ngò le mang byuq bê, ngá é yhumsing myhí le asak ipyat ko bê." ga luí, maumang lagyo lé tú tai ri.

19 Maumang lagyo haú gi, "Ngò gi, Garai Gasang eq rahá nyi é sù Gabrielaq nghut lhê. Nang lé gabú danglù shí tai kyo aq ga luí, Yhang, ngo lé nhang kat é nghut lhê.

20 Ahkyíng jé jáng, ngá dang gi, gè gè dut lò rá nghut lhê. Dang shí pé lé nàng a lumjíng é yanmai, mù haú dut lo é buinyi jé shoq, nàng gi, nhut jít byuq rá nghut lhê." ga luí, yhang lé tú tai ri.

21 Haú u, shiwa byu pé gi, Zahkariq noqkuq yhùm ahkaú má haú-í myáng shoq lúng byuq é hkyô lé lánng maú nyi akô.

22 Zahkariq dum htoq lo le, dang a wó nyo byuq mù shiwa byu pé lé loq lik za lik shit nyi ri. Haú mù luí, yhangmoq gi, noqkuq yhùm ahkaú má yhang myoqwup shing-rán rajung jung myàng ang bê lé, wú sê yu akô nghut ri.

23 Ahkuí, Zahkariq gi, hkyangjong jong âng é buinyi ngap jáng, yhùm shut dum taú ló byuq bê.

24 Hau htàng má, yhâng é yhumsing myhí Elizabet gi, zogúng dut lò mù luí, hká le a htoq e za lhamó ngo hkyap yhùmkaú má lúng byuq ri.

25 Haú hkûn, yhang gi, "Byu pé hí má ngò hui zô é hoq hpu hkyô lé, Garai Gasang gi, myàng byi luí, shí su dut nhang é dngng ang má hui sêng pyám byí é buinyi má, Yhang ge é hkyô lé, ngo lé tún shit bê nghut ri." ga tai ri.

Yesuq Hku Lé Lô Berâ Gà É Hkyô

26 Ahkuí, Elizabet zogúng dut é lhamó hkyuq hkyap jé jáng, Garai Gasang gi, maumang lagyo Gabrielaq lé Galile mau, Nazaret wá má nyi é, zomyi gyíng rayuq chyáng nhang kat ri.

27 Zomyi hau é myíng gi, Mariq gà ri; yhang gi, Dawiq amyû má é Yosep ga su eq dúng tô é zomyi nghut ri.

28 Maumang haú gi, Mariq chyáng jé jáng, "Mariq ê, nguínón nyí sháng gaq; Nàng, hkungsô wó nyi ri; Haú Yhumsing Garai gi, nàng eq rahá nyi nyi ri ò!" ga tai ri.

29 Mariq gi, dang haú lé gyo sing nán mù, shí su gà é dang gi, hai jung ga naú é nghut lhê lhú ga luí, myit maú nyi ri.

30 Haú hkûn, haú maumang lagyo gi, "Mariq ê, hkâgyuq, nàng gi, Garai Gasang é hí má myoqdong wó bê nghut ri.

31 Wú aq, nàng zogúng dut lò mù luí, yuqzo rayuq bau rá nghut lhê. Yhâng é myíng lé gi, 'Yesuq' nghú luí, nàng myhíng byi ra rá nghut lhê.

32 Yhang gi, hpung bô sù dut rá nghut mù, Myhang htáng htúm Su é Yhangzo gà é hui rá nghut lhê. Yhumsing Garai Gasang gi, yhang lé, yhâng é íchyí íwa Dawiq é hkohkâm tanghkuq lé, byi rá nghut mù luí,

33 Yhang gi, Yakup yhùm* lé hkâ-nhám le ru-up nyi rá nghut lhê. Yhâng é míngdán le htum nghu é joq rá a nghut." ga luí, yhang lé tai ri.

34 Haú hkûn, Mariq gi, "Ngò gi, zomyi gyíng ru nghut ashí, haú gi, hkâsu wó dut rá lhú?" ga luí, maumang lagyo lé tú tai ri.

35 Haú maumang lagyo gi, "Choyoiyúng Woi-nyí náng é ahtoq má jé lé mù, Myhang htáng htúm Su é wum-o a-tsam gi, nàng lé shum gum to byi luí, haú baú lò rá Choyoiyúng sù le gi, Garai Gasang é Yhangzo ga kó rá nghut lhê.

* 1:33 Yakup yhùm nghu e gi, Israellaq amyú lé gà lhê.

36 Hau htoq agó, wú aq, náng é amyú swisho baùdung myhí Elizabet lháng, mang bê le yuqgè zo wun to bê. Ahkuí, zogûng dut é lhamó hkyuq hkyap wàng bê nghut ri.

37 Hkâsu mù gâ le, Garai Gasang a wó kut é hai le a joq." ga luí, yhang lé tú tai ri.

38 Haú hkûn, Mariq gi, "Yhumsing é jùnmyhí ngò nghut nyi lhê; náng é dang eq rajung za ngá chyáng dut lò sháng gaq." ga tú tai ri. Hau htâng, maumang lagyo gi, yhâng chyáng mai ló byuq bê.

Elizabet Lé Mariq Ê Huí Ê Hkyô

39 Hau htâng hkâ-í a myáng má, Mariq gi, Yuda mau bum mau mâ é wà rawá shut hân hân é ló luí,

40 Zahkariq é yhúm má wàng mù, Elizabet eq huí nyo lhúm ri.

41 Mariq é danghtê lé Elizabet wó gyo jáng, yhâng é unghkaú mâ é zoshâng gi, byam chyú lo ri.

42 Elizabet le, Chyoiyúng Woi-nyí byíng to mù luí, Mariq lé htê mó eq tai é gi, "Myiwe banshoq má, nàng gi, hkungsô wó dik sù nghut ri. Náng é unghkaú mâ é zoshâng le hkungsô wó nyi ri ô!

43 Ngá Yhumsing é yhângnu ngá chyáng jé lé é jeju gi, hai é yanmai nghut bê lhú?

44 Wú aq, náng danghtê lé wó gyo kat jáng, ngá unghkaú mâ é zoshâng gi, gabú luí byam chyú nyi ri.

45 Haú Yhumsing tai é dang gi, gè gè dik lò rá nghut lhê ga luí, lumjíng é myiwe gi, hkungsô wó nyi ri." gâ ri.

Mariq Ê Hkya-on Dang

46 Haú hkûn, Mariq gi,

"Ngá é i-myt mai haú Yhumsing lé hkya-on nyi lhê,

47 ngá é woi-nyí le, Garai Gasang ngá é hkyi yù Sù má gabú nyi lhê.

48 Ngò Yhâng é jùnmyhí myit nyhum nyi é lé, Yhang myàng byi bê nghut ri.

Wú aq, ahkuí mai ipyat dedu má, ngo lé gi, hkungsô wó nyí sù, gâ nyi bekô rá nghut lhê.

49 hkâsu mù gâ le, Wum-o Bo Dik é Garai Gasang gi, ngo lé mauhpo mù mó kut byi bê nghut ri,

Yhâng é myíng gi, chyoiyúng nyi ri ô.

50 Yhang lé gyuq hoq nyí bâng é ahtoq má, Yhang shogyo nhikmyîn é hkyô gi, pyat bán hkangmó jé shoq hkâ-nhám le joq nyi rá nghut lhê.

51 Yhâng é wum-o bo é loq eq mauhpo mù mó pé lé tún shit bê.

Yhumsing myit é hkyô má nghutbún nyi é bang lé, Yhang lhoq pyo pyám bê.

52 Zaugun suwún wuí lé gi, zau zûng tanghkuq mai lhoq hkyô pyám mù, i-myt nyhúm bang lé gi, lhoq myhâng bê nghut ri.

53 Zòmut hui bang lé gi, ge é zoshuq gyi shoq byi tso mù, sutzè wó bang lé gi, akôm nhang kat bê nghut ri.

54-55 Nga-nhûng é íchyí íwá pé lé tai tô é dang eq rajung za, Abraham eq yhangzo yhangshu pé lé,

hkâ-nhám le shogyo nhikmyîn nyi rá gâ é lé myit bún nyi é yanmai,

Yhâng é dui-nhâng zoshâng Israelaq byu pé lé hku baú nyi ri." ga luí, tai ri.

⁵⁶ Mariq gi, Elizabet chyáng lhamó sum hkyap kô nyi mù luí, yhúm shut dum taú lò byuq bê.

Wui-myhup Sará Yohan Bau É Hkyô

⁵⁷ Hau htâng, Elizabet gi, zoshâng bau râ buinyi jé mù, yuqgè zo bau bê.

⁵⁸ Yhang lé haú-í kô é jeju Yhumsing tân shit é hkyô lé, yhâng é yhumkyo buinùm wui eq mung moq gumang wui wó gyo kojáng, yhang eq rahá gabú nyi akô.

⁵⁹ Ahkuí shit nyí jé jáng, yhangmoq gi, zoshâng haú lé ahpyo-kuq hpyit byi râ matú lé kôluí, yhâng wá é mying eq rajung za, Zahkariq ga myhíng byi râ dá akô.

⁶⁰ Nghut kôlhâng, yhâng nu gi, "A nghut, Yohan nghú sheq myhíng râ nghut lhê." ga tú taí ri.

⁶¹ Yhangmoq gi, "Náng é amyú suisho má le, haú su gâ é mying rayuq le a bo wú shí." ga luí, yhang lé taí akô.

⁶² Haú hkún, zoshâng haú lé hkásu nghú myhíng nau lhê laq ga, yhâng wa lé loq lik lik shit mù myí akô.

⁶³ Zahkariq gi, kâ jung longpá dúng yù mù, "Yhâng é mying gi, Yohan nghut lhê." ga kâ shit ri. Haú mù, lhunglhâng bang gi, maú byuq bum akô.

⁶⁴ Haú hkún jáng, Zahkariq gi, nhut hkum bóng lô mù, dang wó nyô lui, Garai Gasang lé hkya-ôn nyi ri.

⁶⁵ Haú su dut é hkyô lé, wó gyô é awui ayàm lhinghkyuq mâ é lhunglhâng bang gi, gyuq maú byuq bùm kômù, Yuda mau bum mau ramau gón taí pyo lô bum akô.

⁶⁶ Wó gyô é lhunglhâng bang gi, haú hkyô lé yhumsing é i-myit unghkaú má kat to mù, "Zoshâng shí gi, hkásu dut lò râ sù nghut lhê lhu?" ga myit wú nyi akô. Haí mù gâ le, haú Yhumsing é loq gi, yhang eq rahá nghut nyí é yanmai nghut ri.

Zahkariq É Myiqhtoi Dang

⁶⁷ Haú hkún, zôshang é yhângwa Zahkariq gi, Chyoiyúng Woi-nyí byíng lô mù, myiqhtoi dang dong taí é gi,

⁶⁸ "Haú Yhumsing, Israelaq é Garai Gasang lé hkya-on sháng ô!

Haí mù gâ le, Yhang gi, Yhâng é amyú lé, lé kúm wú mù luí, lé hkyi yù bê nghut ri.

⁶⁹ Garai Gasang gi, Yhâng é dui-nhâng zoshâng, Dawiq é amyú mai nga-nhúng é matú

wum-o bo é hkyi yu é hkyuí[†] lé, yuq htoq lô nhâng bê.

⁷⁰ Shí hkyô gi, a-nham pyat mai yhâng é chyoiyúng myiqhtoi pé é nhut mai taí tô é eq rajung za nghut ri.

⁷¹ Haú hkyuí gi, nga-nhúng lé nga-nhúng é gye pé chyáng mai le, a nguí a nau bang banshoq é loq mai le, hkyi yù râ nghut lhê.

⁷² Íwa Garai gi, nga-nhúng é íchyí íwa pé lé shogyo nhikmyin hkyô lé tân shit râ matú, Yhang byí tô é chyoiyúng dangshikaq lé a tô-myhí nghut ri.

⁷³ Haú gi, nga-nhúng é chyiké Abraham lé byi tô é danggidiq nghut lhê.

⁷⁴⁻⁷⁵ Nga-nhúng lé gye pé loq mai hkyi yù râ eq, nga-nhúng asak dui tô é buinyi banshoq má,

Yhâng é hí má a gyuq a kyum é za, chyoiyúng é eq dingmán é hkyô mai,

[†] 1:69 Hkyi yu é hkyuí gi, Yhumsing Yesuq lé taí é nghut ri.

Yhang lé wó dojaú nyí nhâng rã matú, Yhang jé lé é nghut lhê.

⁷⁶ Ngá zo ê, nàng gi, Yhumsing é hí má, e ló mù luí, Yhâng é hkyô lé hen lajang byi rã sù nghut é yanmai,

nang lé Myhang htang htúm Su é myiqhtoi ga kó rã nghut lhê.

⁷⁷ Nàng gi, Garai Gasâng é byu pé lé, yhangmoq é yubak mara hkyut pyám byí é dong,

hkyi yu é hui rã hkyô lé tai kyo rã sù nghut lhê.

⁷⁸ Haí mù gâ le, Garai Gasâng é shogyo nhikmyin é yanmai, napsûn bui[‡] gi, mauhkûng mai nga-nhûng chyáng htoq lé lô rã nghut lhê.

⁷⁹ Yhang gi, mauchut hkaú[§] eq shí wup hkaú má lúng to bang lé builoq su duqbó byi rã eq,

nga-nhûng lé nguingón simsaq é hkyô shut shuí e ló rã sù nghut lhê." ga ri.

⁸⁰ Zoshâng haú gi, kô lò mù, woi-nyí wum-o bo lò luí, Israelaq byu pé chyáng htoq shit lo é buinyi jé shoq, yoso pé má nyi nyi ri.

2

Betlehem Wà Mó Má Yesuq Hku Lo É Hkyô

Mht 1:18-25

¹ Buinyi haú pé má, Romaq hkoséng ming banshoq mã é byù lhunglhang bang gi, myìng jihpán kat rã matú, hkoséng Kehtaq Augustuq chyáng mai mungdang htoq ri.

² Jihpán haú lé sâng-hi dàm guq hi é gi, Kuireni ga sù Suriq mau má mauzau kut nyi é hkûn nghut ri.

³ Haú hkûn, byù du jup gi, myìng jihpán kat rã matú, ó le ô é wà shut ló bum akô.

⁴ Haú mù, Yosep le Dawiq é awut ashín nghut é yanmai, Galile mau Nazaret wà mai, Yuda mau mã é Betlehem ga é Dawiq é wà shut,

⁵ yhang dúng tô é myiwe Mariq eq rahá myìng kat lhóm rã matú jé doq ló akô; Mariq kúm gi, gungloq lai to bê nghut ri.

⁶ Haú Betlehem má nyi tô ashí le, Mariq gi, zo hkû rã buinyi jé mù, zomún yuqzo lé bau bê.

⁷ Yhang gi, zoshâng haú lé panchoq eq htup mù no tso langhkang má lheq tô ri; haí mù gâ le, bíng yhùm má yhangmoq nyi rã jowò a joq lo é yanmai nghut ri.

Sau Zúng Bang Yesuq Chyáng Jé Lé É Hkyô

⁸ Ahkuí, haú ginwáng mã é sau zúng zo bang gi, sau zúng jang má yhangmoq é sau hpúng lé, myín lé zúng nyi akô.

⁹ Haú hkûn, Yhumsing é maumang lagyo gi, yhangmoq é hí má lé htoq yap shit to mù, Yhumsing é hpungwup shingkang gi, awui ayám mã duqbang lò luí, yhangmoq gyai gyuq bum akô.

¹⁰ Maumang lagyo gi, "Hkâgyuq kó, byù lhunglhang bâng é matú, gyai yhang gabú é danglù, ngò nungmoq chyáng wun lé lo lhê.

¹¹ Hkû-nyí lhê buinyi má, Hkrisduq* nghu é Yhumsing nghut é hkyi yù Sú gi, Dawiq é wà má nungmoq é matú hku to bê.

[‡] 1:78 *Napsûn bui* gâ é gi, Yesuq lé tai é nghut lhê. [§] 1:79 *Mauchut hkaú* gâ é gi, Garai lé a sé mù woi-nyí má shi tô é bang lé gâ lhê. * 2:11 *Grik dong Hkrisduq* gâ é gi, xù but hui Sú gâ é lichyúm nghut mù, Hebre dong "Mesaia" gâ é eq rajung za nghut lhê.

¹² Nungmoq é matú kumlhá gi, zoshâng nyheqnú rayuq panchoq èq htop mù, no tso langhkang má lheq to láng ra nghut lhê." ga luí, yhangmoq lé tai ri.

¹³ Haú hkûn jáng yhang, mauhkûng bang rajùm rayò htoq lô mù, maumang lagyo haú eq rahá Garai Gasang lé hkya-ôn é dang gi,

¹⁴ "Htoq tsáng myhâng má, Garai Gasang gi, hpungwup shingkang bo nyi sháng gaq ô!

Myigùng htoq má le, Yhang ô nau é byu pé má, nguóngón é gi, hkâ-nhám le joq nyi sháng gaq ô!"

gâ akô.

¹⁵ Maumang lagyo pé, yhangmoq chyáng mai, mauhkûng shut dum ló byuq jáng, sau zúng bang gi, "Sà! Betlehem wà mó má jé shoq yhang, nga-nhúng è mù, ahkuí za Yhumsing nga-nhúng lé lé shit kyô lai ló bê hkyô lé è gôn wú sháng." ga luí, rayuq eq rayuq tai lhùm akô.

¹⁶ Hau htâng, yhangmoq gi, hân hân è luí, Mariq eq Yosep lé le, no tso langhkang má lheq tô é zoshâng nyheqnú lé le, è myàng akô.

¹⁷ Zoshâng haú lé, yhangmoq myàng kôjáng, zoshâng haú eq séng luí yhangmoq lé, lé tai kyô é dang lé, tai pyô kat bekô.

¹⁸ Wó gyô é bang banshoq gi, haú sau zúng bang tai kyô é dang lé, maú byuq bum akô.

¹⁹ Mariq kúm gi, dut lo é hkyô pé eq wó gyô é dang banshoq lé unghkaú má matsing yù mù luí, nik nik myit wú nyi ri.

²⁰ Sau zúng bang gi, yhangmoq lé maumang lagyo tai kyô kat é dang eq rajung za, wó gyô yù, wó myang yu é hkyô pé banshoq é yanmai, Garai Gasang lé hkya-on kungtôn uchyang dum tau ló bekô nghut ri.

Yesuq Lé, Noqkuq Yhùm Má Shui É Hkyô

²¹ Zoshâng haú, shit nyí jé mù ahpyo-kuq hpyit byi râ buinyí má, yhang unghkaú má a lúng shi mai maumang lagyo myhâng tô é myiêng eq rajung za, yhang lé, "Yesuq" ga luí, myhíng byi akô.

²² Mosheq é tarâ eq rajung za, yhangmoq é lhoq san lhoq séng é buinyí byíng jáng, Yhumsing é tarâ má, "Zomún yuqzo hkangmó gi, haú Yhumsing é hí má chyoiyúng sù wó nghû râ matú, Yhumsing chyáng é ap byi râ lhê."* gâ é eq.

²³ "Hpúngkyui razúm, haú a nghut jáng, nghoqmyhû zo í du,"* hkungga byi râ lhê ga kâ tô é eq rajung za,

²⁴ Mariq eq Yosep gi, zoshâng haú lé shui mù Yerusalem wà mó shut è akô.

²⁵ Haú hkûn, Simeon gâ é mangzo rayuq, Yerusalem wà mó má nyi ri. Haú yuq gi, dingmán é eq tarâ cháng sù nghut mù, Israelaq lé nhik lhoq ting râ ahkyiêng lé láng nyí sù nghut ri; haú Chyoiyúng Woi-nyí le, yhâng é ahtoq má nyi nyi ri.

²⁶ Yhang gi, haú Yhumsing Hkrisduq lé a myang é za, shi râ a nghut, ga Chyoiyúng Woi-nyí èq tân shit tô é hui sù nghut lhê.

²⁷ Yhang gi, Chyoiyúng Woi-nyí èq shui mù, noqkuq yhùmhkaú má è jé nyi tô é hkûn lé, Mariq eq Yosep gi, zoshâng Yesuq lé htung tarâ eq rajung za kut byi râ matú, noqkuq yhùmhkaú má shui wang ló kôjáng,

²⁸ Simeon gi, zoshâng lé loq èq lhom bún yù mù, Garai Gasang lé hkya-ôn é dang gi,

- 29 "Yhumsing ê, náng é danggidiq gi, dik bê nghut ri; hkû-nyí náng é jùn ngò gi, nguingón é eq wó shí ló berâ nghut lê.
- 30 Haí mù gâ le, byù lhunglhang bâng é matú, nàng lajang tô é hkyi yù hkyô lé, ngá myoq eq yhang wó myâng bê.
- 31 Haú gi, byù myú chângjup wó myâng râ matú, nàng lajang to byí é nghut mù,
- 32 tûngbaù pé lé, tengmán hkyô má bui su duqbó mù hpông shit râ matú le, náng é amyú Israelaq é hpungwup shingkâng matú le nghut nyi ri."
- gâ ri.

33 Yhângnu eq yhângwâ nhik gi, zoshâng Yesuq é hkyô lé Simeon taí é yanmai, maú byuq akô.

34 Simeon gi, yhangmoq lé shimân byi mù, Yhâng nu Mariq lé, "Wú aq, zoshâng shí gi, Israelaq ming mâ é byù myo myô é matú lingbat jowò eq myo myô é matú kô lò myhang lò râ hkyô le, byù myo myo taí he pyám râ kumlhá matú le, hkyin tô é hui sù nghut ri.

35 Haú mù, byù myo myô é unghkaú má, myit mi-myit lé lhoq htoq shit râ nghut lê. Náng é myit nhiklum má, shâm chûn eq htaú kyâng kat é su gâ é lé, nàng hui zo râ nghut lê." ga taí ri.

36 Ashe amyú mâ é Hpanuelaq é yhangzo, Annaq gâ é myiqhtoi myhí rayuq nyi ri; yhang gi, ipyat gyai ko bê. Yhang gi, zomyí pyat mai, yhanglâng eq nyhit zân za nyi luí, shit xe myi zân jé shoq chuimó mó nyi to sù nghut ri.

37 Myiwe haú gi, noqkuq yhùm mai a htoq é za, nyi myín a ga noqkuq dojaú nyi mù, zoshuq gám luí kyúdüng nyi ri.

38 Simeon dang ban taí jáng, Annaq gi, hui lé lô mù, Garai Gasâng jeju lé hkya-on luí, Yerusalem wà mó lé Garai Gasang hkyi yù râ gâ é lé, myit lum to bang lhunglhang lé, zoshâng hau é hkyô taí kyô ri.

39 Yosep eq Mariq gi, kut râ pé lé haú Yhumsing é tarâ joq é dông ban kut jáng, Galile mau mâ é yhangmoq wà Nazaret shut dum taù ló bekô.

40 Zoshâng haú gi, kô lò mù, wum-o bò lo é eq, hpaqchyí byéng-yá le byíng nyi ri. Garai Gasâng jeju le, Yhâng é ahtoq má joq nyi ri.

Noqkuq Yhùmhkaú Má Zoshâng Yesuq Jé Nyi É Hkyô

41 Yhângnu yhângwâ nhik gi, Lhoqlhai Poí jé hkangmó, zàn wui Yerusalem wà mó má é é kut akô.

42 Yesuq raxe í zân jé jáng, poí haú, ê bo lòm ra htungli joq é eq rajung za, yhangme wui yhanghpe wui doq ló akô.

43 Haú poí buinyi lai luí, dum taù lo é hkûn, zoshâng Yesuq gi, Yerusalem wà mó má nyi gyó tô ri; nghut kôhang, yhângnu yhângwâ nhik gi, a sé kô.

44 Yesuq lé rahá lo é luzúm wui chyáng bò rà su ngàm kômù luí, Yosep eq Mariq gi, ra-nyí buigyùm chap só ló bê htâng má, mung moq wui eq, sê lhùm é buinùm ji-myi wui chyáng Yhang lé châng ho akô.

45 Yhangnhik gi, Yesuq lé a myàng kôjáng, Yhang lé châng hô uchyang, Yerusalem wà mó má dum taù jé e ló bekô.

46 Ahkuí, sum nyi ngú rà nyí sheq, noqkuq yhùmhkaú má, tarâ sará pé é gung gung má zùng to mù, yhangmoq é dang lé gyo yù luí, dum taù myi myi kut nyi é lé, yhangnhik ê myàng akô.

47 Yhâng é dang wó gyô é bang banshoq gi, Yhâng é u-nuq nyau é hkyô lé le, Yhang tù taí é dang lé le, maú nyi akô.

⁴⁸ Yhang lé myàng jáng, yhangnhik maú byuq kômù luí, yhângnu gi, "Ngá zo ê, haí mù luí ngá-nhik lé isu kut lhê lú? Wú aq, náng wa eq ngá-nhik gi, myit myo myit chiq é eq, nàng lé jaq châng ho pyám bê." ga luí, Yhang lé taí ri.

⁴⁹ Yhang gi, "Haí mù luí, ngo lé châng ho akô lú? mauhkúng má é ngá Wá é yhùm má ngò nyi rã lhê le gi, nungnhik a sé kó lú?" ga luí, yhangnhik lé tú taí ri.

⁵⁰ Nghut kôhlang, yhangnhik gi, Yesuq taí é dang lichyúm lé, a sê gyo kó.

⁵¹ Yesuq kúm gi, yhangnhik eq rahá Nazaret wà shut taú jé gyó ló luí, yhangnhik nyo é dang lé gyo mù nyi tô ri. Yhângnu Mariq gi, dut laí lò bê hkyô pé banshoq lé, yhâng é myit nhiklhum má matsing tô ri.

⁵² Yesuq gi, hpaqchyí byéng-yá kúng zet lo é eq, gunghkyâng kô myhang lò mù, Garai Gasâng é hí má le, byu hí má le, myoqdong wó lo nyi ri.

3

Wui-myhup Sará Yohan Mhoqshít É Hkyô

Mht 3:1-12; Mrk 1:1-8; Yhn 1:19-28

¹ Romaq hkoséng Kehtaq Tiberuq gi, hkó zung é raxe ngo zân nghut é hkùn, Yuda mau má Pontu Pilat gi, mauzau ayá má; Galile mau má, Herut gi, mauzau ayá má; Ituri eq Trakuni mau má, Herut yhanggu Hpilip gi, mauzau ayá má; Abili mau má, Lusanu gi, mauzau ayá má;

² Anna eq Kayahpaq gi, hkyangjong mó mù má, kut nyi akô. Haú hkùn, Garai Gasâng é mungdang gi, yoso má nyi tô é, Zahkariq é yhangzo Yohan chyáng jé lé ri.

³ Haú mù, yhang gi, Yodan làng yàm jowò hkangmó má, sô jón wún luí, yubak mara hkyot pyám byí é hui rã matú myit lhing mù, wui-myhup hkâm* yù rã hkyô lé, hko kyô nyi ri.

⁴ Haú gi, myiqhtoi Esai-aq laiká má, "Haú yoso má, byù rayuq garú taí é hté gi, "Haú Yhumsing é matú, hkyô hen to keq, Yhâng é matú hkyô lhoq nyhang to keq;

⁵ wuihkung langhkop hkangmó lé lhoq pyíng ra rã nghut lhê; bùm eq wingkáng hkangmó lé hpyit pyám ra rã nghut lhê; agoí aguq é hkyô hkat hkangmó lé lhoq nyhâng ra rã nghut lhê; ahkung ahkop dut é hkyô hkat hkangmó lé lhoq rhá ra rã nghut lhê.

⁶ Haú hkùn, byù banshoq gi, Garai Gasâng é hkyi yù hkyô lé myàng rã nghut lhê."[†]

ga luí, kã tô é eq rajung za nghut ri.

⁷ Shiwa byu rajùm rayò gi, Yohan é loq má wui-myhup hkâm yù rã ga luí htoq lé lò kójáng, Yohan taí é gi, "Duq htan é lhangmui amyú pé[†] é, jé lò rã yubak dam mai wó hpan lut kó sháng gaq ga, nungmoq lé ó yuq taí pún é lú?"

⁸ Myit lhing hkyô eq gingdán é ashi zui keq. 'Nga-nhúng gi, Abraham é yhangzo yhangshú pé nghut lhê.[‡] nghú luí, yhumsing é i-myit unghkaú má hkátaí kó. Hkásu mù gã le, ngò, nungmoq lé taí kyo kólé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê.

* **3:3** *Wui-myhup hkâm* gã é gi, baptsima lé gã é nghut lhê. ✪ **3:6** Esai 40:3-5 † **3:7** *Lhangmui amyú pé* gã é gi, Lukaq 3:7-10 má bo é Hparishe eq Saduke pé lé taí é nghut ri. ‡ **3:8** *Nga-nhúng gi, Abraham é yhangzo yhangshú pé nghut lhê* gã é gi, Abraham é yhangzo yhangshu nghut é yanmai, Garai Gasang jéyáng é lé a hui rã ga, myit yu é hkyô nghut ri.

⁹ Ahkuí lháng, Garai Gasang gi, Yhâng é wazung lé haú sikgâm wang pé má tó to bê nghut ri; haú mù, ge é ashi a zui é agàm hkangmó lé gi, htuq lhêng pyám mù, myi má dú kat pyám rà nghut lhê." gâ ri. §

¹⁰ Haú hkún, shiwa byu pé gi, "Haú nghut le gi, ngamoq hkâsu kut le gè rà lú?" ga luí, yhang lé myí akô.

¹¹ Yhang gi, "Bu í dung wó sù gi, bu a wó sù lé, gàm byi sháng gaq; zo shuq wó sù lé, a wó sù lé, gàm byi sháng gaq." ga luí, yhangmoq lé tú tai kat ri.

¹² Kang guq bang le, wui-myhup hkâm yù rà ga lé lô mù, "Sarâ é, ngamoq gi, hkâsu kut le gè rà lú?" ga luí, yhang lé myí akô.

¹³ Yhang gi, "Nungmoq hkyui yù rà masat tô é htoq lai shoq hkâyû kó." ga luí, yhangmoq lé tai ri.

¹⁴ Gyezô pé ra-am le, "Ngamoq gi, hkâsu kut le gè rà lú?" ga luí, yhang lé lé myí akô.

Yohan gi, "Ó lé le hkâkyuq zo ko; a tara é dông mara le hkâhûn kó; nungmoq wó e ahpâú èq gé bún nyi keq." ga luí, yhangmoq lé tai ri.

¹⁵ Shiwa byu pé kúm gi, Hkrisduq lé myit láng nyi tô é bang nghut é yanmai, Yohan lé haú yuq nghut lhê laq ga yhumsing é i-myit unghkaú má myit wú nyi bum akô.

¹⁶ Haú hkún, banshoq bang lé Yohan tai é gi, "Ngò gi, nungmoq lé, wui èq za wui-myhup hkâm byi lhê; nghut kôlháng, ngá htoq má wum-o a-tsam je bo é sù rayuq jé lé lô rà nghut lhê. Ngò gi, yhâng é hkyí-tsung tui lé hpyí rà lháng a gingdán; Yhang gi, Chyoiyung Woi-nyí má le, myi má le, nungmoq lé wui-myhup hkâm byi rà nghut lhê.

¹⁷ Yhang gi, loq má byò chung to mù, guq chyaráng má é guq bùm lé hik sân pyám luí, já é guq cham lé gi, guqchyí má tsing kat to mù, guqsóm lé kúm gi, hkâ-nhám le shi byuq a sê é myí èq nyhê hkyô pyám rà nghut lhê." gâ ri.*

¹⁸ Haú mù, Yohan gi, byù haú bang lé gotú dang myo myo èq lhoq pun lhoq kying mù, gabú danglù lé hko kyô nyi ri.

¹⁹ Nghut kôlháng, hkâ-myháng a myáng má mauzau Herut gi, yhanggû é yhangmyi Herudiaq lé lú yu é hkyô èq, yhang kut shut é gotú a ge é mù banshoq é yanmai, Yohan gi, yhang lé tân mhoqshit bê nghut ri.

²⁰ Mara haú pé htoq agó, Herut dum kut jat yu é mara gi, Yohan lé htóng má lhúng kat é nghut ri.

Yesuq, Wui-myhup Hkâm Yu É Hkyô

Mht 3:13-17; Mrk 1:9-11

²¹ Yohan lé htóng má a lhúng kat shimá, byù myo myo gi, wui-myhup hkâm yu nyi kô é hkún, Yesuq le Yohan chyáng wui-myhup hkâm yù mù, kyúdüng nyi le, mauhkúng bóng lô mù,

²² haú Chyoiyung Woi-nyí gi, hpûngkyui gunghkyâng sù é dông mai Yhâng ahtoq má lé gyó nô ri. Haú hkún, "Nàng gi, Ngò chyitdap é Ngá zo nghut lhê; Nàng é ahtoq má Ngò gabú myit ngón nyi lhê." ga mauhkúng mai danghté htoq lo ri.

Yesuq É Byù Xik Shap Kyô É Hkyô

Mht 1:1-17

§ 3:9 Bun zo shí lhúm é lichyúm gi, myit a lhing bang lé, Garai Gasang jéyáng é buinyi jé rà nghut lhê ga naú é nghut ri. * 3:17 Haú èq rajung za, Hkrisduq gi, a ge é byu pé èq ge é byu pé lé gam hkoq pyám rà nghut lhê.

²³ Yesuq gi, Yhang mù zuí hi é hkûn, asak sum xê zàn kô nghut bê; Yhang lé byù hkyam dông gôn wú jáng, Yhang gi, Yosep é yhangzo nghut ri; Yosep gi, Heli é yhangzo, Heli gi, Mahtat é yhangzo,

²⁴ Mahtat gi, Lewiq é yhangzo, Lewiq gi, Melahki é yhangzo, Melahki gi, Yannai é yhangzo, Yannai gi, Yosep é yhangzo,

²⁵ Yosep gi, Matahtiaq é yhangzo, Matahtiaq gi, Amo é yhangzo, Amo gi, Nahum é yhangzo, Nahum gi, Esali é yhangzo, Esali gi, Nagai é yhangzo,

²⁶ Nagai gi, Maat é yhangzo, Maat gi, Matahtiaq é yhangzo, Matahtiaq gi, Semai é yhangzo, Semai gi, Yosek é yhangzo, Yosek gi, Yodaq é yhangzo,

²⁷ Yodaq gi, Yohan é yhangzo, Yoanan gi, Resa é yhangzo, Resa gi, Zerubabelaq é yhangzo, Zerubabelaq gi, Shalahtila é yhangzo, Shalahtila gi, Neri é yhangzo,

²⁸ Neri gi, Melahki é yhangzo, Melahki gi, Adi é yhangzo, Adi gi, Kusam é yhangzo, Kusam gi, Elamadam é yhangzo, Elamadam gi, Era é yhangzo,

²⁹ Era gi, Yoshuq é yhangzo, Yoshuq gi, Elieze é yhangzo, Elieze gi, Yorim é yhangzo, Yorim gi, Mahtat é yhangzo, Mahtat gi, Lewiq é yhangzo,

³⁰ Lewiq gi, Simeon é yhangzo, Simeon gi, Yudaq é yhangzo, Yudaq gi, Yosep é yhangzo, Yosep gi, Yonam é yhangzo, Yonam gi, Eliakim é yhangzo,

³¹ Eliakim gi, Mela é yhangzo, Mela gi, Menaq é yhangzo, Menaq gi, Matahta é yhangzo, Matahta gi, Nahtan é yhangzo, Nahtan gi, Dawiq é yhangzo,

³² Dawiq gi, Yese é yhangzo, Yese gi, Obet é yhangzo, Obet gi, Bua é yhangzo, Bua gi, Salamun é yhangzo, Salamun gi, Nashon é yhangzo,

³³ Nashon gi, Aminada é yhangzo, Aminada gi, Arni é yhangzo, Arni gi, Hesrun é yhangzo, Hesrun gi, Hparet é yhangzo, Hparet gi, Yudaq é yhangzo,

³⁴ Yudaq gi, Yakup é yhangzo, Yakup gi, Isak é yhangzo, Isak gi, Abraham é yhangzo, Abraham gi, Htara é yhangzo, Htara gi, Nahura é yhangzo,

³⁵ Nahura gi, Seruk é yhangzo, Seruk gi, Re-u é yhangzo, Re-u gi, Hpelek é yhangzo, Hpelek gi, Ebera é yhangzo, Ebera gi, Shela é yhangzo,

³⁶ Shela gi, Kainan é yhangzo, Kainan gi, Arhpaza é yhangzo, Arhpaza gi, Shem é yhangzo, Shem gi, Noaq é yhangzo, Noaq gi, Lamek é yhangzo,

³⁷ Lamek gi, Mehtusela é yhangzo, Mehtusela gi, Enuq é yhangzo, Enuq gi, Yaret é yhangzo, Yaret gi, Mahelela é yhangzo, Mahelela gi, Kainan é yhangzo,

³⁸ Kainan gi, Enu é yhangzo, Enu gi, Shet é yhangzo, Shet gi, Adam é yhangzo, Adam gi, Garai Gasâng é yhangzo nghut ri.

4

Yesuq Lé Tsadán Gunглаú É Hkyô *Mht 4:1-11; Mrk 1:12-13*

¹ Yesuq gi, Chyoiyúng Woi-nyí èq byíng mù, Yodan làng mai dum taù lo é hkûn, Chyoiyúng Woi-nyí gi, Yhang lé yoso shut shuí e ri.

² Haù má, Yesuq gi, buinyì myi xê nyí jé shoq, nat Tsadán èq gunглаú é huí ri. Buinyì haù gyoro má, Yesuq gi, haí le a zô é yanmai, zòmút hui bê nghut ri.

³ Haù mù luí, nat Tsadán gi, "Nàng, Garai Gasâng é Yhangzo nghut le gi, luggok shí lé muk dut nhâng aq." ga luí, Yhang lé taí ri.

4 Haú hkûn, Yesuq gi, "'Byù gi, muk èq za asak duì râ a nghut.' ga luí, Chyúmdang má kê tô ri." ✧ ga yhang lé tú tai ri.

5 Hau htâng, nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq lé razup má za tûn shit luí,

6 "Shí ahkáng ayá banshoq eq haú mingdán é hkikhkâm hkyô banshoq, ngò nang lé wó byí lhê; hkâsu mù gâ le, hau pé banshoq gi, ngo lé ap byí to bê nghut mù, ngò byí nau é sù ó yuq lé nghut kôlhâng, byí râ nghut lhê.

7 Haú mù, Nang, ngo lé noq é nghut jáng, shí pé banshoq Nang é dut râ nghut lhê." ga, Yesuq lé tai ri.

8 Haú hkûn, Yesuq gi, "'Haú Yhumsing náng é Garai Gasang lé za, nàng noqkuq dojaú ra râ nghut lhê." ✧ ga luí, Chyúmdang má kê tô ri." ga luí, yhang lé tú tai ri.

9 Nat Tsadán gi, Yesuq lé Yerusalem wà mó má shuí è mù, noqkuq yhum je myhang é shùhtâng htoq má yap nhang to luí, "Nang, Garai Gasang é Yhangzo nghut le gi, shí mai byam gyó kat wú aq.

10 Hkâsu mù gâ le, 'Nang lé upzúng byí nyi râ matú, Garai Gasang gi, Yhâng é maumang lagyô pé lé tai to râ nghut mù,

11 luqgok má náng é hkyí a ló htung shoq, yhangmoq é loq èq Nang lé lhom bún yú kó râ nghut lhê.' ✧ ga luí, Chyúmdang má kê tô ri." ga tai ri.

12 Nghut kôlhâng, Yesuq gi, "'Haú Yhumsing, nungmoq é Garai Gasang lé, wó chyam wú râ a nghut." ✧ ga luí, Chyúmdang má bo tô ri." ga, yhang lé tú tai ri.

13 Nat Tsadán gi, gunglaú é hkyô pé banshoq ban kut jáng, ahko ahkáng láng wú uchyang yhang chyáng mai byam gâng nyi byuq ri.

Yesuq Lé Nazaret Wà Bang He-ngik Pyâm É Hkyô
Mht 4:12-17; 13:53-58; Mrk 1:14-15; 6:1-6

14 Yesuq kúm gi, Chyoiyúng Woi-nyi wum-o byíng é èq Galile mau shut dum taú lo ri. Haú mau jowò hkangmó má, Yhâng é hkyô lé tai pyo ló bùm bekò.

15 Yhangmoq é tarajong pé má, Yesuq mhoqshit byi mù, lhunglhâng bang gi, Yhang lé tai hkya-ôn nyi bum akò.

16 Hau htâng má, Yhang nyi kò lo é Nazaret wà má dum taú jé ló bê; Yhang gi, hkâ-nhám le kut nyi é eq rajung za, Bánno buinyi* lé tarajong má wang é mù, laiká nghap râ ga toq yap é hkûn,

17 Yhang lé myiqhtoi Esai-aq chyúmding byi kôjáng, Yhang chyúmding haú lé hpông kat le,

18 "Yhumsing é Woi-nyi gi, ngá é ahtoq má nyi nyi ri; hkâsu mù gâ le, asho awuí é bang lé gabú danglù hkò kyo râ matú, Yhang ngo lé hkyin yú bê.

Htóng lúng bang lé lhoq htoq râ hkyô eq, myoqjit bang lé myoq dum myàng nhâng râ hkyô hkò kyo râ matú le,

zik zo huí é bang lé nhang kat nhâng râ eq,

19 Yhumsing, Yhâng é byu pé lé hkyi yú râ ahkyíng zanwut lé hkò kyo râ matú le, Yhang, ngo lé nhang kat bê nghut ri." ✧

✧ 4:4 Tarâ Pun 8:3 ✧ 4:8 Tarâ Pun 6:13 ✧ 4:11 Hkya-on 91:11-12 ✧ 4:12 Tarâ Pun 6:16 * 4:16 Bánno buinyi gâ é gi, Yudaq byu pé nòmu é buinyi lé gâ lhê. Ahkui lhê é dông ga jáng, Bánno buinyi gi, bat htoq hkyuq nyi lé âng ri. ✧ 4:19 Esai 61:1-2

ga luí, kê tô é jowò lé myang záng mù nghap ri.

²⁰ Hau htâng, Yesuq gi, chyúmding haú lé ding mù, shuí-u sù lé tau byí pyám luí, dum zung tô ri; tarajong mâ é byù lunglhâng bang gi, Yesuq lé chòm wú tô é hkùn,

²¹ Yesuq gi, "Nungmoq é nohkyap má, ahkuí wó gyô é Chyúmdang shí gi, hkù-nyí yhang lo dik bê." ga luí, yhangmoq lé taí hi kat ri.

²² Lunglhâng bang gi, Yhang ge é hkyô lé saksé hkám byi kômù, Yhâng é nhut mai htoq é jeju bo é dang lé le, maú kôluí, "Shí yuq gi, Yosep é yhangzo a nghut lú?" ga taí bum akò.

²³ Haú mù luí, Yesuq gi, "Nungmoq gè gè yhang, 'Chi sará ê, yhumsing gùng lé lhoq ge yù aq.'† gâ é sanghkyang eq le, 'Nàng, Kaperna-um wà má kut shit wú é hkyô ngamoq wó gyo bê, haú eq rajung za, nàng, náng é yhum mau má le, kut shit wú aq.' ga luí le, ngo lé taí kó rà nghut lhê." ga taí ri.

²⁴ Yhang dum xoq taí é gi, "Ngò, nungmoq lé teng za taí kôlé, myiqhtoi ó yuq le yhumsing é yhum mau má myoqdong wó wú é a nghut.

²⁵ Ngò, nungmoq lé teng za taí kôlé, Eliyaq é pyat lé, Israelaq ming má chuimó myo myo nyi bum akò.

²⁶ Nghut kôlhâng, haú ming má sùm zan eq lhamó hkyuq hkyap yhang, mau a wò dut byuq mù, mutmó gyó tô é hkùn, Garai Gasang gi, yhangmoq mâ é rayuq chyáng le, Eliyaq lé a nhang kat é za, Sidun mau Zarephtha wà mâ é, chuimó myhí rayuq chyáng sheq nhang kat byí é nghut lhê.

²⁷ Myiqhtoi Elisha é pyat má le, Israelaq ming má, manggâm dap é byù myo myo nyi kôlhâng, yhangmoq chyáng mâ é rayuq le wó sán-yúng yù kô é a nghut; Suriq byù Naman ga sù tûngbau hpó za sheq wó sán-yúng é nghut lhê." ga taí ri.

²⁸ Tarajong hkaú mâ é lunglhâng bang gi, haú hkyô lé wó gyo kôjáng, gyai yhang nhik-yo nau bùm kômù,

²⁹ toq yap luí, Yhang lé wà mai hkat htoq mù, yhangmoq é wà xuq tô é bùm gùng htoq mâ é gampyoq má, ê chyún hpyit hkyô pyám rà ga shuí é ló akò.

³⁰ Nghut kôlhâng, Yesuq kúm gi, byù hpûng haú mai so hkoq htoq ló byuq bê nghut ri.

*Agè Ashop É Nat Lé Yesuq Hkat Htoq É Hkyô
Mrk 1:21-28*

³¹ Hau htâng, Yesuq gi, Galile mau mâ é Kaperna-um wà má jé ê mù, Bánno buinyi má byu pé lé mhoqshit hi ló bê nghut ri.

³² Yhangmoq gi, Yhang mhoqshit é hkyô lé mauhong nyi akò; hkâsu mù gâ le, Yhang gi, ahko ahkáng bo é dang đông taí nyi é yanmai nghut ri.

³³ Yesuq, tarajong hkaú mâ mhoqshit byí nyi é hkùn, nat gang wang júng é byù rayuq htê mó o mó eq taí é gi,

³⁴ "Ê, Nazaret wà byù Yesuq ê, ngamoq gi, Nàng eq haí sêng lhê lú? Ngamoq lé lhoq hten rà matú, Nàng jé lé é nghut lhê lú? Nàng gi, Garai Gasâng é Chyoiyúng Sù nghut é lé, ngò sê lhê." gâ ri.

³⁵ Haú hkùn, Yesuq gi, "Hkâjop, yhâng chyáng mai htoq ló aq." ga yhang lé tân kat jáng, nat gi, haú yuq le yhangmoq é gung gùng má lhoq lheq to mù, a nò nhang é za, yhâng chyáng mai htoq ló byuq ri.

† 4:23 Chi sará ê, yhumsing gùng lé lhoq ge yù aq gâ é sanghkyang gi, "Mesaia nghut le gi, mauhpo mù wó tân shit rà nghut lhê." gâ é nghut lhê.

³⁶ Haú mù luí, shiwa byù banshoq bang gi, gyai yang maú byuq kômù, rayuq eq rayuq, "Shí yuq é dang gi, hkasú é dang wá nghut lhê lúh? Yang gi, ahkáng ayá éq le, wum-o bo é éq le, agé ashop é nat pé lé hkunmó hkyó jáng, haú bang htoq ló byuq akô." ga taí lhum bum akô.

³⁷ Haú hkún, haú mau má é awui ayám jowò hkangmó má jam shoq, Yhâng é hkyô lé taí pyo hú ló bùm bekò nghut ri.

Yesuq Nòhpyo Lhoq Gê Byi É Hkyô

Mht 8:14-17; Mrk 1:29-34

³⁸ Yesuq gi, haú tarajong mai toq ló mù, Simun é yhùm má wang ló ri. Simun é yhâng-aumó gi, alí gyai nyé no nyi é nghut mù luí, lhoq gê byi rá matú, Yesuq lé garúm dung byi akô.

³⁹ Yesuq gi, Simun é yhâng-aumó nam má yap to mù, nòhpyo haú lé tân kat jáng, Simun é yhâng-aumó gi, ge ló byuq bê; haú hkún jáng, yang gi, toq mù, yangmoq lé gaí tso gaí huq bê nghut ri.

⁴⁰ Bui wang ló jáng, nòhpyo hui bang eq awáng nòhpyo ajung jung dap é bang lunglhang lé, Yesuq chyáng shuí lé lô kômù, yangmoq rayuq htàng rayuq é ahtoq má Yesuq gi, loq ke byi luí, lhoq gê byi ri.

⁴¹ Nat gâng pé gi, Yesuq lé, "Nàng gi, Garai Gasâng é Yhangzo nghut ri." ga luí, wut taí mù byù myo myô chyáng mai htoq ló byuq akô; Yesuq gi, Hkrisduq nghut é hkyô lé, yangmoq sé kô é yanmai, yangmoq lé dang a wó taí loshoq, Yesuq tân pyâm ri.

⁴² Maubó lô jáng, Yesuq gi, htoq ló mù, gaú é jowò yoso hkaú má é nyi tô ri; shiwa byu pé kúm gi, Yhang lé hkat hô kômù, myang hô kôjáng, yangmoq chyáng mai a ló byuq rá matú châng hkúm wú akô.

⁴³ Nghut kôlhang, Yesuq gi, "Garai Gasâng é mingdán é gabú danglù lé, gó wá pé má le ngò hko kyo rá rá ashí, haú é matú, Garai Gasang gi, ngo lé nhang kat bê nghut lhê." ga luí, yangmoq lé taí ri.

⁴⁴ Haú mù, Yesuq gi, Yuda mau má é tarajong pé má, hko kyô wún nyi ri.

5

Sâng-hi Ji Yù Hui É Chángô Pé

Mht 4:18-22; Mrk 1:16-20

¹ Radàm má lé, Yesuq gi, Genesarat nhông yàm má yap tô le, Garai Gasâng é mungdang gyo rá ga, shiwa byu pé, Yhâng chyáng chyín chyap wang lé lô kô é hkún,

² nhông gin-gau yàm má lhai razúm joq tô é lé, Yhang myang kat ri. Ngogún dú bang kúm gi, lhai mai htoq mù, yangmoq é gùn pé lé chí nyi akô.

³ Yesuq gi, Simun é lhai má wàng mù gin-gau mai rachyit lhoq kang nhâng luí, haú lhai htoq má zung to mù, shiwa byu pé lé mhoqshit taí kyô nyi ri.

⁴ Dang ban taí jáng, Yesuq gi, Simun lé, "Wui nik é shut hui luí, ngozo wó kông yù rá matú, nungmoq é gùn pé lé dú hkyô kat keq." ga taí ri.

⁵ Simun gi, "Yhumsing é, ngamoq amàn ra-myin mau shikut wú kôlhang, haí le a wó; nghut kôlhang, náng dang é yanmai, ngò gùn dú hkyô kat rá nghut lhê." ga tú taí ri.

⁶ Gùn pé lé hkyô kat kôjáng, yangmoq gi, ngozo gyai myo shoq lé wó kông yù kômù, gùn lhang jeq ló rá su dut é yanmai,

⁷ lhai gó lhum má é luzúm wui lé, lé garúm yù rá matú loq lik lik kat kôjáng, haú bang lé lô mù, haú lhai í lhum aluq myup ló shoq ngozo lé kat pyíng bekò.

⁸ Simun Petruq gi, haú lé myàng jáng, Yesuq é hkyî wang má hkyihput htuoq mù, "Yhumsing ê, ngá chyáng mai ló byuq aq, haí mù gâ le, ngò gi, yubak dap é byù nghut nyi lhê." ga tai ri.

⁹ Haí mù luí gâ le, Simun le, yhang eq nyi tô é lhunglhâng bang le, haú su ngozo wó yu é yanmai, maú nyi bùm kômù nghut ri.

¹⁰ Simûn é luzùm nhik, Zebedi é yhangzo Yakuq eq Yohan le, haú su chòm maú byuq akô.

Hau htâng, Yesuq gi, "Hkâgyuq, ahkuí mai nàng gi, byù lé châng kóng sù dut râ nghut lhê." ga luí, Simun lé tai ri.

¹¹ Yhangmoq gi, wuiyàm má jé jáng, lhai pé eq yhangmoq é zè banshoq lé tô pyám to luí, Yesuq htâng cháng bekô nghut ri.

Manggâm Dap Bang Lé Yesuq Lhoq Gê Byí É Hkyô

Mht 8:1-4; Mrk 1:40-45

¹² Radàm lé, Yesuq gi, wà rawà má nyi tô lé, ragùngdù é manggâm dap é byù rayuq lé lo ri; haú yuq gi, Yesuq lé myàng jáng, hkyihput htuoq luí, "Yhumsing ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga dúng wut ri.

¹³ Yesuq gi, loq lhâm kat mù, haú yuq lé é záng luí, "Ngò dóng lhê, sân-yúng aq hkoi." ga tai ri; haú hkûn jáng, haú yuq é manggâm gi, ge byuq bê nghut ri.

¹⁴ Yesuq gi, "Nàng, shí hkyô ó lé le hkâtaí kyo. Nghut kôlhâng, náng é gungdu lé, hkyangjong hpô chyáng ló tân shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé tai hkûm kat ri.

¹⁵ Nghut kôlhâng, Yesuq é hkyô gi, je riyhang tai pyo hù jam ló mù luí, shiwa byù rajùm rayò gi, Yhâng é dang gyo râ matú le, yhangmoq é nòhpyo lhoq gê byí nhâng râ matú le, lé zup míng tô akô.

¹⁶ Yesuq kúm gi, Yhang baú tsik za yoso shut htoq é mù, kyù é dung dung kut ri.

Gùngjum Shí Sù Lé, Yesuq Lhoq Gê Byí É Hkyô

Mht 9:1-8; Mrk 2:1-12

¹⁷ Ra-nyí lé, Yesuq mhoqshit nyi é hkûn, Hparishe pé eq tarâ sará pé le, Yesuq nâm má zung tô akô; haú bang gi, Galile mau wà hkyap hkgangmó má é bang eq Yuda mau, Yerusalem wà mó má é bang nghut akô. Yhumsing Garai é wum-o a-tsam le nòhpyo lhoq gê râ matú Yesuq eq rahá nghut nyi ri.

¹⁸ Haú hkûn, byù ra-am gi, gùngjum shí sù rayuq lé taphkang mai waq lé lô kômù, haú yuq lé, yhúmhmaú má nyi tô é Yesuq é hí má, wó lhez byi shoq ga hkyô ho nyi akô.

¹⁹ Byù lùm myô chyin chyap to mù, haú nò sù lé hká dông le a wó shuí wàng kôluí, haú yhumhkûng htoq shut waq doq ló mù, haú yuq lé taphkang eq roq, shiwa hpong gung gung, Yesuq é hí ang ang má hkyô hang kat akô.

²⁰ Yesuq gi, yhangmoq é lumjáng myit lé byu myàng jáng, "Byù nàng ê! Náng é yubak mara lé hkyut pyám byi bê." ga tai ri.

²¹ Haú hkûn, Hparishe pé eq tarâ sará pé gi, "Shí su ga luí, Garai Gasang lé rhoi dang tai é sù gi, ó yuq wá nghut lhê lhu? Garai Gasang za a nghut jáng, yubak mara wó hkyut pyám byi sù gi, ó yuq wá nghut lhê lhu?" ga luí, myit són wui nyi bum akô.

²² Yesuq gi, yhangmoq myit són wui nyi é hkyô lé sé mù, "Nungmoq é i-myyit hkaú má, haí mù shí pé lé myit són wui nyi akô lhu?"

23 'Náng é yubak mara lé hkyut pyám byi bê.' nghû taí rã eq, "Toq luí, hkyô so aq.' nghû taí rã má, hká hkun je taí lui lhê lúh?"

24 Nghut kôlhang, haú Byu Yhangzo* gi, mingkan htoq má, mara hkyut byi rã ahkáng wó Sû nghut é lé, nungmoq lé sé nhâng nau lhê." ga mù, haú gúngjum shí sù lé, "Ngò, nàng lé taí bá, toq aq, náng é taphkang yu chùng luí, yhùm taú ló aq hkoi." ga taí ri.

25 Haú hkún jáng, yhang gi, yhangmoq é hí má toq yap mù, yhâng é taphkang waq chùng luí, yhâng é yhùm shut Garai Gasang lé hkya-on kungtôn uchyang ló byuq bê.

26 Byù banshoq bang gi, gyai maú byuq kômù luí, Garai Gasang lé hkya-on kungton akò nghut ri. Yhangmoq gyai gyuq maú dik é èq le, "Hkû-nyí, nga-nhúng, mauhpo amû pé lé myàng bê." ga taí nyi akò.

Yesuq Gi, Lewiq É Yhùm Má Yubak Dap Bang Eq Rahá Zo Shuq É Hkyô
Mht 9:9-13; Mrk 2:13-17

27 Hau htâng má, Yesuq sô e ló le, Lewiq gâ é kang guq sù rayuq yhâng é kang guq zúm má zung tô é lé é myàng mù, haú yuq lé, "Ngá htâng cháng aq." ga taí ri.

28 Lewiq gi, haú má é zè banshoq lé tô pyâm to mù, toq luí, Yhâng htâng cháng bê nghut ri.

29 Hau htâng, Lewiq gi, yhâng é yhùm má Yesuq é matú zoshuq poi mó kut byí ri; poi haú má kang guq bang myo myo eq byù góbang le, yhangmoq eq rahá za zô zung nyi bum akò.

30 Haú mù luí, Hparishe pé eq yhangmoq hpúng má é tará sará pé kúm gi, "Nungmoq gi, haí mù luí kang guq bang eq yubak dap bang eq rahá zo shuq nyi akò lúh?" ga, Yhâng é chángzô pé lé mara hùn dang taí akò.

31 Yesuq gi, yhangmoq lé, "Wángzán bang chi sará a ra kó, nõhpyo hui bang za sheq ru rã lhê.

32 Ngò gi, dingmán bang lé wut yù rã matú jé lé é a nghut, yubak dap bang myit lhing rã matú sheq jé lé é ru nghut lhê." ga tú taí ri.

Zoshuq Gám Hkyô Eq Séng Luí, Yesuq Taí É Hkyô
Mht 9:14-17; Mrk 2:18-22

33 Dum, yhangmoq gi, "Yohan é chángzô pé gi, zoshuq gám mù kyúdung dung kut akò; Hparishe pé é chángzô pé le, haú su kut akò; nghut kôlhang, náng é chángzô pé gi, haí mù zô nyi shuq nyi akò lúh?" ga Yesuq lé taí akò.

34 Yesuq, yhangmoq lé tú taí é gi, "Bíng pé gi, lusik eq rahá nghut nyi to ashí hkún, yhangmoq lé zo shuq wó gám nhâng rã lúh?"

35 Nghut kôlhang, lusik† lé yhangmoq chyáng mai shuí yu pyâm é hkyíng jé rã nghut lhê; haú buinyi pé má kúm gi, yhangmoq, zoshuq gám kó rã nghut lhê." gâ ri.

36 Dangtú dông mai le, Yesuq, yhangmoq lé taí é gi, "Mebu sik má é lãng cheq yù mù, mebu xau má hpo é gi, ó a kut wú kó; haú su kut é nghut jáng, mebu sik lé le lãng cheq pyâm é dut mù, pán jap sik le mebu xau eq du lhum rã a nghut.

* 5:24 Byu Yhangzo gâ é gi, Yesuq Yhânggùng yhang lé le taí e nghut lhê, Mesaia lé le taí é nghut lhê.

† 5:35 Lusik gâ é gi, Yesuq lé taí nau é nghut lhê.

³⁷ Tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng mù, tsibiyiq wing le yui shun byuq, htûng le htên byuq, dut râ nghut lhê.

³⁸ Haú su a dut shoq gi, tsibiyiq wing asik lé, shokuq htûng asik má kat ra râ nghut lhê.

³⁹ Tsibiyiq wing axau shuq nyí bè sù gi, asik lé a shuq naú nghut râ; hkâsu mù gà le, 'Axau sheq je nghâm ri.' ga tai râ." gà ri.

6

Bánno Buinyi Má, Yesuq É Chángzô Pé Kyôshi Shap Zô É Hkyô
Mht 12:1-8; Mrk 2:23-28

¹ Bánno buinyi ra-nyí má, Yesuq gi, Yhâng é chángzô pé eq yò hkaú mai sô lai ló é hkûn, Yhâng é chángzô pé gi, kyôshi ratsuí langshap yú mù, loq èq nè hpuq zô akô.

² Haú mù luí, Hparishe pé ra-am gi, "Bánno buinyi má a ge kut jung lé, nungmoq gi, hai mù luí haú su kut akô lú?" ga tai akô.

³ Yesuq gi, yhangmoq lé, "Dawiq lháng gi, yhâng htâng châng é bang eq raha zòmut huí é hkûn, hkâsu kut é hkyô lé, nungmoq a nghap wú kó lú?"

⁴ Dawiq gi, Garai Gasâng é yhùm* hkaú má wang é mù, hkyangjông pé mai lai luí, ó le a ge zô é, kyâng tô é muk lé yù zo mù, yhâng htâng châng é bang lé le, byi tsô é a nghut kó lú?" ga tû tai ri.

⁵ Hau htâng, Yhang gi, "Haú Byu Yhangzo gi, haú Bánno buinyi é Yhumsing nghut lhê." ga yhangmoq lé tai ri.

Loq Jum Shí Sù Lé Yesuq Lhoq Gê Byi É Hkyô
Mht 12:9-14; Mrk 3:1-6

⁶ Gotú Bánno buinyi má le, Yesuq gi, tarajong má wàng mù mhoqshit nyi é hkûn, loqyo loq ajum shi byuq é byù rayuq haú má nyi tô ri.

⁷ Haú hkûn, tarâ sará pé eq Hparishe pé gi, Bánno buinyi má nòhpyo lhoq gê byi râ lú ga luí, Yhang lé mara wó hún shoq ga gyám wú nyi akô.

⁸ Yesuq kúm gi, yhangmoq é i-myt lé sé sù nghut luí, loq jum shí sù lé, "Toq mù, banshoq bâng é hí má, yap shit aq." ga tai kat ri. Haú yuq le, toq mù yap tô ri.

⁹ Haú hkûn, Yesuq gi, "Ngò nungmoq lé myí wú kôlé, Bánno buinyi má, ge é muzó kut râ, a ge é muzó kut râ, byù asak hkyí râ eq lhoq hten râ pé má hká lhum kut le sheq tarâ wang lhê lú?" ga luí, yhangmoq lé tai ri.

¹⁰ Hau htâng má, yhangmoq banshoq lé lhing wú mù, haú loq jum shí sù lé "Náng é loq nyhang kat aq." ga tai kat é hkûn lé, yhang le loq nyhang kat luí, yhâng é loq gi, shoq za ge byuq bê nghut ri.

¹¹ Nghut kôlháng, yhangmoq gi, myoq chum nhò chik yhang nhik-yo naú kómù luí, "Yesuq lé hkâsu wá kut pyám râ lú?" ga luí, rayuq eq rayuq tai lhum nyi akô.

Raxe Í Yuq Lé Lagyo Ga Myhîng Yu É Hkyô
Mht 10:1-4; Mrk 3:13-19

¹² Haú yoq ra-nyí má, Yesuq gi, kyûdung râ ga bùm shut htoq e ló luí, ra-myin mau Garai Gasang lé kyûdung nyi ri.

* 6:4 Garai Gasâng é yhùm nghu é gi, Yerusalem wá mó má joq é saksé zúm lé gà é nghut lhê.

13 Maubó jáng Yhâng é chángzô pé lé wut yù mù, yhangmoq chyáng mã é raxe í yuq lé hkyin yù luí, lagyô pé ga myhíng to byí ri.

14 Haú bang gi, Yesuq èq Petruq ga myíng myhíng byí é Simun eq, yhanggu Andre, Yakuq eq Yohan, Hpilip eq Barhtolome,

15 Mahte eq Htomaq, Alhpe é yhangzo Yakuq eq Zelutuq† dut é Simun,

16 Yakuq é yhangzo Yudaq eq, Yesuq lé ap pyám rà sù Yudaq Iskarut pé nghut akô.

Hkungsô Wó É Hkyô Eq Dingnyé Wó É Hkyô

Mht 4:23-25; 5:1-12

17 Yesuq gi, yhangmoq eq rahá gyó ló mù, janggyú má yap tó é hkûn; Yhâng é chángzo moq mó lé mù, Yuda mau banshoq mã é bang, Yerusalem wà mó mã é bang, wuìshuq lung-aú ayám mã é Turuq myuq eq Sidun myuq mã é bang, rajùm rayò gi,

18 Yhâng é dang gyô yù rà eq yhangmoq é nõhpyo lhoq gê nhâng rà matú, rahá za zup míng tó akô. Agè ashop é nat èq zing-ri huí é bang le ge byuq akô.

19 Yhâng é gùng mai htoq é wum-ô èq byù banshoq lé lhoq gê byí nyi é yanmai shiwa byu pé le Yhang lé wó záng shoq ga, ho nyi akô.

20 Haú hkûn, Yesuq gi, Yhâng é chángzô pé lé wú kat luí taí é gi,

"Myùng bang nungmoq gi, hkungsô wó nyi ri, hkâsu mù gà le, Garai Gasâng é mingdán‡ gi, nungmoq é mingdán nghut nyi ri.

21 Ahkuí, zòmut wuìshit huí nyi é bang nungmoq gi, hkungsô wó nyi ri, hkâsu mù gà le, nungmoq nhik dik shoq myàng zo kó rà nghut lhé.

Ahkuí, ngau nyi bang nungmoq gi, hkungsô wó nyi ri, hkâsu mù gà le, nungmoq myang wui kó rà nghut lhé.

22 Haú Byu Yhangzô é yanmai nungmoq lé su èq a nguì é, lhoq hpyoq lhoq kâng é, hoq hpu nhang é,

agè ashop nghut é dong jihpoi gamhkui huí é hkûn, nungmoq gi, hkungsô wó nyi ri.

23 Haú hkûn lé, gabú byam chyú nyi keq, hkâsu mù gà le, wú keq, nungmoq é matú kô é chyunghuq gi, mauhkúng mingdán má joq tó ri. Ngò, nungmoq lé taí lhé, hkâsu mù gà le, yhangmoq é íchyí iwa pé le myiqhtoí pé§ lé haú su kut wú bekô."

24 Nghut kólhang, sùt wó bang nungmoq gi, dingnyé wó rà, hkâsu mù gà le, nungmoq gi, yhumsing gùng má nhik shí nhik dik é hkyô lé huí yù bekô.

25 Ahkuí, gyi gyi dau dau myàng zo myàng shuq nyi é bang nungmoq gi, dingnyé wó rà, hkâsu mù gà le, nungmoq zòmut wuìshit é hui kó rà nghut lhé.

Ahkuí, wui nyi é bang nungmoq gi, dingnyé wó rà, hkâsu mù gà le, iyon yôn é eq ngaubyi ngau-nhap htoq é hui kó rà nghut lhé.

26 Byù banshoq bang, nungmoq lé ge é byù ga kôjáng, nungmoq gi, dingnyé wó rà,

† 6:15 Zelutuq gà é lichyúm gi, yhumsing zui sai é hkyô má gyai yhang myit lòm shiróng é sù lé ga lhé. Haú u lé, Israelaq byu pé gi, mingdán luthkyô wó rà matú shikut nyi é hpúng bang lé, Zelutuq gà lhé.

‡ 6:20 Garai Gasâng é mingdán gà é gi, Garai Gasang up é lé gà lhé. § 6:23 Myiqhtoí pé le zing-ri huí é yanmai, yhangmoq chyunghuq wó nyi akô. Haú eq rajung za, jamjau huí é bang nga-nhúng le chyunghuq wó rà nghut lhé.

hkâsu mù gâ le, yhangmoq é îchyi îwâ pé le, myiqhtoi pyoq pé* lé, haû su ga tai wú bekô.

Gye Pé Lé Chyitdap Râ Hkyô

Mht 5:38-48; 7:12

²⁷ Hau htoq agó, ngá dang gyô nyi bang nungmoq lé ngò tai kôlé, nungmoq é gye pé lé chyitdap nyi keq; nungmoq lé a nau a wôm é bang lé ge é hkyô kut keq;

²⁸ nungmoq lé nhîng é bang lé, shimân byi keq; nungmoq lé rhoi é bang lé kyûdung byi keq.

²⁹ Nang lé bo-pyuq rahkyam shut pyuq byi sù lé, rahkyam dum hkâm byi shi aq; nang bumó hkyut yu é sù lé, buzo le dum hkyut byi shi aq;

³⁰ nang lé rajung jung dũng é sù lé le, byi pyám aq; nang zè yu pyám byi é su chyáng mai le, hkâdũng yù lo.

³¹ Nungmoq ô nau é dõng supé lé kut nhâng nau é su, yhangmoq lé le kut byi keq.

³² Nungmoq lé chyitdap é bang lé za chyitdap kô le gi, nungmoq é matú hai akyû bò kó rà lú? Yubak dap bang le, yhumsing lé chyitdap é bang lé gi, chyitdap nyi akô.

³³ Nungmoq lé ge é dõng kut nyi é bang lé za, ge é dõng kut nyi kô le gi, nungmoq é matú hai akyû bò kó rà lú? Yubak dap bang le haû su kut nyi akô.

³⁴ Supé lé zè chyi byi le, dum wó tau byi rà su dut é bang lé za, chyi byi le gi, nungmoq é matú hai akyû bò kó rà lú? Yubak dap bang lhâng chyi byi é myhó dum wó yû shoq, yubak dap é bang lé chyi byi akô.

³⁵ Nghut kôlhâng, nungmoq gi, nungmoq é gye pé lé chyitdap mù, ge é dõng kut byi nyi keq. Dum wó tau yù rà lé myoq a byu é za, chyi ngho byi keq; haû su kut jáng, nungmoq wó é chyunghuq ko rà eq, Myhang htáng htúm Su é yhangzô pé dut rà nghut lhê; hkâsu mù gâ le, Yhang gi, jeju a dat bun bang eq agè ashop é bang lé ge é kut nyi ri.

³⁶ Nungmoq é Îwa Garai Gasang shogyo nhikmyin sê é su, nungmoq le shogyo nhikmyin nyi keq.

A Jéyáng Râ Hkyô

Mht 7:1-5

³⁷ A jéyáng é za nyi keq; haû jáng, nungmoq le jéyáng é a hui kó rà nghut lhê. A doqdân é za nyi keq; haû jáng, nungmoq le doqdân é a hui kó rà nghut lhê. Mara hkyut byi keq; haû jáng, nungmoq le mara hkyut byi é hui kó rà nghut lhê.

³⁸ Byi keq, haû jáng, nungmoq le dum byi é hui kó rà nghut lhê. Mán é bũng mai býng mui shũn shoq nhũn chyíng, dũn chyíng kat mù, nungmoq é tanghkoí hkaú má lik kat byi é hui kó rà. Hkâsu mù gâ le, nungmoq lik byi é bung èq, nungmoq lé dum lik byi rà nghut lhê." gâ ri.

³⁹ Hau htoq agó, Yhang dangtú ralhum dõng yhangmoq lé dum tai é gi, "Myoqjit sù gi, myoqjit sù lé hkyô wó tũn shit lhê lú? Yhangnhik í yuq é donghkong má byit gyó kó rà nghut lhê, a nghut kó lú?"

⁴⁰ Jongzo gi, sará htoq gyaú rà a nghut; nghut kôlhâng, gúm shoq mhoq yù bê sù ó nghut kôlhâng, yhumsing é sará su dut rà nghut lhê.

⁴¹ Yhumsing myoq hkaú má lúng tô é siktúm† lé lháng a myit wú é nhîng,

* 6:26 Myiqhtoi pyoq pé gi, Garai Gasang jéyáng é hui rà. † 6:41 Siktúm nghu e gi, yubak mara kô é lé tai lhê.

hai mù luí, nunggu nungmâng é myoqwàng[‡] lé myang lhê lúhú?

⁴² Yhumsing é myoq má lúng tô é siktúm lé lháng a myàng sú nhing, 'Gumang hpó ê, náng myoq má lúng tô é myoqwàng lé, ngò choq pyám byi lé.' nghú luí, náng é gumang hpó lé hkâsu wó taí rã lúhú? Gegùn labyoq kut sú ê, náng é myoq má lúng tô é siktúm lé hí choq pyám aq. Haú jáng sheq, nunggu nungmang é myoq má wang tô é myoqwàng lé choq pyám byi rã matú, náng san za myàng rã nghut lhê.

Agâm Eq Ashi

Mht 7:17-20; 12:34-35

⁴³ A ge é ashí zuí é, ge é shigâm hkâmá le a joq. Ge é ashí zuí é, a ge é shigâm le a joq.

⁴⁴ Haú mù luí, shigâm hkingmó lé, zuí é ashí lé wú mù wó sê hkyin yu lhê. Danké, zubyap mai maihpáng-shi ó le a myang hpyoq yù wú, zogyóm mai le tsibiyq shi a wó hpyoq yu wú.

⁴⁵ Ge é sú gi, yhumsing é i-myyit unghkaú má é sutdò mai ge é zè pé lé lhoq htoq shit lhê. Agè ashop é sú gi, yhumsing é i-myyit unghkaú má é agè ashop é sutdò mai, agè ashop é zè pé lé lhoq htoq shit lhê. Hai mù gâ le, yhâng é i-myyit unghkaú má byíng mui tô é lé za, yhâng é nhut mai taí htoq lo é nghut lhê.

Luqtân Htoq Má Yhûm Saí Sú Eq Myì Chîn Dum Má Yhûm Saí Su É Hkyô

Mht 7:24-27

⁴⁶ Ngò taí é eq rajung za lháng a wó châng kut kô é nhing, hai mù luí, nungmoq Ngo lé 'Yhumsing ê, Yhumsing ê.' nghu nyi akò lúhú?

⁴⁷ Ngá chyáng lé mù, ngá dang gyô yù luí, châng kut é sú ó nghut kôle, hkasú é sú eq wuí é lé ngò nungmoq lé shit kyo kôle.

⁴⁸ Haú yuq gi, wahpang yhûm saí le, nik nik du luí a dui é lungtân htoq má apûn awang hí é sú eq wuí lhê. Wuí jê lò luí wuibaú pé èq yhûm haú lé lo gùn kôlháng, ging ging tít tít saí to bè nghut luí, haú lé a wó gun nhún.

⁴⁹ Ngá dang gyô yù mù, a cháng sú gi, apûn awang a saí é za myì chîn dum má wahpang yhûm saí sú eq wuí nyi ri. Wuíbaú pé èq yhûm haú lé lo gun kat é eq, haú hkûn jáng, léng gyop byuq ri. Yhûm haú byoq hten byuq é gi, yù whuí a bò loshoq dut byuq rã nghut lhê." gâ ri.

7

Romaq Gyezau Rayuq É Lumjîng Myit

Mht 8:5-13; Yhn 4:43-54

¹ Yesuq gi, shiwa byu pé lé ban mhoqshit é htâng má, Kaperna-um wà shut wang ló ri.

² Haú hkûn, Romaq gyezau rayuq é chyitdap dui-nhâng zoshâng gi, shí-nò no nyi ri.

³ Haú u lé, gyezau hpó gi, Yesuq é hkyô lé wó gyo jáng, yhâng é dui-nhâng zoshâng lé lhoq gê byi rã matú, Yesuq lé é ji lò keq ga, Yudaq suwún wuí lé nhang kat ri.

⁴ Haú bang gi, Yesuq chyáng jé é kô é hkûn, "Yhang gi, nàng shí hkyô kut byi rã matú gingdán é sú, yhang nghut nyi ri;

⁵ hkâsu mù gâ le, yhang gi, nga-nhûng amyú lé chyitdap é eq, ngamoq matú tarajong le kut byi sú nghut ri." ga luí, Yhang lé zuq zuq dúng wut nyi akò.

⁶ Haú mù luí, Yesuq gi, yhangmoq eq rahá za e ló ri.

[‡] 6:41 Myoqwàng nghu e gi, yubak mara atiq azo lé taí é nghut lhê.

Háu yhûm eq hká hé a wê é má jé jáng, Romaq gyezau hpó, yhâng é luzúm wui lé tai nhang kat é gi, "Yhumsing Yesuq ê, náng gûng lé hkâlhoq hkyik lo. Nang, ngá é laishûn-htâng má, lé nang râ lhang ngò má a gingdán.

⁷ Háu mù, ngò, náng chyáng jé lé râ matú gingdán é sù a nghut; Nang, dang rahkun za tai kat laq, háu hkûn, ngá é dui-nhâng zoshâng ge lô râ nghut lhê.

⁸ Hkâsû mù gâ le, ngò le ahkáng ayá wó é zau rayuq é a-ô má é zau nghut lhê; ngá é a-ô má le gyezô pé nyi lhê, rayuq lé 'Ê aq!' nghu le, yhang e lô lhê; góyuq lé, 'Lò aq!' nghu le, yhang lò lhê; ngá jûn lé le, 'Shi kut aq!' nghu le, yhang kut lhê." gâ ri.

⁹ Yesuq gi, dang háu lé wó gyo jáng, háu yuq é hkyô lé maú byuq lui, Yhang htâng châng é shiwa byu pé lé lhing wú mù, "Ngò, nungmoq lé tai kôlé, Israelaq amyû má lhang, shi í lumjîng é sù lé, Ngò a myang wú." ga tai ri.

¹⁰ Nhang kat é bang yhûm má dum taú jé jáng, no nyi é dui-nhâng zoshâng gi, ge to lánq é lé lô myang akô.

Shi Sû Lé Dum Lhoq Tui É Hkyô

¹¹ Háu htâng hkâ-myháng a myáng má, Yesuq gi, Yhâng é chángzô pé eq, shiwa byu moq mó le mù rahá za Na-in gâ é wà shut e lô akô.

¹² Háu wà wàng hkum má jé lo é hkûn lé, chuimó myhî é yuqzo te gi, shi mù, yhâng é mâng lé waq htoq lé lo akô. Wà byu myo myo le, chuimó myhî háu eq rahá châng lé lo akô.

¹³ Yhumsing gi, háu chuimó myhî lé myàng jáng, yhang lé wú shogyo lui, "Hkâ-ngaù." ga tai ri.

¹⁴ Yesuq gi, gung shut huí é mù, loq èq é záng kat ri. Háu hkûn, waq tô é bang le jáng yap to byi akô. Yhang gi, "Zorâm ê, ngò, nang lé tai lhê, toq aq." ga tai ri.

¹⁵ Háu hkûn, shi bê sù gi, toq zûng mù dang tai lo ri. Yesuq gi, zorâm háu lé yhângnú chyáng dum ap byi ri.

¹⁶ Byu lhunglhang bang gyuq maú bùm kôluí, Garai Gasang lé hkya-ôn é dang gi, "Myiqhtoi mó, nga-nhûng chyáng lé pô htoq bê nghut ri. Garai Gasang gi, Yhâng é amyû lé garûm râ ga lé kûm wú nyi ri." ga tai nyi akô.

¹⁷ Háu Yesuq é hkyô eq sêng é ludang lé, Yuda mau eq háu mau awui ayàm jowò hkangmó má tai pyo myhîn lô bum akô.

Yesuq Eq Wui-myhup Sará Yohan É Hkyô

Mht 11:1-19

¹⁸ Háu hkûn, wui-myhup sará Yohan é chángzô pé gi, háu hkyô banshoq yhang lé lo tai kyô akô.

¹⁹ Háu mù lui, Yohan gi, yhâng é chángzo í yuq lé ji yù mù, háu Yhumsing chyáng nhang kat lui, "Nang gi, háu jé lé lô râ Sû nghut lhê lú? Háu a nghut jáng, ngamoq, góyuq lé lánq ra shirâ lú?" ga, myi nhang kat ri.

²⁰ Háu nhik gi, Yesuq chyáng jé jáng, "Nang gi, háu jé lé lô râ sù nghut lhê lú? Háu a nghut jáng, ngamoq góyuq lé myoqbyu lánq nyi ra shirâ lú?" ga lui, Wui-myhup Sará Yohan gi, ngá-nhik lé náng chyáng myi nhang kat ri." ga tai akô.

²¹ Háu u yhang, Yesuq gi, nò zo hpyo zo, noli nojàng huí é bang eq agè ashop é nat dap jun dap é byu myo myo lé, lhoq gê byi ri. Myoqjit bang myo myo lé le, myoq dum myàng nhang ri.

²² Háu hkûn, Yesuq gi, yhangnhik lé, "Myàng mi-myàng, wó gyo má wó gyo, Yohan lé lô tai kyo keq; myoqjit bang, myoq wó myàng bekô; hkyi hten bang

le, wó so bekô; manggâm dap bang le, lhoq gê byí é hui bekô; nojit bang le, wó gyo bekô; shí bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê.

23 Ngá é yanmai, Ngo lé lum shut é hkyô a bò sù gi, hkungsô wó nyi ri." ga tai ri.

24 Yohan é chángzô nhik ló byuq é htâng má, Yesuq gi, Yohan eq séng luí, byù moq mó lé tai é gi, "Nungmoq gi, hai lé hpuq wú rà matú, haù yoso shut e akô lú? Lai èq hik nhùn é jamgâm lé wú rà matú nghut akô lú?"

25 Haù a nghut jáng, hai lé wú rà matú e akô lú? Nú-nhâm é mebu wut sù lé wú rà matú e akô lú? A nghut! Wú keq, gyai hpaù é mebu wut luí agùn agó wó bang gi, hkohkâm-wâng pé má sheq ru nyi lhê.

26 Haù nghut le gi, hai lé wú rà matú é kô é lú? Myiqhtoi rayuq lé lú? Haù kúm nghut ri. Ngò, nungmoq lé tai kôlé, Yohan gi, myiqhtoi htoq lháng gyaù sù nghut lhê.

27 Haù yuq é hkyô lé, Chyúmdang má kê tô é gi, 'Wú aq, Náng é hkyô lajang lánng rà matú, Ngá é lagyo lé, Náng é hí má Ngò nhang kat rà nghut lhê.'*

gâ ri.

28 Ngò, nungmoq lé tai kôlé, myiwe wuì mai hku kat é bang má, Yohan htoq je kô é rayuq lháng a nyi, nghut kôlháng, Garai Gasâng é mingdán má je tiq dik sù gi, Yohan htoq je kô lhê." gâ ri.

29 Míngbyù lhunglhâng bang eq kang guq bang gi, dang haù pé lé wó gyo kôjáng, Yohan byí é baptisma lé hkâm yù kô é nghut mù luí, Garai Gasâng é dǐngmán é hkyô lé sê gyô yu akô.

30 Hparishe pé eq tarâ sará pé kúm gi, Yohan byí é baptisma a hkam yù kômù luí, Garai Gasang hen lajang é hkyô lé yhumsing gung é matú he-ngik pyâm akô.

31 Yesuq dum tai é gi, "Haù mù luí, byù myù shí lé, Ngò, hai èq tai kê wú rà lú? Yhangmoq hai eq wuì akô lú?"

32 Yhangmoq gi, 'Nungmoq é matú, ngamoq sampyí mut byi kôlháng, nungmoq gi, a gó kó, ngamoq ngaù hkyangsang kôlháng, nungmoq gi, a ngaù kó.'

ga luí, gai pé má zùng uchyang rayuq eq rayuq wut tai lhùm nyi é zoshâng wuì eq wuì akô.

33 Hkâsu mù gâ le, Wui-myhup Sará Yohan jé lé luí, muk a zo, tsibiyiq a shuq é nyi le, 'Yhang gi, nat gang dap sù nghut ri.' ga luí, nungmoq tai akô.

34 Haù Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum tai akô.

35 Nghut kôlháng, hpaqchyí byéng-yá é yhangzô pé gi, hpaqchyí byéng-yá tengmán é hkyô lé saksé hkám byí nyi akô."* gâ ri.

Yubak Dap É Myiwe Rayuq, Yesuq Lé Xù But Byí É Hkyô

36 Hparishe rayuq gi, Yesuq lé yhâng chyáng zang zo rà matú ji kat ri. Haù mù, Yesuq gi, haù Hparishe é yhùm má wàng luí zo rà matú zung tò ri.

* 7:27 Mal 3:1 * 7:35 Nghut kôlháng, Garai Gasâng é hpaqchyí byéng-yá lé lhom hap yu é banshoq bang gi, Garai Gasâng é hpaqchyí byéng-yá haù, tengmán ri ga saksé hkám nyi akô.

³⁷ Haú hkûn, wú keq, haú wâ mâ é yubak dap é myiwe rayuq gi, Yesuq haú Hparishe é yhûm má zô zung tô é lé sé jáng, gyai hpau dap é namngón xû bo é luq hpyû bông yu lé luí,

³⁸ Yesuq é nunghtáng hkyî wàng má ngau yap to mù, Yhâng é hkyî má ngaubyî èq záng lhoq teq byi jáng, ûxam èq but sut pyám byi ri. Dum nghut jáng, nhut èq puq luí mura lé but byi ri.

³⁹ Yesuq lé ji é Hparishe wá gi, haú lé myàng jáng, "Shí yuq myiqhtoi nghut le gi, Yhang lé záng htùng é sù, ó yuq nghut é eq hkâsû é yubak dap é myiwe nghut é lé, Yhang sé rà nghut lhê." ga luí, yhâng é unghkaú má myit nyi ri.

⁴⁰ Yesuq gi, "Simun ê, Ngò, nang lé tai rà rajung joq ri." ga tai ri.

Simun le, "Sarâ ê, tai aq." ga tai kat ri.

⁴¹ Haú hkûn, Yesuq gi, "Ngùn chyî zo sù rayuq chyáng, chyîn dap é byù í yuq nyi ri. Rayuq gi, denari† ngo shò chap, rayuq gi, ngo xê chap dap ri.

⁴² Haú nhik gi, chyîn xap rà ngùn a wó kôluí, chyîn yhumsîng gi, yhangnhik lé xap a ra lò gâ pyám ri. Haú mù luí, haú nhik mâ é hká yuq gi, yhang lé je chyitdap rà lhú?" ga myí ri.

⁴³ Simun gi, "Je myo lhoq lhut hui sù, nghut rà su ngam ri." ga tú tai ri.

Yesuq gi, "Nàng myit e đông jô ri." ga tai ri.

⁴⁴ Haú hkûn, Yesuq, myiwe zo haú lé lhing wú luí, Simun lé, "Nàng myiwe zo shí lé myang lhê lhú? Ngò, nàng é yhûm má wang le, hkyî chi rà uchyam, nàng a byi, yhang kúm gi, ngaubyî èq ngá hkyî lé tik byi luí, yhâng é xam èq sut pyám byi bê.

⁴⁵ Nàng gi, ngo lé nhut èq a puq nghut ri; yhang kúm gi, ngò yhúmhaú má wang é mai ngá hkyî má a no loshoq puq nyi rà.

⁴⁶ Nàng gi, ngá ulhum má xû a but byi wú, yhang kúm gi, ngá é hkyî má nàm ngón é mura but byi bê nghut ri.

⁴⁷ Haú su mù, ngò, nàng lé tai lé, haú myiwe gi, je chyitdap luí, yhang wó é yubak myo myo lé hkyut pyám byi é hui bê. Shau za mara hkyut pyám byi é hui sù gi, shau za chyitdap sù nghut ri." ga tai ri.

⁴⁸ Yesuq gi, myiwe haú lé le, "Ngò, nàng é yubak mara hkyut pyám byi bê." ga tai ri.

⁴⁹ Rahá zung tô é bang gi, "Yubak mara lháng wó hkyut pyám byi sù, shí yuq gi, ó wá nghut lhê lhú?" ga luí, myit nyi bum akô.

⁵⁰ Yesuq gi, "Náng é lumjing myit èq nang lé hkyi yù bê, ngón za ló aq hkoi." ga luí, myiwe haú lé tai kat ri.

8

Yesuq Htâng Châng É Myiwe Wui

¹ Hau htâng hkâ-myháng a myáng má, Yesuq gi, Garai Gasâng é mingdán hkyô eq sêng é gabú danglú lé tai kyo uchyang, Yhâng é lagyo raxe í yuq eq rahá za, rawa htâng rawá jé e ló ri.

² Hau htoq agó, nat gang dap é mai le, nõhpyo mai le Yesuq èq lhoq ge yu é myiwe wui, nat nyhit nat lhoq htoq pyám byi huí é, Magadalaq wà má é Mariq le,

³ Herut é ikun zum sù Kuza é yhumsîng myhí Yoanaq le, Susannaq le, gotú myiwe wui myo myo le, Yesuq eq rahá nghut akô. Haú bang gi, yhumsîng wó du é í Yesuq eq lagyo pé lé byi zo byi huq nyi akô.

† 7:41 Denari rachat gi, ra-nyí lhê é byù rayuq é zuihpau eq wú ri.

*Kyôshi Sân É Hkyô**Mht 13:1-23; Mrk 4:1-20*

⁴ Wà hkanq wà mó má é bang gi, Yesuq chyáng zup zîng lé lo bùm kômù shiwa byù moq mó zup míng tô é hkûn, Yesuq dangtú dông tai kyô é gi,

⁵ "Kyô hkyô sù rayuq gi, kyôshi san râ ga htoq e lô ri. Yhang, kyôshi sân kat é hkûn, ra-am gi, hkyô má gyô ang mù, byu eq záng nang pyeq pyâm lhê, maulat nghoq pê eq hte zo pyâm lhê dut ri.

⁶ Ra-am gi, luqgok yò má gyô ang mù, yuq htoq lo é hkûn, myigùng a teq é yanmai nyhuí shi byuq akô.

⁷ Ra-am gi, zugyóm hkaú má gyô ang luí, zubyap eq rahá yuq htoq lô mù, wup pyâm é hui bê nghut ri.

⁸ Nghut kôlháng, ra-am gi, myihpún bo é jang má gyô ang mù, yuq kô lò jáng, rashô tú myô jat lo ri." ga tai ri.

Yhang haú su ga tai nyi é hkûn, "Gyô yù râ nohkyap dap sù gi, gyô yù sháng gaq!" ga le, htê mó eq tai kat ri.

⁹ Haú hkûn, Yhâng é chángzô pé gi, dangtú shí hai lichyúm nghut lhê lú ga, Yhang lé myí akô.

¹⁰ Yhang gi, "Garai Gasâng é mingdán eq sêng é sê gyo wuí é hkyô pé lé sê gyo râ ahko ahkáng, nungmoq lé byí to bê. Nghut kôlháng, góbâng matú gi, 'Wú to kôlháng, a myâng kó sháng, gyô nyi kôlháng, a sê gyo kó sháng.'[✠] nghù, ngò dangtú dông tai lhê.

¹¹ Ahkui lhê é dangtú shi é lichyúm gi, ísu nghut ri: kyôshi gi, Garai Gasâng é mungdang nghut nyi lhê.

¹² Hkyô má gyô âng é kyôshi gi, haí eq wuí lhê lú gâ le, haú mungdang lé byu pé wó gyô é htâng má, lumjîng é má le, hkyi yu é má le, a jé kó sháng gaq ga luí, yhangmoq é i-myt hkaú mai nat Tsadán eq mungdang haú lé, lé yu pyâm é hui bang eq wuí lhê.

¹³ Luqgok yò pé má gyô âng é kyôshi gi, haí eq wuí lhê lú gâ le, haú mungdang lé wó gyo jáng, gabú myit eq hap yù kôlháng, amyit a wó chín mù, rayoq rabun za lumjîng luí, gunglaú huí é nyí má, dum htak lô byuq é bang eq wuí lhê.

¹⁴ Zugyóm má gyô âng é kyôshi gi, haí eq wuí lhê lú gâ le, haú mungdang lé gyô yù luí, yhumsing é asak dui e lô é hkyô má, shí ipyat lhê é myit wui myit hke hkyô, ngùn zè sutgan eq mingkan ngón hkyô má myup byuq luí, mo é ashi a zuí é bang eq wuí lhê.

¹⁵ Hpún bo é myigùng má gyô é kyôshi kúm gi, haí eq wuí lhê lú gâ le, haú mungdang lé lhumzui luí ge é i-myt eq ban gyô yù mù, ging tîng shoq zuí zîng luí, wó jân é i-myt eq ashi zuí é bang eq wuí lhê.

*Myibung Htún É Hkyô**Mrk 4:21-25*

¹⁶ Myibung lé tap mù, aú eq nghop tô é le, yhupchong ô má tô tô é le, ó a kut wú kó. Nghut kôlháng, wang lé lô bang myoq wó myâng râ matú kúm gi, tsungjang má tsung to to chyat kut akô.

¹⁷ Hkâsu mù gâ le, a htoqzê loshoq haq tô é zè haí le a joq, a sé a byông htoq loshoq wó zaú tô é zè le haí a joq nghut ri.

✠ 8:10 Esai 6:9

18 Haú mù luí, nungmoq hkâsu wó gyô yu é hkyô lé sidiq nyi keq, haí mù gà le, wó to sù lé gi, jat byi shirâ, a wó su chyáng mai kúm gi, yhang wó to bún é mã é lé lhang, yu pyám byi shirâ nghut lhê." ga tai ri.

Yesuq É Yhângnu Eq Yhanggu Pé

Mht 12:46-50; Mrk 3:31-35

19 Haú hkûn, Yesuq é yhângnu eq yhanggu pé gi, Yhâng chyáng lé lô kô le, shiwa byu pé lûm chyûn chyap to kômù, Yhâng chyáng a wó wang é kó nghut ri.

20 Haú hkûn, Yhang lé, "Náng nu eq nunggu pé gi, nang lé hui naú luí, shinggan má láng yap bum akô." ga tai kyo akô.

21 Yesuq gi, yhangmoq lé, "Garai Gasâng é mungdang lé gyô yù luí, châng é bang gi, Ngá nu eq Ngá gù pé nghut akô." ga luí, yhangmoq lé tú tai kat ri.

Laidun Mó Lé Yesuq Lhoq Zim É Hkyô

Mht 8:23-27; Mrk 4:35-41

22 Ra-nyí lé, Yesuq gi, Yhâng é chángzô pé lé, "Nga-nhúng nhông he hpoq shut dap e ló sháng." ga tai luí, lhai má wàng mù gù dap e ló akô.

23 Yhangmoq gù dap e ló é hkûn lé, Yesuq gi, yhup myhî tô ri. Haú u lé, nhông haú má laidun mó lò luí, lhai má wui byíng lô mù, yhangmoq myup shí râ su dut lò nyi bekô nghut ri.

24 Haú mù, yhangmoq gi, Yesuq chyáng huí ê luí, Yhang lé nhaú pun mù, "Yhumsing é, Yhumsing é, nga-nhúng myup ló nyi ri." ga tai akô.

Haú hkûn, Yhang toq luí, laidun eq wuilhêng pé lé tân kat jáng, haú pé gi, zim za dut ló byuq bé.

25 Haú mù, Yesuq gi, "Nungmoq é lumjing myit gi, hkâmá nghut akô lhu?" ga luí, yhangmoq lé myí ri.

Yhangmoq kúm gi, gyuq maú byuq bùm kôluí, "Shí yuq gi, hkasú é byù nghut lhê lha? Yhang hkunmó hkyó jáng, lai eq wuilhêng pé lhang gyo byi ri-nhung!" ga luí, rayuq eq rayuq myí lhum bum akô nghut ri.

Nat Lé Hkat Htoq Byí É Hkyô

Mht 8:28-34; Mrk 5:1-20

26 Hau htâng, yhangmoq gi, Galile mau tú tap mã é Gerase byu pé é mau má jé dap e ló bekô.

27 Yesuq kong shut doq ló le, haú wâ mã é nat gang dap é sù rayuq gi, Yhang lé hui ri. Haú yuq gi, yhúm má le a nyi é za, mebu a dap é, lupdùng má myáng myáng nyi nyi sù nghut ri.

28 Haú yuq gi, Yesuq lé myàng jáng, wut garu luí, yhâng é hkyî wang má paí gop to mù, "Myhang htâng é Garaí Yhangzo Yesuq ê, Nang gi, ngò eq haí séng lhê lhu? Ngo lé a zing-ri râ matú, ngò nang lé dúng nyi lhê." ga luí, htê mó èq tai garú nyi ri.

29 Hkâsu mù gà le, Yesuq gi, agè ashop é nat lé haú yuq gùng mai htoq ló râ matú, tân pyám é yanmai nghut ri. Byù haú yuq lé nat gâng èq adàm dàm wang júng hkangmó, loq eq hkyî má tojâng tuí èq tuí shung, kyum xâng tô é eq, zúng tô é nghut kôlhang, láng hpyit pyám pyám kut é htoq ago, nat gâng èq yhang lé yoso hkaú shut llangmhap yù yù kut nyi ri.

30 Yesuq gi, yhang lé, "Náng myíng haí gâ lhê?" ga myí kat é hkûn, yhang gi, "Legio* gâ lhê." ga tû tai ri. Haí mù gâ le, yhâng chyáng nat gang myo myo wang lúng tô é yanmai nghut ri.

31 Nat jùm gi, yhangmoq lé nik dik htúm é Lasang-dong shut a kôn kat rá matú, Yesuq lé chôm dúng nyi bum akô.

32 Haú u lé, waq rajùm mó gi, bùm yàm má dû but zô nyi bum akô nghut ri. Haú mù, yhangmoq gi, waq pè chyáng wàng nhâng laq ga, Yesuq lé ahkáng dum dung kut kojáng, Yesuq gi, yhangmoq lé ahkáng byi kat ri.

33 Haú mù luí, nat gang jùm gi, byù haú yuq chyáng mai htoq ló kôluí, waq pè chyáng wàng byuq bekô nghut ri. Haú hkûn, waq haú jùm gi, gampyoq mai nhông hkaú shut rut din yán wang ló kôluí, myup shi byuq bekô nghut ri.

34 Waq zúng bang gi, haú su dut é lé myàng jáng, h pang din ló kômù, myuq hkaú má é bang eq awui ayàm má é bang lé ló tai kyô akô nghut ri.

35 Haú mù, wó gyô é bang gi, haú hkyô lé wú rá matú htoq lé lo akô. Yhangmoq gi, Yesuq chyáng jé lé kô é hkûn, nat gang htoq byuq hui sù, Yesuq é hkyí wang má mebu wut to luí, byù gè rayuq su zùng to láng é lé myàng kômù, gyuq dan bùm bekô nghut ri.

36 Nat dap sù lé hkâsu kut luí lhoq ge yu é hkyô lé myang é bang gi, góbang lé tai kyô akô nghut ri.

37 Haú hkûn, Gerase byu pè é mau má é lhunglhâng bang gi, gyuq dan dik kôluí, Yesuq lé yhangmoq é mau mai htoq ló byuq rá matú, chôm dúng tóngbán akô. Haú mù luí, Yesuq gi, taú ló byuq rá matú lhai má wàng bê nghut ri.

38 Nat htoq byuq hui é sù gi, Yesuq htâng cháng rá matú, Yesuq lé dúng tóngbán ri.

39 Nghut kôlháng, Yesuq gi, "Nàng, yhùm shut sheq ló mù, Garai Gasang, nang lé hkâ-í kut byi bê hkyô lé, ló tai kyo aq." ga luí, yhang lé ló nhâng bê nghut ri. Haú hkûn, yhang htoq ló mù, Yesuq yhang lé hkâ-í kut byi bê hkyô lé, haú wà rawà bang lé ló tai kyô ri.

Ya-iruyq É Yhangzo Byizô É Hkyô Eq, Yesuq É Bu Lé Lé Záng É Myiwe Rayuq É Hkyô

Mht 9:18-26; Mrk 5:21-43

40 Ahkuí, Galile byu pé gi, Yesuq dum taú lò rá lé láng nyí kô é nghut mù, Yhang dum taú gú dap lo é hkûn gabú myit eq lhom te yu akô.

41 Haú hkûn, Ya-iruyq gâ é tarajong má up sù rayuq gi, jé lé ló mù, Yesuq é hkyí wang má hkyihput htuq luí, yhâng yhùm má lé rá matú ji nyi ri.

42 Hkâsu mù gâ le, raxe í zân bò bê é, yhangzo byizo te gi, shi ló nyi é yanmai nghut ri.

Haú mù, Yesuq cháng e ló le, shiwa byu pé gi, Yhang lé záng htung lo bum akô.

43 Haú u lé, raxe í zân sui yui luí ngunzè lhunglháng ban pyám shoq chi sará pè chyáng yá wú kôlháng, hká yuq le a wó yá gè byi é† myiwe myhí rayuq le haú hkaú má bo tô ri.

44 Myiwe haú gi, Yesuq é nunghtáng má hui lé mù, Yhâng é bushi htâng má é záng kat eq, sui yui é ana gi, ge byuq bê nghut ri.

* **8:30** Legio gâ é lychyum gi, gyezo 4000 eq 6000 gyoro bo é gyedap lé tai ri. † **8:43** Ngunzè lhunglháng ban pyám shoq chi sará pè chyáng yá wú kôlháng, hká yuq le a wó yá gè byi gâ é, Chyúmdang ra-am má gi, bo lhé; ra-am má gi, a bò.

45 Haú hkûn, Yesuq gi, "Ngo lé, ó yuq záng bê lhú?" ga luí myi jáng, lhunglhâng bang gi, a sé ga he nyi bùm kô é hkûn lé, Petruq gi, "Yhumsing ê, shiwa byu pé gi, náng é lhinghkyuq mai náng chyáng chyín chyap wang lo bùm kô é yanmai, nang lé záng bekô râ nghut lhê?" ga taí ri.

46 Yesuq gi, "Byù rayuq ngo lé lé záng mù, ngá chyáng mà é hpungwup a-tsam htoq ló é lé, ngò châng sé kat ri." ga taí ri.

47 Haú jáng, myiwe myhi haú gi, yhang a wó haq zaú to lô é hkyô lé sé jáng, req req nán lé lô mù, Yesuq é hkyi wang má ngóm gop kat luí, haí mù Yhang lé záng é hkyô eq, hká dông ge lô byuq é hkyô pé lé, shiwa byù banshoq bâng é hí má Yesuq lé taí kyô ri.

48 Yesuq gi, "Ngá zo ê, náng é lumjíng myit gi, nang lé lhoq gê byi bê nghut ri, ngón za ló aq hkoi!" ga luí, myiwe haú lé taí kat ri.

49 Yesuq gi, dang ru taí nyi ashí hkûn, tarajong má up sù Ya-iruaq é yhùm mai byù rayuq jé lé lô luí, "Nung zo gi, shi byuq bê, haú sará lé hkálhoq hkyik nyí lo." ga luí, Ya-iruaq lé taí kyô ri.

50 Yesuq gi, dang haú lé wó gyo jáng, "Hkâgyuq, za lumjíng aq, haú jáng, yhang ge byuq râ nghut lhê." ga luí, Ya-iruaq lé taí ri.

51 Yesuq gi, Ya-iruaq é yhùm má jé é hkûn lé, Petruq, Yohan, Yakuq, eq haú myiwe zô é yhângnu eq yhângwa mai lai luí, yhùm haú má, ó lé le a wàng nhâng kut ri.

52 Haú u lé, lhunglhâng bang zoshâng hau é yanmai, ngaubyi ngau-nhap eq yón nyi akô. Yesuq kúm gi, "Hkâ-ngaú kó, yhang shi byuq é a nghut, yhup myhi tô é sheq ru nghut lhê." ga luí, yhangmoq lé taí ri.

53 Zoshâng gi, shi byuq bê lé yhangmoq sé kôluí, yhangmoq gi, Yesuq lé wuizui kut pyám byí akô.

54 Yhang kúm gi, myiwe zo hau é loq má zuí to mù, "Zoshâng ê, toq aq." ga taí kat ri.

55 Haú mù luí, yhâng woi-nyí dum taú wàng mù, haú hkûn jáng toq yap ri. Haú jáng, Yesuq gi, zoshâng haú lé zôjung byi keq, ga yhangmoq lé taí kat ri.

56 Haú myiwe zô é yhângnu eq yhângwa nhik gi, gyai maú byuq akô. Nghut kôlhâng, Yesuq gi, haú dut é hkyô ó lé le a taí kyo râ matú, yhangnhik lé taí hkûm tô ri.

9

Lagyo Raxe Í Yuq Lé Nhang Htoq Kat É Hkyô *Mht 10:5-15; Mrk 6:7-13*

1 Yesuq gi, haú lagyo raxe í yuq lé wut yù mù, nat gang banshoq lé wó hkat htoq pyám râ matú eq, noli nojàng wó lhoq gê râ matú, yhangmoq lé wum-o a-tsam eq ahko ahkáng byí ri.

2 Hau htâng má, Garai Gasâng é mingdán hkyô hko kyo râ eq, nòhpyo lhoq gê byi râ matú nhang htoq kat ri.

3 Yesuq gi, yhangmoq lé, "Hkyowui é matú, dumbáng, etap, zoshuq, ngùn eq, bu htaí lháng hkâwún hkâchúng kó.

4 Nungmoq hká yhùm má wàng kôlhâng, haú wâ mai dum htoq ló é buinyi jé shoq, haú yhùm má za nyi nyi keq.

5 Nungmoq lé a lhom hap yu é bang lé gi, yhangmoq é wà mai htoq ló é hkûn, nungmoq lé a lhom hap yu é saksé dut sháng gaq, nungmoq é hkyiwa má dap é hpuilhaú lé yhangmoq é myoq hí má ko hkyô pyám to keq." ga taí kat ri.

⁶ Haú mù, yhangmoq gi, htoq e ló luí, wà hkgang wà mó má haú gabú danglù hko kyo uchyang, hká jé hkámá nõhpyo lhoq gê byí wún akò.

Herut Maú Úng-âng É Hkyô

Mht 14:1-12; Mrk 6:14-29

⁷ Haú su dut é hkyô banshoq lé, mauzau Herut wó gyô yù luí myit wuí nyi ri. Hkásu mù gà le, ra-am gi, Yohan shi é mai dum dui toq lô bê ga,

⁸ ra-am gi, Eliyaq dum pô htoq lo ri ga, haú mai, ra-am gi, hí hpyang lhê é myiqhtoi rayuq yuq dum dui toq lô bê ga luí, taí bùm kô é yanmai nghut ri.

⁹ Herut gi, "Yohan é ulhum lé, ngò hpyit pyám nhâng bê, nghut kôhang, shí í wá taí byông bùm kô é gi, ó wá nghut lhê lú?" ga luí, Yesuq lé myàng shoq ga ho nyi ri.

Byù Ngo Hkying Lé Yesuq Zoshuq Byi Tsô É Hkyô

Mht 14:13-21; Mrk 6:30-44; Yhn 6:1-14

¹⁰ Lagyô pé dum taú lo é hkùn, yhangmoq kut lai lo é hkyô pé, Yesuq lé taí kyô akò. Haú hkùn, Yesuq gi, yhangmoq lé shuí chùng mù, Bet-saida gà é wà mó shut tsik za e ló byuq ri.

¹¹ Shiwa byu pé gi, haú hkyô lé châng sé kômù, Yhâng htâng châng e ló akò. Yesuq lé yhangmoq lé lhom hap yù mù, Garai Gasâng é mingdán hkyô lé taí kyo luí, nõhpyo gè naú bang lé, lhoq gê byí ri.

¹² Buigyùm zó má, lagyo raxe í yuq gi, Yhâng chyáng huí é mù, "Haú shiwa byu pé lé, awui ayám mã é yhùm pé eq wà pé má ló mù, zoshuq hô zo luí ló yhup kó sháng gaq, ló nhâng aq. Hkásu mù gà le, ahkuí nga-nhúng gi, yoso má nghut nyi ri." ga luí, Yhang lé taí akò.

¹³ Haú hkùn, Yesuq gi, "Nungmoq, yhangmoq lé rajung jung byi tso keq." ga tú taí ri.

Yhangmoq gi, "Shí myhò bang lé tso rá zoshuq a é wui le gi, ngamoq chyáng muk-yo muk ngo long eq ngozo í du mai lai luí, hai le a wó nghut ri." ga taí akò. (Hkásu mù gà le, yuqgè wui baú lhang ngo hkying kô nghut ri.)

¹⁴ Nghut kôhang, Yesuq gi, "Shí bang lé rahpúng má ngo xê xê kô kut luí, zùng nhang to keq." ga luí, Yhâng e chángzô pé lé taí ri.

¹⁵ Yhangmoq lé Yesuq taí é eq rajung za, banshoq bang lé zùng nhang to bekò.

¹⁶ Haú hkùn, Yesuq gi, haú muk ngo long eq ngozo í du lé yù mù, mauhkung shut tu wú to luí, jeju ban hkya-on jáng, haú lé ajap jap hpé luí, shiwa byu pé lé, châng to byi rá matú, Yhâng é chángzô pé lé byi kat ri.

¹⁷ Haú hkùn, yhangmoq banshoq bang zô gyí bùm kô é htâng má, haú chángzô pé gi, zô myhit tò é pé lé, raxe í mung bying shoq wó guq tsing yu ashí kô nghut ri.

Yesuq Gi, Hkrisduq Nghut Lhê Ga Petruq Taí É Hkyô

Mht 16:13-28; Mrk 8:27-9:1

¹⁸ Radàm lé, Yesuq gi, Yhang baú kyúdung nyi é hkùn, chángzô pé le, Yhang eq rahá nghut akò. Hau htâng, Yhang gi, yhangmoq lé, "Shiwa byu pé gi, ngo lé ó yuq nghut lhê ga, taí akò lú?" ga myí ri.

¹⁹ "Ra-am gi, Wui-myhup Sará Yohan ga; góbang gi, Eliyaq ga; dum ra-am gi, hí hpyang lhê é myiqhtoi rayuq yuq dum dui toq lo é nghut ri ga, taí akò." ga luí, yhangmoq tú taí akò.

²⁰ Dum, Yhang gi, yhangmoq lé, "Nghut kôhang, nungmoq gi, ngo lé ó yuq nghut lhê nghu akò lú?" ga myí ri.

Hau hkûn, Petruq gi, "Nàng gi, Garai Gasang nhâng byí é Hkrisduq nghut ri." ga tũ tai ri.

²¹ Shí hkyô ó lé le a tai kyo sháng gaq ga, Yesuq, yhangmoq lé tai hkûm pyâm ri.

²² Hau mù, Yhang gi, "Hau Byu Yhangzo gi, zing-rí é myo myo hui zo lui, suwún wui, hkyangjong agyi pé, tarâ sará pé eq he-ngik pyâm é hui mù, sat pyâm é hui ra rá nghut lhê, hau htâng sum nyí nghû rá buinyi má, lhoq toq yu é hui rá nghut lhê." ga tai ri.

²³ Hau htâng, banshoq bang lé Yhang dum xoq tai é gi, "Ngá htâng cháng naũ sũ ó yuq nghut kôle, yhumsing gùng yhumsing he-ngik pyâm mù, nyí wui yhumsing é tapzing lé waq chũng* lui, cháng ra rá nghut lhê.

²⁴ Hkâsu mù gâ le, yhumsing é asak lé hkyi yù naũ sũ ó yuq nghut kôle, asak sum rá nghut lhê; nghut kôhang, Ngá é yanmai, yhumsing é asak sum pyâm é sũ kùm gi, asak hkyi yu é hui rá nghut lhê.

²⁵ Byù gi, mingkan gón lé wó sing to kôhang, yhumsing é asak woi-nyí sùm byuq é nghut le gi, yhang é matú, hai akyù bò rá lúh?

²⁶ Ngò eq Ngá é dang lé, lhom hap yù rá lé hoq é sũ ó yuq lé le, hau Byu Yhangzo gi, yhumsing é hpungwup shingkang eq, Yhâng Wâ é hpungwup shingkang, hau chyoiyung maumang lagyô pê é hpungwup shingkang eq jé lé é hkûn, hoq pyâm rá nghut lhê.

²⁷ Ngò, nungmoq lé teng za tai kôle, shi má yap tô é bang ra-am gi, Garai Gasâng é mingdán lé a myang é za shí kó rá a nghut." gâ ri.

Mosheq Eq Eliyaq Yesuq Lé Hui Nyo É Hkyô
Mht 17:1-8; Mrk 9:2-8

²⁸ Dang hau tai é htâng, shit nyí kô nghut jáng, Yhang gi, kyûdung rá ga Petruq, Yohan, Yakuq pé lé shuí chũng mù, bùm shut doq lô ri.

²⁹ Kyù dũng nyi le, Yesuq é myoqdong gi, ihpyô isâm htaí lò mù, Yhâng é mebu gi, lhap su duq bang lo ri.

³⁰ Hau hkûn, wú keq, Mosheq eq Eliyaq gi, hpungwup shingkang eq htoq lé lô lui, Yesuq eq dãng nyo lhũm nyi akô.

³¹ Yhangmoq gi, Garai Gasang myit tô é hkyô Yerusalem wà mó má Yesuq shí hkâm é dõng mai dik lò rá nghut é hkyô lé tai lhũm nyi akô.

³² Petruq eq yhâng luzúm nhik gi, yhup mui nyi akô; nghut kôhang, yhangmoq bũn lo é hkûn lé, Yesuq é hpungwup shingkang lé le, Yhang eq rahá yap to su nhik lé le, myang kat akô.

³³ Hau nhik Yesuq chyáng mai gâng lô nyi é hkûn, Petruq gi, Yesuq lé, "Yhumsing ê, shí jowô má nga-nhũng nyi le ge ri, hau mù, Nàng é matú ralhum, Mosheq é matú ralhum, Eliyaq é matú ralhum kut, ngamoq lé, zũm sũm lhũm sai nhâng laq." ga tai kat kôhang, yhang hai tai nyi é lé, yhang a sé.

³⁴ Petruq dang tai nyi ashí hkûn lé, mhut jé mù, yhangmoq lé htup zing lo nyi ri. Mhut hau htup lo nyi é yanmai, yhangmoq gi, gyuq byuq akô.

³⁵ Hau mhut hkaũ mai htoq lo é htê gi, "Shí yuq gi, Ngá zo nghut lhê; Ngò hkyin yu é Sũ le nghut lhê; Yhâng é dang gyo keq." gâ ri.

³⁶ Dang htê hau zing jáng, Yesuq yhang baũ nyi tô é lé, yhangmoq myang akô. Yhangmoq myang é hkyô lé, buinyi hau bun hau yoq má, ó lé le a tai kyô é zim za nyi byuq akô.

* 9:23 Tapzing lé waq chũng nghu é gi, Yesuq é yanmai jamjau hui é lé tai é nghut lhê.

Nat Gang Dap É Yuqgè Zo Rayuq Lé Lhoq Gê Byi É Hkyô
Mht 17:14-18; Mrk 9:14-27

³⁷ Hau htâng nyi, yhangmoq bùm haù mai gyó ló kô le, byù moq mó gi, Yesuq lé lhom te yu akô.

³⁸ Haù hkún, byu hpúng haù má é byù rayuq wut garú htoq ló é gi,

³⁹ "Sarà é, wú aq, ngá é zo te yuqzo gi, nat wang júng mù dàn so dàn loq garú lo lhê, guttsû gi, agut gut dut shoq langhtân nhang lo lhê kut mù, nat gi, yhang lé gyai myáng shoq zing-rî yù yù kut nyi ri.

⁴⁰ Nat haù lé hkat pyám byi kó laq nghû luí, Náng é chángzô pé lé ngò dúng wú kôlhang, yhangmoq a wó hkat pyám byi kó. Haù mù, ngá zo lé lhoq gê byi rà matú, ngò gi, nang lé gyai myit lum é eq dúng kat lhê." gâ ri.

⁴¹ Haù mù luí, Yesuq gi, "Lumjúng myit a bo é eq agè ashop é amyú pé é, Ngò gi, hkâ-myháng jé shoq nungmoq eq rahá nyi mù, wó jân nyi rà lúhú? Nung zo lé, shí shut shuí lé lô aq." ga tù tai ri.

⁴² Zoshâng haù, lé lo nyi le lhang, nat gang gi, yhang lé lhoq lhêng to mù langhtân nhang ashí. Yesuq kúm gi, haù agè ashop é nat lé tân kat luí, zoshâng haù lé lhoq gê byi mù, yhâng wa lé dum ap byi ri.

⁴³ Nyi mi-nyì gi, Garai Gasâng é kô dik é hpungwup a-tsam lé maú hong nyi bum akô.

Lhunglhang bang gi, Yesuq kut é muzó haù lé maú nyi bùm kô le, Yesuq gi,

⁴⁴ "Haù Byu Yhangzo gi, byu pé é loq má ap pyám é hui zo rà nghut lhê. Dang shí hkun lé nungmoq é no má rago gyô wun to keq." ga luí, chángzô pé lé tai ri.

⁴⁵ Yhangmoq kúm gi, dang haù lé a sê gyo kó, hkâsu mù ga le, haù gi, yhangmoq é matú a sê gyo sháng gaq ga luí, nghop tô ashí yanmai nghut ri. Dang hau é lichyúm lé, Yesuq chyáng yhangmoq a wám myi kó nghut ri.

Ó Yuq Gi, Kô Dik Sû Nghut Râ Lúhú?

Mht 18:1-5; Mrk 9:33-40

⁴⁶ Hau htâng, lagyô pé gi, hká yuq sheq, kô dik sù nghut lhê lúhú ga, rayuq eq rayuq tai myíng myô lhum nyi akô.

⁴⁷ Yesuq kúm gi, yhangmoq é unghkaù má myit nyi é hkyô lé sé byi luí, zoshâng rayuq lé shuí yù mù, Yhâng nàm má shap to luí,

⁴⁸ "Shí zoshâng lé Ngá é myíng mai hap sù ó yuq nghut kôle, Ngo lé hap yu é sù nghut bê; Ngo lé hap yu sù ó yuq nghut kôle, haù Ngo lé nhang kat é Sù lé hap yu é le nghut lhê. Haù mù luí, nungmoq banshoq má, je tiq sù gi, je ko sù nghut lhê." ga luí, yhangmoq lé tai ri.

⁴⁹ Haù hkún, Yohan gi, "Yhumsíng é, Náng é myíng lánng luí, nat gâng pé lé hkat pyám byi wún é byù rayuq lé, ngamoq myang ri. Yhang gi, ngamoq chyáng a lòm sù nghut é yanmai, yhang lé ngamoq hkúm pyám é nghut lhê." ga tai ri.

⁵⁰ Yesuq kúm gi, "Yhang lé hkâhkúm kó, nungmoq é gyè hkyam shut a nyi sù gi, nungmoq é hkyam shut nyi sù nghut lhê." ga luí, yhang lé tai ri.

Samariq Wà Bang Yesuq Lé A Lhom Hap Yu É Hkyô

⁵¹ Ahkuí, Yesuq gi, Yhang lé mauhkúng shut shuí toq yù rà buinyi chyáng lò bê nghut mù, Yerusalem wà mó shut é rà lé myit hpyit to luí, Yhâng é hí má lagyô nhang kat ri.

⁵² Lagyo haù bang gi, Yhâng matú rà é hkyô lajang lánng rà ga, Samariq wà rawà má wang ló akô.

⁵³ Nghut kôlhang, Yesuq gi, Yerusalem wà mó shut laî e ló é sù nghut é yanmai, haú wâ bang gi, Yhang lé a lhom hap yù kó.

⁵⁴ Haú hkûn, lagyo Yakuq eq Yohan nhik gi, haú lé myàng jáng, "Yhumsîng ê, yhangmoq lé lhoq htên pyám râ matú, ngá-nhik mauhkûng mai myi wut hkyô le, a gè lhu?" ga luí, Yesuq lé myí akô.

⁵⁵ Yhang kúm gi, lhing wú luí yhangnhik lé, tân pyâm ri,

⁵⁶ haú mù luí, yhangmoq gi, gó wâ shut e ló byuq akô.

Yesuq É Htâng, Hkâsu Kut Cháng Râ Hkyô

Mht 8:19-22

⁵⁷ Yhangmoq haú hkyô má e ló kô le, byù rayuq gi, "Nàng hká e le hká ngò cháng râ." ga luí, Yesuq lé tai ri.

⁵⁸ Yesuq gi, haú yuq lé, "Wamhkuí pé gi, hkyûng wó akô, nghoq pé le, nghoqsut wó akô. Nghut kôlhang, haú Byu Yhangzo gi, ulhum to jang lhang a wó é nghut ri." ga tai pyám ri.

⁵⁹ Dum rayuq lé, "Ngá htâng cháng aq." ga tai jáng, haú yuq gi, "Yhumsîng ê, ngá wa lé, ló yhúm pyám râ ahkáng hí byi shi laq." ga tai ri.

⁶⁰ Yesuq gi, yhang lé, "Shí bê bang† gi, shí bê bang yhangchang yhúm lhum kó sháng gaq; nghut kôlhang, nàng gi, Garai Gasâng é mingdán hkyô lé, ê hko kyo aq." ga tai ri.

⁶¹ Byù rayuq dum, Yhang lé, "Yhumsîng ê, ngò le náng htâng cháng râ, nghut kôlhang, ngá yhumbyù lé hí hkyang ló shit to râ ahkáng byi shi laq." ga tai ri.

⁶² Yesuq gi, "Yò hpuq li zui mù htâng shut lhing wú sù ó yuq nghut kôlhang, Garai Gasâng é mingdán eq a gingdán." ga luí, yhang lé tai ri.

10

Yesuq, Chángzô Pé Nyhit Xê Yuq Lé, Nhang Htoq Kat É Hkyô

¹ Hau htâng má, Yhumsîng gi, gotú chángzô pé nyhit xê yuq* lé hkyin yù mù, Yhang e ló râ wà eq jowò hkangmó shut í yuq razúm zúm kut luí, Yhâng é hí má é nhang kat ri.

² Yesuq gi, yhangmoq lé, "Kyô† shù yù râ myo shoq joq kôlhang, mù zui râ byù gi, shaú nyi ri. Haú mù, haú kyô Yhumsîng lé, Yhâng é kyô yò má, kyô shu byù‡ myo myo nhâng byi râ matú, dung keq.

³ Nungmoq e ló keq! Wamhkuí hpúng má nhang hâng kat é sau zô pé lé su, Ngò, nungmoq lé nhang kat é nghut lhê.

⁴ Ngùn htúng eq, etap, hkyí-tsung pé hkâyú chùng kó, hkyô má ó lé le hkâshichyên kún nyi kó.

⁵ Nungmoq gi, hká yhúm má wàng e ló kô le, 'Shi yhúm nguingón nyí sháng gaq.' nghú luí, hí tai keq.

⁶ Haú yhúm má nguingón hkyô eq gingdán sù nyi é nghut le gi, nguingón hkyô haú gi, haú yuq é ahtoq má joq to râ nghut lhê. Haú a nghut jáng, nguingón hkyô haú gi, nungmoq chyáng dum taú lo byuq râ nghut lhê.

⁷ Haú yhúm má nyi to mù, yhangmoq haí byí le haí zo haí shuq keq; hkâsu mù gâ le, mù zui sù gi, zuihpau wó yú gíng lhê; haú mù, nungmoq rayhum htâng rayhúm hkâhtot nyi wún kó.

† 9:60 *Shí bê bang* gâ é gi, woi-nyí má shi to bang lé gâ lhê. * 10:1 Chyúmdang ra-am má gi, chángzô nyhit xê í yuq ga le kâ tô ri. † 10:2 *Kyô* nghú é gi, Yesuq lé lumjáng naú kôlhang tai kyo râ bang a nyi luí láng tô é bang nghut ri. ‡ 10:2 *Kyô shu byù* nghu é gi, Yesuq é hkyô gabú danglú lé tai kyo bang nghut ri.

⁸ Nungmoq hká wà má wang ló kôlhang, yhangmoq lhom hap yù kô é nghut le gi, nungmoq é hí má yhangmoq htung to byí é zoshuq lé, zo keq, shuq keq.

⁹ Haú má é nò bang lé lhoq gè byi mù, 'Garai Gasâng é mingdán gi, nungmoq eq chyâng lò bê nghut ri.' nghù luí, yhangmoq lé taí kyo keq.

¹⁰ Nghut kôlhang, nungmoq hká wà má wang ló kô le, yhangmoq a lhom hap yu é nghut le gi, haú wà má é hkyô mó má htoq é mù,

¹¹ Ngamoq é hkyí má dap tó é nungmoq wà má é hpuilhaú lhang, nungmoq lé hkyang pù tsô nyí râ matú ngamoq ko hkyô pyâm to byi bê. Nghut kôlhang, Garai Gasâng é mingdán gi, chyâng lò bê hkyô lé, sé to keq.' nghù luí taí keq.

¹² Ngò, nungmoq lé taí kôlé, haú buinyi^S lé, haú wà gi, Sodom wà htoq má je hpuzo râ nghut lhê.

¹³ Kurazin wà mó ê! Nang dingnyé wó ri! Bet-saida wà mó ê! Nang dingnyé wó ri! Nungmoq chyâng lé kut shit é laklai kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhing mù, jimê tú wut lhê, miyiwap kyaq gyún lhê kut zung ngúng to bekô râ nghut lhê.

¹⁴ Haú mù, tarâ jéyáng é nyí jé jáng, nungnhik gi, Turuq myuq eq Sidun myuq htoq má je hpuzo* kó râ nghut lhê.

¹⁵ Dum mù, Kaperna-um wà nang ê, nang gi, mauhkûng jé shoq waq toq é hui rá lúh? A nghut, mosumhkung má sheq gyó râ nghut lhê." ga taí ri.

¹⁶ Hau htâng má, chángzô pé lé dum xoq taí é gi, "Nungmoq é dang gyo sù gi, ngá é dang gyo sù le nghut bê; nungmoq lé he-ngik é sù gi, ngo lé le he-ngik é sù nghut bê; ngo lé he-ngik é sù gi, ngo lé nhang kat sù lé le, he-ngik é sù nghut bê." gâ ri.

Nyhít Xê Yuq Dum Taú Jé Lo É Hkyô

¹⁷ Hau htâng, haú chángzo nyhit xê yuq gi, gabú myit èq dum taú lò mù, "Yhumsing ê, nang é mying lé lang jáng, nat gâng pé lhang ngamoq é dang lé gyô bum akò." ga taí akò.

¹⁸ Haú su ga taí kôjáng, Yesuq tú taí é gi, "Tsdán gi, mauhkûng htoq mai lhap hpyat é su byit gyó lo é lé ngò myang kat bê.

¹⁹ Wú keq! Ngò gi, nungmoq lé, lhangmui eq gogok pé lé wó nang rá eq gumlau gyè pé é wum-o a-tsam banshoq lé wó ùng rá ahko ahkáng lé byi bê nghut mù luí, hai èq le nungmoq lé wó lhoq hten rá a nghut lo.

²⁰ Nghut kôlhang, nat pé nungmoq é dang gyô é lé za hkâgabú nyí kó, mauhkûng htoq má é asak jihpán laiká buk má nungmoq é mying bo to bê lé sheq gabú nyí keq." ga taí ri.

²¹ Haú u lé, Yesuq gi, Chyoiyúng Woi-nyí má gabú é myit byíng lô mù, "Mauhkûng eq myigung é Yhumsing, Áwa è, Nang gi, haú pé lé, hpaqchyí byéng-yá bò bang eq myit hpaqchyí sé bâng é hí mai haq nghop to luí, zoshâng wui lé tûn shit bê nghut é yanmai, Ngò, Nang lé hkya-ôn lhê ô. Nghut bê, Áwa è, haú gi, Nang ô nau é hkyô nghut ri.

²² Ngá Wa gi, lhunglhang lé Ngá é loq má ap byi to bê. Garai Gasang Yhangzo ó nghut é gi, Áwa Garai Gasang mai lai luí ó le a sé; Áwa ó nghut é lé le, haú Zo eq haú Zo mai sé nhâng rá matú hkyin yu é bang mai lai luí, ó a sé." ga taí ri.

^S 10:12 Haú buinyi gâ é gi, Garai Gasâng tarâ jéyáng é buinyi lé gâ lhê. * 10:14 Nungnhik je hpuzo é hkyô gi, mauhpo kumlhá myo myo myang é nghut kôlhang, myit a lhing kô é yanmai nghut ri.

23 Hau htâng má, Yhâng é chángzô pê shut lhing wú luí, yhangmoq lé baú za haq tái kat é gi, "Nungmoq byu-myàng é hkyô pé lé, myang é myoq pé gi, hkungsô wó nyi ri.

24 Hkâsu mù gâ le, Ngò, nungmoq lé tái kôlé, nungmoq wó myàng, wó gyô é pé lé, myiqhtoi pé eq hkohkam pé myo myo gi, myàng naù gyo naù kôlhang, a wó myàng, a wó gyo kô nghut ri." ga tái ri.

Gè Ê Samariq Byù

25 Haú hkûn, wú keq, tarâ sará rayuq gi, toq luí, Yesuq lé, "Sará ê, ahtum abyuc é asak lé wó yú shoq, ngò hkâsu kut râ râ lê lú?" ga luí, Yhang lé myí chyam wú ri.

26 Yesuq gi, "Mosheq é tarâ má hkâsu ga kê tô ri lú? Nàng haú lé hkâsu nghap yu nyi lê lú?" ga luí, yhang lé myí ri.

27 Haú yuq gi, "'Haú Yhumsing náng é Garai Gasang lé, náng é myit nhikhlum banshoq, náng é asak woi-nyí lhum gón, náng é wum-o banshoq, náng myit é hkyô banshoq eq, chyitdap râ lê; * náng gûng lé nàng chyitdap é su, náng é chyangnâm mâ é bang lé le chyitdap aq. *" ga tũ tái ri.

28 Yesuq gi, "Nàng tũ tái é dang jô ri; haú su yhang kut aq, haú jáng nàng gi, asak ùi râ nghut lê." ga yhang lé tái ri.

29 Nghut kôlhang, haú yuq gi, yhâng gungdu dingmán é lé, tũn shit naú luí, "Ngá é chyangnâm mâ é sũ gi, ó yuq nghut lê lú?" ga luí, Yesuq lé myí ri.

30 Yesuq tũ tái é gi, "Byù rayuq gi, Yerusalem wà mó mai Yeriho wà shut gyó ló le, damyaq eq htung huí ri. Damyaq haú bang gi, yhâng é mebu pé lé hkyut shang pyám byi kôluí, rayúm gyut shoq bat nha mù, aluq shoí shũ jáng sheq tô pyâm to kôluí ló byuq bekô.

31 Haú u lé, hkyangjong rayuq gi, haú hkyô mai lai âng ló le, haú damyaq huí sũ lé myàng jáng, koi lai ló byuq ri.

32 Haú eq rajung za, Lewiq rayuq le, haú mai lai ló é hkûn, haú yuq lé myàng jáng, koi lai ló byuq ri.

33 Nghut kôlhang, Samariq byù rayuq le, haú mai lai ló é hkûn, haú yuq leq tô é lé myàng jáng, wú shogyo luí yhâng chyáng huí é mù,

34 yhâng é dâm má, xũ eq tsibiyiq wing shoq gyun luí, rago za htup byi mù, yhâng é logung má, haú yuq lé bún ke luí, bing-yhùm ralhüm má jé shoq shuí ló mù, gôn lajang byí ri.

35 Htang nyí lé, yhang gi, haú bing-yhùm yhumsing lé ngùn Denari í chap shê byi mù, tái é gi, 'Shí yuq lé wú lajang byi laq, yhâng gung má nàng myo chung záng é banshoq lé ngò dum taú lò jáng, lo xap râ.' gâ ri." gâ ri.

36 Hau htâng, tarâ sará lé, "Nàng gi, byù haú bang sum yuq má damyaq huí sũ é chyangnâm mâ é òng nghut sũ gi, hká yuq nghut râ su ngam ri lú?" ga luí, Yesuq myí ri.

37 Haú tarâ sará gi, "Haú yuq lé shogyo sũ nghut ri." ga tái ri.

Yesuq gi, "Nàng le haú òng ló kut aq." ga luí, yhang lé tái kat ri.

Mariq Eq Mahtaq Nhik Chyáng Yesuq Ê Jé Ê Hkyô

38 Ahkuí, Yesuq eq Yhâng é chángzô pé hkyô xoq sô e ló kô le, wà rawá má jé wang ló é hkûn, Mahtaq gâ é myiwe rayuq gi, Yesuq lé yhâng yhùm má lhom te yu ri.

³⁹ Mahtaq gi, Mariq gâ é yhanggu miywe zo rayuq wó ri. Mariq haú gi, Yhumsing Yesuq é hkyî wang má zung to mù, Yhang mhoqshit é dang lé gyô nyi ri.

⁴⁰ Mahtaq kúm gi, saí tso saí huq é amû myo luí, gyin bún nyi ri. Haú mù luí, yhang huí é mù, "Yhumsing ê, ngá gu gi, saí tso saí huq é amû má, ngo lé baú za rap kut tô é lé, nang a bo myang byi lúhú? Ngo lé, lé garúm sháng gaq, yhang lé tai byi laq." ga luí, Yesuq lé tai ri.

⁴¹ Haú hkûn, Yhumsing gi, "Mahtaq, Mahtaq, nang gi, muzó lé za ma nyi mù, myit myo myit chiq é huí nyi ri.

⁴² Nghut kôhang, je ahkyak é hkyô gi, rahkat za nghut lhê. Mariq kúm gi, haú je ge é hkyô lé hkyin yù bê nghut ri. Haú lé yhang chyáng mai wó yu pyám byi rá a nghut." ga luí, yhang lé tú tai ri.

11

Yesuq Mhoqshit É Kyûdung Dang

Mht 6:9-13; 7:7-11

¹ Ra-nyí lé, Yesuq gi, jowò rawò má kyûdung nyi ri. Yhang kyû ban dung jáng, Yhâng é chángzo rayuq gi, "Yhumsing ê, Yohan gi, yhâng é chángzô pé lé kyûdung rá hkyô mhoq byí é su, ngamoq lé le mhoq byi laq." ga Yhang lé tai ri.

² Haú hkûn, Yhang gi, "Nungmoq kyûdung le, 'Mauhkûng htoq tsáng myhâng má é ngamoq é Áwa ê, Náng é mying gi, choyiýung nyí sháng gaq. Náng é mingdán jé lô sháng gaq.

³ Ngamoq nyí wuí rá é zoshuq lé, ngamoq lé nyí wuí byi laq.

⁴ Ngamoq lé shut é byù banshoq bâng é mara lé, ngamoq hkyut pyám byí é yanmai, ngamoq é mara lé le hkyut pyám byi laq.

Ngamoq lé, agúng alaú hkyô má hkâwâng nhâng.' nghû keq." ga luí, yhangmoq lé mhoqshit ri.

⁵ Yesuq yhangmoq lé dum tai é gi, "Dangké, nungmoq chyáng má é rayuq sù gi, buinùm wó é nghû sháng, yhang gi, gunggàm yoq má haú yuq chyáng é luí, 'Buinùm hpó ê, ngo lé muk sùm long byam chyi byí kat laq,

⁶ haí mù gâ le, ngá buinùm rayuq byin we mai ngá chyáng jé nyi tô ri. Ngó gi, yhang lé byi tso rá haí le a joq byam dut tô ri.' ga tai é hkûn,

⁷ yhúmhaú shut má é sù gi, 'Ngo lé, hkâlê lhoq hkyik lo, hkum le myhî pyám bê, ngá zoshâng wui le ngò eq rahá yhupjang má yhup to bekô. Ngò, nang lé haí le a wó toq yù byi lo.' ga tu kat ri.

⁸ Ngò, nungmoq lé tai kôlé, buinùm nghut é yanmai za gi, muk a kâm toq byi lo kôhang, zuq zuq dúng nyi é yanmai, haú yuq lé, yhang ra chá é banshoq toq yù byi rá nghut lhê.

⁹ Haú mù, ngò, nungmoq lé dum tai kôlé, dung keq, haú jáng, nungmoq lé byi rá nghut lhê; hô keq, haú jáng, nungmoq myàng kó rá nghut lhê; hkum má kok keq, haú jáng, nungmoq lé hpóng byi rá nghut lhê.

¹⁰ Hkâsù mù gâ le, ó yuq nghut kôle, dung sù wó rá; hô sù myàng rá; hkum kok sù lé gi, hpóng byi rá nghut lhê.

¹¹ Nungmoq íwá pé má, ó yuq wá, yhumsing yhangzo muk dúng le, luqgok byi kó rá lúhú? Ngozo dúng le, lhangmui byi kó rá lúhú?

¹² Woq-ú dúng le, gogok byi kó rá lúhú?

13 Agè ashop é bang nungmoq lháng gi, nungmoq é zo wuî lé, ge é chyunghuq dat byi kô le nhîng, mauhkûng htoq tsáng myhâng mâ é nungmoq é İwa gi, Yhang lé dîng é bang lé, je riyhang haû Chyoiyûng Woi-nyî byi râ nghut lhê." ga taî ri.

Mara Hûn É Dang Lé Yesuq Tû Tai É Hkyô
Mht 12:22-30, 43-45; Mrk 3:20-27

14 Radâm lé, Yesuq gi, byû rayuq lé dang a wó nyô shoq kut tô é nat gang lé, haû yuq chyáng mai hkat htoq pyâm ri. Nat haû htoq lô byuq é htâng mã, dang a wó nyô sù gi, dang wó nyo nyi é yanmai, byû moq mó gi, chôm maú byuq bum akô.

15 Nghut kôlhâng, yhangmoq chyáng mã é ra-am gi, "Yhang gi, nat gâng pé é zau Bezebulaq é wum-o a-tsâm eq za, nat gâng pé lé wó hkat pyâm é nghut ri." ga taî bum akô nghut ri.

16 Ra-am le, Yhang lé, mauhkûng mã é kumlhá tûn shit wú laq ga dîng chyam wú akô.*

17 Yesuq kúm yhangmoq myit nyi é hkyô lé sé mù taî é gi, "Ikun byoq é mingdán hká lhum nghut kôle, hten byuq râ za nghut lhê; haû eq rajung za, ikun byû yhangchang rayuq eq rayuq byoq lhûm é yhûm htu gi, byoq gâng lhum râ za nghut lhê.

18 Nat pé le yhangmoq yhangchang byoq gâng lhûm nyi kô é nghut le gi, Tsadán é mingdán gi, hkâsu kut wó gîng to râ lhú? Ngò isu nghu taî é gi, nungmoq ngo lé Bezebulaq é wum-o a-tsâm eq za, nat gâng pé lé hkat pyâm ri ga kô é yanmai nghut lhê.

19 Ngò gi, Bezebulaq é wum-ô eq za, nat gâng pé lé hkat htoq é nghut jáng, nungmoq é chángzô pé gi, ó yuq é wum-o a-tsâm eq za, nat gâng pé lé hkat pyâm kô é nghut lhê lhú? Haû mù luî, yhangmoq gi, nungmoq lé jéyáng é bang dut bekô râ nghut lhê.

20 Nghut kôlhâng, Ngò gi, Garai Gasâng é wum-ô eq nat gâng pé lé hkat htoq pyâm é nghut jáng, Garai Gasâng é mingdán† gi, nungmoq chyáng jé bê nghut ri.

21 Wum-o bo é sù rayuq gi, yhâng é yhûm lé, shâm, lhâm chûng luî zúng tô é nghut jáng, yhâng é sutzè pé gi, rago za wó joq to râ nghut lhê.

22 Nghut kôlhâng, yhâng htoq wum je bo é sù lé luî, haû yuq lé, lé zân ung pyâm é nghut le gi, yhang lum tô é shâm, lhâm lé, hkyom yu pyâm byi luî, yhâng é sutzè pé lé, gam yu pyâm byi râ nghut lhê.‡

23 Ngá hkyam shut a dap sù gi, Ngo lé gyè kut sù nghut lhê. Ngò eq rahá a shuî tsing sù gi, lhoq pyo pyâm é sù nghut nyi ri.

24 Haû agè ashop é nat gi, byû rayuq chyáng mai htoq lô mù, kyuq huî é jowò pé mã sô yông e ló luî, no râ jowò hkat ho wú le, a myang hô nghut ri. Haû hkûn, yhang gi, 'Ngò nyi laî lo é yhûm má dum taû ló wú râ.' ga taî ri.

25 Yhang dum taû jé ló wú le, yhûm haû gi, shum pyâm mù san za rago dut to lánq é lé ló myang ri.

* **11:16** Byu pé gi, Yesuq lé Garai Gasang nhang kat é hkyô lé saksé myàng nau luî, mauhpo kumlhá dîng nyi akô. † **11:20** *Garai Gasâng é mingdán* gâ é gi, byû htoq má le, nat htoq má le, Garai Gasâng yhang uphkanq é lé gâ é nghut lhê. ‡ **11:22** Haû eq rajung za, Yesuq gi, Tsadán lé zân ûng bê nghut é yanmai, agè ashop é nat pé lé byu pé chyáng mai, wó hkat pyâm bê nghut ri.

26 Haù jáng, yhang gi, dum taù ê mù, yhang htoq je wuì é nat nyhit nat lé shuí lò luí, haù má lo wàng nyi to bekô. Haù mù, haù yuq é nyi yap sâmlai gi, hí lhê htoq má je wuì lò bê nghut ri." ga taí ri.

27 Haù su ga, Yesuq taí nyi é hkûn, haù shiwa hpong má é, myiwe zo rayuq htê mó o mó eq Yhang lé taí é gi, "Nang lé wun é ùng wam eq nàng shuq é nauwàng gi, hkungsô wó nyi ri ô!" gà ri.

28 Yesuq gi, "Garai Gasâng é mungdang gyô yù luí châng kut é bang gi, je riyhang hkungsô wó kó rà nghut lhê." ga taí ri.

Mauhpo Kumlhá Lé Dung Kô É Hkyô

Mht 12:38-42; Mrk 8:12

29 Shiwa byu pé jat myô zup zîng lo é hkûn lé, Yesuq taí é gi, "Shí ipyat lhê é byu pé gi, agè ashop é bang nghut akô. Yhangmoq gi, limik kumlhá dúng nyi bùm kôlhang, Yonaq é kumlhá mai lai luí, gotú haí le tún shit rà a nghut.

30 Yonaq gi, Ninewe wà byù pè hí má kumlhá^S dut é su, haù Byu Yhangzo gi, shí pyat lhê é byu pè hí má, kumlhá dut rà nghut lhê.

31 Maupyí má é hkohkâm myhí gi, maumyí ló htâng é mai lé lô mù, Sholomon é hpaqchyí dang lé, lé gyô yù bê nghut mù, haù tarâ jéyáng é buinyi má, shí ipyat má é byu pé eq rahá toq lò luí, yhangmoq lé mara hùn rà nghut lhê. Wú keq, Sholomon htoq ko sù gi, ahkuí shí má jé nyi to bê.

32 Ninewe wà byu pé gi, Yonaq, mungdang hko kyô é hkûn myit lhîng kô é nghut mù, tarâ jéyáng é buinyi má, shí ipyat eq rahá toq lò luí, yhangmoq lé mara hùn kó rà nghut lhê. Wú keq, Yonaq htoq ko sù gi, ahkuí shí má jé nyi to bê.

Myibung Su Duqbó Râ Hkyô

Mht 5:15; 6:22-23

33 Myibung lé tuq mù go pyâm é jowò má tô tô é le, mûng eq nghop tô é le, ó a kut wú kô. Nghut kôlhang, wang lé lô bang myoq wó myâng rà matú kúm gi, tsungjang má tsung to to chyat kut akô.

34 Náng é myoq gi, náng gungdú é myibung* nghut nyi ri. Náng é myoqjí ge é nghut le gi, náng é gungdu gón má maubó byíng mui to rà nghut lhê. Nghut kôlhang, náng myoq a ge é nghut le gi, náng é gungdu gón gi, mauchut tuq dut nyi rà nghut lhê.

35 Haù mù, náng chyáng bo é maubó gi, mauchut byuq é, a chut byuq é lé wú nyí aq. Náng lumjîng é hkyô eq nàng myit é hkyô gi, mauchut tuq a dut sháng gaq, sidiq nyí aq.

36 Náng é ragûngdu gón má duqbó é nghut le gi, rawò má le mauchut é jowò a joq é za, myibung nang lé duqbó byí nyi é su, náng gungdu gón má duqbó nyi rà nghut lhê." ga taí ri.

Hparishe Pé Eq Tarâ Sará Pé Lé, Yesuq Mara Hun É Hkyô

Mht 23:1-36; Mrk 12:38-40; Luk 20:45-47

37 Yesuq haù su ga ban taí é htâng má, Hparishe rayuq gi, yhang eq zang rahá zo rà matú, Yesuq lé ji ri. Haù mù, Yesuq gi, haù yhûm má wang é mù zang zo rà ga siboi nàm má zung tô ri.

^S 11:30 Kumlhá gi, Yonaq, ngozô wamdau má sum nyí lúng é su, Yesuq le, shí bê mai sum nyí nghú rà nyí má, dum dui toq lò rà hkyô lé taí nau é nghut ri. * 11:34 Myibung gà é gi, tengmán é mungdang lé wó sê yu é a-tsam lé, taí é nghut ri.

38 Nghut kôlhang, Hparishe wá gi, zang zo râ hí má Yesuq loq a chí é lé, myàng luí maú nyi ri.†

39 Haú mù luí, Yhumsing Yesuq yhang lé tai é gi, "Nungmoq Hparishe pé gi, góm eq zanghkoq lé ahtoq shut za chí yúng nyí kômù, nungmoq é unghkaú má gi, lú zo lú shuq é eq agè ashop é hkyô pé bying zan tô ri.

40 Byù bâm pé ê, ahte‡ lé le, ahtoq§ lé le, saí sù gi, Garai Gasang rayuq za nghut é lé, a sé kó lúh?

41 Nghut kôlhang, ahte má bo é zè pé lé, ra chá é bang lé byí pyám keq; haú hkûn, nungmoq é matú banshoq gi, sân-yúng lô rà nghut lhê.

42 Hparishe pé ê, nungmoq gi, dingnyé wó ri, hkâsu mù gà le, nungmoq gi, gau-tsáng, shingtón pé eq zangxun mhan-haq ajù jù má é, xê gambùm ragambùm lé gi, Garai Gasang lé byi nyi kômù, tarâ dingmán é hkyô eq Garai Gasang chyitdap é hkyô lé gi, lhai pyám tô akô. Xê gambùm ragambùm byí é lé le cháng luí, tarâ dingmán é hkyô eq Garai Gasang lé chyitdap é hkyô lé le, kut nyí rà lhê.

43 Hparishe pé ê, nungmoq gi, dingnyé wó ri, hkâsu mù gà le, tarajong pé má é ahkyak dik é zùng jang pé lé le, gai pé má hkunggá é èq shichyên é dang lé le, nungmoq ô nau nyi bum akô.

44 Nungmoq gi, dingnyé wó ri, hkâsu mù gà le, nungmoq gi, ahkô a dong lo mù, byu pé a sé luí, ahtoq mai sô lai é lupdùng eq du akô." ga tai ri.

45 Haú hkûn, tarâ sará rayuq gi, "Sarâ ê, nàng haú su gà é gi, ngamoq lé le rhoi lhôm nyi é nghut bê." ga Yhang lé tú tai ri.

46 Haú su ga jáng, Yesuq gi, "Nungmoq tarâ sará pé le, dingnyé wó ri. Hkâsu mù gà le, nungmoq gi, byu pé lé, wùn waq rà wuí é noqkuq htùng tarâ wòlai lé wùn nhâng luí, yhumsing yhang gi, wò haú lé loqnyhuí èq lhang, a bo záng wù kó nghut ri.

47 Nungmoq gi, dingnyé wó ri, hkâsu mù gà le, nungmoq gi, nungmoq é ichyí íwa pé sat pyám é myiqhtoí pé é lup lé luptsuq tsuq akô.

48 Haú mù luí, nungmoq gi, nungmoq é ichyí íwa pé é muzó lé, myit bo huí é bang nghut nyi akô. Hkâsu mù gà le, yhangmoq gi, myiqhtoí pé lé sat pyám mù, nungmoq gi, lup haú pé lé luptsuq tsuq akô.

49 Haú mù luí, Garai Gasang, Yhâng é hpaqchyí byéng-yá mai tai é gi, 'Myiqhtoí pé eq lagyô pé lé, ngò yhangmoq chyáng nhang kat rà nghut lhê; haú bang má é ra-am lé gi, yhangmoq lhom sat pyám mù, ra-am lé gi, zing-ri kó rà nghut lhê.' gà ri.

50 Haú su mù luí, mau htoq xâng hkûn lhê é, Abelaq é sui mai, hkungga gyap eq noqkuq yhùm gyoro má sat pyám huí é Zahkariq é sui jé shoq, shun pyám é myiqhtoí pé é sui banshoq bâng é manglat gi, shí pyat má é byu pé lé hún rà nghut lhê.

51 Ngò, nungmoq lé tai kólé, manglat haú pé lé gi, shí pyat má é byu pé lé, gè gè yhang hún rà nghut lhê.

52 Tarâ sará pé ê, nungmoq gi, dingnyé wó ri, hkâsu mù gà le, nungmoq gi, byu pé Garai Gasang lé sé ra zoqshi lé yu pyám byi kômù, yhumsing yhang le a sé, sé nau bang lé le, hkùm zing tô akô nghut ri." ga tai ri.

† 11:38 Yudaq htung tarâ má gi, zang a zo shi má loq chí rà lhê. ‡ 11:40 Ahte gà é gi, i-myt unghkaú lé tai ri. § 11:40 Ahtoq gà é gi, gungdu lé tai ri.

53-54 Yesuq haû mai htoq lô é hkûn, tarâ sará pé eq Hparishe pé gi, Yhang lé gyè kut mù, Yhâng é dang má mara wó myâng shoq ga, wuî é dangmyi myo myo myi luî, gyám wú nyi akò nghut ri.

12

Gegùn Labyoq Kut É Bang Lé Sidiq Râ Hkyô

Mh̄t 10:28-33; 12:32; 10:19-20

¹ Haû u, byù hkying mun zup zing lò mù, rayuq eq rayuq lhang zang nang lhum shoq dut nyi é hkûn, Yesuq, Yhâng é changzô pé lé tai hi é gi, "Gegùn labyoq kut é Hparishe pé é múnchi lé koi sidiq pyám keq.

² A byông htoq loshoq wó zaú nghop tô é, hai le a joq râ nghut lhê; a sé loshoq wó haq tô é le, hai a joq râ nghut lhê.

³ Haû mù luî, nungmoq, mauchut hkaû má haq tai é dang banshoq lé, myoq myàng maubó má wó gyô bùm kó râ nghut lhê. Gok hkaû má, dangsoq soq é lé le, yhumhkûng htoq mai tai pyo bùm bekô râ nghut lhê.

⁴ Ngá buinùm wuî ê, Ngò, nungmoq lé tai kôlé, gungdu lé za wó sat pyám mù, woi-nyí lé hai le a wó kut é bang lé, hkâgyuq kó.

⁵ Nghut kôlhâng, nungmoq ó lé za gyuq râ é lé gi, Ngò, nungmoq lé tai kyo kôlé, gungdu lé sat pyám é htâng má, woi-nyí lé ngarai ming shut wó hkyô kat pyám é a-tsam wó sù lé kúm gi, gyuq keq. Nghut bê, Ngò, nungmoq lé tai kôlé, haû yuq lé za, gyuq nyi keq.

⁶ Johkyáng ngo du lé, gyi htingchap í chap èq wó ùng pyám lhê a nghut kó lhu? Haû johkyáng radu lé lhang, Garai Gasang gi, tô-myhí pyám é a nghut.

⁷ Garai Gasang gi, nungmoq é ulhum mã é xâm banshoq lé lhang, nghap to gù nghut lhê. Haû mù, hkâgyuq kó; nungmoq gi, haû johkyáng myo myô htoq mã lhang gù je bo é bang nghut lhê.

⁸ Ngò, nungmoq lé tai kôlé, byu pé hí má Ngo lé lhom yin yu é sù ó yuq nghut kôle, Garai Gasâng é maumang lagyô pé é hí má, haû Byu Yhangzo gi, haû yuq lé lhom yin yû râ nghut lhê.

⁹ Nghut kôlhâng, byu pé é hí má Ngo lé he-ngik pyám é sù lé chyaú gi, Garai Gasâng é maumang lagyô pé é hí má, he-ngik pyám râ nghut lhê.

¹⁰ Haû Byu Yhangzo lé dang dông shut é sù gi, mara hkyut byí é wó hui ra nghut lhê; nghut kôlhâng, haû Chyoiyung Woi-nyí lé rhoi dang tai pyám é sù gi, mara hkyut byí é hui râ a nghut.

¹¹ Byu pé nungmoq lé jéyang râ matú tarajong pé má le, agyi suwún wuî eq ahkáng ayá wó bâng é hí má le, shuî e lô kô é hkûn, hkâsu kut râ lé le, hkâsu nghu tú tai râ lé le, hkâ-myit chiq kó.

¹² Hkâsu mù gâ le, haû u lé yhang, Chyoiyung Woi-nyí gi, nungmoq hkâsu tai râ hkyô lé mhoqshit byi râ nghut lhê." ga tai ri.

Hpaqchyî A Bo É Sahtê Hpó Lé Dangtú Yu É Hkyô

¹³ Haû hkûn, shiwa hpúng hkaû mai, byù rayuq gi, "Sarâ ê, ngá-nhik tang wó é muizè pé lé chôm gam lhum râ matú, ngá mang lé bo tai byi laq." ga luî, Yesuq lé tai ri.

¹⁴ Yesuq gi, "Byù nang ê, nungnhik tang ahtoq má tarâ agyi kut luî, ikun zè gàm byi râ gi, ngo lé ó hkyin tô é lhu?" ga luî, yhang lé tú tai ri.

¹⁵ Yesuq yhangmoq lé tai é gi, "Myoqnoq é hkyô banshoq mai, nungmoq é i-myit lé hkûm zing luî, koi sidiq nyi keq. Hkâsu mù gâ le, byu é asak gi, agùn agó é sutzè má bo é a nghut." gâ ri.

16 Dangtú ralhüm dông mai le, yhangmoq lé Yesuq taí é gi, "Sahtê rayuq gi, yhâng é yò pé má guqzo muilhum gyaí já ri.

17 Haù mù luí, yhâng é unghkaù má myit é gi, 'Ngò hkâsu kut wú râ lhi? Ngá é guqzo muilhum pé lé kat to râ jowò a wó lo dut to bê.' gâ ri.

18 Dum nghut jáng, yhang gi, 'Ngò Ìsu kut wú râ abe, ngá é chyí xau pé lé hpyoq pyám luí, je kó é chyí pé lé sai râ nghut lhê. Chyí haù pé má ngá é guqzo muilhum pé eq sutzè banshoq lé, tsing kat to luí,

19 ngá é i-myt lé Ìsu nghù taí râ, "I-myt ê, zanwut myáng myáng é matú, zè gè myo myo ngò tsing to bê. I-myt nàng zim za kut nyì aq hkoi. Zo mù, shuq mù, ngón ngón nyì aq." ga' gâ ri.

20 Nghut kôlhang, Garai Gasang gi, 'Byù gò ê, náng é asak lé, hkû-myín yhang, wup yu pyám byí é nghut jáng, nàng tsing hkong tô é zè pé gi, ó yuq é matú dut rá lúh?' ga luí, yhang lé taí ri.

21 Haù eq rajung za, yhumsing é matú sutzè hkong to mù luí, Garai Gasang é hí má myung nyì sù gi, haù yuq su nghut rá nghut lhê." gâ ri.

Myit A Chiq É Za Garai Lé Lumjng Râ Hkyô

Mht 6:25-34, 19-21

22 Yesuq, Yhâng é chángzò pé lé dum taí é gi, "Haù mù luí, Ngò, nungmoq lé taí kôlé, nungmoq é asak matú haí zo haí shuq rá eq nungmoq é gungđu matú haí wut haí tsang rá lé, hkâ-myit chiq kó.

23 Asak gi, zoshuq htoq má, gungđu gi, mebù htoq má, je ahkyak lhê.

24 Nghonoq pé é hkyô lé myit wú keq; yhangmoq gi, kyô hkyô kyô shu a kut kó; guqchyí eq sutdek lé a wó kó, nghut kôlhang, Garai Gasang gi, yhangmoq lé, byi tso byi huq nyi lhê. Nungmoq gi, nghoq haù pé htoq má je riyhang hpaudap nyi lhê a nghut kó lúh?

25 Nungmoq má, ó yuq wá, myit chiq é eq, yhumsing é asak lé radúng kó wó jat yù kó rá lúh?

26 Haù su mù luí, tiq dik é hkyô lé lhang, nungmoq a wó kut kó é nhing, haí mù luí gotù hkyô pé lé, myit myô nyi akó lúh?

27 Htutbó ban* pé hkâsu kut kó lo é lé, myit wú keq. Haù pé gi, mù le a zui, hkyíng le a duí kó nghut ri. Nghut kôlhang, Ngò, nungmoq lé taí kyo kôlé, Hkohkâm Sholumon hpúng kó dik u lé wut é mebu lhang, ban haù rabó lé a hkyit nghut ri.

28 Lumjng myit tiq é bang ê, hkû-nyí joq mù, napmá myihkyóm má dú kat pyám hui rá nghut é yosò mhan pé lé za lhang, Garai Gasang haù su kut hut é nghut le gi, nungmoq lé, je riyhang hut rá a nghut kó lúh?

29 Nungmoq gi, haí zo haí shuq rá lé hkâho nyi kó; haù eq séng luí lé hkâ-myit chiq nyí kó.

30 Hkâsu mù gâ le, Garai Gasang lé a sé bang gi, haù hkyô banshoq lé châng hkat ho nyi akó; nghut kôlhang, nungmoq é Ìwa Garai Gasang gi, haù pé lé nungmoq rá é hkyô, sé byí nyi lhê.

31 Nungmoq kúm gi, Yhâng é mingdán lé ho nyi keq, haù jáng, haù pé, nungmoq lé puq byi rá nghut lhê.

32 Sau hpúng zò pé ê, hkâgyuq ko, hkâsu mù gâ le, nungmoq é Ìwa Garai Gasang gi, Yhâng é mingdán nungmoq lé byí nau nyi ri.

* 12:27 Htutbó ban gi, yúng dik é yosò ban nghut lhê.

³³ Nungmoq wó é zè pé lé ùng pyám luí, myùng bang lé byi keq, yhumsing é matú a dat xau a dat wóm é ngunhtùng saí luí, hkau sù lé a jé, manot èq le a wó zò é sutzè lé mauhkúng htoq má hkong to keq.

³⁴ Hkâsu mù gâ le, náng é sutzè joq jang má, náng é i-myt le jé nyí râ nghut lhê.

Yesuq Dum Jé Lé Lô Râ Hkyíng Lé Machya Nyí Râ Hkyó
Mht 24:45-51

³⁵ Nungmoq gi, hpyihit hit luí, (mû zui râ matú rì rì kut to keq); nungmoq é myibung lé tuq to mù,

³⁶ myiháng poí mai dum taù lò luí, hkúm lo kok é, yhumsing hpó lé radá dâm hkum lhom wó hpông hâng yù shoq, láng tô é dui-nhâng zoshâng wui su kut nyí keq.

³⁷ Haù yhumsing jé lo le, machya nyí láng é dui-nhâng zoshâng wui gi, hkungsò wó nyí râ. Hkâsu mù gâ le, ngò, nungmoq lé teng za taí kôlé, haù yhumsing hpó gi, yhangmoq lé yuq zung to nhâng luí, yhang gi, dui-nhâng zoshâng su hpyihit hit mù, saí tso saí huq râ nghut lhê.

³⁸ Gunggàm yoq lé nghut kôlháng, woq tân hkùn lé nghut kôlháng, haù su kut machya nyí é lé, yhumsing hpó lo myang é nghut le gi, dui-nhâng zoshâng haù bang hkungsò wó nyí ri.

³⁹ Yhumsing hpó rayuq, hká u má hkau sù lé lô râ lé, sê tô é ru nghut le gi, yhang machya nyí luí, yhâng yhùm lé a wó hput htong nhâng râ nghut é lé, bûn sê nyí keq.

⁴⁰ Haù mù, nungmoq le rì rì nghut nyí keq; hkâsu mù gâ le, haù Byu Yhangzo gi, a bûn nùng má jé lé lô râ nghut lhê." gâ rì.

⁴¹ Haù hkùn, Petruq gi, "Yhumsing ê, dangtú shí gi, ngamoq lé za, taí é nghut lhê lú? Haù a nghut jáng, lhunglhâng bang lé taí é đông nghut lhê lú?" ga myí ri.

⁴² Haù jáng, Yesuq gi, "Lumging é eq hpaqchyí bo é sùt zum sù gi, hká yuq nghut lhê lú? Haù yuq gi, yhâng yhumsing é dui-nhâng zoshâng wui lé ahkyíng jé jáng zoshuq gàm byi râ matú, yhumsing hpó èq hkyin to sù dut râ nghut lhê.

⁴³ Yhumsing hpó dum taù lo é hkùn, haù su kut nyí láng é dui-nhâng zoshâng gi, hkungsò wó nyí ri.

⁴⁴ Ngò, nungmoq lé teng za taí kôlé, yhumsing hpó haù gi, yhâng é sutzè banshoq, dui-nhâng zoshâng haù lé ap to râ nghut lhê.

⁴⁵ Nghut kôlháng, dui-nhâng zoshâng haù gi, yhâng é i-myt unghkaù má, 'Ngá é yhumsing hpó jé lô râ gayi myáng ashí.' ga myit pyám mù, dui-nhâng zoshâng luzúm wui myiwe, yuqgè lé nhuq bat é eq, zo yê shuq yê î shuq wut nyí é nghut jáng,

⁴⁶ dui-nhâng zoshâng hau é yhumsing hpó gi, yhang a myitbyu tô é buinyi eq yhang a sé tô é ahkyíng má jé lô mù, yhang lé jap pyám luí a lumjing bang eq rahá nyhi pyám râ nghut lhê.

⁴⁷ Yhumsing hpó é i-myt lé sê to kôlháng, yhang ô nau é đông a cháng, rì rì le a hen tô é dui-nhâng zoshâng gi, yhâng yhumsing eq nhuq bat é lé, myo myo hui zo râ nghut lhê.

⁴⁸ Nghut kôlháng, a sé mù kut shut sù kúm gi, shau za bat é hui râ nghut lhê. Haù eq rajung za, Garai Gasang gi, myo shoq wó yù su chyáng mai, myo shoq

dùng yù rã nghut lê. Myo myo ap byí tô é hui su chyáng mai, je myo shoq dum dùng yù rã nghut lê.

Nguingón Nhâng Rã A Nghut, Lhoq Kang Nhâng Rã Ru Nghut Lê

Mht 10:34-36

⁴⁹ Ngò jé lé é gi, myigùng htoq má, myi nyé nhâng rã matú nghut lê. Myi haù dap to lánq é nghut le gi, ngò ô nau é hkyô jup byíng bê.

⁵⁰ Nghut kôhlang, ngò hkam yù rã é baptisma[†] rajung joq ashí, haù a hkam yù yù gi, ngò gyaì yhang hkâm zo wuì nyi ri.

⁵¹ Ngò jé lé é gi, myidàm htoq má simsaq hkyô byi rã matú nghut nhò ngam akô lúh? Haù dông a nghut, Ngò, nungmoq lé tái kôlé, byu pé lé lhoq pyô lhoq kang rã matú sheq ru nghut lê.

⁵² Haù su mù, ahkuí mai rayhùm za má é byù ngo yuq gi, rayuq eq rayuq yhangmoq yhangchang byoq gâng lhum mù, sum yuq rahú, í yuq rahú, í yuq rahú, sum yuq rahú dut lo bùm bekô rã nghut lê.

⁵³ Yhângwa gi, yhâng é yuqzo eq, yuqzo gi, yhângwa eq, yhângnu gi, yhâng é byizo eq, byizo gi, yhângnu eq, yhangmhoi gi, yhâng dumó eq, yhâng dumó gi, yhangmhoi eq kut, ngá é yanmai, rayuq eq rayuq byoq gâng lhum bùm bekô rã nghut lê." ga tái ri.

Dut Lò Rã Hkyo É Kumhá Lé Sê Gam Hkoq Rã Lê

Mht 16:2-3; 5:25-26

⁵⁴ Hau htâng shiwa byu pé lé, Yhang tái é gi, "Nungmoq gi, buiwàng hkyam shut mhut htup é lé myàng jáng, 'Maù wo lò berá.' ga radá dâm lhaq tái tái mu akô, haù eq rajung za le, dut lò lò mu ri.

⁵⁵ Dum nghut jáng, maupyí shut má é lai lo le, 'Bùi htân berá.' ga lhaq tái tái mu akô, haù eq rajung za le dut lò lò mu ri.

⁵⁶ Gegùn labyoq kut bang ê, nungmoq gi, myigùng eq mauhkung é kumhá lé, sê gam hkoq yu nyi akô. Haù su nghut kô le nhíng, haì mù luí, shí ipyat má é kumhá lé gi, a sê gam hkoq dut tô akô lúh?

⁵⁷ Haù eq rajung za, haì mù haù dingham é hkyô lé yhumsing yhang yhang a wó doqdân yù kô é lúh?

⁵⁸ Dangké, nang lé yui tsuq sù eq rahá, tará agyi wá chyáng e ló le, hkyô má yhang eq ngón shoq byìn hpyé huí yù aq. Haù a nghut jáng, yui yhumsing gi, nang lé tará agyi chyáng é dé pyám luí, tará agyi gi, htóng hkyó su chyáng, nang lé ap pyám luí, yhang gi, nang lé htóng má lhung pyám rã nghut lê.

⁵⁹ Ngò, nang lé tái lé, yuichyín haù a ban xap xap gi, htóng haù mai nàng wó htoq lò rã a nghut." ga tái ri.

13

Myit A Lhìng Jáng Shi Hten Byuq Rã

¹ Haù hkùn, haù má nyi é byù ra-am gi, mauzau Pilat èq Galile byù ra-am lé sat mù yhangmoq é sui eq yhangmoq nóng jaú é hkungga lé nyhò pyám é hkyô, Yesuq lé tái tái kyô akô.

² Yesuq gi, "Galile byù haù bang haù su kut hui zo kô é yanmai, yhangmoq gi, gotù Galile byu pé banshoq htoq má, yubak je myô akô nghú, nungmoq myit ngam akô lúh?

[†] 12:50 Shí má é baptisma gi, Yesuq, ajung jung hpuzo mù shí hkâm é hkyô lé tái é nghut lê.

³ Haù su a nghut! Ngò, nungmoq lé taí kôlé, nungmoq le, myit a lêng kô é nghut le gi, banshoq bang haù eq rajung za shi hten byuq kó rà nghut lhê.

⁴ Haù htoq agó, Siloam wà mã é machya gyop gyó luí, nhê sat huí é byù raxe shit yuq gi, Yerusalem wà mó mã é byù banshoq bang htoq má mara je kò akò nghù, nungmoq myit ngam nyi akò lúh?

⁵ Haù su a nghut! Ngò, nungmoq lé taí kôlé, nungmoq le, myit a lêng kô é nghut le gi, banshoq bang haù eq rajung za shi hten byuq kó rà nghut lhê." ga taí ri.

⁶ Yesuq dangtú dông dum taí é gi, "Byù rayuq gi, yhang é tsibiyiq hkyâm má, maihpáng gâm ragàm hô tô ri. Yhang agàm haù má, ashi ê ho wú le, zui tô é a myàng nghut ri.

⁷ Haù hkûn, yhang gi, 'Wú aq, ngò sum zân tup maihpáng gâm haù má ashi ê ho wú le, a myàng nghut ri; haù lé htuq pyám aq. Haí mù, maumyí aha agó kut yuq nhang tô lhê lúh?' ga luí, tsibiyiq hkyâm zúng sù lé taí ri.

⁸ Hkyâm zúng sù gi, 'Yhumsing ê, hkûzân za gi, yuq tô wú shi sháng gaq, shigâm hau é lêngghkyuq má ngò du lêng to mù, myìhpún kat luí bóm byi wú shirà.

⁹ Htang zàn má ashi zui é nghut le gi, yuq to sháng gaq, ashi a zui é nghut le kúm gi, htuq pyám rà nghut lhê.' ga luí, hkyâm yhumsing lé tù taí ri." gá ri.

Bánno Buinyì Má Gùng Loq Hten Sù Lé, Lhoq Gê Byí É Hkyó

¹⁰ Bánno buinyì lé, Yesuq gi, tarajong ralhú má, mhoqshit nyi ri.

¹¹ Haù hkûn, haù má raxe shit zân tup nat dap luí, gùng loq lhoq hten huí é myiwe rayuq le nyi tô ri. Yhang gi, dàngngóm luí, gungdu ratsuí lhang a wó lhoq nyhàng lô é sù nghut ri.

¹² Yesuq gi, myiwe haù lé myàng jáng, yhang chyáng wut yù mù, "Myiwe myí ê, năng, nòhpyo mai gè berâ." ga luí,

¹³ yhang é ahtoq má loq ke byí ri. Haù hkûn jáng, myiwe haù gi, nyàng za dum wó yap luí, Garai Gasang lé hkya-ôn nyi ri.

¹⁴ Haù mù, Bánno buinyì lé, Yesuq nòhpyo lhoq gê byí é yanmai, tarajong má up sù gi, wú nhik-yo luí, "Mù wó zui é buinyì hkyuq nyí joq tô le, buinyì haù pé má, lé wó lhoq ge yu lhê. Haù mù, Bánno buinyì má gi, hkâkut kó." ga luí, shiwa byu pé lé taí kat ri.

¹⁵ Haù hkûn, Yhumsing Yesuq gi, "Gegùn labyoq kut bang ê, nungmoq yuq hkanmó gi, Bánno buinyì lé, yhumsing é no, logúng pé lé, hkup mai hpông htoq yù mù uchyam byi huq huq kut akò a nghut lúh?

¹⁶ Haù nghut le gi, raxe shit zân gón Tsadán èq tuí to huí é, Abraham é yhangzo yhangshu myiwe zo shí lé, Bánno buinyì má Tsadán loq mai, hkyut byi a gíng rà lúh?" ga tù taí ri.

¹⁷ Haù su ga taí jáng, Yhang eq i-myt shai lhum é bang banshoq gi, hoq hpú byuq bum akò. Shiwa byù banshoq bang kúm gi, Yhang kut é mauhpo amú banshoq é yanmai, gabú nyi bum bekò nghut ri.

Angshi Cham Eq Munchi Dangké

Mhít 13:31-33; Mrk 4:30-32

¹⁸ Haù hkûn, Yesuq taí é gi, "Garai Gasang é mingdán gi, haí eq wuí lhê lúh? Ngò hai eq taí kê wú rà lúh?"

¹⁹ Haù gi, byù rayuq mai, yhang é hkyâm má hô tô é angshi cham eq wuí ri. Angshi cham haù gi, yuq kô lò mù agàm mó dut lò jáng, hau é akoq pé má, maulat nghoq zô pé wó zung nô yu akò." gá ri.

20 Yhang dum xoq taí é gi, "Garai Gasâng é mingdán lé, ngò hai eq taí kê wú rã lúhú?"

21 Haú gi, myiwe zo rayuq èq sungso mún sum búng má yu nyhó luí, haú pé banshoq lé wó lhoq daú nhang é múnchi eq wuí ri." gã ri.

Chyap É Hkúmdong

Mht 7:13-14, 21-23

22 Hau htâng, Yesuq gi, Yerusalem wà mó shut laí e ló uchyang, rawà bàn rawà má wàng mù, mhoqshit byí ri.

23 Haú hkùn, byù rayuq gi, "Yhumsing ê, hkyi yu é hui rã bang gi, shau za nghut rã lúhú?" ga luí, Yesuq lé myí ri.

24 Yesuq gi, "Chyap é hkúmdong mai, Garai Gasâng é mingdán má wó wàng shoq shikut keq. Hkâsu mù gâ le, ngò, nungmoq lé taí kôlé, byù myo myo gi, wó wàng shoq ga shikut wú kó rã. Nghut kôlháng, a wó wàng kó rã nghut lhê.

25 Yhumsing hpó,* hkum toq myhí pyâm é htâng má sheq, nungmoq gi, hkúmdong hí má yap to mù, hkum lé kok uchyang, 'Yhumsing ê, ngamoq lé hkum hpóng byi laq ô!' ga luí, wut dung jáng, haú yuq gi, 'Nungmoq ó nghut é lé le, hkarâ é bang nghut é lé le, ngò a sé.' ga tù taí rã nghut lhê.

26 Haú jáng, nungmoq gi, 'Ngamoq gi, nàng eq rahá zo wú shuq wú bê bang nghut lhê; ngamoq é wà hkyó pé má le, nàng mhoqshit byí wú bê nghut lhê.' ga taí bekô rã.

27 Nghut kôlháng, yhumsing hpó kúm gi, 'Nungmoq ó nghut é lé le, hkarâ é bang nghut é lé le, ngò a sé. Age ashop dông kut é bang banshoq è, ngá chyáng mai gâng ló byuq keq.' ga tù taí kat rã nghut lhê.

28 Garai Gasâng é mingdán má, Abraham, Isak, Yakup pé eq myiqhtoí pé banshoq bang nyi to kô é lé, nungmoq wó myâng kôlháng, nungmoq gi, shinggan shut hkat pyâm é hui luí, haú jowò má ngaubyi ngaú nhap eq zui kyik kyik shoq hpuzô nyi bùm bekô rã nghut lhê.

29 Hau hkùn, buihitoq, buiwàng, maupyí, mautsung mâ é mingdán myo myo mai byu pé lé luí, Garai Gasâng é mingdán zoshuq poi má myang zùng kó rã nghut lhê.

30 Haú hkùn, ahkuí htâng gyó nyí bang gi, hí bekô rã; ahkuí hí to bang gi, htâng gyó bekô rã." ga luí, yhangmoq lé taí ri.

Yerusalem Wà Mó Eq Séng Luí, Yesuq Taí É Hkyó

31 Haú u lé, Hparishe pé ra-am gi, Yesuq chyáng lé luí, "Shí jowò mai htoq ló byuq aq. Hkâsu mù gâ le, Herut gi, nang lé sat rã hen nyi ri." ga luí, Yhang lé taí akô.

32 Haú jáng, Yesuq gi, "'Hkú-nyí, napmá,† ngò nat gang hkat pyám luí, nò zo hpýo zo lhoq gè byí rã nghut lhê; sum nyí nghú rã buinyí‡ má sheq, ngá mù bàn rã nghut lhê.' nghú luí, agé ashop é wamhkuí haú lé ló taí kyo keq.

33 Haí wá dut kôlháng, hkú-nyí, napmá, sânghe nyí, ngò gi, e ló rã dut ashí. Hkâsu mù gâ le, myiqhtoí pé gi, Yerusalem wà mó mai lai luí gotù jowò má a shí wú kó nghut ri.

34 Yerusalem ê, Yerusalem ê, myiqhtoí pé lé sat pyám pyám kut mù, náng chyáng nhang kat é bang lé, luqgok èq dú sat sat kut é myuq nàng ê, woqzìng

* 13:25 Yhumsing hpó gi, Garai nghut lhê. Yhúm gi, Garai é mingdán lé taí é nghut lhê. † 13:32 Hkú-nyí, napmá gâ é gi, Yesuq mingkan htoq má mù zui rã ahkýing lé taí é nghut lhê. ‡ 13:32 Sum nyí nghú rã buinyi gâ é gi, Yesuq mingkan htoq má mù ban zui é buinyi lé taí é nghut lhê.

gi, yhangzô pé lé, yhang é dùng hkaû má tsing lhung yu é su, nungzô pé lé, Ngò hkâ-myhó dâm shui tsing yù naù kôlhang, nàng a dōng nghut ri.

³⁵ Wú keq, nungmoq é yhùm gi, nungmoq é matú chamchuyiyuì dut pyâm to berâ nghut lhê; Ngò, nungmoq lé tai kôlê; Yhumsing é mying mai jé lé lo é Sû gi, hkungsô wó nyi sháng gaq. * nghû, nungmoq a tai tai gi, Ngo lé wó myâng kó râ a nghut lo." ga luí, yhangmoq lé tai ri.

14

Hparishe Rayuq É Yhùm Má Yesuq Jé Nyi É Hkyô

¹ Bánno buinyi ra-nyí má, Yesuq gi, zang zo râ ga Hparishe suwún rayuq é yhùm má, ê wang nyi tô le, haù má é bang gi, Yhang lé gyui gyui chòm wú nyi bum akô.

² Haù u lé, wui wam ana dut sù rayuq gi, Yesuq é hí má jé nyi tô ri.

³ Haù mù, Yesuq gi, "Bánno buinyi má nòhpyo lé lhoq gè byí é gi, tarâ wang lhê lú, a wang é lú?" ga luí, tarâ sará pé eq Hparishe pé lé myí kat ri.

⁴ Nghut kôlhang, yhangmoq gi, zim za dut byuq akô. Haù hkûn, Yesuq gi, nòhpyo hui sù lé, zuí to mù, lhoq gè byi luí, nhang kat ri.

⁵ Hau htâng, Yesuq gi, yhangmoq lé, "Nungmoq chyáng mâ é rayuq yuq gi, yhumsing é yhangzo rayuq yuq, haù a nghut jáng, no myang radu du, Bánno buinyi má, wuihtung má byit gyó le, haù hkûn jáng, a xe htoq yu é za, wó nyi kó râ nghut lhê lú?" ga myí kat ri.

⁶ Yhangmoq kúm gi, dang haù hkun lé, haí le a wó tù tai kó nghut ri.

⁷ Haù hkûn, Yesuq gi, ji tô é bang jé réng é zùng jowò pé hkyin yu nyi kô é lé myàng jáng, yhangmoq lé dangtú dōng tai é gi,

⁸ "Byù rayuq yuq nang lé, myiháng poi má ji é nghut jáng, je réng é jowò má hkâ-ê zùng. Hkâsu mù gà le, náng htoq je arōng wó sù lé le, ji to shirâ abe.

⁹ Ji tô é nghut jáng gi, nungnhik lé ji tô é yhumsing hpó lé lô mù, 'Shí yuq lé jowò hui byi aq.' ga luí, náng lé lé tai jáng, nàng hoq hpu luí, hkyí htâng shut huí zùng ra râ nghut lhê.

¹⁰ Haù mù luí, supé nang lé ji le, hkyí htâng má é zùng aq; haù hkûn, nang lé ji sù lé mù luí, 'Buinum hpó é, shí je réng é jowò má huí doq zùng aq.' ga luí, nang lé tai jáng, nàng eq rahá zung tô é bíng lunglhang bāng é hí má, nàng gi, myoqdong wó râ nghut lhê.

¹¹ Hkâsu mù gà le, yhumsing gùng lé waq toq é sù ó yuq nghut kôlê, lhoq nyhum pyâm é hui râ nghut lhê; yhumsing gùng lé, lhoq nyhum é sù kúm gi, waq toq é hui râ nghut lhê." ga tai ri.

¹² Hau htâng, Yesuq yhang lé ji é yhumsing hpó lé tai é gi, "Napzang, a nghut jáng, myinxún lé nàng byi tso nau le gi, náng é buinùm wui, âgu âmāng pé, mungmoq wui, sùt wó é yhumkyo chang pé lé hkâji tso. Haù bang lé ji tsô é nghut jáng gi, yhangmoq nang lé dum ji tsô é eq, jeju dum tau kó râ nghut lhê.

¹³ Nghut kôlhang, nàng poi kut mù, byi tso byi huq nau é nghut le gi, myùng bang, hkyí gyui loq hten bang eq myoqjit é bang lé, ji tso aq.

¹⁴ Haù su kut jáng, nàng hkungsô wó nyi râ nghut lhê. Yhangmoq nang lé jeju a wó tau kôlhang, dingmán bang dum dui toq lo é buinyi má, hau é akyú lé, nàng wó hkam yù râ nghut lhê." gà ri.

Zoshuq Poi Mó Lé Dangtú Yu É Hkyô
Mht 22:1-10

15 Yesuq eq rahá zô zung tô é byù rayuq gi, dang haù wó gyo jáng, "Garai Gasâng é mingdán mà é zoshuq poi má wó zo rà sù gi, hkungsó wó nyí sù nghut rà." ga luí, Yesuq lé tai ri.

16 Yesuq haù yuq lé tú tai é gi, "Byù rayuq gi, myinzang byi tso rà ga, zoshuq poi mó ralhum hen to mù, byù myo myo lé ji tò ri.

17 Zang byi tso rà yàm jé jáng, yhâng é dui-nhâng zoshâng lé, ji tô é bâng chyáng 'Lé keq hkoi, zoshuq jin to bê.' ga é châng wut nhang ri.

18 Nghut kôhang, haù bang banshoq gi, zoshuq poi má a ê rà dông chyat he pyâm akô. Rayuq sù gi, 'Ngò yohtung rahkyang wui tô lê; haù lé é wú rà dut ri. Haù mù, ngo lé ahkáng byi shi laq.' ga yhang lé tai ri.

19 Dum rayuq le, 'Ngò, nohtó ngo zúm wui tô lê; haù pé lé dui nhang chyam wú rà dut ri; ngo lé ahkáng byi shi laq.' ga tai wô ho ri.

20 Dum rayuq le, 'Ngò miyiwe hâng tô é a myáng shi mù, a wó lé.' ga tai wô ho ri.

21 Haù jáng, dui-nhâng zoshâng taù lò mù, yhâng é yhumsing lé haù hkyô banshoq lò tai kyô ri. Haù hkûn, yhumsing hpó gi, nhikmó gyô yo mù, 'Wà mà é hkyô mó hkyô zo hkat hkangmó má hân hân é mù luí, myùng bang, hkyí gyui loq hten bang eq myoqjit bang lé, è ji lò aq.' ga luí, yhâng é dui-nhâng zoshâng lé nhang kat ri.

22 Hau htâng má, dui-nhâng zoshâng gi, 'Yhumsing ê, nàng nhang é eq rajung za ban kut bê; nghut kôhang, zùng rà jowò gi, mân tô ashí.' ga tai ri.

23 Haù su ga jáng, yhumsing hpó gi, 'Ngá yhùm byíng rà matú, wà yàm hkyô pé eq hkyâm yàm hkyô pé má htoq é mù, myang é bang lé a wó le wó shoq é tsing shuí lò aq.

24 Nang lé ngò tai lé, hí lé ji to huí é bang rayuq lhang, ngá é zoshuq poi lé wó chyim wú rà a nghut.' ga luí, yhâng é dui-nhâng zoshâng lé tai ri." gâ ri.

Yesuq É Chángzo Wó Dut Rà Matú

Mht 10:37-38; 5:13; Mrk 9:50

25 Byù hpúng mó Yesuq eq rahá e ló kô é hkûn, Yesuq gi, haù bang lé lhing wú luí,

26 "Ngá chyáng lé sù ó yuq nghut kôle, yhumsing é ìnu, íwa, yhangmyi, yhangzo eq, yhanggu, yhangmang, yhâng nhammó pé lé le, haù htoq agó, yhumsing é asak lé le, ngo lé chytidap é htoq má je chytidap sù gi, ngá é chángzo a wó dut.

27 Yhumsing é tapzîng lé a waq é za, Ngá htâng châng é sù ó yuq nghut kôle, Ngá é chángzo a wó dut.

28 Dangké, nungmoq chyáng mà é byù rayuq yuq, tsehtung yhùm ralhum saí nau le, yhang gi, yhùm haù ban saí rà matú, ngùn hkâ-myhó bàn rà eq yhang wó tô é ngùn luq a luq é lé, zùng mù luí, hí a sôn wú é byù nyí kó rà lhú?

29 Laq má mù, apûn awang gi, saí hi to mù luí, a wó lhoq pân é nghut jáng,

30 myàng é bang banshoq èq, 'Shí yuq gi, apûn awang gi, saí hi to mù luí, banshoq a wó saí pán lo nghut ri.' ga luí, yhang lé jóng pyám bekô rà nghut lhé.

31 Dangké, hkohkâm rayuq gi, gyè zan rà hen le, gyezo í mun eq lé sù hkohkâm lé, gyezo ramùn eq za lhom wó zân ùng rà, a wó zân ùng rà lé, zùng mù luí, hí a myit wú é nyí rà lhú?

32 A ùng rà dut le gi, gyè pé we we má nyi tô ashí hkûn lé, lagyo suwún pé lé nhang kat luí, simsaq rà matú htíngm gram pyám ra rà nghut lhé.

³³ Haù eq rajung za, nungmoq chyáng mà é ó yuq nghut kôlhang, yhumsing wó é zè banshoq lé, a pyâm to sù gi, ngá é chángzo wó dut rá a nghut.

³⁴ Xo gi, gè lhê. Nghut kôlhang, xomân kân byuq jáng gi, haù lé hai èq dum wó lhoq ngam yù rá lúh?

³⁵ Haù gi, myigung matú le, myìhpún kut rá matú le, akyù a bò lo. Haù mù luí, shinggan shut kúm gi, dù pyâm sê akô.

Gyo rá nohkyap dap sù gi, gyo yù sháng gaq." ga taí ri.

15

Byuq Byuq É Sau

Mht 18:12-14

¹ Ra-nyí lé, Yesuq é dang gyo kó rá ga, kang guq bang eq yubak dap bang gi, Yhâng chyáng lé zing bum akô.

² Haù hkûn, Hparishe pé eq tará sará pé gi, "Shí yuq gi, yubak dap bang lé lhom hap yù mù, yhangmoq eq rahá za, zo shuq nyi ri." ga taí put nyi bum akô.

³ Haù mù, Yesuq yhangmoq lé dangtú dông taí é gi,

⁴ "Nungmoq má, sau rashô du wó luí radu byuq byuq é nghut le, gaú xe gaú du lé yoso mhan yô má nyhi pyâm to mù, byuq byuq é sau haù lé, myàng shoq a châng ho yu é, ó yuq wá nyi kó rá lúh?

⁵ Byuq byuq é sau haù lé myang hô jáng, gyaí gau é i-myt èq goqsân htoq má bún kê chúng mù,

⁶ yhùm má jé jáng, yhâng é buinùm ji-myi wuì eq, yhumkyo chang pé lé ji yù mù, 'Ngá é byuq byuq é sau lé, ngò dum myang ho yù bê, ngò eq rahá chôm gabú sháng.' ga taí rá nghut lhê.

⁷ Haù eq rajung za, Ngò, nungmoq lé taí kôlé, myit lhing a rá é dingmán bang gaú xe gau yuq lé gabú é htoq, myit lhing é yubak dap sù rayuq é yanmai, mauhkung htoq má, je riyhang gabú jowò dut rá nghut lhê.

Byuq Byuq É Ngùn Chap

⁸ Dum nghut jáng, dangtú ralhüm gi, myiwe rayuq, ngùn raxê chap wó é má, rachap byuq byuq é nghut le, yhang gi, myibung tap mù rayhum é shum luí, myang yù shoq rago za, ho wú rá a nghut lúh?

⁹ Haù lé ho myàng jáng le, yhâng é buinùm ji-myi wuì eq yhumkyo chang pé lé ji yù mù, 'Byuq byuq é ngá ngùn chap lé dum myang ho yù bê, ngò eq rahá chôm gabú sháng.' ga taí rá nghut lhê.

¹⁰ Haù eq rajung za, Ngò, nungmoq lé taí kôlé, myit lhing é yubak dap sù rayuq é yanmai, Garai Gasâng é maumang lagyo pé hí má, gabú jowò dut rá nghut lhê." gá ri.

Byuq Byuq É Yuqzo

¹¹ Yesuq xoq taí é gi, "Byù rayuq gi, yuqzo í yuq wó ri.

¹² Haù nhik mà é tiq sù yuq gi, yhâng wa lé, 'Áwa ê, ngò wó gíng é sutzè, ngo lé gám byi laq.' ga dung jáng, yhâng wa le yhangnhik táng lé sutzè gám byí kat ri.

¹³ Hau htâng hkâ-myhàng a myáng má, yhangzo tiq sù yuq gi, sutzè banshoq hkyom yu chúng mù, mau we shut ê luí, haù jowò má, mingkan ngón hkyó châng é má yhang wó é ngunzè banshoq lé langsa pyám bê.

¹⁴ Haù su kut ngunzè wó mi-wó lé ban langsa pyám é htâng má, haù mau má mutmó gyo é yanmai, yhang gi, asho awui dut lo nyi bê nghut ri.

15 Haù mù, haù mau mâ é byù rayuq chyáng, langchyáng ê kut le, haù yuq gi, yhang lé waq rém jang shut nhang kat mù, waq lé lhom zúng nhang ri.

16 Haù hkùn, yhang gi, waq jùm zô é shigyang cham pé lé lhang, zo naù shoq dut kôlhang, ó yuq le a byi zo kó nghut ri.

17 Haù mù, yhang myit bûn lo é gi, 'Ngá wâ chyáng nyi é langchyâng pé gi, agùn agó myàng zô nyi kó rà nghut lê. Nghut kôlhang, ngò gi, shí jowò má, zo mut wuìshit é eq shí lô rà dut bê.

18 Ahkuí, ngò toq mù, ngá wâ chyáng taù ló luí, "Áwa ê, ngò gi, Garai Gasang lé le, nang lé le, shut bê.

19 Ahkuí mai ngò gi, nung zo nghû rá a gíng lo, hau é yanmai, náng é langchyáng rayuq đông za ngo lé nyi nhâng laq." nghû luí, ló tái rá.' gá ri.

20 Hau htàng, yhang toq luí, yhâng wâ chyáng ló le, yhang we we má ru nghut ashí hkùn mai, yhâng wa gi, yhang lé lhom myàng jáng, wú shogyo luí, din é mù, yhangzô é lingzing má é po pyik dap to luí, bopuq puq byí ri.

21 Haù hkùn, yhangzo gi, 'Áwa ê, ngò gi, Garai Gasang lé le, nang lé le, shut bê. Ahkuí mai, ngò gi, nung zo nghû rá a gíng lo.' ga luí, yhâng wa lé dúng tôngbán ri.

22 Yhângwa kúm gi, yhâng é langchyâng pé lé, 'Réng dik é mebu hân hân yu lé mù, yhang lé hut byi keq; yhâng é loq má, loqchyop chyop byi keq; hkyí má le hkyí-tsung tsung byi keq.

23 Tsô myum tô é nojúng zo le yu sat keq. Haù mù, nga-nhúng gi, zoshuq poi kut mù chòm ngón sháng.

24 Haù mù gâ le, ngá zo shí yuq gi, shi byuq é mai, ahkuí dum dui bê; byuq byuq é mai le, ahkuí dum myàng bê.' ga tái ri. Haù mù, yhangmoq gi, ngón ngón zo shuq ló bekô.

25 Haù u lé, yhangzo ko sù yuq kúm gi, yò má nyi tô ri. Yhang gi, yò mai yhâm shut jé lo nyi é hkùn, zìng út bat luí gó nyi é htê lé lò wó gyô ri.

26 Haù mù, langchyáng rayuq lé wut yù luí, haù hkyô lé yhang myí wú le,

27 langchyáng haù gi, 'Nung gu dum taù jé lô bê. Haù mù, náng wa gi, nung gu wáng wáng zán zán dum taù jé lo é lé lhom myàng luí, tsô myum tô é nojúng zo lé sat bê nghut ri.' ga tái kyô ri.

28 Dang haù lé wó gyo jáng, yhang gi, gyô nhik-yo luí, yhúmhkaù shut a wàng lo kut ri. Haù mù, yhâng wa htoq é luí, yhang lé é chyuq ri.

29 Yhangzo kúm gi, 'Wú aq, ngò, shí-myháng shílo náng é jùn đông kut luí, hkâ-nhám le náng dang lé a lu lai wú. Nghut kôlhang, ngò ngá é luzúm wuì eq ngón kún rá matú, bainám zo radu lhang radàm le náng a byi wú shi.

30 Shiwa myhí pé eq zum yap wún luí, náng é sutzé lé lhoq pân pyâm é sù nung zo haù dum taù jé lô jáng kúm gi, tsô myum tô é nojúng zo lé, yhâng é matú náng sat byi bu-nhung!' ga luí, yhâng wa lé tù tái ri.

31 Yhângwa gi, 'Ngá zo ê, náng gi, hkâ-nhám le ngò eq rahá yhang nyi nyi lê mù, ngá é sutzé joq mijoq banshoq gi, náng é chyat nghut lê.

32 Nghut kôlhang, shí nung gu gi, shi byuq é mai ahkuí dum dui bê; byuq byuq é mai le, dum myàng bê. Haù mù, gabú hpo nghut bê.' ga luí, yhang lé tái ri." gá ri.

¹ Yesuq, Yhâng é chángzô pé lé tai é gi, "Sahtê rayuq chyáng sùt zum sù rayuq nyi ri. Haú yuq gi, yhâng yhumsing é sutzè pé lé jai hpyuq pyám ri ga, yhâng yhumsing é hí má, yhang lé mara lé hun akô.

² Haú hkûn, sahtê hpó gi, yhang lé wut yù mù, 'Nàng é hkyô lé ngò wó gyo bê. Haú gi, hkâsu lhu? Nàng sùt zùm é eq séng lui kut tô é jihpán laiká lé lò shit wú aq. Hkâsu mù gà le, ahkuí mai nàng gi, sùt zum sù wó kut lo rà a nghut lo.' ga tai ri.

³ Haú jáng, sùt zum sù gi, 'Ahkuí, ngò hkâsu kut lo rà lhu? Ngá é yhumsing gi, ngo lé sùt zum ayá mai lhoq hkyô pyám bê. Myi du myi hkop zo rà le ngò wum a bò; dung zo dung shuq rà le ngò hoq ri.

⁴ Ngo lé sùt zùm é ayá mai hkyô pyám htàng má, supé ngo lé yhangmoq é yhùm má lhom hap yù rà matú, hkâsu kut rà hkyô lé ngò sé bê.' ga wó myit rot jáng,

⁵ yhang gi, yhâng yhumsing hpó lé chyín dap tô é bang rayuq htàng rayuq lé wut yù mù, sâng-hí yuq lé, 'Ngá yhumsing hpò chyáng nàng chyín hkâ-myhó dap tô lhê lhu?' ga myi jáng,

⁶ haú yuq gi, 'Xú rashô púng dap lhê.' ga tù tai ri.

Haú jáng, sùt zum sù gi, 'Náng é jihpán yù lui, hân zùng mù, ngo xê púng kut ká to aq.' ga yhang lé tai ri.

⁷ Dum rayuq lé, 'Nàng hkâ-myhó dap tô lhê lhu?' ga myi jáng, haú yuq gi, 'Sungsô rashô búng dap lhê.' ga tù tai ri. Sutzum sù gi, haú yuq lé, 'Náng é jihpán má shit xê búng kut ká to aq.' ga tai ri.

⁸ Haú a dǎngmán é sùt zum sù lé, yhumsing hpó gi, hpaqchyí ge da sù nghut ri ga hkya-ôn ri. Ngò shí lé tai é gi, mingkan zo wui gi, yhangmoq é mingkan eq séng é hkyô pé má, maubó gung é yhangzo pè* htoq hpaqchyí je bò kô é yanmai nghut lhê.

⁹ Haú mù lui, Ngò nungmoq lé tai kyo kôle, a tara é sutzè pé èq buinùm ho nyi keq, haú mù, sutzè haú htùm byuq jáng, nungmoq lé, ahtum abyuq joq tô é yhùm má, lhom hap yu é hui kó rà nghut lhê.

¹⁰ Tiq é mù má wó lum é sù ó yuq nghut kôlhang, mù mó má le wó lùm rà nghut lhê. Tiq é mù má lhum a zui é sù ó yuq nghut kôlhang, mù mó má le lhumzui rà a nghut.

¹¹ Haú mù, mingkan sutzè má lháng nungmoq lé a wó lùm kô é nghut le gi, haú tengmán é sutzè lé, nungmoq chyáng ó yuq wá kâm ap byi rà lhu?

¹² Supé é sutzè má, nungmoq lé a wó lùm kô é nghut le gi, nungmoq sǎng áng é sutzè lé, nungmoq chyáng ó yuq wá kâm ap byi rà lhu?

¹³ Dui-nhâng zoshâng ó yuq nghut kôlhang, yhumsing í yuq lé wó dojaú rà a nghut. Hkâsu mù gà le, yhang gi, rayuq lé a jú kut mù, rayuq lé, chyitdap rà nghut lhê; haú a nghut jáng, rayuq lé gi, lhumzui mù, rayuq lé gi, hpau a tap kut rà nghut lhê. Nungmoq gi, Garai Gasang lé le, ngunzè lé le, radá dâm wó dojaú kó rà a nghut." ga tai ri.

¹⁴ Ngùn myoqnoq é Hparishe pé gi, dang haú banshoq lé wó gyo kôjáng, Yesuq lé wuizui kut pyám byi akô.

¹⁵ Haú mù lui, Yesuq gi, yhangmoq lé, "Nungmoq gi, byu pé hí má yhumsing gùng lé yhumsing dǎngmán bang su kut shit mhaú é bang nghut akô; nghut kôlhang, Garai Gasang gi, nungmoq é i-myit unghkaú lé sé sù nghut lhê. Byù é hí má hpaudap é pé gi, Garai Gasâng é hí má achaq achyut é nghut nyi ri.

* **16:8** Maubó gung é yhangzô pé nghu é gi, Garai Gasâng é yhangzô pé lé tai é nghut lhê.

16 Jep é tarâ[†] eq myiqhtoî pê é dang, ahko ahkáng wó tô é ahkýing gi, wui-myhup sará Yohan jé lé é buinyî jé shoq nghut bê. Haú hkýing mai gi, Garai Gasâng é mingdán hkyô gabú danglù lé, hko kyô nyî mù, yuq du jup gi, haú hkyô má htung chying wang ló bum akò.

17 Jep é tarâ mâ é tiq dik é dangjí eq myihkyet zo ralhú lé wó lhoq hten rá htoq, mauhkung eq myigùng hten rá gi, je lui rá nghut lhê.

18 Dangké, yhumsing é yhangmyi lé káng pyám mù, myiwe gotú dum háng yu é sù ó yuq nghut kôle, su-myi lú é sù nghut bê; yhumsing é yhanglâng eq gang bê myiwe lé háng yu é sù le, su-myi lú é sù dut bê nghut ri." ga taí ri.

Sahtê Hpó Eq Lazaruq

19 Yesuq dum xoq taí é gi, "Radám lé, sahtê rayuq gi, nè é eq nú-nhâm é mebu wut mù lui, nyí nyí bui bui zo ngón shuq ngón nyi ri.

20 Yhâng é hkúmdong má gi, ragùngdú é jeq byi tô é Lazaruq gâ é dung zo sù rayuq lé, lé nyhi tô akò.

21 Haú yuq gi, sahtê wá é siboî mai gyó é agyó ahtâng lé, wú zô nau nyi ri. Hkui pé le yhâng é dâm pé má, lé yoq byí nyi akò.

22 Htâng má, haú dung zo sù shi byuq jáng, maumang lagyô pé gi, mauhkung má nyi é Abraham é tanghkoí má yhang lé shuí ló byi akò. Sahtê wá le shi byuq lui, yhúm pyám bekò nghut ri.

23 Sahtê wá gi, ngaraí ming má dik shoq hpuzô nyi mù lui, tu wú kat le, we we má Abraham lé le, yhâng é tanghkoí má é Lazaruq lé le, myàng kat ri.

24 Haú mù, yhang gi, 'Áwa Abraham é, ngo lé shogyo yù laq ô. Ngò gi, shí myi htum má achyi aku nyé é hui zô nyi ri. Haú mù, Lazaruq gi, yhâng é loqnyhui ù eq wui má tik yù mù, ngá é shô má wui ra-poq zo hkálhâng lé tik cham byi sháng gaq, yhang lé ngá chyáng nhang kat byi laq ô!' ga lui, dúng wut nyi ri.

25 Haú hkún, Abraham gi, 'Ngá zo è, asak dui tô é u lé, nàng nyi ngón yuqyo tô é hkún, Lazaruq gi, asho awui dut é lé, bún nyi aq. Ahkuí, yhang kúm gi, shí má ló nyi byán to bê; nàng chyaú gi, jamjau hui zô nyi bê.

26 Haú mai gotú gi, shí mai nungmoq chyáng dap lé naú bang a wó dap shoq le, haú mai ngamoq chyáng ó a wó dap lé rá matú le, ngamoq eq nungmoq é gyoro má, nik dik é langhkung mó eq kyo pyám to bê nghut ri.' ga tú taí ri.

27 Sahtê wá gi, 'Áwa é, haú nghut le gi, ngò, nang lé dúng nau ri. Ngá gú pé ngo yuq nyi ashí; yhangmoq le ísu hpuzô é jowò má a jé sháng gaq,

28 yhangmoq myit lhing shoq ló taí pun rá matú, Lazaruq lé ngá wá yhúm shut nhang kat byi laq ô!' ga lui, dúng wut ngau nyi ri.

29 Abraham gi, 'Yhangmoq chyáng, Mosheq eq myiqhtoî pé nyi lhê; haú bâng dang lé gyô yù kó sháng gaq.' ga taí ri.

30 Sahtê wá gi, 'Áwa Abraham é, haú su a nghut. Shi byuq é bang má é rayuq yuq yhangmoq chyáng dum taú lo é nghut le kúm gi, yhangmoq myit lhing kó rá nghut lhê.' ga taí ri.

31 Abraham gi, 'Mosheq eq myiqhtoî pê é dang lé yhangmoq a gyo kô é nghut le gi, shi byuq é bang má é rayuq yuq dum dui toq ló mù, ló taí kyo kólhang, kâm gyo kó rá a nghut.' ga lui, yhang lé tú taí ri." gâ ri.

[†] 16:16 Jep é tarâ gâ é gi, Garai Gasang, Mosheq mai nga-nhung lé byi tô é tarâ lé gâ lhê.

17

Mara Hkyut É Hkyô Eq Lumjîng Myit
Mht 18:6-7, 21-22; Mrk 9:42

¹ Yesuq, Yhâng chângzô pé lé tai é gi, "Byu pé lé mara kut shut nhang é hkyô gi, joq htoq lô râ za nghut lhê. Nghut kôlhang, mara kut shut nhang é hkyô lé lhoq htoq é sù gi, dingnyé wó râ.

² Zoshâng shí bang mâ é rayuq lé, mara kut shut nhang é sù gi, yhâng é lingzing má luqluí long mó tuí hut byi luí, wuimau má ê dù hkyô pyâm é huí é nghut le gi, yhang é matú je gè râ nghut lhê.

³ Nungmoq gi, yhumsîng gùng yhumsîng sidiq keq.

Nunggu nungmang nàng lé mara kut shut é nghut le gi, yhang lé tan luí, mhoqshit aq; yhang myit lhîng é nghut le gi, yhang lé mara hkyut pyâm byi aq.

⁴ Ra-nyí má za, yhang nang lé nyhit dàm shut mù, 'Ngò myit lhîng bê.' ga luí, nang lé nyhit dàm dum tôngbán le, tôngbán hkanngmó, nàng, yhâng é mara lé hkyut pyâm byi aq." gâ ri.

⁵ Haú hkûn, lagyô pé gi, "Ngamoq é lumjîng myit lé lhoq ko byi laq." ga Yhumsîng lé dũng akô.

⁶ Haú jáng, Yhumsîng gi, "Nungmoq é lumjîng myit angshi cham í za hkâlháng bò kô é nghut le gi, shí hangwâ gâm lé, 'Sikgâm ê, amyit eq roq bún luí, wuishuq lung-aú má, ê yuq to aq ô.' gâ le, nungmoq é dang lé sikgâm haú gyo byi râ nghut lhê.

⁷ Dangké, nungmoq mâ é rayuq yuq chyáng, yò hpuq é, a nghut jáng, sau zúng é dui-nhâng zoshâng rayuq nyí é nghut le, dui-nhâng zoshâng haú yohtung pá mai jé lo é hkûn, yhang lé, 'Hân zùng mù zang zo aq.' ga luí, ó yuq wá tai kó râ lúhú?

⁸ Haú dui-nhâng zoshâng lé sheq, 'Ngò zo râ myinzang lajang aq. Ngò bàn zo shoq hpyidum má hpyihit hit mù, xun zang wú nyí aq. Ngò bàn zo jáng sheq nàng wó zo râ nghut lhê.' ga luí, tai râ a nghut kó lúhú?

⁹ Tai mitai banshoq lé, dui-nhâng zoshâng ban zui sai byí é nghut kôlhang, yhang lé jeju bún é dang ó yuq wá tai wú akô lúhú?

¹⁰ Haú eq rajung za, nungmoq gi, tai mitai ban kut jáng sheq, 'Nga-nhúng gi, jeju bun a gíng é dui-nhâng zoshâng pé nghut nyi lhê; kut râ é mù lé za lhoq pân é bang nghut lhê.' nghú tai keq." ga tai ri.

Manggâm Dap Bang Raxê Yuq Lé, Yesuq Lhoq Gê Byí É Hkyô

¹¹ Ahkuí, Yesuq gi, Yerusalem wà mó shut e ló nyi le, Samariq mau eq Galile mau gyoro mai lai é ló ri.

¹² Yhang, wà rawà shut wang ló é hkûn, manggâm dap é byù raxê yuq eq huí ri. Haú bang gi, we mai yap to mù, Yesuq lé,

¹³ "Yesuq, Zau ê, ngamoq lé shogyô yù laq ô." ga luí, wut garú bum akô.

¹⁴ Yesuq gi, yhangmoq lé myàng jáng, "Nungmoq é gungdu lé, hkyangjông pé chyáng ló tún shit keq." ga yhangmoq lé tai ri. Yhangmoq gi, hkyô má ru sô nyi ashí le lháng, sãn-yúng ló byuq bekô.

¹⁵ Yhangmoq chyáng mâ é rayuq gi, yhumsîng gungdu ge byuq é lé myàng jáng, Yesuq chyáng dum taú ê mù, htê mó èq Garai Gasang lé hkya-ôn é eq,

¹⁶ Yesuq é hkyí wang má paí gop to luí, Yhang lé jeju hkya-ôn nyi ri. Haú yuq gi, Samariq byù nghut ri.

17 Haù mù, Yesuq gi, "Sân-yúng byuq é gi, raxê yuq a nghut lúh? Gau yuq gi, hká ló byuq bekô?

18 Shí tûngbaù rayuq mai lai luí, dum taù lé mù Garai Gasang lé hkya-ôn é byù, rayuq le a nyí lo kó lúh?" ga taí ri.

19 Hau htâng, Yesuq gi, haù yuq lé, "Toq mù ló aq, náng é lumjúng myít gi, nang lé lhoq sân-yúng byi bê nghut ri." ga taí ri.

Garai Gasâng É Mingdán Jé Lô Râ Hkyô

Mht 24:23-28, 37-41

20 Radàm lé, Hparishe pé gi, Garai Gasâng é mingdán hkâ-nhám jé râ hkyô, Yesuq lé myí akô. Haù jáng, Yesuq gi, "Garai Gasâng é mingdán jé lé râ gi, myoq èq wú luí myàng rà a nghut.

21 Garai Gasâng é mingdán gi, nungmoq yuq jup é ahkaù má nghut nyi é yanmai, 'Wú keq, shí má joq ri, mhó má joq ri.' ga luí le, byu pé gi, wó taí kó rà a nghut." ga luí, yhangmoq lé tù taí ri.

22 Chángzô pé lé le Yesuq taí é gi, "Haù Byu Yhangzô é buinyi ra-nyí lé, nungmoq myàng nau dik é ahkying jé rà. Nghut kôlháng, nungmoq gi, Byu Yhangzo lé wó myàng kó rà a nghut.

23 Haù buinyi má, byu pé gi, nungmoq lé, 'Yhang shí má nyi ri.' haù a nghut jáng, 'Yhang hê má nyi ri.' ga taí kó rà nghut lhê. Nghut kôlháng, hkâ-ê; hkâcháng kó.

24 Hkâsu mù gâ le, maumyí rahkyam má hpyat é maulhap gi, maumyí gó hkyam jé shoq duqbó é su, haù Byu Yhangzo dum jé lé é buinyi má le dut rà nghut lhê.

25 Nghut kôlháng, haù su a dut htoq shimá, Yhang gi, zing-rí é myo myo lé le, ipyat shí mâ é byu pé èq he-ngik pyám é lé le, hui shirâ nghut lhê.

26 Noaq é tsín pyat má dut é su, haù Byu Yhangzo jé lé é buinyi má le dut rà nghut lhê.

27 Byu pé gi, Noaq, wuì-sanghpo mó hkaù má wang é hkùn jé shoq, zo zo shuq shuq, myi byi myi yú, myiháng kut luí, nyi nyi bum akô. Haù hkùn, dowuì dǐng lô mù, yhangmoq banshoq lé lo lhoq htên pyám bê nghut ri.

28 Haù eq rajung za, Lot é pyat má le, byu pé gi, zo mù, shuq mù, ung zo wuì zo, ho zo ho shuq, yhùm kut luí nyi nyi akô.

29 Nghut kôlháng, Sodom wà mai Lot htoq ló é buinyi má, mauhkúng mai, myi eq hang gi, mau su wò gyó lô luí, lunggháng lé lhoq htên pyám bê nghut ri.

30 Haù Byu Yhangzo, lé htoq shit é buinyi má le, haù eq rajung za dut rà nghut lhê.

31 Haù buinyi má, yhumhkúng* htoq má nyi tô é sù gi, yhùmhkaù mâ é zè lé, a ló gyó wang yù lo sháng gaq. Yò má nyi tô é sù gi, haù eq rajung za, yhùm shut a taù ló lo sháng gaq.

32 Lot é yhangmyi† lé bûn nyi keq.

33 Yhumsing é asak ùi hkyô hô sù ó yuq nghut kôle, asak sum rà nghut lhê; asak sum pyám é sù kúm gi, asak wó ùi rà nghut lhê.

34 Ngò, nungmoq lé taí kyo kôlé, haù myín lé, yhupjang ralhùm má byù í yuq nyi to kô le, rayuq gi, shuí yu é hui mù, rayuq gi, myít gyó to rà nghut lhê.

* 17:31 Yudaq byu pé é yhumhkúng gi, rá é nghut lhê mù, nyi kún jang kut akô. † 17:32 Lot é yhangmyi gi, Sodom wà shut dum taù lǐng wú é yanmai, Garai Gasang lhoq hten pyám é hui sù nghut lhê.

³⁵ Myiwe í yuq luí má rahá za chô m luí nyi tô le; rayuq gi, shuí yu é hui mù, rayuq gi, myit gyó pyâm to râ nghut lhê.

³⁶ Yohtung má byù í yuq nyi to le, rayuq gi, shuí yu é hui luí, rayuq gi, myit gyó pyâm to berâ nghut lhê." gâ ri.

³⁷ Haú hkún, chángzô pé gi, "Yhumsing Yesuq ê, haú gi, hká gyo má dut râ lhú?" ga luí, Yesuq lé myi kôjáng, Yhang gi, "Màng leq é jang má, langdá pé, lé zing bùm râ nghut lhê." ga luí, yhangmoq lé tù tai ri.

18

Chuimó Myhí Eq Tarâ Agyi É Hkyô Lé Dangtú Yù É Hkyô

¹ Yesuq, Yhâng é chángzô pé lé, myit wum a gyuí é za, hkâ-nhám le kyúdung nyi râ hkyô lé, dangtú đồng mhoqshit é gi,

² "Wà rawà má, Garai Gasang lé le a gyuq hoq, byù lé le haí su a ngàm é tarâ agyi rayuq nyi ri.

³ Haú wâ má chuimó myhí rayuq le nyi ri. Yhang gi, haú tarâ agyi wá chyáng ê luí, 'Ngò eq amú htoq sú lé, yhâng é mara eq rajung za, jéyáng byi laq.' ga luí, é dum tai tai kut nyi ri.

⁴ Nghut kôlhang, tarâ agyi wá gi, ahkyíng rayoq zo jé shoq tarâ a jéyáng byí é tô tô ri. Hau htàng má, yhang gi, 'Ngò, Garai Gasang lé le a gyuq a hoq, byù lé le haí su a ngàm,

⁵ nghut kôlhang, chuimó myhí shí yuq é amú lé, ngò a jéyáng a doqdan byí é nghut le gi, yhang dum lé lé kut mù, ngò lé myit hpêbù nhâng râ dut ri. Haú mù, ngò yhâng é amú lé jéyáng byi rá.' ga, yhâng é unghkaú má myit yu ri." gâ ri.

⁶ Haú mù luí, Yhumsing Yesuq gi, "A ding a mán é tarâ agyi wá tai é dang mai mhoq yù keq.

⁷ Garai Gasang gi, Yhang lé nyí myín wut dúng nyi é, Yhang hkyin yu to bê bang lé, tarâ é đồng a kut byí é gi, myáng myáng nyi to râ lhú?

⁸ Ngò, nungmoq lé tai kôlé, Garai Gasang gi, yhangmoq lé hân yhang tengmán é đồng jéyáng byi berâ nghut lhê. Nghut kôlhang, haú Byu Yhangzo jé lé é buinyi má, lumjing hkyô lé gi, mingkan htoq má myang wú shirá lhú?" ga tai ri.

Hparishe Eq Kang Guq Sú Kyúdung É Hkyô

⁹ Yhumsing gùng lé dingmán bun luí, byù góbang lé wú tiq é bang ra-am lé, Yesuq dangtú đồng tai é gi,

¹⁰ "Byù í yuq kyúdung kó râ ga, noqkuq yhúm má doq e akô. Rayuq gi, Hparishe, rayuq gi, kang guq sú nghut ri.

¹¹ Hparishe hpó gi, yap to luí, 'Garai Gasang ê, ngò gi, byù góbang su lú zo lú shuq é hkyô le a kut, agè ashop é hkyô le a cháng, su-myi le a lú é htoq agó, shí kang guq sú su le, a nghut é yanmai, ngò nàng lé jeju bûn lhê ô!

¹² Ngò gi, rabat má zoshuq í dâm gám nyi lhê; ngò wó yu é gú má é xê gambùm ragambùm le kat nyi lhê.' ga luí, yhang baú yhang gotú kut dúng nyi ri.

¹³ Kang guq sú kúm gi, we we má yap to mù, mauhkúng shut lháng a wám tu wú é za, wànggàng bat luí, 'Garai Gasang ê, shí yubak dap sú ngo lé, shogyô yù laq ò!' ga dúng ri.

¹⁴ Ngò, nungmoq lé tai kôlé, kang guq sú kúm gi, Garai Gasang é hí má mara hkyut san byí é lé wó yù luí, yhúm shut dum tai lô bê; nghut kôlhang,

Hparishe wá gi, a wó nghut ri. Hkâsu mù gà le, yhumsing gùng lé waq toq sú ó yuq nghut kôle, lhoq nyhum pyâm é hui râ nghut lhê; yhumsing gùng lé lhoq nyhum é sú kúm gi, waq toq é hui râ nghut lhê." ga tai ri.

Zoshâng Wuì Lé Yesuq Shimân Byì É Hkyô

Mht 19:13-15; Mrk 10:13-16

¹⁵ Byu pé gi, zonú wuì lé Yesuq záng htung byi sháng gaq ga, Yhâng chyáng shuí lé lo bum akô. Chángzô pé gi, haù lé myàng jáng, lhom tân hkùm akô nghut ri.

¹⁶ Nghut kôhang, Yesuq gi, zoshâng wuì lé, wut yù luì, "Haù zoshâng wuì lé, Ngá chyáng lé nhâng keq; yhangmoq lé hkâhkùm zing to kó; hkâsu mù gà le, Garai Gasâng é mingdán gi, haù sú é bâng é mingdán ru nghut lhê.

¹⁷ Ngò, nungmoq lé teng za tai kôlé, Garai Gasâng é mingdán lé, zoshâng su kut a lhom hap yu é nghut le gi, mingdán haù má gè gè yhang wó wâng râ a nghut." ga tai ri.

Ayá Wó É Shtë Hpó

Mht 19:16-30; Mrk 10:17-31

¹⁸ Ayá wó é byù rayuq le, Yesuq lé, "Ge é Sará è, ahtum abyuq é asak wó yù râ matú, ngò hái kut ra râ lúhú?" ga myí ri.

¹⁹ Yesuq gi, "Hái mù, Ngo lé ge é Sará nghu lhê lúhú? Garai Gasang mai lai luì, ge é ó yuq le a nyì.

²⁰ Jep é tarâ má, 'Su-myi sulàng hkâlú, byù hkâsat, hkâhkau, a teng a mán é saksé hkâhkám, nángnu nángwa lé hkungga aq.'* gâ é dang pé lé, nàng sé gù bê." ga luì, yhang lé tú tai ri.

²¹ Haù yuq gi, "Haù pé banshoq lé, ngò, zoshâng hkùn mai cháng bê nghut lhê." ga tai ri.

²² Yesuq gi, dang haù lé wó gyo jáng, "Nàng kut râ rajung râ tô ashí; nàng wó miwó lé ùng pyám luì, myùng bang lé byì pyám aq; haù jáng, nàng, mauhkúng htoq má sutzè wó râ nghut lhê; haù mù, Ngá htàng lé cháng aq." ga luì, yhang lé tai ri.

²³ Haù yuq gi, dang haù lé wó gyo jáng, sutzè gyai wó sú nghut é yanmai, gyai yhang myit a ngón dut byuq ri.

²⁴ Yesuq gi, haù yuq lé wú luì, "Sutzè wó bang gi, Garai Gasâng é mingdán má wâng râ matú, haù-í yhang wuì ri-nhung!

²⁵ Sutzè wó sú rayuq, Garai Gasâng é mingdán má wó wâng râ htoq, gola-uq radu ãpno mai wó wang lai râ gi, je lui râ nghut lhê." ga tai ri.

²⁶ Dang haù lé wó gyô é bang gi, "Haù su ru nghut le gi, ó yuq za hkyi yu é hui râ nghut lhê lúhú?" ga myí bum akô nghut ri.

²⁷ Haù hkùn, Yesuq gi, "Byù a wó kut é hkyô lé, Garai Gasang gi, wó kut lhê." ga tai kyô ri.

²⁸ Haù hkùn, Petruq gi, Yesuq lé, "Wú aq, ngamoq gi, wó miwó tô pyâm to luì, Náng htàng cháng bê nghut lhê." ga tai jáng,

²⁹ Yesuq gi, "Ngò, nungmoq lé teng za tai kôlé, Garai Gasâng é mingdán é yanmai, yhumsing é yhùm, yhumsing é yhangmyi, yhumsing é águ âmang, yhumsing é ìnu ìwa, yhumsing é yhangzô pé lé, pyâm to sú ó yuq nghut kôle,

³⁰ shí pyat má, akyú myo myo wó hkam yù râ htoq agó, htang pyat má le, ahtum abyuq é asak a wó yu é gi, a nyì râ nghut lhê." ga luì, yhangmoq lé tai ri.

* 18:20 Htoq Ló 20:12-16

*Yesuq, Yhang Shî Hkám Râ Lé Dum Taí É Hkyô**Mht 20:29-34; Mrk 10:46-52*

³¹ Yesuq gi, Yhâng é lagyô pé raxe í yuq lé gotú kut wut yù mù, "Gyô wú keq, nga-nhúng gi, Yerusalem wà mó shut doq lô nyi é nghut lê. Haú má jé jáng, haú Byu Yhangzo eq séng luí, myiqhtoí pé kâ tô é banshoq gi, dik lò berâ nghut lê.

³² Hkâsu mù gâ le, Byu Yhangzo gi, tûngbaù pé é loq má ap pyâm é hui luí, haú bâng eq Yhang lé, wuizui kut pyâm é, rhoí rip e, sôkan byé gyûn é, nhuq bat é kut yù mù, sat pyám kó rà nghut lê.

³³ Hau htâng sum nyí nghû râ buinyi má, Yhang gi, dum dui toq lô râ nghut lê." ga luí, yhangmoq lé taí ri.

³⁴ Lagyo pé gi, dang haú pé rahkun lé lháng a sê gyo kó; dang hau é lichyúm gi, yhangmoq é hí má záu nghop tô é nghut é yanmai, Yhang haí taí nyi é hkyô pé lé yhangmoq a sé kó nghut ri.

Dung Zo É Myoqjit Sû Lé, Yesuq, Myoq Dum Myàng Nhang É Hkyô

³⁵ Ahkuí, Yesuq Yerihko wà nàm má jé lo nyi le, myoqjit é byù rayuq gi, hkyô yàm má zùng mù, dung zô nyi ri.

³⁶ Yhang gi, byù rajùm rayò sô lai lô é htê lé wó gyo jáng, haú haí dut nyi é hkyô lé, myi kat ri.

³⁷ Haú hkûn, yhangmoq gi, "Nazaret wà byù Yesuq lai lô ri." ga luí, yhang lé taí kyo akô.

³⁸ Haú su gâ é lé wó gyo jáng, yhang gi, "Dawiq é Yhangzo Yesuq é, ngo lé shogyo yù laq ô!" ga wut dúng kat ri.

³⁹ Hí má lai lô é bang gi, zim za nyi râ matú yhang lé tân hkûm akô; nghut kôlhang, yhang gi, "Dawiq é Yhangzo é, ngo lé shogyo yù laq ô!" ga, je riyhang htê mó o mó eq wut dúng kat ri.

⁴⁰ Haú mù, Yesuq gi, yap kat mù, byù haú yuq lé Yhâng chyáng shuí lé lô nhang kat ri. Myoqjit sú Yhâng nàm má jé lé jáng, Yesuq gi,

⁴¹ "Ngò, nàng lé haí kut byi rà ô nau ri lú?" ga, yhang lé myi kat ri.

Hau yuq gi, "Yhumsing é, ngò myoq myàng nau ri." ga tû taí ri.

⁴² Hau hkûn, Yesuq gi, "Náng myoq myàng sháng gaq! Náng é lumjing myit gi, nang lé lhoq gê byi bê nghut ri." ga, yhang lé taí ri.

⁴³ Haú yuq gi, haú hkûn jáng, yhang myoq wó myàng mù, Garai Gasang lé hkya-on uchyang Yesuq htâng cháng bê. Lhunglhang bang haú lé myàng kôjáng, Garai Gasang lé hkya-ôn nyi bum akô.

19*Yesuq Eq Zake*

¹ Yesuq gi, Yerihko wà má wàng mù, sô lai lô nyi ri.

² Haú hkûn, haú wâ má, Zake gâ é kang guq agyi rayuq nyi ri; haú yuq gi, sutzè wó sú nghut ri.

³ Yhang gi, Yesuq hká yuq nghut é lé myàng nau kôlhang, nyhùm sú nghut é htoq agó, byù rajùm rayò chyín chyap tô é yanmai, a wó myàng nghut ri.

⁴ Haú mù, yhang gi, Yesuq lé wó myàng shoq ga, Yesuq lai lô rà hkyô hí shut din é mù, hkohúm gâm htoq má ê doq zung tô ri.

⁵ Yesuq gi, haú jowò má jé jáng, tu wú kat luí, "Zake é, hân gyó lô aq; hkû-nyi ngò náng yhùm má bíng rà nghut lê." ga taí ri.

⁶ Haú jáng, Zake gi, hân hân gyó ló mù, gabú dik é èq Yesuq lé lhom hkulum yu ri.

⁷ Haú má nyi bang banshoq gi, haú lé myàng jáng, "Yhang gi, yubak dap sù rayuq chyáng bíng kut rà ga wang e ló bê." ga luí, mara hân dang taí nyi bum akó.

⁸ Zake kúm gi, toq yap mù, "Yhumsíng Yesuq ê, ngò wó é sutzè rawuí gú myùng bang lé gàm byí pyám rà; ngò záng mop zô pyám é byù rayuq yuq nyi le gi, myi tú dum tau byi rà." ga Yhumsíng Yesuq lé taí ri.

⁹ Haú hkùn, Yesuq gi, "Shí yuq le, Abraham é yhangzo* rayuq nghut é yanmai, hkùn-nyí shí yhùm má hkyi yù hkyô jé bê,

¹⁰ hkâsu mù gâ le, haú Byu Yhangzo gi, byuq byuq bê bang lé, hkat hô mù hkyi yù rà matú, jé lé sù nghut lhê." ga luí, Zake lé taí ri.

Hkohkam É Dui-nhâng Zoshâng Raxê Yuq

Mht 25:14-30

¹¹ Haú hkyô lé, yhangmoq gyô nyi bùm kô é hkùn, Yesuq gi, Yerusalem wà mó má jé rà chyâng lò bê nghut é yanmai le, Garai Gasâng é mingdán gi, radá dâm htoq shit lô berâ ga, byu pé myit ngam tô bùm kô é yanmai le, dangtú ralhùm đông dum taí jat é gi,

¹² "Aróng wó sù byù rayuq gi, hkohkâm ayá é hkam yù luí, dum taú lò rà ga, wê é ming shut é rà matú hen nyi ri.

¹³ Haú mù, yhang gi, Yhâng é dui-nhâng zoshâng raxê yuq lé wut yù mù, rayuq lé ngùn rajoí joi ap byi luí, 'Ngò dum taú jé lô shoq, shi èq hpugá gá nyí lánq keq.' ga luí, yhangmoq lé pying tô ri.

¹⁴ Yhâng é mingbyù wui kúm gi, yhang lé a ngui bum é nghut mù luí, yhang e ló é htâng má, 'Shí yuq ngamoq ahtoq má up nyi rà lé, ngamoq a ô nau.' ga luí, é taí rà matú lagyo châng nhang kat akó.

¹⁵ Nghut kôlhâng, yhang kúm gi, hkohkâm ayá wó hkam yù luí, dum taú jé lò jáng, yhang ngùn ap byi tô é dui-nhâng zoshâng wui lé, hpugá gá luí, amyat hkâ-myhó wó ho jat bê hkyô lé sé nau luí, yhangmoq lé wut nhang kat ri.

¹⁶ Haú hkùn, sâng-hí yuq gi, lé mù luí, 'Yhumsíng ê, ngò, náng é ngùn rajoí mai, amyat raxê joi wó ho jat yù bê.' ga taí ri.

¹⁷ Haú hkùn, yhumsíng hpó gi, 'Arâ! Nghut bê, kyet é dui-nhâng zoshâng ê, náng gi, je tiq é mù má lhang wó lum é sù nghut é yanmai, wà raxê lé upzo lo aq hkoi.' ga luí, yhang lé taí ri.

¹⁸ Htang yuq le, lé mù luí, 'Yhumsíng ê, ngò, náng é ngùn rajoí mai, amyat ngo joi wó ho jat yù bê.' gâ ri.

¹⁹ Yhumsíng gi, haú yuq lé, 'Nàng gi, wà ngo wá lé up lo aq hkoi.' ga taí ri.

²⁰ Dum rayuq le, lé mù luí, 'Yhumsíng ê, náng é ngùn rajoí lé a byuq shoq, ngò panchoq èq htpu tô lhê; wú aq, shi nghut lhê.

²¹ Nàng gi, yhumsíng yhang a tô tô é zè pé lé yù nau é eq, yhumsíng yhang a hô tô é yò mai yâm yù nau é sù, byù wui nghut é yanmai, nang lé ngò gyuq ri.' ga taí ri.

²² Haú hkùn, yhumsíng gi, 'Agè ashop é dui-nhâng zoshâng ê, náng nhut mâ é dang eq rajung za, ngò, nang lé jéyáng rà nghut lhê. Ngò gi, yhumsíng yhang a tô tô é zè pé lé yù nau é eq, yhumsíng yhang a hô tô é yò mai yâm yù nau é sù, byù wui nghut é hkyô lé, náng sê tô gù nghut le nhíng,

* 19:9 Abraham é yhangzo nghú é lichyúm gi, Abraham su Garai Gasang lé lumjéng é sù lé gâ lhê.

23 ngá ngún lé, ngò dum taù jé lô jáng, aráng eq amyat wó yú shoq, ngùn hpún kat jang má, haí mù a kat tô é lúú?' ga yhang lé taí ri.

24 Hau htáng, yhumsing hpó gi, ayám má yap tô é bang lé, 'Haù ngùn rajoi lé yhang chyáng mai taù yù luí, raxê joi wó sù lé jat byi keq.' ga taí ri.

25 Haù bang gi, 'Yhumsing ê, yhang gi, raxê joi wó to bê lé nhing.' ga akô.

26 Haù jáng, yhang gi, 'Ngò, nungmoq lé taí kôlé, wó sù† ó yuq le, jat byi é hui shirâ nghut lhê; a wó su chyáng mai kúm gi, yhang wó tô é lé lhang, yu pyám byi shirâ nghut lhê.

27 Ahkuí, yhangmoq ahtoq má ngò hkohkâm kut râ lé a ô nau é, ngá é gye pé lé, shí má shuí lé mù, ngá hí má sat pyám keq.' ga hkûnmó hkyô kat ri." gá ri.

*Yesuq Logúng Ji Mù, Yerusalem Wà Mó Shut Wang E Ló É Hkyô
Mht 21:1-11; Mrk 11:1-11; Yhn 12:12-19*

28 Yesuq gi, shí hkyô pé lé ban taí jáng, hí má so luí, Yerusalem wà mó shut doq ló nyi ri.

29 Yesuq gi, Yhâng é chángzô pé eq Tsanlun Bùm má é Bethpage wà eq Behtani wà má jé lô kojáng, Yhâng é chángzo í yuq lé,

30 "Nungnhik, hí má é wà má é keq; wà haù má wang é hkûn jáng, ó le a jì wú shí é logúng zo tuí tô lánng é lé, ê myàng kó râ nghut lhê; haù lé hpyi yù mù, Ngá chyáng she lò keq.

31 Byù rayuq yuq mai, 'Haù haí mù hpyi nyi akô?' ga nungnhik lé myi kôjáng, 'Shí du lé, haù Yhumsing râ ri gâ.' nghú tú taí keq." ga pying luí, nhang kat ri.

32 Nhang kat é sù nhik é jé lé, Yesuq taí kat é dông yhang, dut to lánng é lé é myang akô.

33 Yhangnhik logúng zo haù lé hpyi nyi kô é hkûn, yhumsing wui gi, "Haù logúng zo lé, haí mù hpyi nyi akô lúú?" ga luí, yhangnhik lé myi akô.

34 Haù jáng, yhangnhik gi, "Shí du lé haù Yhumsing râ ri gâ." ga taí akô.

35 Yhangnhik gi, haù logúng zo lé Yesuq chyáng she lò mù, yhangmoq é buhing pé lé logúng ahtoq má buí luí, Yesuq lé doq ji nhang akô.

36 Haù su kut, Yhang ji e ló nyi le, byu pé gi, yhangmoq é buhing pé lé hkyô má hkang byi akô.

37 Ahkuí, Tsanlun Bùm hkêgyó gyó ló é jowò eq chyáng lo é mai gi, chángzô pé banshoq bang, yhangmoq myang é laklai kumlhá pê é yanmai, gabú myit mai htê mó o mó eq Garai Gasang lé hkya-on kô é dang gi,

38 "Haù Yhumsing é mying mai jé lé lo é hkohkâm gi, hkungsô wó nyí sháng gaq ô!✠ Mauhkung htoq má, nguingón nyí sháng gaq ô!

Htoq tsáng myhâng má, Garai Gasang gi, hpungwup shing kang bo nyi sháng gaq ô!"

gá akô.
39 Haù mù luí, haù byù hpûng hkaù má bo é Hparishe pé ra-am gi, "Sarâ é, náng é chángzô pé lé tân pyám aq." ga luí, Yesuq lé taí akô.

40 Haù hkûn, Yesuq gi, "Ngò, nungmoq lé taí kôlé, shí bang zim za nyi kó é nghut le gi, luqgok pé garú lô râ nghut lhê." ga tú taí ri.

41 Ahkuí, Yesuq, Yerusalem wà mó eq chyáng lò luí, wà mó haù lé myàng jáng, haù wà mó é matú ngaù mù, taí é gi,

† 19:26 Wó sù nghu é gi, yhumsing a-tsam lé rago dat chùng sù lé taí é nghut lhê. ✠ 19:38 Hkya-on 118:26

⁴² "Wà nàng ê! Hkû-nyí lhê é buinyí má, nguóngón é hkyô lé nàng bûn sé tô é nghut le gi, gè rà wá! Ahkuí kúm gi, haú hkyô lé nghop to bê nghut mù luí, nàng a sé lo nghut ri.

⁴³ Hkâsu mù gâ le, náng chyáng Garai Gasang lé kúm jé é hkûn, nàng a bun a sé wú kat é yanmai, náng é gyè pé gi, awui ayâm má gyewap xuq mù, náng é lhing hkyuq mai nang lé lom tô é buinyí jé lô rà nghut lhê.

⁴⁴ Haú hkûn, nang lé lhoq htên pyám luí, nung zo pé lé le, haú ahkaú má yhang dùn nhê pyet sat pyám bekô rà; nàng gi, luqgok racham htoq má racham lhang a kê lhum loshoq, dut byuq rà nghut lhê." gâ ri.

Yesuq, Noqkuq Yhûm Lé Sêng Pyâm É Hkyô

Mht 21:12-17; Mrk 11:15-19; Yhn 2:13-22

⁴⁵ Ahkuí, Yesuq gi, Yerusalem noqkuq yhûm má wàng mù, ung zo ung shuq é bang lé, "Ngá yhûm gi, kyûdung yhûm dut rà nghut lhê."[☆] ga kâ to kôlhang,

⁴⁶ nungmoq gi, jowò shí lé 'damaq hkyûng'[☆] kut akô." ga taí uchyang, hkat htoq pyâm ri.

⁴⁷ Yhang gi, nyí wuí noqkuq yhûm má mhoqshit nyi ri. Hkyangjong agyi pé, tarâ sará pé eq, byu pé é suwún wuí kúm gi, Yhang lé wó sat pyám rà hkyô ho nyi akô.

⁴⁸ Nghut kôlhang, byù banshoq bang gi, Yhâng mhoqshit é dang lé gyo nau nyi kô é yanmai, wó sat rà hkyô lé, a myang hô kó nghut ri.

20

Yesuq É Ahko Ahkáng Lé Myí Chyam Wú É Hkyô

Mht 21:23-27; Mrk 11:27-33

¹ Ra-nyí lé, Yesuq gi, noqkuq yhûm wàng hkaú má, byu pé lé mhoqshit nyi é eq, gabú danglù hko kyô nyi é hkûn, hkyangjong agyi pé gi, tarâ sará pé, suwún wuí eq rahá kut, Yhâng chyáng lé jé kômù,

² "Hai ahko ahkâng èq Nàng shí pé lé kut nyi lhê lú? Ahko ahkáng shí, Nang lé ó yuq byí é lú? Ngamoq lé taí kyô wú aq." ga Yhang lé myí akô.

³ Haú hkûn, Yhang gi, "Ngò le, nungmoq lé rajung myí wú kôlé;

⁴ Yohan byí é baptisma gi, mauhkung mai lú? A nghut jáng, byu chyáng mai lú? Ngo lé taí kyô wú keq?" ga yhangmoq lé myí ri.

⁵ Haú hkûn, yhangmoq chôm hpyé lhum kô é gi, "'Mauhkung mai nghut lhê.', nghû nga-nhúng taí jáng le, 'Haí mù, yhang lé a lumjéng kô é lú?' ga rà nghut;

⁶ 'Byu chyáng mai nghut lhê.' nghû jáng le, shiwa byù banshoq gi, Yohan lé, myightoi rayuq ga lumjéng to kô é yanmai, yhangmoq, nga-nhúng lé luqgok èq dú sat kó rà nghut." ga akô.

⁷ Haú mù, yhangmoq gi, "Hkâmai nghut é lé, ngamoq a sé." ga tù taí akô.

⁸ Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

Tsibiyq Hkyâm Yhumsing Eq Hkyâm Saí Zo Bang

Mht 21:3-46; Mrk 12:1-12

⁹ Byu pé lé, Yesuq dangtú dòng xoq taí kyô é gi, "Byù rayuq gi, tsibiyq hkyâm rallhum saí to mù, hkyâm saí zo bâng chyáng ngho byí to luí, gó ming shut myáng myáng è nyi byuq ri.

¹⁰ Kyôshu yoq jé jáng, yhang gi, hkyâm saí zo bâng èq, hkyâm mâ é tsibiyiq shi pé lé lhom byí kat sháng gaq ga, dui-nhâng zoshâng rayuq lé yhangmoq chyáng nhang kat ri. Nghut kôlhâng, hkyâm saí zo bang gi, haú yuq lé lhom bat mù, loq kôm taú nhang kat akô.

¹¹ Gotú dui-nhâng zoshâng rayuq lé, yhangmoq chyáng dum nhang kat ri. Nghut kôlhâng, yhangmoq gi, haú yuq lé le, lhom bat mù, hoq lhoq hpu luí, loq kôm dum taú nhang kat akô.

¹² Sum yuq nghû râ dui-nhâng zoshâng lé dum nhang kat ri. Yhangmoq gi, haú yuq lé le bat cheq luí, hkyâm mai hkat htoq kat akô.

¹³ Haú hkùn, tsibiyiq hkyâm yhumsing gi, 'Ngò hkâsu kut wú râ lúh? Ngò chyitdap é ngá zo lé, nhang kat wú râ nghut ri. Yhang lé kúm gi, yhangmoq lhom hkungga kó abe.' ga taí ri.

¹⁴ Hkyâm saí zo bang gi, yhumsing hpô é yhangzo lé myàng kôjáng, 'Shí yuq gi, silí wunlí sing yù râ sù nghut lhê; nga-nhúng, silí wunlí haú pé wó yú shoq, yhang lé sat pyám sháng.' ga rayuq eq rayuq taí lhum bum akô.

¹⁵ Haú mù, yhang lé hkyâm shinggan shut dú htoq kômù, sat pyâm akô.

Haú su kut kôjáng, tsibiyiq hkyâm yhumsing gi, yhangmoq lé hkâsu kut râ lúh?

¹⁶ Yhang gi, è mù, haú hkyâm saí zo bang lé sat pyám luí, hkyâm haú lé góbang lé htot ngho byí pyám râ nghut lhê." gà ri.

Dang haú lé wó gyo bang gi, "Haú su gi, hkâ-nhám le a dut sháng gaq ô!" gà akô.

¹⁷ Hau htâng, Yesuq gi, yhangmoq lé byu wú luí, "Haú jáng gi, 'Yhúm saí bâng èq hkyin htoq pyám é luqgok gi, htungchyûn mâ é ahkyak dik é luqgok dut bê.'[✧]

ga Chyúmdang má kê tô é gi, haí gá nau é nghut lhê lúh?

¹⁸ Luqgok* haú má gyó záng é sù ó yuq nghut kôle, gyuí gyop byuq râ nghut lhê. Luqgok hau èq gyó nhê záng é sù le, nhê pyeq pyám é hui râ nghut lhê." ga taí ri.

¹⁹ Tarâ sará pé eq hkyangjong agyi pé gi, dangtú shí gi, yhangmoq lé lhoq ang luí taí é hkyô lé, sé kê é yanmai, haú hkùn jáng lhang Yhang lé chyup yú râ matú hkyô ho nyi akô. Nghut kôlhâng, byu pé lé gyuq mù a chyup shi kó nghut ri.

Kang Kat É Hkyô Eq Séng Luí Myi É Dang

Mht 22:15-22; Mrk 12:13-17

²⁰ Haú mù, yhangmoq gi, Yesuq é dang má mara wó chyup yú shoq ga, gegùn labyoq kut bang lé jowú nhang nyi akô. Haú gi, ahkáng ayá wó é mauzaú chyáng Yhang lé wó ap pyám râ matú nghut ri.

²¹ Haú jowú bang gi, "Sarâ ê, nàng gi, dینگ dینگ mán mán taí mhoqshit é eq, byu é myoqdong lé a tê byí é za, Garai Gasâng é hkyô lé, tengmán é dong mhoqshit é sù nghut é lé, ngamoq sê lhê.

²² Hkoséng Kehtaq lé, ngamoq kang kat râ gi, tarâ wang lhê lúh? A wang é lúh?" ga luí, Yhang lé myí wú akô.

²³ Nghut kôlhâng, Yesuq gi, haú bâng é myit goí é hkyô lé sé mù luí, yhangmoq lé,

²⁴ "Ngo lé, ngùn rachap tân shit wú keq. Ó yuq é alhô eq masat laiká dap tô ri lúh?" ga myí jáng,

✧ 20:17 Hkyá-on 118:22 * 20:18 Luqgok nghu é gi, Yesuq lé taí ri.

²⁵ yhangmoq gi, "Kehtaq é nghut ri." ga akô.

Haú hkûn, Yesuq gi, "Haú nghut jang, Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga yhangmoq lé tai ri.

²⁶ Yhangmoq gi, byu pè hí má, Yhâng é dang má mara a wó ho myang é eq, Yhang tú tai é dang é yanmai, maú hong byuq kôluí, zim byuq akô.

Dum Dui Toq Lô Râ Hkyô Eq Séng Luí Myí É Dang

Mht 22:23-33; Mrk 12:18-27

²⁷ Haú hkûn, haú dum dui toq hkyô a joq gâ é Saduke pé ra-am gi, Yesuq chyáng lé jé kômù,

²⁸ "Sarâ é, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kâ to byí ri.

²⁹ Hí hpyang lé, gumang nhiktâng wuì nyhit yuq nyi akô. Lagám yuq gi, myiwe yù luí, zo dù a dap é za shi lô byuq bê nghut ri.

³⁰ Lanong yuq le, yhangmang mó é chui lé gon mù, zo dù a dap é za shi lô byuq bê.

³¹ Hau htâng, Lalaq yuq mai Lahkâ yuq jé shoq, chuimó haú lé rayuq htâng rayuq dum gon gon kut kôlhang, zo dù a dap é chyat shi lô byuq bùm bekô nghut ri.

³² Lô htáng má, myiwe myhí haú le châng shi lô byuq bê nghut ri.

³³ Haú mù luí, haú dum dui toq é buinyi má, myiwe myhí haú gi, haú nhiktâng wuì má é hká yuq é yhangmyi nghut râ lúh? Hkâsu mù gâ le, yhang gi, haú nyhit yuq é yhangmyi dut wú bê sù nghut ri." ga luí, Yhang lé myí wú akô.

³⁴ Haú hkûn, Yesuq gi, "Shí mingkan htoq má é byu pé gi, ikun kut é eq myi byi myi yú kut nyi bum akô.

³⁵ Shi é mai dum dui toq râ eq, haú pyat má nyi râ gíng bâng é matú gi, ikun kut é eq myi byi myi yú hkyô joq lo râ a nghut.

³⁶ Haú bang gi, maumang lagyô pé su dut byuq luí, a dat shí lo kô râ nghut lhê. Yhangmoq gi, dum dui toq lô su é yhangzô pé[†] nghut é yanmai, Garai Gasâng é yhangzô pé nghut bekô.

³⁷ Haú nyé duq nyi é mhanpúng eq séng luí, Mosheq eq kâ tô é má lháng, Yhumsíng gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.* ga bo tô é yanmai, shi é bang dum dui toq lô râ hkyô lé tún shit to bê nghut ri.

³⁸ Garai Gasang gi, shi bê bâng é Garai Gasang a nghut, dui nyi bâng é Garai Gasang ru nghut nyi lhê; hkâsu mù gâ le, lhunglhâng bang gi, Garai Gasâng é hí má dui nyi é bang chyat nghut akô." ga yhangmoq lé tú tai ri.

³⁹ Haú hkûn, tarâ sarâ pé ra-am gi, "Sarâ é, nang tai é jô ri." ga akô.

⁴⁰ Haú mù, yhangmoq gi, Yhang lé haí le a wám myí jat lo kó nghut ri.

Hkrisduq Gi, Ó Yuq É Yhangzo?

Mht 22:41-46; Mrk 12:35-37

⁴¹ Hau htâng, Yesuq gi, yhangmoq lé, "Byu pé gi, Hkrisduq lé, Dawiq é yhangzo nghut lhê, ga hkâsu mù tai akô lúh?

⁴²⁻⁴³ Dawiq yhang yhang lháng gi, Hkya-on Kungtôn Laiká má, 'Haú Yhumsíng Garai gi, ngá é Yhumsíng lé, "Ngò, nang é gyè pé lé,

[†] 20:36 Dum dui toq lô su é yhangzô pé gâ é gi, Yesuq lé lumjíng luí, shi é htâng má dum dui toq lo é bang lé gâ lhê. * 20:37 Htoq Lô 3:6

náng é hkyî nang tanghkuq kut pyám byí é hkyíng jé shoq. Ngá é loqyo hkyam[‡] shut zung nyi shi aq." gâ ri.*

ga kê tô ri.

⁴⁴ Haú mù, Dawiq yhang lháng, Hkrisduq lé, Yhumsing gâ é nghut le gi, Hkrisduq gi, yhangzo za hkâsu ge nghut râ lhu?" ga tâ ri.

Tarâ Sará Pé Lé Sidiq Râ Hkyô

Mht 23:1-36; Mrk 12:38-40; Luk 11:37-54

⁴⁵ Byù banshoq gyô nyi é u lé, Yesuq, Yhâng é chángzô pé lé taí é gi,

⁴⁶ "Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún lui, gai pé má hkunggâ é eq shichyen râ lé le, tarajong pé mâ é ahkyak dik é zûng jang pé eq poi pé mâ é je réng é zûng jowò pé má myang zûng râ lé le, ô nau nyi bum akô.

⁴⁷ Yhangmoq gi, chuimó pé é yhûm-yò pé lé hpyoq zo hpyoq shuq kôluí, kyû hîng hîng dũng shit mhaú é bang nghut akô. Haú sù é bang gi, je riyhang htan é dông dam byí é hui zo kó râ nghut lhê." gâ ri.

21

Chuimó Myhí Kat É Alu

Mrk 12:41-44

¹ Yesuq tu wú kat é hkûn lé, noqkuq yhûm mâ é alu sidek má, wó bang alu kat nyi bùm kô é lé myang ri.

² Dum nghut jáng, gyi htíngchap ngùn zo í chap za kat é, myung é chuimó myhí rayuq lé le myang ri.

³ Haú mù, Yhang gi, "Ngò, nungmoq lé teng za taí kôlé, shí myung é chuimó myhí gi, góbang banshoq htoq má je myo kat bê nghut ri.

⁴ Hkâsu mù gâ le, haú góbang banshoq gi, yhumsing agùn agó wó é mâ é lé, lé kat akô; yhang kúm gi, myùng sù nghut kôle, yhâng asak lé baú ra ngùn lunglhang lé kat bê nghut ri." ga tâ ri.

Ló Htûm Buinyi Má Dut Lò Râ Hkyô

Mht 24:1-21, 29-35; Mrk 13:1-19, 24-31

⁵ Noqkuq yhûm lé, yúng é luqgok pé eq le, alu chyunghuq pé eq le, mhôn tô ri ga, chángzô pé ra-am hkya-ôn bùm kôjáng, Yesuq gi,

⁶ "Nungmoq myang nyi é shí pé gi, luqgok rachâm htoq racham lháng a kê lhum loshoq, hpyoq hpyi pyâm é buinyi jé râ nghut lhê." ga tâ ri.

⁷ Haú su ga jáng, yhangmoq gi, "Sará ê, haú nghut le gi, haú hkyô pé gi, hkâ-nhâm dut lò râ lhu? Haú dut râ chyâng lò jáng, hkasú é kumlhá htoq lò râ nghut lhê lhu?" ga, Yhang lé myí akô.

⁸ Haú hkûn, Yhang gi, "Nungmoq gi, hkyô shuí ngoq é a hui kó sháng gaq, sidiq nyi keq. Hkâsu mù gâ le, 'Ngò gi, Mesaia nghut lhê.' ga le, 'Ahkyíng chyâng lò bê.' ga le, Ngá myíng lé lãng é byù myo myo pô htoq lò kó râ nghut lhê. Nghut kôlhang, nungmoq gi, yhangmoq htâng hkâcháng kó.

⁹ Majan htoq é eq, gumlau toq é hkyô lé, wó gyo kôjáng, hkâgyuq hkâ-kyûm kó, haú hkyô pé hí dut lò râ nghut lhê. Nghut kôlhang, ló htâng é buinyi gi, haú hkûn jáng dut râ a nghut shi." ga tâ ri.

¹⁰ Hau htâng, Yhang, yhangmoq lé dum taí é gi, "Ra-myû eq ra-myû, mingdán ralhûm eq ralhûm majan zân lhûm lò kó râ nghut lhê.

11 Jowò myo myo má, layàng mó nún lo é, noli nojàng myô lo é eq mutmó gyó lo é pé, dut lò rá nghut lhê; gyuq chiq jung pé eq kumhá mó le, mauhkúng htoq mai htoq shit lò rá nghut lhê.

12 Nghut kôlhang, haù hkyô banshoq a dut shimá, Ngá mying é yanmai, byu pé gi, nungmoq lé chyup yù luí, zing-rî yù mù, tarajong pé eq htóng pé má ap pyám kó rá nghut lhê, hau htoq agó, nungmoq gi, hkohkam pé eq zau pé chyáng é ap byí é le, hui kó rá nghut lhê.

13 Haù su é pé mai, nungmoq gi, ngò eq séng luí, saksé wó hkám rá hkyô htoq lò berá nghut lhê.

14 Nghut kôlhang, hkâsu nghù lhom tú tái rá hkyô lé, hí mai a myit wui nyi rá lé, nungmoq myit hpyit to keq.

15 Hkâsu mù gà le, nungmoq é gye pé lhunglhang bang, haí le a wó lhom tú tái loshoq, ngò, nungmoq lé dang eq hpaqchyí byi rá nghut lhê.

16 Nghut kôlhang, nungmoq gi, ìnu iwá pé, âgu âmâng pé, mungmoq eq buinùm ji-myi wui èq lhang, ap pyám é hui kó rá nghut lhê. Yhangmoq gi, nungmoq chyáng má é ra-am lé lhang, sat pyám kó rá nghut lhê.

17 Byù lhunglhang bang gi, Ngá é yanmai, nungmoq lé a nguì kut kó rá nghut lhê.

18 Nghut kôlhang, nungmoq é xâm rahkat lhang wó htên byuq rá a nghut.*

19 Nungmoq gi, wó jân é hkyô mai, asak lé wó yù kó rá nghut lhê.

20 Yerusalem wà mó lé gye hpúng mó èq lóm tô é lé, nungmoq myàng jáng, wà mó haù htên byuq rá ahkyíng chyáng lò bê lé, bûn sê nyi keq.

21 Haù hkùn lé, Yuda mau má nyi é bang gi, bùm pé shut hpang doq ló kó sháng gaq; haù wà hkaù má nyi é bang le, hpang htoq kó sháng gaq; wà tiq wà zo pé má nyi é bang le, wà hkaù shut a wàng kó sháng gaq.

22 Hkâsu mù gà le, Chyúmdang má kâ to má kâ to banshoq dik lò rá matú, buinyi haù pé gi, mara dam byí é buinyi pé dut rá nghut lhê.

23 Haù buinyi pé má, zogúng dut é myiwe wui eq naù huq ashí nghut é ìnu wui gi, gyai yhang wuìhke kó rá nghut lhê; hkâsu mù gà le, shí ming ahtoq má wuìhke mó eq, shí amyuahtoq má Garai Gasang nhikmó-yô é jé lò rá nghut lhê.

24 Yhangmoq gi, shâm lham èq sat pyám hui lhê eq, ming hkang ming mó má chyup shuí lò é le hui kó rá nghut lhê. Tungbaù pé lé byí tô é buinyi ahkyíng htáng shoq, Yerusalem wà mó gi, tungbaù pé èq nâng zik tô é hui rá nghut lhê.

25 Haù hkùn, bui, kyí, lhamó pé má, kumhá htoq shit rá nghut lhê. Wuishuq lung-aù má é wuìlhêng pé é mying é htê mó é yanmai, myigùng htoq má, byù myù chângjup gi, hkâsu kut rá a sé loshoq maù é eq myit wui myit hké é hui bekò rá nghut lhê.

26 Byu pé gi, mingkan htoq má dut lò rá é hkyô pé lé, a jé shi mai myit gyuq kó é yanmai, moq byuq ló bùm kó rá nghut lhê; hkâsu mù gà le, mauhkúng má é wum-o a-tsam pé gi, lhoq nhùn é huí bùm kó rá nghut lhê.

27 Haù hkùn, haù Byu Yhangzo gi, mhut ji mù, hpungwup a-tsam mó eq le, hpungwup shingkan mó eq le, gyó lé lo é lé, yhangmoq byu-myàng kó rá nghut lhê.

28 Haù hkyô pé dut hi lò jáng, ulhum tú mù wú kat keq, hkâsu mù gà le, nungmoq lé hkyi yù rá buinyi gi, chyáng lò bê nghut ri." gá ri.

* 21:18 Shí má gi, asak woi-nyí a shí rá hkyô lé tái é nghut lhê.

²⁹ Yhang, yhangmoq lé dangtú dông xoq taí é gi, "Maihpáng gâm eq siggâm banshoq lé wú wú keq.

³⁰ Sikbu nyún lo é lé myàng jáng, bui nyé nám chyâng lò bê ga luí, nungmoq yhang dat wú sê akò.

³¹ Haú eq rajung za, haú hkyô pé dut nyi é lé, nungmoq myàng kôjáng, Garai Gasâng é mingdán gi, chyáng bê nghut é hkyô lé, nungmoq sé lo keq.

³² Ngò, nungmoq lé teng za taí kôlé, shí pyat má é byu pé a ban shi byuq shimá, haú hkyô pé banshoq dut byuq râ nghut lhê.

³³ Mauhkúng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyí râ nghut lhê.

³⁴ "Nghut kôlhang, zo myo shuq myô é, í shuq wut é, mingkan htoq mâ é myit wui myit hkê é pé èq, nungmoq é i-myt wò láí nyi luí, haú ngò jé lé é buinyi gi, lhaí bik lo é su, nungmoq ahtoq má byodàn tung a jé lò sháng gaq, sidiq nyi keq.

³⁵ Hkâsu mù gà le, buinyi haú gi, mingkan htoq má nyi é byù banshoq bâng é ahtoq má, haú su jé lò râ nghut lhê.

³⁶ Haú mù luí, haú dut lò râ hkyô banshoq mai, nungmoq wó lut lai mù, haú Byu Yhangzô é hí má, wó yap gíng é bang dut sháng gaq, hkâ-nhám le kyúdung luí, ahkyíng hkangmó má machya nyi keq." gà ri.

³⁷ Yesuq gi, nyí wui noqkuq yhúm má mhoqshit nyí luí, myìn wui Tsanlun Bùm gà é bùm shut htoq é mù, è nyi to to kut ri.

³⁸ Byù banshoq bang gi, Yhang mhoqshit é dang gyo râ ga, napsún noq noq mai noqkuq yhúm má jé lé bum akò nghut ri.

22

Yesuq Lé, Yudaq Èq Ung Zô É Hkyô

Mht 26:1-5,14,16; Mrk 14:1-2, 10-11; Yhn 11:45-53

¹ Ahkuí, Lhoqlhai Poí gà é Azuma (múnchi a kat é Muk Zo Poí) jé râ chyâng lò bê.

² Haú mù, hkyangjong agyi pé eq tarâ sará pé gi, Yesuq lé hkâsu kut wó sat pyám râ hkyô, ho nyi akò; hkâsu mù gà le, yhangmoq gi, mingbyù wui lé gyuq bùm kô é yanmai nghut ri.

³ Haú hkùn, lagyo raxe í yuq má bo é Iskarut gà é Yudaq chyáng Tsadán wàng mù luí,

⁴ yhang gi, htoq é mù Yesuq lé hkâsu kut ap pyám râ hkyô lé hkyangjong agyi pé, noqkuq yhúm zúng é gyezau pé eq, è hpyé ri.

⁵ Haú mù, yhangmoq gi, gyô ngui luí, Yudaq lé ngùn byi râ hkyô myit hui bekò.

⁶ Yudaq le hap yù luí, byù hpúng má a nghut é hkùn, Yesuq lé ap pyám râ hkyô ho nyi bê nghut ri.

Lhoqlhai Poí Lé Món É Hkyô

Mht 26:17-30; Mrk 14:12-26; Yhn 13:21-30

⁷ Ahkuí, haú Lhoqlhai Poí má é sauzo shigu hkungga sat nhông byi râ é Azuma buinyi jé bê.

⁸ Haú hkùn, Yesuq gi, Petruq eq Yohan lé, "Nga-nhúng zo râ matú Lhoqlhai Poí é món láng keq." ga luí, nhang kat ri.

⁹ Haú nhik gi, "Hkámá è món to nhâng nau ri lúhú?" ga luí, Yhang lé myí akò.

10 Haú hkûn, Yesuq gi, "Nungnhik, myuq hkaú shut wang e ló le wuì yambú waq é byù rayuq lhom hui rá nghut lhê; haú yuq chyáng châng ló luí, yhang wang ló é yhúm má châng wàng mù,

11 yhumsing lé, 'Ngò Ngá é chángzô pé eq rahá, Lhoqlhai Poí zo rá bing wap hkámá nghut lhê lú ga, Sará myí nhang kat ri.' nghú taí keq.

12 Haú hkûn, hen tô é ahtoq má é wap mó lé, nungnhik lé lhom tún shit rá nghut lhê; wap haú má é món to keq." ga taí kat ri.

13 Haú chángzo nhik htoq e ló le, Yesuq taí kat é eq roq za é myâng kômù, Lhoqlhai Poí lé món to bekô nghut ri.

Yhumsing É Myinzang

14 Ahkuí, ahkyíng jé jáng, Yesuq eq Yhâng é chángzô pé rahá za zohpoq má zung tô akô.

15 Haú hkûn, Yesuq gi, "Ngò wuìhke jamjau hpuzô é a hui shi má, Lhoqlhai Poí shi lé nungmoq eq rahá zo rá lé, Ngò gyai ô nau nyi lhê.

16 Hkâsu mù gâ le, ngò, nungmoq lé taí kôlé, Garai Gasâng é mingdán má poí shi a ló dik dik gi, ngò haú lé dum zo rá a nghut ló." ga luí, yhangmoq lé taí ri.

17 Hau htâng, Yesuq gi, góm lé yù mù jeju ban hkya-on jáng, "Góm shi lé yù luí, nungmoq yhangchang gàm shuq lhum keq.

18 Ngò, nungmoq lé taí kôlé, ahkuí mai gi, Ngò, Garai Gasâng é mingdán a jé tsibiyiq wing lé dum shuq rá a nghut lo." ga taí ri.

19 Hau htâng, Yhang gi, muk lé yù mù, jeju hkya-on luí, muk lé myhik hpé mù, yhangmoq lé byi uchyang, "Shi gi, nungmoq é matú byí pyâm é, Ngá é gungdu nghut lhê; Ngo lé bún nyi rá matú, shi su kut nyi keq." ga taí ri.

20 Haú eq rajung za, myinzang ban zo jáng, góm lé le yù mù, "Góm shi gi, nungmoq é matú htoq pyâm é, Ngá é sui má xuq tô é dangshikaq asik nghut lhê.

21 Nghut kôlhang, wú keq, Ngo lé ap pyâm rá sù gi, zang bó shi má ngò eq rahá nyi tô ri.

22 Haú Byu Yhangzo gi, hkyin to huí é eq rajung za shi rá nghut lhê; nghut kôlhang, Yhang lé ap pyâm é sù gi, dingnyé wó ri." ga taí ri.

23 Haú su ga jáng, lagyô pé gi, yhangmoq má shi hkyô kut rá sù gi, hká yuq nghut rá lú ga, rayuq eq rayuq myí lhum bum akô.

24 Haú htoq agó, yhangmoq má é hká yuq sheq je kô lhê lú ga le, rayuq eq rayuq taí htíng lhúm bum akô.

25 Haú mù luí, Yesuq gi, "Túngbaù pé é hkohkam pé gi, yhangmoq byù myù pé é ahtoq má up zô nyi kô é nghut luí, byu pé gi, ahkáng ayá wó é bang lé jeju yhumsing pé ga luí, taí hkungga nyi bum akô.

26 Nungmoq kúm gi, haú su hkâkut kó. Nungmoq má je ko sù gi, asak je tiq é sù su, up é sù le, dui-nhâng zoshâng su nghut nyi sháng gaq.

27 Hká yuq sheq je kô lhê lú? Zô zung nyi sù lú? Haú a nghut jáng, saí tsô é sù lú? Zô zung nyi é sù sheq nghut ri. Nghut kôlhang, ngò gi, nungmoq má é saí tso sù su za nghut nyi lhê.

28 Nungmoq kúm gi, Ngò jamjau huí nyi le, Ngò eq rahá nyi nyi é bang nghut nyi akô.

29 Haú su mù, Ngá wa gi, Ngo lé, mingdán ap byí é su, Ngò le, nungmoq lé mingdán ap byi rá nghut lhê.

30 Haù mù, Ngá é mingdán mâ é, Ngá é zangbó má, nungmoq wó zo kó râ nghut lhê; nungmoq le hkohkâm-tanghkuq má zung to mù, Israelaq amyù raxe í hú lé jéyáng kó râ nghut lhê.

Yesuq Lé, Petruq (Simun) He-ngik Pyâm Râ Hkyô
Mht 26:31-35; Mrk 14:27-31; Yhn 13:36-38

31 Simun, Simun ê, wú aq, sungso cham lé shaí é su, nungmoq lé wó shaí shoq ga, Tsdán wá gi, ahkáng dung bê.

32 Nghut kôhang, náng é lumjínng myit a hten sháng gaq nghù, Ngò, náng é matú kyúdung byi bê; náng dum lhing bûn lò jáng, nung gu nung mâng pé lé wum-o lhoq ging byi aq." ga tai ri.

33 Haù hkún, Simun gi, "Yhumsing ê, htóng wâng kôhang, shí kôhang, ngò gi, náng eq rahá cháng râ matú myit hpyit to bê." ga tû tai ri.

34 Yesuq gi, "Petruq ê, nang lé Ngò tái lé, hkû-nyí* lháng woq a tûn shi má, náng, Ngo lé a sé ga luí sum dâm he-ngik pyám râ nghut lhê." ga tai ri.

35 Hau htâng, Yesuq, yhangmoq lé tái é gi, "Ngò, nungmoq lé ngunhtung, jhtung, hkyi-tsung a wùn a chûng nhang é za, nhang kat é nghut hkún, nungmoq chyáng haí ra akô hú?" ga myi jáng, yhangmoq gi, "Haí le a ra lo." ga tai akô.

36 Haù hkún, Yhang gi, "Ahkuí kúm gi, ngunhtung wó sù gi, yù wun sháng gaq, jhtung wó sù le, yù wùn sháng gaq, shâm a wó sù gi, bumó ung luí wui sháng gaq.

37 Hkâsu mù gâ le, Ngò, nungmoq lé tái kôlé, Ngò eq séng luí Chyúmdang má kâ tô é gi, dut lò berá nghut lhê; 'Hau yuq gi, yubak mara wó bang má nghap lhôm to bê. ✱ ga kâ tô é dang gi, Ngá chyáng dik lò râ nghut lhê." ga luí, yhangmoq lé tái ri.

38 Haù mù, lagyô pé gi, "Yhumsing ê, wú aq, shí má shâm í hkyam joq tô ri." ga tái kôjáng, Yesuq gi, "Gé bê." ga luí, yhangmoq lé tái ri.

Tsanlun Bùm Má Yesuq Kyúdung É Hkyô
Mht 26:36-46; Mrk 14:32-42

39 Ahkuí, Yesuq gi, htoq luí, gó hkun é eq rajung za, Tsanlun Bùm shut htoq e ló bê nghut ri; Yhâng é chángzô pé le Yhang htâng châng e ló akô.

40 Haù jowò má jé jáng, Yhang gi, "Nungmoq, gunglau é a hui sháng gaq, kyúdung nyi keq." ga luí, yhangmoq lé tái to mù,

41 chángzô pé nyi é mai lugqok radú we kô gâng e ló luí, hkyihput htuq mù,

42 "Áwa é, Náng ô nau é nghut le gi, góm† shí lé Ngá chyáng mai haí pyám byi laq. Nghut kôhang, Ngò ô nau é đông a nghut, Náng ô é đông sheq nghut sháng gaq." ga kyúdung ri.

43 Haù hkún, mauhkúng mai maumang lagyo rayuq htoq lé luí, Yhang lé i-myt nhik lé tái tûng ri.

44 I-myt hkaú má dik shoq hkâm zo wui é yanmai, Yhang je riyhang kyúdung wum kat nyi ri; Yhâng é buibù le, sui hkyí sui pat su myigùng má yui gyó ri.

45 Haù mù, kyú ban dung jáng, Yhang toq luí, chángzô pé chyáng ló wú le, yhangmoq gi, myit yón mù luí, yhup myhi to kô é lé ló myâng mù,

* 22:34 Yudaq byu pé é ra-nyí gi, myinhâng bùi wang é mai, htang nyi bùi wang é jé shoq nghut lhê. Shí má é hkû-nyí gi, nga-nhùng é matú myín àng ri. ✱ 22:37 Esai 53:12 † 22:42 góm gâ é gi, Yesuq jamjau hui râ hkyô eq shí râ hkyô lé, tái nau é nghut lhê.

46 "Haî mù yhup nyi akô lúhú? Toq keq! Gunglaú é a hui sháng gaq, kyûdùng nyi keq." ga luí, yhangmoq lé tai ri.

Yesuq Lé Chyup É Hkyô

Mht 26:47-56; Mrk 14:43-50; Yhn 18:3-11

47 Haú su ga, ru tai nyi ashí le, wú keq, haú chángzo raxe í yuq má bo é Yudaq gi, hkyô hí mù byù rajùm rayò lé shuí lé lô luí, yhang gi, Yesuq lé bopuq puq râ ga huí lé lo ri.

48 Haú mù luí, Yesuq gi, "Yudaq ê, nàng gi, haú Byu Yhangzo lé bopuq puq é eq gye é pè chyáng ap pyâm lhê lúhú?" ga luí, yhang lé lhom myí ri.

49 Haú hkûn, Yesuq htâng cháng bang gi, hai dut lò rà lé bûn sé kô é yanmai, "Yhumsîng ê, ngamoq gi, sham eq zân le, gè rà lúhú?" ga myí akô.

50 Yhangmoq chyáng má é rayuq gi, hkyangjong mó é dui-nhâng zoshâng lé zân kat luí, yhâng é loqyo nohkyap byit byuq bê nghut ri.

51 Yesuq kúm gi, "Gé bê. Yhangmoq ô nau é su nghut kó sháng gaq." ga tú tai mù, haú yuq é nohkyap lé ê zâng luí lhoq gè byí ri.

52 Yesuq gi, Yhang lé chyup râ ga jé lé é hkyangjong agyi pé, noqkuq yhùm zúng é zau pé eq agyi suwún wuí lé, "Nungmoq gi, danyaq rayuq lé chyup é su, shâm, dumbáng eq kut luí, lé lo akô lúhú?"

53 Ngò gi, nyí wuí, noqkuq yhùm má nungmoq eq rahá nyi kôlhang, nungmoq Ngo lé chyup yú râ ga a hen wú kó; ahkuí gi, mauchut eq up[‡] nyi bê yanmai, nungmoq é ahkying nghut nyi ri." ga tai ri.

Yesuq Lé, Petruq Èq He-ngik Pyâm É Hkyô

Mht 26:57-58, 67-75; Mrk 14:53-54, 66-72; Yhn 18:12-18, 25-27

54 Haú hkûn, yhangmoq gi, Yhang lé chyup yú mù she lô luí, hkyangjong mó é yhùm shut shuí wang lô akô. Petruq le we we mai châng tô ri.

55 Ahkuí, yhangmoq gi, wàng hkaú má myi mut yú luí zung tô bum é hkûn, Petruq le yhangmoq é ahkaú má bo tô ri.

56 Langchyáng myhí rayuq gi, myihkyom yâm má Petruq zung tô é lé, myang kat mù, yhang lé rago wú tsuq to luí, "Shí yuq le Yesuq eq rahá nyi sù nghut ri." ga tai ri.

57 Haú hkûn, Petruq gi, "Myiwe myhí ê, nàng tai é sù lé, ngò a sé." ga he pyâm ri.

58 Hau htâng hkâ-myháng a myáng má, byù rayuq gi, yhang lé dum myàng luí, "Nàng le yhangmoq chyáng bo nyi sù nghut ri." ga tai kat jáng, Petruq gi, "Byù hpó ê, ngò a nghut." ga tú tai ri.

59 Hkyíng hkum rahkum kô myáng jáng, rayuq le, "Gè gè yhang, shí yuq gi, Yhang eq rahá nyi wún sù nghut ri; hai mù gá le, yhang gi, Galile byù le nghut ri." ga zuq zuq tai ri.

60 Petruq gi, "Byù hpó ê, nàng tai nyi é hkyô lé, ngò a sé." ga tú tai ri. Haú su ga ru tai nyi ashí le, woq tún bê nghut ri.

61 Haú hkûn, Yesuq gi, lhing luí, Petruq lé wú kat ri. Haú mù, Petruq gi, "Hkû-nyí lháng, woq a tún shí má, nàng Ngo lé sum dâm he pyám râ nghut lhê." ga luí, Yhumsîng yhang lé tai é dang lé bûn kat ri.

62 Haú mù, yhang gi, shinggan shut htoq é luí, gyai yhang é ngau nyi ri.

Gyezô Pé Yesuq Lé Rhoi É Hkyô

[‡] 22:53 Mauchut eq up gá é gi, Tsadán eq up é lé gá ri.

⁶³ Yesuq lé zúng nyi é bang gi, Yhang lé rhoi luí nghap myíng nghap htê mu nyi akô.

⁶⁴ Yhangmoq gi, Yhâng é myoqdong nghop pyám byi luí, "Nang lé bat sù gi, ó yuq nghut ri lúh? Myiqhtoi htoí wú aq." ga myí akô.

⁶⁵ Yhangmoq gi, Yhang lé nyhap é dang ajung jung dông taí rhoi nyi akô.

Suwún Wui É Hí Má Yesuq Jé Nyi É Hkyô

Mht 26:59-66; Mrk 14:55-64; Yhn 18:19-24

⁶⁶ Napkyó myoqmyàng jáng, mingbyú wui é suwún hpúng bang eq rahá, hkyangjong agyi pé, tarâ sará pé, zup hpong kut nyi é má, Yesuq lé shuí é mù,

⁶⁷ "Nàng Hkrisduq nghut é têng le gi, ngamoq lé taí kyo laq." gá akô.

Yesuq gi, "Ngò gi, Hkrisduq nghut lhê nghú taí kôhlang, nungmoq jing kó rà a nghut.

⁶⁸ Ngò, nungmoq lé myi kôhlang, nungmoq gi, tú taí kó rà a nghut.

⁶⁹ Nghut kôhlang, ahkuí mai haú Byu Yhangzo gi, a-tsam bo dik é Garai Gasâng é loqyò hkyam má wó zung nyi berâ nghut lhê." ga luí, yhangmoq lé taí ri.

⁷⁰ Haú hkûn, yhangmoq banshoq bang gi, "Haú nghut le gi, Nàng, Garai Gasâng é Yhangzo nghut lhê lúh?" ga myí akô.

Yesuq gi, "Nungmoq taí é eq rajung za Ngò nghut lhê." ga luí, yhangmoq lé tú taí ri.

⁷¹ Haú hkûn, yhangmoq gi, "Nga-nhúng haí jung saksé wá rà nyi ashí lúh? Yhâng é nhut mai yhang, taí htoq kat é dang lé, nga-nhúng wó gyo bê nghut lhê." ga akô.

23

Yesuq Lé Mara Hun É Hkyô

Mht 27:1-2, 11-14; Mrk 15:1-5; Yhn 18:28-38

¹ Haú hkûn, zup zing tô é bang banshoq gi, htoq mù, Yesuq lé mauzau Pilat chyáng shuí wang ê luí,

² "Shí yuq gi, mingbyú wui lé hkyô shuí nghoq é eq, hkoséng Kehtaq chyáng kang kat rà hkyô lé le hkûm to luí, Yhânggùng yhang gi, haú Hkrisduq nghú é hkohkâm nghut lhê ga luí, taí nyi é lé ngamoq myang ri." ga luí, Yhang lé mara hun akô.

³ Haú hkûn, Pilat gi, Yesuq lé, "Nàng gi, Yudaq byu pé é hkohkâm nghut lhê lúh?" ga myi jáng, Yesuq gi, "Nàng taí é eq rajung za nghut lhê." ga tú taí ri.

⁴ Pilat gi, "Shí yuq lé hûn rà mara ngò a myàng." ga luí, hkyangjong agyi pé eq shiwa byu pé lé taí ri.

⁵ Nghut kôhlang, haú bang gi, "Shí yuq gi, Yuda mau gón má yhang mhoqshit é dông mai, mingbyú wui é i-myt lé shuí gabyông ri. Haú gi, Galile mau mai ahkuí shí má jé shoq nghut bê nghut ri." ga zuq zuq taí bum akô.

⁶ Pilat gi, haú su ga kô é lé wó gyo jáng, Yesuq Galile byù nghut é, a nghut é hkyô lé myí wú ri.

⁷ Yesuq gi, Herut up é mau mâ é byù nghut é lé Pilat sé jáng, haú u lé Yerusalem wá mó má nyi tô é Herut chyáng, é dé kat nhang ri.

⁸ Herut gi, Yesuq lé myàng jáng, gyai yhang gabú pyâm ri. Hkâsu mù gá le, Yhâng é hkyô lé wó gyò wú mù, Yhang laklai kumlhá ralhum lhum kut shit rá lé, wó myàng shoq ga, myit myoqbyu nyi é nghut luí, Yhang lé myàng nau é gyai yhang myàng bê nghut ri.

⁹ Haù mù, yhang gi, Yesuq lé dangmyi myo myò éq myí wú kôlhang, Yesuq gi, dang rahkun lháng a tû tai byi nghut ri.

¹⁰ Hkyangjong agyi pé eq tará sará pé gi, yap to mù, Yhang lé mara gyai yhang chôm hun akô.

¹¹ Herut eq yhâng é gyezô pé gi, Yesuq lé rhoi jihkyoi kut mù, atam é đông tai hpoi kô luí, réng é mebu hut byi mù, Pilat chyáng dum taù dé nhang kat akô.

¹² Haù nyí jáng, hí hpyang gyè dut lhùm é Herut eq Pilat gi, buinùm dut byuq bekô nghut ri.

Yesuq Lé Sat Râ Matú Doqdân É Hkyô

Mht 27:15-26; Mrk 15:6-15; Yhn 18:39-19:16

¹³ Haù hkûn, Pilat gi, hkyangjong agyi pé eq zau suwún wuí, mingbyû wui lé wut tsíng to mù,

¹⁴ "Shí yuq gi, mingbyû wui lé hkyô shuí nghoq ri ga, Yhang lé nungmoq ngá chyáng shuí lé ló bekô. Ahkuí, wú keq, nungmoq é hí má, Yhang lé ngò myí wú le, Yhang má nungmoq hun é mara lé ngò a myàng nghut ri.

¹⁵ Hau htoq agó, Herut le, hai mara le a myàng mù, shí yuq lé nga-nhùng chyáng dum dé kat byi bê nghut ri; haù mù luí, wú keq, shí yuq gi, shí gíng é mara haí le a kut shut nghut ri.

¹⁶ Haù mù, ngò, Yhang lé dam byi luí, nhang pyám râ." ga luí, yhangmoq lé tai ri.

¹⁷ Nghut kôlhang, Lhoqlhai Poi hkangmó má, Pilat gi, mingbyû wui lé htongbyû rayuq yuq nhang kat byi byi kut é yanmai,

¹⁸ yhangmoq banshoq bang gi, "Shí yuq lé gi, yu pyám aq; Barabaq lé kúm gi, nhang kat byi laq." ga luí, chôm wut garu bum akô.

¹⁹ Barabaq gi, wà htum má gumlau kut é eq byù sat é yanmai, htóng gyó nyí sù nghut ri.

²⁰ Pilat gi, Yesuq lé nhang pyám nau é nghut mù luí, yhangmoq lé dum puq tai ri.

²¹ Nghut kôlhang, yhangmoq gi, "Yhang lé tapzîng má jén tap pyám aq, jén tap pyám aq!" ga luí, wut tai garú nyi bum akô.

²² Haù mù luí, sum dâm nghú râ hkûn, Pilat dum tai é gi, "Haí mù luí lhu? Yhang gi, hai mara kut shut bê lhu? Yhang má shí gíng é mara lé ngò a myàng, haù mù, ngò, Yhang lé bat, nhuq, mhoqshit luí, nhang pyám râ." ga luí, yhangmoq lé tai ri.

²³ Yhangmoq gi, Yesuq lé tapzîng má wó jén sat pyám shoq ga, zuq zuq hté mó o mó éq dúng wut nyi akô nghut é yanmai, wó tai ung yù bekô nghut ri.

²⁴ Haù mù luí, Pilat gi, yhangmoq dúng é eq rajung za myit hpyit doqdan byi ri.

²⁵ Haù su mù, yhang gi, yhangmoq dúng é eq rajung za, wà htum má gumlau kut é eq byù sat é mai, htóng gyó nyí sù lé nhang kat byi luí; Yesuq lé gi, yhangmoq ô nau é đông ap byi kat bê nghut ri.

Yesuq Lé Tapzîng Htoq Má Jén Tap É Hkyô

Mht 27:31-44; Mrk 15:21-32; Yhn 19:17-27

²⁶ Yhangmoq gi, Yesuq lé shuí htoq ló kô é hkûn, yosô wà mai lo é, Kuruni myuq byû nghut é Simun ga sù lé, chyup yù mù, tapzîng waq nhâng luí, Yesuq htâng má cháng nhang akô.

²⁷ Byù rajùm rayò gi, Yhang htâng má châng e ló bum akô. Yhang é yanmai ngaubyi ngàu nhap eq iyon yôn é myiwe zo wuì le haú má bo tô ri.

²⁸ Yesuq gi, yhangmoq shut lhîng wú luí, "Yerusalem byizo wuì ê, Ngá é yanmai hkâ-ngau nyi kó, nungmoq gi, yhumsing gùng eq yhumsing é zo dù wuì é matú sheq ngau nyi keq.

²⁹ Hkâsu mù gâ le, 'Zogûng a dut wú é eq naú a huq wú é baùdung myhí pé gi, hkungsó wó nyi ri.' ga luí, taí é buinyi gi, jé lô rà nghut lhê.

³⁰ Haú buinyi má, byu pé gi, bùm pé lé, 'Ngamoq ahtoq má byoq nhé aq!' ga luí le, kong pé lé,

'Ngamoq ahtoq má nghop aq!'[✠]

ga luí le, wut taí bùm bekô rà nghut lhê.

³¹ Byu pé gi, sikgâm jùm tô ashí le isu kut kô é nghut le gi, màn jáng gi, hkâsu wá dut lò rà lhú?" ga taí ri.

³² Haú hkûn, damyaq í yuq lé le, sat pyám rà ga, Yesuq eq rahá shuí htoq ló akô.

³³ Ahkuí, Ugyap nghu é kong má jé jáng, Yesuq lé tapzîng htoq má jén tap tô é hkûn, damyaq í yuq lé le, loqpai loqyò shut kut luí tapzîng má jén tap tô akô.

³⁴ Haú hkûn, Yesuq gi, "Âwa ê, yhangmoq lé mara hkyut pyám byi laq; hkâsu mù gâ le, yhangmoq kut é hkyò lé yhangmoq a sé kó nghut ri." ga taí ri. Gyezò pé gi, Yhâng é mebu pé lé lháng, hkyîn shosé she é dông gam yu pyám byí akô.

³⁵ Mingbyù wuì gi, yap to mù tu wú nyi akô. Zau suwún wuì Yhang lé nyhap é gi, "Yhang gi, byù góbang lé hkyi yu é sù nghut ri. Yhang gi, Garai Gasang hkyin yu é sù Hkrisduq nghut le gi; Yhânggùng yhang le hkyi yu wú sháng gaq." ga akô.

³⁶ Gyezò pé le, huí é mù, rhoi nyaú nyaú akô. Yhangmoq gi, chyîn wing lé yhun byi kôluí,

³⁷ "Nàng gi, Yudaq byu pé é hkohkâm nghut é nghut le gi, Náng gùng yhang nàng, hkyi yu wú aq." ga Yhang lé taí akô.

³⁸ Yhâng é ulhum ahtoq má le, (Grik dông le, Latin dông le, Hebre dông le) "SHÍ YUQ GI, YUDAQ BYU PÊ É HKOHKÂM." gâ é laiká kâ tap tô akô.

³⁹ Tapzîng htoq má bat tap lhâng to huí é damyaq rayuq gi, "Nàng gi, Hkrisduq nghut lhê, a nghut lhú? Haú Náng gùng nàng le, ngá-nhik lé le, hkyi yu aq." ga luí, Yhang lé rhoi ri.

⁴⁰ Damyaq góyuq sù kúm gi, "Nàng le shí yuq eq rajung za jén tô é hui luí nhîng, Garai Gasang lé a gyuq lhú?

⁴¹ Nga-nhik gi, yhumsing kut shut é mara eq rajung za, jéyáng hui zo gíng é sù nhik nghut lhê; shí yuq kúm gi, hai mara lé kut shut wú sù a nghut." ga luí, haú yuq lé tân kat ri.

⁴² Hau htâng, yhang Yesuq lé taí é gi, "Yesuq ê, Nàng, Náng é mingdán má jé ló jáng, ngo lé myit bun laq ô." gâ ri.

⁴³ Haú hkûn, Yesuq gi, "Ngò, nang lé teng za taí lé, hkû-nyí yhang nàng Ngò eq rahá hparadisu* má nyi rà nghut lhê." ga luí, yhang lé tù taí kat ri.

*Yesuq Soqkang Byit É Hkyô
Mht 27:45-56; Mrk 15:33-41; Yhn 19:28-30*

✠ 23:30 Hos 10:8 * 23:43 Hparadisu nghu é gi, mauhkûng mingdán lé taí ri.

44 Haú ahkýing gi, nyí káng raxe í hkýing nghut luí, myinhâng sum hkýing jé shoq ramau gón mauchut tuq dut byuq bê nghut ri;†

45 hkásu mù gà le, builoq shum byuq é yanmai nghut ri. Noqkuq yhùm mã é pán-gyang le, í hkyam byáng dut byuq bê nghut ri.

46 Haú hkûn, Yesuq gi, "Áwa ê, Ngò, Ngá é woi-nyí náng é loq má ap byí lhê." ga htê mó èq garú kat ri. Haú su ga ban tai eq, Yhang kâng byit bê nghut ri.

47 Shô up gyezau hpó gi, haú su dut é lé myàng jáng, "Shí yuq gi, gè gè yhang, dingmán sù nghut ri." ga luí, Garai Gasang lé hkya-on kungton ri.

48 Haú hkyô lé wú rà ga, lé zîng tô é byù lhunglhâng bang le, haú su dut é hkyô pé lé myàng kôjáng, myit yón kôluí, wànggàng bat mù, dum taú ló byuq bekô.

49 Nghut kôlhang, Yhang lé sê é bang eq Galile mau mai Yhang htâng châng é myiwe wui gi, we we má yap to mù, haú hkyô pé lé byu wú nyi akô.

Yesuq É Màng Lé Lup Hkaú Má Kat É Hkyô

Mht 27:57-61; Mrk 15:42-47; Yhn 19:38-42

50 Haú hkûn, Yuda mau Aramahti gà é myuq má, Yosep gà é sù rayuq nyi ri. Haú yuq gi, nhik bo é sù eq dingmán é sù nghut é htoq agó, Garai Gasang é mingdán jé rà hkyô lé myit myoqbyu to sù le, nghut mù luí,

51 yhang gi, Yudaq uphkâng hpúng mã é rayuq nghut kôlhang, hpyé lhùm é hkyô má le, zui sai é hkyô má le, myit a bo huí lom é sù nghut ri.

52 Yhang gi, Pilat chyáng wàng luí, Yesuq é gungsôm lé dúng yu ri.

53 Haú mù, gungsôm haú lé tapzîng mai hkyut hkyô yù luí, pán yúng èq htup yup mù, ó lé háng a kat wú shí é, luqgok lé kyûng tô é luqgok lup hkaú má kat tô ri.

54 Haú nyi gi, Hên Lajang Buinyi nghut luí, Bánno buinyi jé rà za nghut bê.

55 Galile mau mai Yesuq eq rahá htoq lé lo é myiwe zo wui le, Yosep htâng má châng é luí, lup haú lé le, Yesuq é gungsôm lé le, hkásu kut tô tô é lé, é myang akô.

56 Hau htâng, yhangmoq gi, yhùm shut taú lò mù, Yesuq é gùng sôm lé but byi rà matú, namngón é jung eq mura xú lé hen tô akô. Bánno buinyi má kúm gi, tará joq é eq rajung za, yhangmoq yuban bân nyi bum akô nghut ri.

24

Yesuq, Dum Dui Toq É Hkyô

Mht 28:1-10; Mrk 16:1-8; Yhn 20:1-10

1 Bánno buinyi htang napsún noq le, myiwe wui gi, yhangmoq hen tô é namngón jung pé lé yu chùng mù, lup shut é ló akô.

2 Yhangmoq gi, lup mã é luqhkum lêng bóng to lánng é lé, ê myàng kômù,

3 wang e wú kô le, haú Yhumsing Yesuq é gungsôm lé, a myàng lo kó nghut ri.

4 Yhangmoq maú úng-âng nyi bùm kô é hkûn, radá dâm mauhap su duqbó é mebu wut é byù í yuq, yhangmoq é nàm má yap tô akô.

5 Haú mù, myiwe haú bang gi, gyuq dan bum kôluí, myigùng shut myoq-dong ngóm gop tô bum é u lé, haú nhik gi, "Nungmoq gi, ùi sù lé, shi to bâng chyáng hai mù ho nyi akô lúh?

† 23:44 Nga-nhùng é nyí káng raxe í hkýing gi, Yudaq byù pé é napkyó hkyuq hkýing nghut lhê; yhangmoq é gau hkýing gi, nga-nhùng é myinhâng sum hkýing nghut bê.

6 Yesuq gi, shí má a nyi lo; Yhang dui toq lo bê! Yhang gi, nungmoq eq rahá Galile mau má nyi tô ashí hkún lé,

7 'Haú Byu Yhangzo gi, yubak dap bâng é loq má ap pyâm é hui luí, tapzîng má jén sat to huí é htâng, sum nyí nghú é buinyi má lhoq dui toq yu é hui rá nghut lhê.' ga nungmoq lé tai tô é dang lé myit bun keq." ga luí, yhangmoq lé tai ri.

8 Haú hkún, yhangmoq gi, Yesuq é dang lé bûn kat bekô nghut ri.

9 Yhangmoq gi, lup mai dum taú lò mù, lagyo raxe rayuq eq gotú lunglhâng bang lé, haú hkyô banshoq lo tai kyô akô.

10 Lagyo pé lé lo tai kyo bang gi, Magadalaq wà mã é Mariq, Yoanaq, Yakuq é yhangnu Mariq eq, yhangmoq eq rahá nyi é myiwe gôbang le nghut akô.

11 Lagyo pé kúm gi, yhangmoq é dang lé dangsôm su ngam pyám kôluí, a jîng byi kô nghut ri.

12 Nghut kôlhâng, Petruq gi, toq luí lup má din jé é mù ngóm wú kat le, mâng htup é pán leq tô é lé za myàng mù luí, haú su dut é hkyô lé mau é èq, yhúm shut dum taú lò byuq bê nghut ri.

Chángzo Í Yuq Lé Yesuq Htoq Shit É Hkyô

Mrk 16:12-13

13 Haú ra-nyí má za, Yesuq é chángzô pé mã é í yuq gi, Yerusalem wà mó mai nyhit déng kô wê é Ema-u gâ é wà shut e ló akô.

14 Yhangnhik gi, dut lai ló é hkyô pé banshoq lé, rayuq eq rayuq tai lhúm nyi akô.

15 Yhangnhik gi, haú hkyô pé lé rayuq eq rayuq tai hpyê lhúm e ló kô le, Yesuq gi, yhangnhik chyáng jé lé lò mù, yhangnhik eq rahá sô nyi ri.

16 Nghut kôlhâng, yhangnhik gi, myoq hpuq hpuq pyám byí é hui kômù, Yhang lé a sê wú byuq kô nghut ri.

17 Hau hkún, Yesuq gi, yhangnhik lé, "Nungnhik hkyô so uchyang tai lhúm lé lo é gi, hai jung wá nghut akô lhu?" ga myi kat jâng, yhangnhik gi, myoqdong shúm kut luí, hkyîng yap tô akô.

18 Yhangnhik mã é Hklupa gâ é sù gi, "Nàng gi, Yerusalem wà mó mã lé bíng nyí luí nhîng, shí gyoro lé haú wà mã dut lo é hkyô pé lé, a sê é bíng gi, Nàng baú za wá nghut lhê lhu?" ga myi kat ri.

19 Yhang gi, "Hai jung lhu?" ga dum myí é hkún lé, yhangnhik gi, "Nazaret wà byù Yesuq é hkyô nghut lhê; haú yuq gi, Garai Gasâng é hí má le, byù lunglhâng bâng é hí má le, nhut shô hpaqchyí a-tsam eq hkyí loq a-tsam má wum-o bo é sù myiqhtoi nghut ri.

20 Nghut kôlhâng, hkyangjong agyi pé eq ngamoq é zau suwún wui èq haú yuq lé sat pyám rá matú ap byí pyám kômù, yhangmoq gi, Yhang lé tapzîng má jén sat pyám bekô nghut ri.

21 Ngamoq kúm gi, haú yuq lé, Israelaq byù myú lé hkyi yù rá sù nghut lhê nghú luí, myit myoqbyu nyi bum lhê. Nghut kôlhâng, haú su dut lai ló é gi, hkú-nyí sum nyí lhang bô bê.

22 Hau htoq agó, hkú-nap noq le, lup má é wú é, ngamoq hpúng mã é myiwe wui ra-am gi, ngamoq lé, lo lhoq mau akô.

23 Yhangmoq gi, Yesuq é gungsôm lé a myàng jâng dum taú lò mù, 'Haú Yhumsîng dui nyi ri.' ga luí, tai kyô é maumang lagyo htoq shit é shing-rán lé, myang é hkyô lé lo tai kyô akô.

24 Haù mù, ngamoq é luzúm wuì ra-am gi, lup má é wú kô le, miyiwè wuì taì é eq rajung za, dut to láng é lé é myàng akô. Nghut kôlhang, haù yuq lé gi, yhangmoq a myàng kó gâ." ga luì, Yhang lé taì kyô akô.

25 Haù hkùn, Yhang gi, "Miyiqhtoì pé taì é dang banshoq lé lumjing rà matú, hpaqchyì a bo é eq ngha é sù nhik ê,

26 Hkrisduq gi, haù su é wuìhke jamjau hkâm zô yu é htàng má sheq, Yhâng é hpungwup shing kang má wó wang nyi to rà, a nghut kó lúhú?" ga luì, yhangnhik lé myì ri.

27 Yhang gi, yhangnhik lé, Mosheq kâ tô é eq myiqhtoì pé banshoq bang kâ tô é Chyúmdang pé mai, Yhang má âng é dang banshoq é lichyúm lé, taì hpông kyô ri.

28 Ahkuì, yhangmoq, haù nhik e ló é wà má chyâng lò kôjáng, Yesuq gi, laì ló rà su kut ri.

29 Haù hkùn, yhangnhik gi, "Nga-nhik eq rahá wang bíng sháng; hkâsu mù gâ le, buigyùm bê mù, mau le chut lô bê nghut ri." ga luì, Yhang lé wum kat chôm lung nyi akô. Haù mù luì, Yesuq gi, yhangnhik eq rahá wang bíng bê nghut ri.

30 Yesuq gi, zang zo rà ga, yhangnhik eq rahá zung tô é hkùn, muk lé yù luì, jeju hkya-on mù, myhik hpé luì, yhangnhik lé gàm byì ri.

31 Haù hkùn, yhangnhik é myoq bóng lô luì, Yesuq nghut é lé bún sé kat bekô. Yesuq kúm gi, yhangnhik chyáng mai byuq byuq bê nghut ri.

32 Haù mù, yhangnhik gi, "Yhang gi, hkyô má ngá-nhik eq dang nyo lhum é eq Chyúmdang é lichyúm taì hpông shit é hkùn, ngá-nhik gi, i-myt unghkaù má, achyí aku dut bê a nghut lúhú?" ga luì, yhangnhik yhangchang taì lhum akô.

33 Yhangnhik gi, toq mù, radá dâm Yerusalem wà mó shut dum taù ló kô le, lagyo raxe rayuq eq, yhangmoq eq rahá nyi é bang zup míng to kô é lé ló myang akô.

34 Haù bang gi, "Haù Yhumsing gi, teng za yhang dum dui toq ló bê; Simun lé lháng htoq shit bê nghut ri." ga taì lhum nyi bum akô.

35 Haù hkùn, yhangnhik gi, hkyô má dut laì ló é hkyô pé eq, muk hpé é hkùn má Yesuq lé bún sé kat é hkyô lé, taì kyô akô nghut ri.

Chángzô Pé Lé Yesuq Htoq Shit É Hkyô

Mht 28:16-20; Mrk 16:14-18; Yhn 20:19-23; Lagyo 1:6-8

36 Yhangmoq haù hkyô lé chôm taì nyi tô bum ashì le, Yesuq gi, Yhang gung yhang, yhangmoq é agùng má yap to luì, "Nungmoq nguingón yuqyo nyi sháng gaq." ga luì, yhangmoq lé taì ri.

37 Yhangmoq kúm gi, gyuq dan byuq bùm kômù, sobyô lé myàng bê ga myit yu pyâm bum akô.

38 Haù mù luì, Yhang gi, "Nungmoq gi, haì mù dan nyi bum akô lúhú? Haì mù nungmoq é i-myt unghkaù má úng-âng nyi bum akô lúhú?

39 Ngá é loq eq Ngá é hkyì lé wú wú keq. Ngò yhang nghut nyi lhê. Ngo lé sop wú keq. Sobyô nghù é gi, ngo lé nungmoq myang é su, sho eq showui showang bo é a nghut." ga luì, yhangmoq lé taì kyô ri.

40 Yhang gi, haù su ga taì mù, Yhâng é hkyì loq lé tùn shit ri.

41 Yhangmoq gi, gabú é eq maù nyi bùm kômù, a wó jing shi dut tô é hkùn lé, Yesuq gi, "Nungmoq shí má zôhpo rajung jung wó akô lúhú?" ga luì, yhangmoq lé myì kat ri.

42 Haú hkûn, yhangmoq gi, nyhîn nyhoq tô é ngozo rahtung lé, byî akô.

43 Yhang gi, haú lé yù mù, yhangmoq é hí má zô shit ri.

44 Hau htâng, Yhang, yhangmoq lé taí é gi, "Mosheq é tarâ eq, myiqhtoi laiká pé má le, Hkya-on Kungtôn Laiká pé má le, Ngò èq séng luí kâ to má kâ to banshoq gi, dik râ chyat nghut lhê nghû luí, nungmoq eq rahá nyi to ashí hkûn lé, Ngò, nungmoq lé taí kyô tô é pé gi, shí nghut bê." ga taí ri.

45 Hau htâng, Yhang gi, Chyúmdang pé lé sê gyo shoq ga, yhangmoq é i-myit hkum hpóng byî ri.

46 Haú mù, Yhang gi, "Hkrisduq gi, wuîhke jamjau hui zo mù, sum nyí nghû râ buinyi má, shí é mai dum dui toq lô râ hkyô lé le,

47 Yerusalem wà mó mai hí luí, byù myú chângjup lé, Yhâng é myìng lé lang luí yubak mara hkyut pyám byi râ hkyô eq myit lhing râ hkyô lé le, hko kyo râ hkyô lé, kâ to bê nghut ri.

48 Nungmoq gi, shí pê é saksé pé nghut nyi akô.

49 Ngá Wa byî tô é danggidiq* lé, Ngò, nungmoq é ahtog má nhang kat râ nghut lhê; nungmoq kúm gi, htoq tsáng myhâng má é wum-o a-tsam wó yu é buinyi jé shoq, Yerusalem wà mó má láng nyí keq." ga luí, yhangmoq lé taí ri.

*Yesuq Mauhkûng Shut Shuí Toq Yu Hui É Hkyô
Mrk 16:19-20; Lagyo 1:9-11*

50 Hau htâng, Yhang gi, yhangmoq lé Behtani wà yàm shut shuí htoq é mù, Yhâng é loq tu toq luí, shimân byî ri.

51 Haú su kut shimân byî nyi ashí le, Yhang gi, yhangmoq chyáng mai gâng ló byuq luí, mauhkûng shut shuí toq yu é hui bê nghut ri.

52 Yhangmoq kúm gi, Yhang lé noqkuq kômù luí, gyai gabú é myit èq Yerusalem wà mó shut dum taú ló akô.

53 Yhangmoq gi, noqkuq yhûm má nyi to mù, Garai Gasang lé hkya-on kungton nyi bum akô nghut ri.

* 24:49 Ngá Wá byi tô é danggidiq nghu é gi, Chyoiyúng é Woi-nyí lé taí ri.

YOHAN é Gabú Danglù Laiká (The Gospel of John)

Haú Mungdang, Xângzo Byù Gùng Lé Dut É Hkyô

¹ A-nham sâng-hi má, Mungdang joq ri; Mungdang haú gi, Garai Gasang eq rahá nghut luí, haú Mungdang yhang Garai Gasang nghut ri.

² Yhang gi, a-nham sâng-hi má, Garai Gasang eq rahá nghut nyi ri.

³ Nyi mi-nyi, joq mijoq gi, Yhang đông mai hpan tô é chyat nghut lhê; Yhang đông mai a hpan é gi, haí lháng a joq nghut ri.

⁴ Asak chyungxe gi, Yhang má nghut lhê mù, asak haú gi, byu pè é matú maubó nghut ri.

⁵ Haú maubó gi, mauchut má duqbo byi nyi kôlhang, mauchut gi, haú lé a hap yù nghut ri.

⁶ Garai Gasang mai nhang kat é, Yohan gâ é byù rayuq jé lé ri.

⁷ Yhang gi, maubó haú eq sêng é hkyô lé, saksé hkám byi luí, yhang é yanmai byù lhunglhang bang wó lumjing kó sháng gaq ga, saksé rayuq đông jé lé é sù nghut ri.

⁸ Yhang gi, haú maubó a nghut; maubó haú lé saksé hkám byi râ matú za sheq jé lé é ru nghut lhê.

⁹ Byù yuq jup lé duqbo byi é, maubó akying haú gi, mingkan htoq má jé nyi to bê.

¹⁰ Yhang gi, mingkan htoq má nyi to bê nghut ri; mingkan lé gi, Yhang đông mai hpan tô é nghut kôlhang, mingkan haú gi, Yhang lé a wú sé nghut ri.

¹¹ Yhang gi, yhumsing mau má jé lé kôlhang, Yhâng é amyú pé gi, Yhang lé a lhom hap yù kó nghut ri.

¹² Nghut kôlhang, Yhang gi, Yhang lé lhom hap yù luí, Yhâng é mying lé lumjing é bang lhunglhang lé, Garai Gasang é yhangzô pé dut râ ahkáng byi bê nghut ri.

¹³ Haú bang gi, sui sho đông hku kat é le a nghut, byù ô nau é đông hku kat é le a nghut, gungsho ô nau é đông hku kat é le a nghut e za, Garai Gasang chyáng mai hku kat é bang ru nghut lhê.

¹⁴ Haú Mungdang gi, xângzo byù gùng lé dut luí, ngamoq chyáng nyi wú bê nghut lhê. Ngamoq gi, haú jeju eq tengmán hkyô bying tô é, Yhang é hpungwup shingkang lé myang wú bê nghut lhê; haú gi, haú Íwá é zote rayuq đông, Yhang wó yu é hpungwup shingkang nghut ri.

¹⁵ Wui-myhup Sará Yohan gi, Yhang eq sêng é hkyô lé saksé hkám é hkûn, garú taí é gi, "Ngá é htàng má jé lé é Sù gi, ngá é hí mai nyi to bê sù nghut é yanmai, ngá htoq je gyaú sù nghut ri.' nghû, ngò taí é sù gi, shí yuq nghut bê." gâ ri.

¹⁶ Yhâng é gumjup é jeju ahkaú mai, nga-nhúng banshoq bang gi, shimân jeju lé ralhûm htoq ralhûm myang yu nyi bê nghut lhê.

¹⁷ Hkâsu mù gâ lé, haú jep é tarâ gi, Mosheq é loq đông mai byi é nghut lhê; jeju eq tengmán hkyô kúm gi, Yesuq Hkrisduq é yanmai lé joq é nghut lhê.

18 Garai Gasang lé, ó yuq èq le a myang wú wú é nghut lhê; nghut kôlhang, haú Íwâ é tangkoí má lúng tô é, Yhang Zo zote gi, Garai Gasâng é gùng lé lhoq htoq shit bê nghut ri.

Wui-myhup Sará Yohan Hko Kyô É Hkyô
Mht 3:1-12; Mrk 1:1-8; Luk 3:15-17

19 Yerusalem wà mó mã é Yudaq byu pé gi, hkyangjông pé eq Lewiq byu pé lé, Yohan ó yuq nghut é hkyô myí nhang kat kô é hkûn, Yohan saksé hkâm é gi, a-ô mã é hkyô pé nghut ri.

20 Yhang gi, a hê a záu tô e za, "Ngò gi, Hkrisduq* a nghut." ga lhom taí kyô ri.

21 Haú hkûn, yhangmoq gi, "Haú nghut jáng, nàng gi, ó yuq nghut lhê lú? Nàng gi, Eliyaq lú?" ga myí kôjáng, yhang gi, "A nghut." ga taí ri; "Nàng gi, haú Myiqhtoi nghut lhê lú?" ga dum myí kôjáng, yhang gi, "A nghut." ga tú taí ri.

22 Haú mù, yhangmoq gi, "Ngamoq lé nhang kat bâng chyáng ló wó taí kyo rá matú, nàng gi, ó yuq nghut lhê lú? Náng gùng lé nàng hkâsu nghú lhê lú? Taí kyô wú laq." ga dum myí akô.

23 Haú hkûn, Yohan gi, myiqhtoi Esai-aq é dang eq rajung za, "Ngò gi, haú yoso má, 'Yhumsing é matú hkyô lhoq nyhang to keq.' gâ é htê lé, garú taí é sù nghut lhê."* ga tú taí ri.

24 Hparishe pé mai nhang kat é bang ra-am gi, yhang lé,

25 "Nàng gi, haú Hkrisduq le a nghut, Eliyaq le a nghut, Myiqhtoi le a nghut é nhîng, hai mù luí, wui-myhup hkâm byi nyi lhê lú?" ga dangmyi myí akô.

26 Haú hkûn, Yohan tú taí é gi, "Ngò gi, wui èq za wui-myhup hkâm byi lhê; nghut kôlhang, nungmoq a sê é sù rayuq nungmoq chyáng yap tô ri.

27 Yhang gi, ngá htâng má lé é sù yuq nghut bê; ngò gi, Yhâng é hkyî-tsung tui lé hpyí rá lhang a gingdán é nghut ri." gâ ri.

28 Shí pé banshoq gi, Yohan wui-myhup hkâm byi nyi é, Yodan làng hé hpoq mã é Behtani wà mã dut é hkyô pé chyat nghut ri.

Yesuq Gi, Garai Gasâng É Sauzo Nghut É Hkyô

29 Hau htang nyí, Yohan gi, yhâng chyáng Yesuq lé lo nyi é lé myàng luí, taí é gi, "Mingkan byu pé é yubak mara lé yu pyám byí é Garai Gasâng é Sauzo lé, wú keq!"

30 Shí yuq gi, 'Ngá é htâng má jé lé é Sù gi, ngá é hí má nyi bê sù nghut é yanmai, ngá htoq je gyaú Sù nghut ri.' nghú, ngò taí é sù yhang nghut bê.

31 Ngò gi, Yhang ó yuq nghut é lé a sê é nghut lhê, nghut kôlhang, Yhang lé, Israelaq byu pé wó sé kó sháng gaq nghú, ngò lé jé mù, wui èq wui-myhup hkâm byi nyi é nghut lhê." gâ ri.

32 Hau htâng, Yohan saksé hkâm é gi, "Haú Woi-nyí gi, mauhkûng mai hpûngkyui gunghkyâng sù é đông mai gyó lé mù, Yhâng chyáng lé nô tô é lé, ngò myàng ri.

33 Ngò gi, Yhang ó yuq nghut é lé a sê é nghut kôlhang, wui èq wui-myhup hkâm byi rá matú, ngo lé nhang kat é Sù, ngo lé taí kyô é gi, 'Haú Woi-nyí gyó lé lô mù, ó yuq chyáng lé nô tô é lé, nàng myàng jáng, haú yuq gi, haú Chyoiyúng Woi-nyí má wui-myhup hkâm byi rá sù nghut lhê.' gâ ri.

* 1:20 Grik dong *Hkrisduq* gâ é gi, xú but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê. ✨ 1:23 Esai 40:3

34 Haú eq rajung za ngò myàng bê nghut luí, shí yuq gi, Garai Gasâng é Yhangzo nghut lhê nghú, ngò saksé hkâm lhê." ga ri.

Sâng-hi Lhê É Chángzô Pé

35 Hau htang nyí, Yohan gi, yhâng é chángzo í yuq eq rahá, haú má dum nyi tó akò.

36 Haú hkûn, yhang gi, Yesuq lai ló nyi é lé myang kat jáng, "Hê, Garai Gasâng é sauzo lé, wú keq!" ga tai kat ri.

37 Chángzo haú í yuq gi, yhang haú su gâ é lé wó gyo kôjáng, Yesuq é htâng cháng bekò nghut ri.

38 Yesuq gi, lhing wú kat le, yhangnhik châng tô é lé myàng luí, "Nungnhik haí o akò lúhú?" ga myi jáng, yhangnhik gi, "Rabai ê, Nàng hkâmá nyi lhê lúhú?" ga tau myi kat akò nghut ri. (Rabai gâ é gi, Sará gâ é lichyúm nghut lhê.)

39 Haú hkûn, Yhang gi, "Lé keq, haú jáng, nungnhik myàng kó rá nghut lhê." ga tú tai ri.

(Haú-u gi, raxê hkyíng[†] kô nghut ri.) Haú mù luí, yhangnhik gi, châng ê mù, Yhang hkâmá nyi é lé, ê myàng kôluí, haú nyí buigyúm shoq, Yhang eq rahá é nyi nyi akò nghut ri.

40 Yohan tai é dang lé wó gyo luí, Yesuq htâng châng é su nhik má é rayuq gi, Simun Petruq é yhanggu Andre nghut ri.

41 Andre gi, yhangmang Simun lé hí myàng luí, "Nga-nhik gi, Mesaia lé myàng bê." ga yhang lé tai kyô ri. (Mesaia gâ é lichyúm gi, Hkrisduq gâ é nghut lhê.)

42 Hau htâng, yhang gi, yhangmang lé Yesuq chyáng shuí e ri.

Yesuq gi, Simun lé lhom myàng jáng, "Nàng gi, Yohan é yhangzo Simun nghut ri; Kehpa[‡] gâ é mying lé, nàng wó yú rá nghut lhê." ga tai ri. (Kehpa gâ é lichyúm gi, Petruq gâ é nghut lhê.)

Hpilip Eq Nahtanelaq Lé Hkyin Yu É Hkyô

43 Hau htang nyí, Yesuq gi, Galile mau shut ê rá matú, myit hpyit yú bê nghut ri. Yhang gi, Hpilip lé myàng jáng, "Ngá htâng cháng aq." ga tai ri.

44 Hpilip gi, Andre eq Petruq nhik nyi é Bet-saida wà mó má é byú nghut ri.

45 Yhang gi, Nahtanelaq lé myàng jáng, "Mosheq mai tará laiká má kâ tô é eq myiqhtoi pé mai le lhoq ang luí kâ tô é sù, Yosep é yhangzo, Nazaret wà byú Yesuq lé, ngamoq myàng bê." ga yhang lé tai kyô ri.

46 Haú hkûn, Nahtanelaq gi, "Nazaret wà ô! Haú mai, ge é jung haí wa wó htoq lhê lúhú?" ga myi jáng, Hpilip gi, "Ru lé wú aq." ga yhang lé tai ri.

47 Yesuq gi, Yhâng chyáng Nahtanelaq lé lo nyi é lé myàng jáng, yhang lé lhoq ang luí, "Wú keq, shí yuq gi, mhaú é myit a bo é sù, Israelaq byú akying rayuq nghut ri." ga tai ri.

48 Haú hkûn, Nahtanelaq gi, "Nàng, ngo lé hkâsu kut sé é lúhú?" ga myi jáng, Yesuq gi, "Nang lé, Hpilip eq a wut yú shimá, nàng, maihpáng gâm ô má ru nyi tô ashí hkûn, Ngò, nang lé myàng bê nghut lhê." ga tú tai ri.

49 Haú mù, Nahtanelaq gi, "Rabai ê, Nàng gi, Garai Gasâng é Yhangzo nghut ri; Nàng gi, Israelaq byu pé é Hkohlkâm le nghut ri." ga tai ri.

[†] 1:39 Raxê hkyíng gi, myinhtâng myi hkyíng záng ri. [‡] 1:42 Aramaik dang đông *Kehpa* gâ é eq Grik dang đông "Petruq" gâ é lichyúm gi, luqgok gâ é nghut lhê.

⁵⁰ Haú hkûn, Yesuq gi, "Ngò, nang lé, maihpáng gâm ô má myang é nghú taí kyô é yanmai, nàng lumjǐng lhê a nghut lúh? Hau htoq je kô é muzó pé lé, nàng myàng rã nghut lhê." ga taí ri.

⁵¹ Hau htàng, Yesuq xoq taí é gi, "Ngò, nungmoq lé teng za taí kôlê, mauhkúng bóng lô luí, haú Byu Yhangzô ahtoq má, Garai Gasàng é maumang lagyô pé doq lô gyó lô kut nyí kô é lé, nungmoq myàng kô rã nghut lhê." gã ri.

2

Wuì Lé Tsibiyiq Wing Dut Nhang É Hkyô

¹ Hau htàng, í nyi nghú rã nyi má, Galile mau má é Hkanaq và mó má, myiháng poi ralhúm joq ri. Haú má Yesuq é yhângnu le, bo lom ri.

² Yesuq eq Yhâng é chángzô pé lé le, myiháng poi haú má ji akô nghut ri.

³ Tsibiyiq wing jaú tũm to kô é hkûn, Yesuq é yhângnu gi, "Yhangmoq, tsibiyiq wing a wó lo kó nghut ri." ga, Yesuq lé taí ri.

⁴ Haú hkûn, Yesuq gi, "Ánu ê,* haú, nàng gi, Ngò eq haí sêng lhê lúh? Ngá é ahkyíng a jé shi é nghut lhê." ga tũ taí ri.

⁵ Nghut kôlhang, Yhâng nu gi, haú dui-nhâng zoshâng wuì lé, "Yhang haí taí le, haí kut keq." ga taí ri.

⁶ Haú nãm má, í sum xê galan kô wang é luqgok wúng hkyuq cham joq tô ri; haú gi, Yudaq byu pé mai, lhoq san lhoq yúng hkíng é matú, chung é jung wúng nghut ri.

⁷ Yesuq gi, haú dui-nhâng zoshâng wuì lé, "Wúng haú pé má wuì lhoq pyíng keq." ga taí ri; haú mù, yhangmoq gi, wúng haú pé má byíng shoq shoq lhoq pyíng bekô nghut ri.

⁸ Hau htàng, Yhang gi, yhangmoq lé, "Ahkuí, ratsuí hkû yù mù, poi-up lé yu ló byi keq." ga taí jáng, yhangmoq gi, yu ló byí akô nghut ri.

⁹ Poi-up hpó gi, wuì mai dut é tsibiyiq wing haú lé, shuq chyam wú ri; wuì hkam é dui-nhâng zoshâng wuì gi, tsibiyiq wing haú hkâmai lo é hkyô lé sê to kôlhang, yhang gi, a sé nghut ri. Haú mù, yhang gi, lusik lé, ji yu luí,

¹⁰ "Yuq hkangmó gi, tsibiyiq wing mún lé hí jaú mù, bíng pé shuq gyí bùm jáng sheq, tsibiyiq wing apyáng lé ru yu htoq lhê; nghut kôlhang, nàng gi, nghâm é tsibiyiq wing lé, ahkuí jé shoq wó hkong tô ri-nhung!" ga taí ri.

¹¹ Galile mau má é Hkanaq và mó má, Yesuq tũn shit é limik kumlhá gi, Yhang kut é limik kumlhá pé má é sâng-hí dãm nghut ri. Yhang gi, Yhâng é hpungwup shingkang lé, haú dông lhoq htoq shit é nghut mù luí, Yhâng é chángzô pé gi, Yhang lé lumjǐng bum akô nghut ri.

Noqkuq Yhũm Lé Lhoq Sansêng Pyâm É Hkyô

Mht 21:12-13; Mrk 11:15-17; Luk 19:45-46

¹² Hau htàng má, Yesuq gi, Yhâng nu, Yhâng gu yuqzo pé eq Yhâng é chángzô pé le mù, Kaperna-um và má gyó lô ri; yhangmoq gi, haú má buinyí myi ngò nyí nyi akô nghut ri.

¹³ Yudaq byu pé é Lhoqlhai Poi jé rã nghut é hkûn, Yesuq gi, Yerusalem và mó má doq lô ri.

¹⁴ Haú hkûn, noqkuq yhũm wàng má, nojũng, sau, hpũngkyui pé lé ùng nyi é bang lé le, siboí má ngùn htaí zô zung nyi é bang lé le, Yhang lô myàng ri.

* 2:4 Ánu é gã é lé, Griek dông gi, "Myiwe myhi ê" ga bo tô é nghut lhê.

15 Haù mù, Yhang gi, tui lé, nhuq râ wase saí yù mù, banshoq bang lé le, sau eq nojúng lé le, haù noqkuq yhùm wàng mai hkat htoq lui, ngùn htaí zo bâng é ngùn htingchap lé gi, tû hut pyám byi mù, yhangmoq é siboí lé gi, tu nhuq pyám byí ri;

16 haù hpúngkyui ung zô é bang lé le, "Zè shi pé lé yu htoq ló keq! Ngá Wá é yhùm lé, hpugá jowò hkâkut kó!" ga lui nhik-yô ri.

17 Haù mù, Yhâng é chángzô pé gi, "Ngò, Nàng é yhùm lé chyitdap kâng tuí é hkyô gi, Ngo lé myi su nyhê jôm pyám râ nghut lhê."✧ ga kê tô é lé, myit bûn kat akô nghut ri.

18 Yudaq byu pé gi, Yhang lé, "Nàng, shí pé kut râ ahko ahkáng wó é hkyô lé saksé tún shit râ matú, ngamoq lé, hái jung limik kumlhá wó tún shit râ lú?" ga chôm myí akô nghut ri.

19 Haù hkûn, Yesuq gi, "Noqkuq yhùm shí lé nungmoq hpyoq pyám keq, sum nyí gyoro má, Ngò, haù lé dum tu shap râ nghut lhê." ga, yhangmoq lé tû taí ri.

20 Haù Yudaq byu pé gi, "Noqkuq yhùm shí lé, myi xe hkyuq zân tup saí é ru nghut lhê; sum nyí gyoro má za, Nàng wó tu shap râ lú?" ga tu myí akô nghut ri.

21 Nghut kôlhâng, Yesuq taí é noqkuq yhùm gi, Yhâng é gùng lé lhoq ang lui taí é nghut ri.

22 Haù mù, Yhang, shí é mai lhoq dui toq hui é hkûn sheq, Yhâng é chángzô pé gi, Yhang haù su ga taí é dang lé myit bun kômù, Chyúmdang lé le, Yesuq taí é dang pé lé le, lumjúng akô nghut ri.

23 Haù Lhoqlhai Poí nghut é u lé, Yerusalem wà mó má Yesuq nyi nyi é hkûn, byù myo myo gi, Yhang kut shit é limik kumlhá pé lé myàng kômù, Yhang lé lumjúng bum akô nghut ri.

24 Nghut kôlhâng, Yesuq gi, byù lhunglhâng bâng é myit lé sê é yanmai, yhangmoq chyáng, Yhânggùng lé a ap to nghut ri.

25 Yhang gi, byu é i-myit unghkaù má hái lúng tô é lé sê é yanmai, byù yhangchang saksé hkám byí é a ra nghut ri.

3

Nikodimu Lé, Yesuq Mhoqshit É Hkyô

1 Nikodimu gâ é Hparishe rayuq nyi ri; yhang gi, Yudaq byu pé é byin tú wadoq má bo é sù nghut ri.

2 Yhang gi, myín lé, Yesuq chyáng lé mù, "Rabai ê, Nàng gi, Garai Gasâng chyáng mai lé é sará rayuq nghut é lé, ngamoq sê lhê. Hkâsu mù gâ le, Nàng kut shit é limik kumlhá pé gi, Garai Gasang a lom é nghut jáng, ó yuq le wó kut râ a nghut." ga taí ri.

3 Haù hkûn, Yesuq gi, yhang lé, "Ngò, nàng lé teng za taí kyo lé, ó yuq nghut kôle, dum hku é hui sù za a nghut le gi, Garai Gasâng é mingdán lé wó myàng râ a nghut." ga tû taí ri.

4 Haù jáng, Nikodimu gi, "Ipyat kó bê é byù gi, dum hkû é hkâsu kut wó hui râ lú? Ínú é unghkaù má dum wàng mù, dum hku é hui râ gi, gè gè yhang wó dut râ a nghut!" ga taí ri.

⁵ Haù hkûn, Yesuq gi, "Ngò, nàng lé teng za taí kyo lé, ó yuq nghut kôle, wui eq Woi-nyí mai hku kat é hui sù za a nghut le gi, Garai Gasâng é mingdán má wó wâng rà a nghut.

⁶ Gungsho mai hku kat é gi, gungsho nghut ri; Woi-nyí mai hku kat é kúm gi, woi-nyí nghut ri.

⁷ 'Nungmoq gi, dum hku é hui rà lhê' nghù Ngò taí é dang lé, nàng hkâmaù nyí.

⁸ Haù, lai gi, yhang nau é shut ló lhê. Lai lò htê lé nàng wó gyo kôlhang, lai hkâmai lo é eq, hká shut ló é lé, nàng sé rà a nghut; haù Woi-nyí mai hku kat huí é sù, ó yuq nghut kôle, haù eq rajung za nghut lhê." ga tù taí ri.

⁹ Haù hkûn, Nikodimu gi, "Haù gi, hkâsu wó dut rà lúhú?" ga myí ri.

¹⁰ Yesuq tù taí é gi, "Nàng gi, Israelaq byu pé é sará rayuq nghut to luí nhing, haù hkyô pé lé a sê gyo lúhú?

¹¹ Ngò, nang lé teng za taí kyo lé, ngamoq gi, ngamoq sê é hkyô lé taí mù, ngamoq myang wú bê lé saksé hkâm lhê; nghut kôlhang, nungmoq gi, ngamoq é saksé lé a hap yù kó nghut ri.

¹² Ngò gi, nungmoq lé, mingkan eq sêng é hkyô lé taí kyô le lhang, a lumjínng kô é nghut le gi, mauhkûng mingdán eq sêng é hkyô lé taí kyô é nghut le gi, hkâsu kut wó lumjínng kó rà lúhú?

¹³ Mauhkûng mingdán mai gyó lo é sù, haù Byu Yhangzo mai lai luí, mauhkûng mingdán má ó yuq lhang wó doq ló wú é a nghut.

¹⁴ Mosheq gi, yoso má lhangmui lé tu shap tô é su, haù Byu Yhangzo le tu shap tô é hui rà rà nghut lhê.

¹⁵ Haù mù, haù Byu Yhangzo lé lumjínng é yuq hkangmó gi, ahtum abyuq é asak wó yù rà nghut lhê.

¹⁶ Hkâsu mù gà le, Garai Gasang gi, mingkan lé gyai yhang chyyitdap é yanmai, Yhang Zo lé lumjínng é sù ó yuq nghut kôle, htên byoq é a huí e za, ahtum abyuq é asak wó yù sháng gaq ga, rayuq za é Yhâng é Zote lé byí pyám bê nghut ri.

¹⁷ Hkâsu mù gà le, Garai Gasang gi, mingkan lé mara byi rà matú, Yhang Zo lé mingkan htoq má nhang kat é a nghut é za, Yhang é yanmai mingkan hkyyi yu é hui rà matú sheq nhang kat é ru nghut lhê.

¹⁸ Yhang lé lumjínng é sù gi, mara byí é hui rà a nghut; nghut kôlhang, Yhang lé a lumjínng é sù kúm gi, Garai Gasâng é Yhangzo zote lé a lumjínng é sù nghut é yanmai, mara byí é huí to gù bê nghut ri.

¹⁹ Maubó gi, mingkan htoq má lé jé to bê; nghut kôlhang, byu pé kut é hkyô gi, agè ashop hkyô nghut é yanmai, yhangmoq gi, maubó lé chyyit rà malaí, mauchut lé chyyit akô nghut ri; haù gi, mara byí é hui rà hkyô yhang nghut ri.

²⁰ Agè ashop hkyô kut é sù ó yuq nghut kôle, maubó lé a ngui nghut ri; haù yuq gi, yhang kut é hkyô lhoq byóng htoq kat rà lé gyuq é yanmai, haù maubó shut lé lô rà a nghut.

²¹ Nghut kôlhang, haù tengmán hkyô dông asak dui é sù ó yuq le, yhumsing kut é hkyô gi, Garai Gasang lom é hkyô lé, san za byu-myàng sháng gaq ga, haù maubó shut lé lo ri." gà ri.

Yesuq Eq Séng Luí, Wui-myhup Sará Yohan Saksé Hkâm É Hkyô

²² Hau htâng má, Yesuq gi, Yhâng é chángzô pé eq rahá, Yuda mau shut wang ló mù, haù má rayoq zo nyi luí, wui-myhup hkâm byí ri.

²³ Haú u lé, Yohan gi, Salim nàm mã é E-nun gà é jowò má, wui gyai myo joq é yanmai, wui-myhup hkám byí nyi ri; byu pé gi, abyit alan lé lò kòmù, wui-myhup lé hkám yu nyi bum akò nghut ri.

²⁴ (Haú gi, Yohan lé htóng a lhoq hkyó shí é hkun lhê é hkyô nghut ri.)

²⁵ Haú hkûn, Yohan é chángzò pé ra-am eq Yudaq byù rayuq gi, lhoq san lhoq yúng hkíng eq séng luí, dang htíng htíng lhùm bum akò nghut ri.

²⁶ Hau htàng, yhangmoq gi, Yohan chyáng lé luí, "Rabai ê, Yodan làng hé hpoq shut nàng eq rahá nyí luí, nàng eq saksé hkám byí é Sû gi, ahkuí, wui-myhup hkám byí nyi é nghut mù, yuq hkangmó gi, Yhâng chyáng e bum akò nghut ri mhai." ga, yhang lé tai akò.

²⁷ Haú eq séng luí, Yohan tú tai é gi, "Byù rayuq gi, mauhkúng mai byí é za a nghut jáng, hai le wó hap yù rà a nghut.

²⁸ Ngò gi, Hkrisduq a nghut, Yhang é hí má nhang kat huí é sù za nghut lhê.' nghù, ngò tai é lé, nungmoq yhang saksé nghut bum akò.

²⁹ Myisik wó é sù gi, lusik nghut ri. Lusik lé, láng yap tò é luzúm hpó gi, lusik é htê lé wó gyô é yanmai, gyai yhang gabú nyi ri. Haú sù é gabú hkyô gi, ngá é gabú hkyô nghut mù, ngò má byíng jup nyí bê nghut ri.

³⁰ Yhang gi, kò jat lò ra rà nghut lhê; ngò gi, yom ló ra rà nghut lhê.

³¹ Ahtoq mai lé é Sû gi, lhunglhâng é ahtoq má nghut ri; myigùng htoq mã é sù kúm gi, myigùng htoq eq séng é nghut luí, myigùng htoq eq séng é dông za tai ri; mauhkúng mai lé é Sû gi, lhunglháng é ahtoq má nghut ri.

³² Yhang gi, wó myàng wó gyô é hkyô lé, saksé hkám kôlháng, Yhang hkám é saksé lé, ó yuq le a hap yù kò nghut ri.

³³ Yhâng é saksé lé hap yu é sù kúm gi, haú Garai Gasang gi, tengmán sù nghut ri ga, saksé shit é sù nghut bê.

³⁴ Garai Gasâng eq nhang kat é huí Sû gi, Garai Gasâng é mungdang lé tai ri; hkâsu mù gà le, Garai Gasang gi, haú Woi-nyí lé, laké a kat e za byí é yanmai nghut ri.

³⁵ Haú Íwa gi, Zo lé chyitdap luí, jung hkangmó lé Yhâng é loq má ap byi bê nghut ri.

³⁶ Haú Zo lé lumjíng é sù ó yuq nghut kôle, ahtum abyuq é asak wó lhê; nghut kôlháng, haú Zo lé he-ngik pyâm é sù ó yuq nghut kôle, asak haú lé myàng rà a nghut; hkâsu mù gà le, Garai Gasâng é nhikmo-yo hkyô gi, yhâng chyáng ru joq nyi ri." gà ri.

4

Yesuq Eq Samariq Myhí Huí É Hkyô

¹ Yesuq gi, Yohan htoq má, chángzo je lhoq myô é eq wui-myhup hkám byí nyi ri gà é hkyô lé, haú Hparishe pé wó gyô akò nghut ri.

² (Nghut kôlháng, gè gè ga jáng, Yesuq gi, Yhang wui-myhup hkám byí é a nghut, Yhâng é chángzò pé sheq ru nghut akò.)

³ Haú hkyô lé, Yesuq sé jáng, Yhang gi, Yuda mau mai htoq mù, Galile mau shut dum tau ló bê nghut ri.

⁴ Ahkuí, Yesuq gi, Samariq mau mai sô lai ló rá dut bê nghut ri.

⁵ Haú mù, Yhang gi, Yakup mai yhang zo Yosep lé byí é maumyí rajap eq chyáng lhùm é, Suhka ga myhíng é, Samariq mau mã é wà mó ralhùm má lo jé ri.

⁶ Haú má, Yakup é wuìtung le joq to luí, Yesuq gi, hkyô sô ngu é yanmai, wuìtung hau é nàm má zung gyó tô ri. Haú u gi, nyí-káng raxe í hkyíng* nghut bê nghut ri.

⁷ Haú hkûn, Samariq myiwe myhí rayuq wui lé hkam ri; Yesuq gi, yhang lé, "Ngo lé wui byi shuq laq." ga tai ri.

⁸ (Haú u gi, Yhâng é chángzô pé, zoshuq wui rá matú wà hkaú shut e byuq kô é ahkyíng nghut ri.)

⁹ Haú Samariq myiwe myhí gi, Yhang lé, "Nàng gi, Yudaq byu rayuq nghut to luí nhîng, ngò Samariq myiwe myhí chyáng, haí mù shuq wui dúng lhê lú?" ga tai ri. (Hkâsu mù gâ le, Yudaq byu pé gi, Samariq byu pé eq a zùm yap kó nghut ri.)

¹⁰ Haú hkûn, Yesuq gi, yhang lé, "Nàng gi, haú Garai Gasâng é chyunghuq lé le, nang lé wui dung sù ó yuq nghut é lé le, sê é nghut le gi, noq mai Yhang lé dúng tóngbán luí, Yhang gi, nang lé asak-wui byi berâ nghut lhê." ga tú tai ri.

¹¹ Myiwe myhí haú gi, "Yhumsîng ê, Nàng gi, wui hkâm rá zè haí le a wó, wuìtung le nik ri; haú asak-wui lé, Nàng hkâmâ é wó yú rá lú?"

¹² Ngamoq é íwa Yakup gi, ngamoq lé wuìtung shî byí to bê nghut lhê; yhang yhang le, yhang zo pé le, yhang rém é dusak pé le, wuìtung shî mâ é wui shuq bekô nghut ri; Nàng gi, Yakup htoq je kô lhê lú?" ga Yhang lé tai ri.

¹³ Yesuq gi, "Wui shî lé shuq é sù ó yuq le, wuìshit é dum hui rá nghut lhê.

¹⁴ Nghut kôlhang, Ngò byí é wui lé shuq é sù ó yuq nghut kôle, wuìshit é hkâ-nhâm a hui lo rá nghut lhê. Ngò byí é wui haú gi, haú yuq má, ahtum abyuq é asak matú wuibúm dut rá nghut lhê." ga yhang lé tú tai ri.

¹⁵ Myiwe myhí haú gi, Yhang lé, "Yhumsîng ê, ngò gi, wui le a shit lo, shî má wui hkâm le a lé ra lo sháng gaq, wui haú ngo lé byi laq." ga tai ri.

¹⁶ Haú hkûn, Yesuq gi, "Ló mù, nung làng lé ló wut lò aq." ga, yhang lé tai ri.

¹⁷ Yhang gi, "Ngò, làng a wó." ga tai jáng, Yesuq gi, yhang lé, "Nàng, làng a wó gâ é gi, têng ri.

¹⁸ Hkâsu mù gâ le, nàng gi, yuqgè ngo yuq wó wú bê sù nghut ri; nàng, ahkuí wó tô é yuqgè le nung làng a nghut. Nàng gi, têng é dang tai bê nghut ri." ga tai ri.

¹⁹ Haú hkûn, myiwe myhí haú gi, "Yhumsîng ê, Nàng gi, myiqhtoi rayuq nghut é hkyô lé, ngò wú sé bê.

²⁰ Ngamoq é íchyí íwâ pé gi, bùm shî má noqkuq kô é nghut lhê; nghut kôlhang, nungmoq Yudaq byu pé gi, Yerusalem wà mó za noqkuq jowò nghut lhê ga tai akò nghut ri." ga tai ri.

²¹ Haú hkûn, Yesuq tai é gi, "Myiwe myhí ê, Ngo lé jing aq; bùm shî má le a nghut, Yerusalem wà mó má le a nghut e za, haú íwa lé noqkuq rá ahkyíng, jé lò nyi bê nghut ri.

²² Nungmoq Samariq byu pé gi, yhumsîng lháng a sê é lé, noqkuq akô; ngamoq kúm gi, ngamoq sê é lé noqkuq lhê; hkâsu mù gâ le, hkyi yù hkyô gi, Yudaq amyú mai lo é nghut lhê.†

²³ Nghut kôlhang, haú têng é dông noqkuq é bang gi, woi-nyí mai le, tengmán hkyô mai le, haú íwa lé noqkuq rá ahkyíng gi, jé lo nyi bê nghut luí, ahkuí

* 4:6 Nyí-káng raxe í hkyíng gi, Yudaq byu pé é hkyuq hkyíng nghut ri. † 4:22 Bun zo shî má, Yesuq tai nau é gi, hkyi yù hkyô lé, Garai Gasang gi, Yudaq byu pé dông danggidig byi to é nghut é lé tai nau é nghut ri.

lhang jé to bê nghut ri; hkâsu mù gâ le, haû Îwa gi, haû su kut noqkuq é bang lé ô nau ri.

²⁴ Garai Gasang gi, woi-nyí nghut lhê; haû mù, Yhang lé noqkuq é bang gi, woi-nyí mai le, tengmán hkyô mai le, noqkuq ra râ nghut lhê." ga tai ri.

²⁵ Myiwe myhí haû gi, "Hkrisduq gâ é Mesaia jé lé râ nghut é lé gi, ngò sê lhê. Yhang jé lé jáng, nga-nhúng lé banshoq tai sân kyo râ nghut lhê." ga tai ri.

²⁶ Hau htâng, Yesuq gi, "Nàng eq dang nyo nyi é sù ngò gi, haû yuq nghut lhê." ga tai ri.

Haû Chángzô Pé Dum Taû Jé Lo É Hkûn Lhê Hkyô

²⁷ Haû u lé, Yhâng é chángzô pé gi, dum taû jé lo bum akò; yhangmoq gi, Yesuq, myiwe rayuq eq dang nyo nyi é lé lo myàng luí, maú byuq bum akò. Nghut kôlhang, "Nàng, haí ô ri lú?" ga le, "Haí mù Yhang eq dang nyo nyi lhê lú?" ga le, Yhang lé ó yuq a myi kó nghut ri.

²⁸ Hau htâng, myiwe myhí haû gi, yhâng é wui yambú lé tô pyâm to luí, wà shut taû wang ló mù, wà byù wui lé ló tai kyô é gi,

²⁹ "Ngò kut lai lò bê hkyô pé lunglhang lé, tai kyô é byù rayuq lé, lé wú keq! Yhang gi, Hkrisduq nghut lhê abe?" gâ ri.

³⁰ Haû mù, yhangmoq gi, wà mai htoq lé luí, Yesuq chyáng lé lo bum akò nghut ri.

³¹ Haû u lé, Yhâng é chángzô pé gi, Yhang lé, "Rabai ê, zoshuq zo aq." ga chòm tai akò.

³² Haû hkûn, Yhang gi, yhangmoq lé, "Nungmoq a sê é jung zoshuq zo râ Ngò wó lhê." ga tai ri.

³³ Haû mù, Yhâng é chángzô pé gi, "Yhang lé, rayuq yuq eq zoshuq lé dé byí é abe?" ga, rayuq eq rayuq tai lhum bum akò.

³⁴ Haû hkûn, Yesuq tai é gi, "Ngo lé nhang kat Sû ô nau é hkyô lé kut râ eq Yhâng é muzó jizó lé lhoq pán râ hkyô gi, Ngá é zoshuq nghut bê.

³⁵ 'Kyôshu yoq jé râ gi, lhamó myi hkyap râ ashí.' ga, nungmoq lhaq tai lhê a nghut kó lú? Ngò, nungmoq lé tai kôlé, nungmoq é myoq hpóng luí, haû yò pé má wú kat wú keq! Kyôshi gi, myhíng luí, kyô shu yoq gi, jé to bê nghut ri.

³⁶ Haû kyô hkyó sù eq kyô shu sù gi, rahá wó gabú kó sháng gaq ga, ahkuí lhang, haû kyô shu sù gi, yhâng é zuihpau lé myang yù luí, ahtum abyuq é asak é matú, kyôshi shú tsíng to bê nghut ri.

³⁷ Haû su mù, 'Rayuq gi, sân hkyó, góyuq gi, shù yù.' gâ é sanghkyang gi, têng ri.

³⁸ Nungmoq a zui sai tô é jang mã é shù yù râ matú, nungmoq lé Ngò nhang kat bê nghut lhê. Góbang gi, haû má wum kat zui sai to bê nghut mù, nungmoq gi, haû bang zui sai é akyù lé shu yù bekò nghut ri." gâ ri.

Samariq Byù Myo Myo Lumjíng Kô É Hkyô

³⁹ "Yhang gi, ngò kut lai lò bê hkyô lunglhang lé, tai kyô ri." ga luí, myiwe myhí haû saksé hkâm é yanmai, haû wâ mã é Samariq byù myo myo gi, Yesuq lé lumjíng bùm bekò nghut ri.

⁴⁰ Haû mù, Samariq byu pé gi, Yesuq chyáng lé jé kômù, yhangmoq eq nyi râ matú, Yhang lé lung kô é yanmai, Yhang gi, í nyí bo nyi bê nghut ri.

⁴¹ Yhâng é dang pé é yanmai, byù myo myo gi, lumjíng bang dut jat lò bekò nghut ri.

⁴² Yhangmoq gi, myiwe myhí haù lé, "Ahkuí, ngamoq lumj́ing é gi, nàng taí é dang yanmai za a nghut lo; ngamoq yhang wó gyo bê nghut é htoq agó, shí yuq gi, gè gè yhang, mǐngkan é hkyi yù Sù nghut é lé, ngamoq sé bê nghut é yanmai nghut lhê." ga chôm taí akô nghut ri.

Mingsuwún Hpó É Yhangzo Lé Lhoq Gê Byí É Hkyô
Mht 8:5-13; Luk 7:1-10

⁴³ Í nyí lai jáng, Yesuq gi, haù mai Galile mau shut htoq e ló bê nghut ri.

⁴⁴ "Myiqhtoi gi, yhumsing é mau má myoqdong a wó wú é nghut lhê." ga, Yesuq yhang saksé hkâm é nghut lhê.

⁴⁵ Yesuq gi, Galile mau má jé é hkún, Galile byu pé gi, Yhang lé lhom hkulum yu akô; yhangmoq gi, Yerusalem và mó má, Lhoqlhai Poí ê lòm kô é nghut é yanmai, poí u lé, Yesuq kut é hkyô lhunglhang lé, myàng kô é bang nghut ri.

⁴⁶ Yesuq gi, Yhang mai haù wui lé tsibiyiq wing dut nhang é, Galile mau má é Hkanaq và mó má, ê dum kúm ri. Haù mǐng suwún rayuq é yhangzo yuqzo gi, Kaperna-um và má no nyi ri.

⁴⁷ Yesuq gi, Yuda mau mai Galile mau má jé lé bê gâ é hkyô lé, mǐng suwún haù wó gyo jáng, yhang gi, Yesuq chyáng é mù, shí-nò no nyi é yhangzo lé, lé lhoq gê byi râ matú, Yhang lé dúng tóngbán ri.

⁴⁸ Haù hkún, Yesuq gi, yhang lé, "Byù nungmoq gi, limik kumlhá pé eq mauho muzó pé lé za a myàng kô é nghut le gi, hkâ-nhám lé lumj́ing kó râ a nghut." ga taí ri.

⁴⁹ Mingsuwún haù gi, "Yhumsing ê, ngá zo a shí shimá gyó lé laq." ga taí ri.

⁵⁰ Haù hkún, Yesuq gi, "Nàng wó ló bê; nung zo byùn râ nghut lhê." ga tú taí ri.

Suwún haù gi, Yesuq taí é dang haù lé gyô j́ing luí, tau ló bê nghut ri.

⁵¹ Yhang gi, hkyô má ru nghut nyi ashí hkún, yhang é dui-nhang zoshâng wui gi, yhang lé lé hui luí, zoshâng haù gè byuq é hkyô, lé taí kyô akô nghut ri.

⁵² Yhang gi, yhang zo hkâ-nhám gè byuq é ahkyíng lé myi wú é hkún, yhangmoq gi, "A-nyí nap nyí hkyuí rahkyíng má, gùng nyé é châm ló byuq bê nghut ri." ga taí kyô akô.

⁵³ Haù hkún, ahkyíng haù gi, "Nung zo byùn râ nghut lhê." ga, yhang lé, Yesuq taí é ahkyíng nghut é lé, haù yhangwa bún sé bê nghut ri. Haù mù, yhang eq yhang yhumbyù banshoq bang gi, lumj́ing bekô nghut ri.

⁵⁴ Haù gi, Yesuq, Yuda mau mai Galile mau má jé lé é htàng, í dâm nghù râ dá kut shit é limik kumlhá nghut ri.

5

Wuihtum Yàm Má, Nòhpyo Lhoq Gê Byí É Hkyô

¹ Hau htàng a myáng má, Yudaq byu pé é poi ralhúm joq é yanmai, Yesuq gi, Yerusalem và mó má doq ló ri.

² Ahkuí, haù Yerusalem và mó é Sau Hkúmdong nàm má, Hebre myíng đông gi, Betzahta ga myhíng é wuihtum ralhúm joq ri; hau é lhíngkyuq má, jirop ngo lhum joq tô ri.

³ Jirop haù pé má, myoqjit bang, hkyí hten bang, gùngjum shí bang ajùm ayò leq tô bum akô. (Hau bang gi, wui dui nún râ lé láng tô é bang nghut akô.

4 Hkâsu mù gâ le, haù Yhumsing é maumang lagyo gyó lé lé kut mù, wui lé, lé lhu nhún jáng, wuihtum haù má hí wó wang é sù gi, haì jung ana wa dap to kôlhang, ge byuq é huí é yanmai nghut ri.)*

5 Súm xe shit zân tup no nyi é byù rayuq le, haù má bo tô ri.

6 Yesuq gi, haù yuq no leq tô é lé myàng mù, haù su no nyi é gyai myáng bê nghut é hkyô lé sé jáng, yhang lé, "Nàng, gè nau ri lúh?" ga myí ri.

7 Nò sù haù yuq gi, "Yhumsing é, wui dui nún lo é hkûn, wuihtum má wàng râ matú, ngo lé garúm râ byù ó a nyi; ngò wàng râ nghú jáng, góyuq hí, ngá hí má wàng wàng dut ri." ga tú taí ri.

8 Hau htâng, Yesuq gi, yhang lé, "Toq aq! Nàng é taphkang yu chùng luí, sô ló aq." ga taí ri.

9 Haù yuq gi, radá dâm nò ge byuq bê nghut luí, yhâng é taphkang yù mù, sô ló bê nghut ri.

Haù nyí gi, Bánno buinyi nghut ri.

10 Haù mù, Yudaq byu pé gi, haù nò ge byuq é hui sù lé, "Hkû-nyí gi, Bánno buinyi nyí nghut é yanmai, nàng, taphkang waq é gi, tará lu lai bê nghut ri." ga taí akô.

11 Nghut kôlhang, yhang tú taí é gi, "Haù ngo lé lhoq gè byi sù gi, ngo lé, 'Nàng é taphkang yu chùng mù, sô ló aq.' ga taí é nghut lhê." gâ ri.

12 Haù mù, yhangmoq gi, "'Nàng é taphkang yu chùng mù sô ló aq.' ga, nang lé taí é sù gi, ó yuq wá nghut ri lúh?" ga myí akô.

13 Nghut kôlhang, haù ó yuq nghut é lé, nò ge byuq é hui sù gi, a châng sê kat nghut ri; hkâsu mù gâ le, Yesuq gi, haù má é byù moq mó má wang nyó ló byuq é yanmai nghut ri.

14 Htâng má, Yesuq gi, haù yuq lé noqkuq yhùm má myàng jáng, "Wú aq, nàng wángzán bê nghut ri; hí lhê htoq má je wuihke é hkyô a hui zo sháng gaq, mara hkâkut shut lo." ga luí, yhang lé taí ri.

15 Haù yuq gi, htoq ló mù, yhang lé lhoq gè byí é sù gi, Yesuq nghut ri ga, Yudaq byu pé lé taí kyô ri.

Asak Wó Yù Râ Hkyô

16 Haù mù, Yudaq byu pé gi, Bánno buinyi nyí má, Yesuq, haù hkyô kut é yanmai, Yhang lé gunjang lo akô nghut ri.

17 Haù hkûn, Yesuq gi, yhangmoq lé, "Ngá Wa gi, hkû-nyí jé shoq, hkâ-nhám le mù zúí nyi é nghut mù, Ngò le mù zúí nyi lhê." ga taí ri.

18 Haù mù luí, Yesuq gi, Bánno buinyi lé lhoq htên é htoq agó, Garai Gasang lé lhang, Yhâng Wa ga wut é đông, yhumsing gùng lé, Garai Gasang eq lhoq whuí é yanmai, Yudaq byu pé gi, Yhang lé sat pyám râ matú, je riyhang shikut lo akô nghut ri.

19 Yesuq, yhangmoq lé tú taí é gi, "Ngò, nungmoq lé teng za taí kôlé, haù Zo gi, yhumsing é myit đông haì le a wó kut; Yhâng Wa kut é hkyô lé myang é gù za wó kut é nghut lhê; hkâsu mù gâ le, haù Íwa kut é hkyô lé za, haù Zo châng kut é yanmai nghut lhê.

20 Hkâsu mù gâ le, haù Íwa gi, Zo lé chyitdap é nghut luí, Yhang kut é hkyô lunglhang, haù Zo lé tún shit ri; nungmoq maù hông shoq, shí pé htoq je ko é hkyô pé lé lhang, haù Zo lé tún shit shirâ nghut lhê.

* 5:4 Bun zo 3 lhum má é ahtang túm eq bun zo 4 lhum gi, chyúmding myo myo má a bo é nghut lhê.

21 Haù Íwa gi, shí bê bang lé lhoq dui toq mù, yhangmoq lé asak byí é eq rajung za, haù Zo le, Yhang byí nau é bang lé, asak byi râ nghut lhê.

22 Hau htoq agó, haù Íwa lé hkunggâ é eq rajung za, haù Zo lé le, lhunglhâng bang hkungga kó sháng gaq ga, haù Íwa gi, ó yuq lé le a jéyáng e za, jéyáng é hkyô lhunglhâng, haù Zo lé lum to bê nghut ri.

23 Haù Zo lé a hkunggâ é sù gi, haù Yhang lé nhang kat é sù Íwa lé le, a hkunggâ é sù nghut ri.

24 Ngò, nungmoq lé teng za tái kôlé, Ngá dang lé gyo luí, Ngo lé nhang kat é Sù lé lumjíng é sù, ó yuq nghut kôle, mara byí é a hui e za, ahtum abyuq é asak wó é nghut lhê; haù yuq gi, shi é mai lut luí, asak dui bê sù nghut ri.

25 Ngò, nungmoq lé teng za tái kôlé, haù Garai Gasâng é Yhangzô é htê lé, shi byuq bê bang wó gyo râ ahkyíng gi, jé lo nyi bê nghut ri; ahkuí lháng jé to bê nghut ri. Htê haù lé gyô é bang gi, asak dui kó râ nghut lhê.

26 Hkâsu mù gâ le, Garai Gasang gi, Yhânggùng má yhang, asak bo é eq rajung za, Yhang Zo lé le, Yhânggùng má yhang, asak bò nhang é yanmai nghut ri.

27 Hau htoq agó, Yhang gi, haù Byu Yhangzo nghut é yanmai, Garai Gasang gi, tarâ jéyáng râ ahko ahkáng, Yhang lé byi bê nghut ri.

28 Shí hkyô lé hkâ-maú hong nyi kó: lup pé má lúng tô é bang banshoq gi, Yhâng é htê lé wó gyo kôluí, htoq ló râ ahkyíng jé lò râ nghut lhê.

29 Ge é hkyô kut é bang gi, asak dui râ matú, dui toq kó râ nghut lhê; agè ashop hkyô kut é bang gi, mara byí é hui zo râ matú, dui toq kó râ nghut lhê.

30 Ngò gi, Ngá myit đông mai haí le a wó kut é nghut lhê; Ngò wó gyô yu é eq rajung za sheq, jéyáng é nghut luí, Ngò jéyáng é hkyô gi, tengmán lhê; hkâsu mù gâ le, Ngò gi, Ngò ô nau é đông châng é a nghut e za, Ngo lé nhang kat é Sù ô nau é đông châng é sheq ru nghut lhê.

Yesuq Eq Séng Luí, Saksé Hkâm É Hkyô

31 Ngá gùng lé ngò saksé hkâm é nghut jáng, ngò za saksé hkâm é hkyô gi, teng râ a nghut.

32 Ngá é hkyô lé saksé hkâm byí é Sù (Ngá Wa) góyuq nyi lhê; Ngò eq séng luí, haù yuq hkâm é saksé gi, têng é hkyô lé, Ngò sê lhê.

33 Nungmoq gi, Yohan† chyáng byù nhang kat wú bekô nghut ri; yhang gi, haù tengmán hkyô lé saksé hkâm byi bê nghut lhê.

34 Ngò gi, xângzo byu pé mai saksé hkâm byi râ lé, ra luí a nghut, nghut kôlhang, nungmoq hkyi yu é wó hui râ matú sheq, haù su nghù tái é ru nghut lhê.

35 Yohan gi, duq nyi é myibung su duqbó byí é nghut mù luí, nungmoq gi, haù duqbó é hkaú má, rayoq zo ngón nau nyi akô nghut ri.

36 Nghut kôlhang, Ngò wó é saksé gi, Yohan byí é saksé htoq je kô lhê; hkâsu mù gâ le, ahkuí Ngò zui saí nyi é muzó gi, Ngò lhoq pán râ matú, haù Íwa, Ngo lé ap byí tô é nghut luí, haù Íwa, Ngo lé nhang kat é hkyô lé, saksé hkâm byi nyi ri.

37 Hau htoq agó, haù Ngo lé nhang kat é sù Íwa le, Ngò eq séng luí saksé hkâm byi ri; nungmoq gi, Yhâng é htê lé le, a wó gyô wú kó; Yhâng é gungghyâng lé le, a myang wú kó;

† 5:33 Yohan shí yuq gi, Wui-myhup Sará Yohan nghut lhê.

³⁸ haù Yhâng é mungdang le, nungmoq chyáng a bò kó nghut ri; hkâsu mù gâ le, nungmoq gi, Yhang nhang kat é Sû lé a lumjîng kô é yanmai nghut ri.

³⁹ Nungmoq gi, haù Chyúmdang mai ahtum abyuq é asak wó yû râ nghut lhê ga myit yù kô é yanmai, haù Chyúmdang má ho wú akô nghut ri; nghut kôhang, Chyúmdang haù gi, Ngò eq séng luí saksé hkâm byí ri;

⁴⁰ nghut kôhang, asak wó yû râ matú, nungmoq gi, Ngá chyáng a kâm lé kó nghut ri.

⁴¹ Ngò gi, byu eq hkya-ôn é lé a lhom yu é nghut lhê.

⁴² Nghut kôhang, nungmoq lé gi, Ngò sê lhê; nungmoq é i-myit hkaù má, Garai Gasang lé chyitdap é myit a bò kó nghut ri.

⁴³ Ngò gi, Ngá Wâ é myîng mai jé lé é sù nghut kôhang, nungmoq gi, Ngo lé a lhom hap yù kó; yhâng myîng yhang lang é byù, gotù rayuq jé lé é ru nghut le gi, haù yuq lé, nungmoq lhom hap yù kó râ nghut lhê.

⁴⁴ Nungmoq gi, rayuq eq rayuq hkya-ôn lhúm é lé za hap yù luí, rayuq za nghut é Garai Gasâng chyáng mai lo é hkya-ôn hkyô lé gi, a hô kô é bang nhîng, hkâsu kut wó lumjîng kó râ lhú?

⁴⁵ Nghut kôhang, haù Íwâ é hí má, Ngò, nungmoq lé mara hûn nhô hkâ-ngâm kó; nungmoq lé mara hun é sù gi, haù nungmoq mai myit myoqbyu tò é Mosheq ru nghut lhê.

⁴⁶ Mosheq lé nungmoq gè gè yhang lumjîng kô é ru nghut le gi, Ngo lé le lumjîng kó râ nghut lhê; hkâsu mù gâ le, Mosheq gi, Ngá é hkyô lé kâ tô é sù nghut ri.

⁴⁷ Nghut kôhang, nungmoq gi, yhang kâ tô é pé lé lháng a lumjîng kô é nhîng, Ngá dang lé, hkâsu kut wó lumjîng kó râ lhú?" gâ ri.

6

Byù Ngo Hkyîng Lé Zoshuq Byi Tsô É Hkyô

Mht 14:13-21; Mrk 6:30-44; Luk 9:10-17

¹ Hau htâng a myáng má, Yesuq gi, Tiberi nhông le gâ é, Galile nhông he hpoq shut gù dap ló bê nghut ri.

² Haù hkûn, byù ajùm ayò gi, haù nò bâng htoq má, Yhang kut shit é limik kumhá pé lé myàng kô é yanmai, Yhang htâng châng e ló bum akô nghut ri.

³ Yesuq gi, bùm shut doq ló mù, Yhâng é chángzò pé eq rahá zung tô ri.

⁴ Yudaq byu pé é Lhoqlhai Poí gi, chyâng lo nyi bê nghut ri.

⁵ Yesuq gi, tu wú kat le, byù ajùm ayò Yhâng shut lé lo bùm kô é lé byu-myang kat luí, Hphilip lé, "Shí bang zo râ muk, nga-nhúng, hkâmá é wó wuí râ lhú?" ga taí ri.

⁶ Yesuq, haù su ga taí é gi, yhang lé chyam wú râ matú za nghut ri; hkâsu mù gâ le, hkâsu kut râ hkyô gi, Yhâng é myit má bo to gù bê nghut ri.

⁷ Hphilip gi, Yhang lé, "Denari* í sho eq muk wui le lháng, rayuq ratsuí tsui ngap râ a nghut." ga tù taí ri.

⁸ Haù hkûn, Yhâng é chángzo nghut é, Simun Petruq é yhanggu Andre gi, Yhang lé,

⁹ "Muk-yo muk ngo long eq ngozo í du wó é yuqgè zo rayuq, shí má nyi ri; nghut kôhang, byù shí myhò bang lé luq shoq, hkâsu kut wó gâm byi râ lhú?" ga taí htoq kat ri.

* 6:7 Denari rachap gi, byù rayuq é ra-nyí é zuihpau eq wuí é nghut lhê.

10 Yesuq gi, "Haù shiwa byu pé lé, zùng nhâng keq." ga taí ri. Jowò haù gi, nhán htu é jang nghut mù, yuqgè wuì baù lhang, ngo hkyíng kò zung tô bùm bekò nghut ri;

11 hau htâng, Yesuq gi, muk long pé lé yù mù, jeju hkya-on luí, zung tô é bang lé, yhangmoq o é myhó tsing gàm byí ri. Haù eq rajung za, ngozo lé le haù su kut ri.

12 Yhangmoq banshoq bang zô gyí bùm kô é htâng má Yhang gi, Yhâng é chángzô pé lé, "Myit gyó tô é ajap azo pé lé châng guq tsíng yù keq. Haí le a langsa pyám sháng gaq." ga taí ri.

13 Haù mù, yhangmoq gi, zô myhit tô é muk-yo muk ngo long má é ajap azo pé lé châng guq tsíng le, raxe í mung byíng shoq wó guq tsíng yu akò nghut ri.

14 Haù shiwa byu pé gi, Yesuq kut é limik kumlhá lé myàng kô é hkùn, "Shí yuq gi, mingkan htoq má jé lé lô rà gá é, Myiqhtoi yhang nghut ri-nhung!" ga taí bum akò.

15 Yesuq gi, yhangmoq lé mù, Yhang lé hkohkâm zik kut nhâng kó rà dà é hkyó lé, sê é yanmai, Yhang baù tsik za bùm shut dum haq doq lô bê nghut ri.

Yesuq, Wuì Htoq Má Sô É Hkyô

Mht 14:22-27; Mrk 6:45-52

16 Buigyum htâng, Yhâng é chángzô pé gi, haù nhông shut gyó lô mù,

17 lhai má wang jí luí, nhông hé hpoq má é Kaperna-um wà shut gù e lô akò; haù hkùn, mauchut bê nghut kôlhang, Yesuq gi, yhangmoq chyáng a jé gyó lo shí nghut ri.

18 Haù u lé, laidun htan lo é yanmai, wuìlhêng toq lô bê nghut ri.

19 Yhangmoq gi, sum myi déng kô lhai kôn e lô kô é hkùn, Yesuq gi, nhông htoq má so luí, haù lhai shut chyáng lé lo nyi é lé myàng kômù, gyuq dan bùm bekò nghut ri.

20 Nghut kôlhang, Yesuq gi, "Hkâgyuq kó, Ngò ru nghut lhê." ga yhangmoq lé taí ri.

21 Haù mù, yhangmoq gi, Yesuq lé gabú myit èq lhai hkaù má shuì hâng yù nau akò. Haù hkùn, lhai haù gi, radá dâm yhangmoq jé nau é jang wuiyàm má jé bê nghut ri.

22 Nhông hé hpoq má nyi tô é byù moq mó gi, haù má lhai racham za joq láí lo é hkyô eq, lhai haù má Yesuq a bo doq jí e za, chángzô pé baù jí htoq lô kô é hkyô lé, hau htang nyí, bìn sê kat akò nghut ri.

23 Haù hkùn, haù Yhumsíng, jeju hkya-ôn é htâng, byu pé muk zô é jowò nàm má, Tiberi myuq má é lhai pé jé lé bum ri.

24 Haù byù moq mó gi, Yesuq eq Yhâng é chángzô pé, haù má a nyi lo kô é hkyó lé sé kô é yanmai, Yesuq lé châng hô rà matú lhai haù pé má wang jí mù, Kaperna-um wà shut e lô akò nghut ri.

Yesuq, Asak Muk Nghut É Hkyô

25 Yhangmoq gi, nhông hé hpoq má Yesuq lé myàng kôjáng, "Rabai é, Nàng gi, shí má hkâ-nhám jé lé é lhu?" ga, Yhang lé myí akò.

26 Haù hkùn, Yesuq gi, "Ngò, nungmoq lé teng za taí kôlé, nungmoq gi, limik kumlhá pé lé myàng kô é yanmai, Ngo lé hô kô é a nghut, muk gyi shoq myàng zo kô é yanmai sheq, hô kô é ru nghut lhê.

27 Htên byuq sê é zoshuq é matú, hkâshikut kó; haù Byu Yhangzo byi rà nghut é ahtum abyuq é asak é matú, ru gíng nyi é zoshuq wó yù rà lé sheq

shikut nyi keq. Yhâng chyáng gi, haù Íwa Garai Gasang mai Yhâng é saksé dizik tap to bê nghut lhê." ga tù tai ri.

28 Haù mù, yhangmoq gi, "Garai Gasang ô nau é muzó pé zui sai rà matú, ngamoq haì kut ra rà lúhú?" ga Yhang lé myí akô.

29 Haù hkûn, Yesuq gi, "Garai Gasang nhang kat é Sû lé, lumjîng é gi, Garai Gasang ô nau é muzó nghut bê." ga tù tai ri.

30 Haù mù luí, yhangmoq gi, Yhang lé, "Ngamoq myoq èq wó myâng luí, Nàng lé lumjîng rà matú, Nàng, haì jung limik kumlhá kut shit rà lúhú? Nàng, haì jung kut shit rà lúhú?"

31 Haù Chyúmdang má, Yhang gi, yhangmoq zo rà matú, mauhkûng mai muk byí ri.⁴⁰ ga kâ tô é eq rajung za, ngamoq é íchyí íwa pé gi, haù yoso hkaù má mannaq muk zo bekô nghut lhê." ga tai akô.

32 Haù hkûn, Yesuq gi, yhangmoq lé, "Ngò, nungmoq lé teng za tai kôlé, nungmoq lé mauhkûng mai muk byí é Sû gi, Mosheq a nghut, haù Ngá Wa sheq, nungmoq lé mauhkûng mai tengmán é muk byí é Sû ru nghut lhê.

33 Hkâsu mù gà le, Garai Gasang byí é muk gi, mauhkûng mai gyó lé luí, haù mingkan lé asak byí é Sû nghut lhê." ga tai ri.

34 Yhangmoq gi, "Yhumsîng è, ahkuí mai, ngamoq lé muk haù hkâ-nhám le byí nyi laq." ga chòm tai bum akô.

35 Haù mù, Yesuq tai kyô é gi, "Ngò gi, asak muk nghut lhê. Ngá chyáng lé é sù gi, hkâ-nhám le zòmut é hui rà a nghut; Ngo lé lumjîng é sù le, hkâ-nhám le wuìshit é hui rà a nghut.

36 Nghut kôlhang, Ngò, nungmoq lé tai wú bê eq rajung za, nungmoq gi, Ngo lé myang wú é nghut kôlhang, a lumjîng shi kó nghut ri.

37 Haù Íwa mai Ngo lé ap byí tô é byù lhunglhang bang gi, Ngá chyáng lé kó rà nghut luí, Ngá chyáng lé é sù ó yuq lé le, Ngò gi, hkâ-nhám lé hkat htoq pyám rà a nghut.

38 Hkâsu mù gà le, Ngò, mauhkûng mai gyó lé é gi, Ngò ô nau é hkyô lé kut rà matú a nghut e za, Ngo lé nhang kat Sû ô nau é hkyô lé kut rà matú ru nghut lhê.

39 Haù Ngo lé nhang kat Sû ô nau é hkyô gi, Yhang mai Ngo lé ap byí tô é bang mâ é rayuq lé lhang, Ngò, a lhoq hpyuq pyám e za, jìhtùm buinyi má yhangmoq lé dum lhoq dui toq yù rà matú ru nghut lhê.

40 Hkâsu mù gà le, Ngá Wa ô nau é hkyô gi, haù Zo lé wú mù, Yhang lé lumjîng é sù yuq hkangmó, ahtum abyuq é asak lé wó yù rà matú nghut lhê; Ngò le, jìhtùm buinyi má haù bang lé lhoq dui toq rà nghut lhê." gà ri.

41 Haù mù, "Ngò gi, mauhkûng mai gyó lé é muk nghut lhê." ga, Yesuq tai é yanmai, Yhang eq séng luí, Yudaq byu pé tai put kô é gi,

42 "Shí yuq gi, Yosep é yhangzo Yesuq a nghut lhi? Yhâng nu Yhâng wa lé, nga-nhúng sê lhê a nghut kó lúhú? Haù sù é nhîng, ahkuí, 'Ngò gi, mauhkûng mai gyó lé é nghut lhê.' ga, Yhang hkâsu kut wó tai lhê lúhú?" gà bum akô.

43 Haù hkûn, Yesuq gi, "Nungmoq ahkaù má hkâtai put nyi kó.

44 Haù Ngo lé nhang kat é sù Íwa mai shuí jé é sù za a nghut jáng, ó yuq le Ngá chyáng wó jé lé rà a nghut; jé lé é sù lé gi, jìhtùm buinyi má, Ngo lhoq dui toq rà nghut lhê.

45 Myiqhtoi laiká pé má, 'Yhangmoq lhunglhâng bang gi, Garai Gasâng èq mhoq byí é hui kó rà nghut lhê.'* ga kâ tô é eq rajung za, haù Íwâ chyáng mai gyo yù, mhoq yu é bang yuq hkanmó gi, Ngá chyáng lé kó rà nghut lhê.

46 Haù gi, rayuq yuq mai, haù Íwa lé myang wú bê nghú nau é a nghut; Garai Gasâng chyáng mã é Sù za sheq, haù Íwa lé myang wú é Sù nghut lhê.

47 Ngò, nungmoq lé teng za taí kôlé, lumjing é sù gi, ahtum abyuq é asak wó lhê.

48 Ngò gi, asak muk nghut lhê.

49 Nungmoq é íchyí íwâ pé gi, haù yoso hkaù má mannaq muk zo bekò nghut lhê; nghut kôlé, shi byuq bekò nghut ri.

50 Nghut kôlhâng, shí gi, mauhkúng mai gyó lé lo é muk nghut lhê; haù lé zô é sù gi, a shí lo rà nghut lhê.

51 Ngò gi, mauhkúng mai gyó lé lo é, haù asak dui é muk nghut lhê; rayuq yuq, muk shí lé zô é nghut le gi, ahtum abyuq dui nyí rà nghut lhê; muk shí gi, mingkan zô wui é asak matú, Ngò byi rà nghut é Ngá gungsho nghut lhê." ga tù taí ri.

52 Haù mù, haù Yudaq byu pé gi, "Byù shí yuq gi, nga-nhúng lé, Yhâng é gungsho hkâsu kut wó byi tso rà lhú?" ga, yhangmoq yhangchang dang htíng htíng lhúm bum akò.

53 Haù hkûn, Yesuq gi, yhangmoq lé, "Ngò, nungmoq lé teng za taí kôlé, haù Byu Yhangzô é gungsho lé zô é eq Yhâng é sui lé shuq e za a nghut le gi, nungmoq asak wó kó rà a nghut.

54 Ngá é gungsho lé zô é eq Ngá é sui lé shuq é sù, ó yuq nghut kôlé, ahtum abyuq é asak wó é nghut lhê; Ngò gi, jhtùm buinyi má, haù yuq lé lhoq dui toq yù rà nghut lhê.

55 Hkâsu mù gâ le, Ngá é gungsho gi, zojung yhang nghut lhê; Ngá é sui gi, shuqjung yhang nghut lhê.

56 Ngá é gungsho lé zô é eq Ngá é sui shuq é sù, ó yuq nghut kôlé, Ngò má nghut nyí luí, Ngò le haù yuq má nghut nyí bê nghut lhê.

57 Haù rù dui nyi é Íwa gi, Ngo lé nhang kat luí, Ngò gi, haù Íwâ é yanmai, dui nyi é eq rajung za, Ngá é gungsho lé zô é sù gi, Ngá é yanmai, dui nyi rà nghut lhê.

58 Shí gi, mauhkúng mai gyó lé lo é muk nghut lhê. Nungmoq é íchyí íwâ pé gi, mannaq muk zo kôlé, shi byuq bekò nghut ri; nghut kôlhâng, muk shí lé zô é sù gi, ahtum abyuq dui nyi rà nghut lhê." ga taí ri.

59 Dang haù pé gi, Yesuq, Kaperna-um wà mã é tarajong má mhoqshit nyi é u lé, taí é dang nghut ri.

Chángzô Pé Myo Myo, Yesuq Lé Kâng Pyâm To Kô É Hkyô

60 Yhâng é chángzô pé myo myo gi, haù lé wó gyo kôjáng, "Dang shí gi, gyai wui ri. Ó yuq wá wó cháng rà lhú?" ga taí bum akò.

61 Yesuq gi, haù eq séng luí, Yhâng é chángzô pé taí put nyi bùm kô é lé Yhâng é myit má sé luí, yhangmoq lé, "Dang shi é yanmai, nungmoq myit htên bum akò lhú?"

62 Haù Byu Yhangzo gi, Yhang nyi lai lò bê jowò shut taù doq ló é lé, nungmoq myàng kô é nghut le gi, hkâsu nghú kó rà lhú?

63 Haù Woi-nyí gi, asak byí lhê; gungsho kúm gi, haí le a wó dut nghut ri. Nungmoq lé, Ngò taí é dang pé gi, Woi-nyí le nghut lhê, asak le nghut lhê.

* 6:45 Esai 54:13

⁶⁴ Nghut kôle, nungmoq chyáng mã é ra-am gi, a lumjínng kó nghut ri." ga tai ri. Hkâsu mù gâ le, ô pé gi, a lumjínng kó râ eq, ó yuq gi, Yhang lé ap pyám râ nghut é hkyô lé, Yesuq gi, sâng-hi mai sê to gù bê nghut ri.

⁶⁵ Yhang xoq tai é gi, "Haù su mù, haù Íwâ èq ahkáng byí é sù za a nghut le gi, ó yuq le Ngá chyáng wó lé râ a nghut nghû, Ngò, nungmoq lé tai kyo wú bê nghut lhê." gâ ri.

⁶⁶ Haù dâm mai, Yhâng é chángzô pé myo myo gi, Yhâng htâng a cháng lo kô e za, taù ló byuq bùm bekô nghut ri.

⁶⁷ Haù su mù, Yesuq gi, haù chángzo raxe í yuq lé, "Nungmoq le, ló byuq nau akô, a nghut lúhú?" ga myí ri.

⁶⁸ Haù hkûn, Simun Petruq gi, "Yhumsíng ê, Nàng gi, ahtum abyuq é asak mungdang wó Sù nghut to bê lé nhing, ngamoq gi, ó yuq chyáng é shirâ lúhú?

⁶⁹ Nàng gi, Garai Gasâng é Chyoiyúng Sù nghut é lé, ngamoq, lumjínng lhê, sê nyi lhê." ga, Yhang lé tú tai ri.

⁷⁰ Haù hkûn, Yesuq gi, "Nungmoq raxe í yuq lé, Ngò hkyin yù bê a nghut kó lúhú? Nghut kôle, nungmoq mã é rayuq gi, nat nghut ri." ga tú tai ri.

⁷¹ (Yhang gi, haù Simun Iskarut é yhangzo, Yudaq lé tai nau é nghut ri; haù yuq gi, chángzo raxe í yuq má bò sù nghut kôle, htâng má, Yhang lé ap pyám râ sù nghut ri.)

7

Yesuq Eq Yhâng É Gumang Wui

¹ Hau htâng má, Yesuq gi, Yhang lé sat râ matú, Yudaq byu pé ho nyi bùm kô é yanmai, Yuda mau má a kâm sô wún mù, Galile mau má sô lhing wún ri.

² Nghut kôlhang, haù Yudaq byu pé é Saksé Zúm Poí chyâng lo nyi é hkûn,

³ Yesuq é yhanggu yuqzô pé gi, Yhang lé, "Náng é chángzô pé gi, Nàng kut é laklai kumlhá pé lé myàng kó sháng gaq, Nàng, shî mai htoq ló luí, Yuda mau shut e ló aq.

⁴ Myìng hu nau é sù gi, hkaù zaù luí hai le a kut wú é nghut lhê. Nàng gi, haù pé lé kut nyi bê nghut é yanmai, mingkan lé, Náng gúng tûn shit aq." ga tai akô.

⁵ Hkâsu mù gâ le, yhanggu sîng yuqzô pé lhang, Yhang lé a lumjínng kó nghut ri.

⁶ Haù mù luí, Yesuq gi, yhangmoq lé, "Ngá é ahkyíng gi, a jé shi nghut ri; nungmoq é ahkyíng kúm gi, hká hkûn le joq nyi ri.

⁷ Haù mingkan gi, nungmoq lé a jú a wó kut kó nghut ri; nghut kôlhang, Ngo lé gi, a jú kó; hai mù gâ le, yhang kut é hkyô gi, agè ashop é nghut é lé, Ngò, saksé tûn shit é yanmai nghut ri.

⁸ Nungmoq gi, poi haù shut doq ló keq. Ngò kúm gi, Ngá é ahkyíng a jé shi nghut é yanmai, poi haù shut a doq ló shirâ nghut lhê." ga tai ri.

⁹ Haù su ga tai luí, Yhang gi, Galile mau má nyi gyó to bê nghut ri.

¹⁰ Nghut kôlhang, Yhang gu pé, haù poi shut doq ló byuq é htâng má, Yhang gi, de de a nghut é dông, tsik za châng doq ló bê nghut ri.

¹¹ Yudaq byu pé gi, haù poi má, Yhang lé châng hô kômù, "Haù yuq gi, hkâmá nghut lhê lúhú?" ga, myi wún akô nghut ri.

¹² Haù byu hpûng hkaù má, Yhang eq séng luí tai lhùm bùm kô é má, ra-am gi, "Yhang gi, byu gè nghut ri." ga tai kôjáng, ra-am gi, "A nghut, Yhang gi, byu pé lé hkyô shuí nghoq sù nghut ri." ga tú tai akô.

13 Nghut kôlhang, haû Yudaq suwún wuî lé gyuq kô é yanmai, ó yuq le, Yhang eq sêng é hkyô lé de de a wám taí kó nghut ri.

Haû Poi Má, Yesuq Mhoqshit É Hkyô

14 Haû poi rawuî nghut lô é hkûn, Yesuq gi, noqkuq yhûm má doq ê luí, mhoqshit hi lô bê nghut ri.

15 Haû hkûn, Yudaq byu pé gi, gyô maú byuq kômù, "Shí yuq gi, mhoq yu é hkyô le a joq wú é wá, haû-í hkâsu mù sê lhê laq?" ga myi bum akô.

16 Haû mù, Yesuq tú taí é gi, "Ngò mhoqshit é dang gi, Ngá é dang a nghut; Ngo lé nhang kat Su é dang ru nghut lhê.

17 Rayuq yuq, Garai Gasang ô nau é hkyô lé châng kut nau é nghut jáng, Ngò mhoqshit é dang gi, Garai Gasang chyáng má é nghut a nghut é eq, Ngá é myit dông taí é dang nghut a nghut é lé, yhang sê gàm hkoq yú râ nghut lhê.

18 Yhumsing é myit dông taí é sù gi, yhumsing é matú aróng hô sù nghut ri; nghut kôlhang, yhumsing lé nhang kat su é matú, aróng ho é sù gi, tengmán é byû nghut ri; yhang má, a tengmán é hkyô haí le a bò nghut ri.

19 Mosheq gi, nungmoq lé jep é tarâ byí to bê, a nghut kó lúhú? Nghut kôlhang, nungmoq ó yuq le, jep é tarâ haû lé a cháng kó nghut ri. Haí mù luí, Ngo lé sat nau nyi akô lúhú?" gâ ri.

20 Haû hkûn, haû byû hpûng gi, "Nàng gi, nat gang wang to sù nghut ri-nhung! Nàng lé, ó yuq wá sat nau nyi ri lúhú?" ga tú taí akô.

21 Yesuq gi, yhangmoq lé, "Ngò, laklai kumhá ralhûm kut jáng, nungmoq banshoq bang gi, maú byuq bum akô.

22 Nghut kôlhang, nungmoq gi, ahpyo-kuq hpyit byí é hkyô lé, Mosheq byí é nghut lhê ga luí, Bánno buinyi má, zoshâng lé ahpyo-kuq hpyit byí akô (gè gè ga jáng, ahpyo-kuq hpyit é hkyô gi, Mosheq chyáng mai lo é a nghut e za, íchyí iwâ pê chyáng mai lo é ru nghut lhê.).

23 Haû, Mosheq é jep é tarâ lé a lhoq htên pyám sháng gaq nghû, Bánno buinyi má, zoshâng lé ahpyo-kuq hpyit byí é nghut le gi, haí mù luí, Bánno buinyi má, byû rayuq é gùng gón lé, Ngò lhoq gè byí é yanmai, Ngo lé nhikjum yô akô lúhú?

24 Byû du lé wú luí hkâjéyáng kó; tengmán é dông sheq jéyáng keq." ga taí ri.

Yesuq Gi, Hkrisduq Nghut Lhê Lúhú?

25 Haû mù luí, Yerusalem wà mó má é byu pé ra-am gi, "Haû yhangmoq sat pyám nau nyi é sù gi, shí yuq a nghut lhi?

26 Yhang gi, shí má de de dâng nyo nyi le, yhangmoq gi, Yhang lé, haí le a ga kó myhi-nhung! Yhang gi, Hkrisduq nghut lhê ga, haû ahkáng ayá wó bang gi, gè gè yhang, sê akô abe?

27 Haû Hkrisduq jé lé é hkûn gi, Yhang hkâmai lé lo é lé, ó yuq lhang sé rà a nghut." ga taí bum akô. Nghut kôlhang, shí yuq gi, hkâmá é sù nghut é lé, nga-nhúng sê lhê;

28 Haû mù, Yesuq gi, noqkuq yhûm wàng má mhoqshit lchyang, htê mó èq taí kat é gi, "Nungmoq gi, Ngo lé sê é htoq agó, Ngò, hkâmai lé é sù nghut é lé le, sê akô nghut ri. Ngò gi, Ngá myit dông shí má lé nyi tô é sù a nghut kôlhang, Ngo lé nhang kat é Sù gi, tengmán lhê; nungmoq gi, Yhang lé a sé kôlhang,

29 Ngò gi, Yhang lé sê lhê; hkâsu mù gâ le, Ngò gi, Yhâng chyáng mai lé é sù eq Yhang mai nhang kat é sù nghut lhê." gâ ri.

³⁰ Haù mù, yhangmoq gi, Yhang lé chyup rà dâ akô; nghut kôlhang, Yhâng é ahkýing a jé shi é yanmai, Yhang lé chyup rà matú, ó yuq le loq a jé kó nghut ri.

³¹ Nghut kôlhang, byù hpûng hkaù má é bang myo myo gi, Yhang lé lumjǐng bùm kôluí, "Haù Hkrisduq jé lé é hkûn, Yhang gi, shí yuq htoq má, limik kumlhá pé je wó kut shit rà lúhú?" ga tai bum akô nghut ri.

³² Haù Hparishe pé gi, haù byù hpûng hkaù má, Yesuq eq sêng é hkyô lé, haù su ga dangsoq soq lhùm nyi kô é hkyô lé wó gyô yu akô. Haù mù, haù hkyangjong agyi pé eq Hparishe pé gi, Yhang lé é chyup rà matú, noqkuq yhùm zúng é bang lé nhang kat akô.

³³ Haù hkûn, Yesuq gi, "Ngò gi, nungmoq eq rahá rayoq zo za nyi rà nghut lhé; hau htâng, Ngo lé nhang kat Su chyáng taù ló rà nghut lhé.

³⁴ Haù hkûn, nungmoq gi, Ngo lé hô kôlhang, myang hô kó rà a nghut; Ngò nyi é jang má, nungmoq wó jé kó rà a nghut." ga tai ri.

³⁵ Hau é yanmai, Yudaq byu pé, rayuq eq rayuq tai lhum kô é gi, "Shí yuq gi, Yhang lé nga-nhúng a myang hô loshoq, hká shut e byuq rà dâ lhé lúhú? Yhang gi, Grik byu pé má nyi byo myín tô é nga-nhúng é byu pé nyi é jowò má é mù, Grik byu pé lé, ê mhoqshit rà dâ lhé lúhú?"

³⁶ 'Nungmoq gi, Ngo lé hô kôlhang, myang hô kó rà a nghut.' gâ é eq, 'Ngò nyi é jang má, nungmoq wó jé kó rà a nghut.' gâ é, Yhang tai é dang gi, hái jung wá gá naù é nghut lhé lúhú?" gâ akô.

³⁷ Haù lô htâng é eq je ahkyak é Poi buinyi má, Yesuq toq yap luí, htê mó èq tai é gi, "Wuì shit sù gi, Ngá chyáng lé mù, shuq sháng gaq.

³⁸ Ngo lé lumjǐng é sù ó yuq nghut kôle, haù Chyúmdang má tai tô é eq rajung za, 'Yhâng chyáng mai asak uchyâm é wuilàng yui htoq lô rà nghut lhé.'" gâ ri.

³⁹ Yhang haù su gâ é gi, Yhang lé lumjǐng é bang myang hap yù rà nghut é, haù Woi-nyí lé tai é nghut ri. Haù hkûn jé shoq, haù Woi-nyí lé a byi kat shi nghut ri. Hkâsu mù gâ le, Yesuq gi, hpungwup shingkang dan hù é a hui nhâng shi é yanmai nghut ri.

⁴⁰ Yhâng é dang pé lé wó gyo kôjáng, ra-am gi, "Shí yuq gi, gè gè yhang, Myiqhtoi haù nghut ri." ga tai akô.

⁴¹ Ra-am gi, "Shí yuq gi, Hkrisduq nghut ri." ga tai akô. Góbang nghut jáng, "Hkrisduq wá Galile mau mai htoq lé rà nghut lhé lúhú?"

⁴² Haù Chyúmdang má, Hkrisduq gi, Dawiq é awut ashín mã é nghut luí, Dawiq nyi lái lo é Betlehem wá mai htoq ló rà nghut lhé gâ é, a nghut lúhú?" ga myí bum akô nghut ri.

⁴³ Haù mù luí, Yesuq é yanmai, shiwa byu pé gi, gàm hkoq lò byuq bekô nghut ri.

⁴⁴ Ra-am gi, Yhang lé chyup yù nau bùm kôlhang, Yhang lé loq a záng kó nghut ri.

Yudaq Byu Pé Lé Shuí U É Bang A Lumjǐng Kô É Hkyô

⁴⁵ Hau htâng má, haù noqkuq yhùm zúng bang gi, haù hkyangjong agyi pé eq Hparishe pé chyáng taù ló kô é hkûn, haù bang gi, yhangmoq lé, "Nungmoq, hái mù luí, Yhang lé a shuí lo kô é lúhú?" ga lhom myí akô.

⁴⁶ Haù hkûn, haù noqkuq yhùm zúng bang gi, "Shí yuq su ga tai é byù gi, ó le a nyi wú é nghut lhé." ga tai kyô akô.

⁴⁷ Haù mù, haù Hparishe pé gi, "Nungmoq lé le, Yhang èq mhoq hpyoq yù bekô lúhú?"

48 Haù zaù wui chyáng le, Hparishe pê chyáng le, Yhang lé lumjǐng é byù bò akô lúhú?

49 A bò! Nghut kôlhang, haù jep é tarâ lé a sê é byù moq mó shǐ gi, nhǐng pyám é hui bekô nghut ri." ga nhǐk-yô é dōng tũ tai kat akô nghut ri.

50 Nghut kôlhang, yhangmoq hpúng má bo é, hí hkún Yesuq chyáng e wú bê sũ nghut é, Nikodimu gi,

51 "Nga-nhúng é tarâ gi, byù rayuq lé, yhâng é dang hí a gyô wú é eq, yhang hai kut é lé a sê e za, mara byi lhê lúhú?" ga, yhangmoq lé myǐ ri.

52 Haù hkún, yhangmoq gi, "Nàng le, Galile mau byù nghut lhê lúhú? Galile mau mai myiqhtoi rayuq lháng a htoq é hkyô lé, nàng gon wú aq, haù jáng sé râ nghut lhê." ga tũ tai akô.

53 Hau htâng, yuq hkgangmó gi, ó le ô yhũm shut taù ló byuq bùm bekô nghut ri.*

8

Yesuq Lé, Lé Myǐ Chyam Wú Kô É Hkyô

1 Yesuq kúm gi, Tsalun Bùm shut e ló bê nghut ri.

2 Htang napkyô napsũn noq le, Yesuq gi, noqkuq yhũm wàng hkaù má dum é luǐ, byu pé lhunglháng gi, Yhâng é lhǐnghkyuq má lé zǐng bum akô; haù mù, Yhang gi, zung to luǐ, yhangmoq lé mhoqshit ri.

3 Haù hkún, haù tarâ sará pé eq Hparishe pé gi, sulàng shut nyi é má myang chyup yu é su-myi rayuq lé shuí lé lô kômù, gung gũng má shap to kôluǐ,

4 Yesuq lé, "Sarâ ê, myiwe myhǐ shǐ lé, sulàng shut nyi é má myang chyup yu é nghut lhê.

5 Haù Mosheq é tarâ má gi, shǐ su é myiwe lé, luqgok èq dú sat pyám keq ga, nga-nhúng lé hkunmó hkyô tô ri. Ahkuǐ, Nàng gi, hkâsu nghũ râ lúhú?" ga myǐ akô.

6 Yhangmoq haù su ga myǐ é hkyô gi, Yhang lé mara wó hũn shoq ga, chyam wú râ matú nghut ri.

Nghut kôlhang, Yesuq gi, ngóm mù, myigùng má loqnyhuǐ èq htaù kâ nyi ri.

7 Yhang lé, yhangmoq ru jang myǐ nyi kô é hkún, Yhang gi, yap nyhang kat mù, yhangmoq lé, "Nungmoq mã é mara a wó é sũ hí, myiwe myhǐ shǐ yuq lé luqgok èq dú sháng gaq." ga tai ri.

8 Hau htâng, Yhang gi, dum ngóm luǐ, myigùng má kâ nyi ri.

9 Yhangmoq gi, haù su gâ é lé wó gyo kôjáng, je mang bang mai hí luǐ, rayuq htâng rayuq ló byuq bekô nghut luǐ, Yesuq baù za myit gyó tô é eq, myiwe myhǐ haù jáng yap nân tô ri.

10 Yesuq gi, yap nyhang kat luǐ, yhang lé, "Myiwe myhǐ ê, yhangmoq hká ló bekô lúhú? Ó yuq èq le, nàng lé mara a byi kó lúhú?" ga myǐ ri.

11 Yhang gi, "Yhumsǐng ê, ó yuq le mara a byi kó nghut ri." ga tũ tai ri.

Haù hkún, Yesuq gi, "Ngò le, nàng lé mara a byi, ló aq hkoi, ahkuǐ mai mara hkâdum kut shut lo." ga tai kat ri.

Yesuq, Mingkân É Maubó

12 Yesuq gi, shiwa byu pé lé dum nyo é hkún, "Ngò gi, mingkân é maubó nghut lhê; Ngá htâng châng é sũ ó yuq nghut kôle, mauchut hkaù má hkâ-nhám le so râ a nghut, asak maubó lé wó râ nghut lhê." ga tai ri.

* 7:53 Yohan Laiká 7:53 mai 8:11 jé shoq gi, chyũmding axau myo myo má a bo é nghut lhê.

13 Haù mù, haù Hparishe pé gi, "Wú aq, Náng gũng Nàng saksé hkâm yu é nghut ri; Náng é saksé gi, teng rà a nghut." ga tai akô.

14 Haù hkûn, Yesuq gi, "Ngá gũng Ngò saksé hkâm kôlhang, Ngá é saksé gi, têng lhê; hkâsu mù gâ le, Ngò gi, Ngò hkâmai lé lo é eq Ngò hká shut e ló é lé, sê lhê. Nghut kôlhang, nungmoq gi, Ngò hkâmai lé lo é lé le, Ngò hká shut e ló é lé le, a sé kó nghut ri.

15 Nungmoq gi, byù hkyam đông za jéyáng akô; Ngò gi, ó yuq lé le a jéyáng é nghut lhê.

16 Nghut kôlhang, Ngò jéyáng é nghut jáng, Ngò jéyáng é hkyô gi, jô lhê; hkâsu mù gâ le, Ngò gi, Ngò baù a nghut, haù Ngo lé nhang kat é sù İwa eq rahá nghut nyi lhê.

17 Haù nungmoq é tarâ má yhang le, í yuq mai hkâm é saksé gi, têng lhê ga kâ tô ri.

18 Ngò gi, Ngá é matú saksé hkâm yù sù nghut lhê; hau htoq agó, haù Ngo lé nhang kat é sù İwa le, Ngá é matú saksé hkâm byi é nghut lhê." ga tù tai ri.

19 Haù mù, yhangmoq gi, Yhang lé, "Náng Wa gi, hkâmá lhu?" ga myi kôjáng, Yhang gi, "Nungmoq gi, Ngo lé le, Ngá Wa lé le, a sé kó nghut ri; nungmoq, Ngo lé sé kô é nghut le gi, Ngá Wa lé le, sé kó rà nghut lhê." ga tù tai ri.

20 Dang haù pé gi, haù noqkuq yhũm wàng hkaù má é alu kat jang nàm má, Yhang mhoqshit nyi é u lé tai é dang nghut ri. Nghut kôlhang, Yhang lé, ó yuq le a chyup kó; hkâsu mù gâ le, Yhâng é ahkying a jé shi é yanmai nghut ri.

21 Haù mù luí, Yesuq gi, yhangmoq lé, "Ngò gi, ló byuq rà nghut lhê, haù hkûn, nungmoq Ngo lé hô kó rà, yhumsing é mara má le shi kó rà nghut lhê. Ngò ló é jang má, nungmoq wó jé kó rà a nghut." ga, radàm dum puq tai ri.

22 Hau é yanmai, haù Yudaq byu pé gi, "Ngò ló é jang má, nungmoq wó jé kó rà a nghut.' gâ é gi, Yhânggũng yhang sat shi rà gâ é nghut lhê lhu?" ga myi bum akô.

23 Nghut kôlhang, Yesuq xoq tai é gi, "Nungmoq gi, a-ô mai lo é bang nghut akô; Ngò gi, ahtoq mai lé é sù nghut lhê. Nungmoq gi, mingkan shi eq sêng é bang nghut akô; Ngò kúm gi, mingkan shi eq sêng é sù a nghut.

24 Haù mù, nungmoq gi, yhumsing é mara má shi kó rà nghut lhê nghũ, Ngò tai é nghut lhê. Ngò gi, haù Yuq nghut lhê nghũ tai é lé, nungmoq a lumjing kô é nghut jáng, nungmoq gi, gè gè yhang, yhumsing é mara má shi kó rà nghut lhê." gâ ri.

25 Haù hkûn, yhangmoq gi, "Nàng, ó yuq nghut lhê?" ga myi kôjáng, Yesuq gi, "Ngò ó yuq nghut é lé, Ngò, hkâ-nhám le tai nyi bê nghut lhê.

26 Ngò gi, nungmoq eq sêng luí, tai rà hkyô eq jéyáng rà hkyô, myo myo joq lhê. Nghut kôlhang, Ngo lé nhang kat é Sù gi, tengmán é Sù nghut lhê mù, Yhâng chyáng mai wó gyo yu é gũ lé, Ngò, mingkan lé tai kyô lhê." ga tù tai ri.

27 Yesuq gi, yhangmoq lé, Yhâng Wa eq sêng é hkyô tai kyô nyi é lé, yhangmoq gi, a sé gyo kó nghut ri.

28 Haù mù luí, Yesuq gi, "Haù Byu Yhangzo lé nungmoq tu shap* kat é hkûn sheq, Ngò gi, haù Yuq nghut é hkyô lé le, yhumsing myit đông haí le a kut e za, haù İwa mhoq byi é đông za tai é hkyô lé le, nungmoq sé kó rà nghut lhê.

29 Haù Ngo lé nhang kat é Sù gi, Ngò eq rahá nghut nyi lhê; Ngò gi, hkâ-nhám le, Yhang lé myit ngón nhang é hkyô chyat kut é yanmai, Yhang gi, Ngo lé baù za a tô pyâm to nghut ri." ga tai ri.

* 8:28 Tu shap gâ é lichyúm gi, tapzĩng htoq má jén sat pyám rà gâ é nghut lhê.

30 Yhang, haù su taì nyi é u lé lhang, byù myo myo gi, Yhang lé lumjing bùm bekò nghut ri.

Abraham É Awut Ashin Pé Hkyô

31 Haù mù, Yesuq gi, Yhang lé lumjing é Yudaq byu pé lé, "Ngò mhoqshit é hkyô lé châng kut nyi bekò nghut jáng, nungmoq gi, gè gè yhang, Ngá é chángzô pé nghut bekò.

32 Nungmoq gi, haù tengmán hkyô lé sé kó rà nghut luí, haù tengmán hkyô gi, nungmoq lé lhoq lhut kat rà nghut lhê." ga taì ri.

33 Haù hkùn, yhangmoq gi, "Ngamoq gi, Abraham é awut ashin pé nghut luí, ó yuq é jùn le hkâ-nhám a dut wú é nghut lhê. Haù mù, 'nungmoq lé lhoq lhut kat rà' nghù Nang hkâsu kut wó taì lhê lú?" ga tù taì akò.

34 Yesuq dum tù taì é gi, "Ngò, nungmoq lé teng za taì kôlé, mara kut shut é sù gi, mará é jùn nghut lhê.

35 Jùn gi, yhùm ikun eq hkâ-nhám le sêng nyi rà a nghut; zo kúm gi, ikun eq ahtum abyuq sêng lhê.

36 Haù mù luí, haù Zo gi, nungmoq lé lhoq lhut kat é nghut jáng, nungmoq gi, gè gè yhang, lut berá nghut lhê.

37 Nungmoq gi, Abraham é awut ashin pé nghut é lé, Ngò sê lhê. Nghut kôlhang, nungmoq gi, Ngá é dang lé a lhom yù kô é yanmai, Ngo lé sat rà dà akò nghut ri.

38 Ngò gi, Ngá Wâ chyáng mai myang yu é eq rajung za, nungmoq lé taì kyô nyi lhê; nungmoq le, nungmoq é iwa chyáng mai wó gyô yu é eq rajung za kut nyi akò nghut ri." gâ ri.

39 Haù hkùn, yhangmoq gi, "Ngamoq é iwa gi, Abraham nghut lhê." ga tù taì kôjáng, Yesuq gi, "Nungmoq, Abraham é yhangzô pé nghut é nghut le gi, Abraham kut é su kut kó rà nghut lhê.

40 Nghut kôlhang, nungmoq gi, haù Garai Gasang chyáng mai wó gyô yu é tengmán hkyô lé taì kyo sù nghut é Ngo lé, sat pyám nau akò nghut ri. Haù sù é hkyô gi, Abraham a kut é nghut lhê.

41 Nungmoq gi, nungmoq é iwa kut é muzó lé yhang, kut nyi akò." ga taì ri.

Haù hkùn, yhangmoq gi, "Ngamoq gi, dezo amyù a nghut; ngamoq gi, Iwa rayuq za wó lhê; haù gi, Garai Gasang nghut lhê." ga taì he akò nghut ri.

Zô Wui É A-kyang Gi, Mó Ó Nghut É Hkyô Shit

42 Yesuq gi, yhangmoq lé, "Garai Gasang gi, nungmoq é iwa nghut é nghut jáng, nungmoq gi, Ngo lé chyitdap kó rà nghut lhê; hkâsu mù gà le, Ngò gi, Garai Gasang chyáng mai lé jé luí, ahkuí, shí má nyi tô é nghut lhê. Ngò gi, Ngá myit dòng lé lo é a nghut, Yhang sheq Ngo lé nhang kat é ru nghut lhê.

43 Nungmoq gi, haù mù Ngá é dang lé a sé gyo kô é lú gà le, Ngò taì é dang lé, nungmoq a wó lhom yù kô é yanmai nghut ri.

44 Nungmoq gi, haù nungmoq é iwa nghut é nat Tsadán eq sêng é bang nghut luí, nungmoq é iwa ô nau é hkyô lé kut nau bum akò. Yhang gi, a-nham sâng-hi mai byù sat sù nghut ri. Yhang má tengmán hkyô a bo é yanmai, yhang gi, haù tengmán hkyô má a yap gîng nyi nghut ri. Yhang gi, mhaù é hkùn, yhang é myit má bo é dòng taì ri; hkâsu mù gà le, Yhang gi, byù mhaù nghut luí, mhaù hkyô pé é iwa nghut ri.

45 Haù su mù, Ngò, nungmoq lé, haù tengmán hkyô taì kyô é yanmai, nungmoq gi, Ngo lé a lumjing kó nghut ri.

46 Nungmoq mâ é ó yuq wá, Ngo lé mara bo lhê nghû saksé wó tûn shit akô lhú? Ngò gi, haù tengmán hkyô lé taì nyi é nghut le nhîng, nungmoq, Ngo lé haì mù a lumjîng kô é lhú?

47 Garai Gasang eq sêng é sù gi, Garai Gasang taì é dang lé gyô lhê. Nungmoq a gyo kô é gi, nungmoq, Garai Gasang eq a séng kô é yanmai nghut ri." ga taì ri.

Yesuq Eq Abraham

48 Haù hkûn, haù Yudaq byu pé gi, Yhang lé, "Nàng gi, Samariq byù nghut é htoq agó, nat gang wang júng to sù nghut lhê nghû, ngamoq taì é dang gi, jô lhê a nghut lhú?" ga myî akô.

49 Yesuq gi, "Ngò gi, nat gang wang júng é hui sù a nghut; Ngò gi, Ngá Wa lé sheq hkunggâ é ru nghut lhê; nungmoq kúm gi, Ngo lé taì hpoi nyi akô nghut ri.

50 Ngò gi, Ngá é matú aróng ho nyi é a nghut; nghut kôlhang, hô byi Sù rayuq nyi lhê, haù yuq jéyáng sháng gaq.

51 Ngò, nungmoq lé teng za taì kôlé, Ngá dang lé châng é sù gi, hkâ-nhám le, shí râ a nghut." ga taì ri.

52 Hau é yanmai, haù Yudaq byu pé gi, "Nàng gi, nat gang wang júng to sù nghut é lé, ahkuî, ngamoq sé bê! Abraham gi, shi byuq bê; haù myiqhtoî pé le, shi byuq bekô nghut ri; nghut kôlhang, Nàng gi, 'Ngá dang lé châng é sù gi, hkâ-nhám le, shí râ a nghut.' ga taì ri.

53 Nàng gi, ngamoq é iwa Abraham htoq hkik lhê lhú? Yhang gi, shi byuq bê; haù myiqhtoî pé le, shi byuq bekô nghut ri. Náng gûng nàng ó yuq su ngàm lhê lhú?" ga taì akô.

54 Yesuq gi, "Ngá gûng Ngò lhoq gyaú yu é nghut jáng, Ngá é aróng gi, hai hpaudap é a nghut; nghut kôlhang, haù nungmoq é Garai Gasang nghut lhê ga nungmoq taì é sù, Ngá Wa gi, Ngo lé lhoq gyaú é sù ru nghut lhê.

55 Nungmoq gi, Yhang lé a sé kó nghut ri; nghut kôlhang, Ngò gi, sê lhê. Yhang lé a sé nghû Ngò taì é ru nghut le gi, Ngò le nungmoq su byù mhaù dut râ nghut lhê; nghut kôlhang, Ngò gi, Yhang lé sé luî, Yhâng é dang gyo sù nghut lhê.

56 Nungmoq é iwa Abraham gi, Ngo lé râ buinyi lé myoqbyu gabú nyi é nghut luî, myàng mù, gabú bê nghut ri." ga tû taì ri.

57 Haù hkûn, haù Yudaq byu pé gi, Yhang lé, "Nàng gi, asak ngo xê zàn lhang a nghut shî é nhîng, Abraham lé myàng wú é nghut lhê lhú?" ga taì akô.

58 Yesuq gi, "Ngò, nungmoq lé teng za taì kôlé, Abraham lhang a hkû shi má, Ngò nyi gù bê nghut lhê."† ga tû taì ri.†

59 Haù mù luî, yhangmoq gi, Yesuq lé, dú râ ga luqgok kui yu akô; nghut kôlhang, Yesuq gi, haù noqkuq yhûm mai haq htoq ló byuq bê nghut ri.

9

Myoqjit Sù Lé Lhoq Gê Byî É Hkyô

1 Yesuq gi, sô yông ló nyi é u lé, hku lé é mai myoqjit to gû nghut é byù rayuq lé myang ri.

† 8:58 Htoq Ló 3:14 † 8:58 Bun zo shí má, Yesuq gi, Yhânggûng yhang Garai Gasang nghut lhê gâ nyi nghut ri.

² Haù hkùn, Yhâng é chángzô pé gi, Yhang lé, "Rabai ê, shí yuq, myoqjit gù hku lé é gi, ó yuq kut shut é yubak é yanmai nghut lhê lú? Yhang kut shut é lú? A nghut jáng, yhâng nu yhâng wa kut shut é lú?" ga myí akô.

³ Yesuq tù tái é gi, "Haù gi, yhang kut shut é yanmai le a nghut, yhâng nu yhâng wa kut shut é yanmai le a nghut; haù Garai Gasâng é muzó lé, yhang má wó lhoq htoq shít rã matú, haù dut é ru nghut lhê.

⁴ Nga-nhúng gi, haù Ngo lé nhang kut Su é muzó lé, nyí nghut tô ashí hkùn, zui saí nyí ra rã dut lhê; myín jé jáng gi, ó yuq le, mù wó zui saí rã a nghut.

⁵ Ngò gi, mingkan htoq má nyí tô é u lé, mingkân é maubó nghut lhê." ga ri.

⁶ Yhang gi, haù su ga tái lui, myigùng má sòkan byé hkyó mù, tse-nyhaq saí yù lui, haù yuq é myoqjí má but byí ri.

⁷ Hau htâng, haù yuq lé, "Haù Siloam wuihtum má ê chí pyám aq." ga tái ri. (Siloam gâ é gi, nhang é gâ é lichyúm nghut lhê). Haù mù, haù yuq gi, ê chí mù, myoq myàng lui, yhùm shut lò bê nghut ri.

⁸ Haù yhâng é yhumkyo bang eq yhang dung zô wún é lé myang wú é bang gi, "Shí yuq gi, haù zung to mù, dung zo zo lhaq kut é sù, a nghut kó lú?" ga myí bum akô.

⁹ Ra-am gi, "Haù yuq nghut lhê." gâ bum akô.

Góbang gi, "A nghut, haù yuq su dut e za ru nghut lhê." ga tái akô.

Nghut kôhlang, yhang gi, "Ngò, haù yuq yhang nghut lhê." ga tái ri.

¹⁰ Haù hkùn, yhangmoq gi, "Haù nghut le gi, náng myoq hkâsu kut wó myang é lú?" ga myí akô.

¹¹ Yhang gi, "Haù Yesuq gâ é byù rayuq, tse-nyhaq ratsuí saí yù lui, ngá é myoqjí má but byí mù, 'Siloam wuihtum má ê chí pyám aq.' ga ngo lé tái ri; haù mù, ngò ê chí pyám é htâng má, ngá myoq wó myang é nghut lhê." ga tù tái ri.

¹² Haù hkùn, yhangmoq gi, "Byù haù yuq gi, hkâmá nyí ri lú?" ga, yhang lé myí akô.

Yhang gi, "Ngò a sé." ga tái ri.

Myoq Dum Myang Byuq É Hkyô Lé, Hparishe Pé Gôn Wú É Hkyô

¹³ Yhangmoq gi, haù myoqjit wú bê sù lé, Hparishe pè chyáng shuí lé akô.

¹⁴ Yesuq, tse-nyhaq saí yù mù, haù yuq é myoq lé lhoq myàng byí é buinyí gi, Bánno buinyí nghut ri.

¹⁵ Haù mù, yhang, myoq hkâsu kut wó myang é hkyô lé, haù Hparishe pé le dum myí akô. Haù jáng, yhang gi, "Haù yuq gi, ngá é myoqjí má tse-nyhaq but byí mù, ngò gi, ê chí pyám jáng, ngá myoq myàng bê nghut lhê." ga tù tái ri.

¹⁶ Haù Hparishe pé ra-am gi, "Shí yuq gi, Bánno buinyí é tarâ lé a châng é sù nghut é yanmai, Garai Gasâng chyáng mai lé é sù a nghut." ga tái akô.

Nghut kôhlang, ra-am gi, "Yubak dap sù rayuq gi, haù su é limik kumlhá pé lé, hkâsu wó kut htoq rã lú?" ga myí akô. Haù mù, yhangmoq gi, myit a huí lhum bùm lò kó nghut ri.

¹⁷ Haù mù, yhangmoq gi, haù myoqjit wú sù shut lhing mù, "Nang lé myoq lhoq myàng byí é sù gi, hkasú é byù nghut lhê nghù, náng tái rã lú?" ga dum myí kôjáng, "Yhang gi, myiqhtoi rayuq nghut ri." ga, yhang tù tái ri.

¹⁸ Haù Yudaq byu pé gi, haù yuq myoqjit wú é hkyô lé le, ahkuí myoq dum myàng bê nghut é hkyô lé le, haù yhâng nu eq yhâng wa lé, é jì lò nhang é hkùn jé shoq, a lumjáng kó nghut ri.

19 Haù mù, Yhangmoq gi, haù yhâng nu eq yhâng wa lé, "Shí yuq gi, nungnhik é yhangzo nghut lhê lú? Hku lé é hkûn mai, myoqjit gù nghut lhê lú? Yhang, ahkuí, hkâsu kut wó myang é lú?" ga myí akô.

20 Haù hkûn, yhâng nu eq yhâng wâ nhik gi, "Yhang gi, ngá-nhik é yhangzo nghut é lé le, hku lé é hkûn mai myoqjit gù nghut é lé le, ngá-nhik sê lhê.

21 Nghut kôlhâng, yhang, ahkuí hkâsu kut wó myang é hkyô lé le, yhâng é myoq lé ó yuq èq lhoq myâng byí é hkyô lé le, ngá-nhik a sé. Yhang, asak wáng bê, yhang lé myí wú keq, yhanggùng yhang dat tái kyo rà nghut lhê." ga tù tái akô.

22 Haù yhâng nu eq yhâng wâ nhik gi, Yudaq byu pé lé gyuq kô é yanmai, haù su ga tái kô é nghut ri; hkâsu mù gà le, Yesuq gi, haù Hkrisduq nghut lhê ga yín yu é sù, ó yuq lé nghut kôle, haù tarajong mai lhoq htoq pyám rà nghut lhê ga, haù Yudaq suwún wuí chôm myit hpyit to bekô nghut é yanmai nghut ri.

23 Hau é yanmai, yhâng nu eq yhâng wâ nhik gi, "Yhang, asak wáng bê, yhang lé myí wú keq." ga tái kô é nghut ri.

24 Haù Hparishe pé gi, myoqjit wú bê sù haù yuq lé dum ji yù mù, "Garai Gasang lé za hkya-on waq toq aq! Haù yuq gi, yubak dap sù rayuq nghut é lé ngamoq sê lhê." ga tái akô.

25 Haù hkûn, yhang tù tái é gi, "Yhang gi, yubak dap sù rayuq nghut lhê luq, a nghut é luq, ngò a sé. Ngò gi, hí lé myoqjit sù nghut kôle, ahkuí wó myâng bê nghut é lé za, ngò ru sê lhê." gà ri.

26 Hau htâng, yhangmoq gi, "Yhang, nang lé haí kut byí ri lú? Náng é myoq lé, yhang, hkâsu kut lhoq myâng byí ri lú?" ga, yhang lé myí akô.

27 Haù hkûn, yhang gi, "Ahkuí za, ngò, nungmoq lé tái kyo bê le, nungmoq sheq a gyo kôluí nhing! Nungmoq gi, haí mù dum gyô nau akô lú? Nungmoq le, Yhâng é chángzô pé dut nau akô lú?" ga taù myí ri.

28 Haù mù, yhangmoq gi, yhang lé gyaí rhoi é dông mai, "Nàng gi, haù yuq é chángzo nghut ri-nhung! Ngamoq kúm gi, Mosheq é chángzô pé ru nghut lhê!

29 Garai Gasang gi, Mosheq lé dâng nyo é hkyô lé, ngamoq sê lhê; nghut kôlhâng, haù yuq eq séng luí, Yhang gi, hkâmai lé é sù nghut é lé lháng, ngamoq a sé." ga tái akô.

30 Haù hkûn, haù yuq gi, "Yhang, ngo lé myoq wó lhoq myang byi kôlhâng, Yhang gi, hkâmai lé é sù nghut é lé, nungmoq a sé kô é gi, mauhpo yhang nghut bê!

31 Garai Gasang gi, yubak dap bâng é dang lé a gyo byí é hkyô lé, nga-nhung sê lhê. Garai Gasang gi, Yhang lé noququq luí, Yhâng ô nau é hkyô lé, kut é sù é dang lé kúm gyo byí lhê.

32 Hku lé é hkûn mai myoqjit gù nghut é byù lé, ó yuq èq myoq lhoq myâng byí é gâ é hkyô lé, mingkan lé joq é hkûn mai, ó yuq le a wó gyô wú é nghut lhê.

33 Haù yuq gi, Garai Gasâng chyáng mai lé é sù za a nghut le gi, haí le wó kut rà a nghut." ga tù tái ri.

34 Haù su ga jâng, yhangmoq gi, "Nàng gi, yubak htui má hku lé é sù nghut to luí nhing, ngamoq lé wám mhoqshit lhê lú?" ga tù tái kôluí, yhang lé hkat htoq pyám akô nghut ri.

³⁵ Yesuq gi, haú yuq lé yhangmoq hkat htoq pyâm é hkyô lé wó gyo lui, yhang lé myàng hui jáng, "Nàng gi, haú Byu Yhangzo lé lumjǐng lhê lú?" ga myí ri.

³⁶ Haú hkún, haú yuq gi, "Yhumsǐng ê, haú gi, ó yuq nghut lhê lú? Yhang lé, ngò wó lumjǐng sháng gaq, taí kyo laq." ga myí ri.

³⁷ Yesuq gi, "Nàng, haú yuq lé myàng wú bê nghut lhê; ahkuí, nàng eq dǎng nyo nyi é sǔ gi, haú yuq yhang nghut lhê." ga taí ri.

³⁸ Haú mù, haú yuq gi, "Yhumsǐng ê, ngò lumjǐng lhê!" ga taí lui, Yhang lé noqkuq ri.

³⁹ Haú hkún, Yesuq gi, "Haú myoqjit bang myoq myàng kó rǎ hkyô eq myoq myàng bang myoqjit kó rǎ hkyô lé, tarǎ jéyáng rǎ matú, mingkan shí má Ngò jé lé é nghut lhê." ga taí ri.

⁴⁰ Yhang eq rahá nghut nyi é Hparishe pé ra-am gi, Yhang haú su ga taí é lé wó gyo kǒjáng, "Hkǎsu htǎ? Ngamoq gi, myoqjit bang dut bê lú?" ga myí akó.

⁴¹ Haú hkún, Yesuq gi, "Nungmoq, myoqjit é bang ru nghut le gi, yubak mara a bò kó rǎ nghut lhê; nghut kǒlhang, ahkuí, nungmoq gi, myoq myàng bang nghut lhê ga kó é yanmai, nungmoq má yubak mara bo ashí kó nghut ri.

10

Sau Zúng Sǔ Eq Sau Hpúng

¹ Ngò, nungmoq lé teng za taí kǒlê, haú sau hkup má, hkúmdong mai a wang e za, gó hkyô dǒng doq lut wang é sǔ gi, hkau sǔ eq damyaq nghut ri.

² Haú hkúmdong maí wang é sǔ kúm gi, sau zúng sǔ nghut ri.

³ Haú hkum zúng sǔ gi, yhang lé hkum hpóng byí é htoq agó, haú sau pé gi, yháng é htê lé gyo byí akó. Yhang gi, yháng é sau pé lé, myǐng lang lui wut yù mù, yhangmoq lé shuí htoq htoq kut nyi ri.

⁴ Yháng é sau pé banshoq lé hpông htoq yù mù, yhang gi, hí má sô ri; sau pé gi, yháng é htê lé sê gyo kó é yanmai, yháng é htáng má chǎng akó nghut ri.

⁵ Nghut kǒlhang, yhangmoq gi, byù bíng é htáng má, hkǎ-nhám lháng chǎng kó rǎ a nghut e za, yháng chyáng maí kúm hpang byuq kó rǎ nghut lhê; hkǎsu mù gǎ le, haú byù bíng é htê lé, yhangmoq a sê gyo kó é yanmai nghut ri." ga taí ri.

⁶ Yesuq gi, dangtú haú lé yù mù, yhangmoq lé taí kyô ri; nghut kǒlhang, yhangmoq gi, Yhang haí taí kyô nyi é lé, a sê gyo kó nghut ri.

⁷ Haú mù, Yesuq dum taí é gi, "Ngò, nungmoq lé teng za taí kǒlê, Ngò gi, haú sau pé wang é hkúmdong nghut lhê.

⁸ Ngá é hí má lé é lhunglhǎng bang gi, hkau bang eq damyaq pé nghut akó; haú sau pé kúm gi, yhangmoq é dang lé a lhom gyo byi kó nghut ri.

⁹ Ngò gi, hkúmdong nghut lhê; Ngò maí wang é sǔ ó yuq nghut kǒlê, hkyi yu é hui rǎ nghut lhê. Haú yuq gi, htoq htoq wàng wàng wó kut rǎ eq mhan-yô myang hô rǎ nghut lhê.

¹⁰ Haú hkau sǔ gi, hkau rǎ, sat rǎ eq lhoq htên pyám rǎ matú, lé e za nghut lhê. Ngo lé é gi, yhangmoq, asak wó yù rǎ eq byǐngjup é asak lé wó yù rǎ matú sheq nghut lhê.

¹¹ Ngò gi, ge é sau zúng sǔ nghut lhê; haú ge é sau zúng sǔ gi, sau pé é matú, yhumsǐng é asak lé ap byi pyám é nghut lhê.

12 Haú langchyang kut sù gi, sau pé lé sing é sau zúng sù a nghut; haú mù, yhang gi, haú wamhkuí lé lo é lé myàng jáng, sau pé lé pyám to mù hpang ló byuq rá nghut lhê; haú hkûn, wamhkuí gi, sau hpúng lé ê htim luí, lhoq pyo pyám rá nghut lhê.

13 Yhang gi, langchyang hpó nghut luí, haú sau pé é matú haí le a myit chiq byí é yanmai, hpang é nghut ri.

14 Ngò gi, haú ge é sau zúng sù nghut lhê; haú Íwa gi, Ngo lé sê é nghut luí, Ngò le, haú Íwa lé sê é eq rajung za,

15 Ngá é sau pé lé, Ngò sê lhê; Ngá é sau pé le, Ngo lé sê akò nghut ri; Ngò gi, haú sau pé é matú, yhumsing é asak lé ap byí pyám é nghut lhê.

16 Ngò gi, sau hkup shí mã é a nghut é gotú sau pé wó ashî; sau haú pé lé le, Ngò, shuí yù ra rá nghut lhê; sau haú pé le, Ngá é htê lé gyo kó rá nghut lhê; haú hkûn, sau hpúng rahpúng za dut luí, sau zúng sù le rayuq za, nghut rá nghut lhê.*

17 Ngò gi, Ngá é asak lé dum wó taú yù sháng gaq ngû, yhumsing é asak lé ap byí pyám é yanmai, Ngá Wa gi, Ngo lé chyitdap é nghut lhê.

18 Ngá é asak lé, ó yuq èq le wó yu pyám é a nghut, Ngá é myit dông byi pyám é ru nghut lhê. Ngò gi, yhumsing asak lé ap byi pyám rá ahko ahkáng eq haú lé dum taú yù rá ahko ahkáng wó sù nghut lhê. Haú gi, Ngá Wá chyang mai Ngò wó yu é hkunmó nghut lhê." gâ ri.

19 Dang haú pé é yanmai, haú Yudaq byu pé gi, myit a huí lhum dum dut byuq bekò nghut ri.

20 Haú mã é bang myo myo gi, "Yhang gi, nat gang wang júng to luí, nâ byuq bê nghut ri. Yhâng é dang lé, haí mù gyò nyi akò lúh?" ga taí bum akò.

21 Nghut kôhang, góbang gi, "Dang shí pé gi, nat gang wang júng tô é byù taí é dang a nghut. Nat gang gi, myoqjit sù lé, myoq wó lhoq myàng nhâng rá lúh?" ga taí bum akò nghut ri.

Yudaq Byu Pé A Lumjúng Kô É Hkyô

22 Yerusalem wà mó má, Ap Nóng Poi* jé bê nghut ri. Haú gi, gyoqmyò nám nghut ri.

23 Haú hkûn, Yesuq gi, haú noqkuq yhûm wàng mã é, Sholumon é Jirop má sô yông wún ri.

24 Haú u lé, haú Yudaq byu pé gi, Yhâng é lhíngkhyuq má lé zîng bùm kômù, "Nàng gi, ngamoq lé hkâ-myháng jé shoq úng-áng nhang nyi rá lúh? Nàng, Hkrisduq nghut le gi, ngamoq lé san za taí kyô pyám laq." ga taí akò.

25 Yesuq gi, "Ngò, nungmoq lé taí kyo bê nghut lhê; nghut kôhang, nungmoq a lumjúng kó nghut ri. Ngá Wá é mying mai, Ngò kut é laklaí kumlhá haú pé gi, Ngá é matú saksé hkâm byí nyi ri.

26 Nghut kôhang, nungmoq gi, Ngá é sau a nghut kô é yanmai, a lumjúng kó nghut ri.

27 Ngá é sau pé gi, Ngá é htê lé dat gyô akò; Ngò gi, yhangmoq lé sê lhê; yhangmoq le, Ngá htâng châng akò nghut ri.

28 Ngò gi, yhangmoq lé, ahtum abyuq é asak byí é nghut mù, yhangmoq gi, hkâ-nhám le htên byoq kó rá a nghut; ó yuq èq le, yhangmoq lé, Ngá é loq mai wó lú yù rá a nghut.

* 10:16 Esai 56:8 * 10:22 Ap Nóng Poi gâ é gi, Garai Gasâng é yhûm lé ap nóng lé gâ lhê.

29 Yhangmoq lé, Ngá é loq má ap byi tô é sù, haù Ngá Wa gi, lunglhang htoq má je gyaù Sù nghut lhê; ó yuq eq le, yhangmoq lé, Ngá Wá é loq mai wó lú yú rã a nghut.

30 Ngò eq haù Íwa gi, rayuq za nghut lhê." ga tú tai ri.

31 Haù hkùn, haù Yudaq byu pé gi, Yesuq lé, dú rã matú luqgok dum kui akô.

32 Nghut kôlháng, Yesuq gi, yhangmoq lé, "Haù Íwã chyang mã é laklai kumlhá mó pé myo myo, Ngò, nungmoq lé tún shit bê nghut lhê. Nungmoq, Ngo lé dú rã gi, hká lhùm é yanmai nghut akô lú?" ga myí ri.

33 Haù Yudaq byu pé gi, "Ngamoq, Nang lé dú rã gi, haù pé hká lhùm é yanmai le a nghut; Nang gi, byù rayuq nghut to lui, Garai Gasang nghut é đông tai whuí lui, Yhang lé rhoi dang tai é yanmai, dú rã nghu lhê." ga tú tai akô.

34 Haù hkùn, Yesuq gi, yhangmoq lé, "Nungmoq gi, garai pé nghut akô nghu, Ngò tai bê nghut lhê."* ga nungmoq é tarã mã kã to lhê a nghut kó lú?

35 Chýumdang haù lé gi, a ge lhoq hpyoq pyâm é nghut lui, haù Garai Gasang é mungdang lé wó yu é bang lé, 'garai pé' gã é nghut le gi,

36 haù Íwa mai, Yhang é matú hkyin htoq yù lui, mingkan mã nhang é Sù eq séng lui gi, hká đông nghu kó rã lú? 'Ngò gi, Garai Gasang é Yhangzo nghut lhê.' nghu tai é yanmai, Ngò gi, Garai Gasang lé tai hpoi ri nghu, nungmoq, hai mù Ngo lé mara hùn akô lú?

37 Ngá Wá é muzó pé lé, Ngò kut é a nghut jáng, Ngo lé hkálumjáng kó.

38 Nghut kôlháng, Ngò, haù pé lé kut é nghut le gi, nungmoq, Ngo lé a lumjáng kôlháng, haù muzó pé lé lumjáng keq; haù hkùn, haù Íwa gi, Ngò mã nghut nyi é hkyô lé le, Ngò gi, haù Íwa mã nghut nyi é hkyô lé le, nungmoq wó sé lui, sê gyo kó rã nghut lhê." ga tú tai ri.

39 Yhangmoq gi, Yhang lé chyup rã dum hen akô; nghut kôlháng, Yhang gi, yhangmoq é loq mai wó lut ló bê nghut ri.

40 Hau htang, Yesuq gi, haù Yodan làng he hpoq mã é, Yohan, wui-myhup hkám byí hi é jowò mã ló jé ri. Haù mã, Yhang nyi nyi é nghut lui,

41 byù myo myo gi, Yhâng chyang lé jé bum akô. Yhangmoq gi, "Yohan gi, limik kumlhá a kut wú é nghut kôlháng, shí yuq eq séng lui, Yohan tai é hkyô lunglhang gi, têng ri." ga tai bum akô.

42 Haù jowò mã, byù myo myo gi, Yesuq lé lumjáng bùm bekô nghut ri.

11

Lazaruq Shi Byuq É Hkyô

1 Ahkuí, Lazaruq gã é byù rayuq gi, no nyi ri. Yhang gi, haù Mariq eq yhangnhá Mahtaq nhik nyi é Behtani wã mã é sù nghut lhê.

2 Mariq haù gi, Yhumsing lé namngón-xù hut gyun lui, hkyí mã yhâng xam eq sùt byí é sù nghut ri; yhang gi, haù no nyi é Lazaruq é yhangnhá nghut ri.

3 Haù mù, haù yhangnhá nhik gi, "Yhumsing é, Nang chyitdap é sù gi, no nyi ri." ga, Yesuq chyang é tai nhang akô.

4 Yesuq gi, dang haù lé wó gyo jáng, "Nòhpyo haù gi, shí-nò a nghut. Haù Garai Gasang é Yhangzo gi, hau é yanmai, hpungwup shinggang wó dan hù é

hui sháng gaq ga, Garai Gasâng é hpungwup shingkâng é matú dut é ru nghut lhê.

⁵ Yesuq gi, Mahtaq eq yhanggu Mariq lé le, Lazaruq lé le, chyitdap ri.

⁶ Haú su mù, Yhang gi, haú Lazaruq no nyi ri gâ é lé, wó gyô é hkûn, haú Yhang nyi é jowô má, í nyi nyi tô ashî nghut ri.

⁷ Hau htâng, Yhang gi, Yhâng é chángzô pé lé, "Nga-nhúng gi, Yuda mau shut dum taú ló sháng," ga taí ri.

⁸ Haú hkûn, yhangmoq gi, "Rabai ê, hkû-yoq za, haú Yudaq byu pé, Nang lé luqgok èq dú sat râ da kô é nghut le nhîng, ahkuí, haú shut dum taú ló râ lúh?" ga Yhang lé myí akô.

⁹ Yesuq gi, "Nyí gi, hkyíng hkum raxe í hkum bo lhê a nghut kó lúh?*" Nyí má hkyô sô é sù gi, mngkan shi é maubó é yanmai myoq myàng luí, lengbat râ a nghut.

¹⁰ Myín lé hkyô sô é sù kúm gi, maubó lé a wó é yanmai, lengbat lhê." ga tú taí ri.

¹¹ Haú su ga taí é htâng má, Yhang, yhangmoq lé xox taí kyô é gi, "Nga-nhúng é luzúm Lazaruq yhup myhî byuq bê nghut ri; nghut kôlhang, Ngò gi, yhang lé ê nhaú toq râ nghut lhê." gâ ri.

¹² Haú hkûn, Yhâng é chángzô pé gi, "Yhumsîng ê, yhang yhup myhî tô é nghut le gi, ge lò râ nghut lhê." gâ taí akô.

¹³ Yesuq gi, Lazaruq shi byuq bê hkyô lé taí é nghut ri; nghut kôlhang, Yhâng é chángzô pé gi, gè gè yhup myhî tô é lé taí é su ngam pyâm akô nghut ri.

¹⁴ Haú mù luí, Yesuq, yhangmoq lé san za jáng taí kyô é gi, "Lazaruq gi, shi byuq bê nghut lhê.

¹⁵ Ngò haú má a nyi záng é gi, nungmoq wó lumjîng râ matú nghut luí, nungmoq é matú Ngò gabú byí ri; yhâng chyáng e ló sháng hkoi." gâ ri.

¹⁶ Haú mù, haú Zozúm le gâ é Htomaq gi, gotú chángzô pé lé, "Nga-nhúng le, Yhang eq rahá shí sháng gaq, châng e ló sháng." ga taí ri.

Haú Í-nhâ Nhik Lé, Yesuq Nhik Tîng É Hkyô

¹⁷ Yesuq gi, jé e é hkûn, haú Lazaruq lé lup má kat pyâm é myi nyí nghut bê hkyô lé, lhom taí kyô akô.

¹⁸ Behtani wà gi, Yerusalem wà mó eq í déng kô za wê lhúm ri.

¹⁹ Haú mù, Yudaq byu pé myo myo gi, Mahtaq eq Mariq nhik é yhanggu shi byuq é yanmai, nhik tîng byi kó râ ga lé jé nyi bum akô nghut ri.

²⁰ Mahtaq gi, Yesuq jé lé lo é hkyô lé wó gyo jáng, htoq é mù, Yhang lé é huí ri; nghut kôlhang, Mariq gi, yhúm má nyi tô ri.

²¹ Mahtaq gi, Yesuq lé, "Yhumsîng ê, Nàng, shí má nyi tô é ru nghut le gi, ngá gu shi byuq râ a nghut.

²² Nghut kôlhang, ahkuí le, Garai Gasâng chyáng Nàng haí dung kôlhang, Yhang byi râ nghut é lé, ngò sê lhê." ga taí ri.

²³ Yesuq gi, yhang lé, "Nung gu, dum dui toq râ nghut lhê." ga taí ri.

²⁴ Haú hkûn, Mahtaq gi, "Haú jilhtúm buinyi má dum dui toq é hkûn, yhang le dum dui toq râ nghut é lé, ngò sê lhê." ga tú taí ri.

²⁵ Haú hkûn, Yesuq gi, yhang lé, "Ngò gi, dum dui toq hkyô eq asak nghut lhê. Ngo lé lumjîng é sù gi, shi byuq kôlhang, dum dui râ nghut lhê.

* **11:9** Nyí gi, hkyíng hkum raxe í hkum bo lhê a nghut kó lúh? gâ é gi, ahkyíng a jé shimá, muzô nô é gi, a ge é nghut lhê gâ é nghut ri.

26 Asak dui nyi lui, Ngo lé lumjǐng é sũ ó yuq nghut kôle, hkâ-nhám le shí é hui râ a nghut. Nang gi, dang shí lé lumjǐng lhê lúhú?" ga tai ri.

27 Haú hkún, yang gi, "Yhumsǐng ê, ngò lumjǐng lhê. Nang gi, haú mingkan má jé lé lô râ nghut é, Garai Gasâng é Yhangzo, Hkrisduq† nghut é lé, ngò lumjǐng lhê." ga, Yhang lé tai kyô ri.

28 Yhang gi, haú su ga tai é htàng má, taú ló mù, yanggu Mariq lé, tsik za wut yù lui, "Haú Sará jé tó ri; Yhang gi, nang lé myi nyi ri." ga tai kyô ri.

29 Mariq gi, haú lé wó gyo jáng, hân za toq mù, Yesuq chyáng ê bê nghut ri.

30 Haú u lé, Yesuq gi, haú wâ hkaú má a wang ló shí e za, Mahtaq eq hui é jowò má ru nyi tô ashí nghut ri.

31 Haú yúm hkaú má, Mariq lé nhik tǐng nyi é Yudaq byu pé gi, yang hân za toq lui, htoq ló é lé myàng kôjáng, yang, lup má é ngaú râ dâ lhê abe ga, myit yù kômù, yang htàng châng e ló bum akò nghut ri.

32 Mariq gi, Yesuq nyi tô é jang má jé mù, Yhang lé myàng jáng, Yhâng é hkyi wang má ngóm gop to lui, "Yhumsǐng ê, Nang, shí má nyi tô é ru nghut le gi, ngá gu shi byuq râ a nghut." ga tai ri.

33 Yesuq gi, Mariq ngaú nyi é lé le, haú yang eq rahá lé lo é Yudaq byu pé ngaú nyi kô é lé le, myàng jáng, Yhâng é myit má gyai yang hkâm zo wui é eq myit wui myit hke dut nyi ri.

34 Haú mù, Yhang gi, "Yhang lé, hkâmá tô tô akò lúhú?" ga myi jáng, yangmoq gi, "Yhumsǐng ê, lé wú wú aq." ga tũ tai akò.

35 Yesuq gi, ngaú bê nghut ri.

36 Haú mù, haú Yudaq byu pé gi, "Wú keq, Yhang gi, Lazaruq lé, haú-i yang chyit ri-nhung!" ga tai akò.

37 Nghut kôhang, ra-am gi, "Haú myoqjit sũ lé, myoq wó lhoq myâng byi é Sũ gi, shí yuq lé le, a shí lo shoq a wó kut é lúhú?" ga tai bum akò nghut ri.

Lazaruq Lé Lhoq Dui Toq É Hkyô

38 Yesuq gi, Yhâng é myit má radàm dum gyai yang hkâm zo wui é eq, lup má lé jé ri. Lup haú gi, luqhkýung dong nghut lui, luqgok rachâm eq chi tô akò.

39 Haú mù, Yhang gi, "Luqgok haú lé yu pyám keq." ga tai ri.

Haú hkún, haú shi byuq su é yhângnhá Mahtaq gi, "Yhumsǐng ê, yang lé, haú má tô tô é myi nyi lhang nghut bê yanmai, ahkuí gi, bup nàm berâ nghut lhê." ga tai ri.

40 Haú mù, Yesuq gi, "Nang, lumjǐng é nghut le gi, haú Garai Gasâng é hpungwup shingkan lé, wó myâng râ nghut lhê nghú, Ngò, nang lé tai kyô wú bê a nghut lúhú?" ga tai ri.

41 Haú mù lui, yangmoq gi, luqgok haú lé yu pyám akò. Hau htàng, Yesuq gi, mauhkung shut tu wú lui, "Áwa ê, Nang, Ngá é dang lé gyo byi é yanmai, Ngò, Nang lé jeju hkya-ôn lhê.

42 Nang gi, hkâ-nhám le, Ngá é dang lé gyo byi nyi é lé, Ngò sê lhê; nghut kôhang, Nang, Ngo lé nhang kat é hkyô lé, shí má yap tô é bang lumjǐng kó sháng gaq nghú, yangmoq é matú, Ngò, isu nghú tai é nghut lhê." ga tai ri.

43 Yhang gi, haú su ga tai lui, "Lazaruq ê, htoq lô aq." ga hté mó eq wut kat ri.

44 Haú hkún, haú shi byuq bê sũ gi, yhâng é loq hkyi pé má pân eq htop yup to gũ eq, yhâng é myoqdong má hpajet eq htop to gũ htoq lo ri.

† 11:27 Hkrisduq lé Mesaia le gâ lhê.

Haù mù, Yesuq gi, yhangmoq lé, "Yhang lé hpyi pyám byi mù, nhang kat keq." ga taì ri.

Yesuq Lé Sat Pyám Râ Haq Dâ É Hkyô
Mht 26:1-5; Mrk 14:1-2; Luk 22:1-2

⁴⁵ Haù mù luí, Mariq chyáng lé kûn é Yudaq byu pé myo myo gi, Yesuq kut é hkyô lé myàng jáng, Yesuq lé lumjíng bùm bekô nghut ri.

⁴⁶ Nghut kôhlang, yhangmoq chyáng mã é ra-am gi, haù Hparishe pé chyáng ló mù, Yesuq kut é hkyô lé, ló taì kyô akô.

⁴⁷ Haù mù, haù hkyangjong agyi pé eq Hparishe pé gi, Yudaq byìn tú wapdoq‡ zuphpong lé ji tsíng to mù, "Byù shí yuq gi, limik kumlhá myo myo kut shit nyi ri. Nga-nhúng, hkâsu kut le gè rà lhú?

⁴⁸ Nga-nhúng, Yhang lé haù su ru kut nyí nhang é nghut jáng, yuq hkanmó gi, Yhang lé lumjíng kó rà nghut lhê; haù hkûn, Romaq byu pé gi, jé lé mù, nga-nhúng é jowò eq nga-nhúng é byuhú lé, lé lhoq htên pyám kó rà nghut lhê." ga taì akô nghut ri.

⁴⁹ Haù hkûn, yhangmoq chyáng mã é, haù zân má hkyangjong mó nghut nyi é sù, Kayahpaq gi, yhangmoq lé, "Nungmoq gi, haì lháng a sé kó nghut ri-nhung!

⁵⁰ Haù byuhú gón htên byoq byuq rà htoq má, byuhú hau é matú, byù rayuq shí hkâm byi le gi, nungmoq é matú je gè rà hkyô lé, nungmoq, a myit jé kó nghut ri." ga taì kat ri.

⁵¹ Yhang haù su ga taì é gi, yhumsing myit dông a nghut e za, haù zân má, yhang gi, hkyangjong mó nghut é eq rajung za, haù Yudaq byuhú é matú, Yesuq shí hkâm byi rà nghut é hkyô lé le,

⁵² byuhú hau é matú haù a nghut e za, haù byo myín tô é, Garai Gasâng é yhangzô pé lé, shuí tsíng yù mù, rading ralhum za dut nhâng rà matú, shí hkâm byi rà nghut é hkyô lé le, myiqhtoi dang taì é ru nghut lhê.

⁵³ Haù nyí mai, yhangmoq gi, Yesuq lé sat rà matú chòm da bekô nghut ri.

⁵⁴ Hau é yanmai, Yesuq gi, Yudaq byu pé gyoq má, de de a sô shit wún e za, haù mai htoq luí, haù yoso eq chyáng lhùm é mau mã é, Ehprim gâ é wà má é mù, Yhâng é chángzô pé eq rahá nyi nyi ri.

⁵⁵ Haù Yudaq byu pé é Lhoqlhai Poí jé rà za nghut é hkûn, byù myo myo gi, Lhoqlhai Poí a jé shi má, lhoq san lhoq yúng hking dông yhumsing gùng lé lhoq sân-yúng yù rà matú, yosô wà pé mai, Yerusalem wà mó shut doq ló bum akô.

⁵⁶ Haù mù, yhangmoq gi, Yesuq lé ho nyi kô é nghut luí, haù noqkuq yhùm wàng má yap to uchyang, rayuq eq rayuq, "Nungmoq, hkâsu wó myit akô lhú? Yhang gi, Poí má a lé lô rà gâ lhê là?" ga myí lhùm bum akô.

⁵⁷ Nghut kôhlang, haù hkyangjong agyi pé eq Hparishe pé gi, Yesuq lé wó chyup yù rà matú, Yesuq hkâmá nyi é lé, sê é sù ó yuq nghut kôle, yhangmoq lé lo shit kyo rà lhê ga dangmó hkyó tô akô nghut ri.

12

Yesuq, Namngón-xù But Byi Huí É Hkyô
Mht 26:6-13; Mrk 14:3-9

¹ Haù Lhoqlhai Poí jé rà hkyuq nyí rà ashí hkûn, Yesuq gi, Yhâng èq shi é mai lhoq dui toq yu é sù, Lazaruq nyi é Behtani wà má ló jé ri.

‡ 11:47 Yudaq byìn tú wapdoq lé Grik dông gi, San-hedrin gâ lhê.

² Haù má, Yesuq lé hkunggâ é dông myinzang byi tsô akô; Mahtaq gi, zoshuq jaù ri; Lazaruq gi, haù Yesuq eq rahá siboí má zô zung nyi bang má é rayuq nghut ri.

³ Haù hkún, Mariq gi, haù nardu amyit mai za saí yu é, gyai hpaù é namngón-xù raxe í rúng kô yu lé mù, Yesuq é hkyí má hut gyun byi luí, yhâng é uxam éq sùt byí ri. Haù mù, yhùm haù gi, namngón-xù shôm byíng to bê nghut ri.

⁴ Nghut kôlhang, Yesuq lé ap pyám rá nghut é, Yhâng é chángzo rayuq nghut sù, Yudaq Iskarut gi,

⁵ "Haù myùng bang lé byí pyám rá matú, haù namngón-xù lé denari sum sho éq haí mù a ùng pyám é lúh?" ga taí ri.

⁶ Yhang haù su ga taí é gi, myùng bang lé chiq byí é yanmai taí é a nghut, yhang gi, ngùn htúng chùng sù nghut luí, haù má kat tô é ngùn lé, yhumsing é matú lhaq yu chùng chùng kut é, hkau sù nghut é yanmai taí é nghut ri.

⁷ Yesuq gi, "Nghut shang gaq; yhang gi, Ngo lé myhup yhum rá buinyi é matú, namngón-xù shí lé hkong to byí é nghut lhê.

⁸ Haù myùng bang gi, nungmoq eq rahá hkâ-nhám le nyi rá nghut lhê; nghut kôlhang, Ngò gi, nungmoq eq rahá ayang nyi nyi rá sù a nghut." ga tú taí ri.

⁹ Haù u lé, Yudaq byu pé ajùm ayò gi, haù má Yesuq nyi é lé sé kôluí, lé lo akô; haù bang gi, Yesuq é yanmai za lé kô é a nghut, haù Yhâng éq shí bê mai lhoq dui toq yu é Lazaruq lé, lé myàng naù kô é yanmai le nghut ri.

¹⁰ Haù mù, haù hkyangjong agyí pé gi, Lazaruq lé le, sat pyám rá matú chôm hpyê lhum akô.

¹¹ Hkâsu mù gâ le, yhâng é yanmai, haù Yudaq byu pé myo myo gi, Yesuq chyáng lhing ló kômù, Yhang lé lumjúng bùm kô é yanmai nghut ri.

Yesuq, Yerusalem Wà Mó Má Wang E Ló É Hkyô

Mht 21:1-11; Mrk 11:1-11; Luk 19:28-40

¹² Hau htang nyi, haù Poí má lé jé é byù moq mó gi, Yerusalem wà mó shut Yesuq jé doq ló é hkyô lé, wó gyô bum akô.

¹³ Haù mù, yhangmoq gi, byùm-haq pé yu chùng mù, Yhang lé ê tê uchyang, "Hosana!"*

Haù Yhumsing é mying mai jé lé lô Sù gi, hkungsô wó nyí sháng gaq ô!

Haù Israelaq byu pé é Hkohlkâm gi, hkungsô wó nyí sháng gaq!"[☆]

ga, taí garù bum akô nghut ri.

¹⁴ Haù hkún, Yesuq gi, logúng zo radu lé myàng luí, doq jì ri;

¹⁵ haù gi, "Zi-un byizo[†] é, hkâgyuq; wú keq, nungmoq é hkohlkâm gi, logúng zo má jì mù lé lo nyi ri."[☆]

ga, kâ tô é eq rajung za nghut ri.

¹⁶ Haù pé banshoq lé, Yhâng é chángzô pé gi, sâng-hi lé a sê gyo kó; nghut kôlhang, Yesuq gi, hpungwup shingkang dan hu huí é htàng má za sheq, haù pé gi, Yhang eq séng luí kâ tô é hkyô lé le, haù eq rajung za, Yhang lé, yhangmoq mai kut bê hkyô lé le, bûn sê kat akô nghut ri.

¹⁷ Haù Yesuq gi, lup hkaù má é Lazaruq lé wut luí, shi é mai lhoq dui toq yu é hkún, Yhang eq rahá nghut é shiwa hpúng gi, haù hkyô lé, saksé hkâm byí nyi akô.

* **12:13** Hebre dang má, *hosana* gâ é gi, "ahkuí hkyi yù aq" gâ é nghut lhê. Nghut kôlhang, bun zo shí má gi, hkyá-on dang dông chung é nghut lhê. [☆] **12:13** Hkya-on 118:25-26 [†] **12:15** Hebre mying dông *Zi-un byizo* gâ é gi, Yerusalem má é byu pé lé gâ é nghut lhê. [☆] **12:15** Zhk 9:9

18 Haù mù, byù myo myo gi, Yesuq tùn shit é limik kumlhá hau é hkyô lé, wó gyo kô é yanmai, Yhang lé hui rà matú htoq e akô.

19 Hau é yanmai, haù Hparishe pé gi, "Wú keq, nga-nhúng, hkâsu yhang a ge kut lo nhung! Haù mingkan gón gi, Yhâng htâng châng bùm bekô." ga, rayuq eq rayuq taì lhùm bum akô nghut ri.

Yesuq, Yhang Shí Râ Hkyô Lé Te Tai É Hkyô

20 Haù hkùn, noqkuq rà matú Poi má doq ló é bang má, Grik pé ra-am le bo tô akô.

21 Yhangmoq gi, Galile mau, Bet-saida wà mó má é Hpilip chyáng lé jé kômù, "Âhkaù ê, ngamoq gi, Yesuq lé myàng nau ri." ga, dung tóngbán akô.

22 Haù mù, Hpilip gi, Andre lé, ê taì kyô ri; Andre eq yháng nhik gi, Yesuq lé, ê taì kyô akô.

23 Haù mù, Yesuq gi, "Haù Byu Yhangzo gi, hpungwup shingkang dan hù é hui rà matú, ahkyíng jé bê nghut ri.

24 Ngò, nungmoq lé teng za taì kôlé, sunsô racham gi, myigùng má gyó luí, shi byuq e za a nghut jáng, acham roq za dut nyi rà nghut lhê. Nghut kôlhang, shi byuq é nghut le gi, ashí myo myo lhoq htoq rà nghut lhê.

25 Haù yhumsing é asak lé chyitdap é sù gi, asak sùm byuq rà nghut lhê. Mingkan shí má, haù yhumsing é asak lé a jú é sù kúm gi, ahtum abyuq é asak matú, yhumsing é asak lé wó sing to rà nghut lhê.

26 Ngo lé dojaù é sù ó yuq nghut kôle, Ngá htâng cháng rà lhê; Ngò, hkâmá nyi le, Ngá é dui-nhâng zoshâng le nyi rà nghut lhê. Ngá Wa gi, haù Ngo lé dojaù é sù lé, shigyaù rà nghut lhê.

27 Ahkuí, Ngò, myit wuìhke nyi ri; Ngò hkâsu nghú taì rà lhi? 'Áwa ê, ahkyíng shí mai Ngo lé lhoq lhut yù laq.' nghú taì rà lhu? Nghut kôle, Ngò gi, ahkyíng shí é matú za sheq jé lé é ru nghut lhê.

28 Áwa ê, Náng é myìng lé hpungwup shingkang dan hu nhâng aq hkoi!" ga taì ri.

Haù hkùn, "Ngò gi, Ngá é myìng lé hpungwup shingkang dan hu nhâng bê nghut luí, dum dan hu nhâng shirâ nghut lhê." gá é htê, mauhkúng mai htoq lo ri.

29 Haù má nyi tô é byù moq mó gi, haù lé wó gyo kôjáng, "Maugum gum ri." gâ bum akô; ra-am gi, "Yhang lé, maumang lagyo rayuq nyo ri." ga taì bum akô nghut ri.

30 Haù hkùn, Yesuq gi, "Danghtê shí gi, Ngá é matú a nghut, nungmoq é matú ru nghut lhê.

31 Ahkuí gi, mingkan shí lé jéyáng rà ahkyíng nghut bê; mingkan shi é zau gi, ahkuí hkat htoq pyâm é hui rà nghut lhê.

32 Nghut kôlhang, Ngò gi, myigùng mai tu shap kat é huí é hkùn, byù lhunglhâng bang lé, Ngá chyáng shê yù rà nghut lhê." ga taì ri.

33 Yhang haù su ga taì é gi, Yhang hkâsu kut shí rà nghut é hkyô lé shit é nghut ri.

34 Haù hkùn, haù byù moq mó gi, "Haù tarâ laiká má, Hkrisduq gi, ahtum abyuq dui nyi rà nghut lhê gá é lé sheq, ngamoq wó gyô wú é ru nghut le nhúng, 'Haù Byu Yhangzo gi, tu shap é hui rà rà nghut lhê.' nghú, Náng hkâsu kut wó taì lhê lhu? Haù Byu Yhangzo gi, ó yuq nghut lhê lhu?" ga, myí akô.

35 Haù mù, Yesuq gi, yhangmoq lé, "Nungmoq chyáng, haù maubó joq nyi rà ahkyíng gi, a lùm myáng lo nghut ri. Mauchut gi, nungmoq chyáng a hkyit jé

sháng gaq, nungmoq chyáng, haù maubó joq nyi ashí hkûn sô nyi keq; hkâsu mù gà le, haù mauchut má sô nyi é sù gi, yang hká shut e ló nyi é lé, a sé nghut ri.

³⁶ Nungmoq gi, maubó é yangzô pé wó dut kó sháng gaq, haù maubó joq nyi ashí hkûn, haù lé lumjǐng keq." ga taí ri. Yesuq gi, dang haù ban taí jáng, yangmoq chyáng mai htoq ló luí, haq byuq bê nghut ri.

Yudaq Byu Pé, A Lumjǐng Ru Dut Nyi Kô É Hkyô

³⁷ Yesuq gi, yangmoq é hí má, limik kumlhá haù pé banshoq kut shit kôlháng, yangmoq gi, Yang lé a lumjǐng shi kó nghut ri.

³⁸ Haù gi,

"Yhumsǐng ê, nga-nhûng é danglù lé, ó yuq wá lumjǐng byí wú é lúh? Haù Yhumsǐng é loq[‡] gi, ó yuq lé htoq shit wú é lúh?"[✧]
ga, myiqttoi Esai-aq taí tô é dang lo dik é nghut ri.

³⁹ Yangmoq a wó lumjǐng kô é hkyô gi, Esai-aq taí é dang má,

⁴⁰ "Yang gi, yangmoq é myoqjí lé lhoq chit byi luí, yangmoq é i-myt lé lhoq htan to byi bê nghut ri;

haù mù, yangmoq gi, myoqjí èq a wó myâng, i-myt èq a wó sê gyo, Ngò, yangmoq lé yá ge byi rá matú, a wó lhing taù lò kó dut rá nghut lhê."[✧]
ga le bo tô é yanmai nghut lhê.

⁴¹ Esai-aq gi, Yesuq é hpungwup shingkang lé myang é yanmai, Yang eq sêng é hkyô lé, haù su ga taí é nghut ri.

⁴² Nghut kôlháng, haù uphkâng bang myo myo lháng gi, haù u má, Yesuq lé lumjǐng bum akô. Nghut kôle, yangmoq gi, Hparishe pé èq tarajong mai lhoq htoq pyâm é hui rá lé, gyuq kô é yanmai, yangmoq lumjǐng bê hkyô lé a yín yu bùm kó nghut ri.

⁴³ Hkâsu mù gà le, yangmoq gi, Garai Gasâng chyáng mã é aróng lé, ô nau é htoq má, byu pé chyáng mã é aróng lé, je ô nau kô é yanmai nghut ri.

⁴⁴ Haù mù, Yesuq, htê mó èq taí é gi, "Ngo lé lumjǐng é sù gi, Ngo lé baù lumjǐng é a nghut; haù Ngo lé nhang kat é Sù lé le, lumjǐng é nghut lhê.

⁴⁵ Ngo lé myang é sù gi, haù Ngo lé nhang kat é Sù lé le myang é nghut lhê.

⁴⁶ Ngò gi, Ngo lé lumjǐng é sù ó yuq le, mauchut hkaù má a nyi sháng gaq nghù, maubó dông mingkan má lé jé jé é nghut lhê.

⁴⁷ Ngò gi, Ngá é dang lé wó gyo luí, a châng é sù ó yuq lé le, jéyáng rá a nghut; hkâsu mù gà le, Ngò gi, mingkan lé jéyáng rá matú jé lé é a nghut; haù mingkan lé hkyi yù rá matú sheq, jé lé é ru nghut lhê.

⁴⁸ Ngo lé he-ngik luí Ngá é dang lé a hap yu é sù lé, jéyáng rá Sù rayuq nyi lhê; Ngò taí é danghkun haù gi, haù jihtùm buinyi má, haù yuq lé mara byi rá nghut lhê.

⁴⁹ Hkâsu mù gà le, Ngò gi, Ngá é myit dông taí é a nghut; nghut kôlháng, Ngò haí taí rá eq hkâsu nghù taí rá lé gi, haù Ngo lé nhang kat é sù Íwa mai, Ngo lé hkunmó hkyô to bê nghut lhê.

⁵⁰ Haù Yhâng é hkunmó gi, ahtum abyuq é asak nghut é lé, Ngò sê lhê. Haù mù luí, Ngò, haí taí kôlé, haù Íwa mai Ngo lé taí kyô é lé za, taí é nghut lhê." gá ri.

[‡] 12:38 Yhumsǐng é loq gà é gi, Yhumsǐng é hpungwup a-tsam lé gà é nghut lhê. [✧] 12:38 Esai 53:1

[✧] 12:40 Esai 6:10

13

Chángzô Pé É Hkyî Chi Byî É Hkyô

1 Haù Lhoqlhai Poi jé rà hí má za, Yesuq gi, Yhang, mingkan shí mai Yhâng Wâ chyáng htot ló rà ahkyíng jé bê hkyô lé, sê ri. Yhang gi, mingkan má nyî é, Yhâng é byu pé lé chyitdap nyî é nghut luí, jihúm jé shoq Yhâng é chyitdap myit lé shit rà nghut lhê.

2 Myinzang zô nyi bùm kô é u lé, nat Tsadán gi, Simun é yhangzo Yudaq Iskarut chyáng, Yesuq lé ap pyám rà myit kat byî to gú nghut ri.

3 Yesuq gi, haù lunglhang lé Iwa mai Yhâng é loq má ap byi to bê nghut é lé, Yhang gi, Garai Gasâng chyáng mai lé é sù nghut luí, Garai Gasâng chyáng dum tau ló rà sù nghut é lé le, sê ri.

4 Haù mù, Yhang gi, zohpoq mai toq luí, Yhâng é bumó lé hkyut pyám mù, hpyidum má hpajet ralhùm eq hpyihit hit tó ri.

5 Hau htâng, Yhang gi, jirung má uchyam hut kat mù, Yhâng é chángzô pé é hkyî chi byi luí, haù Yhâng é hpyidum má hit tó é hpajet eq sut huí byî ri.

6 Yhang gi, Simun Petruq chyáng jé jáng, Simun Petruq gi, "Yhumsîng é, Nàng gi, ngá hkyî lé chi byi rà nghut lhê lú?" ga myî ri.

7 Haù hkún, Yesuq gi, "Ngò, hai kut nyi é hkyô lé, ahkuí, nàng sê gyo rà a nghut; nghut kôlhang, htâng má sê gyo rà nghut lhê." ga tú tai ri.

8 Petruq gi, "Ngá hkyî lé, Nàng, hkâ-nhám le wó chi byi rà a nghut." ga tai jáng, Yesuq gi, "Nang lé, Ngò a chi byî é nghut jáng, nàng gi, Ngò eq séng rà a nghut." ga tú tai ri.

9 Haù hkún, Simun Petruq gi, "Yhumsîng é, haù su nghut jáng gi, ngá é hkyî lé baú za a nghut, ngá é loq eq ulhum lé le chi byi laq!" ga tú tai ri.

10 Yesuq gi, "Gùng chi bê sù gi, hkyî za chi jáng, ragùngdú é sanséng bê nghut ri. Nungmoq gi, sanséng bekô; nghut kôlhang, yuq hkangmó gi, sanséng é a nghut." ga tú tai ri.

11 Hkâsu mù gâ le, Yhang gi, Yhang lé ap pyám rà sù ó yuq nghut é lé, sê é yanmai, "Nungmoq gi, sanséng é bang chyat a nghut." ga tai é nghut ri.

12 Yesuq gi, yhangmoq é hkyî lé ban chi byi jáng, Yhâng é bumó lé wut mù, Yhâng é jowò má ló dum zùng luí, yhangmoq lé myi é gi, "Nungmoq gi, ahkuí, ngò kut byî é hkyô lé, sê gyo akô lú?"

13 Nungmoq, Ngo lé, 'Sarâ' ga le, 'Yhumsîng' ga le, wut kô é gi, a shut; hkâsu mù gâ le, Ngò gi, haù yuq yhang nghut lhê.

14 Ngò, nungmoq é Sarâ eq Yhumsîng nghut sù lhang, nungmoq é hkyî lé chi byî é nghut le gi, nungmoq le, rayuq eq rayuq é hkyî lé chi byî lhum rà dut lhê.

15 Nungmoq gi, Ngò, nungmoq lé kut byî é su kut kó sháng gaq nghú, Ngò, nungmoq lé alik kut shit tó é nghut lhê.

16 Ngò, nungmoq lé teng za tai kôlé, dui-nhâng zoshâng gi, yhumsîng htoq je kô é a nghut; lagyo gi, nhang kat é sù htoq je kô é a nghut.

17 Ahkuí, nungmoq gi, haù pé lé sé bekô nghut luí, châng kut kô é nghut jáng, hkungsô wó kó rà nghut lhê.

Yesuq Lé Ap Pyám Râ Lé, Te Tai É Hkyô

18 Ngò gi, nungmoq banshoq bang lé lhoq ang luí tai é a nghut; Ngò hkyin yu é bang lé gi, Ngò sê lhê. Nghut kôlhang, 'Haù ngá é muk lé bo zô é sù gi, ngo

lé, yhâng é hkyihtáng la-nhik éq nâng htíng rã nghut lhê.*[☆] gâ é Chyúmdang lé, lhoq dik rã matú ru nghut lhê.

¹⁹ Haú a dut htoq shimá, Ngò, nungmoq lé taí kyô nyi é gi, haú dut é hkún, Ngò gi, haú Yuq* nghut é lé, nungmoq wó lumjínng kó rã matú nghut lhê.

²⁰ Ngò, nungmoq lé teng za taí kôlé, Ngò nhang kat é sù lé, lhom hap yu é sù ó yuq nghut kôlé, Ngo lé hap yu é nghut bê; Ngo lé hap yu é sù ó yuq nghut kôlé, haú Ngo lé nhang kat é Sù lé hap yu é nghut bê." gâ ri.

²¹ Yesuq gi, haú su ga taí é htâng má, myit wuihke nyi mù, saksé hkâm é gi, "Ngò, nungmoq lé teng za taí kôlé, nungmoq mâ é rayuq sù gi, Ngo lé ap pyám rã nghut lhê." gâ ri.

²² Haú mù, Yhâng é chángzô pé gi, ó yuq lé taí záng nyi é hkyô lé, rago a sé kô é yanmai, rayuq eq rayuq wú tsuq lhúm bum akò nghut ri.

²³ Haú Yesuq chyitdap é chángzo rayuq gi, Yesuq é tanghkoí nâm má leq nge zung tô ri.

²⁴ Haú mù, Simun Petruq gi, chángzo haú yuq lé, loq lik kat mù, "Yhang, ó yuq lé lhoq ang luí, taí nyi é hkyô lé, myi wú aq." ga taí ri.

²⁵ Haú mù, chángzo haú gi, Yesuq é tanghkoí má sai leq nge zung mù, "Yhumsing é, haú gi, ó yuq nghut lhê lhu?" ga, Yhang lé myi ri.

²⁶ Yesuq gi, "Ngò, muk jap zo shí lé jum yù mù, byí é sù gi, haú yuq nghut lhê." ga tú taí luí, muk jap zo haú lé jum yù mù, Simun é yhangzo Yudaq Iskarut lé byí ri.

²⁷ Yudaq gi, muk haú lé yù zo kat é eq, Tsadán gi, yhâng chyáng wàng bê nghut ri.

Haú mù, Yesuq gi, "Nàng kut rã é hkyô lé, hân kut aq hkoi." ga yhang lé taí kat ri.

²⁸ Nghut kôlháng, yhang lé, Yesuq haú su ga haí mù taí é hkyô lé, zohpoq haú má nyi tô é bang gi, rayuq lháng a sê gyo kó nghut ri.

²⁹ Haú Yudaq gi, ngùn zum sù nghut é yanmai, ra-am gi, haú Poí má rã é hkyô lé, é wui rã matú, Yesuq taí ri ga luí le, myùng bang lé rajung jung byí nhang ri ga luí le, myit yu bum akò nghut ri.

³⁰ Yudaq gi, muk haú lé lhom yù eq, htoq ló byuq bê nghut ri. Haú u gi, mauchut bê nghut ri.

Petruq He-ngik Pyám Rã Lé, Yesuq Te Tai É Hkyô

Mht 26:31-35; Mrk 14:27-31; Luk 22:31-34

³¹ Haú yuq htoq ló byuq jáng, Yesuq taí é gi, "Ahkuí, haú Byu Yhangzo gi, hpungwup shingkang dan hù é nghut luí, Garai Gasang gi, haú Byu Yhangzô é yanmai, hpungwup shingkang dan hu bê nghut ri.

³² Garai Gasang gi, haú Byu Yhangzô é yanmai, hpungwup shingkang dan hù é nghut jáng, Yhang le, Yhang má haú Zo lé hpungwup shingkang dan hu nhâng rã nghut lhê; radá dâm dan hu nhâng rã nghut lhê.

³³ Ngá zo pé é, Ngò, nungmoq eq rahá nyi rã gi, razup za ru nghut alô. Nungmoq gi, Ngo lé hô kó rã nghut lhê; nghut kôlháng, 'Ngò ló é jang má, nungmoq wó jé kó rã a nghut.' nghú, haú Yudaq byu pé lé, Ngò taí é eq rajung za, ahkuí, nungmoq lé le, Ngò taí lhê.

³⁴ Ngò, nungmoq lé, hkunmó asik byi to kô lé, nungmoq yhangchang chyitdap lhum keq. Ngò, nungmoq lé chyitdap é su, nungmoq yhangchang chyitdap lhum rã dut lhê.

³⁵ Nungmoq yhangchang chyitdap lhum kô é nghut jáng, nungmoq gi, Ngá é chángzô pé nghut é hkyô lé, byù lunglhang bang sé kó rá nghut lê." gâ ri.

³⁶ Haù hkùn, Simun Petruq gi, "Yhumsing ê, Nàng, hká shut ló rá lúhú?" ga, Yhang lé myi jáng, Yhang gi, "Ngò ló é jang má, nungmoq, ahkuí a wó cháng kó rá nghut lê. Nghut kôlhang, htàng má gi, nungmoq cháng ra kó rá nghut lê." ga tú taí ri.

³⁷ Petruq gi, "Yhumsing ê, haí mù luí, ahkuí ngò Nàng htàng a wó cháng é lúhú? Ngò gi, Nàng é matú, shí hkám rá rì rì nghut lê." ga taí ri.

³⁸ Haù mù, Yesuq taí é gi, "Nàng gi, gè gè yhang, Ngá é matú shí hkám rá lúhú? Ngò, nàng lé teng za taí lé, woq a tún shimá, nàng, Ngo lé sum dâm he-ngik pyám rá nghut lê.

14

Yesuq, Yhâng É Chángzô Pé Lé Nhik Ting É Hkyô

¹ Nungmoq é i-myt nhiklhum lé, myit wui myit hkê hkâdut nhâng kó. Garai Gasang lé lùm keq; Ngo lé lùm keq.

² Ngá Wâ é yhùm má, nyi jowò myo myo joq lhê; a joq é ru nghut le gi, noq mai, Ngò, nungmoq lé taí kyo rá nghut lê. Ngò, haù má ló é gi, nungmoq é nyi jowò ló hên láng rá matú ru nghut lê.

³ Ngò gi, ló mù, nungmoq é matú nyi jowò ló hen é nghut jáng, Ngò nyi é jang má nungmoq le wó nyi shoq, Ngò eq rahá nyi rá matú, Ngò dum taù lé mù, nungmoq lé, lé shuí yù rá nghut lê.

⁴ Ngò ló é jang má jé é hkyô lé, nungmoq sê lhê." gâ ri.

Yesuq Za Hkyô

⁵ Haù hkùn, Htomaq gi, Yhang lé, "Yhumsing ê, Nàng hká shut ló é lé lhang, ngamoq a sê le nhing, hkyô haù lé, ngamoq hkâsu kut wó sé rá lúhú?" ga myí ri.

⁶ Yesuq gi, "Ngò gi, hkyô nghut lhê; haù tengmán hkyô eq asak le nghut lhê. Ngò mai za a nghut jáng, ó yuq le, Íwâ chyáng wó jé é a nghut.

⁷ Nungmoq, gè gè yhang, Ngo lé sé kô é nghut le gi, Ngá Wa lé le, nungmoq sé kó rá nghut lhê. Ahkuí mai, nungmoq gi, Yhang lé sé kô é htoq agó, myàng le myang wú bekô nghut lhê." ga tú taí ri.

⁸ Haù hkùn, Hpilip gi, "Yhumsing ê, ngamoq lé, haù Íwâ tún shit laq, haù hkùn, ngamoq nhik shí rá nghut lhê." ga taí ri.

⁹ Yesuq tú taí é gi, "Hpilip ê, Ngò, nungmoq eq shí myáng lhang nyi lò bê le nhing, nàng, Ngo lé a sé lúhú? Ngo lé myang é sù gi, haù Íwâ lé myàng bê nghut ri; haù nghut le nhing, 'Ngamoq lé, haù Íwâ tún shit laq.' nghú, nàng hkâsu wó taí lhê lúhú?

¹⁰ Ngò gi, haù Íwâ má nghut nyí luí, haù Íwâ gi, Ngò má nghut nyi é hkyô lé, nàng a lumjing lúhú? Ngò, nungmoq lé taí é dang haù pé gi, Ngá é myit mai taí é a nghut; haù Ngò má lúng nyi é Íwâ sheq, Yhâng é mù zuí nyi é ru nghut lhê.

¹¹ Ngò gi, haù Íwâ má nghut nyí luí, haù Íwâ gi, Ngò má nghut nyi lhê nghú é lé lumjing keq; haù a nghut jáng, kut shit é limik kumlhá pé đông za lhang, lumjing keq.

¹² Ngò, nungmoq lé teng za taí kôlé, Ngo lé lumjing é sù gi, Ngò kut é muzó lé kut rá nghut lhê. Ngò gi, haù Íwâ chyáng ló rá nghut é yanmai, haù yuq gi, hau htoq je kô é muzó pé lé lhang kut rá nghut lhê.

13 Haû Yhangzô é yanmai, Íwâ é hpungwup shingkang wó hû ló shoq, Ngá é mying lé lang luí, nungmoq haí jung dung kôlhang, Ngò gyo byi rá nghut lhê.

14 Nungmoq gi, Ngá é mying lé lang luí, haí dung kôlhang, Ngò gyo byi rá nghut lhê.

Chyoiyúng Woi-nyí Byi Râ Danggidiq

15 Nungmoq gi, Ngo lé chyitdap kô é nghut jáng, Ngò hkyô tô é hkunmó pé lé, cháng kó rá nghut lhê.

16 Haû Íwa gi, nungmoq eq ahtum abyuq nyi nyi rá nghut é, hpaqchyí byi Sû gotú rayuq, nungmoq lé byi rá matú, Ngò gi, haû Íwa lé dung rá nghut lhê.

17 Haû yuq gi, tengmán é Woi-nyí nghut lhê. Haû mingkan gi, Woi-nyí haû lé a myàng a sê é yanmai, Yhang lé a wó hap yu é nghut lhê. Nghut kôlhang, Yhang gi, nungmoq eq rahá nyi nyi é nghut luí, nungmoq má nyi to rá Sû nghut é yanmai, nungmoq gi, Yhang lé sê akó.

18 Ngò gi, nungmoq lé, chuizô pé đông pyâm to rá a nghut; nungmoq chyáng Ngò dum jé lé rá nghut lhê.

19 Adé myáng má, haû mingkan gi, Ngo lé a myàng lo rá nghut lhê; nghut kôlhang, nungmoq gi, Ngo lé myàng kó rá nghut lhê. Hkâsu mù gâ le, Ngò gi, asak dui nyi é nghut mù, nungmoq le dui kó rá nghut lhê.

20 Ngò gi, Ngá Wâ chyáng nghut nyi é lé le, nungmoq gi, Ngò má nghut nyi é lé le, Ngò gi, nungmoq má nghut nyi é lé le, haû buinyí má, nungmoq sé kó rá nghut lhê.

21 Ngá é hkunmó pé lé wó mù, châng kut é sù ó yuq nghut kôle, Ngo lé chyitdap é sù nghut ri. Ngo lé chyitdap é sù lé gi, Ngá Wa chyitdap rá nghut lhê; Ngò le, haû yuq lé chyitdap luí, Ngá gùng lé yhang, yhang lé shit rá nghut lhê." gâ ri.

22 Hau htâng, (Yudaq Iskarut a nghut sù) Yudaq gi, "Yhumsing ê, Nang gi, haû mingkan lé Nang gùng a shit e za, ngamoq lé shit rá nghut é gi, haí mù nghut lhê lú?" ga myí ri.

23 Haû hkún, Yesuq tù taí gi, "Rayuq yuq, Ngo lé chyitdap é nghut le gi, Ngá dang lé gyo rá nghut lhê. Ngá Wa le, haû yuq lé chyitdap rá nghut luí, Ngá hpe gi, haû yuq chyáng lé mù, yhang eq rahá nyi rá nghut lhê.

24 Ngò lé a chyitdap é sù gi, Ngá dang lé gyo rá a nghut. Nang wó gyô é dang shí pé gi, Ngá myit mai taí é a nghut; dang haû pé gi, Ngo lé nhang kat é Sù, haû Íwâ é ru nghut lhê.

25 Ngò gi, shí pé banshoq lé, nungmoq eq rahá nyi tô ashí u lé taí bê nghut lhê.

26 Nghut kôlhang, Ngá é mying đông, haû Íwa nhang kat rá nghut é, hpaqchyí byi Sû ngû é, haû Chyoiyúng Woi-nyí gi, nungmoq lé, jung hkanmó mhoq byi rá eq, Ngò, nungmoq lé taí kyo bê hkyô lhunglhang, nungmoq lé lhoq pun rá nghut lhê.

27 Ngò gi, nungmoq chyáng, nguínón hkyô tô to byi bê; Ngá é nguínón hkyô, Ngò, nungmoq lé byí é nghut lhê. Ngò gi, mingkan byí é đông, nungmoq lé byí é a nghut. Nungmoq é i-myt nhikhum lé, myit wui myit hke é eq gyuq kyúm é hkâdut nhâng kó.

28 'Ngò gi, ló byuq luí, nungmoq chyáng dum taú lé rá nghut lhê.' ngû, Ngò taí é lé, nungmoq wó gyô yù bê nghut lhê. Nungmoq, Ngo lé chyitdap kô é nghut le gi, haû Íwâ chyáng Ngò ló rá nghut é hkyô lé, nungmoq gabú kó rá nghut lhê; hkâsu mù gâ le, haû Íwa gi, Ngá htoq je ko Sû nghut lhê.

²⁹ Haù dut é hkûn, nungmoq lumjîng kó sháng gaq nghû, ahkuî, haù a dut shimá, Ngò, nungmoq lé taí kyô é nghut lhê.

³⁰ Ahkuî mai, Ngò gi, nungmoq lé, dang myo myo wó nyô râ a nghut lo; hkâsu mù gà le, mingkan shí é zau gi, jé lé lo nyí bê nghut ri. Haù yuq gi, Ngo lé up râ ahkáng haí a wó é sù nghut ri.

³¹ Nghut kôlhang, haù Íwa lé Ngò chyitdap é hkyô, mingkan sé sháng gaq nghû, Ngò gi, Ngá Wa hkyô tô é hkunmó eq roq za kut nyi lhê.

Toq keq, e ló sháng hkoi.

15

Tsibiyiq Nuí Eq Akoq Pé É Hkyô

¹ Ngò gi, haù tsibiyiq nuí akyîng nghut lhê; Ngá Wa gi, tsibiyiq hkyâm yhumsîng nghut lhê.

² Yhang gi, ashi a zuí é akoq hkangmó lé, Ngá chyáng mai kyik pyám luí, ashi zuí é akoq hkangmó lé kúm gi, ashi je myo zui sháng gaq ga, shang pyám byí ri.

³ Nungmoq gi, Ngò, nungmoq lé taí é mungdang hau é yanmai, sanséng gû nghut bekô nghut ri.

⁴ Ngò má nyi nyí keq; Ngò le, nungmoq má nyi nyí râ nghut lhê. Akoq hkangmó gi, tsibiyiq nuí má nui nyi é za a nghut jáng, yhang baú ashi wó zuí é a nghut. Haù eq rajung za, nungmoq le, Ngò má nyi nyi e za a nghut jang, ashi wó zui kó râ a nghut.

⁵ Ngò gi, tsibiyiq nuí nghut lhê; nungmoq gi, akoq pé nghut akô. Byù rayuq yuq, Ngò má nyi nyi é nghut luí, Ngò gi, yhang má nyi nyi é nghut jáng, haù yuq gi, ashi myo myo zui râ nghut lhê; hkâsu mù gà le, Ngò mai gang jáng, nungmoq gi, haí le a wó kut kô é nghut lhê.

⁶ Ngò má a nyi nyi é sù gi, haù dú pyâm é hui luí, kyuq shi byuq é akoq eq wuí ri; haù sù é akoq pé gi, byu pé èq guq yù mù, myihkyóm má dú kat pyâm é hui luí, nyé gyó byuq râ nghut lhê.

⁷ Nungmoq gi, Ngò má nyi nyi luí, Ngá é dang pé gi, nungmoq má bo nyi é nghut le gi, nungmoq ô nau é haí nghut kôlhang, dung keq; haù hkûn, nungmoq lé byi râ nghut lhê.

⁸ Nungmoq gi, haù ashi ga-myhó zuí é dông, Ngá Wá é hpungwup shing kang lé lhoq htoq shit é nghut luí, Ngá é chángzô pé nghut é hkyô lé tún shit nyí bekô nghut ri.

⁹ Haù Íwa gi, Ngo lé chyitdap é su, Ngò gi, nungmoq lé chyitdap é nghut lhê. Ahkuî, Ngá é chyitdap myit má gîng nyi keq.

¹⁰ Ngò gi, Ngá Wá é hkunmó lé cháng é nghut luí, Yhâng é chyitdap myit má gîng nyi é su, Ngá é hkunmó lé, nungmoq châng nyi kô é nghut jáng, nungmoq gi, Ngá é chyitdap myit má gîng nyi kó râ nghut lhê.

¹¹ Nungmoq má Ngá é gabú hkyô joq nyi râ eq, nungmoq é gabú hkyô wó byíng jup râ matú, Ngò, nungmoq lé, dang shí pé taí é nghut lhê.

¹² Ngò, nungmoq lé chyitdap é su, nungmoq yhangchang chyitdap lhum keq; haù gi, Ngá é hkunmó nghut lhê.

¹³ Haù yhumsîng é luzúm wuí é matú, yhumsîng é asak ap byí pyâm é chyitdap myit htoq kô é, chyitdap myit gi, ó yuq chyáng le a bò nghut ri.

¹⁴ Ngò hkyô tô é hkunmó pé lé, nungmoq châng kut é nghut jáng, nungmoq gi, Ngá é luzúm wuí nghut bekô.

¹⁵ Ngò gi, Ngá Wâ chyáng mai Ngò wó gyô yu é hkyô lunglhang, nungmoq lé sé nhâng bê nghut é yanmai, nungmoq lé, dui-nhâng zoshâng wui nghû, a wut lô e za, luzúm wui nghû wut é nghut lhê; hkâsu mù gâ le, dui-nhâng zoshâng gi, yhang yhumsing hpô é muzó lé a châng sé nghut ri.

¹⁶ Nungmoq, Ngo lé hkyin yu é a nghut, Ngò sheq, nungmoq lé, htoq e lô mù, gîng nyi é ashi zui rà matú hkyin masat tô é ru nghut lhê. Hau hkûn sheq, Ngá é mying lé lang mù, haù Íwâ chyáng nungmoq haí jung dung kôle, Yhang byi rà nghut lhê.

¹⁷ Nungmoq yhangchang chyitdap lhum keq; haù gi, Ngá é hkunmó nghut lhê.

Haù Mingkan Gi, Chángzô Pé Lé A Jú É Hkyô

¹⁸ Haù mingkan, nungmoq lé a jú é nghut jáng, Ngo lé hí a jú kut bê nghut é lé, sé nyi keq.

¹⁹ Nungmoq gi, haù mingkan eq sêng é bang nghut é nghut jáng, haù mingkan gi, yhang eq sêng é bang nungmoq lé chyitdap rà nghut lhê. Nghut kôlhang, nungmoq lé gi, Ngò, haù mingkan mai hkyin htoq yú bê nghut luí, nungmoq gi, haù mingkan eq a séng lo kô é yanmai, mingkan gi, nungmoq lé a jú é nghut ri.

²⁰ 'Dui-nhâng zoshâng gi, yhang é yhumsing htoq je kô é a nghut.' nghû, Ngò, nungmoq lé tai é dang pé lé bûn nyi keq. Ngo lé lhang, yhangmoq zing-ri yú bekô nghut le gi, nungmoq lé le, zing-ri kó rà nghut lhê. Ngò mhoqshit é hkyô lé, yhangmoq cháng kô é nghut le gi, nungmoq mhoqshit é lé le, cháng kó rà nghut lhê.

²¹ Nghut kôlhang, yhangmoq gi, Ngá é mying é yanmai, nungmoq lé haù su kut kó rà nghut lhê; hkâsu mù gâ le, haù Ngo lé nhang kat é Sù lé, yhangmoq a sé kôluí nghut ri.

²² Yhangmoq lé, Ngò a lé nyo wú é nghut le gi, yhangmoq mara bò kó rà a nghut; nghut kôlhang, ahkuí gi, yhangmoq mara wó tai hkyut rà a nghut lo.

²³ Ngo lé a jú é sù gi, Ngá Wa lé le a jú é sù nghut ri.

²⁴ Haù ó yuq lhang a wó kut é muzó lé, Ngò, yhangmoq chyáng a kut é nghut le gi, yhangmoq mara bò kó rà a nghut; ahkuí kúm gi, laklai kumlhá haù pé lé yhangmoq myang nyi kôlhang, Ngò eq Ngá Wa lé a jú kô é nghut ri.

²⁵ Haù gi, 'Yhangmoq gi, jungúyô má Ngo lé a jú kut akô nghut ri.'* ga, yhangmoq é tará má kâ tô é dang lé lhoq dik é nghut ri.

²⁶ Haù Íwâ chyáng mâ é, Ngò nhang kat rà nghut é, Íwâ mai htoq lé lo é tengmán é Woi-nyi nghut é, haù hpaqchyí byi Sù jé lé é hkûn, Ngá é hkyô lé saksé hkám byi rà nghut lhê.

²⁷ Nungmoq le, Ngò eq rahá sâng-hi mai nyi bekô nghut é yanmai, saksé hkám byi ra kó rà nghut lhê.

16

¹ Nungmoq gi, myit lingbat jowò a joq kó sháng gaq nghû, haù pé banshoq lé, Ngò, nungmoq lé tai kyo bê nghut lhê.

² Yhangmoq gi, nungmoq lé, tarajong mai hkat htoq pyám kó rà nghut lhê; ó yuq nghut kôle, yhang mai nungmoq lé sat pyám é hkûn, yhang gi, haù dòng mai Garai Gasang lé dojaú nyi lhê ga myit yu é ahkyíng, gè gè yhang, jé rà nghut lhê.

* 15:25 Hkya-on 35:19; 69:4

³ Yhangmoq gi, haû Íwa lé le, Ngo lé le, a sé kô é yanmai, haû su kut kó rá nghut lhê.

⁴ Nghut kôlhang, nungmoq lé, Ngò sidiq byi é hkyô lé, ahkyíng jé jáng nungmoq bûn nyi kó sháng gaq nghú, Ngò haû hkyô taí kyô é nghut lhê. Ngò gi, nungmoq eq rahá nghut nyi é yanmai, haû hkyô lé, hí hkûn nungmoq lé a taí kyô é nghut lhê.

Chyoiyúng Woi-nyí é muzó

⁵ Nghut kôlhang, ahkuí, Ngò gi, Ngo lé nhang kat Su chyáng ló rá nghut lhê. Nghut kôlhang, nungmoq ó yuq le, 'Nàng, hká shut ló rá lúh?' ga, Ngo lé a myi kó nghut ri.

⁶ Ngò, nungmoq lé, haû hkyô pé taí kyô é yanmai, nungmoq é i-myt unghkaû má iyon hkyô byíng to bekô nghut ri.

⁷ Nghut kôlhang, Ngò, nungmoq lé teng za taí kôlé, Ngò ló byuq é gi, nungmoq é matú je gè rá hkyô ru nghut lhê. Ngò ló byuq e za a nghut jáng, haû hpaqchyí byi Sù gi, nungmoq chyáng lé rá a nghut; Ngò ló jáng sheq, Yhang lé, Ngò, nungmoq chyáng nhang kat byi rá nghut lhê.

⁸ Yhang jé lé é hkûn, Yhang gi, haû mara wó é eq séng luí le, dǐngmán hkyô eq séng luí le, tará jéyáng hkyô eq séng luí le, haû mǐngkan lé tǔn shít rá nghut lhê.

⁹ Haû yubak mara wó é eq séng luí ga jang, byu pé gi, Ngo lé a lumjǐng kô é yanmai nghut ri.

¹⁰ Haû dǐngmán hkyô eq séng luí ga jang, Ngò gi, haû Íwa chyáng ló rá nghut luí, nungmoq, Ngo lé a myàng lo kó rá nghut é yanmai nghut ri.

¹¹ Haû tará jéyáng hkyô eq séng luí ga jang, mǐngkan shí é zau gi, mara byí é huí é nghut é yanmai nghut ri.

¹² Ngò gi, nungmoq lé taí rá hkyô myo myo wó ashí; nghut kôlhang, ahkuí, nungmoq wó hkám kó rá a nghut.

¹³ Nghut kôlhang, haû tengmán é Woi-nyí jé lé é hkûn, Yhang gi, tengmán hkyô lhunglhang lé shuí sé rá nghut lhê. Yhang gi, Yhâng myit dǒng taí rá a nghut; Yhang, wó gyô yu é hkyô lé za taí luí, dut ló rá hkyô pé lé le, nungmoq chyáng taí pyô rá nghut lhê.

¹⁴ Yhang gi, Ngò wó é lé, yù mù, nungmoq lé taí kyô é eq sé nhang é dǒng, Ngá é hpungwup shingkan lé hù ló nhâng rá nghut lhê.

¹⁵ Haû Íwa wó é lhunglhang gi, Ngá é chyat nghut lhê. Hau é yanmai, haû Woi-nyí gi, Ngò wó é lé yù mù, nungmoq lé sé nhâng rá nghut lhê nghú, Ngò taí é nghut lhê.

¹⁶ Adê myáng má, nungmoq gi, Ngo lé a myàng lo kó rá nghut lhê; hau htàng, dum adê myáng má, nungmoq gi, Ngo lé myàng kó rá nghut lhê." gá ri.

Changzô Pê É Iyon Hkyô Gi, Gabú Hkyô Taú Dut Rá

¹⁷ Yhâng é chángzô pé ra-am gi, "Adê myáng má, nungmoq gi, Ngo lé a myàng lo kó rá nghut lhê; hau htàng, dum adê myáng má, nungmoq gi, Ngo lé myàng kó rá nghut lhê.' gá é eq 'Ngò gi, Íwa chyáng ló rá nghut é yanmai nghut lhê.' ga, Yhang taí é gi, haí jung gá nau é nghut lhê lúh?" ga, rayuq eq rayuq myí lhum bum akó.

¹⁸ Hau htoq agó, yhangmoq gi, "Adê myáng má,' gá é gi, Yhang haí jung gá nau lhê lúh? Nga-nhúng gi, Yhang haí taí nau é lé a sê gyo." ga, taí lhum bum akó nghut ri.

19 Yesuq gi, yhangmoq myi naù kô é hkyô lé sê ri; haù mù, Yhang, yhangmoq lé taí é gi, "Adê myáng má, nungmoq gi, Ngo lé a myàng lo kó rà nghut lhê; hau htàng, dum adê myáng má, nungmoq gi, Ngo lé myàng kó rà nghut lhê." nghû, Ngò taí é lé, haí jung gá nau lhê laq nghû, rayuq eq rayuq myi lhum nyi akò lúh?

20 Ngò, nungmoq lé teng za taí kôlé, haù mingkan gi, gabú nyi é u lé, nungmoq gi, ngaù é eq iyon yón é hui kó rà nghut lhê. Nungmoq gi, iyon yón é hui kó rà nghut lhê; nghut kôlhang, nungmoq é iyon hkyô gi, gabú hkyô taù dut rà nghut lhê.

21 Myiwe gi, zoshâng hkû rà nghut jáng, zohkû-nò nò rà ahkyíng jé bê nghut é yanmai, myit chiq nyi ri; nghut kôlhang, zoshâng lé wó hku htoq kat é hkûn gi, mingkan htoq má zoshâng rayuq wó hku to bê nghut luí, yhang gabú é yanmai, haù no hpu é hkyô lé a bun byuq lo nghut ri.

22 Haù eq rajung za, ahkuí gi, nungmoq iyon yón é ahkyíng nghut ri; nghut kôlhang, Ngò, nungmoq lé dum huí é hkûn, nungmoq gi, gabú kó rà nghut lhê; nungmoq é gabú hkyô haù lé, nungmoq chyáng mai ó yuq èq le wó yu pyám byi rà a nghut.

23 Haù buinyi má, nungmoq gi, Ngo lé, haí le a dung lo kó rà nghut lhê. Ngò, nungmoq lé teng za taí kôlé, nungmoq gi, Ngá myíng lang luí, Ngá Wá chyáng haí dung kôle, Yhang byi rà nghut lhê.

24 Ahkuí jé shoq, nungmoq gi, Ngá myíng lé lang luí, haí le a dúng wú shi kó nghut ri. Dung keq, haù hkûn, nungmoq myang hap yù kó rà nghut luí, nungmoq é gabú hkyô gi, byíng jup lò rà nghut lhê.

25 Ngò gi, nungmoq lé, dangtú dông haù pé taí kyo bê nghut lhê; nghut kôlhang, Ngò gi, dangtú a chûng lô e za, haù Íwa eq sêng é hkyô, nungmoq lé san za taí kyô é ahkyíng jé rà nghut lhê.

26 Haù buinyi má, nungmoq gi, Ngá é myíng lé lang luí dung kó rà nghut lhê. Ngò gi, nungmoq é matú, haù Íwá chyáng dung byi rà nghû taí nyi é a nghut.

27 Hkâsu mù gâ le, nungmoq gi, Ngo lé chyitdap kô é eq, Ngò gi, Íwa Garai Gasâng chyáng mai jé lé é Sû nghut é lé, nungmoq lumjíng kô é yanmai, haù Íwa yhang, nungmoq lé chyitdap é nghut lhê.

28 Ngò gi, haù Íwá chyáng mai htoq lé mù, mingkan má lé jé wang é nghut lhê; ahkuí, Ngò gi, mingkan mai htoq mù, haù Íwá chyáng dum taù ló rà nghut lhê." gâ ri.

29 Haù hkûn, Yesuq é chángzô pé gi, "Ahkuí, Nàng gi, dangtú a chûng é dông, san za taí kyô nyi é nghut bê!

30 Nàng gi, lhunglhang lé sê é sù nghut é lé le, Nàng lé, ó yuq èq le dangmyi myi nó a rà é hkyô lé le, ahkuí, ngamoq wó sé bê. Hau é yanmai, Nàng gi, Garai Gasâng chyáng mai lé é sù nghut é lé, ngamoq lumjíng lhê." ga taí bum akò.

31 Haù hkûn, Yesuq tû taí é gi, "Nungmoq, ahkuí lumjíng bekò lúh?

32 Nghut kôlhang, nungmoq gi, lhoq pyo pyám é hui luí, Ngo lé baù za tô pyám to kômù, ó le ô yhùm shut ló byuq rà ahkyíng jé lo nyi bê nghut ri; ahkuí lhang jé to bê. Nghut kôlhang, Ngò gi, Ngò baù za a nghut; hkâsu mù gâ le, Ngá Wa gi, Ngò eq rahá nghut nyi lhê.

33 Nungmoq gi, Ngò má nguínón hkyô wó kó sháng gaq nghû, Ngò gi, haù hkyô pé lé taí kyô é nghut lhê. Nungmoq gi, mingkan shí má, wuihke hkyô

hui kó rã nghut lhê; nghut kôlhang, myit wum lhoq kóng keq. Ngò gi, mingkan lé ung pyám bê nghut lhê." gã ri.

17

Yesuq Kyûdung É Hkyô

¹ Yesuq gi, haù su ga tai é htâng má, mauhkûng shut tu wú lui, kyûdung é gi, "Áwa ê, ahkyíng jé bê nghut ri; haù Nung Zo gi, Nang lé hpungwup shing kang wó hu nhâng sháng gaq, Nung Zo lé hpungwup shing kang hủ ló nhâng laq ô!

² Hkâsu mù gã le, Nang mai Yhang lé ap byi tô é bang banshoq lé, Yhang, ahtum abyuq é asak wó byi sháng gaq ga, Nang gi, byù lhunglhang bang lé up rã ahkáng, Yhang lé byi tô é yanmai nghut ri.

³ Nang za tengmán é Garai Gasang nghut é eq Nang nhang kat é sủ Yesuq Hkrisduq lé, sê é gi, ahtum abyuq é asak nghut lhê.

⁴ Ngò gi, Nang, Ngo lé wùn waq nhang é muzó lé lhoq pán é đông, myidàm htoq má, Nang é hpungwup shing kang lé lhoq htoq shit bê nghut lhê.

⁵ Áwa ê, haù mingkan lhang a joq shí mai, Ngò, Nang eq rahá chôm wó é hpungwup shing kang èq, ahkuí, Nang é myoq hí má, Ngo lé hpungwup shing kang dan hu nhâng laq.

Chángzô pé matú, Yesuq kyûdung byi é hkyô

⁶ Mingkan mai, Nang, Ngo lé hkyin htoq yù byi é bang lé, Ngò gi, Nang é mying lhoq htoq shit bê nghut lhê. Yhangmoq gi, Nang é byu pé nghut bekô; Nang gi, yhangmoq lé, Ngá é loq má ap byi bê nghut lui, yhangmoq gi, Nang é dang lé châng kut bekô nghut ri.

⁷ Nang, Ngo lé byi é lhunglhang gi, Nang chyáng mã é nghut é lé, ahkuí, yhangmoq sé bekô nghut ri.

⁸ Hkâsu mù gã le, Nang, Ngo lé byi kat é mungdang pé lé, Ngò, yhangmoq lé byi bê nghut lui, yhangmoq gi, haù pé lé hap yù bekô nghut ri; Ngò gi, Nang chyáng mai lé é sủ nghut é lé le, yhangmoq hkyak sé akô; Nang, Ngo lé nhang kat é hkyô lé le, yhangmoq lumjing bekô nghut ri.

⁹ Ngò gi, yhangmoq é matú kyûdung byi lhê. Ngò gi, haù mingkan byu pé é matú dung byi nyi é a nghut; Nang, Ngo lé ap byi tô é bâng é matú sheq dung byi nyi é ru nghut lhê; hkâsu mù gã le, yhangmoq gi, Nang é byu pé nghut akô.

¹⁰ Ngò wó é lhunglhang gi, Nang é chyat nghut mù, Nang wó é lhunglhang le, Ngá é chyat nghut lhê. Haù mù, Ngò gi, yhangmoq má hpungwup shing kang hủ é hui bê nghut lhê.

¹¹ Ngò gi, Nang chyáng lò rã nghut lhê mù, mingkan htoq má nyi nyi rã a nghut lo; nghut kôlhang, yhangmoq gi, mingkan htoq má nyi nyi shirã nghut lhê; chyoiyúng é Áwa ê! Ngá hpe gi, ragùng za nghut é su, yhangmoq le ragùng za wó dut nyi kó sháng gaq, Nang, Ngo lé byi é, haù Nang mying é a-tsam èq yhangmoq lé upzúng nyi aq.

¹² Ngò gi, yhangmoq eq rahá nghut nyi é u lé, yhangmoq lé upzúng bê nghut lui, Nang, Ngo lé byi é mying hau èq, yhangmoq lé rago zúng bê nghut lhê. Haù Chyúmdang lhoq dik sháng gaq ga, haù bang mã é htên byoq hui rã sủ mai lai lui, ó yuq le a byuq byuq é nghut lhê.

¹³ Ngò gi, ahkuí, Nang chyáng lò rã nghut bê; nghut kôlhang, Ngá é gabú hkyô gi, yhangmoq chyáng byíng jup sháng gaq nghù, Ngò gi, haù pé lé mingkan má tai é nghut lhê.

¹⁴ Ngò gi, yhangmoq lé, Náng é mungdang byi bê nghut lê; haù mingkan gi, yhangmoq lé a jú nghut ri; hkâsu mù gâ le, Ngò gi, mingkan mâ é a nghut é su, yhangmoq le, mingkan mâ é a nghut kô é yanmai nghut ri.

¹⁵ Ngò kyûdûng é gi, Náng, yhangmoq lé mingkan mai shuí htoq yû râ matú dúng é a nghut, haù agè ashop su chyáng mai, yhangmoq lé upzúng yû râ matú sheq dúng é ru nghut lê.

¹⁶ Ngò gi, mingkan mâ é a nghut é su, yhangmoq le, mingkan mâ é a nghut kó.

¹⁷ Yhangmoq lé, haù tengmán hkyo eq lhoq sân-yúng yû laq; Náng é mungdang gi, tengmán hkyô nghut ri.

¹⁸ Náng, Ngo lé, mingkan má nhang hâng kat é su, Ngò le, yhangmoq lé, mingkan má nhang hâng kat é nghut lê.

¹⁹ Yhangmoq lé, tengmán hkyô má wó lhoq sân-yúng yû kó sháng gaq nghú, Ngò gi, yhangmoq é matú, yhumsing gùng lé lhoq sân-yúng yu é nghut lê.

Lumjîng Bang Lhunglhang É Matú, Yesuq Kyûdung Byí É Hkyô

²⁰ Ngò gi, yhangmoq é matú baú za kyûdung byí é a nghut; Yhangmoq é danglu é yanmai, Ngo lé lumjîng kó râ bâng é matú le, Ngò kyûdung byí é nghut lê.

²¹ Haù mù, yhangmoq banshoq bang gi, rading ralhú za dut nyi kó sháng gaq. Haù mingkan gi, Náng, Ngo lé nhang kat é hkyô lé wó lumjîng sháng gaq; Áwa, Náng gi, Ngò má nyi nyi mù, Ngò gi, Náng má nyi nyi é su, yhangmoq le, ngá hpe má nyi nyi kó sháng gaq.

²² Ngá hpe gi, ragùng za nghut é su, yhangmoq le, rading ralhú za dut nyi kó sháng gaq nghú, Ngò gi, Náng, Ngo lé byí é hpungwup shingkang lé, yhangmoq lé byi bê nghut lê.

²³ Náng, Ngo lé nhang kat bê hkyô eq Náng, Ngo lé chyitdap é su, yhangmoq lé chyitdap é hkyô lé, haù mingkan wó sé râ matú, yhangmoq gi, gumjup shoq rading ralhú za wó dut kó sháng gaq nghú, Ngò gi, yhangmoq má nyi nyi luí, Náng gi, Ngò má nyi nyi é nghut lê.

²⁴ Áwa é, haù mingkan lhang a joq shi mai, Náng, Ngo lé chyitdap luí byi tô é hpungwup shingkang haù lé, Náng, Ngo lé byi tô é bang, wó myàng kó râ matú le, Ngò nyi é jang má, Ngò eq rahá wó nyi kó râ matú le, Ngò ô nau ri.

²⁵ Dingmán é Áwa é, haù mingkan gi, Nang lé a sé kôlhang, Ngò gi, Nang lé sê lê; Náng, Ngo lé nhang kat é hkyô lé gi, yhangmoq sé akô nghut ri.

²⁶ Náng, Ngo lé chyitdap é chyitdap myit gi, yhangmoq má wó joq nyi râ matú le, Ngò gi, yhangmoq má wó nyi nyi râ matú le, yhangmoq lé, Ngò, Nang é hkyô sé nhâng bê nghut luí, xoq mù sé nhang nyi shirâ nghut lê." gâ ri.

18

Yesuq Chyup Yû Hui É Hkyô

Mht 26:47-56; Mrk 14:43-50; Luk 22:47-53

¹ Yesuq gi, haù su ga kyûdûng é htâng má, Yhâng é chángzô pé eq rahá, Kedron wùihkung mai laí byit dap ló luí, haù hpoq má joq é hkyâm ralhú má wang e akô nghut ri.

² Hkyâm haù gi, Yesuq eq Yhâng é chángzô pé lhaq hui hui kut é jowò nghut é yanmai, haù Yesuq lé ap pyám râ sù Yudaq le sê ri.

³ Haù mù, Yudaq gi, haù hkyangjong agyi pé eq Hparishe pê chyáng mai nhang kat é noqkuq yhúm zúng bang ra-am eq gyezo rajum lé, haù jowò shut

shuí wang lé lo ri. Haú bang gi, myihu, myibung eq shâm lhâm pé chung lé lo akô.

⁴ Yesuq gi, Yhang má dut lò rà hkyô lhunglhang lé sé gû nghut mù, htoq é luí, yhangmoq lé, "Nungmoq, ó yuq lé ho akô lú?" ga myí ri.

⁵ Haú hkûn, yhangmoq gi, "Nazaret wà byú Yesuq lé ho lhê." ga tú taí kôjáng, Yesuq gi, "Ngò gi, haú yuq nghut lhê." ga taí ri. (Yesuq lé ap pyám sù Yudaq le, yhangmoq eq rahá yap tô ri.)

⁶ "Ngò gi, haú yuq nghut lhê." ga Yesuq taí kat é hkûn jáng, yhangmoq gi, nungzut zut mù, myigùng má lêng leq ló bum akô nghut ri.

⁷ Yhang gi, "Nungmoq, ó yuq lé ho akô lú?" ga, yhangmoq lé dum myí kat jáng, yhangmoq gi, "Nazaret wà byú Yesuq lé ho lhê." ga taí akô.

⁸ Haú hkûn, Yesuq gi, "Ngò gi, haú yuq nghut lhê nghû, nungmoq lé taí kyo bê nghut lhê; nungmoq, Ngo lé hô kô é nghut le gi, shí bang lé ló nhang pyám keq." ga tú taí ri.

⁹ Haú gi, "Nàng, Ngo lé byí tô é bang rayuq le lhang, Ngò, a lhoq hpyuq pyám." ga, Yhang taí tô é dang dik rà matú nghut ri.

¹⁰ Haú hkûn, Simun Petruq gi, shâm wun tô é nghut luí, shâm shê mù, haú hkyangjong mó é dui-nhang zôshang é loqyo nohkyap lé zân hpyit kat byí ri. (Dui-nhang zoshang haú yuq é mying gi, Malhku gá ri.)

¹¹ Haú mù, Yesuq gi, Petruq lé, "Nàng é shâm lé, shambyâng má xâng pyám aq! Haú Íwa, Ngo lé byí é góm* lé, Ngò a shuq é wó nyí rà lú?" ga taí kat ri.

Yesuq Lé, Anna Chyáng Shuí E É Hkyô

Mht 26:57-58; Mrk 14:53-54; Luk 22:54

¹² Hau htâng, gyezo haú jûm eq yhangmoq é gyezau hpó, Yudaq byu pé é mingsuwún wuí gi, Yesuq lé chyup yú mù, tuí akô nghut ri.

¹³ Yhangmoq gi, haú zân má é hkyangjong mó Kayahpaq é yhang-tsa Anna chyáng hí, Yhang lé shuí ló akô nghut ri.

¹⁴ Kayahpaq gi, byu pé é matú rayuq shí hkám byí le je gè rà nghut lhê ga, haú Yudaq byu pé lé hpaqchyí byí é sù yuq nghut ri.

Yesuq Lé, Petruq Sâng-hi Dam He-ngik Pyám É Hkyô

Mht 26:69-70; Mrk 14:66-68; Luk 22:55-57

¹⁵ Simun Petruq eq gotú chángzo rayuq gi, Yesuq htâng châng e ló akô nghut ri. Gotú chángzo haú yuq gi, hkyangjong mó lé rago sê lhê nghut mù luí, hkyangjong mó é yhumwàng hkaú shut, Yesuq é htâng má châng wang ló ri.

¹⁶ Petruq kúm gi, hkúmdong shinggan má lánq yap tô ri. Haú hkyangjong mó lé rago sê é sù, gotú chángzo haú yuq gi, taú htoq ló mù, hkum zúng é myiwe myí lé taí luí, Petruq lé shuí hâng yu ri.

¹⁷ Haú hkûn, haú hkum zúng é myiwe myí gi, Petruq lé, "Nàng gi, haú yuq é chángzô pé má é rayuq a nghut lú?" ga myí jáng, yhang gi, "Ngò a nghut." ga tú taí ri.

¹⁸ Haú u lé, gyoq é yanmai, dui-nhang zoshang wuí eq noqkuq yhûm zúng bang gi, yhangmoq gyoq gâng rà matú myigyê eq mut tô é myihkyóm má, gyoq gang yap nyi bum akô. Petruq le, yhangmoq eq rahá gyoq gang yap tô ri.

Yesuq Lé, Hkyangjong Mó Myí Choq Wú É Hkyô

Mht 26:59-66; Mrk 14:55-64; Luk 22:66-71

* **18:11** Góm lé shuq gá é gi, jamjau hui rà eq shí hkám rà lé, taí nau é nghut lhê.

19 Haú u lé, haú hkyangjong mó gi, Yesuq lé, Yhâng é chángzô pê hkyô eq Yhâng mhoqshit é hkyô eq séng luí myí ri.

20 Haú hkûn, Yesuq gi, "Haú mingkan htoq má, Ngò, de de taí bê nghut lhê. Ngò gi, haú Yudaq byu pé banshoq bang chôm zîng é, tarajong pé má le, noqkuq yhûm má le, ayang mhoqshit é nghut lhê. Ngò gi, haq zaú luí taí é hkyô haí le a joq.

21 Nàng, haí mù Ngo lé myi lhê lú? Haú, Ngò taí é lé wó gyô é bang lé myi aq; Ngò haí taí é hkyô lé, yhangmoq gè gè sê akô nghut ri." ga tú taí ri.

22 Yesuq haú su ga taí jáng, haú nàm má nyi tô é noqkuq yhûm zúng sù rayuq gi, Yhang lé pyuq kat luí, "Hkyangjong mó lé wá, Nàng, haú su nghû dang tú lhê lú?" ga taí ri.

23 Haú hkûn, Yesuq gi, "Ngò taí shut é nghut le gi, shut é hkyô lé saksé tûn shit aq. Nghut kôhlang, Ngò gi, têng é đông ru taí le nhîng, nàng, haí mù Ngo lé pyuq lhê lú?" ga tú taí ri.

24 Hau htâng, Anna gi, Yhang lé tuí to gù, haú hkyangjong mó Kayahpaq chyáng dé kat nhang ri.

Yesuq Lé, Petruq Xoq He-ngik Pyâm É Hkyô
Mht 26:71-75; Mrk 14:69-72; Lúk 22:58-62

25 Haú Simun Petruq gyoq gang yap tô é hkûn, "Nàng gi, Yhâng é chángzô pé mâ é rayuq a nghut lú?" ga, yhang lé myi kôjáng, yhang gi, "Ngò a nghut." ga, dum he pyâm ri.

26 Haú Petruq eq nohkyap zân hpyit pyâm byí é huí su é buinùm nghut é sù, haú hkyangjong mó é dui-nhâng zoshâng rayuq gi, yhang lé, "Haú hkyâm má, nàng, Yhang eq rahá nghut nyi é lé, ngò a myang é su ngam lhê lú?" ga taí ri.

27 Haú hkûn, Petruq gi, xoq he pyâm ri; haú u yhang, woq tûn bê nghut ri.

Pilat É Myoq Hí Má, Yesuq Jé Nyi É Hkun Lhê Hkyô
Mht 27:1-2, 11-14; Mrk 15:1-5; Lúk 23:1-5

28 Hau htâng, yhangmoq gi, Yesuq lé, Kayahpaq chyáng mai, haú mauzau hpô é yhûmwàng shut shui e ló akô. Haú u gi, napsùn noq ashí nghut ri. Yhangmoq gi, agot a-û a dut e za, htûngli đông Lhoqlhai Poí lé wó zo râ matú, yhúmhaú má a wàng kó nghut ri.

29 Haú mù luí, mauzau Pilat gi, yhangmoq chyáng htoq ê mù, "Shí yuq lé, nungmoq hai mara hûn nau akô lú?" ga myí ri.

30 Haú hkûn, yhangmoq gi, "Shí yuq, a ge é muzó kut é a nghut le gi, Yhang lé, náng é loq má ngamoq lé ap byi râ a nghut." ga tú taí akô.

31 Pilat gi, "Yhang lé, nungmoq yhang shui ló mù, nungmoq é tarâ đông ló jéyáng keq." ga taí jáng, haú Yudaq byu pé gi, "Nghut kôhlang, ngamoq gi, ó yuq lé sat râ ahkáng le a wó é nghut lhê." ga tú taí akô nghut ri.

32 Haú su dut é hkyô gi, Yesuq, Yhang hká đông shí râ ga taí é dang lé lhoq dik râ matú nghut lhê.

33 Haú mù, Pilat gi, yhúmhaú má taú wang ló mù, Yesuq lé wut yù luí, "Nàng gi, Yudaq byu pé é hkohkâm nghut lhê lú?" ga myí ri.

34 Haú hkûn, Yesuq gi, "Haú gi, náng é myit đông taí é nghut lhê lú? A nghut jáng, góbang mai, nang lé, Ngá é hkyô taí kyo luí nghut lhê lú?" ga taú myí ri.

35 Pilat gi, "Ngò gi, Yudaq byù nghut lhê lú? Haú Náng é byù myú eq Náng é hkyangjong agyi pé sheq, Nang lé, ngá loq má ap byí é ru nghut lhê. Nàng gi, haí kut é nghut lhê lú?" ga dum myí ri.

³⁶ Haù hkùn, Yesuq gi, "Ngá é mingdán gi, mingkan shí eq a séng. Mingkan shí eq séng é ru nghut le gi, haù Yudaq byu pé, Ngo lé a wó chyup yu lo shoq, Ngá é dui-nhâng zoshâng wui, Ngo lé chôm hung yù kó rà nghut lhê. Nghut kôlhâng, Ngá é mingdán gi, mingkan shí eq a séng é ru nghut lhê." ga tai ri.

³⁷ Haù mù, Pilat gi, "Haù jáng, Nàng gi, hkohkâm nghut bê lúhú?" ga myi jáng, Yesuq gi, "Ngo lé, hkohkâm nghut lhê ga, nàng tai nyi é jô ri. Gè gè ga jáng, Ngò gi, hau é yanmai hku lé lo é sù nghut lhê; haù tengmán hkyô lé saksé hkâm rà matú, Ngò, mingkan htoq má jé lé é nghut lhê. Haù tengmán hkyô eq séng é sù ó yuq le, Ngá é dang lé gyô ri." ga tù tai ri.

³⁸ Haù hkùn, Pilat gi, "Tengmán hkyô gá é gi, haí jung lúhú?" ga myi ri. Yhang gi, haù su ga myi lui, haù Yudaq byu pé chyáng dum htoq ê mù, "Shí yuq chyáng mara hùn rà hkyô, ngò a myàng nghut ri.

³⁹ Nghut kôlhâng, haù Lhoqlhai Poì u lé, nungmoq é matú, ngò, htóng byù rayuq nhang htoq kat byi byi kut é htông, nungmoq wó akô. Haù mù, 'Yudaq byu pé é hkohkâm' lé, nhang htoq kat byi rà lé, nungmoq ô nau akô lúhú?" ga myi ri.

⁴⁰ Haù hkùn, yhangmoq gi, "Haù yuq lé a nghut! Barabaq lé sheq nhâng byi aq." ga, garú kat akô. Barabaq gi, damyaq nghut ri.

19

Yesuq Lé, Tapzîng Má Jén Sat Râ Matú Doqdân É Hkyô

Mht 27:15-31; Mrk 15:6-20; Luk 23:13-25

¹ Haù mù lui, Yesuq lé láng she yù mù, nhuq bat rà matú, Pilat hkunmó hkyô ri.

² Haù gyezô pé gi, zujanmaù saí yù kôluí, Yesuq é ulhum má tsung byi kômù, Yhang lé, buhíng nè hut byi akô nghut ri.

³ Hau htâng, yhangmoq gi, Yhâng chyáng dum huí ê ê kut lui, "Yudaq byu pé é hkohkâm ê! Chyung híng xê híng nyi sháng gaq ô!" ga tai kômù, Yhâng é myoqdong má pyuq byi akô nghut ri.

⁴ Pilat gi, haù Yudaq byu pé chyáng radàm dum htoq ê mù, "Wú keq, shí yuq chyáng mara hùn rà hkyô, ngò a myang é lé nungmoq sé sháng nghù, Yhang lé, ngò nungmoq chyáng shuí htoq lé byi lhê." ga tai ri.

⁵ Yesuq gi, haù zumuq tsùng tô é eq bu nè híng wut tò mù htoq lé jáng, Pilat gi, yhangmoq lé, "Wú keq, Yhang, shí yuq nghut lhê." ga tai ri.

⁶ Haù hkyangjong agyi pé eq yhangmoq é noqkuq yhùm zúng bang gi, Yhang lé myang kat kôjáng, "Yhang lé tapzîng má jén sat pyám aq! Yhang lé tapzîng má jén sat pyám aq!" ga garú bum akô.

Nghut kôlhâng, Pilat gi, "Nungmoq shuí yù mù, tapzîng má jén sat keq. Ngò gi, Yhâng chyáng mara hùn rà hkyô a myàng." ga tù tai ri.

⁷ Haù hkùn, haù Yudaq byu pé gi, "Ngamoq chyáng tará rahkat joq lhê; tará haù đông ga jang, Yhang gi, shí gíng bê nghut ri; hkâsu mù gá le, Yhang gi, Garai Gasâng é Yhangzo haù nghut lhê gá ri." ga xoq tai akô.

⁸ Pilat gi, dang haù lé wó gyo jáng, je gyô gyuq lui,

⁹ yhúmhmaù shut dum wang ló mù, Yesuq lé, "Nàng, hkâmá é sù nghut lhê lúhú?" ga myi ri. Nghut kôlhâng, Yesuq gi, dang rahkun lhang a tù tai byi nghut ri.

¹⁰ Haù hkùn, Pilat gi, "Nàng, ngo lé a tù tai kut lhê lúhú? Ngò gi, Nàng lé, wó lhoq lhut kat é eq tapzîng má wó jén sat pyám é ahkáng wó sù nghut é lé, Nàng a sé lúhú?" ga myi ri.

11 Yesuq gi, "Nàng lé, haù ahtoq mai ahkáng byí e za a nghut le gi, nàng, Ngo lé haì kut rà a-tsam le wó rà a nghut. Haù mù luí, Ngo lé, náng é loq má ap byí é sù gi, mara je bo é nghut lhê." ga tù taí ri.

12 Haù hkún mai, Pilat gi, Yesuq lé lhoq lhut kat byi nau nyì bê nghut ri. Nghut kôlhang, haù Yudaq byu pé gi, "Nàng, haù yuq lé nhang pyâm é nghut jáng, nàng gi, hkoséng Kehtaq é luzúm a nghut lo; yhumsing gùng lé, hkohkâm gá é sù gi, hkoséng Kehtaq eq shai lhùm é sù nghut lhê." ga, ru jàng garù nyì bum akò nghut ri.

13 Haù lé wó gyo jáng, Pilat gi, Yesuq lé shuí htoq é mù, Hebre myíng đông Gabahta gá é Luqgok hkàng myhang to jang nghu é jowò mã é tará jéyáng tanghkuq má zung tô ri.

14 Haù u gi, Lhoqlhai Poí é matú, Hên Lajàng é Buinyì nyí-káng raxe í hkyíng nghut ri.

Pilat gi, haù Yudaq byu pé lé, "Nungmoq é hkohkâm lé wú keq." ga taí ri.

15 Nghut kôlhang, yhangmoq gi, "Yhang lé yu pyám aq! Yhang lé yu pyám aq! Yhang lé tapzìng má jén sat pyám aq!" ga garù bum akò.

Haù hkún, Pilat gi, "Nungmoq é hkohkâm lé wá, ngò, tapzìng má jén sat pyám rà lú?" ga myí jáng, haù hkyangjong agyi pé gi, "Haù hkoséng Kehtaq mai lai luí, gotú hkohkâm ngamoq a wó." ga, tù taí akò nghut ri.

16 Hau htàng má, Pilat gi, Yesuq lé tapzìng má jén sat pyám rà matú, yhangmoq é loq má ap byí kat bê nghut ri. Haù mù luí, yhangmoq gi, Yesuq lé shuí ló bekò nghut ri.

Tapzìng Má Jén Pyâm É Hkyô

Mht 27:32-44; Mrk 15:21-32; Luk 23:26-43

17 Yesuq gi, yhumsing é tapzìng lé waq mù, Hebre myíng đông Golgahta gá é, Ugyap joq é Jowò gá é jang mã htoq jé e ri.

18 Yhangmoq gi, haù má, Yesuq lé tapzìng htoq má jén tap pyám akò; Yhang eq rahá, gotú í yuq lé le, rahkyam shut rayuq kut jén to kô é nghut luí, Yesuq gi, gyoro má nghut ri.

19 Pilat le, masat laiká kâ yù luí, haù tapzìng htoq má tap tô ri. Haù má gi, "YUDAQ BYU PÊ É HKOHKÂM, NAZARET WÁ BYÙ YESUQ" gá tô ri.

20 Yesuq lé jén tô é jowò gi, myuq eq chyàng lhùm é htoq agó, haù masat laiká gi, Hebre đông le, Latin đông le, Grik đông le, kâ tô é yanmai, haù Yudaq byu pé myo myo gi, masat laiká haù lé nghap bum akò nghut ri.

21 Haù Yudaq byu pé é hkyangjong agyi pé gi, Pilat lé, "'Yudaq byu pé é hkohkâm' ngú hkáká, 'Ngò gi, Yudaq byu pé é hkohkâm nghut lhê ga, Yhang taí ri.' ngú luí sheq ká aq." ga taí akò.

22 Haù hkún, Pilat gi, "Ngò ká é đông, ngò ká to bê nghut lhê." ga tù taí ri.

23 Haù gyezô pé gi, Yesuq lé tapzìng má jén tap pyâm é htàng má, Yhàng é mebu pé lé yù mù, myí hkyam gàm luí, rayuq rahkyam yu akò; haù ahte bu lé le, gàm rà dá akò; nghut kôlhang, haù gi, hkyupshi a bo e za, awang mai ahpyo hpyot kut woq tô é nghut ri.

24 Haù mù, yhangmoq gi, "Bu shí lé gi, a lêng cheq e za, ó yuq myang yù ang rà laq, hkyín shosé she wú sháng." ga, rayuq eq rayuq taí lhùm akò.

Haù gi,

"Yhangmoq, Ngá é mebu lé chôm gam yù kó rà; Ngá é ahtê bú é matú, hkyín shosé shê kó rà nghut lhê."✠

gâ é Chyúmdang lé lhoq dik râ matú dut é nghut lhê. Haû mù, gyezô pé gi, haû su kut bekô nghut ri.

²⁵ Haû Yesuq é tapzîng nàm má gi, Yhângnu, Yhângnú é yhanggu byizo eq, Klopa é yhangmyi Mariq eq Magadalaq wà mà é Mariq pé, yap tô bum akô.

²⁶ Yesuq gi, Yhang nàm má, Yhang chyitdap é chángzo eq Yhâng nu yap tô é lé myang kat jáng, Yhâng nu lé, "Ánu ê* nung zo lé wú aq," ga taí mù,

²⁷ chángzo haû lé le, "Náng nu lé wú aq." ga taí ri. Haû hkûn mai, chángzo haû yuq gi, Yesuq é yhângnu lé, yhâng é yhùm shut shuí ló bê nghut ri.

Yesuq Soqkâng Byit É Hkyô

Mht 27:45-56; Mrk 15:33-41; Luk 23:44-49

²⁸ Hau htâng, Yesuq gi, ahkuí, muzó bàn bê nghut é lé sé luí, haû Chyúmdang lhoq dik râ matú, "Ngò, wuì shit ri." ga taí ri.

²⁹ Haû má, tsibiyiq wing chyín rayambú joq tô ri; haû mù, yhangmoq gi, wuìmaù lé tsibiyiq wing chyín haû má jum yù luí, jàm-yang ahpyo má tuí tap mù, Yhâng é nhutwuí jé shoq yhun byí akô nghut ri.

³⁰ Yesuq gi, tsibiyiq wing chyín haû lé shuq yù mù, "Mù bàn bê." ga taí ri. Yhang, haû su ga taí eq yhang, ulhum nghuq ló mù, kâng byit bê nghut ri.

³¹ Htang nyí gi, ahkyak é Bánno buinyi nghut luí, haû nyí gi, Hên Lajang Buinyi nghut ri. Haû mù, Yudaq byu pé gi, Bánno buinyi má, mâng pé lé tapzîng htoq má a joq to nhâng nau kô é yanmai, hkyí pé lé bat hkyuí pyám mù, mâng pé lé yù hkyô pyám nhâng râ matú, Pilat chyáng dúng tôngbán akô.

³² Haû mù luí, gyezô pé gi, lé mù, Yesuq eq jén hui su nhik mà é, rayuq é hkyí lé hí bat hkyuí pyám mù, rayuq é hkyí lé dum bat hkyuí pyám akô nghut ri.

³³ Nghut kôlhâng, yhangmoq gi, Yesuq chyáng jé é hkûn, Yhang shi to láng bê nghut é lé myàng kômù, Yhâng é hkyí lé a bat hkyui byi kó nghut ri.

³⁴ Nghut kôlhâng, gyezo rayuq gi, Yesuq é namcham má lham eq htaù kat byi jáng, radá dâm sui eq wui yui htoq lo ri.

³⁵ Haû lé myàng é sù gi, saksé hkám byí ri; yhâng saksé hkám é hkyô gi, tengmán ri. Haû yhang taí kyô é hkyô gi, têng é lé, yhang sé mù, nungmoq le wó lumjîng kó sháng gaq ga, saksé hkám byí é nghut ri.

³⁶ Haû hkyô pé dut é gi, "Yhâng é showui rahkat lhâng a lhoq hkyui rà nghut lhê."* gâ é Chyúmdang haû lhoq dik râ matú nghut lhê.

³⁷ Chyúmdang gotù ralhum má le, "Yhangmoq eq htau htông é sù lé, yhangmoq tu wú kó râ nghut lhê."* gâ é bo tô ashí nghut ri.

Yesuq Lé, Myhup Yhum É Hkyô

Mht 27:57-61; Mrk 15:42-47; Luk 23:50-56

³⁸ Hau htâng, Yesuq é chángzo dut nyí é Aramahti myuq byú Yosep gi, haû Yudaq byu pé lé gyuq é yanmai, tsik za Pilat chyáng Yesuq é gungsôm lé, lé dúng ri. Pilat eq ahkáng byí kat jáng, yhang gi, gungsôm haû lé, lé yu ló bê nghut ri.

³⁹ Yhang gi, hí hkûn, myín lé, Yesuq lé ê huí é sù, Nikodema eq rahá lé é nghut ri; Nikodema gi, mura eq achyo nyhò tô é namngón jung sum xê jói kô yu lé ri.

⁴⁰ Yhangnhik gi, Yesuq é gungsôm lé yù mù, Yudaq byu pé é mâng yhum htúng eq rajung za, namngón jung eq rahá, pán yúng eq htup yup to byí akô.

* **19:26** Ánu ê, gâ é lé, Grik dông gi, "myiwe myhí ê" ga bo tô é nghut lhê. ✧ **19:36** Htoq Ló 12:46; Gyung So 9:12; Hkya-on 34:20 ✧ **19:37** Zhk 12:10

⁴¹ Haù Yesuq lé tapzîng má jén sat pyâm é jowò nàm má, hkyâm ralhùm joq ri; ó yuq lé le a lheq wú shî é, lup sik ralhùm hkyâm hkaù má joq tô ri.

⁴² Haù nyí gi, Yudaq byu pê é Hên Lajang Buinyi nghut é yanmai le, lup haù le chyâng é yanmai le, yhangnhik gi, Yesuq lé, haù má é lheq tô akò nghut ri.

20

Lup Akôm

Mht 28:1-10; Mrk 16:1-8; Luk 24:1-12

¹ Bánno buinyi htâng, napsún noq le mau a bó shimá, Magadalaq wà má é Mariq gi, haù lup má é jé le, lup hkum má é luqlong huí hpyuq to láng é lé myang ri.

² Haù mù, yhang gi, Simun Petruq eq Yesuq chyitdap é chángzo góyuq chyáng din jé ló mù, "Haù Yhumsîng lé, lup mai yu htoq ló byuq bekô; hkâmá é kat to kô é lé, ngamoq a sé." ga tai ri.

³ Haù mù, Petruq eq chángzo haù gi, lup shut e ló akò.

⁴ Yhangnhik í yuq é din akò; nghut kôlhàng, chángzo haù gi, Petruq htoq má wò đin luí, lup má hí din jé e ri.

⁵ Haù mù, yhang gi, ahkaù shut ngóm wú kat é hkùn, haù pán yúng htui leq tô é lé myang ri; nghut kôlhàng, yhang gi, a wang é nghut ri.

⁶ Hau htâng, Simun Petruq gi, châng jé luí, lup hkaù shut wang e ri; haù hkùn, yhang gi, haù má pán yúng htui joq tô é lé le,

⁷ haù Yesuq é ulhùm má htup é panchoq lé le, myang ri. Panchoq haù gi, pán yúng htui eq rahá a nghut e za htui jup leq tô ri.

⁸ Haù lup má hí jé é chángzo le, ahkaù má wang é luí, myàng jáng, lumjîng bê nghut ri.

⁹ (Yesuq gi, shi é mai dum dui toq lô râ nghut lhê ga bo tô é Chyúmdang lé, yhangnhik gi, a sê gyo shi kó nghut ri.)

¹⁰ Hau htâng, haù chángzô nhik gi, yhùm taù ló bekô nghut ri.

Magadalaq Wà Mã É Mariq Lé, Yesuq Htoq Shit É Hkyô

Mrk 16:9-11

¹¹ Nghut kôlhàng, Mariq gi, lup shinggan má ngau yap tô ri. Yhang gi, ngàu uchyang lup hkaù má ngóm wú kat ri.

¹² Haù hkùn, yhang gi, Yesuq é gungsôm lheq tô é jang má, hpyu é mebu wut é maumang lagyo í yuq hkyi htâng shut rayuq, umhtúng shut rayuq, zung to kô é lé, myang ri.

¹³ Yhangnhik gi, "Myiwe myhí ê, nàng, haì mù ngau nyi lhê lú?" ga myi kôjáng, yhang gi, "Ngá é Yhumsîng lé yù ló hpyuq kôluí, Yhang lé hkâmá ló lheq to kô é lé, ngò a sé é yanmai nghut lhê." ga tù tai ri.

¹⁴ Haù su ga luí, yhang, lhing wú kat é hkùn, Yesuq yap tô é lé myàng kôlhàng, Yesuq nghut é lé yhang a wú sé nghut ri.

¹⁵ Yesuq gi, "Myiwe myhí ê, nàng, haì mù ngau nyi lhê lú? Nàng gi, ó yuq lé ho wún lhê lú?" ga myi jáng, yhang gi, hkyâm sai zo sú su ngam pyâm mù, "Sarà ê, nàng, Yhang lé waq htot pyâm é nghut le gi, hkâmá é lheq tô é, ngo lé tai kyo laq, ngò, Yhang lé yu ló rá." ga tai ri.

¹⁶ Haù hkùn, Yesuq gi, yhang lé, "Mariq ê" ga wut kat ri.

Mariq gi, Yhâng shut lhing mù, Hebre myíng dông, "Raboni!" ga wut kat ri. (Haù gi, "Sarà ê" gá é lichyúm nghut ri.)

17 Yesuq gi, "Ngo lé hkâzàng shi; hkâsu mù gà le, Ngò gi, haù Íwâ chyáng a taù doq ló shí é nghut lhê. Nàng gi, Ngá é gumang wui chyáng ló mù, yhangmoq lé, 'Ngò gi, Ngá Wa eq nungmoq é Yhângwa, Ngá é Garai Gasang eq nungmoq é Garai Gasang nghut su chyáng doq ló zó nghut lhê.' gà ri nghù, ló tai kyo aq." ga, yhang lé tai kat ri.

18 Magadalaq wà mà é Mariq gi, chángzô pè chyáng ló mù, "Yhumsing lé, ngò myàng bê!" ga tai luí, yhang lé shit kat é pé lé, tai kyô ri.

Yesuq, Yhâng É Chángzô Pé Lé Htoq Shit É Hkyô
Mht 28:16-20; Mrk 16:14-18; Luk 24:36-49

19 Haù nyí, Bánno buinyí htang myìn lé, haù chángzô pé gi, Yudaq byu pé lé gyuq kô é yanmai, hkum tsing myhî pyám mù, zing tô bum kô é u lé, Yesuq gi, lé jé mù, yhangmoq é agùng má yap to luí, "Nungmoq nguingón yuqyo nyí sháng gaq!" ga tai ri.

20 Yhang gi, haù su ga tai é htàng má, yhangmoq lé, Yhâng é loq pé eq namcham lé tûn shit ri. Chángzô pé gi, haù Yhumsing lé myàng kôjáng, gyai gabú bùm bekò nghut ri.

21 Yesuq gi, "Nungmoq nguingón yuqyo nyí sháng gaq! Haù Íwa gi, Ngo lé nhang kat é su, Ngò gi, ahkuí, nungmoq lé nhang kat é nghut lhê." ga dum tai ri.

22 Haù su ga tai mù, Yhang gi, yhangmoq é ahtoq má soq mut luí, "Haù Chyoiyúng Woi-nyí lé hap yù keq.

23 Ó yuq é mara pé lé nghut kôle, nungmoq hkyut byí é nghut jáng, mara haù pé gi, hkyut pyám byí é hui rà nghut lhê; nungmoq a hkyut byí é nghut jáng, mara haù pé gi, hkyut pyám é hui rà a nghut." ga tai ri.

Htomaq Lé, Yesuq Htoq Shit É Hkyô

24 Haù chángzo raxe í yuq má bo é, Zozùm le gà é Htomaq gi, Yesuq lé jé é hkùn, haù chángzô pé eq rahá a nyi to nghut ri.

25 Haù mù luí, gotû chángzô pé gi, yhang lé, "Haù Yhumsing lé, ngamoq myàng bê." ga tai kyô akò.

Nghut kôlhang, yhang gi, yhangmoq lé, "Ngò gi, Yhâng é loq pé mà é shamtoq zuhkô lé myàng mù, ngá é loqnyhui eq joí wú é eq, Yhâng é namcham má, ngá é loq eq myang lap wú é za a nghut jáng, haù lé ngò lumjing rá a nghut." ga tai ri.

26 Rabat myáng jáng, chángzô pé gi, haù yhúmhaù má dum nyi tô akò; Htomaq le, yhangmoq eq rahá nghut nyi ri. Haù hkum pé myhî to kôlhang, Yesuq gi, lé jé mù, yhangmoq é agùng má yap to luí, "Nungmoq nguingón yuqyo nyí sháng gaq!" ga tai ri.

27 Hau htàng, Yhang gi, Htomaq lé, "Náng é loqnyhui, shí má lé joí mù, Ngá é loq pé lé wú aq. Náng é loq lham kat mù, Ngá é namcham má lé lap wú aq. A lùm hkâkut, lumjing nyi aq." ga tai ri.

28 Haù hkùn, Htomaq gi, "Ngá é Yhumsing, ngá é Garai Gasang ê!" ga Yhang lé tai ri.

29 Yesuq gi, yhang lé, "Nàng gi, Ngo lé myang é yanmai, lumjing é a nghut lhu? A myàng kôlhang, lumjing é bang gi, hkungsô wó nyi ri." ga tai ri.

30 Laiká buk shí má a kâ tô é limik kumlhá pé gotû myo myo lé le, Yesuq gi, Yhâng é chángzô pè hí má kut shit bê nghut ri.

³¹ Nghut kôlhang, Yesuq gi, Garai Gasâng é Yhangzo Hkrisduq nghut é lé, nungmoq wó lumjíngrâ rá matú eq, lumjíngrâ é yanmai, nungmoq Yhâng é myíng má asak wó kó rá matú, shí hkyô pé lé kâ tô é nghut lhê.

21

Ngozo Wó Chyup Yu É Limik Kumlhá

¹ Hau htâng má, Yesuq gi, Tiberi nhông yàm má, Yhâng é chángzô pé lé dum htoq shit ri. Yhang htoq shit é hkyô gi, a-ô má é dông nghut ri.

² Simun Petruq, Zozúm le gâ é Htomaq, Galile mau Hkanaq wà mó má é Nahtanelaq, Zebedi é yhangzo nhik eq gotú chángzo í yuq pé gi, rahá nyi to bum akô.

³ Háu hkûn, Simun Petruq gi, yhangmoq lé, "Ngò gi, ngozo kóng ê rá." ga tái jáng, yhangmoq gi, "Ngamoq le châng lé rá." ga tái akô. Háu mù luí, yhangmoq gi, htoq é mù, háu lhai má wàng bekô nghut ri; nghut kôlhang, háu myín, radu lhang a wó kóng kó nghut ri.

⁴ Htang napkyó maubó lo é hkûn, Yesuq gi, wuiyàm má yap tô ri; nghut kôlhang, háu chángzô pé gi, Yesuq nghut é lé a wú sé kó nghut ri.

⁵ Yesuq gi, yhangmoq lé, "Luzúm wui ê, nungmoq, ngozo wó akô lhu?" ga, wut myi kat jáng, yhangmoq gi, "A wó." ga tù tái akô.

⁶ Háu hkûn, Yhang gi, "Nungmoq é gùn lé, háu lhai é loqyo hkyam shut dú hkyô kat keq; háu jáng, nungmoq wó kông yù kó rá nghut lhê." ga tái ri. Háu mù, yhangmoq gi, gùn dú hkyô kat é hkûn, ngozo lúm myô é yanmai, háu gùn lé lhang a wó llang yù lo kó nghut ri.

⁷ Háu mù luí, háu Yesuq chyitdap é chángzo gi, Petruq lé, "Yhumsing ru nghut ri." ga tái ri. Simun Petruq gi, "Yhumsing ru nghut ri." gâ é lé wó gyo eq yhang, yhang gi, mebu hkyut pyâm tô é yanmai, buhíng mó lé, yhâng é gùng má baiyup yù mù, wui hkaú má byam wang ló bê nghut ri.

⁸ Háu chángzo góbang gi, wuiyàm eq ngo xê làm kô za wê é yanmai, ngozo byíng tô é gùn lé, wuiyàm shut lhai mai she jé lo akô nghut ri.

⁹ Yhangmoq gi, wuiyàm má jé dap ló kô é hkûn, myigye gyúng é myihkyóm htoq má ngozo nyhín tô é lé le, muk ratsuí joq tô é lé le, myang akô.

¹⁰ Yesuq gi, yhangmoq lé, "Háu, ahkuí za nungmoq wó kông yu é ngozo, ra-am yù lé keq." ga tái ri.

¹¹ Háu mù, Simun Petruq gi, lhai má doq ji luí, kô é ngozo rasho ngó xe sùm du yhang bo é gùn lé, dùng yàm má she htoq tô ri. Ngozo háu myhó myo kôlhang, gùn gi, a jeq nghut ri.

¹² Yesuq gi, yhangmoq lé, "Napzang lé zo keq." ga tái ri. Chángzô pé gi, Yhang, háu Yhumsing nghut é lé sé kô é yanmai, ó yuq lhang, "Nàng, ó yuq nghut lhê?" ga, a wám myi kó nghut ri.

¹³ Yesuq gi, lé mù, muk lé é yù luí, yhangmoq lé byí ri; ngozo lé le, háu su kut ri.

¹⁴ Yesuq gi, shi é mai lhoq dui toq yù huí é htâng, Yhâng é chángzô pé lé htoq shit é má, shí gi, sum dâm nghú rá dâm nghut ri.

Yesuq Eq Petruq

¹⁵ Yhangmoq bàn zô bùm kô é htâng má, Yesuq gi, Simun Petruq lé, "Yohan é yhangzo Simun ê, nàng gi, shí bang htoq má, Ngo lé teng za je chyitdap lhê lhu?" ga myi jáng, yhang gi, "Nghut lhê; Yhumsing ê, ngò, Nàng lé chyitdap é

hkyô lé, Nàng sê lhê." ga tù tai ri. Haú hkûn, Yesuq gi, "Ngá é sau zô pé lé, baú aq." ga, yhang lé tai ri.

¹⁶ Hau htâng, Yesuq gi, "Yohan é yhangzo Simun ê, nàng gi, Ngo lé teng za chyitdap lhê lú?" ga dum myi jáng, yhang gi, "Nghut lhê; Yhumsing ê, ngò, Nàng lé chyitdap é hkyô lé, Nàng sê lhê." ga tù tai ri. Haú hkûn, Yesuq gi, "Ngá é sau pé lé, rém aq." ga tai ri.

¹⁷ Dum radàm, Yesuq gi, yhang lé, "Yohan é yhangzo Simun ê, nàng gi, Ngo lé chyit lhê lú?" ga myi ri.

Haú hkûn, Petruq gi, "Nàng gi, ngo lé chyitdap lhê lú?" ga, yhang lé Yesuq eq sùm dam dàt tai é yanmai, yhâng myit nô luí, "Yhumsing ê, Nàng gi, lunglhang lé sê lhê; ngò, Nàng lé chyitdap é hkyô lé, Nàng sê lhê." ga tai ri.

Haú hkûn, Yesuq gi, "Ngá é sau pé lé, baú aq.

¹⁸ Ngò, nàng lé teng za tai lé, nàng, zorâm nghut é hkûn gi, yhumsing gùng yhumsing hpyihit baiyup* yù mù, é nau é jowò hkangmó má wó é é nghut lhê; nghut kôlhang, nàng mang jáng gi, loq í loq lham luí, nang lé góyuq eq hpyihit baiyup byi mù, nàng a é nau é jowò shut shuí é râ nghut lhê." ga tai ri.

¹⁹ (Yesuq haú su ga tai é gi, haú Petruq, hkâsu kut shí é đông mai, Garai Gasâng é hpungwup shingkan lé dan hu nhâng râ nghut é lé, tai nau é nghut ri.) Hau htâng, Yesuq gi, yhang lé, "Ngá htâng cháng aq." ga tai ri.

²⁰ Haú hkûn, Petruq gi, lîng wú kat le, haú Yesuq chyitdap é chángzo, yhangmoq htâng châng wún é lé myàng ri. Chángzo haú gi, hí hkûn, myinzang zô é u lé, Yesuq chyáng leq ngè mù, "Yhumsing ê, Nang lé ap pyám râ sù gi, ó yuq lú?" ga, myi wú é sù nghut ri.

²¹ Petruq gi, haú yuq lé myàng jáng, Yesuq lé, "Yhumsing ê, shí yuq gi, hkâsu dut râ lú?" ga myi ri.

²² Yesuq gi, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lhê lú? Nàng gi, Ngá htâng cháng aq." ga tù tai ri.

²³ Dang hau é yanmai, chángzo haú yuq a shí râ nghut lhê gâ é danglám gi, haú gumang wui chyáng byo myin to bê nghut ri. Nghut kôlhang, Yesuq gi, haú yuq a shí râ hkyô lé tai é a nghut, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lhê lú?" ga, tai é ru nghut lhê.

²⁴ Shí pé lé saksé hkám mù, shí pé lé kê tô é sù gi, chángzo haú yuq nghut lhê. Yhâng é saksé gi, têng é lé, ngamoq sê lhê.

²⁵ Yesuq gi, gotù muzó myo myo le kut ashí nghut ri. Muzó haú pé lhum jup lé, kê htoq yu é ru nghut le gi, kê tô é laiká buk haú pé gi, mingkan gón má lhang ngo râ a nghut nghû, ngò wó myit ri.

* 21:18 Hpyihit baiyup gâ é lichyúm gi, mebu wut luí ri ri kut tô é lé gâ lhê.

LAGYO Laiká (Acts)

Yesuq, Mauhkûng Má Shuí Yù Huí É Hkyô

¹ Htohpilug ê, Yesuq yhang hkyin yu tô é lagyô pé lé, Chyoiyúng Woi-nyí wum-o êq dang ban pying tô é htâng má, Garai Gasang yhang lé mauhkûng shut shuí yu é buinyí jé shoq,

² Yhang kut shit é hkyô pé eq, mhoqshit é hkyô pé banshoq lé, hí lhê é laiká buk má ngò kê kat bê nghut lhê.

³ Yesuq gi, shí hkâm é htâng má, Yhang dui toq bê hkyô lé, lumgíng é saksé myo myô êq yhangmoq lé tún shit mù, buinyí myí xê nyí gyoro má yhangmoq chyáng lé htoq shit shit kut luí, Garai Gasâng é mingdán hkyô lé hko kyô ri.

⁴ Yhang, yhangmoq eq rahá zup tô é hkûn, hkunmó hkyô é gi, "Nungmoq gi, Yerusalem wà mó mai a htoq é za, ngá chyáng mai wó gyô yu é, ngá wá é danggidiq byí tô é chyunghuq lé lánq nyí keq.

⁵ Hkâsu mù gà le, Yohan gi, wui êq wui-myhup hkám byí é nghut lhê; nghut kôlhang, nungmoq kúm gi, buinyí hkâ-myháng a myáng má, Chyoiyúng Woi-nyí mai baptisma wó hkam yù kó râ nghut lhê." ga ri.

⁶ Lagyô pé gi, Yhang eq rahá chôm zup ming tô é hkûn, Yhang lé, "Yhumsíng ê, nàng, haù Israelaq byu pé lé mingdán dum xuq byí râ gi, ahkuí yhang nghut bê lhú?" ga myí akò.

⁷ Yesuq gi, "Áwa gi, Yhâng é ahkáng ayá êq kut to bê é ahkyíng yam-yoq pé lé, nungmoq sé nó a ra.

⁸ Nghut kôlhang, Chyoiyúng Woi-nyí nungmoq chyáng jé jáng, nungmoq gi, wum-o a-tsam wó yù mù luí, Yerusalem wà mó eq Yuda mau banshoq, Samariq mau eq maumyí htáng shoq, ngá é saksé pé dut kó râ nghut lhê." ga luí, yhangmoq lé tai ri.

⁹ Dang haù ban tai é htâng má, yhangmoq wú nyi le, Yhang gi, mauhkûng shut shuí yu é hui mù, yhangmoq hí mai Yhang lé a myàng loshoq, mhut êq htup ló byuq bê nghut ri.

¹⁰ Yesuq doq ló nyi é u lé, yhangmoq mauhkûng shut ru wú tsuq nyi bum ashí le, hpyu é mebu wut é byù í yuq gi, radá dâm yhangmoq nàm má htoq yap ló mù,

¹¹ "Galile byu pé ê, haí mù luí mauhkûng shut wú tsuq nyi akò lhú? Nungmoq é hí mai mauhkûng shut shuí yù huí é, haù Yesuq mauhkûng shut doq ló é u lé, nungmoq myang kat é su, Yhang dum jé lé râ nghut lhê." ga tai akò.

Yudaq É Jowò Má, Mahtiaq Lé Hkyin Kat É Hkyô

¹² Hau htâng má, yhangmoq gi, Tsanlun Bùm má, Yerusalem wà mó shut tau ló bekò.* Haù gyoro gi, Bánno buinyí má ge sô é í za wê ri.

¹³ Yhangmoq jé ló kôjáng, yhangmoq nyi nyi kô é yhúm ahtaq pyâm má é wap shut doq ló akò; haù bang gi, Petruq, Yohan, Yakuq, Andre, Hpilip

* **1:12** Tsanlun bùm eq Yerusalem gyoro gi, déng rawuí hkup kô we ri.

eq Htomaq, Barhtolume eq Mahte, Alhpe é yhangzo Yakuq, Zelutuq dut é Simun, góyuq Yakuq é yhangzo Yudaq pé nghut akô.

¹⁴ Yhangmoq lhunglhâng bang gi, myiwe wui le, Yesuq é yhângnu Mariq le, yhanggu pé le kut mù, i-myt rahkat za kyû chôm dung dung kut nyi akô.

¹⁵ Buinyi haú yoq má, Petruq gi, lumjínq é gumang gu-nhá[†] wui rasho í xê yuq kô zup zing tô é gung gúng má, toq yap mù,

¹⁶ "Gumang gu-nhá wui è, Yesuq lé chyup é bang lé hkyô shuí hí é sú Yudaq eq séng luí, hí hpyang Dawiq é nhut mai Chyoiyúng Woi-nyí taí tô é Chyúmdang gi, dik byuq bê nghut ri.

¹⁷ Yhang gi, nga-nhúng má nghap lhôm é hui mù, hpúng sará ayá wó bê sù nghut kôlhâng shí hkyô dut bê nghut ri." ga taí ri.

¹⁸ (Yudaq gi, yhang kut é agé ashop é muzó mai wó é ahpau éq myigùng ratóng wui yu é htâng, haú má yhang, a-nghop dông byit gyó mù wam buq goq luí, ú banshoq buq myín byuq bê nghut ri.

¹⁹ Haú hkyô lé Yerusalem wà mó má nyi é lhunglhâng bang wó gyo kôjáng, myigùng haú lé yhangmoq é myíng dông, 'Akeladama' ga myhíng akô; haú gi, 'Sui myigùng', gâ é nghut ri.)

²⁰ Petruq xoq taí é gi, "Hkâsu mù gâ le, Hkya-on Kungtôn Laiká má, 'Yhâng é jowò chamchyuyui dut byuq sháng gaq; haú má ó le a nyi kó sháng gaq.'[✧]

ga luí le, dum

'Yhang wó é ayá lé byù góyuq wó yu pyám byi sháng gaq.'[✧]

ga luí le, bo tô ri.

²¹⁻²² Haú mù luí, Yohan baptisma byí hi é hkûn mai, Yesuq lé nga-nhúng chyáng mai shuí yu é buinyi jé shoq, Yhumsíng Yesuq nga-nhúng eq rahá htoq htoq wàng wàng kut nyi é buinyi banshoq pé má, nga-nhúng eq yhang zum nyi sù rayuq lé, hkyin kat râ dut ri. Haú yuq gi, Yesuq dum dui toq é hkyô lé nga-nhúng eq rahá saksé dut râ sù nghut lhê." gâ ri.

²³ Haú hkûn, yhangmoq gi, Yustu ga le myhíng é, Barsabaq gâ é Yosep eq Mahtiaq nhik lé hkyin tô akô.

²⁴⁻²⁵ Haú mù, yhangmoq kyúdung kô é gi, "Byù banshoq é i-myt lé sê é Yhumsíng è, Yudaq Iskarut gi, yhang ló gíng é jowò shut ló râ ga, tô pyám tô é yhâng é lagyo ayá é matú shí nhik mâ é nàng hkyin tô é sú lé tún shit laq ò." ga akô.

²⁶ Hau htâng, yhangmoq, byù hkyin shosé she le, Mahtiaq chyáng ang bê. Haú mai, Mahtiaq lé gi, haú lagyo raxe rayuq má jat kat bê nghut ri.

2

Chyoiyúng Woi-nyí Jé Gyó Lo É Hkyô

¹ Penteko-ti^{*} buinyi jé jáng, lumjínq bang banshoq gi, jowò ralhum má za, chôm zup míng nyi tô akô.

² Haú hkûn, laidun mó lo é su gâ é htê gi, byodàn ratung, mauhkûng mai mying htoq lô mù luí, yhangmoq zing tô é yhúm byíng shoq dut to bê nghut ri.

³ Myishâm su dut é le byò myín htoq lô mù, yhangmoq yuq jup é ahtoq má jé to bùm bê nghut ri.

[†] 1:15 Gumang gu-nhá gâ é lé, Grik má gi, gumang za gâ to lhê. ✧ 1:20 Hkya-on 69:25 ✧ 1:20

Hkya-on 109:8 ✧ 2:1 Penteko-ti gâ é gi, Lhoqlhai Poi lai é htâng ngo xê nyí jé é buinyi má, kut é poi lé gâ lhê.

⁴ Yhangmoq lhunglhâng bang gi, Choyiyúng Woi-nyí byíng lo bùm kômù, Woi-nyí èq taí nhang é eq rajung za, laklaí dang dông nyo lo bum akò.

⁵ Haú u lé, mauhkúng ô má joq é mingdán hkangmó má é, tará hkunggá é Yudaq byu pé gi, Yerusalem wà mó má bíng nyi bum akò.

⁶ Haú myíng é htê lé wó gyo kôjáng, byù rajùm rayò zíng lé lô kômù, ó le ô é myíng dông sê gyô yù kô é yanmai, maú úng-âng byuq bùm kôluí,

⁷ maú bùm uchyang taí kô é gi, "Wú keq, ahkuí dang taí nyi é byù shí bang lhunglháng gi, Galile byu pé chyat a nghut kó lúhú?

⁸ Haú nghut é wa, hkâsu mù nga-nhúng ó le ô é yhumsing mau má é myíng dông sê gyô yu lhê lúhú?

⁹ Parhtí, Medi, Elam mau má é bang eq Mesopotamiaq mau, Yuda eq Kapadokia mau, Pontuq eq Asia,

¹⁰ Hprugi eq Pamhpuli, Egutuq ming má nyi é bang eq Kuruni myuq nâm má nyi é Libya ming má é bang, Romaq myuq mai lé bíng nyi é Yudaq byu pé eq Yudaq noqkuq htúng má lhing wang lò bang,

¹¹ Kreti zinlóng eq Arabiq mau má é bang, nga-nhúng gi, yhangmoq hko kyô é Garai Gasâng é mauhpo muzó hkyô lé, yhumsing mau má é myíng dông yhang wó sê gyô yu ri-nhung." gâ ri.

¹² Yhangmoq banshoq bang gi, maú úng-âng byuq kômù, "Shí gi, haí wá nghut lhê lúhú?" ga le, rayuq eq rayuq myí lhum bum akò.

¹³ Nghut kôlhang, byù ra-am gi, "Shí bang gi, í shuq wut é bang nghut akò." ga luí, taí jihpoi bum akò nghut ri.

Petruq Hko Kyô É Mungdang

¹⁴ Haú hkún, Petruq gi, lagyo góbang raxe rayuq eq toq yap mù, htê mó èq byù haú bang lé taí é gi, "Yudaq byu pé eq Yerusalem wà mó má nyi nyi é lhunglhâng bang ê, rago gyô wú keq! Ngò, nungmoq lé, shí hkyô taí kyo kôlé.

¹⁵ Shí bang gi, nungmoq sù-ngam é dông, shuq wut é bang a nghut; hkâsu mù gâ le, ahkuí gi, napkyó gau hkyíng za ru nghut ashí.

¹⁶ Shí hkyô kúm gi, myiqhtoi Yoelaq taí tô é eq rajung za dut é nghut ri.

¹⁷ Yhang taí tô é gi,

'Garai Gasang ísu gâ ri: Ló htâng é buinyi pé má, Ngò Ngá é Woi-nyí lé byù lhunglhâng bâng é ahtoq má hut gyun rá nghut lhê.

Haú mù, nungmoq é yuqzo byizô pé gi, myiqhtoi htoi kó rá; nungmoq é zorâm wui gi, myoqwup shing-rán myàng kó rá; nungmoq é hpaú mâng pé gi, yhupmoq myàng kó rá nghut lhê.

¹⁸ Buinyi haú pé má, Ngá é dui-nhâng zoshâng hpô pé eq dui-nhâng zoshâng myhí pé é ahtoq má lhang, Ngò Ngá é Woi-nyí lé hut gyun mù luí, yhangmoq gi, myiqhtoi htoi kó rá nghut lhê.

¹⁹ Ngò gi, ahtoq mauhkúng htoq má mauhpo muzó pé lé, a-ô myigùng htoq má, kumlhá pé lé, sui eq, myi eq, myihkau dùm pé èq kut mù tún shít rá.

²⁰ Haú Yhumsing é kô hkikhkam é buinyi a jé shimá, bui gi, mauchut byuq, lhamó gi, sui dut byuq é hí dut rá nghut lhê.

²¹ Haú hkún, Yhumsing é myíng lé llang é bang yuq hkangmó gi, hkyi yu é hui kó rá nghut lhê.[✧]

gâ ri.

²² Israelaq byu pé ê, dang shí lé gyô yù keq, nungmoq sê é eq rajung za, Nazaret wà byù Yesuq nungmoq é hí má tún shit é, laklai kumlhá, mauhpo muzó eq kumlhá pé gi, Yhang lé Garai Gasang nhang kat é saksé dut bê nghut ri.

²³ Shí yuq gi, Garai Gasang myit hpyit tô é hkyô eq, hí te sê é hpaqchyí dông, nungmoq chyáng ap pyâm é hui mù, nungmoq gi, agè ashop byu pé é loq èq, Yhang lé tapzîng htoq má jén sat pyám nhâng bekô nghut ri.

²⁴ Nghut kôlhang, haù shí-nò hkyô gi, Yhang lé wó hkùm zing jung a nghut é yanmai, Garai Gasang gi, Yhang lé shí-nò jamjau mó mai, lhut pyám byi lui lhuq dui toq yù bê nghut ri.

²⁵ Dawiq gi, shí yuq eq séng lui tai é má, 'Haù Yhumsîng gi, ngá é myoq hí má hkâ-nhám le nyi nyi é lé ngò myàng bê. Yhang ngá é loqyo hkyam má nyi nyi é yanmai, ngo lé wó lhoq nhún râ a nghut lo.

²⁶ Haù mù, ngá i-myt gi, nguîngón nyí lui, ngá nhut shô gabú hkya-ôn nyi ri; ngá é gungdu le myit myoqbyù jowò má nyi nyi râ nghut lhê.

²⁷ Hkâsu mù gà le, nàng, ngá é woi-nyí lé mosumhkung má tô pyâm to râ a nghut.

Nàng, náng é Chyoiyúng Sù lé bup byuq é hui nhâng râ a nghut.

²⁸ Nàng, ngo lé asak dui é hkyô sé nhâng bê.

Náng é myoq hí má, nàng, ngo lé gabú hkyô lhoq pyíng byi râ nghut lhê.*
gâ ri.

²⁹ Gumang wui ê, nga-nhông é íchyí íkê Dawiq kâng byit mù, myhup pyám hui bê hkyô lé le, yhâng é lup gi, hkû-nyí jé shoq nga-nhông chyáng joq tô é lé le, ngò, nungmoq lé a gyuq a kyum wám tai lhê.

³⁰ Dawiq gi, myiqhtoi rayuq nghut é yanmai, yhâng é awut ashín mã é rayuq lé, yhâng é hkohkâm tanghkuq má zùng nhâng râ ga Garai Gasang byi tô é danggidiq lé sê to mù,

³¹ 'Hkrisduq† gi, mosumhkung má pyâm to a hui râ eq, Yhâng é gungsho a bup byuq é za, dum dui toq ló râ nghut lhê.', gà é hkyô lé te sê to lui tai tô ri.

³² Garai Gasang gi, haù Yesuq lé lhoq dui toq yù bê. Ngamoq banshoq bang gi, haù hkyo é saksé pé nghut nyi ri.

³³ Haù mù, Garai Gasang gi, Yesuq lé Yhâng é loqyo hkyam má lhoq toq to bê. Yesuq gi, Garai Gasang byi tô é danggidiq Chyoiyúng Woi-nyí lé hkam yù mù, hut hkyô kat bê nghut é yanmai, ahkuí nungmoq shí su wó myàng, wó gyo bekô nghut ri.

³⁴⁻³⁵ Hkâsu mù gà le, Dawiq gi, mauhkûng htoq tsáng myhâng má a doq ló wú kôlhang, yhang gi,

'Haù Yhumsîng Garai gi, ngá é Yhumsîng lé,

"Ngò, náng é gye pé lé, náng é hkyí nang tanghkuq kut pyám byí é hkyíng jé shoq,

Ngá é loqyo hkyam shut zung nyi shi aq." gà ri.*

ga lui, tai ri.

³⁶ Hau é yanmai, Garai Gasang gi, nungmoq eq tapzîng má jén sat pyâm é haù Yesuq lé, Yhumsîng eq Hkrisduq dut nhang é hkyô, Israelaq byu pé lhunglhang bang hkyak sê nyi kó sháng gaq ô." gà ri.

* 2:28 Hkya-on 16:8-11 † 2:31 Grik dong Hkrisduq gà é gi, xù but hui Sù gà é lichyúm nghut mù, Hebre dong Mesaia gà é eq rajung za nghut lhê. * 2:34-35 Hkya-on 110:1

Sâng-hi Lumjîng É Bang

³⁷ Yhangmoq gi, haù lé wó gyô bùm kôjáng, yhangmoq é i-myyit má záng kô é nghut mù luí, "Gumang wui ê, ngamoq hkâsu kut lo râ lhú?" ga luí, Petruq eq lagyo góbang lé myí akô.

³⁸ Petruq gi, "Nungmoq yuq hkangmó myit lhîng mù, Yesuq Hkrisduq é myîng mai wui-myhup hkâm yù keq; Haù jáng, nungmoq é yubak hkyut pyám byí é hui kó râ nghut lhê. Haù hkûn, Chyoiyúng Woi-nyí gâ é chyunghuq lé, nungmoq wó yù kó râ nghut lhê.

³⁹ Hkâsu mù gâ le, danggidiq haù gi, nga-nhûng é Yhumsîng Garai Gasang ji yù râ bang banshoq nghut é, nungmoq eq nungmoq é yhangzo yhangshú pé eq le, mau we má nyí é lhunglhâng bang eq le, sêng lhê." ga luí, yhangmoq lé tai kyô ri.

⁴⁰ Yhang gi, dang gotû myo myô èq le saksé hkâm mù, "Shí agé ashop é amyú mai wó lut htoq lo keq ô!" ga luí, yhangmoq lé lhoq pun lhoq kyîng ri.

⁴¹ Dang haù lé guq yu é bang gi, wui-myhup hkâm yu bùm kôluí, haù nyí má byù sum hkyîng kô jat wàng lo bum bekô nghut ri.

Lumjîng Bang Zùm Yap É Hkyô

⁴² Haù bang gi, lagyô pé mhoqshit é hkyô, zùm yap é hkyô, muk hpê gam é hkyô² eq akyú dúng é hkyô má, i-myyit rahkat za chôm châng nyí akô.

⁴³ Lagyo pé kut shit é mauhpo muzó eq limik kumlhá pé myo myô é yanmai, lhunglhâng bang gi, gyuq maú nyí bum akô nghut ri.

⁴⁴ Lumjîng é lhunglhâng bang gi, rawò má za zup zîng to mù, azîng zè banshoq lé chôm chung nyí akô.

⁴⁵ Yhangmoq gi, yhumsîng é sutzè pé lé, ûng pyám mù, yuq hkangmó lé, yhang râ tô é eq rajung za gâm byí akô.

⁴⁶ Yhangmoq gi, nyí wuí myit rahkat zâ èq noqkuq yhûm wàng má nyí nyí akô. Yhumsîng é yhûm pé má le muk hpê gam é hkûn,

⁴⁷ Garai Gasang lé hkya-on kungtôn uchyang, gabú é eq myit hui é èq chôm zo chôm shuq nyí bum akô; byù banshoq bâng é hí má le myoqdong wó bum akô. Haù Yhumsîng gi, nyí wuí yhangmoq chyáng hkyi yù hui bang jat lò nhang ri.

3

Hkyi Hten Sû Rayuq Lé, Petruq Lhoq Gê Byí É Hkyô

¹ Ahkuí, Petruq eq Yohan gi, myinhâng zó sum hkyîng lhê é kyûdung nám má, noqkuq yhûm shut doq é ló akô.

² Haù hkûn, ìnù unghkaú mai hkyi hten lugù dut é byù rayuq lé, noqkuq yhûm má wang lé lô bâng chyáng mai dung zo sháng gaq ga, Yúnglho hkum ga myhîng é hkúmdong má nyí hkang nyí mó waq lé lô mù, lé nyhi to to kut akô.

³ Yhang gi, Petruq eq Yohan, noqkuq yhûm haù má wang e ló é lé, myàng luí, lhom dúng nyí ri.

⁴ Petruq eq Yohan kúm gi, yhang lé chôm wú tsuq to mù, "Nga-nhik lé tu wú aq." gâ akô.

⁵ Haù mù, yhang, yhangnhik chyáng mai rajung jung wó yù râ lé myit myoqbyù luí, yhangnhik lé rago za saí wú tô ri.

† 2:42 Muk hpê gam hkyô gâ é lé lichyúm í dông wó yu lhê - radông gi, rahá chôm zo chôm shuq é lé ga lhê; radông gi, Poído chôm zô é lé gâ lhê.

⁶ Petruq kúm gi, "Ngùn, hîng gi, ngò a wó; nghut kôlhang, ngò wó é nang lé byi lé: Nazaret wà byù Yesuq Hkrisduq é myîng mai toq sô lô aq." ga taí uchyang,

⁷ yhâng é loqyo loq má zui mù láng toq kat ri; haú hkún jáng, yhâng é hkyí kochang-chap pé wúm bo lò bê nghut ri.

⁸ Haú mù, yhang gi, radá dâm toq yap mù sô kat luí, so uchyang, byàm uchyang Garai Gasang lé hkyà-on mù, yhangnhik eq rahá noqkuq yhùm má wang lô ri.

⁹ Yhang sô e lô nyi é eq Garai Gasang lé hkyà-on kungton nyi é lé, lhunglhâng bang chôm myang akô.

¹⁰ Haú yuq gi, noqkuq yhum é Yúngl hó hkum gâ é hkúmdong má zung to mù, dung zo sù nghut é lé yhangmoq matsîng kô é nghut mù luí, yhâng chyáng dut lò bê hkyo é yanmai, maú hong byuq bum akô nghut ri.

Petruq Hkô Kyô É Mungdang

¹¹ Petruq eq Yohan chyáng haú dung zo sù byìn châng tô é hkún, shiwa byu pé gi, wú maú uchyang, Sholumon jirop shut, yhangmoq chyáng đin yán wang lé lo bum akô.

¹² Petruq haú lé myàng jáng, shiwa byu pé lé taí é gi, "Israelaq byu pé è, shí yuq é hkyô lé hai mù luí maú nyi akô lúh? Nga-nhik é dingmán hkyô eq wum-o a-tsâm èq, shí yuq lé wó so nhang é su ngâm luí, ngá-nhik lé wú tsuq bum akô lúh? Haú đong a nghut.

¹³ Abraham, Isak eq Yakup pé é Garai Gasang, nga-nhùng é íchyí íwa pé é Garai Gasang gi, Yhâng é đui-nhâng zoshâng Yesuq lé hpungwup shingkang lhoq htoq byí é nghut ri; nungmoq kúm gi, Yhang lé sat hui shoq ga ap pyám kômù luí, Pilat zau hpó mai Yhang lé nhang pyám rã ga myit to bê lé, nungmoq gi, Yhâng é hí má yhang, Yhang lé he-ngik pyâm akô nghut ri.

¹⁴ Haú chyoyúng dingmán é Sù lé nungmoq he-ngik pyám kômù, byù sat sù lé sheq đung htoq yú kôluí,

¹⁵ Asak Yhumsing lé gi, sat pyám bekô. Garai Gasang kúm gi, haú yuq lé shi é mai lhoq đui toq yú bê nghut ri; ngá-nhik gi, haú hkyo é saksé nghut nyi lhê.

¹⁶ Yesuq é myîng lé lumjîng é yanmai, haú lumjîng myit mai za, shí nungmoq myang é sê é sù lé wum-o lhoq pyîng byi bê nghut ri; nghut bê, Yesuq lé lumjîng é yanmai, shí yuq lé, nungmoq banshoq bâng é hí má, gumjup shoq lhoq ge to byi bê nghut ri.

¹⁷ Ahkuí, gumang wui ê, nungmoq é uphkâng bang kut é su, nungmoq le haú hkyô lé a sé mù kut pyâm é hkyô lé ngò sê nyi lhê.

¹⁸ Nghut kôlhang, haú hkyô gi, Garai é Hkrisduq shí-nò jamjau hui rã nghut lhê ga luí, myiqhtoi banshoq bang lé hí hí mai taí nhang tô é Garai Gasang yhang, lhoq đik é nghut ri.

¹⁹ Hau é yanmai, haú Yhumsing chyáng mã é nguôngón é ahkýing yàm yoq jé lô rã matú le,

²⁰ nungmoq é matú hkyin tô é Hkrisduq nghut é Yesuq lé, Yhang nhang kat byi rã matú le, nungmoq é yubak mara hkyut pyám byí é hui rã matú le, nungmoq gi, myit lhîng mù Garai Gasang chyáng lhîng lò keq.

²¹ Garai Gasang gi, a-nham pyat mai, Yhâng é chyoyúng myiqhtoi pé é nhut mai, taí nhang to bê eq rajung za, nyi mi-nyi, joq mijoq lé asik dum sai é pyat jé shoq, Yesuq lé mauhkúng htoq má nyi nhang to rã nghut lhê.

22 Hkâsu mù gâ le, Mosheq taî tô é le, 'Haû Yhumsîng Garai Gasang gi, nungmoq é yhanggu yhangmâng pê chyáng mai, nungmoq é matú ngò sù é myiqhtoi rayuq pô htoq lô nhâng râ nghut lhê; haû yuq taî mitaî nungmoq gyo ra râ nghut lhê.

23 Myiqhtoi hau é dang lé a gyo sù ó yuq nghut kôlhâng, yhumsing é byù myû mai chyung hpyit pyâm é hui râ nghut lhê.[✧] gâ ri.

24 Gê gè yhang, Samuelaq mai, yhâng é htâng má châng pô htoq lo é myiqhtoi pé banshoq bang hko kyô lo é má le, buinyi shí pé eq séng mù taî to bekô nghut ri.

25 Nungmoq gi, haû myiqhtoi pê é dang silí wunlí eq, Garai Gasang mai, Abraham lé, 'Náng é awut ashîn é yanmai, mingkan htoq mâ é byù myû chângjup hkungsô wó kó râ nghut lhê![✧] gâ é eq rajung za, nungmoq é íchý íwâ pé eq tó tô é danggidiq lé wó hkam yù râ bang nghut akô.

26 Garai Gasang gi, nungmoq yuq hkangmó lé yhumsing agè ashop é hkyô mai wó lhing taû lò nhang é dông, shimân byi râ matú, Yhâng é dui-nhâng zoshâng lé pô htoq lô nhâng luí, nungmoq chyáng hí nhang kat byi bê nghut ri." gâ ri.

4

Petruq Eq Yohan Nhik Chyup Huí É Hkyô

1 Hkyangjông pé, noqkuq yhûm zúng é suwún hpó eq Saduke pé gi, Petruq eq Yohan shiwa byu pé lé dâng nyo nyi é hkûn, htoq lé lô kômù,

2 yhangnhik, shiwa byu pé lé mhoqshit é eq, Yesuq é yanmai shi byuq bê bang Yesuq má dum dui toq lô râ gâ é hkyô lé taî nyi kô é yanmai, yhangmoq gyai yhang myit myô nyi bum akô.

3 Haû mù, yhangmoq gi, yhangnhik lé chyup yû luí, myinhâng mauchut lô bê nghut é yanmai, htang napkyó jé shoq htóng má lhûng tô akô.

4 Nghut kôlhâng, mungdang lé wó gyô yu é bang myo myo gi, lumjîng kômù luí, yuqgè ngo hkyîng kô jé shoq myô jat lò bekô nghut ri.

Yudaq Byìn Tú Wapdoq Má, Yhangnhik Lé Myi Jep Wú É Hkyô

5 Htang nyi, yhangmoq é zau wui, suwún wui eq tarâ sará pé gi, Yerusalem wà mó má chôm huí zup akô.

6 Hkyangjong mó Anna, Kayahpaq, Yohan, Alesander pé eq hkyangjong mó é amyû pé banshoq le, hau má bo tô akô.

7 Haû mù, yhangmoq gi, Petruq eq Yohan lé gung gûng má nyhi to luí, "Nungnhik gi, haî a-tsam, ó yuq é myîng mai mù shí lé kut akô lú?" ga myi akô.

8 Haû hkûn, Petruq gi, Chyoiyúng Woi-nyí byîng tô é nghut mù luí, yhangmoq lé taí é gi, "Mîngbyû wui é zaugun suwún wui ê,

9 hkyi hten sù shí yuq lé lhoq gè byi é jeju yanmai, yhang hkâsu kut lhoq ge yù huí é hkyô lé, hkû-nyí nungmoq ngá-nhik lé myi gôn wú naû kô é nghut le gi,

10 nungmoq lhunglhâng bang eq Israelaq byu pé banshoq lé sé nhâng kôlé, nungmoq èq tapzîng má jén sat pyâm mù, Garai Gasang èq shi é mai lhoq dui toq yu é, Nazaret wà byù Yesuq Hkrisduq é myîng mai, shí yuq gi, nungmoq é hí má ísu wáng wáng zán zán yap tô é nghut ri.

11 "Yhûm saí bang nungmoq hkyin htoq pyâm é luqgok gi, htungchyûn mâ é ahkyak dik é luqgok dut bê."*

gâ é gi, Yesuq lé tai é đông nghut ri.

12 Hkyi yù hkyô gi, Yhang mai lai lui gotù a nyi lo, hkâsu mù gâ le, nga-nhúng hkyi yu é hui râ matù, mauhkûng a-ô má, Yhâng é mying mai lai lui, xângzo byu pé lé byi tô é mying gotù a joq lo é yanmai nghut ri." gâ ri.

13 Yhangmoq kúm gi, Petruq eq Yohan nhik a gyuq a kyum tai é lé myàng kôjáng, yhangnhik, jong a doq wú é, mayù byù za nghut é hkyô lé sé to kô é yanmai, mau nyi bum akô; nghut kôlhang, hí hpyang Yesuq eq zum wún wú sù nhik nghut é lé, yhangmoq bûn kat akô nghut ri.

14 Hau htoq agó, lhoq gê byi é hui sù le, yhangnhik eq rahá yap tô é lé, yhangmoq myàng kô é nghut mù lui, tai râ hkyô hai le a joq lo kó nghut ri.

15 Haù mù, yhangnhik lé, haù Yudaq byin tú wapdoq* mai lhoq htoq to mù, yhangmoq rayuq eq rayuq hpyê lhum kô é gi,

16 "Shí nhik lé hkâsu kut lé gè râ lú? Yhangnhik kut shit e laklai kumlhá gi, Yerusalem wà mó má nyi é lhunglhang bâng é hí má de za dut bê nghut é yanmai, nga-nhúng haù lé a wó hê lo nghut ri.

17 Nghut kôlhang, mingbyù wui má shí hkyô je riyhang a byo myín ló sháng gaq, ahkuí mai mying haù lé lang mù ó lé le a tai kyo lo râ matù, yhangnhik lé kyuq hkúm pyám sháng." gâ bum akô.

18 Haù mù, yhangnhik lé dum wut hâng yù lui, Yesuq é mying lé lang mù, hai le hkâtai, hkâ-mhoqshit kó ga chòm hkúm akô.

19 Petruq eq Yohan kúm gi, "Garai Gasâng é mungdang lé gyo râ htoq má, nungmoq é dang gyo le gi, Garai Gasâng é hí má gè râ, a gè râ lé, nungmoq yhang doqdân yù keq.

20 Nga-nhik kúm gi, myàng yù, wó gyô yù bê é hkyô pé lé, a tai é, a wó nyi nghut lhê." ga lui, yhangmoq lé dum tú tai akô.

21 Haù hkùn, yhangmoq gi, dut lai lò bê hkyô é yanmai, shiwa byu pé Garai Gasang lé hkya-on kungton nyi bùm kôlui, yhangnhik lé dàm byi râ hkyô a myàng kô é nghut mù lui, yhangnhik lé dum tân kyuq lui nhang pyám bekô nghut ri.

22 Hkâsu mù gâ le, haù laklai kumlhá đông lhoq gê byi hui é sù gi, asak myi xê zàn chyan bê sù nghut é yanmai nghut ri.

Lumjúng Bâng É Kyûdung Dang

23 Yhangnhik gi, nhang kat pyâm é hui kôjáng, yhangnhik é luzúm wui chyáng taù ló kômù, hkyangjong agyi pé eq suwún wui eq yhangnhik lé hkyim é dang banshoq lé, ló tai kyo akô nghut ri.

24 Haù hkyô lé wó gyo kôjáng, yhangmoq gi, myit rahkat zâ èq yhumsing é hte lhoq ko mù, Garai Gasang lé kyûdung kô é gi, "Mauhkûng eq myigùng, wuishuq lung-aù eq, haù pé má, nyi mi-nyi lé hpan tô é, ahko ahkáng lhunglhang wó é Yhumsing ê,

25 Nang, nang é dui-nhâng zoshâng, ngamoq é íchýi íkê Dawiq é nhut mai, Chyoiyúng Woi-nyí eq tai tô é gi,

"Haù mù lui, tûngbaù amyù pé gi, nhikjum yô akô? haù mù lui, byu pé gi, akôm dâ pyám akô lú?"

* 4:11 Hkya-on 118:22 * 4:15 Yudaq byin tú wapdoq lé Grik đông gi, San-hedrin gâ lhê.

26 Haù Yhumsîng eq Yhâng é Hkrisduq lé gumlau toq râ matú, mingkan hkohkâm pé gi, toq mù, zau suwún wuî eq rahá zup zîng bum akò.[✧] gâ ri.

27 Gê gè yhang, Herut eq Pontu Pilat nhik gi, tûngbaù pé eq Israelaq byu pé le mù, wà mó shî má chôm zîng to kôluî, nàng xù but byi é sù,[†] náng é Chyoiyúng dui-nhâng zoshâng Yesuq lé gumlau toq râ dâ nyi akò.

28 Náng é wum-o a-tsam eq nàng ô nau é đông dut râ matú, hí hkûn mai nàng myit hpyit doqdân tô é hkyô lé, yhangmoq gi, kut pyám bekò nghut ri.

29 Yhumsîng ê, ahkuî yhangmoq taí kyuq nyi é dang lé myàng byi laq ô! Náng é dui-nhâng zoshâng wuî, a gyuq a kyum é myit eq náng é dang lé taí râ matú wum-o byi laq!

30 Náng é wum-o bo é loq lâh kat luî, noli nojàng lé lhoq gè byi mù, náng é Chyoiyúng dui-nhâng zoshâng Yesuq é mying mai, limik kumlhá eq mauhpò muzô pé lé kut shit laq ô!" gâ akò.

31 Haù su, kyù ban dung kôjáng, yhangmoq zîng tô é jowò gi, dui nún lô mù, yhangmoq lhunglhâng bang gi, Chyoiyúng Woi-nyî byíng lô luî, Garai Gasâng é mungdang lé a gyuq a kyum é za taí bùm bekò nghut ri.

Azîng Zê Lé Chôm Gam Chûng Kô É Hkyô

32 Haù lumjîng é lhunglhâng bang gi, i-myt rahkat za nghut nyi akò; ó yuq le, yhumsîng wó é zè lé ngá é a gâ é za, banshoq eq chôm gam chung nyi akò.

33 Lagyô pé le, haù Yhumsîng Yesuq dum dui toq é hkyô lé a-tsam mó eq saksé hkâm nyi kô é nghut mù luî, yhangmoq banshoq bâng é ahtoq má jeju myo myo joq nyi ri.

34 Yhangmoq chyáng a wó a lom é byù rayuq le a nyi kó. Hkâsu mù gâ le, maumyî ratóng wó é, a nghut jáng, yhùm wó é bang ó yuq nghut kôlhâng, haù pé lé adàm dàm ûng pyám luî wó yu é ngùn le gi,

35 lagyô pê é hkyî wang má lé to byi akò. Haù mù luî, a wó a lòm sù ó yuq lé le ra tô é eq rajung za gàm byi akò nghut ri.

36 Haù hkûn, Barnaba ga luî lagyô pê é eq myhíng byi é, Kupru ming mâ é Lewiq byù Yosep le, yhang wó é maumyî ratóng lé ung luî, wó yu é ngùn lé lagyô pê é hkyî wang má, lé to byi ri.

37 Barnaba gâ é dang lichyúm gi, myit wum byi su é yhangzo gâ é lichyúm nghut lhê.

5

Anani Eq Sahpira Nhik É Hkyô

1 Nghut kôlhâng, Anani ga sù gi, yhangmyi Sahpira eq rahá, yháng nhâm wó é maumyî ratóng lé ûng pyám luî,

2 yhangmyi le bo sê é đông, ngùn haù ra-am lé gi, haq myhit yu to mù, ra-am lé za lagyô pê é hkyî wang má lé to byi akò.

3 Haù mù luî, Petruq gi, "Anani ê, Chyoiyúng Woi-nyî lé mhaù pyám râ matú eq, maumyî hpau mâ é ra-am lé haq yu to râ matú, haù mù luî, náng é myit má Tsadán le byíng nhang tô lhê lhuí?"

✧ 4:26 Hkya-on 2:1-2 † 4:27 Xù but é hkyô gi, Yudaq byu pé htûng đông xù but byi jáng, rajung jung kut râ matú hkyin masat yu é hkyô nghut lhê. Xù but byi é sù gi, Grik đông Mesaia gâ é nghut lhê.

4 Maumyí haú joq tô le, náng é zè nghut lhê a nghut lú? Wó ung é ngùn le náng é zè nghut ashí, a nghut lú? Há mù luí, náng haú dông dá lhê lú? Byù lé mhaú é a nghut, Garai Gasang lé mhaú pyám bê nghut ri." ga tai ri.

5 Anani gi, dang haú lé wó gyo jáng, lêng mù, shi byuq bê nghut ri. Haú hkyô lé wó gyô é bang banshoq le, gyai yang gyuq bùm bekô nghut ri.

6 Haú hkún, zorâm wui gi, toq mù, yhang é mâng lé htup luí, è waq myhup pyâm akô.

7 Hau htâng, sum hkyíng kô myáng jáng, yangmyi le, wang lé lo ri. Haú su dut é hkyô lé gi, yang a sé nghut ri.

8 Haú hkún, Petruq gi, "Ngo lé tai kyô wú aq. Nungnhik ùng é maumyí hpau gi, shí gú za nghut lhê lú?" ga myi jáng, yang gi, "Nghut lhê, haú gú za nghut bê." ga tú tai ri.

9 Petruq gi, "Nungnhik gi, haú Yhumsing é Woi-nyí lé isu kut chyam wú rá matú, hkásu mù chôm myit huí akô lú? Wú aq, náng é yhumsing hpó lé è myhup pyám bang gi, haú hkúmdong má jé bê; yangmoq gi, nang lé le waq htoq pyám kó rá nghut lhê." ga tai ri.

10 Radá dâm, yang le lagyo hpô é hkyí wang má lêng shi byuq bê. Zorâm wui le wang lo wú le, myiwe haú shi to lánng é lé myàng kôluí, waq è mù, yanglang é nâm má, è myhup pyám bekô.

11 Hau é yanmai, haú hkun lhê é hpúng byù banshoq bang eq, haú su dut é hkyô lé wó gyo má wó gyô é bang gi, gyai yang gyuq bùm bekô nghut ri.

Byù Myo Myo Lé, Lagyo Pé Lhoq Gê Byí É Hkyô

12 Ahkuí, lagyo pé gi, mingbyù wui é hí má limik kumlhá eq mauhpo muzo myo myo lé, kut shit nyi akô. Haú lumjáng bang gi, i-myit rahkat zâ èq, Sholomon jiroq má chôm hui hui kut bum akô.

13 Shiwa byu pé gi, yangmoq lé hkunggá nyi bùm kôlhang, yangmoq lé a wám è zum bùm kó.

14 Nghut kôlhang, haú Yhumsing lé lumjáng é myiwe yuqgè wui gi, myo sheq myô jat lò kômù, yangmoq chyáng je myô jat lò bê nghut ri.

15 Haú mù luí, byu pé gi, Petruq lai lo é hkún, yhang é wupzo za lhang rayuq yuq é ahtoq má zang sháng gaq ga, nõhpyo huí é bang lé, wà mã é hkyô yàm má waq htoq è mù, yhuphpú pé eq taphkang pé má lhez tô akô.

16 Hau htoq agó, Yerusalem awui ayàm mã é wà pé mai le, byù ajùm ayò gi, no é bang eq agè ashop é nat wang zing-ri huí é bang lé shuí jé lé bum akô; haú bang lhunglhang gi, lhoq gê lhoq yô byí é huí bum akô nghut ri.

Lagyo Pé Zing-ri Huí É Hkyô

17 Hkyangjong mó eq yhang é luzúm wui, Saduke hpúng mã é byu pé kúm gi, gyai yang wú manon bùm kôluí, toq mù,

18 lagyo pé lé chyup yú luí, wà mã é htóng mã lhùng tô akô.

19 Nghut kôlhang, haú myín lé, Yhumsing é maumang lagyo rayuq gi, htóng hkum pé lé hpông pyám mù, yangmoq lé shuí htoq yú uchyang,

20 "Nungmoq htoq lò mù, noqkuq yhúm mã é yap to luí, dui é asak hkyô sik eq sêng é danglù banshoq, shiwa byu pé lé tai kyo keq." ga tai ri.

21 Napsún myoqmyàng zó lé, yangmoq gi, noqkuq yhúm mã wàng mù yangmoq wó gyô yu é eq rajung za, shiwa byu pé lé, mhooqshit hi lò akô.

Hau ú lé, hkyangjong mó eq yhang é luzúm wui gi, Israelaq byu pé é suwún wui lhunglhang bang lé ji yù mù, Yudaq byin tú wapdoq chôm zung yù luí, lagyo pé lé è shuí yù rá matú htóng shut byù nhang kat akô.

²² Haú bang kúm gi, htong má jé é hkûn, lagyo pé lé a myàng kôjáng, dum taú lò mù lo tai kyo kô é gi,

²³ "Htóng hkum le ging ging myhi to lánq ri, htóng zúng bang le hkum yâm má yap tô akô. Nghut kôlhang, hpông wú le, ahkaú má ó le a nyi to lo nghut ri." gâ ri.

²⁴ Noqkuq yhûm zúng é zau hpó eq hkyangjong agyi wui gi, dang haú lé wó gyo kôjáng, "Shí hkyô hai dut lô râ lú?" ga, gyaí gyuq maú bum akô.

²⁵ Haú hkûn, byù rayuq wang lé lô mù, "Wú keq, nungmoq èq htóng má lhung tô é bang gi, noqkuq yhûm má yap to mù byu pé lé mhoqshit nyi bum akô." ga luí, yhangmoq lé tai kyô ri.

²⁶ Haú mù luí, zau hpó haú gi, yhang é a-ô má é bang eq è mù, lagyo pé lé é shuí yu akô. Nghut kôlhang, shiwa byu pé luqgok èq dú lô kó râ lé gyuq kô é yanmai, htân htân a wám kut kó nghut ri.

²⁷ Lagyo pé lé shuí jé lô kôjáng, Yudaq byin tú wapdoq hí má yhangmoq lé nyhi tô akô. Haú hkûn, hkyangjong mó gi,

²⁸ "Yesuq é mying lé lang luí a mhoqshit râ matú, nungmoq lé, htan é hkunmó hkyô to bê nghut lhê. Nghut kôle, nungmoq mhoqshit é hkyô gi, Yerusalem wà mó jam shoq, nungmoq kut bekô nghut luí, Yesuq é sui lé, ngamoq é ahtoq má ke byi râ dâ nyi akô." ga luí, yhangmoq lé tai akô.

²⁹ Haú hkûn, Petruq eq gotú lagyo pé tú tai kô é gi, "Ngamoq gi, byù dang lé gyo ra htoq má Garai Gasang é mungdang lé je luí gyo râ dut lhê.

³⁰ Nga-nhung é ichyí iwâ pé é Garai Gasang gi, nungmoq èq tapzîng má lhang sat pyâm é Yesuq lé, shi e mai lhoq dui toq kat bê nghut ri.

³¹ Israelaq amyú lé, myit lhung hkyô eq mara hkyut byi hkyô hpông byi râ matú, up é ahkáng wó Sû eq hkyi yù Sû kut nhâng râ ga, Garai Gasang gi, Yhang lé, Yhang é loqyo loq* má waq toq to bê nghut ri.

³² Ngamoq le shí hkyo é saksé pé nghut nyi lhê; mungdang lé gyô yù luí châng é bang lé Garai Gasang byí tô é Chyoiyung Woi-nyí le, shí pé é saksé nghut lhê." ga akô.

Gamalelaq Hpaqchyí Byí É Hkyô

³³ Yhangmoq gi, dang haú lé wó gyo kôjáng, lùm gyo nhik-yo naú kômù, lagyo pé lé sat pyâm râ lhang myit akô.

³⁴ Nghut kôlhang, mingbyù banshoq bâng é hí má aróng wó é tarâ sará Gamalelaq gâ é Hparishe rayuq, haú Yudaq byin tú wapdoq má toq yap mù, lagyo pé lé razup zo lhoq htoq to nhâng luí,

³⁵ yhang tai é gi, "Israelaq byu pé è, shí bang lé hkâsu kut râ hkyô, rago za hí myit wú keq.

³⁶ Hkâsu mù gâ le, hí hpyang Htudaq gâ é byù rayuq pô htoq lô mù, yhanggung yhang byù mó rayuq yuq nghut lhê ga tai jáng, byù myi shô kô yhang chyáng châng wú bekô. Yhang sat pyâm é hui luí, yhang htâng châng é lhunglhang bang le byo myín byuq kômù, hai le a wó kut dut byuq akô nghut ri.

³⁷ Hau htâng, mying jihpán guq yu é buinyi má, Yudaq gâ é Galile byù rayuq pô htoq mù, mingbyù wui lé yhang hkyam shut mhoq hpyoq yu ri. Yhang le sat pyâm é hui mù, yhang htâng châng é lhunglhang bang le, byo myín byuq bekô nghut ri.

* **5:31** *Garai é loqyo loq gâ é gi, hpautap hkungga gíng é jowò lé tai nau é nghut lhê.*

³⁸ Ahkuí le, shí bang lé haí le hkâgon ko, yhangmoq kâm é dông nghut nyí kó sháng gaq; yhangmoq kut nyí é hkyô eq dá nyí é hkyô pé gi, byù myit dông kut é nghut jáng, htên byoq byuq râ za nghut lhê.

³⁹ Nghut kôlhang, Garai Gasâng chyáng mã é nghut le gi, nungmoq wó lhoq hkyíng pyám kó râ a nghut. Garai Gasâng é gyê sheq dut lò kó râ nghut lhê." gâ ri.

⁴⁰ Dang haú lé yhangmoq gyô htuk bum akô. Haú mù, lagyo pé lé wut yù mù luí, nhuq bat yù kômù, Yesuq é myíng lé lang luí mhoqshit é hkyô a ge kut râ nghut lhê ga taí kômù, nhang pyám akô nghut ri.

⁴¹ Lagyo pé kúm gi, Yesuq é myíng é yanmai ru hpuzô é hkyô gi, gingdán nyí ri, ga myit yù kômù, Yudaq byìn tú wapdoq haú mai gabú myit eq htoq lò bekô.

⁴² Hau htâng, yhangmoq gi, nyí wuí làng noqkuq yhúm má le, rayhúm htâng rayhúm má le, Yesuq gi, Hkrisduq nghut é hkyô gabú danglù lé mhoqshit hkô kyô nyí akô nghut ri.

6

Garúm Râ Byù Nyhit Yuq Lé Hkyin Yu É Hkyô

¹ Ahkuí, chángzô pé myô jat lo nyí é buinyi pé má, Grik dang nyo é Yudaq byu pé gi, yhangmoq é chuimó myhí pé lé, nyí wuí lhê é gàm tso gàm huq é hkyô má rago a wó kut kô é yanmai, Hebre myíng mu é Yudaq byu pé lé mara hún dang taí bum akô.

² Haú hkûn, lagyo raxe í yuq gi, chángzô pé lhunglhang bang lé wut yù mù, "Ngamoq, Íwa Garai Gasâng é mungdang hko kyô é muzó lé rap pyám to mù, zangbó amù lé za lajang nyí é nghut le gi, a htuk râ nghut lhê.

³ Haú mù luí, gumang wuí ê, Chyoiyúng Woi-nyí byíng é eq hpaqchyí byéng-yá bo é nhik bo byù nyhit yuq lé nungmoq chyáng mã é hkyin to keq. Haú bang lé muzó shí lhum hun to râ nghut lhê.

⁴ Ngamoq kúm gi, kyûdûng é hkyô eq mungdang hkô é hkyô lé za, noqzuq tung kut nyí râ nghut lhê." ga taí akô.

⁵ Dang haú lé shiwa byù lhunglhang bang gyô htuk kômù luí, lumjíng myit kô é, Chyoiyúng Woi-nyí byíng é Stehpan ga sù eq, Hpilip, Prokoru, Nikanora, Timun, Parmena, Yudaq noqkuq htûng má lhung wang lò bê sù Antioku wà mó mã é Nikolaq pé lé hkyin yù mù,

⁶ lagyo pé chyáng shuí lò akô; lagyo pé gi, kyûdung byi kômù, yhangmoq lé loq ke byí akô nghut ri.

⁷ Garai Gasâng é mungdang gi, je myô jam lò luí, Yerusalem wà mó má chángzô pé gyai myô jat lawán lo é htoq agó, hkyangjông pé myo myo le, haú lumjíng hkyô má châng nyi bum akô.

Stehpan Chyup Yú Huí É Hkyô

⁸ Ahkuí, Stehpan gi, Garai Gasâng é jeju chyunghuq eq wum-o a-tsam byíng nyí é nghut mù, byu pé é hí má mauhpo muzó pé eq limik kumlhá mó pé tûn shit ri.

⁹ Haú hkûn, luthkyô ga bâng é tarajong eq sêng é Kuruni, Alesander eq Kiliki, Asia mau mã é bang ra-am gi, toq mù, Stehpan eq dang chyin chyin lhúm akô.

¹⁰ Nghut kôlhang, Stehpân é dang gi, Chyoiyúng Woi-nyí lom é hpaqchyí dang nghut é yanmai, yhangmoq a úng kó nghut ri.

¹¹ Haù mù, yhangmoq gi, "Shí yuq, Mosheq eq Garai Gasang lé rhoi dang taí nyi é lé, ngamoq wó gyô ri." ga luí, mhaù taí nhâng râ byù haq lung tô akô.

¹² Haù mù, yhangmoq gi, mingbyù wuì eq nhik bô suwún wuì, tará sará pé lé, chun htau mù, Stehpan lé chyup yù nhâng luí, Yudaq byìn tú wapdoq má shuí nyhi tô akô.

¹³ Mhaù é saksé byu pé lé le lhoq hâng kat luí, haú bang gi, "Shí yuq, shí chyoiyúng jowò* eq jep é tará lé shut shai é dang ru taí nyi ri.

¹⁴ Nazaret và byù Yesuq ga sù gi, jowò shí lé hpyoq pyám mù, nga-nhúng lé Mosheq èq byí tô é htungking lé htaí pyám râ nghut lhê ga luí, yhang taí é dang lé ngamoq wó gyô é nghut lhê." ga taí akô.

¹⁵ Haù Yudaq byìn tú wapdoq má zung to bang banshoq, yhang lé chôm wú tsuq nyí kô é hkún, yhâng é myoqdong gi, maumang lagyô é myoqdong su dut é lé, yhangmoq myang akô nghut ri.

7

Stehpan Taí É Dang

¹ Haù hkún, hkyangjong mó gi, "Dang haú pé têng lhê lú?" ga luí, yhang lé myí jáng,

² Stehpan tú taí é gi, "Gumang wuì eq íwa wuì ê, gyô wú keq, nga-nhúng lhunglhâng bâng é íchíy Abraham gi, Haran và má a ló nyí shí lé, Mesopotamiaq mau má nyi tô ashí hkún, hpungwup shingkaq bo é Garai Gasang gi, yhâng chyáng lé htoq shit mù,

³ 'Náng é ming eq náng é amyù mai htoq ló luí, ngò tûn shit râ ming shut e ló aq.* ga luí, yhang lé taí ri.

⁴ Haù mù, yhang gi, Hkaldea byu pé é mau mai htoq ló luí, Haran và má ló nyi nyi ri. Yhâng wa shi byuq é htâng má, Garai Gasang gi, ahkuí, nungmoq nyi nyi é ming shí má yhang lé htot lô nhâng bê nghut ri.

⁵ Garai Gasang gi, shí ming má yhang lé silí wunlí ngùu rá, hkyí rahkô nang í é myigùng lháng a byí é nghut kôlháng, yhang, zodù lháng a wò shi mai, yhang lé le, yhâng é awut ashín pé lé le, maumyí shí byi rá ga danggidíq byí to bê nghut ri.

⁶ Hau htoq agó, shí hkyô lé Garai Gasang xoq taí é gi, 'Náng é awut ashín pé, tûngbau ming má bíng nyí mù, haú ming bâng èq myí shô zàn jùn zô é eq zing-rí é lé hui kó rá.

⁷ Nghut kôlháng, yhangmoq lé jùn zô é amyù lé le, ngò jéyáng râ nghut lhê.' gâ ri. 'Haù hkún, yhangmoq gi, haú ming mai htoq lô mù, jowò shí má ngo lé noqkuq kó rá nghut lhê.* ga le, Garai Gasang taí ri.

⁸ Hau htâng, yhang lé ahpyo-kuq hpyit byi rá hkyô eq sêng é dangshikaq le, byí ri. Haù mù, Abraham gi, Isak lé hku é htâng shit nyí buinyi má ahpyo-kuq hpyit byí ri; Isak gi, Yakup lé hkù mù, Yakup gi, íchíy íwa achýùng raxe í yuq lé hku kat bê nghut ri.

⁹ Haù íchíy íwâ pé gi, Yosep lé manôn kôluí, Egotuq ming shut jùn đông ùng kat akô. Nghut kôlháng, Garai Gasang gi, yhang eq rahá nghut nyí mù luí,

¹⁰ wuìhke jamjau banshoq mai yhang lé lhoq lhut yù mù, Egotuq hkohkâm Hpara-uq é hí má le myoqdong wó, hpaqchyí byéng-yá le bô nhang é yanmai,

* 6:13 *Shí chyoiyúng jowò* gi, Yerusalem noqkuq yhùm lé gâ lhê. ✧ 7:3 Apùn 12:1 ✧ 7:7 Apùn 15:13-14

hkohkâm haù gi, Egutuq ming eq, yâng é hkohkâm-wâng banshoq lé up nhang ri.

¹¹ Haù u lé, Egutuq ming eq Hkanaan ming banshoq má mutmó gyó lô mù, wuìhke jamjau mó hui bekô. Nga-nhông é íchyí iwâ pé le zoshuq a myang hô zo lo dut byuq bekô nghut ri.

¹² Ahkuí, Yakup gi, Egutuq ming má guqzo joq é hkyô lé wó gyo jáng, nga-nhông é íchyí iwâ pé lé sâng-hì dàm é nhang ri.

¹³ Htang dàm dum ê é hkûn, Yosep gi, yhanggu yhangmâng pé lé yhang ó nghut é hkyô taí kyô ri. Hpara-uq le Yosep é yhumbyù ikun hkyô lé sê yù byi bê nghut ri.

¹⁴ Hau htâng, Yosep gi, yâng wa Yakup eq yhumbyù banshoq nyhit xe ngo yuq lé, yhâng chyáng pying yù bê nghut ri.

¹⁵ Yakup le Egutuq ming má jé gyó lô luí, yhang eq nga-nhông é íchyí iwâ pé gi, banshoq haù ming má shí lô byuq bekô nghut ri.

¹⁶ Yhangmoq é mâng lé gi, Shehkem wà má yu taù lô mù, Shehkem wà má é Hamora é yhangzo yhangshu pè chyáng mai, Abraham èq ngùn byi mù wui hpyit tô é lupdùng má lô myhup tô akô nghut ri.

¹⁷ Abraham lé Garai Gasang byi tô é danggidiq dik rà ahkyíng jé lo nyi é u lé,

¹⁸ nga-nhông é amyù gi, Egutuq ming má Yosep lé a sê é hkohkâm pô htoq é pyat jé shoq, myoluq jebe lò bekô nghut ri.

¹⁹ Hkohkâm hpó haù gi, nga-nhông é amyù htoq má a ge é hpaqchyí da luí, nyhegnú pé lé shí byuq sháng gaq ga, dú pyám nhang é đông mai nga-nhông é íchyí iwâ pé lé zing-ri bê nghut lhê.

²⁰ Haù u má, Mosheq lé hkû to bê. Yhang gi, Garai Gasâng é hí má gyai yúnglhô é sù nghut ri; yhang gi, yhângwâ é yhùm má lhamó sum hkyap baù tô é hui mù,

²¹ htot tô tô é hui jáng, yhang lé Hpara-uq é byizô èq xe yù mù, zosíng kut yù luí, hku kô ri.

²² Mosheq gi, Egutuq ming má é hpaqchyí byéng-yá banshoq lé mhoq yù luí, nhut shô a-tsam eq hkyí loq a-tsam gyai bò sù nghut ri.

²³ Yhang asak myi xê zàn jé lò jáng, yhâng é gumang Israelaq byu pè chyáng é kùm wú rà matú wó myit htoq kat ri.

²⁴ Ê jé jáng, zing-ri hui nyi é sù rayuq lé é myâng luí, haù yuq lé búng mù, zing-rí nyi é Egutuq byù lé, loqchoq hpuq é đông sat pyâm ri.

²⁵ Mosheq gi, yhâng é byu pé lé yhâng é loq đông Garai Gasang hkyi yù hkyô byi nyi é lé, yhâng é amyù pé sê gyo byi nhô ngàm kôlhàng, yhangmoq a sê gyo byi kô nghut ri.

²⁶ Htang nyí lé, Israelaq byù yhangchang mabyoq htoq nyi é má, e ang mù, yhangnhik lé pyín naù luí, 'Ahkaù nhik ê, gumang yhangchang sheq ru nghut lhê nhíng, haí mù rayuq eq rayuq byoq lhum nyi akô lhú?' ga taí gón wú ri.

²⁷ Luzúm hpó lé zing-rí nyi sù yuq gi, 'Ngamoq é ahtoq má zau eq tarâ agyí kut rà matú, nàng lé ó yuq hkyin tô é lhú?'

²⁸ A-nyí nap Egutuq byù lé sat pyâm é su, ngo lé le sat pyám nau ri lhú?✧ ga luí, tû taí uchyang yhang lé dún chyùn pyâm ri.

²⁹ Mosheq gi, dang hau é yanmai, hpâng luí Midian ming má é nyi byuq ri. Haù má yuqzo í yuq é wó ri.

30 Haû ming má myi xê zàn lai jáng, Sinaq Bùm yàm, yoso hkaû mâ é myi gyúng tô é mhanpúng mai, maumang lagyo rayuq gi, Mosheq lé htoq shit ri.

31 Mosheq gi, haû lé myàng jáng, hau é yanmai maú luí, wú wú rà ga huí e ló le, Yhumsing é htê htoq lo é gi,

32 'Ngò gi, náng íchyí íwâ pé é Garai Gasang, Abraham, Isak, Yakup é Garai Gasang nghut nyi lhê.[✠] gâ ri. Mosheq kúm gi, gyuq nán luí, a wám tu wú nghut ri.

33 Haû Yhumsing gi, 'Náng é hkyî-tsung hkyut pyám aq, nàng yap tô é jowò gi, chyoiyúng é myigùng nghut lhê.

34 Egotuq ming má ngá é amyû pé zik zo huí nyi é hkyô lé, ngò gè gè yhang myàng bê; yhangmoq é ngaù nhik ngaù htê lé ngò wó gyo bê; yhangmoq lé hkyi yù rà matú ngò gyó lé é nghut lhê; ahkuí, lé aq, ngò, nang lé Egotuq ming shut nhang taù kat rà.[✠] ga luí, yhang lé dum taí ri.

35 Yhangmoq èq, 'Nang lé zau eq tarâ agyi kut rà matú, ó yuq hkyin tô é lhu?' ga luí he-ngik pyám é Mosheq lé yhang, mhanpúng má htoq shit é maumang lagyo dông mai, Garai Gasang gi, yhangmoq é zau eq hkyi yù sù kut nhang luí, taù nhang kat é nghut ri.

36 Haû Mosheq yhang, Egotuq ming má le, Nhões Nè má le, yoso hkaû pé má le, myi xê zàn gyoro má mauhpo muzó pé eq limik kumlhá pé tún shit uchyang, yhâng é byù myû pé lé Egotuq ming mai shuí htoq ló ri.

37 Israelaq byu pé lé, 'Nung gu nung mâng pé mai, nungmoq é matú ngò eq du é myightoi rayuq lé, Garai Gasang gi, pô htoq lô nhang rà nghut lhê.[✠] ga luí, taí tô é sù le Mosheq yhang nghut ri.

38 Yoso hkaû má nghut nyi ashí hkûn lé, shiwa byù hpúng má, Sinaq Bùm má yhang lé dang taí é maumang lagyô eq le, nga-nhúng é íchyí íwâ pé eq le rahá nghut sù gi, yhang yhang nghut nyi ri; nga-nhúng lé ap byi rà asak dui é mungdang lé lom yu é sù le, yhang nghut nyi ri.

39 Nghut kôlhang, nga-nhúng é íchyí íwâ pé kúm gi, yhâng é dang lé a kâm gyo kômù, yhang lé he pyám luí, Egotuq ming shut taù nau é myit bo bum akô.

40 Haû mù, Arun lé, 'Egotuq ming mai nga-nhúng lé shuí htoq lo é Mosheq gi, haí dut byuq bê hkyô lé, ngamoq a sé lo; haû mù, nga-nhúng hí má so byi rà hparaò lhô pé sai byi aq.[✠] ga taí akô.

41 Haû buinyi pé má, yhangmoq gi, nojùng zo lhô sai mù, alhô haû lé hkungga nhông byi uchyang, yhangmoq é loq èq sai tô é muzó jizó má gabú nhik dik nyi akô.

42 Haû mù luí, myightoi pé é laiká má kê tô é gi, 'Israelaq byu pé ê, myi xê zàn tup yoso má chung é shigu eq hkungga gi, ngo lé nhông byi é nghut akô lhu?

43 Nungmoq gi, nungmoq noq rà matú sai yu é alhô, Molak é zúm eq Rehpan hpara é kyí lé sheq, waq lhing wún ko é yanmai, Babelon lai shoq ngò nungmoq lé lhoq lhâm pyám rà nghut lhê.[✠] ga luí, bo tô é eq rajung za, Garai Gasang gi, yhangmoq chyáng mai myoqdong lhing pyám mù, mauhkúng htoq mâ é buí, kyí, lhamó pé lé noqkuq rà matú ap pyám bê nghut ri.

44 Mosheq lé, nàng myang é azòng eq rajung za sai aq ga, Garai Gasang taí é dông sai tô é saksé zúm lé, haû yoso má nga-nhúng é íchyí íwâ pé wó yù bekò nghut ri.

✠ 7:32 Htoq Ló 3:6 ✠ 7:34 Htoq Ló 3:5, 7-8,10 ✠ 7:37 Tarâ Pun 18:15 ✠ 7:40 Htoq Ló 32:1

✠ 7:43 Amo 5:25-27

45 Haù mù, nga-nhùng é íchyí íwâ pé gi, yhangmoq é myoq hí mai Garai Gasang èq hkat htoq pyám byí é byù myù pé é mau má, Yoshuq eq rahá wang nyi ló kô é hkún, saksé zúm haù lé yu wang ló akô. Haù gi, Dawiq é pyat jé shoq joq to bê nghut ri.

46 Dawiq kúm gi, Garai Gasang hí má myoqdong wó sù nghut mù luí, Yakup é Garai Gasang matú nyi jowò sai rá ahkáng dung kôlhang,

47 Sholumon èq sheq sai bê nghut ri.

48 Nghut kôlhang, Myhang htàng htum Sù gi, byu é loq èq za sai é yhùm má nyi é a nghut, haù hkyô eq séng luí myiqhtoi wá tai tô é gi,

49 'Mauhkúng gi, ngá é zùng tanghkuq, myigùng gi, ngá é hkyí nang jang nghut nyi lhê;

ngá é matú hkasú é yhùm sai byi shi kó rá lhú? Ngò nô yù rá jang gi, hkâmá nghut kó rá lhú?

50 Haù banshoq lé ngá é loq èq baù sai tô é a nghut kó lhú? ga luí, haù Yhumsing tai ri.^{1*}
gâ ri.

51 I-myt htân mù, i-myt eq nohkyap má ahyo-kuq a hpyit é bang* ê, nungmoq gi, nungmoq é íchyí íwâ pé su, Chyoiyung Woi-nyí lé hkâ-nhâm le lhom he-ngik pyám nyi akô;

52 Nungmoq é íchyí íwâ pé èq a zing-rí wú é myiqhtoi, ó yuq wá nyi lhê lhú? Haù Dingmán Sù pô htoq rá hkyô lé hko kyô é bang lé, yhangmoq sat pyám é chyat nghut akô; ahkuí, nungmoq le, haù Dingmán Sù lé ap pyám é bang eq sat pyám é bang nghut nyi akô.

53 Maumang lagyo èq shit kyo byí é tarâ lé nungmoq wó yù kôlhang, haù lé a cháng kó nghut ri." gâ ri.

Stephan Lé Luqgok Èq Dú Sat É Hkyô

54 Haù hkyô lé yhangmoq wó gyo kôjáng, yhangmoq é nhikhlum má lùm htaù záng kô é yanmai, Stephan lé, zui wang ngat kyáng shoq wú nhik-yô nyi akô.

55 Stephan kúm gi, Chyoiyung Woi-nyí bying mù, mauhkúng shut tu wú kat le, Garai Gasang é hpungwup shingkang lé le, Garai Gasang é loqyo hkyam shut Yesuq yap tô é lé le, myang ri.

56 Haù mù, yhang gi, "Wú keq, mauhkúng hpông tô é lé le, Garai Gasang é loqyo hkyam shut haù Byu Yhangzo yap tô é lé le, ngò myàng ri." ga tai kat ri.

57 Haù hkún, yhangmoq gi, htê mó o mó garu uchang, yhumsing é nohkyap xaù pyám mù, radá dâm yhang lé chôm htim kômù,

58 yhang lé wá mai she htoq ló kôluí, luqgok èq chôm dú ló bekô nghut ri; saksé kut é bang gi, Sholuq gâ é zoram é hkyí wang má yhangmoq é buhông pé lé hkyut bum tô akô.

59 Luqgok èq dú nyi bùm kô é u lé, Stephan gi, "Yhumsing Yesuq ê, ngá é woi-nyí lé hap yù laq." ga kyúdung ri.

60 Hau htàng, yhang gi, hkyihput htuq mù, "Yhumsing ê, yhangmoq kut é mara haù lé hkyut pyám byi laq." ga luí, htê mó èq wut dung ri; haù ban tai jáng, yhang káng byit byuq bê nghut ri.

* 7:50 Esai 66:1-2 * 7:51 I-myt eq nohkyap má ahyo-kuq a hpyit é bang gâ é gi, Garai dang lé a lùm a cháng é bang lé gâ lhê.

8

Hpúng Byù Lé Sholuq Zing-ri É Hkyô

1 Sholuq gi, haù má nyi to mù, Stehpan lé sat pyâm é muzó má myit bo huí ri.

Haù nyí mai, Yerusalem wà mó mã é noqkuq hpúng gi, zing-ri mó huí lo é nghut mù luí, lagyô pé mai lai luí, lumjǐng bang lhunglhang gi, Yuda mau eq Samariq mau jowò hkgámó má byo myín ló bekò.

2 Nghut kòlhang, tará hkunggá é bang gi, Stehpan lé yhum pyâm é htàng má, yhang é yanmai yon mó huí nyi akò nghut ri.

3 Sholuq kúm gi, rayhum htàng rayhúm wàng mù, myiwe yuggè lé she hkyut htoq yù luí, htóng má lhung tó é đông mai, noqkuq hpúng haù lé lhoq hpyoq ló nyi ri.

Samariq Wà Má, Gabú Danglù Hkò Kyô É Hkyô

4 Byo htoq ló é bang kúm gi, jé é jowò hkgámó má mungdang lé hkò kyô ló akò.

5 Haù hkùn, Hpilip gi, Samariq mau mã é myuq ra-myuq shut e ló mù, Hkrisduq é hkyô lé hkò kyô ri.

6 Byù ajùm ayò gi, Hpilip tai kyô é hkyô lé wó gyô é eq, yhang tũn shit é limik kumlhá lé myàng kòjáng, i-myt rahkat za eq yhàng é dang chòm gyô nyi bum akò.

7 Nat wang júng é byù myo myò pê chyáng mai, agè ashop é nat pé wut garu uchyang htoq ló byuq bum akò; gùngjum shi é bang eq hkyi htên é bang myo myo le, ge ló byuq bum akò.

8 Haù mù luí, haù myuq má gabú hkyô gyai yhang wó bekò nghut ri.

Myoqheq Sará Simun É Hkyô

9 Simun gá é byù rayuq gi, hí lé haù myuq má myoqheq hpaqchyí kut shit mù, Samariq byu pé lé lhoq maú luí, yhàng gùng lé yhang, laklaí sù nghut lhè gá ri.

10 Byù tiq ko banshoq le, "Byù shí yuq gi, 'haù a-tsam mó' gá é, Garaí chyáng mai hpingwup a-tsam wó yù sù nghut ri." ga luí, yhàng é dang lé gyô bum akò.

11 Haù yuq gi, myàng myàng yhàng é myoqheq hpaqchyí èq yhangmoq lé lhoq maú lo é yanmai, yhàng dang lé chòm lum bum akò.

12 Nghut kòlhang, Hpilip hko kyô é Garaí Gasàng é mǐngdán hkyô eq, Yesuq Hkrisduq é myǐng eq sêng é gabú danglù hkyô lé, lumjǐng kòjáng, myiwe yuggè wui-myhup hkâm yu bum akò.

13 Simun yhang yhang le lumjǐng mù luí, wui-myhup hkâm yù mù, Hpilip htàng châng wún ri. Hpilip é kumlhá mó eq laklaí kumlhá pé lé myàng jáng, yhang gi, gyai maú byuq ri.

14 Garaí Gasàng é mungdang lé Samariq byu pé, lhom hap yù bè hkyô lé, Yerusalem wà mó má nyi é lagyô pé wó gyô bùm kòjáng, yhangmoq gi, Petruq eq Yohan nhik lé haù má nhang kat akò.

15 Yhangnhik gi, lé jé jáng, byù haù bang Chyoiyúng Woi-nyí wó yù rã matú kyúdung byí akò.

16 Hkásu mù gá le, Chyoiyúng Woi-nyí gi, yhangmoq chyáng ó yuq é ahtoq má lé, a gyó lô shi; Yhumsǐng Yesuq é myǐng mai wui-myhup hkâm yu é za ru nghut bùm ashí.

17 Haù mù luí, lagyô nhik yhangmoq é ahtoq má loq ke byi jáng, yhangmoq gi, haù Chyoiyúng Woi-nyí lé wó hkâm yù bekô nghut ri.

18 Lagyô nhik é loq ke kat jáng Chyoiyúng Woi-nyí wó hkâm yu é lé, Simun myàng jáng, yhang gi, yhangnhik lé ngùn ê byi wú mù,

19 "Hká yuq é ahtoq má nghut kôlhàng, ngò loq ke byi jáng, haù yuq gi, Chyoiyúng Woi-nyí wó yù râ matú, haù su é a-tsam ngo lé le byi kó laq." ga dung ri.

20 Petruq kúm gi, "Garai Gasâng é chyunghuq lé ngun èq wó wui yù râ nghut lhê ga luí, myit é yanmai, náng é ngùn gi, nàng eq rahá htên byoq byuq sháng gaq.

21 Nàng gi, Garai Gasâng é hí má myit a dítng sù nghut é yanmai, shí hkyô má nàng wó bo lóm râ a nghut.

22 Haù mù luí, shí agè ashop é hkyô mai myit lhing mù, Yhumsing Garai chyáng dúng tôngbán aq. Haù hkûn, náng é unghkaù má myit pyâm é hkyô lé, mara hkyut pyám byi abe.

23 Nàng gi, ladu lai shoq nhikhko zo mù, yubak marâ èq tuí zing to huí é lé, ngò myàng ri." ga yhang lé tai ri.

24 Haù hkûn, Simun gi, "Nungnhik tai é hkyô hai le ngá chyáng a jé sháng gaq, ngá é matú haù Yhumsing chyáng kyúdung byi kó laq." ga tú tai ri.

25 Yhangnhik kúm gi, haù Yhumsing é mungdang lé saksé hkám mù ban hko kyo jáng, Samariq byu pê é wà myo myo má, haù gabú danglù lé hko kyo uchyang, Yerusalem wà mó shut dum taù lò bekô nghut ri.

Hpilip Eq U-nuk Nhik É Hkyô

26 Ahkuí, Yhumsing é maumang lagyo gi, Hpilip lé, "Toq aq, Yerusalem wà mó mai Gaza shut ló é hkyô jé shoq, maupyí shut nyâng za e ló aq. Hkyô haù gi, yoso hkyô nghut lhê." ga tai ri.

27 Haù hkûn, yhang toq mù e ló ri. Haù u lé, Ehtiopi ming lé up é hkohkâm myí Kandake é hí má ahko ahkáng mó wó mù, yhâng é sutzè banshoq lé zùm é, Ehtiopi byù u-nuk rayuq gi, noqkuq râ ga Yerusalem wà mó má é mù,

28 dum taù lo é hkûn, yhâng é myanglhêng má zùng luí, myiqhtoi Esai-aq laiká lé nghap nyi ri.

29 Woi-nyí gi, Hpilip lé, "Myanglhêng shut chyâng e ló aq." ga tai ri.

30 Haù mù, Hpilip gi, din é mù, myiqhtoi Esai-aq laiká nghap nyi é lé wó gyo jáng, "Nàng nghap nyi é hkyô lé sê gyo ri lú?" ga luí, yhang lé myí ri.

31 Haù yuq gi, "Mhoqshit su yuq a nyi le, ngò hkâsu kut sê gyo râ lú?" ga tú tai mù, yhang eq rahá lo doq zùng aq ga Hpilip lé lung ri.

32 Yhang nghap é Chyúmdang gi,

"Sat râ sau lé su, Yhang lé she e ló bê nghut ri; sau zo gi, sau maú nyhám su é hí má zim za nyi tô é su, Yhang le nhut a hpông é za nyi tô ri.

33 Yhânggùng lé lhoq shôm pyâm to huí é hkûn, Yhang lé a tara é đông doqdân pyám bekô;

Yhâng é asak lé myigùng htoq mai yù pyám bekô nghut mù luí, Yhâng é awut ashín lé ó yuq wó gôn kyo râ lú?"*

gâ ri.

34 Haù hkûn, haù u-nuk wa gi, Hpilip lé, "Haù nghut le gi, ngo lé tai kyo laq! Myiqhtoi shí yuq gi, ó lé lhoq ang luí, tai é nghut lhê lú? Yhânggùng lé tai é

nghut lhê lú? Haú a nggut jáng, góyuq é hkyô lé taí é nggut lhê lú?" ga myí ri.

³⁵ Haú hkún, Hpilip gi, Chyúmdang haú lé yù mù, Yesuq eq sêng é gabú danglù lé taí kyô ri.

³⁶ Haú su é ló kô le, wui joq é má jé jáng, haú u-nuk hpó gi, "Wú aq, shí má wui joq tó ri, wui-myhup hkâm yù rà matú ngo lé hkúm rà jang haí joq ashí lú?" ga taí ri.

³⁷ Hpilip gi, "Náng i-myt banshoq eq, nàng lumjínng bê nggut le gi, hkâm yu le ge lhê." ga taí ri; yang le, "Yesuq Hkrisduq gi, Garai Gasâng é Yhangzo nggut é lé, ngò lumjínng bê." ga tú taí ri.*

³⁸ Haú hkún, yhâng é myanglhêng hkying nhâng mù, yangnhik wui má gyó wâng luí, Hpilip gi, u-nuk hpó lé wui-myhup hkâm byí ri.

³⁹ Wui hkaú mai htoq ló kô é hkún, haú Yhumsing é Woi-nyí gi, Hpilip lé myhik za shuí ló byuq mù, u-nuk hpó le Hpilip lé dum a myàng lo; nggut kôhang, yang gi, é ló é hkyô shut gabú myit eq xoq sô é ló bê nggut ri.

⁴⁰ Hpilip kúm gi, Azutu wà má lo htoq jé kat mù luí, Kesare wà mó jé shoq haú mau má é myuq pé wà pé hkangmó má gabú danglù hkô kyô wún ri.

9

Sholuq Lhik Wang Lo É Hkyô

¹ Haú u lé, Sholuq kúm gi, Yhumsing é chángzô pé lé hkat kyuq nha rà eq sat pyám rà ga, nhikmó-yô nyi é nggut mù luí, hkyangjong mó chyáng ê mù,

² Yhumsing é Hkyô lé lumjínng é myiwe yuqgè myàng mi-myàng lé chyup yú luí, Yerusalem wà mó shut wó she ló rà matú, Damaskuq myuq má é tarajong pé má byi rà laiká pé lé dúng chúnng ri.

³ Yang é ló le, Damaskuq myuq eq chyáng ló nyi é hkún, yhâng é lhínghkyuq má mauhkúng mai dân loq tung duqbó htoq ló ri.

⁴ Yang myigùng má lêng ngop tó é u lé, "Sholuq, Sholuq, nàng ngo lé haí mù zing-rí nyi lhê lú?" ga luí, yang lé taí é htê wó gyô ri.

⁵ Haú hkún, yang gi, "Yhumsing ê, nàng gi, ó yuq nggut lhê lú?" ga myi jáng, haú Yhumsing gi, "Nàng zing-rí nyi é Yesuq nggut lhê,

⁶ toq aq, myuq shut wang ló aq. Nàng zui saí rà hkyô lé lhóm taí kyo rà nggut lhê." ga tú taí ri.

⁷ Yang eq rahá é ló é luzúm wui gi, htê haú wó gyo kôhang, ó yuq lé le a myàng kô é yanmai, máu hong yap tó bum akô.

⁸ Sholuq toq mù, myoq hpông kat wú le, haí lé le a myàng dut byuq mù luí, yangmoq gi, yang lé loq mai shê mù Damaskuq myuq shut shuí wang ló akô.

⁹ Sholuq gi, sum nyí tup myoqjit byuq mù luí, a zo a shuq é nyi byuq ri.

¹⁰ Damaskuq myuq má Anani gá é chángzo rayuq nyi ri. Yhumsing gi, yang lé, "Anani ê." ga shing-rán dúng wut ri.

Yang gi, "Yhumsing ê, shí má nyi lhê." ga tú taí ri.

¹¹ Haú Yhumsing dum taí é gi, "Toq aq, Hkyô-Nyàng gá é wà hkyô shut ê mù, Yudaq é yhúm má, Tarshu byú Sholuq lé é hô aq, yang gi, kyúdnng nyi ri.

¹² Yang gi, Anani ga sù wang lé lô mù, yhâng é myoq dum myàng sháng gaq ga, yhâng é ahtoq má loq ke byí é lé, shing-rán dúng myàng bê nggut ri." ga ri.

* 8:37 Bun zo 37 shí lé Chyúmlaiká ra-am má gi, bo lhê; ra-am má gi, a bô.

13 Anani kúm gi, "Yhumsing ê, shí yuq gi, Yerusalem wà mó má, náng é sânyung bang lé a ge é đông hkâ-myhó kut lai lo é hkyanglú lé ngò myo myo wó gyô wú bê;

14 Shí pé má le, náng é mying lé láng é bang banshoq lé chyup râ ga, hkyangjong agyi pé chyáng mâ é ahko ahkáng wó yu to sù nghut ri." ga tã ri.

15 Nghut kôhang, Yhumsing gi, "Ru é aq, shí yuq gi, tungbaù pé eq yhangmoq é hkohkam pé é hí má le, Israelaq byu pé é hí má le, ngá é mying lé wùn waq râ matú, ngò chùng râ nghú luí hkyin to sù nghut lhê;

16 Ngá mying é yanmai hkâ-í hpuzo ra hkyô lé, Ngò, yhang lé tũn shit râ nghut lhê." ga tã ri.

17 Hau htâng, Anani gi, jé é mù, yhũm haú má wàng luí, Sholuq é ahtoq má loq kê to mù, "Gumang Sholuq ê, náng myoq dum wó myàng mù, Chyoiyung Woi-nyí bying sháng gaq ga, náng lé lo é hkyô má, náng lé htoq shit é Yhumsing Yesuq èq ngo lé nhang kat é nghut lhê." ga tã ri.

18 Haú hkũn jáng, Sholuq é myoq mai akyap sũ é wuí gyó byuq mù, yhang myoq dum wó myàng bê. Haú hkũn, yhang gi, toq mù wui-myhup hkãm yu luí,

19 zoshuq lé zo mù, wum-o dum lhoq pying yù bê nghut ri.

Sholuq, Damaskuq Myuq Má Mungdang Hko É Hkyô

Hau htâng, yhang gi, Damaskuq myuq mâ é chángzô pé eq rahá rayoq zo zùm yap nyi uchyang,

20 Yesuq gi, Garai Gasâng é Yhangzo nghut é hkyô, haú hkũn jáng tarajong pé má hko kyô nyi bê nghut ri.

21 Sholuq é dang lé wó gyô é lhunglhâng bang gi, maú byuq bùm kômù, "Shí yuq gi, Yerusalem wà mó má mying haú láng é bang lé lhoq hten lhoq hpyoq sũ nghut lhê, a nghut kó lúh? Ahkuí, shí má le, haú su é bang lé chyup yù mù, hkyangjong agyi pé chyáng ló ap râ da luí jé lé é sũ a nghut kó lúh?" ga myi bum akò.

22 Sholuq kúm gi, a-tsam je bo lò mù, Damaskuq myuq má nyi é Yudaq byu pé lé tã hpyi kyo luí, Yesuq gi, Hkrisduq yhang nghut nyi é hkyô lé saksé tũn shit ri.

23 Buinyí tsómra myáng é htâng má, Yudaq byu pé gi, yhang lé sat pyám râ matú haq dã akò.

24 Nghut kôhang, yhangmoq dã é hkyô lé Sholuq sê pyâm ri. Yhangmoq gi, yhang lé wó sat pyám shoq ga, nyí lé myín lé myuq hkum pé má lhom nyi akò.

25 Sholuq é chángzô pé kúm gi, myín má yhang lé shuí yù mù, manghkoq má lúng nhâng luí, wà kyám xewâm mai lhoq nyhum hkyô kat akò nghut ri.

Sholuq, Yerusalem Wà Mó Má Tãu Jé Lo É Hkyô

26 Hau htâng, yhang gi, Yerusalem wà mó má jé lo é hkũn, chángzô pé eq zùm yap râ matú shikut wú kôhang, yhang gi, chángzô dut bê hkyô lé a jing kó é yanmai, lhunglhâng bang gi, yhang lé gyuq bum akò.

27 Nababa kúm gi, Sholuq lé lagyo pé chyáng shuí lò mù, Sholuq, hkyô má Yesuq eq hkâsu kut huí é hkyô lé le, Yesuq èq yhang lé tã é dang wó gyô é hkyô lé le, Damaskuq myuq má Yesuq é mying mai gyuq myit a bo é za hkâsu kut hko kyô é hkyô lé le, yhangmoq lé tã kyô ri.

²⁸ Haû mù, Sholuq gi, yhangmoq eq rahá Yerusalem và mó má htoq htoq wàng wàng kut nyí uchyang, Yhumsing é mying mai a gyuq a kyum é za hko kyô nyi ri.

²⁹ Grik dang nyo é Yudaq byu pé eq le, taí he lhum nyi akô; nghut kôlhang, yhangmoq gi, yhang lé sat pyám rà dà akô.

³⁰ Haû hkyô lé, gumang wui sé kôjáng, yhang lé Kesare và mó má jé shoq dé mù, Tarshu myuq shut nhang kat akô nghut ri.

³¹ Yuda mau, Galile mau eq Samariq mau jowò hkangmó mâ é noqkuq hpúng gi, haû yoq pé má, lhoq ging lhoq ting é hkyô wó yú mù, nguingón nyi akô; haû Yhumsing lé gyuq hkunggá é hkyô má le, Chyoiyung Woi-nyí eq lhoq pun lhoq kying é hkyô pé má le châng nyi mù, myô jat lo bùm bekô nghut ri.

Ainea Ge Byuq É Hkyô

³² Haû hkún, Petruq gi, haû mau pé má hkat kùm wún uchyang, Ludaq và mó má nyi é sân-yung bâng chyáng ê jé ri.

³³ Haû và má, gùngjum shí luí shit zân tup yhupjang mai a wó toq é Ainea gá é byù rayuq lé é myang ri.

³⁴ Haû mù, Petruq gi, "Ainea ê, Yesuq Hkrisduq, nang lé lhoq gê byi bê nghut ri, toq mù, náng é yhuphpú hen yù aq." ga luí, yhang lé taí ri. Haû hkún jáng, Ainea wó toq yap bê nghut ri.

³⁵ Ludaq eq Sharon pá má nyi é lunglhang bang gi, haû yuq lé myàng mù luí, Yhumsing Yesuq chyáng lhing wang lo bum akô.

Dorka Ga Sù Dum Dui Lo É Hkyô

³⁶ Ahkuí, Yopa myuq má Tabihta gá é chángzo myiwe rayuq nyi ri; mying haû lé Grik dang đông gi, Dorka* gá é nghut lhê. Myiwe haû gi, ge é muzó kut nyi é sù eq, asho awui bang lé alu byí nyi é sù nghut ri.

³⁷ Haû u lé, yhang gi, nõhpyo hui mù shi ló bê nghut ri. Yhâng mâng lé gi, chi mù luí ahtoq gok má jang tô akô.

³⁸ Ludaq và mó gi, Yopa myuq eq chyáng é yanmai, haû myuq má Petruq nyi é lé chángzò pé wó gyo kôjáng, yhangmoq gi, byù í yuq lé nhang kat mù, "Ngamoq chyáng myap lé lô aq." ga jì nhang kat akô.

³⁹ Haû hkún, Petruq gi, toq mù, haû nhik htâng châng e ló ri. Yhang jé jáng, ahtoq pyám gok má shuí hâng yu akô. Chuimó myhí pé lunglhang bang gi, yhang nàm má yap mù ngau uchyang, yhangmoq eq rahá nyi tô ashí hkún Dorka hkyup é buhing eq gotù mebu pé lé tûn shit nyi akô.

⁴⁰ Petruq kúm gi, lunglhang bang lé htoq ló nhâng mù, hkyihput htuq luí, kyúdung mù, mâng shut lhing wú luí, "Tabihta ê, toq aq!" ga taí ri, haû hkún myiwe haû myoq hpóng lô mù, Petruq lé myàng jáng, toq zung lo ri.

⁴¹ Petruq gi, loq lhâm kat mù yhang lé llang toq yù luí, lumjing bang eq chuimó myhí pé lé wut yù mù, dui gù ap byí ri.

⁴² Haû hkyô lé, Yopa myuq má é bang banshoq wó gyô ló kômù luí, byù myo myo gi, haû Yhumsing Yesuq lé lumjing bum akô nghut ri.

⁴³ Haû mù, Petruq gi, shokuq loqmú saí é Simun ga sù eq rahá, Yopa myuq má rayoq zo nyi nyi ri.

10

Koneli É Shing-rán

* 9:36 Dorka gá é lichyúm gi, "chochí" gá é nghut lhê.

¹ Ahkuî, Kesare wà mó má gyezo rashô up é Koneli gâ é gyezau rayuq nyi ri. Yhang gi, Itali gyedap mâ é nghut lhê.

² Yhang gi, tarâ hkungga myit bò luî, yhâng é yhumbyù banshoq bang eq rahá Garai Gasang lé gyuq hkunggâ nyi lhê eq, myùng bang lé alu myo myo byi uchyang, Garai Gasang lé hkâ-nhâm le kyûdung nyi ri.

³ Ra-nyí lé, myinhâng sum hkyíng kô má, Garai Gasâng é maumang lagyo rayuq gi, yhâng chyáng jé mù, "Koneli ê." ga luî, yhang lé wut é lé, shing-rán mai de de myang ri.

⁴ Haú mù, haú yuq lé wú tsuq to mù, "Yhumsing ê, hai hkyô nghut lhê lhú?" ga gyuq myit eq myí ri.

Maumang kúm gi, "Náng é kyûdung dang eq alu byí é hkyô gi, Garai Gasâng é hí má, hkungga masat dông hkyâng bê nghut ri.

⁵ Ahkuî, Yopa myuq shut byù nhang kat mù, Petruq gâ é sù Simun lé è shuí lò nhâng aq.

⁶ Yhang gi, wuimau yàm mâ é, shokuq hkyup zô é Simun yhùm má bíng nyi ri." ga taí ri.

⁷ Koneli gi, yhang eq dang taí é maumang lagyo ló byuq jáng, dui-nhâng zoshâng í yuq eq, yhâng chyáng hkâ-nhâm le châng nyi bang má é, tarâ hkunggâ é gyezo rayuq lé ji yù mù,

⁸ dut lai lo é hkyô banshoq, yhangmoq lé taí kyo luî, Yopa myuq shut nhang kat ri.

Petruq É Shing-rán

⁹ Htang nyí nyí-káng u lé, yhangmoq, Yopa myuq jé ló yâm má, Petruq gi, kyûdung râ ga, yhumhkung shut doq ló ri.

¹⁰ Haú hkùn, yhang gi, zòmut luî rajung jung zô nau nyi ri; nghut kôhang, zoshuq ru gai nyi ashí le, yhang moq byuq ló mù myoqwup shing-rán myang é gi,

¹¹ mauhkung bóng lô mù, hpajóng mó sù é lé, myi chyùn má zui luî myigùng shut lhoq hkyô kat é azíng lé myang ri.

¹² Haú hkaú má, myigùng htoq mâ é hkyí myi hkyí dap é jung dusak ahú hú eq dô yê é jung ahú hú, mau má dang é nghoq ahú hú, lúng tô ri.

¹³ "Petruq ê, toq mù, sat zo aq." gâ é danghtê le mying htoq lo ri.

¹⁴ Petruq kúm gi, "Yhumsing ê, haú gi, a wó dut, achaq achyut é eq a sanséng é zè lé, ngò hkâ-nhâm le a zô wú." ga tù taí ri.*

¹⁵ Haú hkùn, "Garai Gasang lhoq san lhoq séng bê zè lé, a sanséng hkâ-nghú." ga luî, yhang lé dum taí kat ri.

¹⁶ Haú su ga sum dâm taí é htâng má, zè haú lé radá dâm mauhkung shut wup yu ló bê nghut ri.

¹⁷ Ahkuî, Petruq gi, yhang myang é shing-rán lé haí wá nghut lhê lhú ga luî, myit maú nyi é hkùn, haú Koneli nhang kat é bang gi, Simun é yhùm lé myang hô kômù, hkumtot má yap to luî,

¹⁸ Petruq gâ é sù Simun, yhùm haú má nyi a nyi é lé, wut myí wú akô.

¹⁹ Petruq gi, shing-rán haú lé ru myit wú nyi ashí le, Woi-nyí gi, "Wú aq, byù sum yuq nang lé ho nyi akô, toq mù gyó ló aq;

²⁰ yhangmoq gi, ngò nhang kat é bang nghut é yanmai, myit haí a úng-âng é za, yhangmoq eq rahá bo ló aq." ga taí ri.

* 10:14 Nhung 11 lé wú aq.

21 Haú mù, Petruq gi, haú bâng chyáng gyó ló luí, "Nungmoq hô nyi é sù gi, ngò nghut lhê, haí ra luí lé kô é lú?" ga myí ri.

22 Yhangmoq taí é gi, "Dingmán é, Garai Gasang lé gyuq hkunggá é, Yudaq amyú lunglhang bâng é hí má myoqdong wó é, shò up gyezau Koneli gi, nang lé yhâng é yhùm má ji hâng yù mù, nàng taí é dang gyo yù râ matú, yhang lé chyoyúng maumang lagyô eq taí shit kyô é hkyô lé wó yù luí, ngamoq lé nhang kat é nghut lhê." ga akô.

23 Haú mù luí, Petruq gi, yhangmoq lé wut hâng yù mù, bíng nhang ri. Hau htang nyi, yhang gi, toq mù, yhangmoq eq rahá bo ló ri; Yopa myuq má é gumang wui ra-am le châng akô nghut ri.

Koneli Lé Petruq Huí É Hkyô

24 Hau htang nyi, yhangmoq gi, Kesare wà mó shut wang ló akô. Koneli gi, yhâng é gumang wui eq buinùm ji-myi wui lé ji tsing to mù, yhangmoq lé láng nyi ri.

25 Petruq wang ló jáng, Koneli gi, te yù mù, yhâng é hkyí wang má paí gop noqkuq ri.

26 Petruq kúm gi, "Toq aq, ngò le byù ru nghut lhê." ga luí, taí uchyang yhang lé tu toq ri.

27 Haú mù, Petruq gi, yhang eq dang nyô uchyang wang ló wú le, byù myo myo zup zîng tô bum é lé myang ri.

28 Haú hkùn, yhang gi, yhangmoq lé, "Yudaq byù rayuq gi, noqkuq htung dông tûngbau rayuq eq a wó zùm yap é, htoq htoq wàng wàng a wó kut é hkyô lé, nungmoq sé lugù nghut akô. Nghut kôlhang, ó yuq lé le achay achyut dut ri, a sanséng dut ri nghù a ge taí é hkyô lé gi, Garai Gasang, ngo lé tûn shit bê.

29 Hau é yanmai, nungmoq ngo lé ji kat é hkùn, ngò a he pyâm é za châng lé lo é nghut lhê. Haú mù luí, haí ra kô é yanmai, ngo lé ji akô nghù ngò myi nau ri." ga taí ri.

30 Haú hkùn, Koneli gi, "Lái lò bê myi nyí nyí, myinhâng sum hkyíng má, ngá é yhùm má, ngò kyúđung nyi le, danso loq, duqbó é mebu wut é byù rayuq ngá é hí má yap htoq shit mù,

31 'Koneli é, Garai Gasang gi, náng é kyúdung danghtê lé le gyo byi bê; nàng alu byí é hkyô lé le, bun byi bê nghut ri.

32 Hau é yanmai, Yopa myuq shut byù nhang kat mù, Petruq gá é Simun lé ji nhâng aq. Haú yuq gi, wuimau yàm má é shokuq hkyup zô é Simun yhùm má bíng nyi ri.' ga taí ri.

33 Haú mù luí, haú hkùn jáng ngò náng chyáng byù nhang kat bê nghut lhê. Ahkuí, nàng jé é gi, gyai gê bê nghut ri. Yhumsing yhang nang lé tai nhang é gû banshoq gyô yù râ matú, ahkuí ngamoq lunglhang bang Garai Gasang é hí má nghut nyi lhê." ga taí ri.

Petruq Hko Kyô É Mungdang

34 Haú hkùn, Petruq dang-hi hpông é gi, "Garai Gasang, myoqdong a hkyin é hkyô lé, ahkuí ngò gè gè yhang sé bê.

35 Byù myú chângiup má, Yhang lé gyuq hkunggá é eq tengmán é muzó jizó sai é sù gi, Yhang é hí má myoqdong wó nyi ri.

36 Nyi mi-nyí, joq muijoq é Yhumsing, Yesuq Hkrisduq é yanmai, nguínón hkyô eq sêng é gabú danglù lé hko kyo sháng gaq ga, Israelaq byu pê chyáng Garai Gasang hun kat é mungdang eq rajung za,

³⁷ baptisma hkyô lé, Yohan hko é htâng, Galile mau mai Yuda mau banshoq má tai pyo ló é hkyô lé, nungmoq sé gû nghut nyi lhê.

³⁸ Haú gi, Garai Gasâng eq Chyoiyúng Woi-nyí eq wum-o a-tsam byí to bê sù, Nazaret wà byù Yesuq é hkyô nghut nyi ri. Garai Gasang yhang eq rahá nghut nyi é yanmai, yhang gi, ge é muzó lé kut wún é eq, nat eq zing-ri huí é bang banshoq lé lhoq gê byí wún ri.

³⁹ Haú mù, Yudaq byu pé é ming má le, Yerusalem wà mó má le, yhang zui saí bê muzó banshoq é saksê pé gi, ngamoq nghut nyi lhê. Haú yuq lé yhang, yhangmoq sik zîng má jén sat pyám bekô nghut ri.

⁴⁰ Garai Gasang kúm gi, sum nyí nghû râ buinyi má, haú yuq lé lhoq dui toq kat é nghut mù luí, byù banshoq é hí má a nghut e za, saksé kut râ matú Garai Gasang hkyin to gù nghut é bang ngamoq é hí má za htoq shit bê nghut ri.

⁴¹ Yhang shi é mai dum dui toq ló é htâng má, ngamoq yhang, Yhang eq rahá razo rashuq wó kut yu é nghut lhê.

⁴² Yhang gi, asak dui é bang eq shí bê bâng é tarâ agyi kut râ matú, Garai Gasâng eq Yhang lé hkyin tô é sù nghut é hkyô lé, byu pé lé hko kyo râ eq, saksé hkám râ matú, ngamoq lé hkunmó hkyô to bê nghut ri.

⁴³ "Yhang lé lumjîng é bang yuq hkangmó gi, Yhâng é mying é yanmai, yubak hkyut pyám byí é hui kó râ nghut lhê." ga luí, tai é myiqhtoi banshoq gi, Yhâng é hkyô lé saksé hkam byí é bang nghut nyi akô." ga tai ri.

Chyoiyúng Woi-nyí Lé, Tungbaù Pé Wó Hap Yu É Hkyô

⁴⁴ Petruq gi, haú hkyô lé ru tai nyi ashí le, dang haú wó gyô é banshoq bâng ahtoq má Chyoiyúng Woi-nyí gyó jé lo ri.

⁴⁵ Tungbaù pé é htoq má lháng Chyoiyúng Woi-nyí gâ é chyunghuq lé hut hkyô kat é yanmai, Petruq eq rahá lé é, ahpyo-kuq hpyit bê é lumjîng bang Yudaq byu pé gi, maú bum akô.

⁴⁶ Hkâsu mù gâ le, yhangmoq gi, laklai dang nyo é lé le, Garai Gasang lé hkyá-on kô é lé le, wó gyô bum kô é yanmai nghut ri.

⁴⁷ Haú mù, Petruq gi, "Ngamoq su Chyoiyúng Woi-nyí hkâm yù bê bang lé, baptisma a byi nhâng râ gi, wui lé ó yuq wó hkûm to râ lúh?" ga tai ri.

⁴⁸ Hau htâng, yhang gi, yhangmoq lé Yesuq Hkrisduq é mying lang luí wui-myhup hkâm yù râ matú pyîng tô ri. Haú hkûn, yhangmoq gi, Petruq lé buinyi ra-í nyí, nyi gyó shi aq ga chôh hkûm akô.

11

Petruq, Yhang Kut É Muzó Lé Shit Kyô É Hkyô

¹ Tungbaù pé le, Garai Gasâng é mungdang lhom yù bê gâ é hkyô lé, lagyo pé eq Yuda mau pé mâ é gumang wui wó gyô akô.

² Haú mù, Petruq, Yerusalem wà mó má doq ló é hkûn, ahpyo-kuq hpyit hkyô lé myit zuq é lumjîng bang gi,

³ "Nàng gi, ahpyo-kuq a hpyit é bâng é yhûm má wàng mù, yhangmoq eq razo rashuq kut ri." ga luí, yhang lé mara lhom tai hun bum akô.

⁴ Haú hkûn, Petruq gi, haú dut lò bê hkyô lé awang mai ahpyo hpyot, yhangmoq lé tai sân kyô hi kat é má,

⁵ "Ngò gi, Yopa myuq má kyúdûng nyi le, moq byuq ló mù shing-rán myang é gi, mauhkûng mai hpajông mó sù é myi chyûn shut zui luí, ngá shut lhoq hkyô kat é zè gyó jé lo é lé, myang ri.

⁶ Haú lé rago za saí wú le, myigùng htoq má hkyí myi hkyí dap é jung dusak, yosò zè, dô yê é jung eq, maulat nghoqzò pé bo tô é lé, ngò myàng luí, myit wú nyi é hkùn,

⁷ 'Petruq ê, toq mù, sat zo aq.' gâ é danghtë lé, ngò wó gyô ri.

⁸ Ngò kúm gi, 'Yhumsing ê, haú gi, a wó dut, achag achyut é eq a sansêng é zè, ngá é nhut má hkâ-nhâm le a wang wú.' nghû taí kat é nghut lhê.

⁹ Haú hkùn, 'Garai Gasang lhoq san lhoq yúng bê zè lé, a sansêng hkâ-nghû.' ga luí, mauhkùng mai dum taí kat ri.

¹⁰ Haú su ga sum dâm taí é htâng má, haú pé banshoq lé mauhkùng shut dum wup yu ló bê nghut ri.

¹¹ Haú hkùn jáng, Kesare wà mó mai, ngá chyáng nhang kat é byù sum yuq gi, ngò nyi é yhùm hkumtot má jé nyi tô akò.

¹² Chyoiyúng Woi-nyí gi, ngo lé myit a úng-âng é za, yhangmoq htâng châng é aq ga taí ri; shí gumang hkyuq yuq le ngò eq rahá é mù, Koneli é yhùm má ngamoq wang é.

¹³ Haú hkùn, haú yuq gi, yhâng é yhùm má maumang lagyo lé htoq shit é hkùn, yhang hkâsu myang é hkyô lé le; maumang lagyô eq yhang lé, 'Yopa myuq shut byù nhang kat mù, Petruq gâ é sú Simun lé é jì nhâng aq;

¹⁴ nàng eq nàng yhumbyù lhunglhâng bang hkyi yù hui râ danglù, yhang, nàng chyáng wun lé lô byi râ nghut lhê.' ga taí é hkyô lé le, ngamoq lé taí kyô ri.

¹⁵ Ngò dang taí hi ló nyi é u lé, Chyoiyúng Woi-nyí gi, sâng-hi lé ngamoq é ahtoq má gyó lé é su, yhangmoq ahtoq má le gyó lé bê nghut ri.

¹⁶ Haú hkùn sheq, ngò gi, 'Yohan gi, wui eq wui-myhup hkám byí ri; nungmoq kúm gi, Chyoiyúng Woi-nyí eq wui-myhup hkám byí é hui kó râ nghut lhê.' ga luí, Yhumsing taí é dang lé bün kat ri.

¹⁷ Haú mù luí, Yhumsing Yesuq Hkrisduq lé lumjिंग é hkùn, ngamoq lé Garai Gasang jeju chyunhuq byí é su, Yhang, yhangmoq lé le byí é nghut le gi, ngò gi, hkasú é byù nghut luí, Garai Gasang lé wó lhom hkùm pyám râ lhú?" ga taí ri.

¹⁸ Yhangmoq gi, haú hkyô lé wó gyo kôjáng, taí jang a joq lo kômù, "Ó! Nghut bê, Garai Gasang gi, tũngbaù pé lé le, asak òuì râ matú myit lhing hkyô byi bunhung!" ga luí, Garai Gasang lé chòm hkya-ôn akò nghut ri.

Antioku Wà Mâ É Noqkuq Hpúng

¹⁹ Ahkuí, Stehpan lé sat pyám kô é htâng má, zing-ri hui kô é yanmai, byo myín ló é bang gi, Hpinisi mau, Kupru zinlóng eq Antioku wà mó jé shoq byo ló kômù, Yudaq byu pé lé baù za, mungdang haú hko kyô akò nghut ri.

²⁰ Nghut kôlháng, yhangmoq mâ é Kupru byù eq Kuruni byù ra-am gi, Antioku wà mó má châng jé ló kômù, Yhumsing Yesuq é gabú danglù lé, Grik pé lé le taí kyô bum akò.

²¹ Haú Yhumsing é loq gi, yhangmoq eq rahá nghut nyí mù luí, byù myo myo gi, lumjिंग mù, Yhumsing chyáng lhing wang lo bùm bekò nghut ri.

²² Haú bâng é hkyô lé, Yerusalem noqkuq hpúng é no má hkyang jé ló é nghut mù luí, yhangmoq gi, Barnaba lé Antioku wà mó jé shoq nhang kat akò.

²³ Yhang jé é hkùn, Garai Gasang jeju bo nyi é lé myàng jáng, yhang gi, gabú luí, yhangmoq é myit nhikhum banshoq eq haú Yhumsing má lhumzuí nyi râ matú, lhunglhâng bang lé myit wum byí ri.

²⁴ Hkâsu mù gâ le, Barnaba gi, byù gè nghut mù, Chyoiyúng Woi-nyí le, lumjúng myít le byíng tô é sù nghut nyí ri. Haù mù, byù myo myo gi, haù Yhumsing chyáng jat wang lo bùm bekô nghut ri.

²⁵ Hau htâng, Barnaba gi, Sholuq lé é hô rã ga Tarshu myuq shut é mù, yhang lé myàng jáng, Antioku wà mó má shuí lo ri.

²⁶ Haù mù, yhangnhik gi, razàn gón noqkuq hpúng haù eq rahá zum nyí kô é nghut mù luí, byù myo myo lé wó mhoqshit akô. Chángzô pé gi, Hkristan gâ é myíng lé, Antioku wà mó má sâng-hi wó yù bekô nghut ri.

²⁷ Haù u lé, myiqhtoí pé ra-am gi, Yerusalem wà mó mai, Antioku wà mó má lé jé bum akô.

²⁸ Haù bang mã é Agabu gâ é sù gi, toq yap mù, Romaq mingkan títg mã mutmó gyó lô rã nghut é hkyô lé, Woi-nyí eq tún shit é đông tái kyô ri; (Haù gi, hkohkâm Klodi é pyat mã dut bê nghut lhê.)

²⁹ Haù mù luí, chángzô pé gi, Yuda mau mã é gumang wui lé, ó le ó wó dut é myhó garum kat rã ga, myít hpyit yu bum akô.

³⁰ Haù eq rajung za kut kômù, yhangmoq gi, chyunghuq haù pé lé Barnaba eq Sholuq nhik é loq mai suwún wui pê chyáng hun kat bekô nghut ri.

12

Petruq, Htóng Mai Wó Lut Htoq Lo É Hkyô

¹ Haù u lé, Herut hkohkâm gi, hpúng byù ra-am lé chyup yù mù, zing-ri rã ga ngantsâ nyí ri.

² Haù mù, Yohan é yhangmang Yakuq lé sham eq sat pyám nhang ri.

³ Haù hkyô lé Yudaq byu pé wú gabú é lé myàng jáng, yhang gi, Petruq lé le, jâng chyup yu ri. Haù dut é gi, mún a kat é muk zo poí u lé nghut ri.

⁴ Herut gi, Lhoqlhai Poí lai jáng sheq, mingbyù wui hí mã jéyáng rã ga myít tô é yanmai, yhang lé chyup yu é htâng mã, htóng mã lhung to mù, yhang lé zúng rã matú, gye myi yuq yuq kut myi hpúng lé ap tô ri.

⁵ Haù mù, Petruq gi, htóng mã lúng tô ri; hpúng byù wui kúm gi, yhang é matú Garai Gasâng chyáng kyû gyai chôm dung byí nyi akô nghut ri.

⁶ Petruq gi, Herut eq yhang lé jéyáng rã matú she htoq yù rã hí myín lé, shamtoq-tui í hkat eq tui é hui luí, gyezo í yuq é gyoro mã yhup myhí tô ri; zúng é bang le htóng hkum mã zúng nyi bum akô.

⁷ Haù hkùn, Yhumsing é maumang lagyo rayuq lé htoq shit mù, gok haù mã duqbó lo ri. Maumang lagyo haù gi, Petruq é namcham mã é hpuk kat mù, "Myap toq wú aq." ga nhaù ri; haù hkùn, Petruq é loq mã é toqjâng tui pé le gyut gyó lô bê nghut ri.

⁸ Maumang dum tái é gi, "Hpyihit hit mù, hkyí-tsung tsung aq." gâ ri; Petruq le tái é eq rajung za kut ri. "Náng é bumó wut mù ngá htâng cháng aq." ga yhang lé maumang lagyo dum tái ri.

⁹ Haù hkùn, yhang gi, htóng mai yhâng htâng châng htoq ló ri; nghut kôlhang, maumang lagyo kut é muzó haù gi, gè gè nghut é lé, yhang a sé mù, shing-rán myang é nghut ri ga myit yu ri.

¹⁰ Ahkuí, yhangnhik gi, zúng tô é jowò í wô lai mù, wà mã htoq é shamtoq hkum mã jé jáng, hkum haù le yhang baú bóng lô mù, yhangnhik htoq luí, wà hkyô rahkat mã sô lô le, maumang lagyo gi, haù hkùn jáng, yhâng chyáng mai gâng ló byuq bê nghut ri.

¹¹ Ahkuî, Petruq gi, dum bûn gyîng lò jáng, "Yhumsîng gi, Yhâng é maumang lagyo lé nhang kat mù, Herut é loq eq Yudaq byu pé myit myoqbyù tô é hkyô banshoq mai, ngo lé hkyi yù bê nghut é lé, ahkuî ngò gè gè sé bê." ga taí ri.

¹² Haú hkyô lé myit sé kat jáng, yang gi, byù myo myo zing mù, kyûdûng nyi é jowò, Markuq gâ é Yohan é yhângnu Mariq é yhûm má jé lô ri.

¹³ Haú mù, yang gi, yhûm wàng hkum lé lô bat é hkûn, Roda gâ é dui-nhâng zoshâng myiwe zo rayuq gi, gyô wú rà ga htoq lé lo ri.

¹⁴ Yang gi, Petruq é htê nghut é lé sé gyô kat jáng, lûm gabú luí hkum a hpóng byi shí é za, yhûmhkaû shut din wang lô mù, "Petruq gi, hkum mhó lut má lo yap tô ri." ga lô taí kyô ri.

¹⁵ Yangmoq kúm gi, "Nàng na bê nghut ri." ga yang lé taí akô. Yang gi, gè gè nghut ri ga ru taí nyi ri. Dum, yangmoq gi, "Yhâng é maumang lagyo nghut âng ri." ga taí akô.

¹⁶ Nghut kôlhang, Petruq gi, hkum ru bat nyí mù, yangmoq hpông kat é hkûn, yang lé myàng kôjáng, chòm maú byuq bum akô.

¹⁷ Yang gi, yangmoq lé zim za nyi keq ga loq lik shit mù, yang lé Yhumsing eq htóng mai hkâsu kut shuí htoq yu é hkyô lé taí kyo luí, "Shí hkyô lé Yakuq eq gumang wui lé taí kyô kat keq." ga taí ri. Hau htâng, yang htoq lô luí, jowò gó shut e lô bê nghut ri.

¹⁸ Ahkuî, maubó jáng, gyezô pé gi, Petruq haí dut byuq é hkyô lé a sé kô é yanmai, gyai maú gabyông bum akô.

¹⁹ Herut kúm gi, Petruq lé ho wú le a myàng jáng, zúng é bang lé myí gôn wú mù, yangmoq lé sat pyám rà matú hkunmó hkyô ri.

Herut Hkohlâm Shi Byuq É Hkyô

Hau htâng, yang gi, Yuda mau mai Kesare wà mó má gyó lô mù lô nyi nyi ri.

²⁰ Haú gyoro má, Herut hkohlâm gi, Turuq eq Sidun byu pé lé gyai nhik-yô nyi ri. Haú mù luí, yangmoq gi, myit rahkat zâ eq yhâng chyáng é mù, Blastu gâ é, hkohlâm wa lum tô é suwún hpó lé é lûm hkaû mù, simsaq hkyô é dũng akô. Hkâsu mù gâ le, yangmoq é zoshuq wó rà matú gi, Herut é ming lé lùm hkaû nyi kô é yanmai nghut ri.

²¹ Haú hkûn, ding lhûm tô é buyni má, Herut gi, hkohlâm hking wut chũng mù, hkohlâm tanghkuq má zũng luí, yangmoq lé hkohlâm mungdang byí ri.

²² Haú jáng, mingbyû wui gi, "Htê shí gi, waxâng byu é htê a nghut, garai wá é htê sheq nghut ri." ga garú bum akô.

²³ Radá dâm, Herut gi, Garai Gasâng é hpungwup shingkan lé a tê byí é yanmai, Yhumsing é maumang lagyo gi, yang lé dâm byi luí, yang gi, luq eq hkê é hui mù, shi byuq bê nghut ri.

²⁴ Haú Garai Gasâng é mungdang gi, sé é bang myô jat lò mù, je riyhang byo myín lô bê nghut ri.

²⁵ Barnaba eq Sholuq nhik gi, Yerusalem wà mó má yangnhik saí tũm nyi é muzó ban saí jáng, Markuq gâ é Yohan lé shuí chũng mù, Antioku wà mó shut taú lô bekò nghut ri.

¹ Ahkuî, Antioku wà mó mâ é noqkuq hpúng má, myiqhtoî pé eq sará pé le lom nyi akô. Haú bang gi, Barnaba, Niger* gâ é Simeon, Kuruni byù Luki, (Herut zau hpó eq zum kô lò sù) Manaen eq Sholuq pé nghut akô.

² Yhangmoq gi, zoshuq gám luí Yhumsing lé noqkuq dojaú nyi é hkûn, Chyoiyúng Woi-nyí gi, "Ngá é mù wùn waq rá matú ji tô é Barnaba eq Sholuq nhik lé, hkyin to keq." ga taí ri.

³ Haú mù luí, yhangmoq gi, zoshuq gám luí kyúdung mù, yhangnhik ahtoq má loq ke byi kô é htâng, yhangnhik lé nhang htoq kat akô nghut ri.

Kupru Zinlóng Má Dut É Hkyô

⁴ Haú mù, yhangnhik gi, Chyoiyúng Woi-nyí eq nhang kat é eq rajung za, Seluki wà shut gyô lô mù, haú mâ é lhai ji luí, Kupru zinlóng má jé lô luí,

⁵ Salami wà mó má nyi nyi é hkûn, Yudaq byu pé é tarajong pé má, Garai Gasâng é mungdang hko kyô akô. Markuq gâ é Yohan le yhangnhik lé htuqluq htuqbang kut nyi ri.

⁶ Yhangmoq gi, haú zinlóng mai lai byit e lô mù Pahpu wà mó jé lô kô é hkûn, myiqhtoî pyoq nghut sù Bara-Yesuq gâ é Yudaq byù myoqheq sará rayuq eq htúng hui akô.

⁷ Haú yuq gi, Sergi Poluq gâ é, myit hpaqchyí kûng é ginwáng zau hpó é byù rayuq nghut lhé. Minggyi hpó haú gi, Garai Gasâng é mungdang gyô yù nàu mù, Barnaba eq Sholuq nhik lé ji yu ri.

⁸ Haú hkûn, myoqheq sará gâ é lichyúm dông myhîng é Eluma le gâ é Bara-Yesuq kúm gi, ginwáng zau hpó lé haú lumjîng hkyô má a jau lô nhâng nau é nghut mù luí, yhangnhik lé lhom he tang pyâm ri.

⁹ Haú hkûn, Poluq le gâ é Sholuq gi, Chyoiyúng Woi-nyí byíng mù, yhang lé wú tsuq to luí,

¹⁰ "Myit goí é hkyô eq hpuq lô lhik é hkyô banshoq byíng tô é, nat é yhangzo nghut sù, tengmán hkyô hkanmó é gye hpó è, Yhumsing é tengmán hkyô lé a lhoq hpyoq é a wó nyí lhu?

¹¹ Ahkuî, wú aq, Yhumsing é loq gi, náng chyáng jé mù, nàng gi, rayoq zo builoq a wó myang é za, myoqjit byuq rá nghut lhé." ga taí ri.

Haú hkûn jáng, yhâng é myoq gi, myhî-myhà ga luí mauchut tuq dut lò byuq ri; haú mù, yhang lé shê rá byù ho sop lhîng wùn ri.

¹² Haú hkyô lé ginwáng zau hpó myàng jáng, Yhumsing eq sêng é mhoqshit é hkyô lé wú maú luí lumjîng bê nghut ri.

Antioku Wà Mó Má Dut É Hkyô

¹³ Hau htâng, Poluq eq yhâng luzúm wui gi, Pahpu wà mó mai lhai ji mù, Pamhpuli mau mâ é Perga wà má jé lô akô. Markuq gâ é Yohan kúm gi, yhangmoq eq gang luí, Yerusalem wà mó shut taú lú byuq bê nghut ri.

¹⁴ Dum, yhangmoq gi, Perga mai toq e lô le, Pesidi ginwáng mâ é Antioku wà mó má jé lô akô. Banno buinyi má, yhangmoq gi, tarajong má wang zung tô akô.

¹⁵ Haú hkûn, Mosheq é tarâ laiká eq myiqhtoî laiká pé lé ban nghap jáng, tarajong má up bang gi, "Gumang wui è, mingbyù wui lé myit wum byi dang joq kô é nghut le gi, ahkuî taí lo keq." ga luí, yhangmoq chyáng taí nhang kat ri.

* 13:1 Grik dong Niger gâ é gi, byù noq gâ é nghut lhé.

16 Haú hkûn, Poluq gi, toq yap mù, zîm byuq kó sháng gaq ga loq tú luí, "Israelaq byu pé eq Garai Gasang lé gyuq hkunggá é byu pé ê, chômg yô yù keq.

17 Israelaq byu pé é Garai Gasang gi, ngamoq é íchyí íkê pé lé hkyin yù bê nghut mù luí, Egutuq ming má byùbing dut nyi to ashí hkûn, yhangmoq lé kô myhâng nhâng mù, hpungwup a-tsam bo é loq eq haú mau mai shuí htoq ló ri.

18 Dum, myi xê zàn kô, yoso pé má yhangmoq é a-kyang lé jân pyám byi mù,

19 Hkanan ming má é byuhú nyhit hú lé lhoq htên pyám luí, haú bâng é mingdán má é sili wunlí yhangmoq lé gàm byi ri. Haú gi, myi shô ngo xê zàn kô myáng ri.

20 Hau htâng má, Garai Gasang gi, myiqhtoi Samuelaq é pyat jé shoq tará agyi pé lé to byi ri.

21 Hau htâng má, yhangmoq mai hkohkâm dung kômù, Garai Gasang gi, yhangmoq lé, Ben-yamyin amyû má é, Kisha é yhangzo Sholuq lé byi luí, yhang gi, myi xê zàn up bê nghut ri.

22 Hau htâng, Sholuq lé lhoq hkyô pyám mù, Dawiq lé, yhangmoq é hkohkâm kut nhang ri. Dawiq é hkyô lé Yhang saksé hkâm é gi, 'Ngò nhik dik é Yese é yhangzo Dawiq lé myàng bê; yhang gi, ngò kut nhang é hkyô banshoq lé kut râ nghut lhê.' gâ ri.

23 Garai Gasang gi, Yhâng é danggidiq joq é eq rajung za, Israelaq byu pé é matú, haú yuq é awut ashín mai, hkyi yù Sû Yesuq lé, pô htoq nhâng bê nghut ri.

24 Yesuq a jé lé shimá, Yohan gi, Israelaq byu pé banshoq lé myit lhîng hkyô eq séng é baptisma hkyô lé hko kyo bê nghut ri.

25 Dum Yohan gi, yhang zuí é muzô ban ló é u lé, 'Ngo lé ó nghut é su ngâm tô akô lhú? Ngò gi, haú yuq a nghut, wú keq, ngá é htâng má rayuq jé râ nghut lhê, haú yuq é hkyî-tsung tui hpyî râ lháng ngò a gîng.' ga tai ri.

26 Abraham é yhangzo yhangshú pé eq Garai Gasang lé gyuq hkunggá é tûngbaú, gumang wui è, shí hkyi yù hkyô mungdang lé, nga-nhúng chyáng byi kat bê nghut ri.

27 Yerusalem wà mó má é bang eq, yhangmoq é zau suwún wui gi, Yhang hkyi yù sù nghut é lé le, Bánno buinyi hkangmó nghap é myiqhtoi pé é dang lé le, a sê gyo kô é yanmai, Yesuq lé sat râ doqdân é hkûn, myiqhtoi pé é dang lé lhoq dik pyám bekô nghut ri.

28 Yhâng chyáng shí gîng é mara a myàng kôhang, Yhang lé sat pyám nhâng râ matú, Pilat chyáng dúng akô.

29 Yhangmoq gi, yhang eq séng luí, kâ to má kâ to ban lhoq dik kôjáng, Yhang lé tapzing mai yu hkyô mù, lup má kat tô akô nghut ri.

30 Garai Gasang kúm gi, Yhang lé shi é mai lhoq dui toq yù bê nghut lhê.

31 Yhang gi, Galile mau mai Yerusalem wà mó jé shoq, hí lé Yhâng htâng châng é bâng chyáng buinyi tsómra myáng shoq htoq shit shit kut ri. Haú bang gi, ahkuí, nga-nhúng Israelaq byu pé é hí má, Yhâng é saksé dut bekô nghut ri.

32 Haú mù, í dam lhê é Hkya-on Kungtôn Laiká má, 'Nàng gi, Ngá Zo nghut ri. Hkú-nyí, Ngò gi, Náng Wa dut bê nghut lhê.'*

* 13:32 Hkya-on 2:7

³³ Garai Gasang gi, îchyi îwâ pé lé byi tô é danggidiq lé, Yesuq lé lhoq dui toq byi é dông, yhangmoq é yhangzo yhangshu ngamoq é matú, lhoq dik byi é gabú danglú lé, nungmoq chyáng ngamoq wun lé byi bê.

³⁴ Hau htoq agó, Yhang htên byoq é hkâ-nhâm a hui shoq, shi é mai lhoq dui toq yû râ hkyô eq séng luí, Garai Gasang taí é gi, 'Dawiq lé byi tô é danggidiq eq rajung za, chyoiyúng é eq lungging é jeju lé, ngò nungmoq lé byi râ nghut lhê.'[☆]

gâ ri.

³⁵ Hkya-on Kungtôn Laiká gó wô má le, 'Náng é Chyoiyúng Sù lé, Nang htên byoq nhâng naù râ a nghut.'[☆] ga taí tô ri.

³⁶ Ahkuí, Dawiq gi, yhâng é pyat banshoq má Garai Gasang ô nau é dông ban wùn waq jáng, shi byuq luí, îchyi îwâ pé eq rahá myhup pyám hui mù, htên byoq byuq é hui bê nghut ri.

³⁷ Garai Gasang lhoq dui toq yu é sù kúm gi, htên byoq huí é a nghut.

³⁸ Haù nghut é yanmai, gumang wui ê, haù yuq mai yubak wó hkyut pyám byi é hkyô lé, nungmoq lé hko kyô nyi é nghut é le, sê nyi keq.

³⁹ Hau htoq agó, Mosheq é tarâ eq mara hkyut san byi é a hui kôlhang, haù yuq lé lumjing é bang gi, hkyô lhumjup má mara hkyut san byi é hui râ nghut lhê.

⁴⁰ Hau é yanmai,

'Wú keq, jihpoi é bang ê, maú mù luí htum byuq keq; nungmoq é buinyi pé má ngò rajung jung kut htoq râ nghut lhê;

⁴¹ haù hkyô lé, rayuq yuq, nungmoq lé hkaí kyo kôlhang, jing kó râ a nghut.'[☆] ga luí, myiqhtoi pé taí é dang, nungmoq má a ang sháng gaq, sidiq nyi keq." ga hko kyô nyi ri.

⁴² Ahkuí, Poluq eq Barnaba nhik tarajong mai htoq ló le, htâng lhê é Bánno buinyi má le, haù pé lé dum hkaí kyo râ matú yhangmoq chóm dúng akò.

⁴³ Chôm byo htoq ló kô é hkûn, Yudaq byu pé eq Yudaq noqkuq htùng má lhing wang lo é tarâ hkunggá é byù myo myo gi, yhangnhik é htâng má châng bùm kô é nghut mù luí, Garai Gasâng jeju má ging nyi râ matú, yhangnhik gi, yhangmoq lé lhoq pun lhoq kyíng akò nghut ri.

Tungbaù Pé Chyáng Lhing Lo É Hkyô

⁴⁴ Hau htang lhê é Bánno buinyi má, Garai Gasâng é mungdang gyô yù râ matú, rawa bang aluq shoí banshoq, lé zup zing to bum akò.

⁴⁵ Yudaq byu pé kúm gi, byù moq mó haù lé myàng jáng, manon myit baú byíng bùm kômù luí, Poluq taí é dang lé taí htíng é eq nhíng pyám akò.

⁴⁶ Poluq eq Barnaba le gyuq myit a bo é dông taí é gi, "Garai Gasâng é mungdang lé, nungmoq lé hí taí kyo râ dut é yanmai, ngá-nhik taí bê nghut lhê. Nghut kôlhang, nungmoq gi, haù lé lhom he-ngik pyám kômù, ahtum abyuq é asak eq gingdán é dông yhumsing gùng lé a myit yù kô é yanmai, wú keq, ahkuí, ngá-nhik gi, tungbaù pé shut lhing ló berâ nghut lhê.

⁴⁷ Hkâsu mù gâ le, haù Yhumsing gi,

'Hkyi yù hkyô lé maumyi htum shoq wó chùng jé râ matú, Ngò, nàng lé tungbaù pé é maubó dut nhâng bê.'[☆] ga luí, ngamoq lé hkunmó hkyó kat bê." gâ ri.

48 Túngbaù pé gi, dang haù lé wó gyo kôjáng, gabú é eq Yhumsing é mungdang lé hkya-on kungtôn nyi bum akô. Ahtum abyuq é asak lé wó rà matú hkyin to huí é lhunglhang bang le, lumjúng bum akô nghut ri.

49 Yhumsing é mungdang gi, haù ming gón jam lò bê nghut ri.

50 Yudaq byu pé kúm gi, Poluq eq Barnaba nhik lé zing-ri rà matú, aróng wó é myiwe wui mà é tará hkungga bang eq, haù wà mà é suwún wui lé, nhik lhoq yo kôluí, yhangnhik lé maukyo mai chòm hkat htoq pyâm akô.

51 Yhangnhik gi, yhangmoq lé a nau é hkyô tûn shit é dông, yhumsing é hkyi mà é hpuilhaù lé yhangmoq chyáng ko hkyô pyâm to kômù, Ikoni wà mó shut lò byuq bekô nghut ri.

52 Chángzô pé kúm gi, gabú é htoq agó, Chyoiyúng Woi-nyí byíng nyi bum akô nghut ri.

14

Poluq Eq Barnaba Nhik, Ikoni Wà Mó Má Ló Jé É Hkûn Lhê Hkyô

1 Ahkuí, Ikoni wà mó má nghut nyi é hkûn, Poluq eq Barnaba nhik gi, Yudaq byu pé é tarajong má rahá wàng mù, Yudaq byu eq túngbaù pé ajùm ayò lumjúng bùm kó shoq, wum kat hko kyô akô.

2 Nghut kôlhang, a lumjúng é Yudaq byu pé gi, lumjúng é gumang wui lé a ngui rà dông túngbaù pé lé mhoq hpyoq yù mù, shuí gumlaù akô.

3 Haù mù luí, yhangnhik gi, tsómra myang shoq haù má nyi mù, haù Yhumsing é matú gyuq myit a bo é za hko kyô akô; Yang Yhumsing le yhangnhik é loq mai limik kumlhá eq mauhpo muzó dut nhang é dông, Yhâng é jeju mungdang lé saksé hkám byí nyi ri.

4 Haù wà mà é bang kúm gi, myit byo lò bùm kô é nghut mù luí, Yudaq byu pé chyáng ra-am, lagyô pé chyáng ra-am, lom byuq lò akô.

5 Ahkuí, túngbaù pé le, Yudaq byu eq yhangmoq é uphkáng bang le, yhangnhik lé rhoi mù luqgok eq dú sat rà ga htím lo bum akô.

6 Nghut kôlhang, yhangnhik gi, haù hkyô lé bûn sê kat kôjáng, Lukaoni ginwáng mà é Lustra eq Derbe wà mó eq, hau é awui ayàm wà tiq wà zo pé shut hpang e lò akô.

7 Haù pé má le, gabú danglù xoq hko kyô wún akô nghut ri.

Lustra Wà Mó Má Ló Jé É Hkûn Lhê Hkyô

8 Ahkuí, Lustra wà mó má, ìnu unghkaù mai hkyi hten mù luí, hkâ-nhám le hkyô a wó só wú é sù rayuq zung tô ri.

9 Yang le Poluq taí é dang lé gyô nyi ri. Poluq gi, haù yuq lé wú tsuq kat é hkûn, wó lhoq gè byi hui rà nghut lhê gá é lumjúng myit yhâng chyáng bo tô é lé, myàng byí ri.

10 Haù mù, Poluq gi, "Toq yap aq!" ga luí, htê mó eq yang lé taí kat jáng, yang gi, byam toq kat mù, wó so bê nghut ri.

11 Haù mù, Poluq kut é muzó lé shiwa byu pé myàng kôjáng, yhangmoq gi, Lukaoni dang dông, "Nat hparà pé gi, byù gùng dông kut luí ngamoq chyáng gyó lô bekô nghut ri." ga luí, wut garu bum akô.

12 Hau htáng, Poluq gi, dang myô taí sù nghut é yanmai, yang lé Herme ga, Barnaba lé gi, Zeu ga myhíng byí akô.

13 Haù wà yàm mà é Zeu hparà noqkuq yhùm hkyangjong hpó gi, wà hkum má nohtó pé eq ban hkóng pé yu lé mù, shiwa byu pé eq rahá yhangnhik lé hkungga nhông byi rà hen akô.

14 Nghut kôlhang, lagyo nhik Barnaba eq Poluq gi, haù lé wó gyo kôjáng, yhumsing é mebu lãng cheq pyám kôluí, shiwa hpong gung gung shut dìn wang é kômù, garú taí kô é gi,

15 "Hkaù pé è, haí mù haù su kut lo akó lhu? Nga-nhik le nungmoq eq rajung za, xângzo byù za nghut lhê, akyù a bo é hkyô shí pé lé tô pyâm to mù, mauhkung eq myigùng, wuìshuq lung-aù eq haù pé má nyì mi-nyì, joq mìjoq lé hpan to sù, rú dui nyì é Garai Gasâng chyáng lhing wang lò kó sháng gaq nghù luí sheq, nungmoq lé gabú danglù hko kyô é nghut lhê.

16 Garai Gasang gi, byù myù chângjup lé hí hpyang lhê é pyat bán má ó le ó kâm é đông kut nhâng bê nghut ri.

17 Nghut kôlhang, Yhang gi, mauhkung mai mau wô nhâng luí, kyôshi zuí nhang é ahkying yam-yoq byi mù, nungmoq lé zoshuq agùn agó byí é eq, nungmoq lé i-myt ngón nhang nyì é đông, Yhang ge é hkyô lé tũn shit mù, Yhang nyì é hkyô lé saksé hkâm nyi ri." ga akó.

18 Haù su ga taí kô le lhang, yhangnhik lé shiwa byu pé mai hkungga nhông byi rá hkyô lé, yhangnhik gi, gyai wuihke luí sheq wó hkũm pyám akó nghut ri.

19 Hau htâng, Antioku và mó eq Ikoni và mó pé mâ é Yudaq byu pé ram lé jé kômù, shiwa byu pé lé shuí-u luí, Poluq lé luggok eq chôm dú kômù, yhang lé shi byuq bê su ngãm kô é yanmai, và shinggan shut shê hkyut htoq pyám akó.

20 Nghut kôlhang, Poluq gi, yhâng é lnhingkyuq má chángzô pé yap tô kô é hkũn, toq mù và shut tau wang ló ri. Hau htang nyí, yhang gi, Barnaba eq rahá Derbe và mó shut e ló bekô nghut ri.

Antioku Và Mó Má Tau Jé Ló É Hkyô

21 Haù wá má yhangnhik eq gabú danglù hkô kyo kô é yanmai, byù myo myo gi, chángzô pé dut lo akó. Hau htâng, yhangnhik gi, Lustra, Ikoni, Antioku và mó hkyô dum tau ló kômù,

22 chángzô pé lé myit lhoq ging byi uchyang, haù lumjìng hkyô má ru gíng nyì rá matú myit wum byi akó. "Nga-nhúng gi, Garai Gasâng é mingdán má wàng rá matú, wuìhke jamjau myo myo hui ra rá nghut lhê." ga le, mhoqshit akó.

23 Yhangnhik gi, noqkuq hpúng hkangmó má, hpúng suwún kut rá bang lé hkyin yù mù, zoshuq gám luí kyùdung mù, yhangmoq lumjìng nyì é Yhumsing Garai chyáng ap byi tô akó.

24 Hau htâng, yhangnhik gi, Pesidi ginwáng mai lai byit ló mù, Pamhpuli ginwáng má jé ló akó nghut ri.

25 Haù ginwáng mâ é Perga và mó má mungdang hko kyo luí, Atali và mó shut láí gyó ló akó nghut ri.

26 Haù mai, lhai ji mù, ahkuí yhangnhik wùn waq láí ló bê muzó é matú, Garai Gasâng jeju má ap luí yhangnhik lé nhang kat é Antioku và mó má dum jé lò bekô nghut ri.

27 Jé ló é hkũn, yhangnhik gi, hpúng byù wui lé wut tsing yù mù, yhangnhik đông mai Garai Gasang kut é hkyô banshoq lé le, tũngbaù pé lé haù lumjìng hkyô hkum hpóng byí é hkyô lé le, shit kyô akó.

28 Haù mù, yhangnhik gi, haù wá má chángzô pé eq tsómra myang shoq nyi nyi akó nghut ri.

15

Ahpyo-kuq Hpyit Hkyô Eq Sêng É Manghkáng

¹ Ahkuí, Yuda mau mâ é byù ra-am gi, Antioku và mó má lé jé mù, gumang wui lé, "Nungmoq gi, Mosheq é htúngtarâ eq rajung za, ahpyo-kuq a hpyit é nghut jáng, hkyi yu é hui rá a nghut." ga luí, mhoqshit bum akô.

² Hau é yanmai, myit a huí lhum é hkyô htoq lô mù, Poluq eq Barnaba nhik gi, haú bang eq gyai yang myíng myô lhum akô; haú mù luí, gumang wui gi, Yerusalem và mó má nyi é lagyô pé eq suwún wui chyáng, haú hkyô lé ló hpyê lhum rá matú, Poluq, Barnaba nhik eq rahá, yangmoq chyáng mâ é ra-am lé, nhang kat rá ga hkyin tô akô.

³ Haú mù, hpúng byù wui yangmoq lé dé kat kôjáng, yangmoq gi, Hpinisi mau eq Samariq mau gyoro mai sô lai ló uchyang, tũngbaù pé lhing wang lò bê hkyô lé tai kyô akô. Haú mâ é gumang wui lé gyai yang gabú nhang akô nghut ri.

⁴ Yangmoq, Yerusalem và mó má jé kô é hkùn, hpúng byù wui, lagyô pé eq suwún wui gi, yangmoq lé lhom hkúlum yù kô é nghut mù luí, yangmoq gi, yangmoq đông mai Garai Gasang kut é hkyô lunglhang lé, haú bang lé shit kyô akô.

⁵ Haú hkùn, Hparishe hpúng mâ é lumjínng bang ra-am gi, toq mù luí, "Tũngbaù pé lé, ahpyo-kuq hpyit nhâng rá eq, Mosheq é tarâ đông cháng nhâng rá gi, ra yang rá lhê." ga tai bum akô nghut ri.

Yerusalem Và Mó Má Kut É Byin Tú Wap Hpong

⁶ Ahkuí, lagyô pé eq hpúng suwún wui gi, shí hkyô lé chôm myit wú rá ga, zup tô bum akô.

⁷ Shí hkyô lé gyai yang dang rhâng lhum bùm kô é htàng má, Petruq gi, toq mù luí, "Gumang wui ê, Garai Gasang gi, ngá nhut mai tai é, haú gabú danglù lé, tũngbaù pé gyô yù mù lumjínng kô sháng gaq ga, hí hkùn nungmoq chyáng mai ngo lé hkyin yù bê hkyô lé, nungmoq sé lugù nghut bê.

⁸ Haú mù, myit nhikhlum lé sé byi sù Garai Gasang gi, nga-nhúng lé byi é eq rajung za, yangmoq lé le Chyoiyúng Woi-nyí byi é đông, yangmoq lé hap yù bê hkyô lé saksé tũn shit bê nghut ri.

⁹ Garai Gasang gi, yangmoq lumjínng luí, yangmoq é myit nhikhlum lé lhoq san lhoq yúng byi bê nghut é yanmai, nga-nhúng eq yangmoq é gyoro má gamhkuí é hkyô a joq nhâng lo nghut ri.

¹⁰ Haú nghut le gi, íchyí iwâ pé èq le, nga-nhúng èq le a ung é wòlai lé, haú chángzô pé é lingzing má ke byí é đông mai, haí mù, ahkuí Garai Gasang lé chyam wú nyi akô lúh?

¹¹ Nghut kôlhang, ngamoq gi, yangmoq eq rajung za, Yhumsíng Yesuq é jeju mai za hkyi yu é huí é hkyô lé lumjínng é bang nghut lhê." ga luí, yangmoq lé tai ri.

¹² Haú hkùn, zup míng tô é bang lunglhang gi, zim za kut luí, Barnaba eq Poluq nhik mai, tũngbaù pé chyáng, Garai Gasang eq yangnhik é loq đông limik kumlhá pé eq mauhpo muzó pé kut shit é hkyô, tai kyô nyi é lé chôm gyô nyi akô.

¹³ Yangnhik dang ban tai kôjáng, Yakuq gi, "Gumang wui ê, ngá dang lé gyô wú keq.

¹⁴ Garai Gasang gi, tûngbaù pê chyáng mai Yhâng mying é matú byù ra-myù hkyin yù rà ga, yhangmoq lé sâng-hi mai hkâsu kut lé kûm nyi é hkyô lé, Simun taí kyo bê nghut ri.

¹⁵⁻¹⁶ Shí hkyô gi,

'Hau é htâng má gi, ngò dum taù lò mù luí, lêng gyop byuq bê Dawiq é yhûm* lé dum saí rà nghut lhê.

Haù byoq htên tô é pé lé saí mù, haù lé dum lhoq toq rà nghut lhê.

¹⁷ Haù hkûn sheq, ngá myíng mai ji yu é tûngbaù pé eq, myit gyo tô é byù lhunglhang bang gi, Yhumsing Garai lé hô kó rà nghut lhê ga,

¹⁸ a-nham mau htoq xâng hkun mai, shí hkyô pé lé sé nhang é Yhumsing Garai taí ri.*

ga myightoi pé kê tô é dang eq rajung za nghut ri.

¹⁹ Haù mù luí, ngò taí nau é gi, tûngbaù pê chyáng mai Garai Gasang shut lhing lo é bang lé, gotú haí le a lhoq wuí é za,

²⁰ hparà lhó pé lé kyáng byí é a sansêng é zoshuq pé lé le, ashop é đông gungsho zùm yap é hkyô lé le, lingzing mai myhik sat é dusak sho lé le, sui lé zó é hkyô lé le, koi pyám rà matú za, yhangmoq lé, nga-nhúng laiká mai wó shit kat lhê.

²¹ Hkâsu mù gâ le, gó hkûn mai yhang, Mosheq é tarâ lé wà hkangmó má hko kyô lô kômù, Banno buinyi hkangmó tarajong pé má nghap kyo kyo kut bûm kô é nghut lhê." ga taí ri.

Lumjng É Tûngbaù Pê Chyáng Hun Kat É Laiká

²² Haù hkûn, lagyô pé, suwún wuí eq, hpúng byù wuí lhunglhang bang gi, Poluq, Barnaba nhik eq rahá Antioku wà mó shut nhang kat rà byù lé, yhangmoq chyáng mai hkyin yù rà matú chôm myit hpyit akô. Haù eq rajung za, yhangmoq gi, gumang wuí chyáng mã é nhik bô suwún nhik Barsabaq gâ é Yudaq eq Sila lé hkyin yu akô nghut ri.

²³ Yhangnhik é loq má, hun kat kô é laiká gi,

"Antioku wà mó, Suriq mau eq Kiliki mau pé má nyi é, tûngbaù gumang wuí ê, nungmoq é gumang wuí nghut é, ngamoq lagyô pé eq suwún wuí gi, nguínón dang shit kyô kat lhê.

²⁴ Ngamoq nhang kat é le a nghut bang ra-am gi, ngamoq chyáng mai htoq lò mù, nungmoq lé dang eq lhoq byok pyám luí, nungmoq é myit lé lhoq nhúng byí nyi é hkyô lé, ngamoq wó gyo bê.

²⁵ Haù mù, ngamoq lhunglhang bang gi, byù ra-am lé hkyin yù mù,

²⁶ nga-nhúng é Yhumsing Yesuq Hkrisduq é matú, yhumsing asak lé lhang a há é nga-nhúng chyitdap é Barnaba, Poluq nhik eq rahá, nungmoq chyáng nhang kat rà matú chôm myit hui bê.

²⁷ Haù mù luí, ngamoq gi, Yudaq eq Sila lé nhang kat lhê; yhangnhik gi, laiká má bo é eq rajung za, yhangnhik é nhut mai yhang taí kyo kó rà nghut lhê.

²⁸ Nungmoq é matú gi, hparà lhó pé lé tîng byí é zoshuq eq sui, lingzing mai myhik sat é dusak sho eq ashop é đông gungsho zùm yap é hkyô pé lé, koi pyám rà hkyô mai lai luí, gotú wòwùn hún rà hkyô a joq nghù luí, Chyoiyung Woi-nyi le, ngamoq le, myit hui to bê.

²⁹ Nungmoq haù pé lé koi pyám nyi kôjáng gi, gè rà nghut lhê.

* **15:15-16** Dawiq é yhûm gâ é gi, Dawiq eq yhang é awut ashin pé up é hkyô lé gâ é nghut lhê. ✪ **15:18** Amo 9:11-12

Nguingón wángzán nyí kó sháng gaq ô!" ga kâ tô ri.

³⁰ Yhangmoq lé nhang kat kôjáng, yhangmoq gi, Antioku wà mó má gyó jé lô kômù, hpúng byú wui lé ji tsíng to kôluí, haú hún kat é laiká lé ap byí akò nghut ri.

³¹ Hpúng byú wui gi, laiká haú lé ban nghap kôjáng, wum-o byí é danglù hau é yanmai, gabú nyi bum akò.

³² Yudaq eq Sila gi, myiqhtoí nhik le nghut kômù luí, gumang wui lé mungdang myo myò eq lhoq pun lhoq kying kômù, wum-o lhoq gíng to byí akò.

³³ Rayoq zo haú má nyi nyi kô é htâng má, gumang wui gi, yhangmoq lé nhang kat é bâng chyáng, ngui ngui ngón ngón dum tau ló nhâng bekò nghut ri.

³⁴ (Sila kúm gi, yhang ô nau é dông nyi gyó tô ri.)†

³⁵ Poluq eq Barnaba kúm gi, Antioku wà mó má nyi gyó to kômù, Yhumsing Yesuq é mungdang lé, góbang myo myo eq, mhoq kyo hko kyô akò nghut ri.

Poluq Eq Barnaba Nhik Gâng Lhum É Hkyô

³⁶ Hau htâng, buinyi tósmra myáng jáng, Poluq gi, Barnaba lé, "Yhumsing é mungdang hko kyô lai lo wú bê, wà hkyap hkangmó mã é gumang wui chyáng tau lô luí, yhangmoq hkâsu dut nyi é hkyô lé, lô dum kúm wú lo goq." ga tai ri.

³⁷ Barnaba gi, Markuq gâ é Yohan lé le shuí chùng nau ri.

³⁸ Nghut kôlhang, Poluq gi, haú yuq lé a kâm shuí chùng naù nghut ri; hkâsu mù gâ le, yhang gi, Pamhpuli mau má yhangnhik lé tô pyâm to mù, yhangnhik eq rahá muzó a kâm xoq zui nau é sù nghut é yanmai nghut ri.

³⁹ Hau é yanmai, yhangnhik gi, gyai yhang tai shai lhum kômù, rayuq eq rayuq gâng lhum bekò nghut ri. Barnaba gi, Markuq lé shuí chùng luí, hai ji mù Kupru zinlóng shut e lô byuq bê nghut ri.

⁴⁰ Poluq kúm gi, Sila lé hkyin yù mù, gumang wui eq yhang lé Yhumsing Garaí é jeju má ap kat kô é htâng má, yhangnhik gi, htoq e lô byuq bekò.

⁴¹ Haú mù, Poluq gi, Suriq mau eq Kiliki mau mai sô lai lô uchyang, haú mã é noquq hpúng pé lé wum-o lhoq gíng byí wún bê nghut ri.

16

Poluq Eq Sila Nhik Chyáng Timohti Châng É Hkyô

¹ Poluq gi, Derbe wà mó má jé é htâng, Lustra wà mó má dum jé ri. Haú wà mã, Timohti gâ é chángzo rayuq nyi ri. Yhâng nu gi, Yesuq lé lumjíng é Yudaq myiwe myhi nghut ri; yhâng wa kúm gi, Grik amyù nghut ri.

² Timohti gi, Lustra wà mó eq Ikoni wà mó má nyi é gumang wui eq hkya-ôn é hui sù nghut ri.

³ Poluq gi, hkyowuì má yhang lé shuí chùng naù mù luí, ahpyo-kuq hpyit byí ri. Hkâsu mù gâ le, yhâng wa gi, Grik nghut é hkyô lé haú mã é Yudaq byu pé lunglhang bang sé kômù, haú bang lé myit tê byí é yanmai nghut ri.

⁴ Haú mù, yhangmoq gi, rawa htâng rawà mai lai lô uchyang, Yerusalem wà mó mã é lagyo pé eq hpúng suwún wui, chôm myit hpyit tô é hkyô lé, cháng kó sháng gaq ga, yhangmoq lé tai kyô akò.

† 15:34 Bun zo shí lhum gi, Grik Chyúmlaiká myo myo mã a bò nghut lhé.

⁵ Haù mù luí, hpúng byù wùi gi, lumjǎng hkyô má wum-o bo lò kômù, ra-nyí èq ra-nyí byù du myô jat lo nyí ri.

Makedoni Byù Rayuq Lé, Poluq Shing-rán Myang É Hkyô

⁶ Ahkuí, yhangmoq gi, Asia mau má mungdang é hko kyo rá hkyô lé Chyoiyúng Woi-nyí èq yhangmoq lé hkúm pyâm é yanmai, Hprugi mau eq Galatiq mau dông sô lai ló mù,

⁷ Musi mau kyo má jé ló kôjáng, Bihtuni mau shut wang ló rá dà akô; nghut kôlhang, Yesuq é Woi-nyí gi, yhangmoq lé ahkáng a byi nghut ri.

⁸ Haù mù, yhangmoq gi, Musi mau mai sô lai ló luí, Troa myuq má gyó jé ló akô.

⁹ Haù má, myín lé, Poluq gi, Makedoni byù rayuq lé yap to mù, "Makedoni mau shut dap lé luí, ngamoq lé le garúm yù laq." ga luí, yhang lé dung wut nyí é shing-rán myang ri.

¹⁰ Shing-rán haù lé Poluq myang é eq, Makedoni byu pé lé gabú danglù hko kyo rá matú, ngamoq lé Garai Gasang wut yù bê nghut ri nghù myit yù luí, haù hkún yhang, ngamoq gi, Makedoni mau shut dap é rá matú ri ri kut ló bê nghut lhê.

Ludia Gâ É Myiwe Myhí Hpúng Byù Dut Lo É Hkyô

¹¹ Haù mù luí, ngamoq gi, Troa myuq mai Samohtake zinlóng ang ang shut hai ji é mù luí, htang nyí gi, Neapoli wà má jé bê nghut lhê.

¹² Haù mai lai jáng, Makedoni mau má, Romaq byu pé xuq tô é, haù ginwáng mã é ahkyak wà mó nghut é, Hpilipi myuq má ngamoq jé mù, haù má rayoq zo nyí nyí é nghut lhê.

¹³ Bánno buinyi jé jáng, ngamoq gi, kyúdung jowò joq nhô ngam mù, wà hkum shinggan mã é, wuilàng yàm shut htoq é luí, haù má zing to lánq é myiwe wui lé, zung gyó mù nyo hi é nghut lhê.

¹⁴ Haù dang gyo nyí é bang má, Garai Gasang lé noqkuq é, Htuatira myuq byù, pán nê ung zo sú Ludia gâ é myiwe myhí rayuq bo ri; Yhumsing Garai gi, Poluq tai kyô é hkyô lé rago gyô yù sháng gaq ga, yhang lé myit hkum hpóng byí ri.

¹⁵ Yhang gi, yhang eq yhâng yhumbyù wui wui-myhup ban hkâm yù kôjáng, "Nungmoq gi, ngo lé haù Yhumsing Yesuq má lumjǎng bê sú nghut é dông, myit yù byi kô é nghut jáng, ngá yhùm má lé bíng keq." ga luí, ngamoq lé zuq zuq ji yu ri.

Poluq Eq Sila Nhik Htóng Lúng É Hkyô

¹⁶ Ra-nyí lé, ngamoq gi, haù kyúdung é jowò shut e ló nyí le, nat wang júng luí gumhpân hpan é jùnmyhí rayuq ngamoq lé lhom huí ri. Haù yuq gi, gumhpân hpan é dông yhâng yhumsing wui lé ngunzê gyai yhang hô byí é sú nghut lhê.

¹⁷ Myiwe haù gi, Poluq eq ngamoq htáng má châng to mù, "Shí bang gi, nungmoq lé hkyi yù hkyô tai kyô wún é, Myhang Htáng é Garai Gasang é dui-nhâng zoshâng wui nghut bum akô ô!" ga wut garú ri.

¹⁸ Buinyi myo myo haù su chyat châng garú wún é yanmai, Poluq gi, gyai yhang myit hpêbu byuq mù, lhing wú kat luí, nat haù lé, "Yesuq Hkrisduq é mying lang luí ngò nang lé hkunmó hkyô kat lhê, yhâng chyáng mai htoq ló byuq aq." ga luí, nat haù lé, nhik-yô kat ri. Haù hkún jáng, nat haù gi, yhâng chyáng mai htoq ló byuq bê nghut ri.

19 Ahkuí, myiwe hau é yhumsing wui gi, ngunzè myàng zo rã myoqbyù jowò a joq lo é hkyó lé sé kôjáng, Poluq eq Sila nhik lé chyup yù mù, gai má é suwún wui chyáng she hkyut e akò.

20 Dum, yhangmoq gi, yhangnhik lé tarã agyi pè chyáng shuí ê mù, "Shí nhik gi, Yudaq byù nghut mù luí, ngamoq Romaq byu pé mai a ge châng é htunghking lé mhoqshit byí nyi é dông,

21 nga-nhúng é myuq lé gunjáng nyi akò nghut ri." ga taí akò.

22 Haú mù luí, shiwa byu pé gi, yhangnhik lé chòm htím akò. Tarã agyi pé gi, yhangnhik é mebu lé lãng hkyut pyám luí, wumchùm hkat èq bat rã matú, hkunmó hkyô kat akò.

23 Yhangmoq gi, yhangnhik lé gyai yhang nhuq bat yu é htàng, htong má lhung kat mù, rago za wú zúng rã matú htóng suwún lé hkunmó hkyô tô akò.

24 Htóng suwún hpó gi, haú sũ é hkunmó lé wó jáng, yhangnhik lé hkyí kyum hut luí, htóng mã é, je ahtè gok má lhung tô ri.

Htóng Suwún Hpó Hkyi Yù Huí É Hkyô

25 Nghut kôlhang, gunggãm yoq lé, Poluq eq Sila nhik gi, kyùdung luí, Garai Gasang lé mahkôn hkya-ôn nyi kô é hkùn, htóng byù góbang gi, yhangnhik é htè lé chòm gyô nyi bum akò.

26 Haú hkùn, byodàn ratung layàng mó nún lô mù htóng yhùm gón le nún lô luí, hkum pé banshoq le radã dãm bóng hã lo bum ri; dum nghut jáng, yuq hkanmó mã é toqjàng tui pé le gyut gyô byuq bê nghut ri.

27 Htóng suwún hpó gi, yhap bún lò mù, htóng hkum pé bóng hã tô bum é lé myang kat jáng, htóng byu pé ban hpang byuq bùm bekô rá nghut lhé ga myit yù luí, shãm shé mù, yhànggùng yhang sat shí rã dã ri.

28 Nghut kôlhang, Poluq gi, "Ê, náng gùng yhang náng haú su hkâkut, ngamoq banshoq shí má nyi tô lhé." ga luí, htè mó èq wut garu taí kat ri.

29 Haú hkùn, yhang gi, duq é myibung lé dúng yù mù, ahkaú shut din wang ló luí, Poluq eq Sila nhik é hí má gyuq nán é eq ngóm gop tô ri.

30 Hau htàng, yhang gi, yhangnhik lé shuí htoq yù luí, "Sarã nhik ê, ngò hkyi yu é hui rã matú, haí kut ra rã lú?" ga myi kat ri.

31 Haú hkùn, yhangnhik gi, "Yhumsing Yesuq lé lumjáng jáng, nàng eq náng yhumbyù lhunglhang bang hkyi yu é hui rã nghut lhé." ga taí akò.

32 Hau htàng, yhangnhik gi, haú htóng suwún hpó eq yhàng yhumbyù lhunglhang lé, Yhumsing é mungdang hko kyô akò.

33 Haú myín haú u lé yhang, htóng suwún hpó gi, yhangnhik lé shuí ê mù, yhangnhik é dãm pé lé tsing chí pyám byi luí, haú htàng, yhang eq yhàng yhumbyù banshoq bang wui-myhup hkâm yù bekô nghut ri.

34 Hau htàng, yhang gi, yhangnhik lé, yhàng é yhùmhkaú mã shuí wang ló mù, zoshuq hkanq byí ri. Yhang eq yhàng yhumbyù banshoq bang gi, Garai Gasang lé wó lumjáng bekô nghut é yanmai, gyai gabú nyi bum akò nghut ri.

Haq Nhang Pyám Rã Lé A Dông É Hkyô

35 Ahkuí, maubó jáng, tarã agyi wui gi, "Haú nhik lé nhang pyám aq." ga, htóng suwún hpó chyáng pyata pé lé taí nhang kat akò.

36 Haú hkùn, htóng suwún hpó gi, "Nungnhik lé nhang pyám aq ga, tarã agyi wui mai byù nhang kat ri; haú mù, ahkuí, nungnhik gi, ngón za htoq ló lo keq." ga luí, Poluq lé taí ri.

³⁷ Poluq kúm gi, "Nga-nhik gi, Romaq mingdán byû sheq ru nghut le wa, myî gôn wú é hkyô le a bo é, byu pê hí má ngá-nhik lé nhuq bat mù, htóng má hkyô kat kôluí nhîng, ahkuí tsik za haq nhang pyám rà dâ akô nhung lhi? A wó dut, yhangmoq yhang sheq lé shuí htoq yû kó sháng gaq." ga luí, yhangmoq lé tú tai kat ri.

³⁸ Pyata pé gi, tarâ agyi wui lé dang haú pé ló tai kyo kôjáng, tarâ agyi wui gi, Poluq eq Sila nhik Romaq mingdán byû nghut é hkyô lé wó gyo kôjáng, gyô gyuq kôluí,

³⁹ yhangmoq yhang, yhangnhik chyáng lé mù, tóngbán luí, shuí htoq yû mù, wà haú mai htoq ló byuq rà matú chôm dúng akô.

⁴⁰ Haú mù, Poluq eq Sila nhik gi, htóng mai htoq ló é htâng, Ludia é yhùm má wang ló akô; haú má, gumang wui eq le hui kômù, yhangmoq lé wum-o byi luí, htoq ló bekô nghut ri.

17

Htesaloni Wà Mó Má Mungdang Hko Kyô É Hkyô

¹ Hau htâng, yhangmoq gi, Amhpipoli wà mó eq Apolon wà mó mai sô lai ló mù, Htesaloni wà mó má jé akô. Haú wà má gi, Yudaq byu pé é tarajong ralhùm joq ri.

² Poluq gi, yhang lhaq kut nyi é eq rajung za, tarajong má wàng luí, Bánno buinyi sum nyi yhang, Chyúmdang má bo é eq séng mù, yhangmoq eq chôm ming lhum uchyang,

³ Hkrisduq wuihke jamjau hui mù, shí bê mai dum dui toq lô rà hkyô lé tai hkoq san kyo luí, "Nungmoq lé, ngò hko kyô nyi é haú Yesuq gi, Hkrisduq nghut lhê." ga tai ri.

⁴ Yudaq byu pé mâ é ra-am gi, gyô jing kômù, Poluq eq Sila nhik chyáng lé xoq yu akô; haú eq rajung za, Garai Gasang lé hkunggá é Grik pé myo myo eq, ahkyak é myiwe wui tsómra myo shoq le, gyô jing kômù, lé xoq yu akô.

⁵ Nghut kôlhang, a gyô jing é Yudaq byu pé gi, manôn kôluí, gai mâ é byùgang jùm ra-am lé lung yû mù, byù moq mó tsing yû luí, rawa é shuí gabyong kômù, shiwa byu pé é hí má Poluq eq Sila nhik lé wó shuí htoq shit shoq ga, Yason é yhùm má htim e ló akô.

⁶ Nghut kôlhang, yhangnhik lé a myàng kôjáng, yhangmoq gi, Yason eq gumang wui ra-am lé, yhangmoq é wà suwún wui chyáng lêng she é kômù, "Mingkan gón lé atau ahú kut é byù shí nhik, ahkuí shí má jé jáng, Yason gi, yhang é yhùm má lhom hkulum yu ri.

⁷ Yhangmoq lhunglhang bang gi, Yesuq gâ é hkohkâm góyuq nyi lhê ga kôluí, hkoséng Kehtaq é tarâ lé lhoq shai é dông kut é bang nghut akô." ga tai garú bum akô.

⁸ Shiwa byu pé eq wà suwún wui gi, dang haú lé wó gyo kôjáng, myit wui myit hke dut nyi bum akô.

⁹ Hau htâng, yhangmoq gi, manghkáng a lhoq htoq rà matú Yason eq góbang lé danggidiq zè byi nhâng mù, nhang pyám bekô nghut ri.

Beria Wà Mó Bang, Mungdang Lé Lhom Yu É Hkyô

¹⁰ Haú myin jáng yhang, gumang wui gi, Poluq eq Sila nhik lé Beria wà mó shut nhang kat akô; yhangnhik gi, haú wà má jé jáng, Yudaq byu pé é tarajong má wang ló akô nghut ri.

¹¹ Haû Beria wà mó byu pé gi, Htesaloni wà mó byu pé htoq má je riyhang nhik bo bum akô; haû mù, danglù haû lé gyai ô nau é myit èq hap yù mù, danglù shî teng a têng é hkyô lé wó sé shoq ga, nyí wuî Chyúmdang lé chôm nghap wú nyí akô nghut ri.

¹² Haû mù luí, Yudaq byu pé myo myo gi, lumjínq bum akô, haû eq rajung za, aróng wó é Grik myiwe wuî eq yuqgè wuî myo myo le, lumjínq búm bekô nghut ri.

¹³ Poluq gi, Beria wà mó má le, Garai Gasâng é mungdang hko kyô nyí é hkyô lé, Htesaloni wà mó má é Yudaq byu pé sé kôjáng, yhangmoq gi, haû má lé kômù, wà byù wuî lé mhoq hpyoq luí, gabyông lò nhang akô.

¹⁴ Haú hkùn, gumang wuî gi, Poluq lé wuimau yàm jé shoq, radá dâm dé kat akô; nghut kôhang, Sila eq Timohti nhik gi, Beria wà mó má nyí gyó tô akô nghut ri.

¹⁵ Poluq lé châng dé é bang gi, Ahten myuq jé shoq lé dé to kômù, Sila eq Timohti nhik lé hân hân châng lò rá matú pying kat é dang lé wun chûng mù, dum taú lò bekô nghut ri.

Poluq, Ahten Myuq Má Nyí É U Lhé Hkyô

¹⁶ Ahkuí, Poluq gi, Ahten myuq má haú nhik lé lánq nyí tô é u lé, haú wá má rawa é hparà lhô baú dut tô é lé myàng mù luí, yhâng i-myit gyai yhang a ngón dut byuq ri.

¹⁷ Hau é yanmai, yhang gi, tarajong pé má Yudaq byu pé eq Garai Gasang lé gyuq hkunggá é Grik pé eq le, gai pé má hui mihui bang eq le, nyí wuî taí sán kyô lhúm nyí akô nghut ri.

¹⁸ Haû mù luí, Epikuri hpaqchyí eq Sto-i hpaqchyí* lé sê é, myit wú hpaqchyí bo é bang ra-am gi, yhang eq dang chyin chyin lhúm akô; haú hkùn, yhang gi, Yesuq é hkyô eq dum dui toq hkyo é gabú danglù lé hko kyô é yanmai, ra-am gi, "Byù pyok shí yuq gi, haí wá taí nyí lhê lhú?" ga; ra-am gi, "Góming hparà pé é hkyô lé taí kyo sù nghut sam ri." ga, taí bum akô nghut ri.

¹⁹ Hau htâng, yhangmoq gi, Aripagu gâ é byìn tú wap shut Poluq lé shuí doq lò mù, "Nang mhoqshit é hkyô asik, ngamoq lé sé nhang le a gè lhú?"

²⁰ Nang èq taí é maú nhô za gâ é hkyô lé ngamoq wó gyô ri; haú é dang kyíng lé ngamoq sé nau ri." ga taí bum akô.

²¹ (Ahten byu pé eq haú má nyí é góming byu pé lhunglhâng bang gi, dang sik lù sik haú lé taí kún gyô kún mù, yhangmoq é ahkyíng lé lhoq pán nyí bum akô nghut ri.)

Poluq, Aripagu Zuphpong Má Mungdang Hko É Hkyô

²² Haú u lé, Poluq gi, Aripagu zuphpong má toq yap mù, "Ahten byu pé è, nungmoq gi, hkyô hkat hkanqmó má hparà lhô pé lé gyai yhang dat gyuq hkungga kô é lé, ngò myang ri.

²³ Hkâsu mù gâ le, ngò sô lhing wún mù nungmoq jaú é ze pé lé rago wú wú lé, 'A sê é Garaí matú.', ga luí, kâ tô é hkungga gyap ralhum lé myang záng ri; haú nungmoq a sê é za jaú nyí é Garaí hkyô lé, ngò, nungmoq lé hkaí kyo kólé.

* **17:18** Epikuri hpaqchyí gi, htang pyat a joq, ahkuí ngón yù rá za ahkyak gâ é nghut lhê. Sto-i hpaqchyí gi, haí wá dut kôhang i-myit zim za kut mù, htang pyat matú chiq a ra gâ é nghut lhê.

²⁴ Myidàm htoq eq haú má joq mijoq lé hpan tô é Garai Gasang gi, mauhkúng eq myigùng é Yhumsing le nghut lê mù luí, byu loq eq saí é noqkuq yhúm má nyí rà a nghut.

²⁵ Yhang gi, byù lhunghàng bang lé asak, soq, ra mira gumjup shoq byí to sù nghut nyi é yanmai, rajung jung rà é sù lé su, byu loq eq dojaú rà sù a nghut.

²⁶ Yhang gi, gunchyung rayuq mai za byuhú chângiup myô lò nhâng mù, myidàm htoq jàm shoq má nyí nhâng luí, yhangmoq é matú hí hí mai ahkýing yam-yoq eq nyí rà jowò masat to byi bê nghut ri.

²⁷ Yhang gi, nga-nhúng yuq hkanmó eq a we to kôle, byu pé yhang lé châng hò mù, myang hô kó sháng gaq ga shí hkyô lé kut é nghut ri.

²⁸ Hkâsu mù gà le, nungmoq é jihkyang kat bang, 'Nga-nhúng le yhâng é awut ashín pé nghut nyi lê.' ga taí tô bum é eq rajung za, nga-nhúng gi, Yhang é yanmai wó nyí, wó dui é eq ísu wó dut é nghut lê.

²⁹ Haú mù, nga-nhúng gi, Garai Gasang é yhangzô pé nghut nyi é yanmai, Garaí gùng gi, byu é hpaqchyí loq eq kyúng kâ tô é hng, ngùn, luqgok pé eq púng lê nghú luí hkâ-myt yù kó.

³⁰ Laí lò bê haú myoq a bóng shi é pyat lé, Garai Gasang gi, haí le a ga lhai pyám to kôhang, ahkuí gi, jowò hkanmó má é byù lhunghàng bang lé, myit lhung keq ga hkunmó hkyô to bê nghut ri.

³¹ Hkâsu mù gà le, Yhang hkyin to sù mai mingkan gón lé tara é đông jéyáng rà buinyi ra-nyí masat to bê nghut ri. Shí hkyô lé, byù lhunghàng bâng é hí má wó lum é saksé dut sháng gaq ga, Yhang haú yuq lé shi é mai lhoq dui toq yú bê nghut ri." ga taí ri.

³² Shí é mai dum dui toq lo é hkyô lé wó gyô bùm kôjáng, ra-am gi, taí hpoi pyám byí akô; ra-am kúm gi, "Nàng shí hkyô taí é lé ngamoq dum gyô wú nau ashí." ga taí akô.

³³ Hau htâng, Poluq gi, haú zuphpong mai htoq ló byuq bê nghut ri.

³⁴ Nghut kôhang, byù ra-am gi, Poluq é htâng cháng kômù, lumjúng bang dut bekô nghut ri. Haú bang má, Aripagu zuphpong má bo é Dionisi ga sù le bo ri. Hau htoq agó, Damari gà é myiwe rayuq eq gotú byu pé le, bo bum akô nghut ri.

18

Poluq, Korinhtuq Myuq Má Nyi É U Lê Hkyô

¹ Hau htâng má, Poluq gi, Ahten myuq mai htoq luí, Korinhtuq myuq má jé lo ri.

² Haú má, yhang gi, Romaq myuq mai Yudaq byù lhunghàng bang htoq ló byuq rà dut lê ga, hkohkâm Klodí eq hkunmó hkyô é yanmai, a myáng shi lé Itali ming mai yhangmyi Priskila eq htoq jé lo é, Pontuq mau byù nghut é, Akula gà é Yudaq byù rayuq lé hui luí, yhangnhik chyáng è ri.

³ Yhangmoq gi, jonghpang saí zo bang chyat nghut kô é yanmai, muzó púng kôluí, Poluq gi, yhangnhik eq rahá nyi nyi mù, muzó chôm saí akô.

⁴ Bánno buinyi hkanmó, Poluq gi, tarajong má Yudaq byù eq, Grik pé lé, taí sán kyo luí, lhoq pun lhoq kyíng yu ri.

⁵ Ahkuí, Sila eq Timohti nhik Makedoni mau mai châng jé jáng, Poluq gi, mungdang hkô hkyô má za wum kat luí, haú Yesuq gi, Hkrisduq yhang nghut lê ga, Yudaq byu pé lé saksé hkâm kyô ri.

⁶ Nghut kôlhang, Yudaq byu pé gi, lhom he-ngik pyám kômù, yang lé rhoi dang tai pyám akô; haù mù, Poluq gi, yhang mebu ko shit é đông yangmoq lé a nau é hkyô tân shit uchyang, "Nungmoq é sui mara gi, nungmoq é ulhum má jé sháng gaq, ngò eq haì a séng lo; ahkuì mai, ngò gi, tungbaù pé chyáng e ló berá nghut lhê." ga luì, yangmoq lé tai ri.

⁷ Hau htàng, yang gi, tarajong mai htoq luì, jong haù eq yhep nghut é, Garai Gasang lé noqkuq é Titu Yustu ga su é yhùm má wang ló ri.

⁸ Krispu gá é tarajong má up sù gi, yhang yhumbyù lhunglhang bang eq rahá, Yhumsing lé lumjing akô. Korinhtuq myuq byu pé myo myo le, Poluq é dang lé gyô yù mù, lumjing luì, wui-myhup hkâm yu bum akô nghut ri.

⁹ Ra-myìn lé, shing-rán ralhùm má Yhumsing mai Poluq lé tai é gi, "Hkâgyuq, tai aq, zim za hkâ-nyì.

¹⁰ Ngò nàng eq rahá nghut nyi lhê, nàng lé ó yuq èq le haì wó kut rá a nghut, hkâsu mù gâ le, myuq shí má, ngá é byù mò myo nyi bum lhê." gâ ri.

¹¹ Haù mù luì, Poluq gi, Garai Gasang é mungdang mhoqshit uchyang, razàn eq lhamó hkyuq hkyap yang, haù myuq má nyi nyi ri.

¹² Galio ga sù, Ahkaia mau má é ginwáng zau kut nyi é u lé, Yudaq byu pé gi, myit rahkat zâ èq Poluq lé chòm chyup yù kôluì, tará hpyit wap má she háng kômù,

¹³ "Byù shí yuq gi, jep é tará eq shai lhum é đông, Garai Gasang lé noqkuq rá matù, byu pé lé mhoq hpyoq wún ri." ga mara hùn akô.

¹⁴ Haù hkùn, Poluq tũ tai rá dâ lò jáng, Galio gi, Yudaq byu pé lé, "Yudaq byu pé ê, muzó shí gi, tará lu lai é muzó, haù a nghut jáng, agè ashop é muzó mai, dut lo é nghut le gi, nungmoq lé ngò gyo byi rá hkyô joq lhê.

¹⁵ Nghut kôlhang, muzó shí gi, nungmoq é tará eq séng luì, dang eq séng luì, mying eq séng luì, tai lhum kô é hkyô nghut é yanmai, nungmoq yang ru ló hpyit lhum keq. Haù sù é muzó má, ngò gi, tará agyi kut byi rá a nghut." ga tai mù,

¹⁶ tará hpyit wap mai yangmoq lé hkat htoq pyám nhang ri.

¹⁷ Haù hkùn, yangmoq lhunglhang bang gi, tarajong má up sù Sositeni lé chyup yù mù, tará hpyit wap hí má chòm bat akô. Galio kúm gi, haù hkyô lé hai gùn a kut byi nghut ri.

Poluq, Antioku Wà Mó Má Dum Tai Jé É hkyô

¹⁸ Poluq gi, Korinhtuq myuq má buinyi tsómra myáng shoq lumjing bang eq nyi nyi ri. Hau htàng, yang gi, haù bang lé shi-kyâm to luì, Priskila eq Akula nhik lé byinzùm kut mù, lhai ji luì Suriq mau shut e ló akô. Hau hí má, yang gi, danggidiq tô tô é yanmai, Kenhkrea wà má xâm nyhâm pyám ri.*

¹⁹ Yangmoq Ehpesu myuq má jé kô é hkùn, Poluq gi, Priskila eq Akula nhik lé nyhi pyâm to luì, yang baù tarajong má wàng mù, Yudaq byu pé lé tai sân kyo byi ri.

²⁰ Haù má é bang gi, yangmoq eq rahá rayoq zo nyi shi rá đông yang lé dung kô é nghut kôlhang, yang gi, a nhò lo nghut ri.

²¹ Haù mù, yang gi, Ehpesu myuq mai lhai ji mù htoq ló uchyang, "Garai Gasang ô nau é hkyô nghut le gi, ngò nungmoq chyáng dum jé lé rá nghut lhê." ga, yangmoq lé danggidiq byi tô ri.

* **18:18** Xâm nyhâm pyám é gi, Yudaq htung đông rajung jung kut rá matù danggidiq to luì, haù lé ban kut jáng, yhumsing xâm lé nyhâm pyám é nghut lhê.

²² Ahkuí, Poluq gi, Kesare wà mó má ló jé dap jáng, Yerusalem wà mó shut doq ló mù, noqkuq hpúng lé ló huí tó é htâng, Antioku wà mó má dum gyó ló ri.

²³ Yhang gi, haú wà má rayoq zo nyi é htâng, htoq ló mù, Galatiq mau eq Hprugi mau mai sô lai ló uchyang, rawa htâng rawa má é chángzô pé lé wum-o lhoq ging byí ri.

Apolo Zui Saí É Muzó

²⁴ Ahkuí, Alesandru myuq byù nghut é sù, Apolo gá é Yudaq byù rayuq gi, Ehpesu myuq má jé lé ri. Yhang gi, hpaqchyí bò sù nghut é htoq agó, Chyúmdang le gyai kúng é sù nghut ri.

²⁵ Yhang gi, Yohan é baptisma hkyô lé za sé sù nghut kôlháng, Yhumsing é hkyô lé mhoq yú bê nghut luí, Yesuq é hkyô pé lé mhoq yu to bê eq rajung za wum zuq tung ga luí, hkyak hkyak mhoqshit byí ri.

²⁶ Ahkuí, yhang gi, gyuq kyúm myit a bó é za tarajong má taí hi ló ri. Haú hkún, Priskila eq Akula nhik gi, haú lé wó gyo kôjáng, yhang lé ji yú mù, Garai Gasâng é mungdang hkyô lé azó tung taí sân kyo byí akò nghut ri.

²⁷ Apolo gi, Ahkaia mau shut dap e ló nau é hkún, gumang wuè gi, yhang lé wum saí byi mù, yhang lé lhom hkúlum yú rà matú, chángzô pé chyáng laiká ká byí kat akò; yhang gi, jé jáng, Garai Gasâng jeju mai lumjúng bê bang lé, gyai yhang wó garúm sù dut bê nghut ri.

²⁸ Hkâsu mù gá le, yhang mai, Yesuq gi, Hkrisduq yhang nghut nyi ri ga luí Chyúmdang má tún shit uchyang, byu pé hí má Yudaq byu pé lé, wum kat wó taí ung pyám é yanmai nghut ri.

19

Poluq, Ehpesu Myuq Má Nyi U Lhé Hkyô

¹ Ahkuí, Apolo gi, Korinhtuq myuq má nyi tó é hkún, Poluq gi, mau káng mai sô lai ló mù, Ehpesu myuq má jé ri. Haú má, yhang gi, chángzô pé ra-am eq huí luí,

² yhangmoq lé, "Nungmoq gi, lumjúng é hkún, Chyoiyúng Woi-nyí lé, wó yú bekò lhú?" ga myí ri.

Haú hkún, yhangmoq gi, "Chyoiyúng Woi-nyí nyi lhé gá é lháng, ngamoq a wó gyô wú." ga tú taí akò.

³ Haú mù, Poluq gi, "Haú nghut jáng, nungmoq gi, hai jung baptisma hkam yú kô é lhú?" ga luí, yhangmoq lé myí jáng, yhangmoq gi, "Yohan é baptisma hkam yu é nghut lhé." ga tú taí akò.

⁴ Haú hkún, Poluq gi, "Yohan é baptisma nghu é gi, myit lhing mù wui-myhup hkâm yu é hkyô lé gá lhé. Yohan gi, yhang é htâng má jé lé rà sù, haú Yesuq lé sheq lumjúng rà lhé ga shiwa byu pé lé taí ri." ga taí ri.

⁵ Yhangmoq gi, dang haú lé wó gyo kôjáng, Yesuq é mying lang luí baptisma byí é lé, hkam yu bum akò.

⁶ Poluq gi, yhangmoq é htoq má loq ke byi jáng, haú Chyoiyúng Woi-nyí gi, yhangmoq htoq má jé lé mù, yhangmoq gi, laklai dang nyo lo é htoq agó myiqhtoi le htoi lo bum akò.

⁷ Haú bang lhunglháng gi, yuqgè raxe í yuq kó nghut ri.

⁸ Hau htâng, Poluq gi, tarajong má wàng luí, gyuq kyúm myit a bó é za lhamó sum hkyap Garai Gasâng é mingdán hkyô lé taí sân kyo mù, lhoq pun lhoq kyíng yu ri.

⁹ Nghut kôlhang, ra-am gi, myit htan lo bùm kôluí a kâm lumjǐng kô é htoq agó, haú Yhumsing é Hkyô lé byu pé hí má lhoq hpoi pyám byi kôjáng, Poluq gi, yhangmoq chyáng mai htoq luí, chángzô pé lé shuí chùng mù, Turanu gá su é hpaqchyí mhoq jong má, nyí wuí tai sân kyô lhum nyi akô.

¹⁰ Haú su kut í zân yhang mhoqshit nyi é yanmai, Asia mau gón mã é Yudaq byu pé eq Grik pé lhunglhang bang gi, Yhumsing é mungdang lé wó gyô yu bum akô nghut ri.

Skewa É Yhangzo Nyhit Yuq É Hkyô

¹¹ Garai Gasang gi, Poluq é loq dǒng laklai kumlhá kut ri.

¹² Haú mù, Poluq chyáng mã é hpajet eq hpyihit rajung jung lé, nò bǎng chyáng yu ló mù, ló záng byi jǎng lhang, yhangmoq é nòhpyo ge ló byuq é eq, agè ashop é nat pé lé yhangmoq chyáng mai htoq ló byuq bum akô.

¹³ Haú u lé, nat hkat htoq wun é Yudaq byu pé ra-am gi, agè ashop é nat pé lé, "Poluq hko tai é Yesuq é myǐng mai, ngò, nungmoq lé hkat htoq lhê." ga, agè ashop é nat wang jǔng to bǎng é ahtoq má, Yhumsing Yesuq é myǐng lé lang luí, hkat chyam wú akô.

¹⁴ Skewa gá é, Yudaq hkyangjong agyi rayuq é yuqzo nyhit yuq le haú su kut wun akô.

¹⁵ Ra-nyí lé, agè ashop é nat gi, yhangmoq lé, "Yesuq lé ngò sê lhê; Poluq é hkyô lé le ngò sê lhê; nghut kôlhang, nungmoq gi, ó pé nghut akô?" ga tú tai mù,

¹⁶ agè ashop é nat haú wang jǔng é byú gi, yhangmoq htoq má byam doq jǐ to luí, nhuq bat yú mù yhangmoq lé ung pyám ri. Yhangmoq gi, yhúm haú mai gǔngchín sui nê yang yang hpang htoq ló bekô nghut ri.

¹⁷ Haú hkyô lé, Ehpesu myuq má nyi é Yudaq byu pé eq Grik pé sé kôjáng, yhangmoq lhunglhang bang gi, chòm gyô gyuq bum akô. Yhumsing Yesuq é myǐng gi, hkya-on lhoq toq é hui bê nghut ri.

¹⁸ Lumjǐng bê bang myo myo gi, lé mù, yhumsing kut shut é agè ashop hkyô lé, myo myô hí má yín yu akô.

¹⁹ Myoqheq hpaqchyí kut zô é bang le, yhangmoq é laiká lé yu lé kôluí, shiwa byu pé hí má nyhê hkyô pyám akô. Mausau haú pé é ahpau lé sôn wú le, ngùn chap ngo mun záng ri.

²⁰ Haú dǒng mai, haú Yhumsing é mungdang gi, ko lam lò mù, wum-o a-tsam je bo lò bê nghut ri.

Ehpesu Myuq Má Gabyông É Hkyô

²¹ Shí pé ban dut lai htàng mã, Poluq gi, Makedoni mau eq Ahkaia mau dǒng sô lai ló mù, Yerusalem wà mó má ló jé rǎ ga myit hpyit yú luí, "Haú má ló jé tó é htàng mã, ngò, Romaq myuq má le, jé wú rǎ dut ashí." ga tai ri.

²² Haú mù, yhang lé htugbang garúm é Timohti eq Erastu nhik lé hí Makedoni mau shut nhang kat luí, yhang gi, Asia mau má rayoq rabun zo nyi gyô tô ri.

²³ Haú yoq lé, haú Yhumsing é Hkyô yanmai gai yhang gabyông lo bum akô.

²⁴ Demetri gá é ngùn bat zo sù rayuq gi, Artemi hpara é ngùn yhúm zǒng zo sai luí, mú sai luzúm wuí lé wó sùt nhang nyi ri.

²⁵ Yhang gi, yhang é ngùn bat zo luzúm wuí eq haú jung amú kut é góbang lé le jǐ tsǐng to mù, tai é gi, "Luzúm wuí ê, muzó shí lhum é yanmai, nga-nhung nyi gón yuqyo nyi é hkyô lé, nungmoq sé lhê.

²⁶ Nghut kôle, ahkuí gi, Ehpesu myuq má za le a nghut lo, Asia mau lhang aluq jam shoq, byu loq eq sai é zé lé, garaí pé a nghut ga, shí Poluq ga sú mai byù myo myo lé mhoq hpyoq yù mù, hkyô shuí lhoq nghoq nyi é hkyô lé, nungmoq wó myâng, wó gyô nyi akô.

²⁷ Haù mù luí, nga-nhung é muzó shí gi, hpoi byuq râ lé chiq râ é za a nghut, hparà myhí mó Artemi é noqkuq yhum gi, hai a dut byuq luí, Asia mau gón eq mingkan gón mai noq é hparà myhí é shingkan hpoi byuq râ lé le myit chiq râ dut bê." gà ri.

²⁸ Yhangmoq gi, dang haù lé wó gyô bùm kôjáng, nhik mó gyô yo kôluí, "Ehpesu myuq byu pé é Artemi gi, kô nyi sháng gaq ô!" ga chôm garú bum akô.

²⁹ Hkâ-myháng a nghut má, rawa bang gabyông lò bekô. Shiwa byu pé gi, Poluq é byinzùm Makedoni byù Ge-u eq Aristakuq nhik lé chyup she yù mù, yhangmoq é poi wàng mó shut radá dâm chyin chyap wang ló bum akô.

³⁰ Poluq gi, moq hpúng hau hí má htoq shit naù kôlhang, chángzô pé gi, yhang lé a wàng nhâng kô nghut ri.

³¹ Poluq é luzùm wui nghut é, haù mau má é suwún wui ra-am lhang, yhang lé poi wàng hkaù má a ê râ matú, hkùm pyám nhang akô nghut ri.

³² Zing tô é bang gi, hai hù háng le a sé lo dut byuq kômù luí, ra-am rajung ga garú bum akô. Myo mi-myo gi, hai mù luí yhangmoq haù má nyi tô é lé lhang a sê bùm kô nghut ri.

³³ Yudaq byu pé gi, Alesander lé hí má chôm chyun htoq kat kôluí, shiwa hpong mai ra-am gi, yhang hká đông taí râ hkyô lé mhoq byi kat akô. Alesander le shiwa hpong lé taí san kyo naù luí, zim byuq râ matú loq tu ri.

³⁴ Nghut kôlhang, Alesander, Yudaq byù nghut é lé sé kôjáng, yhangmoq lunglhang bang gi, rahtê za kut kôluí, "Ehpesu myuq byu pé é Artemi gi, kô nyi sháng gaq ô!" ga hkying hkum í hkum kô garú bum akô.

³⁵ Haù, myuq chyare hpó gi, shiwa moq mó lé lhoq zim luí taí é gi, "Ehpesu myuq byu pé é, Ehpesu myuq shí gi, Artemi myhí mó é noqkuq yhum eq mauhkung mai byit gyô lo é yhang é alhó lé, wú zung nyi é wà nghut é hkyô lé, mingkan má a sê é ó yuq wa nyi lê lú?"

³⁶ Haù mù luí, shí hkyô pé gi, wó he pyâm jung a nghut é yanmai, zim za nyi le ge lê, hân so hân dùn hkakut ko.

³⁷ Shí nhik gi, noqkuq yhum lé hpyoq zo su nhik le a nghut, nga-nhung é hparà myhí lé lhoq hpoi su nhik le a nghut kô é le nhing, nungmoq shuí lé bekô nghut ri.

³⁸ Demetri eq yhang é ngùn bat zo luzùm wui gi, rayuq yuq é ahtoq má mara hùn râ hkyô joq kô é nghut jáng, tarâ rùng pé hpông tô lê. Tarâ agyi pé nyi lê. Haù má yhangmoq é kô sháng gaq.

³⁹ Nungmoq taí nau é gó hkyô rajung jung joq é nghut le kúm gi, tarâ wang zuppong mó má chôm taí pyám râ nghut lê.

⁴⁰ Hkù-nyí gabyông é mù shí má, mù htoq wang a bo é yanmai, nga-nhung lé mara hùn râ chiq râ ri. Shí su kut chôm ming é hkyô lé, hai é yanmai nghut lê nghú, nga-nhung a wó taí kyo nghut ri." gà ri.

⁴¹ Shí pé ban taí é htâng má, yhang gi, shiwa moq mó lé lhoq pyo kat bê nghut ri.

20

Makedoni Mau Éq Grik Mau Đông Lai Lô É U Lhê Hkyô

¹ Haú gabyông é hkyô zím byuq é htâng má, Poluq gi, chángzô pé lé ji yù luí, yhangmoq lé wum byi dang taí to mù, shi-kyâm to luí, Makedoni mau shut htoq e lô bê nghut ri.

² Yhang gi, haú mau mai sô lai lô uchyang, byu pé lé wum byí é dang myo myo taí luí, Grik mau má lô jé bê.

³ Yhang haú má lhamó sum hkyap nyi yù mù, lhai ji luí Suriq mau shut é râ hen nyi é hkûn, Yudaq byu pé gi, yhang lé gyám nyí kô é yanmai, yhang gi, Makedoni mau đông tau lò râ lé myit hpyit bê nghut ri.

⁴ Yhang eq rabyìn za châng é bang gi, Beria và mó mã é Purû yhangzo Sopata, Htesaloni và mó mã é Aristakuq eq Sekundu nhik, Derbe và mó mã é Ge-u, Timohti, Asia mau mã é Tuhkiku eq Trohpimu nhik pé nghut akô.

⁵ Yhangmoq gi, hí sô láng luí, ngá-nhik lé Troa myuq má lô láng nyi akô.

⁶ Nghut kôlhang, ngá-nhik gi, Azuma Poí* lai é htâng má, Hpilipi và mó mai lhai ji lô le, ngo nyí nghû jáng, Troa myuq má yhangmoq lé hui luí, haú má nyhit nyí chôm nyi é nghut lhê.

Troa Và Mã, Utuhku Ga Sû Lhoq Tui Toq Hui É Hkyô

⁷ Rabat é sâng-hi nyí lé, ngamoq gi, muk hpê gâm rá matú lé chôm zup zing tô é hkûn, Poluq gi, htang nyí lô byuq râ ga hen tô é yanmai, chángzô pé lé gunggâm jé shoq hko kyô nyi ri.

⁸ Ngamoq zup zing nyi é haú ahtoq pyâm wap má, myibung myo myo le duq tô ri.

⁹ Poluq dang nyo hing nyi é u lé, Utuhku gâ é zorâm zo rayuq gi, khohot hkum yâm má yhup mui zung tô ri. Haú yuq gi, yhupmó myi byuq luí, yhùm sum tsáng mai byit gyó mù, yhang lé bún toq wú le shi byuq bê nghut ri.

¹⁰ Haú hkûn, Poluq gi, gyó lô mù, po ngop to luí, "Hkâdân ko, yhang soq bo ashí." ga taí ri.

¹¹ Haú mù, yhang gi, dum tau doq lô luí, muk lé hpé mù, zo luí, maubó shoq yhangmoq eq dang nyo kún mù htoq lô bê nghut ri.

¹² Zorâm zo haú lé duì gù shuí lô kômù, nhik ting é gyai yhang hui bekô nghut ri.

Troa Và Eq Melitu Và Gyoro Mã É Hkyowui

¹³ Poluq gi, myí hkyô lô râ matú hen tô é yanmai, yhang lajang byí é eq rajung za, yhang lé Asu và má lhai lhom shuí ji rá matú, ngamoq gi, lhai ji mù hí lô láng bê nghut lhê.

¹⁴ Haú mù, yhang gi, Asu và má ngamoq eq hui luí, ngamoq gi, yhang lé lhai má shuí ji chûng mù, Mitulene myuq shut e lô bê.

¹⁵ Htang nyi, ngamoq gi, haú mai lhai ji mù, Kiu zinlóng yâm mai lai lô luí, hau htang nyi gi, Samu zinlóng má lai dap lô luí, htang nyi gi, Melitu và mó má jé lô bê nghut lhê.

¹⁶ Poluq gi, wó dut é nghut jáng, Penteko-ti buinyl lé Yerusalem và mó má wó jé shoq gâ é yanmai, Asia mau má buinyi a kâm lhoq htum naù mù luí, Ehpesu myuq lé lhai pyâm to rá matú, myit hpyit to bê nghut ri.

Ehpesu Hpúng Suwún Wuí Lé, Poluq Shi-kyâm Tô É Dang

* 20:6 Múnchi a bo é Muk zo Poí lé, Azuma Poí le gâ lhê.

17 Poluq gi, Melitu wà mó mai Ehpesu shut byù nhang kat luí, hpúng suwún wuí lé é jí nhang ri.

18 Haú bang jé lé kôjáng, yhang yhangmoq lé taí é gi, "Ngò, Asia mau má sâng-hi jé é buinyi mai, nungmoq eq hkásu kut nyi nyi é ahkyíng banshoq lé le;

19 Yudaq byu pé jeq hô luí, ngò wuíhke jamjau hui zo kôlhang, haú Yhumsing é muzó lé, ngò myit gyai lhoq nyhûm é eq ngaubyi ngaù nhap é èq wùn waq é hkyô lé le;

20 nungmoq é matú akyú bo é hkyô banshoq lé, a myhit to loshoq taí é hkyô lé le; shiwa byu pè hí eq rayhûm htàng rayhûm má ngò nungmoq lé mhoqshit é hkyô lé le;

21 ngò gi, Yudaq byu pé eq Grik pé lé, myit lhîng mù Garai Gasâng chyáng lhing lò ra eq, nga-nhûng é Yhumsing Yesuq lé lumjîng ra hkyô lé, saksé hkâm kyo lugù nghut bê lé le, nungmoq sê nyi akô.

22 Ahkuí, ngò gi, Woi-nyí má tuí tô é hui bê yanmai, Yerusalem wà mó má é ló lhê; haú má, ngò haí ló dut rá lé kúm gi, a sé nghut ri.

23 Ngò gi, htóng eq wuíhke jamjau hkyô ngo lé láng tô ri ga, wà hkangmó má Chyoiyúng Woi-nyí èq lhoq pûn é hkyô lé za sê nyi lhê.

24 Nghut kôlhang, ngò gi, òn rá hkyô ban òn rá eq, Garai Gasâng jeju eq sêng é gabú danglú lé saksé hkâm rá matú, Yhumsing Yesuq ngo lé byi tô é muzó lé ban wùn waq rá za nghut jáng, ngá asak lé ratsuí le a myit ha lô é nghut lhê.

25 Garai Gasâng é mingdán hkyô lé hko kyô wún é hkûn, ngò eq huí é nungmoq lhunglhâng bang gi, htàng nùng má ngo lé a myàng lo kó rá nghut é lé, ahkuí ngò sê to bê.

26 Haú mù luí, ó yuq nghut kôlhang, yubak mara má shi byuq ló é nghut le, haú yuq é sui chyín gi, ngò má a dap lô é hkyô lé, hkû-nyí, ngò saksé hkâm tô lhê.

27 Hkásu mù gà le, Garai Gasang ô nau é hkyô banshoq nungmoq lé hko kyo rá matú, ngò zaú tô é hkyô a joq wú é yanmai nghut lhê.

28 Nungmoq gi, yhumsing gùng lé le, nungmoq lé Chyoiyúng Woi-nyí èq up zúng nhang é sau hpúng[†] lhunglháng lé le, zúng nyi keq. Garai Gasang Yhâng suí èq wui tô é noqkuq hpúng lé le, rém zúng nyi keq.

29 Ngò ló byuq é htàng má, sau hpúng lé a shogyô é, ashop é wamhkuí gi, nungmoq chyáng jé rá nghut é hkyô lé, ngò sê lhê.

30 Hau htoq agó, chángzô pé lé wó mhoq hpoyoq yú shoq ga, shut é òng taí é byu pé lhâng nungmoq chyáng mai htoq lò rá nghut lhê.

31 Haú mù luí, nungmoq yuq hkangmó lé, ngò sum zân tup ngaubyi ngaunhap eq nyí myín a hkyíng loshoq, lhoq pun lhoq kyíng tô é dang pé lé, nungmoq gi, myit bun mù machya nyi keq.

32 Ahkuí, ngò gi, nungmoq lé, Garai Gasâng chyáng le, nungmoq lé wó lhoq gîng lhoq tîng mù, lhoq chyoiyúng é hui bê bang eq nungmoq lé silí wunlí wó byí é, Yhâng é jeju mungdang má le, ap tô lhê.

33 Ngò gi, ó yuq é hîng, ngùn, mebu pé lé le a myoqnoq wú.

34 Ngá é loq shí í loq gi, ngò eq ngá htàng châng é bang ra chà é lé kut byi bê hkyô lé, nungmoq yhang sé gû nghut lhê.

35 Ngò kut é muzó banshoq gi, nungmoq é alik dut bê nghut luí, shí su kut shikut é òng mai, nga-nhûng gi, wum-o nyhóm bang lé htuq bang luí, 'Lhom

† 20:28 Sau hpúng gà é gi, lumjîng é bang lé gà lhê.

yu é htoq má byí é gi, je riyhang hkungsô wó nyi ri.' ga luí, Yhumsing Yesuq taí é dang lé bún nyí sháng." gâ ri.

³⁶ Poluq gi, haú su ga ban taí jáng, hkyihput htuq mù, yhangmoq lhunglhâng bang eq rahá za kyúđung ri.

³⁷ Yhangmoq lhunglhâng bang gi, yhang lé po to luí, bopuq puq mù, chôm ngaú akô.

³⁸ Htâng nùng má, yhang lé dum myàng râ a nghut lo gâ é dang yanmai, yhangmoq gi, je riyhang yón kuq bum akô. Yhang lé, lhai má jé shoq lé châng dé kat akô nghut ri.

21

Yerusalem Wà Mó Shut Doq Lô Nyi É U Lhê Hkyô

¹ Ngamoq gi, yhangmoq lé kang pyâm to luí, lhai jí chùng mù, nyâng za Kusa zinlóng má jé é nghut lhê. Hau htang nyí gi, Rode zinlóng má jé mù, haú mai Patara wà má dum jé bê.

² Haú wâ má Hpinisi mau shut dap ló é lhai lé, ngamoq myàng luí, haú mai chôm jí chùng bê.

³ Haú hkûn, ngamoq gi, Kupru zinlóng lé myàng jáng, hau é loqyo hkyam dông lai ló luí, Suriq mau shut e ló le, hpugá zê lé hkyó râ matú, Turuq myuq má nô é nghut lhê.

⁴ Haú wâ má, chángzô pé lé myang hô luí, yhangmoq chyáng nyhit nyí bíng yu é. Chángzo haú bang gi, Chyoiyúng Woi-nyí eq lhoq pûn é dông Poluq lé Yerusalem wà mó shut a ló râ matú, chôm hkúm akô.

⁵ Nghut kôlháng, nyhit nyí haú lai jáng, ngamoq gi, ngamoq é hkyowui shut dum xoq sô htoq ló bê. Chángzô pé lhunglhâng bang gi, yhangmoq é myi zo wui eq rahá, ngamoq lé wâ shinggan jé shoq châng dé kôluí, ngamoq gi, yhangmoq eq rahá wuiyâm má hkyihput htuq mù, kyú chôm dung bê nghut lhê.

⁶ Hau htâng, rayuq eq rayuq ban shi-kyâm lhum jáng, ngamoq gi, lhai má wàng bê; yhangmoq gi, yhùm shut dum tau ló byuq bekô nghut ri.

⁷ Ngamoq gi, Turuq myuq mai lhai jí chùng mù, Toleme wà má jé ló bê. Ngamoq gi, haú wâ má é gumang wui lé shichyên yù mù, yhangmoq eq rahá ra-nyí chôm nyi kûn é nghut lhê.

⁸ Htang nyí gi, ngamoq haú wâ mai htoq ló mù, Kesare wà mó má dum jé bê. Haú wâ má, haú htuqluq htuqbang nyhit yuq* má bò sù, gabú danglù hko taí é Hpilip gá su é yhùm má, ngamoq wang bíng bê nghut lhê.

⁹ Yhang gi, yhang hku tô é byizo zomyi myiqhtoi myi yuq wó ri.

¹⁰ Ngamoq gi, haú yhùm má rayoq zo nyi é htâng má, Agabu gâ é myiqhtoi rayuq, Yuda mau mai jé lé ri.

¹¹ Yhang gi, ngamoq chyáng jé lé luí, Poluq é hpyihit lé yù mù, yhanggùng yhang loq eq hkyí pé má tui mù luí, taí é gi, "'Shí hpyihit yhumsing lé, Yerusalem wà mó má é Yudaq byu pé mai shí su kut lhom tui luí, tungbaù pé é loq má ap pyám kó râ nghut lhê;" ga luí, Chyoiyúng Woi-nyí taí ri." gâ ri.

¹² Dang haú lé wó gyo jáng, haú má é bang eq ngamoq gi, Poluq lé Yerusalem wà mó má a doq ló râ matú, gyai yhang chôm hkúm bê nghut lhê.

¹³ Nghut kôlháng, Poluq gi, "Nungmoq gi, hai mù luí ngaubiyi ngau-nhap kut é eq, ngo lé myit wum gyui rá dông kut nyi akô lhu? Ngó gi, Yhumsing Yesuq

* 21:8 Lagyo 6:1-6

é yanmai, Yerusalem wà mó má, tuí é hui rã za a nghut, shí hkâm rã matú le rì rì nghut lhê." ga tù tai pyâm ri.

¹⁴ Yhang lé wó tai hkúm rã su a dut lo jáng, ngamoq gi, "Garai Gasang ô nau é đông nghut sháng gaq." nghu lui, zim za chôm nyi bùm bê.

¹⁵ Hau htàng má, ngamoq gi, zè món chúng mù Yerusalem wà mó shut doq lô bê nghut lhê.

¹⁶ Kesare wà mó má é chángzô pé ra-am le, ngamoq eq rabyìn za nghut kôlui, yhangmoq gi, ngamoq lé Kupru byù Manason ga sù, hí hí lhê é chángzô rayuq é yhùm má shuí ló mù, yhâng chyáng bíng nhang akô.

Yerusalem Wà Mó Má, Yakuq Lé Ê Hui Ê Hkyô

¹⁷ Yerusalem wà mó má ngamoq jé é hkùn, gumang wui gi, ngamoq lé gabú tung lhom hkúlum yu akô.

¹⁸ Htang nyí, Poluq eq ngamoq gi, Yakuq lé é hui le, hpúng suwún wui le zing nyi to láng akô.

¹⁹ Poluq gi, yhangmoq eq ban shichyen jáng, yhang wùn waq lai lo é hpúng mù đông mai, Garai Gasang eq tưngbaù pé chyáng kut byi bê hkyô pé lé, jihkúm nuqguq shit kyô ri.

²⁰ Yhangmoq gi, hau lé wó gyo kôjáng, Garai Gasang lé hkya-ôn akô. Hau htàng, Poluq lé tai kô é gi, "Ámang ê, Yudaq byu pé má lumjینگ é bang hkâ-myhó hkying mun nghut bê lé, nàng sê lhê. Hau bang lhunglhang gi, jep é tarâ má myit zuq to bê bang chyat nghut bum akô.

²¹ Nghut kôlhang, yhangmoq lhunglhang bang gi, tưngbaù pé chyáng nyó lúng tô é Yudaq byù banshoq bang lé, nàng, yhumsing yhangzo yhangshù pé é matú ahpyo-kuq hpyit a ra nghu é eq nga-nhùng é htùng tarâ lé châng nyi a ra nghu lui, Mosheq é tarâ lé tô pyám rã đông mhoqshit ri gã é dang lé, wó gyô yu bùm bekô nghut ri.

²² Nàng jé bê hkyô lé, yhangmoq wó gyo berã za nghut lhê. Ahkuí, ngamoq hkâsu kut lo rã lú?

²³ Hau mù, ngamoq tai é đông kut aq, ngamoq chyáng danggidiq mó byi bê byù myi yuq nyi lhê.

²⁴ Nàng gi, hau bang lé ji yù mù, yhangmoq eq rahá lhoq san lhoq yúng yù aq, yhangmoq lé u wó wuq yù rã matú, ahpau le htoq byi aq. Hau hkùn sheq, byù lhunglhang bang gi, yhangmoq wó gyô tô é hkyô a têng byuq é eq, nàng yhang lhang, jep é tarâ lé, châng kut nyi sù nghut é hkyô lé, sé kó rã nghut lhê.

²⁵ Lumjing é tưngbaù pé é matú kúm gi, hparã lhô pé lé tưng byi é zoshuq, sui, lingzing mai myhik sat é dusak sho eq ashop é đông gungsho zùm yap é hkyô pé lé, yhangmoq koi pyám rã matú, ngamoq chôm doqdan lui, kã hùn kat bê nghut lhê." ga akô.

²⁶ Hau mù lui, Poluq gi, hau htàng nyí hau bang lé ji yù lui, yhangmoq eq rahá, lhoq san lhoq yúng yù mù, noqkuq yhùm má wàng lui, yhangmoq yuq hkangmó é matú hkungga wó byi shoq ga, yhangmoq é lhoq san lhoq yúng buinyi ngap bê hkyô lé, tai kyô ri.

Poluq Chyup Yù Hui Ê Hkyô

²⁷ Buinyi nyhit nyi hau ngap rã yàm má, Asia mau má é Yudaq byu pé ra-am gi, noqkuq yhùm má Poluq lé myàng kômù, shiwa byu pé lé shuí gabyong lui, yhang lé chyup yù mù, garú tai kô é dang gi,

28 "Israelaq byu pé ê, garúm yû keq, shí yuq gi, nga-nhùng byuhú lé le, jep é tará lé le, jowò shí lé le, shut shai é đông jowò hkgangmó má é byu banshoq lé mhoqshit sù nghut ri. Hau htoq agó, noqkuq yhùm má Grik pé lé shuí háng é eq, chyoyíung jowò shí lé achaq achyut kut é sù nghut ri." gâ akô.

29 (Hkâsu mù gâ le, yhangmoq gi, Ehpesu myuq byû Trohpimu ga sù eq Poluq wâ hkaú má rahá nghut kô é lé, myàng kômù, háu yuq lé noqkuq yhùm shut shuí háng nhò ngam pyám kô é yanmai nghut ri.)

30 Rawà gón gabyông lo mù, shiwa byu pé lìnhghkyuq mai din lé lô kôluí, Poluq lé chyup zing to uchyang, noqkuq yhùm shinggan shut she hkyut htoq lô akô. Háu hkún jáng, hkum pé lé myhí pyám akô nghut ri.

31 Poluq lé yhangmoq sat rã dâ nyi kô é hkún, Yerusalem wâ gón gabyông nyi akô gâ é hkyô lé, Romaq dap up zaú é no má, lò jé ri.

32 Háu mù, yhang gi, radá dâm shô up gyezau ra-am eq gyezô pé lé shuí chùng mù, byû hpúng shut, din yán gyó lô akô. Yhangmoq gi, gyezau eq gyezô pé lé lhom myàng kôjáng, Poluq lé nhuq nyi é mai hkyíng byuq akô nghut ri.

33 Háu hkún, dap up zau hpó gi, Poluq chyáng ê jé mù, yhang lé chyup yû luí, toqjáng tui í hkat eq tui to nhang ri; hau htáng, yhang ó yuq nghut é hkyô lé le, hái kut shut é hkyô lé le myí wú ri.

34 Shiwa byu pé kúm gi, rayuq rajung ga garú bum akô. Háu mù, gyezau hpó gi, lúm garu kô é yanmai, têng é hkyô lé rago a wó sê yù jáng, Poluq lé gyewap má shuí lô nhang ri.

35 Poluq gi, zumhtáng wang má jé lo é hkún, byû moq mó lúm htim chýin chyap lô kô é yanmai, gyezô pé gi, yhang lé waq doq lô akô.

36 Shiwa byu pé gi, "Yhang lé sat pyám keq." ga châng garú nyi akô nghut ri.

Poluq, Yhumsing Gùng Mara A Bo É Lé Tai Sân Kyô É Hkyô

37 Gyezô pé gi, Poluq lé gyewap má shuí wàng rã za nghut é hkún, Poluq gi, dap up zau hpó lé, "Ngò nàng lé dang wó nyô rã lú?" ga myi jáng, dap up zau hpó gi, "Nàng, Grik myíng dat mu lhê lú?"

38 Nàng gi, hí hkún gumlau kut mù, byû sat wún bang myi hkyíng lé, yoso shut shuí htoq lô é sù, Egutuq byû a nghut lú?" ga tau myí ri.

39 Háu hkún, Poluq gi, "Ngò gi, Kiliki mau Tarshu myuq má é Yudaq byû nghut lhê; ngò nyi é wá gi, wá chyap wá zo za a nghut, jeju mai, byû shí bang lé ngò dang tái rã ahkáng byi laq." ga dúng ri.

40 Gyedap up zau hpó ahkáng byi jáng, Poluq gi, zumhtáng má yap to mù, shiwa byu pé shut loq he ri. Háu hkún, yhangmoq lhunglhâng bang zim byuq kômù, Poluq, yhangmoq lé Hebre myíng đông tái é gi,

22

1 "Gumang wui eq íwa pé ê, ahkuí, ngò mara a bò nghu tái é dang lé gyô wú shi keq." gâ ri.

2 Yhangmoq gi, yhang Hebre myíng đông tái é dang lé wó gyô bùm kôjáng, gyai yhang zím byuq bekô. Háu mù, Poluq xoq tái é gi,

3 "Ngò gi, Yudaq byû rayuq nghut lhê. Kiliki mau Tarshu myuq má choq hpyit kôlhang, wá mó shí má nyi kô lò sù nghut lhê. Ngò gi, nga-nhùng íchyi íwa pé é jep é tará lé, Gamalelaq é loq má jikhúm nuqguq mhoq yû luí, hkún-nyí lhê é nungmoq lhunglhâng bang su, Garai Gasang lé gyai myit zìng zuq é sù nghut lhê.

4 Ngò gi, shí Hkyô cháng bang lé shi é jé shoq, zing-rí wú é sũ eq, myiwe yuqgè ó yuq lé nghut kôlhang, chyup yũ mù htóng má lhung pyâm wú bê sũ nghut lhê.

5 Hkyangjong mó eq byìn tú wap suwún wũ lhunglhang bang gi, ngá é saksê pé nghut akô. Ngò gi, Damaskuq myuq má nyi é yhangmoq é Yudaq gumang wui lé byi râ laiká yhangmoq chyâng mai wó yu chũng luí, haú má é bang lé le Yerusalem wà mó má dam byi râ matú, chyup tuí ló râ nghũ, Damaskuq myuq shut e é nghut lhê.

6 Nyigúng tú zó lé, ngò Damaskuq myuq shut sô chyâng ló nyi é hkũn, maubó gi, ngá é lhunglhang má mauhkũng mai byodàn tung duqbó to bê nghut ri.

7 Haú mù, ngò myigúng má lêng gop tô le, wó gyô kat é danghtê gi, 'Sholuq, Sholuq, nang ngo lé haí mù zing-rí nyi lhê lú?' gâ ri.

8 Ngò le, 'Yhumsing ê, nang ó nghut lhê lú?' nghu myi kat jáng, 'Ngò gi, nang zing-rí wún é sũ, Nazaret wà byũ Yesuq nghut lhê.' ga luí, Yhang tú taí kat ri.

9 Ngò eq rahá e ló é bang kúm gi, maubó lé myàng kôlhang, ngo lé taí é danghtê lé a sê gyo kó nghut ri.

10 Dum, ngò gi, 'Yhumsing ê, ngò haí kut ra râ lú?' nghu myi jáng, haú Yhumsing gi, 'Toq mù, Damaskuq myuq má wang ló aq, nang kut râ matú wò byí tô é hkyô pé lhunglhang, nang lé haú má lhom taí kyo berâ nghut lhê.' ga ngo lé dum taí ri.

11 Haú maubó é shingkâng é yanmai, ngò myoqjit byuq mù, ngá é byinzùm wui gi, Damaskuq myuq shut ngo lé loq mai she wang ló akô.

12 Haú hkũn, Anani gâ é yuqgè rayuq ngá chyáng lé huí ri. Yhang gi, jep é tará lé gyuq hkunggâ é eq, haú má nyi é Yudaq byũ lhunglhang bâng é hí má myoqdong gyai wó é sũ nghut ri.

13 Yhang gi, ngá nãm má yap to luí, 'Gumang Sholuq ê, náng myoq myàng aq hkoi!' ga taí ri. Haú hkũn jáng yhang, yhang lé ngò wó myang kat bê nghut lhê.

14 Yhang dum xoq taí é gi, 'Nga-nhung íchýí íwa pé é Garai Gasang gi, nang lé, Yhang ô nau é hkyô sé sháng gaq ga luí le; Dingmán Sũ lé wó myàng luí, Yhâng é nhut mã é mungdang lé wó gyo sháng gaq ga luí le, hkyin to bê nghut ri.

15 Haú mù, nang gi, nang myang é eq wó gyô yu é hkyô pé lé, byũ lhunglhang bâng é hí má, Yhâng é matú saksê hkám byi râ su dut râ nghut lhê.

16 Ahkuí, nang haí lé láng nyi ashí lú? Toq aq, Yhâng é myiàng lé lang luí wui-myhup hkám yu é eq, náng é yubak mara pé lé chí sãn pyám aq.' gâ ri.

17 Hau htâng, ngò gi, Yerusalem wà mó má dum taú jé ló mù, noqkuq yhũm má kyú ê dũng nyi le, moq byuq ló mù,

18 'Nàng, ngá é hkyô lé saksê hkám râ dang lé, yhangmoq a lhom hap yù kó râ nghut é yanmai, Yerusalem wà mó mai hân htoq ló aq.' ga Yhumsing ngo lé taí nyi é lé, myoqwup shing-rán dõng myang ri.

19 Haú mù, ngò gi, 'Yhumsing ê, tarajong ralhũm htâng ralhũm má nang lé lumjáng bang lé, htóng má chyup lhung pyâm é eq, hkat bat lhing wún é hkyô lé, yhangmoq sê bum akô.

20 Náng é saksê Stehpan sat hui luí suí shun u lé, ngò nãm má yhang yap to mù, haú hkyô lé myit bo hui luí, yhang lé sat pyám bâng é mebu lé zúng byí é nghut lhê.' nghũ tú taí bê.

21 Haú hkûn, Yhumsîng gi, 'È aq, ngò, nang lé, wê gânđ é tûngbaù pê chyáng nhang kat rá.' ga, ngo lé tái ri." gâ ri.

Poluq, Romaq Mingdán Byû Nghut É Hkyô

22 Shiwa byu pé gi, dang haù hkun jé za gyô yù kômù, "Shí sù é byù gi, myigùng htoq má nyí a gîng, sat pyám keq." ga, htê mó êq garù bum akò.

23 Yhangmoq gi, haù su garu uchyang, yhumsing buhîng lé hkyut dú pyâm lhê, hpuilhup lé mauhkûng shut kyaq tâng lhê, kut nyí kôjáng,

24 dap up zau hpó gi, Poluq lé gyewap má shuí hâng yù nhâng mù, yhang lé shiwa byu pé haí mù shí su ga garù bum kô é hkyô lé wó sé shoq ga, nhuq bat nhâng luí, myí choq nhang ri.

25 Nhuq bat rá matú shokuq tuí eq tui kôjáng, Poluq gi, nàm má yap tô é shô up gyezau lé, "Romaq mingdán byû ru nghut sù lé nhîng, lháng a jéyáng shimá, nungmoq nhuq bat le gi, tarâ wang akò lúhú?" ga tái ri.

26 Rashô up gyezau gi, dang haù lé wó gyo jáng, dap up zau chyáng ló mù, "Nàng hai kut rá dâ nyi lhê lúhú? Shí yuq gi, Romaq mingdán byû sheq ru nghut ri." ga luí, yhang lé ló tái kyô ri.

27 Haù mù, dap up zau gi, Poluq chyáng ê mù, "Nàng gi, Romaq mingdán byû nghut lhê lúhú? Tái kyô wú laq." ga myí ri.

Poluq gi, "Ngò, Romaq mingdán byû nghut lhê." ga tû tái ri.

28 Haù hkûn, dap up zau hpó gi, "Ngò lháng ahpau myo myo byí pyám luí sheq, Romaq mingdán byû ru wó dut é nghut lhê." ga tû tái jáng, Poluq gi, "Ngò kúm gi, Romaq mingdán byû dut gû hku lé lo é sù nghut lhê." ga tái ri.

29 Yhang lé myí choq wú rá gâ é bang gi, haù hkûn jáng, yhâng chyáng mai huí zut ló bûm bekò. Gyedap up zau hpó le, Poluq gi, Romaq mingdán byû nghut é lé sé jáng, yhang lé tuí pyám bê nghut é yanmai, gyuq byuq bê nghut ri.

Yudaq Byìn Tú Wapdoq Suwún Wuí Gam Hkoq Byuq É Hkyô

30 Htang nyí, dap up zau hpó gi, Yudaq byu pé mai Poluq lé hun é mara haí nghut é hkyô lé hkyak wó sé shoq ga, Poluq lé tuí hpyi pyám byi mù, hkyangjong agyi pé eq Yudaq byìn tú wapdoq suwún wuí lhunglháng lé jì tsîng to luí, yhangmoq é gung gûng má Poluq lé shuí wàng mù, shap to bê nghut ri.

23

1 Haù hkûn, Poluq gi, Yudaq byìn tú wapdoq suwún wuí lé wú tsuq to mù, "Ngá gumang wuí ê, ngò gi, hkû-nyí jé shoq Garai Gasâng é hí má sansêng é i-myt êq asak dui nyí bê nghut lhê." ga tái ri.

2 Haù mù luí, hkyangjong mó Anani gi, Poluq nâm má yap to bang lé, yhâng nhut má bat byi keq gâ ri.

3 Haù hkûn, Poluq gi, yhang lé, "But hpyu tô é xewâm* nàng ê, nàng lé sheq Garai Gasâng êq bat rá nghut lhê. Nàng gi, tarâ eq rajung za ngo lé jéyáng rá matú shí má zung to luí nhîng, hai mù tarâ eq shut shai é đông ngo lé bat nhang lhê lúhú?" ga tái ri.

4 Poluq nâm má yap tô é bang gi, yhang lé, "Nàng gi, Garai Gasâng é hkyangjong mó lé wám rhoi lhê lúhú?" ga luí, chôm tái akò.

* 23:3 But hpyu tô é xewâm gâ é gi, gegùn labyoq kut bang lé gâ lhê.

⁵ Poluq gi, "Gumang wui ê, yhang gi, hkyangjong mó nghut é lé ngò a sê pyám mù nghut bê. Chyúmdang má le, 'Náng amyú lé up é sú lé wó rhoi rã a nghut.'[☆] ga le kê tô é nghut lhê." ga tũ tai ri.

⁶ Hau htâng, hau zing tô é bang mã é ra-am gi, Saduke pé, góbang gi, Hparishe pé nghut é lé, Poluq gi, sé jáng, Yudaq byin tú wapdoq suwún wui lé, "Gumang wui ê, ngò gi, Hparishe awut ashín mã é, Hparishe rayuq nghut lhê. Shí bê bang dum dui toq lô rã hkyô lé myit myoqbyù é yanmai, ngò jéyáng é huí nyi ri." ga lui, garũ tai kat ri.

⁷ Yhang hau su ga tai kat jáng, Hparishe pé eq Saduke pé gi, dang jet jet lhùm lò kômù, Yudaq byin tú wapdoq hpong gi, gam hkoq lô byuq bekô nghut ri.

⁸ (Hkâsu mù gã le, Saduke pé gi, dum dui toq hkyô a joq; maumang lagyo pé le, sobyo pé le, a nyi ga tai bum akô. Hparishe pé kúm gi, hau pé joq lhê ga, lumjing bang nghut akô.)

⁹ Hau mù lui, gyai yhang tai garũ bum akô. Hau hkûn, Hparishe hpúng mã é tarã sarã pé ra-am gi, toq mù, "Shí yuq chyáng hai mara le, ngamoq a myàng nghut ri. Sobyô a nghut jáng, maumang lagyo rayuq yuq, yhang lé dang tai bê nghut jáng gi, hkâsu nghũ kó rã lúhú?" ga lui, zuq zuq tai htíng lhùm akô nghut ri.

¹⁰ Hau su kut gyai yhang tai htíng lhùm lò kôjáng, dap up zau hpó gi, Poluq lé láng myha pyám kó rã lé chiq é yanmai, yhangmoq chyáng gyó ê mù, Poluq lé hau bâng é gung gung mai ê lú shui lò lui, gyewap má shui wang ló rã matú, gyezô pé lé nhang kat ri.

¹¹ Hau myín, Yhumsing gi, Poluq é nãm mã yap to lui, "Hkâgyuq, Yerusalem wã mó mã nàng ngá é hkyô lé saksé hkám bê eq rajung za, Romaq myuq mã le saksé hkám ra shirã nghut lhê." ga, yhang lé tai ri.

Poluq Lé Sat Rã Haq Dã É Hkyô

¹² Htâng napkyô, Yudaq byu pé gi, Poluq lé sat rã hpaqchyí chôm da kômù, yhang lé a wó sat sat gi, a zo a shuq rã nghut lhê ga, ó le ó dakam yu akô nghut ri.

¹³ Hpaqchyí shí lé chôm dã é bang gi, myi xê yuq chyân nghut bum akô.

¹⁴ Yhangmoq gi, hkyangjong agyi pé eq suwún wui chyáng ê kômù, "Poluq lé a wó sat sat gi, ngamoq hai le a zo nghũ, chôm dakam yu to bê nghut lhê.

¹⁵ Hau é yanmai, ahkuí nungmoq gi, Yudaq byin tú wapdoq suwún wui eq rahá kut lui, Poluq é hkyô lé rago za myí gon wú rã nghu mhaú é dông, yhang lé nungmoq chyáng wut yù rã matú, dap up zaú chyáng dúng kat keq. Hau hkûn, ngamoq gi, hkyolat mã yhang lé lhom sat pyám rã rì rì kut to rã nghut lhê." ga tai akô.

¹⁶ Nghut kôlhang, hau lhom haq sat kó rã gã é hkyô lé, Poluq é yhâng nhammó é yhangzo yuqgè zo wó gyó yù lui, yhang gi, gyewap mã wang é mù, Poluq lé é tai kyô ri.

¹⁷ Hau hkûn, Poluq gi, shô up gyezau rayuq lé ji yù mù, "Zorâm shí lé dap up zaú chyáng shui ê aq, yhang, yhang lé shit kyo rã hkyô rajung joq lhê ga." ga tai ri.

¹⁸ Hau mù lui, shô up gyezau hpó gi, zorâm hau lé dap up zaú chyáng shui é mù, "Zorâm shí nang lé shit kyo rã hkyô rajung joq lhê gã ri ga, yhang lé náng chyáng shui lé rã matú, htóng byù Poluq gi, ngo lé ji yù mù tai ri." ga, yhang lé tai ri.

19 Haú jáng, dap up zau hpó gi, jauwò má zorâm haú lé yhang loq mai she é mù, "Nàng ngo lé hái jung shit kyó nau ri lú?" ga, yhang lé baú tsik za myí ri.

20 Haú hkún, zorâm haú gi, "Yudaq byu pé gi, Poluq lé rago za sai myí wú rá su kut mhaú mù, napmá, Yudaq byin tú wapdoq má shuí yù rá matú, náng chyang dung kó rá ga, myit chòm huí to bekò nghut ri.

21 Haú mù luí, yhangmoq ô nau é đông hkágyo byi, hkásu mù gâ le, Poluq lé a wó sat sat gi, hái le a zo a shuq râ nghut lhê ga, byù myi xê yuq chyân yhang, ó le ó dakam yù bekò nghut ri. Haú bang gi, yhang lé lhom chyup yù rá matú haq lhom to láng kó rá nghut lhê. Ahkuí lhang, yhangmoq gi, mù haú kut rá matú rì rì nghut bùm bekò; náng é ahkáng lé za láng nyi bum akò nghut ri." ga shit kyô ri.

22 Haú hkún, dap up zau hpó gi, zorâm haú lé, "Nàng, ngo lé shí hkyô shit kyo bê hkyô lé, ó yuq lé le hkátai kyo." ga, sidiq byi mù, taú nhang kat bê nghut ri.

Mingzau Hpilik Chyang Poluq Lé Dé Kat É Hkyô

23 Hau htâng, yhang gi, shô up gyezau í yuq lé ji yù mù, "Hkû-myín sum hkyíng† má Kesare wà mó shut é rá matú, gyezò pé í shô, myang ji bang nyhit xê, lham chùng bang í shô kut mù, rì rì hen to keq.

24 Hau htoq agó, Poluq lé mingzau Hpilik chyang ngón za wó dé kat rá matú, yhang ji rá myang pé le lajang byi keq." ga, yhangnhik lé pying kat ri.

25 Laiká hun kat é le:

26 "Aróng wó dik é mauzau Hpilik ê, ngò Klodi Lusi gi, nuingón danglù shit kyô kat lhê.

27 Shí yuq lé gi, Yudaq byu pé èq chyup yù mù sat pyám rá dá nyi bekò za nghut lhê. Nghut kôlhang, ngò gi, gyezò pé eq rahá é wú le, yhang Romaq mingdán byù nghut é lé wó sê yu é yanmai, yhangmoq chyang mai yhang lé hkyi lo é nghut lhê.

28 Haú su mù, hái mù yhang lé mara hùn kô é hkyô lé sé nau é yanmai, yhangmoq é Yudaq byin tú wapdoq má yhang lé shuí jé byí wú bê nghut lhê.

29 Haú hkún, yhangmoq é tarâ hkyô eq séng luí za mara hun bùm kô é lé ngò myang ri. Nghut kôlhang, shí gíng é eq htóng lhung gíng é mara hái le a bò nghut ri.

30 Shí yuq lé sat pyám rá hpaqchyí da kô é hkyô, ngo lé shit kyo kô é hkún, radá dâm, yhang lé ngò náng chyang dé nhang kat bê. Yhang lé mara hùn nau é bang lé gi, nang hí má yhang hun lhum keq nghù pying kat bê nghut lhê." gâ ri.

31 Haú mù luí, gyezò pé gi, haú pying kat é dang eq rajung za, myín lé yhang, Antipatri wà mó jé shoq Poluq lé dé kat bekò nghut ri.

32 Htang nyí, myang ji bang lé é châng dé nhâng kômù, yhangmoq gi, gyewap shut dum taú lò bekò nghut ri.

33 Myang jì é gyezò pé gi, Kesare wà mó má jé kô é hkún, mauzau hpó lé laiká byi mù, Poluq lé le jâng ap byí akò nghut ri.

34 Haú hkún, mauzau hpó gi, laiká haú lé ban nghap jáng, Poluq hká mau mã é byù nghut é hkyô lé myí wú luí, Kiliki mau mã é byù nghut é lé sé jáng,

† 23:23 Myín sum hkyíng gi, nga-nhung é myín gau hkyíng nghut lhê.

35 "Nang lé mara hûn bang jé jáng sheq, náng mù lé ngò gôn wú râ." ga tai ri. Hau htâng, yhang gi, Poluq lé Herut é hkohkâm-wâng má byam zúng byi keq ga hkunmó hkyô tô ri.

24

Poluq, Mara Hûn Huí É Hkyô

1 Hau htâng, ngo nyí lai jáng, hkyangjong mó Anani gi, suwún wuí ra-am eq tará sê sú Tertulu lé shuí gyó ló mù, mauzau hpô hí má Poluq lé mara lé tái hun bum akô.

2 Háu hkûn, Poluq lé hí má ji hâng tô é nghut mù, Tertulu, yhang lé mara hûn dang tái hí é gi, "Aróng wó dik é Hpilik è, ngamoq gi, nyi-ngón yuqyo é hkyô lé nang é yanmai gyai myáng shoq wó hkam yu bum é nghut lhê. Nang sê up sê hkang é jeju lé, byù myú shí wó hkâm zô nyi é yanmai,

3 ngamoq gi, háu lé hkyô hkat hkangmó eq jowò hkangmó má jeju bûn é myit eq hkam yu nyi bê nghut lhê.

4 Nghut kôlhâng, ngò nang lé lhoq hkyik é dông a dut sháng gaq, tái râ dang ratot zo lé, myit hîng hîng to mù gyo byi laq nghû dùng tóngbân lhê ô!

5 Shí yuq gi, byù lé gunjang sú, mingkan gón mâ é Yudaq byu pé lhungháng lé shuí gabyong sú eq, háu Nazaret hpúng mâ é hkyô-u shê sú nghut é lé, ngamoq myang ri.

6 Hau htoq agó, yhang gi, noqkuq yhûm lé achâq achyut kut râ dâ nyi lui, yhang lé ngamoq chyup yú mù, (ngamoq é tará dông jéyáng râ hen nyi é hkûn,

7 dap up zau Lusi gi, lé lô mù, ngamoq é loq mai yhang lé lé lú shuí yú lui, yhang lé mara hûn bang lé, náng chyáng jé keq ga hkunmó hkyô tô é nghut lhê.)

8 Háu mù, nang, yhang lé myí wú jáng, ngamoq yhang lé hun é mara banshoq têng é hkyô lé, nang wó sé râ nghut lhê." gâ ri.

9 Yudaq byu pé le, háu pé gi, têng lhê ga bo chôm tái akô nghut ri.

Poluq, Mara A Bò É Lé Tái Hung É Hkyô

10 Mingzau hpó gi, Poluq lé dang tái râ dông loq lik kat jáng, Poluq tái é gi, "Zau è, shí mau bâng é ahtôq má, nang zanwut myo myo jéyáng byí nyi é hkyô lé, ngò sê é yanmai, ngò gabú myit èq yhumsing matú, mara a bo é hkyô tái bá.

11 Ngò, Yerusalem wà mó má noqkuq râ matú doq e é buinyi raxe í nyí lháng a chyân shi é gi, nang lui za wó sé râ nghut lhê.

12 Noqkuq yhûm má ngò ó yuq eq tái htîng lhûm é lé lhâng, tarajong, a nghut jáng, wà hkaú hká jowú má le byu pé lé shuí gabyông é lé lhâng, ngo lé mara hun é bang gi, a myàng kó.

13 Ahkuí, ngo lé yhangmoq hun é mara pé lé, náng hí má yhangmoq saksé lháng a wó tân shít kó nghut ri.

14 Nghut kôlhâng, náng hí má ngò yín yú râ hkyô rahkat gi, yhangmoq èq shut shaí hkyô ga myhîng tô é Hkyô lé cháng lui, ngamoq é íchyí iwâ pé é Garai Gasang lé noqkuq nyi lhê. Jep é tará eq myiqhtoi laiká pé má kê tô é lhungháng lé le lumjîng lhê.

15 Ngò gi, dingmán é bang eq a dingmán bâng é dum dui toq lô râ hkyô joq é lé, yhangmoq eq rajung za Garai Gasang má myit myoqbyu nyi é sú nghut lhê.

¹⁶ Haû mù luí, Garai Gasang eq byu é hí má, ngò gi, rà é hkyô a bo é za, myit é hkyô san za wó dut nyi shoq, shikut nyi lhê.

¹⁷ Zanwut tsómra lai é htàng má, ngò gi, ngá é byù myû má é myùng bang lé chyunghuq byi rà eq alu kat rà matú, Yerusalem wà mó shut ló jé bê nghut lhê.

¹⁸ Haû su kut nyi é hkûn, ngò eq rahá hai byù moq mó le a nyi, hái jung gabyông é hkyô le a htoq, ngò noqkuq yhûm má lhoq san lhoq yúng yû bê hkyô lé za, yhangmoq myang akô.

¹⁹ Nghut kôlhang, Asia mau má é Yudaq byù ra-am gi, haú má nyi tô é nghut lhê; yhangmoq mai ngo lé mara hûn rà hkyô joq kô é nghut le gi, shí náng é hí má yhangmoq lé jé kó ra nghut lhê.

²⁰⁻²¹ Haû a nghut jáng, shí má nyi tô é bang gi, ngò Yudaq byìn tú wapdoq hí má yap to mù, 'Shi byuq bâng é dum dui toq rà hkyô é yanmai, hkû-nyí nungmoq ngo lé jéyáng nyi akô.' nghû luí, garú é dang hkûn mai lai luí, ngò má gotú mara myàng shi kô é nghut le gi, yhangmoq yhang taí kyo kó sháng gaq." gâ ri.

²² Hpilik gi, Hkyô haú lé rago sê lhê nghut mù, "Gyedap up zau Lusi jé jáng sheq, ngò, nungmoq é mù lé doqdan byi rà nghut lhê." ga luí, yhangmoq lé ahkyíng htot kat byi ri.

²³ Poluq lé le, zúng za zúng to mù, yhâng é buinùm ji-myi wuì mai yhang ra châ é hkyô lajang byi naú kô é bang nyi le gi, ahkáng byi keq ga luí, shó up gyezau lé hkunmó hkyô kat ri.

²⁴ Buinyi rayoq zo lai é htàng má, Hpilik gi, Yudaq myiwe myhí nghut é sù yhangmyi Drusila eq jé lé mù, Poluq lé ji lò nhâng luí, yhang, Hkrisduq Yesuq lé lumjíng hkyô taí kyô é le gyô yu ri.

²⁵ Poluq gi, dingmán hkyô, yhumsing gùng lé hkáng é hkyô eq, jé lò rà tarâ dara hkyô lé mhoqshit jáng, Hpilik gi, gyô gyuq mù, "Nàng ahkuí wó ló bê, ngò jìn jáng sheq nang lé dum ji yù rà nghut lhê." ga taí ri.

²⁶ Hpilik kúm gi, Poluq èq ngùn haq byi rà lé myit myoqbyù mù, yhang lé anum num ji yù luí, yhang eq nyo lhum lhum kut ri.

²⁷ Zanwut í zân lai jáng, Hpilik é mauzau ayá má Porku Hpestu lé htaí kat pyâm akô. Nghut kôlhang, Hpilik gi, Yudaq byu pè é hí má myoqdong wó nau é yanmai, Poluq lé htóng má jáng lhûng pyâm to bê nghut ri.

25

Poluq, Kehtaq Chyáng Jé Râ Matú Dùng È Hkyô

¹ Hpestu gi, haú mau má jé é sum nyí lai jáng, Kesare wà mó mai Yerusalem wà mó shut doq ló ri.

² Haú hkûn, hkyangjong agyi pé eq Yudaq byù hkyô-u shê bang gi, yhang lé Poluq é hkyô lé hkyang lhom shit kômù,

³ yhangmoq gi, Poluq lé hkyolat má lhom haq sat pyám rà dâ to kômù luí, jeju ralhûm kut byí é òng Poluq lé Yerusalem wà mó shut dé kat byi rà matú, Hpestu lé lhom dùng akô.

⁴ Nghut kôlhang, Hpestu gi, "Poluq lé Kesare wà mó má sheq ru lhûng tô lhê, hkâ-myháng a myáng má, ngò yhang le haú má dum taù ló rà nghut lhê.

⁵ Haú mù, nungmoq má é hkyô-u shê bang ra-am, ngò eq rahá gyó ló mù, haú yuq kut shut é hkyô bo é nghut jáng gi, yhang lé mara lé hûn kó sháng gaq." ga taí ri.

6 Hau htâng, yhang gi, shit nyi, raxê nyi kô yhangmoq chyáng nyi yù luí, Kesare wà mó má taú ló mù, htang nyí gi, tará tanghkuq má zùng luí, Poluq lé yhang hí má shuí wang lò rà matú hkunmó hkyô kat ri.

7 Poluq jé jáng, Yerusalem wà mó mai gyó lo é Yudaq byu pé gi, yhang é lìnhghkyuq má yap to kôluí, saksé a wó tûn shit é mara mó myo myo lé, yhang é ahtoq má chôm taí hun akô nghut ri.

8 Haú hkûn, Poluq gi, "Yudaq byu pé é jep é tarâ eq shai é đông le, noqkuq yhùm lé shut é đông le, Kehtaq* lé shut é đông le, ngò a kut wú." ga luí, mara a bo é hkyô taí ri.

9 Nghut kôlhang, Hpestu gi, Yudaq byu pé é hí má myoqdong wó naú mù, Poluq lé, "Nàng, Yerusalem wà mó má doq ló luí, shí hkyô pé lé ngò haú má doqdan byi rà matú, nàng dóng lhê lú?" ga myí ri.

10 Poluq kúm gi, "Ngò gi, doqdan hui rà nghut jáng, shí doqdan é jowò, Kehtaq é tarâ hpyit wap má ahkuí yap to bê nghut lhê. Nàng sê é eq rajung za, ngò gi, Yudaq byu pé lé haí lhang a shut wú sù nghut lhê.

11 Laq má mù, shí gíng é mara lé, ngò kut shut pyâm é nghut le gi, shí hkám rà hkyô lé ngò a he pyám; nghut kôlhang, shí Yudaq byu pé mai ngo lé mara hun é hkyô a teng é nghut jáng gi, ó yuq lhang ngo lé yhangmoq é loq má ap byi rà ahkáng wó rà a nghut, ngò gi, Kehtaq chyáng wang taí rà nghut lhê." ga tũ taí ri.

12 Haú hkûn, Hpestu gi, yhang é byin tú wap bang eq ban hpyê lhum jáng, "Nàng Kehtaq chyáng wang taí rà ga bê nghut lhê, Kehtaq chyáng wang ló aq hkoi!" ga taí kat ri.

Poluq Lé, Hkohlkâm Agripa Hí Má Shuí Hâng Yu É Hkyô

13 Hau htâng, buinyi hkâ-myháng a myáng má, Hkohlkâm Agripa eq yhanggu myiwe zo Bernike gi, Kesare wà mó má jé lé mù, Hpestu lé lé huí nyo akô nghut ri.

14 Haú mù, yhangnhik tâng gi, buinyi tsómra myáng nyi nyi é htâng má sheq, Hpestu gi, haú Poluq é hkyô lé hkohlkâm wa eq taí kyô lhum é gi, "Hpilik, lhung to lánng é htóng byu rayuq nyi ri.

15 Ngò Yerusalem wà mó má nyi tô é hkûn, hkyangjong agyi pé eq Yudaq byu pé é suwún wuí gi, haú yuq é hkyô lé taí kyo kôluí, haú yuq lé mara byi rà matú ngo lé chôm dúng akô.

16 Haú hkûn, ngò gi, mara hun é hui sù, mara hun é bang eq chyung chyoyq yoq kut luí, yhangmoq hun é mara lé yhumsing matú mara a bo é hkyô a wó taí shi lé, ó yuq lé ap byi pyám rà le, Romaq htung a joq nghú luí yhangmoq lé taí kyo bê nghut lhê.

17 Yhangmoq ngá htâng châng gyó lô kô é hkûn, ngò gi, a nô yu é za, htang nyí jáng tará tanghkuq má zùng luí, haú yuq lé shuí wang lò rà matú hkunmó hkyô kat é.

18 Haú hkûn, haú yuq lé yhangmoq mara chôm hun bùm kôle, ngò myit ngàm tô é su mara ralhum le a hun htoq lô kó nghut ri.

19 Yhangmoq é noqkuq htung hkyô eq, haú dui nyi ri ga Poluq èq taí é, shi byuq bê Yesuq é hkyô lé za dang jet jet lhum bum akô.

20 Haú mù, ngò gi, haú hkyô lé hká đông gon yù rà le a sé lô é yanmai, haú hkyô lé Yerusalem wà mó má doqdan é ló hkam yù rà matú, yhang dóng a dóng é hkyô lé myí wú le,

* 25:8 Kehtaq gâ é gi, "hkoséng" gâ é nghut lhê.

²¹ Poluq yang sheq, Hkoséng mó chyáng jé rã ga taí é yanmai, Kehtaq chyáng a dé kat shi é u lé, yang lé zúng nyí shirã matú, ngò hkunmó hkyô kat é nghut lhê." gã ri.

²² Haú hkún, Agripa gi, "Ngò le haú yuq é dang gyô wú nau ri." ga, Hpestu lé taí jáng, yang gi, "Napmã, nàng wó myang gyo rã nghut lhê." ga tũ taí ri.

²³ Htáng nyí, Agripa eq Bernike nhiktàng gi, shing kang bò bò za lé lô mù, dap up zau wuí eq wã mã é agyi suwún wuí eq rahã, rûng gok mó mã wang zung tô bùm kô é hkún, Hpestu hkunmó hkyô kat jáng, Poluq lé shuí hâng tô akô.

²⁴ Haú hkún, Hpestu taí é gi, "Hkohlâm Agripa eq ahkuí shí mã zup zing tô é lhunglhang bang ê, Yerusalem wã mó eq shí wã mã é Yudaq byu pé banshoq bang, ngã chyáng lé taí kôluí, shí yuq lé asak a wó duí nhang to lo ga garũ bùm é gi, ahkuí nungmoq myang é shí yuq yang nghut bê.

²⁵ Nghut kôlhang, shí yuq zui saí é mã shí gíng é mara haí lé lhang ngò a myàng nghut ri. Yang gi, Hkoséng chyáng wàng rã ga taí é yanmai, yang lé Romaq myuq shut dé kat rã matú ngò myit hpyit to bê.

²⁶ Dé kat bá nghũ jáng le, ngã é yhumsing Hkoséng chyáng yang é hkyô jihkũm nuqguq kã hun kat rã haí le a bò nghut ri. Haú mù luí, yang lé ban myí gôn wú jáng sheq, kã rã hkyô rajung jung hkãlhang ngò myàng abe nghũ, nungmoq banshoq bãng é hí mã le, je riyhang nàng Hkohlâm Agripa é hí mã le, yang lé ngò lhoq htoq shit é nghut lhê.

²⁷ Hkãsu mù gã le, htóng byú rayuq yuq lé dé kat é hkún, yang lé hun é mara a wó tũn shit lé gi, a htuk nghũ luí, ngò myit lhê." gã ri.

26

Poluq É Hí Hpyang Lhê É Nyí Yap Hkyô

¹ Haú hkún, Agripa gi, Poluq lé, "Nàng, náng matú dang tai rã ahkáng wó bê." ga taí ri.

Haú mù luí, Poluq loq tũ kat mù mara a bo é hkyô taí é gi,

²⁻³ "Hkohlâm Agripa ê, nàng gi, Yudaq byu pé é htungking banshoq eq taí htíng lhum é hkyô hkat hkangmó lé, gyai sê to sũ nghut é yanmai, Yudaq byu pé ngo lé hun é mara hkat hkangmó lé, ngò hkũ-nyí náng é hí mã mara a bò é hkyô myang taí é gi, ngã matú gabú hpo yang nghut ri nghũ myit yu nyi lhê; haú mù luí, ngã dang lé myit hing é eq gyô yù byi laq nghũ, dũng tóngbán kat lhê.

⁴ Ngò gi, zoshàng hkún mai, ngã amyũ mã le, Yerusalem wã mó mã le, hkãsu kut nyi kô lo é hkyô lé, Yudaq byu pé lhunglhang bang gi, sé gũ nghut akô.

⁵ Yangmoq gi, ngo lé hí hkún mai sé kô é yanmai, ngò, ngamoq é noqkuq htũng mã é tarã htan dik é hpúng mã bo é Hparishe rayuq nghut é hkyô lé, sakse hkãm naũ kô é nghut jáng, yangmoq wó hkãm lhê.

⁶ Nghut kôlhang, doqdân é huí zo rã matú, ahkuí ngò shí mã yap tô é gi, Garai Gasang eq ngamoq é íchyí ìwa pé lé byí tô é danggidiq lé myit myoqbyũ nyi é yanmai nghut lhê.

⁷ Ngamoq é byũ myũ raxe í hú gi, danggidiq jeju haú lé wó hkam yũ shoq ga, Garai Gasang lé nyí myín noqkuq dojàu shikut nyi bum akô; Hkohlâm wã é, myit myoqbyũ hkyô hau é yanmai, ngo lé Yudaq byu pé mara hun bum akô nghut ri.

⁸ Garai Gasang gi, shí bê bang lé dum lhoq tui lhê gã é hkyô lé, a wó lùm nghũ, haí mù myit yu akô lúh?

⁹ Ngò le, Nazaret wà byù Yesuq é myìng eq shai lhùm é dōng myo myo wó kut rá nghut lhê nghũ, gè gè yang myit yu wú bê nghut lhê.

¹⁰ Gè gè haù dōng le Yerusalem wà mó má kut wú bê nghut lhê; hkyangjong agyi pè chyáng mã é ahkáng wó yù luí, ngò gi, sân-yúng bang myo myo lé htóng mã kat pyâm é eq, yangmoq sat hui kôjáng le, ngò myit bo huí wú bê nghut lhê.

¹¹ Ngò gi, tarajong banshoq mã a lhing lhing yangmoq lé dam byi luí, Yesuq lé rhoi dang tái kó shoq shikut wú bê nghut lhê; nhik mó góng yo luí, gó mau mã é wà pé lhang jé shoq, yangmoq lé châng zing-rí wú bê nghut lhê.

Poluq Hpúng Byù Dut Lo É Hkyô

¹² Haù hkũn, radãm lé, ngò gi, hkyangjong agyi pè chyáng mai ahko ahkáng eq hkunmó lé yu chũng mù, Damaskuq myuq shut e ló nyi le,

¹³ Hkohlãm wa ê, nyigũng tu ló zó lé, bui htoq mã je duq é maubó gi, haù hkyô mã, ngò eq ngá é luzùm wui é lhinghkyuq mã, mauhkũng mai duq bó htoq lo é lé myang ri.

¹⁴ Haù hkũn, ngamoq banshoq bang myigũng mã lêng gop tô bum le, Hebre mying dōng, 'Sholuq, Sholuq, nang, ngo lé hai mù zing-rí nyi lhê lú? Zuchũn lé pik le gi, nang é matú gyai yang wui lhê.' ga luí, ngo lé tái é danghtë lé ngò wó gyô kat ri.

¹⁵ Haù mù, ngò gi, 'Yhumsing ê, nang gi, ó yuq nghut lhê lú?' nghũ luí, myi jáng, haù Yhumsing tú tái é gi, 'Nang zing-rí nyi é Yesuq nghut lhê.

¹⁶ Ahkuí toq yap aq, hkãsu mù gã le, ahkuí, nang, ngo lé myàng bê hkyô eq, ngò, nang lé tũn shit shirã nghut é hkyô pè é matú, ngá é mù wũn rá byù eq saksé dut nhãng rá dōng nang lé hkyin to rá nghũ, ngò nang chyáng lé htoq shit é nghut lhê.

¹⁷ Nang é amyú pè é loq mai le, tũngbaù pè é loq mai le, ngò, nang lé hkyi yù nyi rá nghut lhê.

¹⁸ Yangmoq, yubak hkyut pyám byi é jeju wó yù rá eq, ngo lé lumjing é yanmai, lhoq sân-yúng huí é bang eq rahá silí wunli wó hkam yù kó sháng gaq nghũ, yangmoq é myoq lhoq hpóng byi mù, mauchut hkaù mai maubó shut, Tsadán é a-tsam hkaù mai Garai Gasâng shut yangmoq lhing ló rá matú, ngò, nang lé yangmoq chyáng nhang kat rá nghut lhê.' gã ri.

Poluq Kut É Muzó Hkyô

¹⁹ Haù mù luí, hkohlãm Agripa ê, ngò gi, mauhkũng mã é myoqwup shing-rãn haù lé a gyô é a wó é nyi nghut lhê.

²⁰ Ngò gi, yangmoq myit lhing luí, Garai Gasang shut lhing taù lò mù, myit lhing bê hkyô lé, hkyí zó loq zó dōng mai tũn shit kó sháng gaq nghũ, sãng-hi mã Damaskuq myuq mã nyi é bãng chyáng mai hí luí, Yerusalem wà mó mã é bãng chyáng mã le, Yuda mau gón mã é bãng chyáng mã le, tũngbaù pè chyáng mã le, hkô kyo bê nghut lhê.

²¹ Hau é yanmai, Yudaq byu pé gi, ngo lé noqkuq yhũm mã chyp yù luí, sat pyám rá da kô é nghut lhê.

²² Nghut kôlhang, ngò gi, hkũ-nyí jé shoq Garai Gasâng eq garúm é lé wó yù luí, ahkuí shí mã yap to mù, tiq ko banshoq bang lé saksé wó hkãm kyô é nghut lhê.

²³ Ngò tái é mã, Hkrisduq gi, hpuzo luí, shí bê bang mai sãng-hi dui toq lò mù, Yhãng é amyú eq tũngbaù amyú pé lé maubó é hkyô lé wó tái kyo rá nghut

lê ga luí, dut lò rà hkyô lé, myiqhtoi pé eq Mosheq taí tô é hkyô mai lai luí, ngò gotú haí le a taí é nghut lê." gâ ri.

²⁴ Yhang haú su ga mara a bo é hkyô taí é lé, Hpestu gi, "Poluq ê, nàng na bê! Lùm mhoq myô yu é yanmai na bê nghut ri." ga luí, htê mó eq dang lat taí hpyit kat ri.

²⁵ Poluq kúm gi, "Aróng wó dik é Hpestu ê, ngò gi, nâ é a nghut, ngò taí é dang gi, tengmán é dang eq dang gyíng nghut lê.

²⁶ Shí hkyô lé hkohkâm wa yhang le sê to gù nghut lê mù, yhâng é hí má ngò a gyuq a kyum taí é nghut lê. Hkâsu mù gâ le, shí hkyô gi, nungwò má kut é a nghut é yanmai, hkohkâm wa yhang a bo sé é gi, haí le a joq ra nghut lê nghú, ngò myit lum nyi lê.

²⁷ Hkohkâm Agripa ê, nàng gi, myiqhtoi pé é dang lé lumjíng lê lú? Nàng lumjíng é hkyô lé ngò sê lê." ga tú taí ri.

²⁸ Haú hkùn, Agripa gi, Poluq lé, "Razup za má, nàng, ngo lé Hkristan rayuq wó dut nhâng nhô ngam ri lú?" ga taí ri.

²⁹ Dum Poluq gi, "Razup za má nghut nghut, myáng myáng má nghut nghut, shí shamtoq-tui pé mai lai luí, nàng za a nghut, hkû-nyí ngò taí é dang lé gyô nyi é lhunglhâng bang, ngò su dut rà matú, ngò gi, Garai Gasang lé kyúdung nyi lê." ga tú taí ri.

³⁰ Haú hkùn, hkohkâm wa gi, ginwáng zau hpó eq Bernike le mù, haú má zùng tô é bang eq rahá toq yap ri.

³¹ Yhangmoq htoq ló kô é hkùn, "Shí yuq gi, sat gíng é mara eq htóng lhung gíng é mara haí le a kut shut nghut ri." ga, rayuq eq rayuq taí lhum bum akó nghut ri.

³² Agripa gi, Hpestu lé, "Shí yuq gi, yhang mai Kehta q chyáng jé rá ga a taí tô é nghut le gi, yhang lé wó nhang pyám berá nghut lê." ga taí ri.

27

Poluq, Romaq Myuq Shut Wui-sanghpo Mai E Ló É Hkyô

¹ Ahkuí, ngamoq lé Itali ming shut wui-sanghpo mai gú dap ló nhâng rà matú myit hpyit to kôluí, yhangmoq gi, Poluq eq htongbyú góbang ra-am lé, Augustuq Hkosêng é gyewap mó mâ é, Yuliu gâ é shô up gyezaú é loq má ap byí kat akô.

² Haú hkùn, Asia mau mâ é wuimau gin-gau cháng luí wà pé má wang jón ló é, Adramuti myuq mai toq é wui-sanghpo má ngamoq wang ji bê nghut lê. Htesaloni wà mó mâ é Aristakuq gâ é Makedoni byú rayuq le ngamoq eq rahá nghut lê.

³ Htang nyí, ngamoq gi, Sidun myuq má no bê nghut lê. Yuliu gi, Poluq lé shogyo mù, yhâng chyáng rá é hkyô lé yhâng é buinùm wui mai lhom lajang byi kô sháng gaq ga, yhangmoq eq é hui rá matú ahkáng byí kat ri.

⁴ Haú mai dum toq ló é hkùn, lài tau mut é yanmai, Kupru zinlóng lé lai hkaú uchyang jì lai ló mù,

⁵ Kiliki eq Pamhpuli mau mâ é wuimau đông lài byit ló le, Laiki mau mâ é Mura myuq má jé bê nghut lê.

⁶ Haú má, shô up gyezaú hpó gi, Itali ming shut dap e ló é, Alesandru myuq má é wui-sanghpo lé myang hkyup luí, ngamoq lé haú má jì nhâng bê nghut ri.

⁷ Haú mai buinyi myo myo yó yó lé za jì e ló luí, awui ahke yhang Kidu wà mó eq ang má wó jé ló jang, lài tau mut é yanmai, hí shut a wó lài ló lo mù,

ngamoq gi, lai lé cháng lui, Kreti zinlóng lé lai hkaû mù, Salamone kongzô é tú tap âng é mai lai lô é nghut lhê.

⁸ Haû mã é wuiyâm mai awui ahke ji lô lé, Lasea wà eq a wê lhûm é Yuqyo é Guhkan gâ é jowô má jé ri.

⁹ Ahkuî, buinyi tsómra lhoq lhai pyám lui, haû Zoshuq gám poi lai bê nghut é yanmai, wui-sanghpo mai sô wún le gi, gyoq chiq rá nám jé bê nghut ri. Haû mù, yhangmoq lé Poluq tai pun tai kyng é gi,

¹⁰ "Áhkaû pé ê, shí dâm lhê é wui hkyô gi, wuihke mó hui lui, wui-sanghpo eq zè pé sùm pyám rá htoq agó, nga-nhûng é asak lhang sum rá dut é hkyô lé, ngò byu myang ri." gâ ri.

¹¹ Nghut kôlhang, shô up gyezau hpô gi, Poluq é dang lé gyo rá malaî, wui-sanghpo hkâng sù eq wui-sanghpo yhumsing é dang lé, je lum ri.

¹² Guhkan haû gi, gyoqmyô* wó lhoq lhai rá su a dut é yanmai, myo hpyang gi, Hponik guhkan má wó jé le jé mù, haû má gyoqmyô lô nyi lhai rá matú chôm myit hui akô. Guhkan haû gi, Kreti zinlóng má maupyî buiwàng hkyam eq mautsûng buiwàng hkyam shut hu tô é jowô nghut ri.

Wuimau Má, Laidun Mó Htûng Hui É Hkyô

¹³ Maupyî shut mã é lai yhó le hik lô jáng, yhangmoq myit tô é má hkyak nghut bê su ngam pyám kôlui, shamtoq goknghe lé lhoq toq yû kômù, Kreti zinlóng yâm dông jî e lô bê nghut lhê.

¹⁴ Nghut kôlhang, hkâ-myháng a myáng má, Buihtoq mautsûng lai gâ é laidun mó gi, haû zinlóng mai mut lò lui,

¹⁵ wui-sanghpo lé lo mut htûng é yanmai, hí shut a wó lô lo jáng, ngamoq gi, lai mut lô é shut châng yông lô bê nghut lhê.

¹⁶ Ngamoq gi, Koda gâ é zinlóng zo lé lai hkaû uchyang yông lô nyi é hkûn, haû sakhkyîlhai lé gyaî shikut é eq wó lêng yû lui,

¹⁷ wui-sanghpo ahtoq má lêng toq to bê. Wui-sanghpo lé gi, a byoq lo shoq tuî eq tuî kîng to bê nghut lhê. Dum, yhangmoq gi, Surti gâ é semui bùm má lô kê gyâm to rá lé chiq kô é yanmai, wui-sanghpo mã é panlong pé lé lhoq nyhum hkyô yû mù, châng yông lô bekô nghut ri.

¹⁸ Laidun mó lûm htan é yanmai, htang nyî yhangmoq gi, hpugá zê pé lé hkyom dú hkyô pyám bekô nghut ri.

¹⁹ Sum nyî nghu é nyî má, yhangmoq gi, wui-sanghpo zè pé lé yhumsing é loq eq yhang hkyô pyám bekô.

²⁰ Buinyi myáng myáng, bui lé le, kyî pé lé le a myàng é eq, laidun mó za ru mut nyi é yanmai, wó lut rá nghû myit myoqbyu tô é hkyô lé, ngamoq tô pyám bê nghut lhê.

²¹ Yhangmoq zoshuq a zô é, buinyi tsómra myáng lô bê nghut mù lui, Poluq gi, yhangmoq é gung gung má yap to mù, "Áhkaû pé ê, nungmoq ngá é dang gyo lui, Kreti zinlóng mai a htoq lô é nghut le gi, shí su htên byoq é marop hui zo rá a nghut.

²² Ahkuî nghut kôlhang, ngò tai é dang lé gyô yû mù myit wum yû keg; nungmoq mã é hká yuq lé asak sum rá a nghut, wui-sanghpo za sheq htên byoq byuq rá nghut lhê.

²³ Hkâsu mù gâ le, ngo lé sing é, ngò dojaú nyi é Garai Gasâng é maumang lagyo rayuq, amàn ngá é nàm má lé yap to mù, ngo lé tai é gi,

* **27:12** Gyoqmyô lé, haû mau má laidun mó lò dut mù, yông wún le gyoq chiq nám nghut lhê.

24 'Poluq ê, hkâgyuq, Kehtaq é hí má nàng wó yap râ nghut lhê. Wuì-sanghpo shí má nàng eq rahá ji tò é lhunglhang bâng é asak lé, Garai Gasang gi, náng é yanmai, lai lai byi râ nghut lhê.' gâ ri.

25 Hau é yanmai, âhkaû pé ê, myit wum yù keq, ngo lé tai kyô é eq rajung za dut lò râ nghut lhê nghû luí, Garai Gasang lé ngò lumjúng nyi lhê.

26 Nghut kôlhang, nga-nhúng gi, zínlóng ralhum lhum má ló htúng chyap to râ nghut lhê." ga luí, yhangmoq lé i-myt tai túng ri.

27 Buinyi raxe myi nyí myín má, gunggàm yoqlé, ngamoq gi, Adria wuimau má yông lhing wún é hkûn, sanghpo hkâng bang gi, dùng yàm eq chyâng lo nyi é su gâ é lé sê gyo kat akô.

28 Haû su mù, wuì nik é lé kê wú lé, loqlam í xê kô nik é lé wó sê akô. Razup zo má dum kê wú le, loqlam raxe ngò kô za nik é lé myàng akô nghut ri.

29 Haû mù luí, luqmó má ló záng htung râ lé chiq kômù, yhangmoq gi, wuì-sanghpo htàng shut má é shamtoq goknghe myí lhum lé lhoq hkyô kat luí, mau hân bó sháng gaq ga kyûdúng nyi bum akô nghut ri.

30 Wuì-sanghpo hkâng bang gi, wuì-sanghpo lé tô pyâm to luí hpâng râ dá é myit eq, wuì sanghpo-u shut má é shamtoq goknghe pé lé lhoq hkyô râ su kut mhaû luí, sakhkyílhai lé wuì má lhoq hkyô nyi bum akô.

31 Haû mù, Poluq gi, shô up gyezau eq gyezô pé lé, "Shí bang wuì-sanghpo má a nyi le gi, nungmoq wó lut râ a nghut." ga tai ri.

32 Haû hkûn, gyezô pé gi, sakhkyílhai lé tui tò é tui lé zân hpyit kat kôluí, sakhkyílhai gi, byit gyó byuq bê nghut ri.

33 Maubó lô jáng, Poluq gi, yhangmoq banshoq bang lé zang zo râ matú myit wum byí é gi, "Nungmoq gi, myit chiq luí, zoshuq hai le a zô é, hkû-nyí raxe myi nyí myàng lô bê.

34 Haû mù luí, zoshuq rajung jung zo keq! Haû gi, nungmoq wó lut râ matú nghut lhê. Nungmoq chyâng má é ó yuq é xâm rahkat lhang byuq râ a nghut." gâ ri.

35 Haû su ga ban tai é eq, yhang gi, muk lé yù luí, yhangmoq banshoq bâng é hí má Garai Gasang jeju lé hkya-on mù, muk lé hpé luí, zô hí bê nghut ri.

36 Haû hkûn sheq, banshoq bang gi, myit wum wó yú kômù, zoshuq zô bùm bekô nghut ri.

37 Wuì-sanghpo haû má é byù lhunglhang gi, í sho nyhit xe hkyuq yuq nghut lhê.

38 Yuq hkangmó bàn zô gyí é htàng má, wuì-sanghpo sóm râ matú, sungso pé lé wuì má dú kat pyâm akô nghut ri.

Wuì-Sanghpo Htên Gyop Byuq É Hkyô

39 Myoq san za myàng jáng, yhangmoq gi, jowò haû lé a sé kôlhang, semuì-jàng chyún ralhum lé byu myàng kôluí, wó dut é nghut jáng, haû má sanghpo lé kôn gyam râ matú chôm doqdân yu akô nghut ri.

40 Haû mù, yhangmoq gi, shamtoq goknghe pé lé wuimau má hkyut hkyô pyâm tô akô. Lhaishap tui lé le hkyut yú luí, wuì-sanghpo ulhum má é panlong lé lhoq toq yú mù, lai hkyô cháng luí wuiyàm shut mut lò bê nghut ri.

41 Nghut kôlhang, semuì lo bum tô é jowò ralhum má, wuì-sanghpo ló htúng chyap byuq luí, sanghpo u gi, a wó dú lo mù, sanghpo htàng lé gi, wuìlheng èq lò bat hkyop myha pyám bê nghut ri.

42 Haû hkûn, gyezô pé gi, htongbyú pé wuili lí hpang byuq kó râ lé gyuq kô é yanmai, yhangmoq lé sat pyám râ chôm dà akô.

⁴³ Nghut kôlhang, shô up gyezau hpó gi, Poluq lé hkyi yù nàu luí, yhangmoq dâ é hkyô lé hkûm pyám mù, wuili dat li bang gi, wui má byam gyó luí wuiyàm shut hí li dap ló kó sháng ga luí le,

⁴⁴ góbang gi, siklong eq wui-sanghpo mâ é gotû zè pé má zui mù, gu dap ló sháng ga le, hkunmó hkyô kat ri. Haù dông mai lhunglhang bang gi, wuiyàm shut rago wó jé dap ló bekô nghut ri.

28

Malata Zinlóng Má Jé Nyi Tô É U Lhê Hkyô

¹ Ngamoq wó lut dap ló jáng sheq, zinlóng haù gi, Malata gâ é lé sê ri.

² Zinlóng byu pé gi, ngamoq lé shogyo myit gyai lhom tûn shit akô. Mau ru jáng wo nyi luí gyoq é yanmai, yhangmoq gi, myi mut byi mù, ngamoq banshoq bang lé hkûlum yu akô.

³ Haù hkûn, Poluq gi, htang rawaq guq tsing yù mù, myihkyóm má kat kat é hkûn, myi soq htan lò jáng, duq htân lhangmui radu gi, htoq ló mù, yhâng é loq má htê zing tô ri.

⁴ Zinlóng byu pé gi, Poluq é loq má lhangmui haù htê lhang tô é lé myàng kôjáng, "Shí yuq gi, gè gè yhang byu sat é sù teng rà dut ri; wui mai wó lut ló kôlhang, yhang asak dui nyi rà matú, Tengmán tarâ gi, a dóng lo nhung!" ga luí, rayuq eq rayuq tai lhum bum akô nghut ri.

⁵ Poluq kúm gi, lhangmui haù lé myihkyóm má ko hkyô kat luí, haí le a dut é za nyi tô ri.

⁶ Yhangmoq gi, yhânggùng wâm lò berâ, haù a nghut jáng, byodàn ratung shi hkyaq leng ló berâ, ga myit láng nyi bum akô. Nghut kôlhang, myáng myáng láng wú nyi bum le, yhang má haí le a dut lo é lé myàng kôjáng, yhangmoq é i-myt dum htaí pyám kôluí, shí yuq gi, hparà rayuq sheq nghut ri ga dum tai bum akô nghut ri.

⁷ Haù é nàm má, zinlóng agyi hpó Popli sing é maumyí pé joq tô ri. Haù yuq gi, ngamoq lé lhom te yù mù, yhâng yhùm má sum nyí yhang lalúm la-nye lhom hkûlum yu ri.

⁸ Haù u lé, Popli é yhângwa gi, ali nyé no nyi é eq wuiwam shun leq tô ri. Poluq gi, haù yuq chyáng wàng mù, kyúdung byi luí, yhâng é ahtoq má loq ke byi mù, yhang lé lhoq gè byi ri.

⁹ Haù su dut é yanmai, zinlóng mâ é nò byù góbang banshoq le, lé luí lhoq gè byi é hui bekô nghut ri.

¹⁰ Yhangmoq gi, ngamoq lé a hkyô hkyô dông hkungga kôluí, ngamoq wui-sanghpo ji mù, dum toq lò rà hkûn, ngamoq rà é gû lé châng byi kat akô nghut ri.

Romaq Myuq Má, Poluq Jé É Hkyô

¹¹ Lhamó sum hkyap lai jáng, Alesandru myuq mâ é, "Hparà zozùm nhiktàng" gâ é alhò dap é wui-sanghpo má, ngamoq wang ji htoq ló bê nghut lhê. Wui-sanghpo haù gi, gyoqmyò lé zinlóng haù má joq lai é nghut ri.

¹² Surakusa wà mó má jé jáng, haù má ngamoq sum nyí nô yu é nghut lhê.

¹³ Haù mai ji xoq lhing ló le, ngamoq gi, Regi wà mó má jé ri. Htang nyí gi, maupyí lai hik lô mù luí, í nyí nyí má nghut jáng, Potioli wà mó má jé lô bê nghut lhê.

¹⁴ Haû mã é gumang wuì ra-am eq hui luí, ngamoq lé nyhit nyí no râ matú lùng kômù, ngamoq gi, nô yù bê; hau htâng, Romaq myuq má jé ló bê nghut lhê.

¹⁵ Haû mã é gumang wuì gi, ngamoq jé lo nyi é hkyô lé wó gyo kôjáng, te yù râ ga, Api Gai gâ é wà eq Bìng Yhùm Sùm Lhum gâ é wà jé shoq lé akô. Poluq gi, hau bang lé lhom myàng jáng, Garai Gasang lé hkya-on kungtôn mù, myit wum wó yù bê nghut ri.

¹⁶ Ngamoq, Romaq myuq má jé wang ló é hkùn, Poluq gi, yhang lé zúng rà gyezo rayuq eq gotù san nyí râ matú, ahkáng wó ri.

Poluq, Romaq Myuq Má, Mungdang Hko Kyô É Hkyô

¹⁷ Buinyì sum nyí lai é htâng má, Poluq gi, hau mã é Yudaq suwún wuì lé ji yu ri. Yhangmoq jé lé bùm kôjáng, yhang gi, "Gumang wuì ê, ngò gi, nganhùng é amyù lé le, ichyí îwa pè é htungking lé le, shut shai é dông hai le a kut wú; nghut kôhang, ngò gi, Yerusalem wà mò má chyup yu é hui mù, Romaq byu pè é loq má ap byí kat é hui bê nghut lhê.

¹⁸ Romaq zau wuì kúm gi, ngo lé ban jep gôn wú jáng, ngá chyáng shí gíng é mara lé a myàng kô é yanmai, ngo lé nhang kat nau akô nghut ri.

¹⁹ Nghut kôhang, hau lé Yudaq byu pé a dóng kô é yanmai, ngò hkâsu a dat kut lo mù, Kehtaq chyáng jé râ matú dúng é nghut lhê. Hau nghut kôle, ngá amyù lé mara hún râ jowò joq é yanmai gi, a nghut.

²⁰ Haû mù luí, Israelaq amyù é myit myoqbyù hkyô* é yanmai, shí shamtoq-tuì eq tuì é ngò hui zô é hkyô eq séng luí, nungmoq eq nyo kún râ matú, ngò, nungmoq lé ji kat é nghut lhê." ga luí, yhangmoq lé tai ri.

²¹ Haû hkùn, yhangmoq gi, "Náng é hkyô eq séng luí Yuda mau mã é laiká ngamoq a wó yù nghut ri. Haû mai lé é gumang wuì ó yuq le, nàng eq séng é a ge é luhkyang lé shit kyô é a bò kó nghut ri.

²² Nghut kôhang, shí nàng lom é hpúng gi, jowò hkangmó má tai he pyâm é hui é hkyô lé, ngamoq sê é yanmai, nàng byu myang é hkyô lé ngamoq gyô wú nau ri." ga tù tai akô.

²³ Yhangmoq gi, yhang eq huí kún râ buinyì ding to kôluí, yhang bíng é yhùm má byù myo myo lé zing bum akô. Haû hkùn, yhang gi, napkyó mai myín htâng jé shoq, Garai Gasâng é mingdán hkyô lé saksé hkâm kyô é eq, Mosheq é tarâ eq myiqhtoi pè é dang má cháng mù, yhangmoq lé shikut luí, Yesuq é hkyô tai pun tai kyíng ri.

²⁴ Yhang tai é hkyô lé, ra-am gi, lumjíng bum akô; ra-am kúm gi, a lumjíng kó nghut ri.

²⁵ Yhangmoq rayuq eq rayuq hau su myit a huí lhùm bùm kô é yanmai, Poluq gi, yhangmoq lé, "Chyoiyúng Woi-nyí, Myiqhtoi Esai-aq é nhut mai nungmoq é îchyí îwâ pé lé tai é dang gi, gyai yhang têng ri. Dang hau gi,

²⁶ 'Byù hau hú chyáng é mù,

"Nungmoq gyô tsuq to kôhang, sê gyo kó rà a nghut;
wú tsuq to kôhang, wú sé kó rà a nghut.", nghù é tai aq.

²⁷ Hkâsu mù gâ le, amyù shi é i-myt gi, htan byuq luí,

yhangmoq é nohkyap gi, htu byuq bê nghut ri;

yhangmoq é myoq gi, chúm byuq bê nghut ri;

hau a nghut le gi, yhangmoq é myoq eq myàng mù,

* **28:20** Israelaq amyù é myit myoqbyù hkyô gi, Mesaia gâ é hkyi yù sú lé myoqbyù nyi é nghut lhê.

yhangmoq é nohkyap èq wó gyo luí,
 yhangmoq é i-myit má sê hkyâng kômù,
 ngá chyáng lhing lò kôluí, ngò yhangmoq lé lhoq gê byi berâ nghut lhê.*

gâ ri.

²⁸ Haú mù luí, shí Garai Gasâng é hkyi yù hkyô lé, tûngbaù pê chyáng byí kat bê nghut luí, yhangmoq lhom gyô yù berâ hkyô lé, nungmoq yhang sê nyi keq ô!" ga luí, danghkun haú taí kat é htâng má, yhangmoq gi, htoq lô byuq bùm bekô nghut ri.

²⁹ (Poluq haú su ga taí é htâng má, Yudaq byu pé gi, yhangmoq yhangchang dang jet jet lhum uchyang lô byuq bekô nghut ri.)

³⁰ Poluq gi, yhang nghô lúng é yhûm má í zân tup nyi é u lé, yhâng chyáng lé má lé é bang lé lhom hkûlum yu ri.

³¹ Haú mù, a gyuq a kyum é za, Garai Gasâng é mingdán hkyô lé hko taí kyô é eq, Yhumsîng Yesuq Hkrisduq eq sêng é hkyô lé mhocshit byí ri; yhang lé, ó le a hkûm zing to kó nghut ri.

ROMAQ

Pê Chyáng Hun Kat é Laiká (Romans)

¹ Hkrisduq Yesuq é dui-nhâng zoshâng eq lagyo dut rã matú, Garai Gasâng eq ji yu é hui luí, chyoiyúng Chyúmdang pé má,

² Garai Gasang gi, hí hí mai Yhâng é myiqhtoí pé dông danggidiq byí to bê nghut é, Yhâng é Yuqzô é hkyô nghut é, Garai Gasâng é gabú danglu é matú hkyin to hui é sù, ngò Poluq gi, Romaq myuq má nyi é, Garai Gasâng eq chyitdap é hui luí, sân-yúng bang dut rã matú jí yu é bang banshoq lé, dang kyô kat lhê.

³ Yhâng é Yuqzo haú gi, byù hkyam dông ga jáng, Dawiq é awut ashín nghut ri;

⁴ Yhang gi, shi é mai dum dui toq é dông, Garai Gasâng é Yhangzo nghut é hkyô lé, chyoiyúng hkyo é Woi-nyí dông mai, hpungwup a-tsâm eq sé nhâng bê nghut ri. Yhang gi, nga-nhúng é Yhumsing Yesuq Hkrisduq nghut ri.

⁵ Yhang dông mai le, Yhâng mying é matú le, ngamoq gi, byù myù chângjup mai byù jí yù mù, lumjínq hkyô lé châng nyi nhâng rã matú, jeju eq lagyo ayá lé wó hkam yù bê nghut lhê.

⁶ Nungmoq le, Yesuq Hkrisduq eq séng rã matú jí yù hui é bang má lòm bekô nghut ri.

⁷ Nga-nhúng é Íwa Garai Gasang eq Yhumsing Yesuq Hkrisduq chyáng má é jeju eq nungmón hkyô gi, nungmoq chyáng ru joq nyí sháng gaq ô!

Poluq, Romaq Myuq Má Ló Kum Nau É Hkyô

⁸ Nungmoq é lumjínq hkyô lé, mingkan gón má tai pyo ló bê nghut é yanmai, sâng-hi má, ngò gi, Yesuq Hkrisduq é mying mai, nungmoq banshoq bâng é matú, ngá é Garai Gasang lé, jeju hkya-on lhê.

⁹ Ngá é kyúdung dang pé má, ngò, nungmoq lé hkâ-nhám le bún nyi é hkyô lé, Yhâng é Yuqzô é hkyô gabú danglù lé hko kyô nyi é má, ngá é myit nhiklum banshoq eq dojaú é Garai Gasang gi, ngá é saksé nghut lhê;

¹⁰ Garai Gasang ô nau é nghut jáng, hkâ-í a myáng má, ngò, nungmoq chyáng wó jé lé rã hkyô htong byi rã matú, ahkuí, ngò kyúdung lhê.

¹¹ Ngò gi, nungmoq lé, woi-nyí hkyô eq séng é chyunghuq wó gâm byi mù, nungmoq lé wum-o wó lhoq kinq byi rã matú, nungmoq lé gyai yhang myàng nau nyi ri.

¹² Haú su nghu é gi, nga-nhúng rayuq eq rayuq é lumjínq hkyô dông mai, nungmoq eq ngò, myit wum byí é hui rã matú nghut lhê.

¹³ Gumang wui é, ngò gi, haú tungbaú pê chyáng mai ashi wó yu é eq rajung za, nungmoq chyáng mai le ashi wó yú rã matú, nungmoq chyáng lé jé rã nghú adam dâm dâ wú é nghut kôhang, ahkuí jé shoq hkûm tang pyám hui é hkyô lé, nungmoq lé sé nhâng nau ri.

¹⁴ Ngò gi, Grik pé lé le, Grik a nghut bang lé le, hpaqchyí bò bang lé le, hpaqchyí a bò bang lé le, chyín dap to sù nghut lhê.

¹⁵ Haú nghut é yanmai, ngò gi, Romaq myuq má é bang nungmoq lé le, haú gabú danglù gyai yhang hko kyo nau nyi é nghut lhê.

16 Haù gabú danglù hkyô má, ngò gi, a hoq é nghut lhê; hkâsu mù gà le, haù gi, sâng-hi má Yudaq byu pé, hau htâng túngbaù pé má, lumjǐng é sù yuq hkangmò lé hkyi yu é wó hui nhâng rã nghut é, Garai Gasâng é hpungwup a-tsam nghut lhê.

17 Hkâsu mù gà le, lumjǐng myit mai wó yù luí, lumjǐng myit má gǐng nyi é, Garai Gasâng chyáng mã é dingmán hkyô lé gi, gabú danglù haù má hpông shit bê nghut ri. Haù gi, "Haù dingmán sù gi, lumjǐng myit mai asak dùì rã nghut lhê."[☆] ga kã tô é eq rajung za nghut ri.

Xángzo Byu Pé Htoq Má Garai Nhkmo-yô É Hkyô

18 Haù tengmán hkyô lé, yhumsing é agè ashop hkyo èq zik hkùm pyám é byu pé é agè ashop hkyô eq garai a bo é hkyô pé banshoq htoq má, mauhkúng mai Garai Gasâng é nhikmo-yo hkyô lé hpông shit bê nghut ri.

19 Haì mù gà le, Garai Gasang gi, Yhang eq sêng é hkyô, yhangmoq lé san za tún shit bê nghut é yanmai, Garai Gasang lé sé âng é hkyô gi, yhangmoq chyáng san za dut bê nghut ri.

20 Hkâsu mù gà le, mau htoq xâng hkun mai, hpan tô é zè pé lé wú jáng, Yhâng é a byu-myang é isâm nghut é, ahtum abyuq é hpungwup a-tsam eq Garaì é myit sâmlai lé gi, san za wó myâng, wó sê gyô é nghut lhê. Haù mù luí, byu pé gi, mara mai wó he lut rã hkyô a joq lo nghut ri.

21 Haì mù gà le, yhangmoq gi, Garai Gasang lé sê to kôlhang, Yhang lé Garaì dông a shigyaú kô é eq, jeju a hkya-on kó nghut ri; yhangmoq myit é hkyô pé gi, akóm dut byuq é eq, nhik a gyíng é yhangmoq é myit nhiklhum gi, chut byuq bê nghut ri.

22 Yhangmoq gi, hpaqchyí bò bang nghut lhê ga kôlhang, a-ngok é bang dut byuq bekô nghut ri.

23 Haù mù, htên byoq a sê é Garai Gasâng é hpungwup shingkan lé, htên byoq sê é byù zòng, nghoq lhô, dusak lhô eq yê jung dusak lhô pé èq, htaì lhik pyám bekô nghut ri.

24 Hau é yanmai, Garai Gasang gi, yhangmoq é gungdu lé rayuq eq rayuq hpau a tap lhum kó rã matú, a sansêng é gungsho zùm-yap hkyô kut rã nghut é, yhangmoq é yut yut ô nau é i-myi má, yhangmoq lé ap pyám bê nghut ri.

25 Yhangmoq gi, haù Garaì Gasâng é tengmán hkyô lé, mhaù é hkyo èq htaì lhik pyám kômù, hpân Sù lé noqkuq dojaù rã malaì, mhaù hkyô nghut é hpan tô é zè pé lé noqkuq mù, dojaù akô nghut ri. Hpân Sù haù gi, ahtum abyuq hkya-on hui sù nghut ri. Amen.

26 Haù nghut é yanmai, Garai Gasang gi, yhangmoq lé, ahoq ahì é yut yut ô nau hkyô má ap pyám bê nghut ri. Yhangmoq é myiwe wui lháng gi, htúng akying lé tô pyám kômù, haù eq shai é dông htaì lhik pyám nyi akô nghut ri.

27 Haù eq rajung za, yuqgè wui le, myiwe wui eq zum é htúng akying lé tô pyám kômù, rayuq eq rayuq, myi su nyé shoq yut yut ô nau lhum kômù, yuqgè yhangchang rayuq eq rayuq agot a-ù hkyô kut shut lhum kôluí, yhangmoq kut shut é eq gíngdán é yubak dam lé, yhumsing gùng yhumsing hkam yù nyí bekô nghut ri.

28 Hau htoq agó, haù Garaì Gasang lé sê é hkyô gi, akyú bo é a nghut ga yhangmoq myit yù kô é yanmai, a kut âng é hkyô kut nhâng rã matú, Garaì Gasang gi, yhangmoq lé, htên byoq sê é myit má ap pyám é nghut lhê.

☆ 1:17 Hbk 2:4

²⁹ Yhangmoq gi, agè agau hkyô ajung jung, agè ashop hkyô, myoqnoq hkyô eq a jú lhum é hkyô pé bying jup tô é bang dut bekô nghut ri; manon é, byù sat é, mabyoq jishum htoq é, mhaú zô é eq myit goi bo é pé le bying bum ri.

³⁰ Yhangmoq gi, lumu é bang, gansang é bang, Garai lé a jú é bang, byù rhoi é bang, nghutbun é bang, gyang é bang, agè ashop kut râ hkyô lhoq htoq é bang, mó wui é jino a gyô é bang nghut akô.

³¹ Yhangmoq gi, a gyng a hâng é bang, gidig a zung é bang, chyt myit a bo é bang, shogyo nhikmyin a sê é bang nghut akô.

³² Haú pé lé kut é bang gi, shí gíng lhê gâ é, Garai Gasang é dingmán tarâ joq é lé, yhangmoq sê to kôlháng, haú pé lé, yhangmoq xoq kut nyi kô é htoq agó, haú hkyô lé kut é bang lé le, hkyá-on waq toq akô nghut ri.

2

Garai Gasang Tarâ Jéyang É Hkyô

¹ Haú mù luí, góyuq lé tarâ jéyang é sù nang ê, nang gi, mara mai wó he lut râ hkyô a joq lo; hkâsu mù gâ le, nang yhang jéyang nyi luí, mù haú pé lé, nang kut nyi é yanmai, byù góbang lé jéyang é hkun, nang gung nang mara byi nyi bê nghut ri.

² Haú đông kut nyi é bang lé, Garai Gasang gi, tengmán é đông tarâ jéyang é lé, nga-nhung sê nyi lhê.

³ Haú mù, byù za nghut to luí, góbang lé gi, jéyang mù, yhumsing gi, haú đông roq cháng kut nyi é sù nang ê, nang gi, Garai Gasang é tarâ jéyang hkyô mai wó hpang lut râ su ngam nyi lhê lú?

⁴ Haú a nghut jáng, nang gi, Garai Gasang é ge é hkyo eq nang lé myit wó shuí lhung nhang é lé a sê é za, Yhâng é agun agó é ge é hkyô lé le, myit hing é hkyo eq jân shirang é hkyô lé le, wú tiq pyâm nyi lhê lú?

⁵ Nghut kôlháng, nang é myit htân hkyô eq myit a lhung é nhiklhum é yanmai, haú Garai Gasang dingmán é đông tarâ jéyang shit râ nghut é, Yhâng é nhikmo-yô é buinyi má hkâm zo râ nhikmo-yo hkyô lé, yhumsing gung yhang hkong tô nyi bê nghut ri.

⁶ Garai Gasang gi, yuq hkgangmó lé, ó le ó kut é má cháng luí, hkâm zo nhâng râ nghut lhê.

⁷ Jân shirang mù, ge é hkyô kut nyi é đông, hpungwup shingkang lé le, aróng eq htên byoq a sê é hkyô lé le, ho é bang lé, Yhang gi, ahtum abyuq é asak byi râ nghut lhê.

⁸ Nghut kôlháng, haú yhumsing wuízat hkyô za hô luí, tengmán hkyô lé he-ngik pyám mù, agè ashop hkyô lé cháng bâng é matú gi, nhikmo-yo hkyô eq nhikjum yo hkyô jé râ nghut lhê.

⁹ Wuíhke hkyô eq iyon yon hkyô gi, agè ashop kut é xângzo byù yuq hkgangmó chyáng jé râ nghut lhê; sâng-hi má Yudaq byu pé chyáng jé mù, tungbaù pé chyáng le jé râ nghut lhê.

¹⁰ Nghut kôlháng, hpungwup shingkang, aróng eq nguingón hkyô gi, haú ge é hkyô kut é bang yuq hkgangmó chyáng jé râ nghut lhê: sâng-hi má Yudaq byu pé chyáng jé mù, tungbaù pé chyáng le jé râ nghut lhê.

¹¹ Hkâsu mù gâ le, Garai Gasang gi, myoqdong a hkyin é Sù nghut lhê.

12 Haù jep é tarâ lé a sê é mara kut shut é bang lhunglhang gi, jep é tarâ dông a nghut é za htên byoq kó râ nghut lhê. Haù jep é tarâ hkaù má mara kut shut é bang lhunglhang gi, jep é tarâ dông jéyáng é hui zo kó râ nghut lhê.*

13 Hkâsu mù gà le, haù jep é tarâ lé wó gyô é bang lé, Garai Gasâng é hí má dingmán bang gà é a nghut é za, jep é tarâ lé châng kut é bang za sheq, dingmán bang gà é hui râ nghut lhê.

14 Haù jep é tarâ lé a wó é tungbaù pé gi, jep é tarâ hkyô lé, yhang baù yhang châng nyi kô é hkûn, jep é tarâ lé a wó kôlhang, yhumsing gùng yhumsing é matú tarâ dut bekô nghut ri.

15 Yhangmoq gi, haù jep é tarâ hkyô pé lé, yhangmoq é i-myt unghkaù má kâ to bê nghut é lé, tûn shit bekô nghut mù, yhangmoq é myit má hkâm zô é hkyô le, haù lé saksé hkâm byi nyi é eq, yhangmoq myit é hkyô gi, ahkuí mara hun kat, ahkuí mara hkyut kat kut nyi ri.

16 Haù hkyô gi, ngò taí pyo é gabú danglù eq rajung za, byu pê é zaù nghop tô é hkyô pé lé, Hkrisduq Yesuq dông mai Garai Gasâng eq tarâ jéyáng é buinyi má dut râ nghut lhê.

Yudaq Byu Pé Eq Jep É Tarâ

17 Nghut kôlhang, nàng gi, nàng gùng nàng Yudaq byu rayuq nghut lhê ga mù, haù jep é tarâ lé lumhkau nyi é eq Garai Gasang lé xoq é hkyô má nghutbùn nyi é sù;

18 Yhâng ô nau é hkyô lé sê é eq haù jep é tarâ mhoqshit é hkyô wó yû bê nghut é yanmai, je ahkyak é hkyô lé sê gâm hkoq é sù;

19 haù jep é tarâ má, hpaqchyí eq tengmán hkyo é alik wó sù nghut é yanmai, haù myoqjit bâng é matú hkyô-u shê sù eq mauchut hkaù má é bâng é matú maubó nghut sù;

20 byù ngok pé lé mhoqshit sù eq zoshâng wui é sará nghut sù nghut é lé, sê gyô to sù nghut é nghut le gi,

21 nàng, góbang lé mhoq byi sù nhîng, yhumsing gùng yhumsing a mhoq yû lú? A wó hkau ga hko taí luí nhîng, nàng gi, hkaù lhê a nghut lú?

22 Su-myi sulàng lú hkyô a wó kut ga byu pé lé taí luí nhîng, nàng gi, su-myi sulàng lú hkyô kut lhê a nghut lú? Hparà lô lé a jú dik sù nàng gi, noqkuq yhúm lé hpyoq zo hpyoq shuq nyi lhê a nghut lú?

23 Jep é tarâ eq séng luí nghutbun sù nàng gi, haù jep é tarâ lé lu laí é dông, Garai Gasang lé a hkungga kut lhê a nghut lú?

24 Haù gi, "Garai Gasâng é myîng gi, nungmoq é yanmai, tungbaù pê chyáng lhoq hpoí pyâm é huí ri."* ga kâ tô é eq rajung za nghut ri.

25 Haù jep é tarâ lé nàng châng é nghut jáng, ahpyo-kuq hpyit hkyô gi, akyû bò bê nghut ri. Nghut kôlhang, nàng, jep é tarâ lé lu laí é nghut jáng, a hpyit é eq rajung za dut bê nghut ri.

26 Ahpyo-kuq a hpyit kôlhang, jep é tarâ hkyô pé lé châng é bang lé gi, ahpyo-kuq hpyit bê bang dông ge sôn byi lhê a nghut kó lú?

27 Kâ tô é tarâ lé wó mù, ahpyo-kuq hpyit hkam to gù nghut é, tarâ lu laí é sù nàng lé, gungsho má ahpyo-kuq a hpyit kôlhang, jep é tarâ lé châng é sù gi, mara hûn râ nghut lhê.

* **2:12** Haù jep é tarâ lé a sê bang gà é gi, tungbaù pé lé gà é nghut luí, haù jep é tarâ hkaù má é bang gà é gi, Yudaq byu pé lé gà é nghut lhê. * **2:24** Esai 52:5

²⁸ Hkâsu mù gà le, shinggan má za Yudaq byù nghut é sù gi, Yudaq byù kyîng a nghut; gungsho má za ahpyo-kuq hpyit é gi, ahpyo-kuq hpyit kyîng a nghut.

²⁹ Ahte myit hkaû má Yudaq byù nghut sù za, Yudaq byù kyîng nghut lhê. Kâ tô é tarâ dông a nghut é za, Woi-nyî eq myit má ahpyo-kuq hpyit é gi, ahpyo-kuq hpyit kyîng nghut bê. Haù yuq é hkya-on kungtôn hkyô gi, byù mai lo é a nghut, Garai mai lo é ru nghut lhê.

3

Garai É Lhumzui Hkyô

¹ Haù dông ga jang, Yudaq byù rayuq dut nyi é gi, hai akyû hkâm zo râ lú? Ahpyo-kuq hpyit hkyô gi, hai akyû bò râ lú?

² Hkyô hkangmó má gyai akyû bò lhê! Je hí má gi, haù Garai Gasâng é mungdang lé yhang, yhangmoq lé ap byi bê nghut ri.

³ Yhangmoq mâ é ra-am lumjîng myit a bo é nghut le gi, hkâsu kó lú? Yhangmoq lumjîng myit a bo é yanmai, Garai Gasâng é lhumzui hkyô lé akyû a bò nhâng wó dut râ lú?

⁴ Hká dông le a wó dut!

"Haù mù, nàng dang tai é hkûn, dingmán é hkyô wó lhoq htoq râ eq,

nàng jéyáng huí é hkûn, ùng râ nghut lhê."*

ga kâ tô é eq rajung za, byù yuq hkangmó gi, byù-mhaù dut kôlháng, Garai Gasang gi, tengmán nyî sháng gaq.

⁵ Nghut kôlháng, nga-nhúng é a dingmán hkyô gi, Garai Gasâng é dingmán hkyô lé san za je lhoq htoq shít é nghut lhê; haù nghut jáng, nga-nhúng hkâsu nghû tai râ lú? Nga-nhúng lé Garai Gasang nhikmo-yô é hkyô gi, Yhang a tarâ mù nghut lhê lú? (Ngò gi, byù hkyam dông tai htîng é nghut lhê.)

⁶ Ratsuí lháng a nghut! Haù su ru nghut le gi, haù mingkan lé, Garai Gasang hkâsu wó jéyáng râ lú?

⁷ Rayuq yuq, "Ngò mhaù é hkyô gi, Garai Gasang tengmán é hkyô lé lhoq ko jat mù, Yhâng é hpungwup shingkang lé je wó lhoq hu nhang é nghut le nhîng, haù mù luí, ngò, yubak byù rayuq dông mara byí é hui zô nyi ra shirà lú?" ga tai dang-rháng râ nghut lhê.

⁸ "Ge é hkyô htoq sháng gaq, nga-nhúng, agè ashop hkyô kut sháng." nghû haù mù a tai kô é lú? Dang haù lé ngamoq tai é nghut lhê ga luí, ngamoq lé lumù gansang é dông byù ra-am tai akô. Haù bang gi, mara dam byí é hui zo gîng bang nghut akô.

Dingmán Byù A Nyi

⁹ Haù jáng, hkâsu nghû lo râ lú? Nga-nhúng gi, je gè bang nghut lhê lú? Ratsuí lháng a nghut. Yudaq byù nghut nghut, tungbaù pé nghut nghut, yubak mara hkaù mâ é bang chyat nghut lhê nghû, ngamoq tai san kyô wú bê nghut lhê.

¹⁰ Chyúmdang má kâ tô é le,

"Dingmán é byù a nyi, rayuq lháng a nyi nghut ri;

¹¹ Sê gyô é byù rayuq le a nyi, Garai Gasang lé ho é byù le a nyi nghut ri;

¹² Lhunglháng bang gi, lhîng ló byuq bekô; yhangmoq gi, hpau a ðap bang chyat dut byuq bekô nghut ri.

Ge é kut sù ó a nyi, rayuq lháng a nyi nghut ri."*

gâ ri.

¹³ "Yhangmoq é hkyung gi, hpông tô é lup pé nghut akô; yhangmoq é shô gi, mhaû akô."*

"Yhangmoq é nhutwuî pé má gi, shíduq bò lhangmui é duq dap bum ri."*

gâ tô ri.

¹⁴ "Yhangmoq é nhut pé gi, nhing myíng nhing htê eq myit nò danghko baú byíng zan tô ri."*

gâ tô ri.

¹⁵ "Yhangmoq é hkyî pé gi, byù sat sui lhoq htoq râ matú, lawán nau akô;

¹⁶ Yhangmoq sô nyi é hkyô pé gi, htên byoq é eq wuîhkê é ahkô tông tô é nghut mù,

¹⁷ ngingón é hkyô lé gi, yhangmoq a sé kó nghut ri."*

gâ tô ri.

¹⁸ "Yhangmoq é myoq hí má Garai Gasang lé gyuq hkunggâ é hkyô, a bò kó nghut ri."*

gâ tô ri.

¹⁹ Byù yuq hkanmó é nhut gi, tù taí jang a joq dut byuq mù, mingkan gón gi, Garai Gasang é hí má mara bo é bang dut nyi sháng gaq ga, haû jep é tarâ má taí é lhunglháng gi, jep é tarâ ô má nyi é bang lé taí é nghut é hkyô lé, nga-nhúng sê lhê.

²⁰ Haû mù luí, jep é tarâ lé châng é đông mai, ó yuq le, Yhâng é hí má dingmán sù gâ é wó hui râ a nghut; jep é tarâ đông gi, yubak mara bo é hkyô lé wó sê yu é za nghut lhê.

Lumjǐng Jǎng, Dingmán Sù Wó Dut É Hkyô

²¹ Ahkuí kúm gi, jep é tarâ đông a nghut é za, haû jep é tarâ eq myiqttoi laik pé mai saksé hkâm tô é Garai Gasang chyáng má é dingmán hkyô lé, sé nhâng bê nghut ri.

²² Garai Gasang chyáng má é dingmán hkyô haû gi, Yesuq Hkrisduq lé lumjǐng é đông mai nghut mù, lumjǐng bang banshoq htoq má jé é nghut lhê. Gamhkuí é hkyô a joq.

²³ Hkâsu mù gâ le, lhunglhâng bang gi, yubak mara kut shut bê bang chyat nghut mù, Garai Gasang é hpungwup shingkanng lé a hkyit hkap byuq lo kó nghut ri.

²⁴ Ahkuí kúm gi, Hkrisduq Yesuq mai lo é hkyi yù hkyô đông, Garai Gasang é jejú eq, mara hkyut san byí é lai lai wó hui bê nghut ri.

²⁵ Garai Gasang gi, Yesuq é sui lé lumjǐng bǎng matú, shíhtaí gunglik hkungga ralhùm đông, Yesuq lé byí pyám bê nghut ri. Haû gi, lai lò bê yubak mara lé lhut pyám byi shoq, Garai Gasang myit hǐng byi bê nghut é yanmai, Yhâng é tengmán hkyô lé tǔn shit é nghut ri.

²⁶ Garai Gasang haû su kut é gi, Yhǎnggǔng yhang dingmán Sù nghut é eq, Yesuq lé lumjǐng é sù lé mara hkyut san byí é Sù nghut râ matú, ahkuí lhê ipyat má, Yhǎng é tengmán hkyô lé shit byí é nghut lhê.

²⁷ Haû su nghut jǎng, nghutbun jowò joq ri lú? A joq. Hai tarâ mai a joq dut byuq é lú? Haû jep é tarâ châng é yanmai nghut lhê lú? A nghut, lumjǐng hkyô é yanmai sheq a joq dut byuq é nghut lhê.

²⁸ Hkâsu mù gâ le, byù gi, haù jep é tarâ châng é dông a nghut é za, lumjìng luí, mara hkyut san byi huí é hkyô lé, ngamoq lum nyi lhê.

²⁹ Garai Gasang gi, Yudaq byu pê é Garai Gasang za nghut lhê lúhú? Túngbaù pê é Garai Gasang le a nghut lúhú? Nghut lhê, túngbaù pê é Garai Gasang le nghut lhê.

³⁰ Hkâsu mù gâ le, Garai Gasang gi, rayuq za nghut é yanmai, rajung za lumjìng luí, ahpyo-kuq hpyit hkam é bang lé le, ahpyo-kuq a hpyit é bang lé le, Yhang, mara hkyut san byi râ nghut lhê.

³¹ Haù nghut jáng, nga-nhúng gi, lumjìng myit hau èq, jep é tarâ lé lhoq hpoi pyám râ lúhú? Ratsuí lhang a nghut! Nga-nhúng gi, jep é tarâ haù lé lhoq gíng tíng é bang ru nghut lhê.

4

Abraham, Mara Hkyut San Huí É Hkyô

¹ Haù su nghut jáng, nga-nhúng é íchyi íwa Abraham gi, haù hkyô mai hai wó sê yu ri nghù, taí râ lúhú?

² Abraham gi, zui sai é dông mai, mara hkyut san byi huí é ru nghut le gi, yhang nghutbun jang joq râ nghut lhê; nghut kôlhang, Garai Gasang é hí má gi, yhang haù dông a nghut.

³ Chyúmdang má hkâsu gâ tô ri lúhú gâ le, "Abraham gi, Garai Gasang lé lumjìng bê nghut mù, yhang lé, dingmán sù ga són byi bê nghut ri."* gâ ri.

⁴ Zui sai é sù gi, yhang é zuihpau lé, chyunghuq dông wó yu é a nghut é za, wó yù gíng luí, wó yu é ru nghut lhê.

⁵ Nghut kôlhang, zui sai é hkyô dông a nghut é za, haù agè ashop hkyô lé mara hkyut san byí é Garai Gasang lé lumhkau é sù gi, yhang é lumjìng myit é yanmai, dingmán sù ga són byi huí é nghut lhê.

⁶ Haù eq rajung za, yhang zui sai é hkyô dông a nghut é za, Garai Gasang èq dingmán sù ga són byi huí é, Garai Gasang chyáng mã é shimân jeju wó é sù eq séng luí, Dawiq taí é gi,

⁷ "Tarâ lu lai é lé mara hkyut pyám byi huí é eq yubak mara lé nghop pyám byi huí é bang gi, hkungsô wó nyi ri.

⁸ Bo tô é mara lé, Yhumsing èq mara a són byí é hui sù gi, hkungsô wó nyi ri."* gâ ri.

⁹ Haù sù é jeju gi, ahpyo-kuq hpyit hkâm bâng é matú za nghut lhê lúhú? Ahpyo-kuq a hpyit bâng é matú le nghut lhê lúhú? Hkâsu mù gâ le, Abraham é lumjìng myit lé, dingmán sù ga són byi bê nghut lhê nghù, ngamoq taí nyi bê nghut lhê.

¹⁰ Haù su són byí é gi, hkâ-nhám nghut lhê lúhú? Ahpyo-kuq hpyit hkâm é htâng má lúhú? A nghut jáng, hí má lúhú? Haù gi, ahpyo-kuq hpyit hkâm é htâng má a nghut é za, hí má ru nghut lhê.

¹¹ Hau htoq agó, Abraham gi, yhang, ahpyo-kuq hpyit a hkam yù shí é hkún mai, lumjìng luí wó é dingmán hkyô gâ é dizik nghut é, ahpyo-kuq hpyit masat lé myang hkam yù bê nghut ri. Haù mù, yhang gi, haù ahpyo-kuq hpyit a hkam yù kôlhang, lumjìng é lhunglhang bang lé dingmán bang ga són byí é wó huí râ matú, haù bâng é íwa dut bê nghut ri.

12 Haù ahpyo-kuq hpyit hkâm é za a nghut, nga-nhùng é iwa Abraham, ahpyo-kuq hpyit a hkam yù shi má wó é lumjúng hkyo é hkyi-kám lé cháng luí ahpyo-kuq hpyit bâng é iwa le, yhang nghut ri.

13 Míngkân é amyú hkúng xoq pé dut rã ga, Abraham eq yhâng é awut ashín pé lé byi tô é danggidíq gi, jep é tara é yanmai a nghut é za, lumjúng hkyô mai lo é dǐngmán hkyô dǐng ru nghut lhê.

14 Hkãsu mù gà le, jep é tarã dǐng nyi yap é bang gi, amyú hkúng xoq pé nghut é nghut jǎng, lumjúng hkyô gi, akyú a bo é eq, danggidíq gi, hpau a dap é dut byuq lhê.

15 Haù jep é tarã gi, nhikmo-yo hkyô lhoq htoq é nghut lhê; nghut kǒlhang, jep é tarã a joq jǎng gi, tarã lu lai hkyô le joq rã a nghut.

16 Haù mù luí, danggidíq gi, Abraham é awut ashín lhunglháng bâng chyáng, jeju mai za lo é eq gǐngtǐng nyi é dut sháng gaq ga, lumjúng hkyô mai lo é nghut lhê. Haù gi, jep é tarã má lòm bâng é matú bau za a nghut, Abraham é lumjúng hkyô má lòm bâng é matú le nghut lhê. Abraham gi, nga-nhúng lhunglháng bâng é iwa nghut ri.

17 "Ngò gi, nang lé, byù myú myo myô é iwa dut nhâng bê."* ga kã tô é eq rajung za, haù shi byuq bê bang lé wó lhoq dui é eq a joq wú é zé lé joq shoq wó kut é, yhang lumjúng é sù Garai Gasâng hí má, Abraham gi, nga-nhúng é iwa nghut lhê.

18 "Náng é awut ashín pé le, haù eq rajung za myô lò rã nghut lhê."* ga yhang lé tai kyô to bê eq rajung za, yhang gi, myit myoqbyù jowò haí a joq kǒlhang, lumjúng luí myoqbyu nyi é nghut mù, byù myú myo myô é iwa dut bê nghut ri.

19 Yhang gi, rashô zàn kô jé byuq bê nghut mù, yhânggùng gi, shi é gyá dut é hui zô é eq Sarah é zoyhúm shibó le shum byuq kǒlhang, yhang gi, lumjúng myit a yom byuq nghut ri.

20 Hau htoq agó, Garai Gasâng é danggidíq eq séng luí, a lumjúng a dut é eq hê myit mhô myit a dut é za, yhâng é lumjúng myit lé saí lhoq gǐng tǐng mù, Garai Gasang lé hkya-on kungtôn luí,

21 Garai Gasang gi, Yhang byi tô é danggidíq eq rajung za wó kut rã a-tsam bô sù nghut é lé, yhang myit zǐng nyi ri.

22 Hau é yanmai, "Yhang lé, dǐngmán sù ga són byi bê nghut ri."* gã tô é nghut lhê.

23 "Yhang lé, són byi bê." ga, kã tô é dang gi, yhang é matú za a nghut,

24 nga-nhúng é Yhumsǐng Yesuq lé, shi é mai lhoq dui toq yú sù Garai Gasang lé lumjúng luí, Yhang èq dǐngmán bang ga són byi rã nghut é, nga-nhúng é matú le nghut lhê.

25 Yhumsǐng Yesuq gi, nga-nhúng é yubak marã é matú, shi hkám byi rã dǐng ap pyâm é hui luí, nga-nhúng, mara hkyut san byi é hui rã matú, lhoq dui toq é hui bê nghut ri.

5

Nguóngón Hkyô Eq Gabú Hkyô

1 Haù mù luí, nga-nhúng gi, lumjúng é dǐng mai mara hkyut san byi é hui bê nghut é yanmai, nga-nhúng é Yhumsǐng Yesuq Hkrisduq dǐng, Garai Gasang eq buinùm wó xoq yú bê nghut lhê.

² Yesuq é yanmai, nga-nhúng gi, ahkuí wó yu to bê jeju shí má, lumjínq luí wó wáng bê nghut mù, Garai Gasâng é hpungwup shíngkang lé myoqbyu luí gabú gumrong nyi lhê.

³ Haú za a nghut, nga-nhúng gi, wuîhke jamjau hkyô pé má le gabú gumrong nyi lhê. Hkâsu mù gâ le, wuîhke jamjau hkyô gi, hkam jan hkyô lhoq htoq ri;

⁴ Hkam jan hkyô gi, myit a-tsam lhoq htoq lhê; myit a-tsam gi, myoqbyu to hkyô lhoq htoq é lé, nga-nhúng sê lhê.

⁵ Myoqbyu to hkyô haú gi, nga-nhúng lé myit wum gyui nhang é a nghut; hkâsu mù gâ le, Garai Gasang gi, Yhâng é chyitdap myit lé, Yhang mai, nga-nhúng lé byí tô é Chyoiyúng Woi-nyí dông, nga-nhúng é i-myt unghkaú má hut kat byí bê nghut ri.

⁶ Hkâsu mù gâ le, nga-nhúng gi, a-tsam a bò dut tô ashí u lé, ahkyíng hkyak má yhang, Hkrisduq gi, yubak dap bang nghut é nga-nhúng é matú shí hkám byi bê nghut ri.

⁷ Gè gè ga jáng, dínqmán su é matú shí hkám byi rá byù gi, shau rá nghut lhê; nghut kôlháng, byù gè rayuq é matú kúm gi, wám shí hkám é byù nyi sé lhê.

⁸ Nghut kôlháng, nga-nhúng gi, yubak dap bang nghut nyi ashí hkûn, nga-nhúng é matú Hkrisduq shí hkám byí é má, Garai Gasang gi, Yhâng é chyitdap myit, nga-nhúng lé shit byi bê nghut ri.

⁹ Nga-nhúng gi, ahkuí, Yhâng é sui mai mara hkyut san byí é hui bê nghut mù, Yhâng é yanmai, Garai Gasâng é nhikmo-yo hkyô mai, hkyi yu é je riyhang hui rá nghut lhê.

¹⁰ Hkâsu mù gâ le, nga-nhúng gi, Garai Gasâng é gyè pé nghut nyi ashí u le, Yhâng Zo shí hkám byí é dông, Garai Gasang eq buinùm wó xoq yu é hui bê nghut lhê. Wó xoq yu to bê nghut jáng, nga-nhúng gi, Yhâng é asak dông mai, gè gè yhang hkyi yu é hui rá nghut lhê.

¹¹ Haú su za a nghut, nga-nhúng gi, nga-nhúng é Yhumsîng Yesuq Hkrisduq dông mai, buinùm wó xoq yu é jeju lé, ahkuí wó yu to bê nghut mù, Yhâng é yanmai, Garai Gasang má le, gabú gumrong nyi lhê.

Shi É Gi, Adam É Yanmai, Dui É Asak Gi, Hkrisduq É Yanmai

¹² Byù rayuq dông mai, yubak mara gi, mingkan má jé wáng bê nghut luí, shí-nò hkyô gi, yubak marâ é yanmai châng jé bê nghut ri; haú dông mai, byù lunglhang bang gi, yubak dap bang chyat nghut byuq mù, shí-nò hkyô gi, byù lunglhang bâng chyáng jé bê nghut ri.

¹³ Hkâsu mù gâ le, haú jep é tarâ lé a byi shimá, yubak mara gi, mingkan má joq to bê nghut lhê. Nghut kôlháng, jep é tarâ a joq shí é hkûn gi, yubak mara lé mara su a ngàm shí é nghut lhê.

¹⁴ Haú su ga kôlháng, Adam su hkunmó lé lu lai é dông mara a kut shut bâng é ahtoq má lhang, shí-nò hkyô gi, Adâm é ipyat mai Mosheq é ipyat jé shoq up nyi bê nghut ri. Adam gi, jé lé lò rá su é azông nghut ri.

¹⁵ Nghut kôlháng, jeju chyunghuq gi, haú mara kut shut é hkyô su a nghut; hkâsu mù gâ le, mara kut shut é byù rayuq é yanmai, byù myo myo shi pyâm é nghut le gi, Garai Gasâng jeju eq Yesuq Hkrisduq gâ é byù rayuq é jeju mai lo é chyunghuq gi, byù myo myô é htoq má hkâ-í yhang byíng mui nyi ri-nhung!

¹⁶ Garai Gasâng jeju chyunghuq gi, byù rayuq kut é yubak mara su a nghut; hkâsu mù gâ le, tarâ jéyáng é hkyô gi, byù rayuq é mara má châng mù, mara

dam byî é hkyô lhoq htoq é nghut lhê; nghut kôlhang, jeju chyunghuq gi, tarâ lu lai bang myo myo má cháng mù, mara hkyut san byi hkyô lhoq htoq é nghut lhê.

¹⁷ Hau htoq agó, byù rayuq tarâ lu lai luí, haù rayuq é yanmai, shî-nò hkyô up nyi bê nghut lhê, ahkuí kúm, haù Garai Gasâng é agùn agó shimân jeju eq dingmán hkyo é chyunghuq lé hap yu é bang gi, Yesuq Hkrisduq gâ é byù rayuq dông mai, je riyhang asak ùi hkyô má uphâng nyi kó rá nghut lhê.

¹⁸ Haù mù luí, tarâ lu lai é hkyô ralhúm é yanmai, byù lhunglhang bang gi, mara dam byî é hui zo kô é su, dingmán hkyo é muzó ralhúm é yanmai, byù lhunglhang bang gi, asak ùi hkyô eq sêng é mara hkyut san byi hkyô lé wó bê nghut ri.

¹⁹ Hkâsu mù gâ le, byù rayuq jino a gyô é yanmai, myo myo gi, yubak dap bang dut byuq é su, byù rayuq jino gyô é yanmai, myo myo gi, dingmán bang gâ é hui kó rá nghut lhê.

²⁰ Haù jep é tarâ jat é gi, tarâ lu lai hkyô je myo rá matú nghut lhê. Nghut kôlhang, yubak mara myô jat é hkûn, jeju gi, je riyhang myô jat lo é nghut lhê.

²¹ Haù mù, yubak mara gi, shî-nò hkyô dông uphâng bê su, jeju gi, nga-nhúng é Yhumsing Yesuq Hkrisduq é yanmai, ahtum abyuq é asak wó byî é dingmán hkyô dông up rá nghut lhê.

6

Hkrisduq Eq Rading Ralhum

¹ Haù nghut jáng, nga-nhúng gi, hkâsu nghú tái rá lúh? Jeju myô jat lò sháng gaq nghú, nga-nhúng, yubak mara kut xoq nyi rá lúh?

² Haù su a nghut sháng gaq! Nga-nhúng gi, yubak mara eq shi gang bê bang nghut lhê; hkâsu mù haù má wó ùi nyi lò rá lúh?

³ Hkrisduq Yesuq eq rading ralhum za dut rá matú, wui-myhup hkâm yù bê bang nga-nhúng banshoq gi, Yhâng é shî hkâm hkyô má le rading ralhum za dut rá matú, wui-myhup hkâm yù bê nghut é lé, nungmoq a sé kó lúh?

⁴ Haù mù luí, Hkrisduq gi, Íwâ é hpungwup shingkâng èq, shî bê mai lhoq ùi toq huí é su, nga-nhúng le, asak asik dông wó ùi nyi sháng gaq nghú, nga-nhúng gi, wui-myhup hkâm é dông, Yhang eq rahá, shî hkâm é eq myhup yhum é hui bê nghut lhê.

⁵ Nga-nhúng gi, Yhang shî hkâm é hkyô má, Yhang eq rading ralhum za dut bê nghut jáng, Yhâng é dum ùi toq hkyô má le, Yhang eq rading ralhum za hkyak dut rá nghut lhê.

⁶⁻⁷ Hkâsu mù gâ le, shî bê sù gi, yubak mara mai lhoq lhut é hui bê nghut é yanmai, nga-nhúng gi, yubak marâ é jùn dut nó a ra lo mù luí, yubak mara gùng gi, lhoq htên pyâm é hui rá matú, nga-nhúng é byù xau gi, Yhang eq rahá jén sat pyâm é hui bê nghut é hkyô lé, nga-nhúng sê lhê.

⁸ Haù mù, nga-nhúng gi, Yhang eq rahá shî hkâm bê nghut jáng, Yhang eq rahá ùi nyi rá nghut lhê nghú, lumjínghê.

⁹ Hkâsu mù gâ le, Hkrisduq gi, shî bê mai lhoq ùi toq é hui bê nghut mù, Yhang gi, dum wó shi lo rá a nghut é lé, nga-nhúng sê lhê; shî-nò hkyô gi, Yhang lé hkâ-nhám le wó sing to rá a nghut lo.

¹⁰ Yhang shî hkâm é shî-nò hkyô gi, banshoq bâng é matú, yubak mara eq séng luí radàm za shî hkâm byi bê nghut ri; nghut kôlhang, Yhang ùi nyi é asak gi, Garai Gasâng hí má ùi nyi é nghut lhê.

11 Haû eq rajung za, nungmoq gi, yubak mara eq shi gang lui, Hkrisduq Yesuq đông Garai Gasâng é matú asak dui nyi lhê nghû, sôn yù keq.

12 Haû mù lui, nungmoq é htên byoq sê é gungdu má, yubak mara lé hkâ-uphkâng nhâng, uphkâng nhâng kô é nghut jâng, gungdu yut yut ô nau é agê ashop hkyô lé, nungmoq châng é nghut bê.

13 Nungmoq é gungdu showui showang pé lé, agê ashop hkyô é chùng zê pé đông yubak mara má hkâ-ap byi pyám kô, shí bê mai lhoq dui toq yù huí é bang su, yhumsing gùng yhumsing, Garai Gasâng chyáng kúm ap byi keq; nungmoq é gungdu showui showang pé lé, dingmán hkyô é chùng zê pé đông, Garai Gasâng chyáng ap byi keq.

14 Hkâsu mù gâ le, nungmoq gi, jep é tarâ hkaû má a nghut lô é za, jeju hkaû má nghut nyi bekô yanmai, yubak mara gi, nungmoq lé sîng sù wó dut râ a nghut lo.

Dingmán Hkyô É Jùn Pé

15 Haû jâng gi, hkâsu kó lú? Nga-nhúng gi, jep é tarâ hkaû má a nghut lô é za, jeju hkaû má nghut nyi bekô yanmai, mara wó kut shut kó râ lú? Haû su a wó kut!

16 Nungmoq gi, rayuq yuq é jino gyo râ matú, yhumsing gùng lé jùn pé đông ap pyâm é hkún, shí-nò hui râ nghut é yubak marâ é jùn đông nghut kôlhang, dingmán hkyô wó râ nghut é jino gyo hkyô nghut kôlhang, nungmoq châng nyi é nghut le gi, nungmoq, haû é jùn dut bê lé, a sé kó lú?

17 Nungmoq gi, yubak marâ é jùn dut wú bê bang nghut kôlhang, nungmoq hkam yu to bê mhoqshit hkyô lé, nungmoq é myit nhikhum banshoq èq cháng bekô nghut é yanmai, Garai Gasâng lé jeju hkyô-on sháng.

18 Nungmoq gi, yubak marâ é jùn dut nyi kô é hkún, dingmán hkyô èq hkyô é jùn dut bekô nghut ri.

19 Nungmoq gi, sê gyô é nyan má wum nyhôm é bang nghut kô é yanmai, byu pé sê gyo râ đông ngò tái râ ga jâng: nungmoq gi, nungmoq é gungdu showui showang pé lé, a sansêng é hkyô eq agê ashop hkyô myô jat nhang é má jùn đông lhang ap byi wú bekô nghut é su, ahkuí gi, chyoiyung hkyô wó yù râ matú, haû pé lé, dingmán hkyô má jùn đông ap byi keq.

20 Nungmoq gi, yubak marâ é jùn dut nyi kô é hkún, dingmán hkyô èq uphkang é mai lut nyi kô é nghut lhê.

21 Ahkuí, nungmoq hoqjung nghû wú htoq é pé gi, haû u lé, hai akyû wó yù kô é lú? Hau pé gi, shi byuq é má htùm é chyat nghut ri.

22 Nghut kôlhang, ahkuí gi, nungmoq, yubak mara mai lhoq lhut é hui bekô nghut mù, Garai Gasâng é jùn dut bekô nghut ri; hau é akyû gi, chyoiyung hkyô wó yu é nghut mù, ahtum abyuq é asak wó râ nghut lhê.

23 Hkâsu mù gâ le, yubak marâ é ahpau gi, shi é hkyô nghut ri; nghut kôlhang, Garai Gasâng é chyunghuq gi, nga-nhúng é Yhumsing Hkrisduq Yesuq é yanmai, ahtum abyuq é asak nghut ri.

7

Tarâ Mai Lut É Hkyô

1 Gumang wui ê, ngò gi, tarâ lé sê é bang nungmoq lé tái nyi lhê: haû tarâ gi, byù rayuq lé, yhang, asak dui nyi é u lé za wó uphkang é lé, nungmoq a sé kó lú?

² Dangké, ikun wàng bê myiwe myhí rayuq gi, yhâng é yhumsing hpó asak dui nyi é ahkying má, tarâ eq up zing tô é hui ri; nghut kôlhang, yhâng é yhumsing hpó shi byuq é nghut jáng gi, haù ikun wàng tarâ mai, yhang wó lut bê nghut ri.

³ Haù nghut é yanmai, yhâng é yhumsing hpó asak dui nyi ashí u lé, yuqgè góyuq eq háng lhum é nghut jáng gi, yhang lé, sulàng lú sù ga kó rá nghut lhê. Nghut kôlhang, yhâng é yhumsing hpó shi byuq é nghut jáng gi, yhang, tarâ haù mai lut bê nghut luí, yuqgè góyuq eq háng lhum kôlhang, sulàng lú sù a nghut lo.

⁴ Haù mù luí, ngá é gumang wui ê, nungmoq le, haù shi byuq é mai lhoq dui toq yù hui bê sù Yuqgè chyáng wó xoq mù, nga-nhúng gi, Garai Gasang lé ashí wó zui byi sháng gaq ga, Hkrisduq é gungdu đông mai, jep é tarâ eq shi gang bê nghut lhê.

⁵ Hkâsu mù gâ le, nga-nhúng, yubak gungsho má nghut nyi é hkún, nga-nhúng gi, shí-nò hkyô é ashí zui sháng gaq ga, jep é tarâ é yanmai htoq lo é yubak yut yut ô nau é hkyô gi, nga-nhúng é gungdu pé má mù zui nyi é nghut lhê.

⁶ Nghut kôlhang, ahkuí gi, nga-nhúng lé up zing tô é jep é tarâ eq shi gang bê nghut mù, jep é tarâ mai lut bê nghut é yanmai, kâ tô é hkyô xau đông a nghut é za, Woi-nyí é hkyô sik đông nga-nhúng dojaù nyi é nghut lhê.

Jep É Tarâ Eq Yubak Mara

⁷ Haù jáng, nga-nhúng hkâsu tái rá lhu? Jep é tarâ gi, yubak mara nghut lhê lhu? Ratsuí lhang a nghut! Gè gè ga jáng, haù jep é tarâ đông mai za a nghut le, yubak mara lé, ngò wó sé é a nghut. Hkâsu mù gâ le, "myoqnoq myit hkâbó"✧ ga jep é tarâ má a tái tô é nghut jáng, myoqnoq é hkyô lé, ngò sé rá a nghut.

⁸ Nghut kôlhang, yubak mara gi, hkunmó é ahkáng lé chùng mù, ngò má myoqnoq hkyô jung hkangmó lhoq htoq byí ri; hkâsu mù gâ le, jep é tarâ hkaù má a nghut jáng, yubak mara gi, shí é za nghut lhê.

⁹ Ngò gi, tarâ hkaù má a nghut é za asak dui wú bê nghut lhê; nghut kôlhang, haù hkunmó htoq lô jáng, yubak mara gi, dui lò mù, ngò gi, shí bê nghut lhê.

¹⁰ Haù mù luí, asak dui nhâng rá matú nghut é hkunmó haù gi, shí-nò hkyô dut byuq é lé, ngò wó sé é nghut lhê.

¹¹ Hkâsu mù gâ le, yubak mara gi, hkunmó é ahkáng lé chùng mù, ngo lé mhaù yù luí, hau eq ngo lé shí nhang ri.

¹² Hau pé lé wú jáng, jep é tarâ gi, chyoiyúng ri; haù hkunmó gi, chyoiyúng, dingmán é eq ge é nghut ri.

¹³ Haù nghut jáng, ge é hkyô haù gi, ngá é matú shí-nò hkyô dut byuq bê lhu? Haù đông a nghut! Nghut kôlhang, yubak mara lé gi, yubak mara đông hkyak wó lhoq htoq shit rá matú, haù ge é hkyô đông mai, yubak mara gi, ngò má shí-nò hkyô lhoq htoq bê nghut luí, yubak mara gi, gè gè yhang agè ashop dut é lé, hkunmó đông mai tún shit é nghut lhê.

¹⁴ Hau htoq agó, jep é tarâ gi, woi-nyí eq sêng é hkyô nghut é lé, nga-nhúng sê lhê; nghut kôlhang, ngò má gi, gungsho eq sêng é hkyô za bo é nghut luí, yubak mara má jùn đông ung zô é hui bê nghut lhê.

¹⁵ Ngò hai kut nyi é hkyô lé, ngò a sé. Hkâsu mù gâ le, ngò kut nau é hkyô lé gi, a kut é za, ngò a jú é hkyô lé kut é yanmai nghut lhê.

¹⁶ Ngò a kut nau é lé kut é nghut jáng gi, haù jep é tarâ ge é lé, ngò myit huí é nghut lhê.

¹⁷ Ahkuí gi, haù lé ngò yhang kut nyi é a nghut lo, ngò má lúng tô é haù yubak sheq kut é ru nghut lhê.

¹⁸ Ngò má, nghut bê, ngá é yubak gungsho má ge é hkyô haí le a bo é lé, ngò sê lhê. Hkâsu mù gâ le, ge é hkyô lé kut nau é myit ngò má bò kôlhang, haù lé a wó kut htoq nghut ri.

¹⁹ Hau é yanmai, ngò kut nau é ge é hkyô lé gi, a kut é za, ngò a kut nau é agè ashop hkyô lé gi, ngò xoq kut nyi ri.

²⁰ Ahkuí, a kut nau é hkyô lé ngò kut nyi é nghut jáng, haù lé ngò yhang kut nyi é a nghut lo é za, ngò má lúng tô é haù yubak sheq haù lé kut nyi é ru nghut lhê.

²¹ Haù mù, ge é hkyô lé ngò kut nau é hkún, ngò má agè ashop hkyô htoq lô lô mù é tarâ lé, ngò myang ri.

²² Hkâsu mù gâ le, ngò gi, Garai Gasâng é tarâ lé, ngá é i-myt unghkaù má myit nguì gabú nyi lhê.

²³ Nghut kôlhang, ngá é gungdu showui showang pé má bo é gotû tarâ gi, ngá é i-myt tarâ eq majan zân lhùm é nghut luí, ngá é gungdu showui showang hkaù má mù zui nyi é yubak é tarâ má, ngo lé shúmbyû dut nhang é lé, ngò myang ri.

²⁴ Ngò gi, shogyo rayhup dut sù nghut ri-nhung! Shí nhang é gungdu shí mai, ó yuq wá, ngo lé wó hkyi yù rá lúh?

²⁵ Nga-nhúng é Yhumsing Yesuq Hkrisduq đông mai wó lut bê nghut mù, Garai Gasang lé jeju hkyá-ôn nyi lhê!

Haù mù luí, ngò yhang, myit é đông gi, Garai Gasâng é tarâ lé châng lhê, nghut kôlhang, yubak gungsho đông gi, yubak é tarâ lé châng lhê.

8

Haù Woi-nyí Mai Asak Dui É Hkyô

¹ Haù mù luí, ahkuí, Hkrisduq Yesuq má nghut nyí bâng é matú gi, mara byí é hkyô a joq lô é nghut lhê.

² Hkâsu mù gâ le, asak duì hkyô eq sêng é Woi-nyí é tarâ gi, Hkrisduq Yesuq đông, yubak mara eq shí-nò hkyo é tarâ mai, ngo lé lhoq lhut yû bê nghut lhê.

³ Haù jep é tarâ gi, yubak gungshô é yanmai, wum nyhóm luí a wó kut é hkyô lé, Garai Gasang gi, yubak mara hkungga dut nhâng rá matú, yubak byu é gungghyâng đông, Yhang Zo sîng lé nhang kat é đông kut pyám bê nghut ri.

⁴ Haù mù, Garai Gasang gi, yubak gungsho đông asak a duì é za Woi-nyí đông asak duì bang nghut é nga-nhúng má, haù jep é tarâ má bo é hkyô pé lé, wó lhoq dik rá matú, gungsho ralhum má, mara lé doqdân pyám bê nghut ri.

⁵ Haù yubak gungsho đông asak duì é bang gi, gungsho yut yut ô nau é hkyô pé lé myit zuq nyi akô; haù Woi-nyí đông asak duì é bang kúm gi, Woi-nyí ô nau é hkyô pé lé myit zuq nyi akô nghut ri.

⁶ Haù yubak byu é myit gi, shí é hkyô nghut ri; haù Woi-nyí eq hking to huí su é myit kúm gi, asak eq nguingón hkyô nghut ri.

⁷ Haù yubak myit gi, Garai é tarâ ô má a nyi é htoq agó, haù lé a wó châng kut é yanmai, Garai é gye nghut ri.

⁸ Haù yubak gungshô eq hking tô é hui bang gi, Garai Gasang lé a wó gabú nhâng kó nghut ri.

⁹ Nghut kôle, Garai Gasâng é Woi-nyí gi, nungmoq chyáng lúng nyí bê nghut jáng, nungmoq gi, haù yubak gungshô èq hkang to huí é bang a nghut lô é za, Woi-nyí èq hkang to huí é bang nghut akô. Rayuq yuq gi, Hkrisduq é Woi-nyí lé a wó é nghut jáng, Hkrisduq eq a sêng é sù nghut lhê.

¹⁰ Nghut kôlháng, nàng má Hkrisduq nyi nyi é nghut jáng, náng é gungdu gi, yubak marâ é yanmai shì kôlháng, náng é woi-nyí gi, dingmán hkyo é yanmai ùi nyi ri.

¹¹ Hau htoq agó, Yesuq lé shi é mai lhoq ùi toq yù Su é Woi-nyí gi, nungmoq má nyi nyi é nghut jáng, Hkrisduq Yesuq lé shi é mai lhoq ùi toq yù Sù gi, nungmoq má nyi nyi é, Yhâng é Woi-nyí òng mai, nungmoq é, shì sê é gungdu pé lé le, asak ùi nhâng râ nghut lhê.

¹² Haù mù luí, Gumang wuì é, nga-nhúng gi, yubak gungsho òng asak ùi râ matú, wò wó é bang a nghut.

¹³ Hkâsu mù gâ le, haù yubak gungsho òng asak ùi kô é nghut jáng, nungmoq gi, shì râ nghut lhê; nghut kôlháng, haù gungshô é shut shaí hkyô lé, Woi-nyí èq sat pyám kô é nghut jáng, nungmoq gi, asak ùi râ nghut lhê.

¹⁴ Garai Gasâng é Woi-nyí èq shuì u é huì bang gi, Garai Gasâng é yhangzô pé nghut lhê.

¹⁵ Hkâsu mù gâ le, nungmoq gi, gyuq râ matú, nungmoq lé jùn dum taù dut nhang é woi-nyí lé, a hap yu é za, nga-nhúng lé zo yín yu é Woi-nyí lé hap yu tô é bang ru nghut lhê; haù mù, nga-nhúng gi, Yhang é yanmai, "Aba,* Áwa ê" nghù wut é nghut lhê.

¹⁶ Nga-nhúng gi, Garai Gasâng é yhangzô pé nghut é lé, Woi-nyí haù gi, nga-nhúng é woi-nyí eq rahá saksé hkâm nyi ri.

¹⁷ Ahkuí, nga-nhúng gi, zo wuì nghut bê yanmai, Hkrisduq eq rahá, Garai Gasâng é amyù hkúngxoq pé wó dut é nghut lhê. Nga-nhúng gi, Hkrisduq é wuìhke jamjau pé lé, gè gè yhang bo huì zô é nghut jáng, Yhâng é hpungwup shing kang lé le, bo myang hkam yù râ nghut lhê.

Htàngnùng Lhê É Hpungwup Shing kang

¹⁸ Nga-nhúng é ahkuí lhê é wuìhke jamjau hkyô pé gi, nga-nhúng lé shit râ nghut é hpungwup shing kang eq whuì râ a gingdán nghù, ngò wó myit ri.

¹⁹ Haù hpan to huí é lhunglháng gi, Garai Gasâng é yhangzô pé lé lhoq htoq shit byi râ lé, gyai yhang myit lánng nyi akô nghut ri.

²⁰ Hkâsu mù gâ le, haù hpan to huí é lhunglháng gi, akyú a bo é chyat dut byuq bê nghut ri. Haù gi, yhumsing hkyin yu é òng a nghut é za, haù su dut nhâng Sù ô nau é òng kut é nghut ri.

²¹ Haù hpan to huí é lhunglháng gi, htên byoq byuq râ matú shúm dut é mai lhoq lhut é huì luí, Garai Gasâng é yhangzô pé é hpungwup bo é luthkyô má wó wâng râ matú, myoqbyu tô é nghut lhê.

²² Haù hpan to huí é lhunglháng gi, ahkuí hkyíng jé shoq, zohkù-nò no é su nò-kying kyíng nyi kô é lé, nga-nhúng sê lhê.

²³ Haù pé za a nghut, Woi-nyí é sâng-hi ashi[†] lé wó yù bê bang nga-nhúng le, zo pé òng yín yu é jeju lé lánng uchyang, i-myt unghkaù má nò-kying kyíng é nghut lhê. Zo pé òng yín yu é jeju haù gi, nga-nhúng é gungdu hkyi xe yù hkyô nghut lhê.

* **8:15** *Aba* gâ é gi, Aramaik dang òng "áwa" gâ é lichyúm nghut lhê. † **8:23** *Woi-nyí é sâng-hi ashi* gâ é gi, Woi-nyí gi, Garai Gasang byí é chyunghuq pé mã é sâng-hi lhum nghut lhê.

²⁴ Hkâsu mù gâ le, nga-nhúng gi, myit myoqbyù hkyô haù mai hkyi yu é hui bê nghut lhê. Nghut kôlhang, byu-myang é lé myit myoqbyu é gi, myit myoqbyu é hkyô ratsui le a nghut. Yhumsing myang to bê é lé, ó yuq wá myit myoqbyù shirâ lhú?

²⁵ Nghut kôlhang, nga-nhúng gi, a wó shí é lé myit myoqbyu é nghut jáng, myit hîng hîng kut láng é nghut lhê.

²⁶ Haù eq rajung za, Woi-nyí gi, nga-nhúng wum nyhôm é hkyô má garúm byí ri. Nga-nhúng gi, hai dung râ é lé a sé kôlhang, haù Woi-nyí yhang gi, dang mai a wó tai htoq é nò-kying htê đông, nga-nhúng é matú bo dúng xoq byí ri.

²⁷ Nga-nhúng é i-myit unghkaù lé gôn wú é Sù gi, haù Woi-nyí myit é hkyô lé sê lhê, hkâsu mù gâ le, haù Woi-nyí gi, Garai Gasang ô nau é đông, sân-yúng bâng é matú bo dúng xoq byí ri.

Banshoq Lé Je Wó Ung Pyâm Râ Hkyô

²⁸ Garai Gasang gi, Yhang myit sôn tô é eq rajung za, ji yù luí, Yhang lé chyitdap bâng é matú, lhungháng lé ge é đông chyat kut é hkyô lé, nga-nhúng sê lhê.

²⁹ Hkâsu mù gâ le, Yhang Zo gi, gumang wui myo myo má zomún dut sháng gaq ga, Garai Gasang gi, hí te sê tô é bang lé, Yhang Zô é sâmlai eq wó pûng nhâng râ matú, hí mai masat to bê nghut ri.

³⁰ Hau htoq agó, Yhang, hí mai masat to bê bang lé gi, ji yu ri; ji yù bê bang lé gi, mara hkyut san byí ri; mara hkyut san byí é hui bang lé gi, hpungwup shing kang bò nhang ri.

³¹ Haù jáng gi, shí hkyô eq séng luí, nga-nhúng hai tai shirâ lhú? Garai Gasang gi, nga-nhúng hkyam shut nghut jáng, nga-nhúng lé, ó yuq wá gyê wám kut râ lhú?

³² Yhumsing é Yhangzo lé lhang a ha bûn é za, nga-nhúng banshoq bâng é matú ap byí pyâm é Sù gi, Yhang lé le, lhungháng lé le, rahá lai lai byi râ a nghut lhú?

³³ Garai Gasang eq hkyin yu to bê bang lé, ó yuq wá mara wó hún râ lhú? Garai Gasang gi, mara hkyut san byi Sù nghut ri.

³⁴ Hkrisduq Yesuq gi, shí hkám luí, shí hkám é htoq agó, shi é mai lhoq dui toq yu é hui mù, Garai Gasang é loqyo hkyam má nghut nyí luí, nga-nhúng é matú bo dúng xoq byí nyi bê nghut é yanmai, ó yuq wá mara wó byi râ lhú?

³⁵ Hkrisduq é chyitdap myit mai, nga-nhúng lé, hai eq wá wó lhoq kang râ lhú? Gunjang hui é hkyo eq luq? Wuîhke hui é hkyo eq luq? Zing-ri hui é hkyo eq luq? Mutmó hui é hkyo eq luq? Gùng chîn dut hui é hkyo eq luq? Gyuq jung eq luq? Sham eq luq?

³⁶ Haù gi,

"Náng é yanmai, ngamoq, nyí wui sat pyâm é hui nyi ri;

sat râ matú nyhi tô é sau pé lé su, ngamoq lé myit pyâm akô."[☆]

ga kê tô é eq rajung za nghut ri.

³⁷ A wó lhoq kang; nga-nhúng lé chyitdap Su é yanmai, nga-nhúng gi, haù pé banshoq lé je wó ung pyâm é nghut lhê.

³⁸ Hkâsu mù gâ le, shí kôlhang, byùn kôlhang, maumang lagyô pé nghut kôlhang, agè ashop é nat pé nghut kôlhang, shí ipyat nghut kôlhang, htang pyat nghut kôlhang, hai jung a-tsam pé nghut kôlhang,

39 htoq tsáng mâ é nghut kôlhang, a-ô tsáng mâ é nghut kôlhang, hpan tô é gotú hái nghut kôlhang, nga-nhúng é Yhumsíng Hkrisduq Yesuq má bo é Garai Gasâng é chyitdap myit mai, nga-nhúng lé wó lhoq kang pyám rã a nghut nghú, ngò gi, hkyak wó sê yu ri.

9

Garai Gasang Hkyin Yu É Israelaq Byu Pé

1 Ahkuí, ngò gi, Hkrisduq má tengmán é dang tái rã; ngò a mhaú é lé, haú Chyoiyúng Woi-nyí gi, ngá é unghkaú myit má hkyak saksé hkâm nyi ri.

2 Ngò gi, ngá é myit nhiklhum má, gyai yhang yón kuq nyi é eq ayang hpuzò nyi lhê.

3 Hkâsu mù gâ le, ngò gi, ngá é byuhú, ngá é gumang wui é matú, nhíng é huí luí Hkrisduq eq gang le lhang gè rã su gâ ri.

4 Haú bang gi, Israelaq byu pé nghut lhê. Zo yín yú huí é hkyô le, hpungwup shing kang le, dangshikaq pé le, tarã lé myang hap yu é hkyô le, noqkuq yhúm má noqkuq é hkyô le, danggidiq pé lé le, yhangmoq wó yu akò nghut ri.

5 Haú myíng hù é íchyí íwã pé gi, yhangmoq é íchyí íwã pé nghut luí, byu é hkyam dông gon jáng, Hkrisduq gi, yhangmoq amyú mâ é nghut ri. Yhang gi, lunglhang lé up é, ahtum abyuq hkya-on huí é Garai Gasang nghut ri! Amen.

6 Haú gi, Garai Gasâng é danggidiq akôm dut byuq bê nghú nau é a nghut. Hkâsu mù gâ le, Israelaq byu pé banshoq bang gi, Israelaq byú akying chyat a nghut kó nghut ri.

7 Abraham é awut ashín banshoq bang gi, yhang é zo wuí akying chyat nghú a wó tái é nghut lhê. Hau é malaí, "Isak dông mai lo é lé, náng é awut ashín nghú són byi rã nghut lhê."* gâ tô ri.

8 Radông tái sháng ga jáng, gungsho mai hku é zo wuí gi, Garai Gasâng é zo wuí akying a nghut kó, danggidiq eq sêng é zo wuí za sheq, Abraham é awut ashín pé dông són byi é nghut lhê.

9 Hkâsu mù gâ le, "Masat tô é ahkyíng má, ngò dum taú lé mù, Sarah gi, yuqzo hkú rã nghut lhê."* ga tái tô é danggidiq é yanmai nghut lhê.

10 Haú za a nghut, Rebeka é yhangzô nhiktang é íwa gi, nga-nhúng é íwa nghut su Isak rayuq za nghut lhê.

11-12 Nghut kôlhang, Garai Gasang myit hpyit to mù hkyin yu é hkyô gi, muzó mai a nghut é za, hkyin ji yú Su é yanmai nghut é lé, wó gíng nyí sháng gaq ga, haú zozúm nhik a hku lé shí é htoq agó, ge é eq a ge é muzó hái lhang a kut shimá, "Haú ko sù yuq gi, tiq sù yuq lé dojaú rã nghut lhê."* ga, Rebeka lé tái kyô tô é nghut lhê.

13 Haú gi, "Yakup lé, ngò chyitdap lhê, nghut kôlhang, Eso lé gi, a ngui é nghut lhê."* ga kã tô é eq rajung za nghut ri.

14 Haú nghut é yanmai, nga-nhúng hkâsu nghú tái rã? Garai Gasang gi, a tarã é sù nghut lhê lhu? Ratsuí lhang a nghut!

15 Hkâsu mù gâ le,

"Ngò, shogyo nhikmyin naú sù lé, shogyo nhikmyin rã nghut lhê;

Ngò, jeju byi naú sù lé, jeju byi rã nghut lhê."*

ga, Mosheq lé Yhang tái ri.

16 Haù mù luí, haù hkyin yu é hkyô gi, byù yut yut ô nau é yanmai le a nghut, shikut é yanmai le a nghut, Garai Gasâng é shogyo nhikmyîn é yanmai za nghut lhê.

17 Hkâsu mù gâ le, Chyúmdang má, "Náng chyâng Ngá é a-tsam wó tún shit râ eq mingkan gón má Ngá é mying lhoq pyo é hui râ matú sheq, Ngò, nang lé lhoq toq kat é nghut lhê." ✧ ga, Hpara-uq lé taí ri.

18 Haù mù luí, Garai Gasang gi, shogyo nhikmyin nau sù lé, shogyo nhikmyin mù, myit lhoq htân byi nau sù lé, myit lhoq htân byi ri.

19 Nungmoq mâ é rayuq yuq, "Haù jáng, Garai Gasang gi, ngamoq lé haí mù mara hun nyí ashí lú? Yhang ô nau é hkyô lé, ó yuq wá wó hkúm pyâm lhê lú?" ga, ngo lé taí kó râ nghut lhê.

20 Nghut kôlhang, Garai Gasang lé dang tu sù byù nàng gi, ó yuq wá nghut lhê lú? Saí to hui bê é zè pé gi, "Nàng, haí mù ngo lé shí su kut saí tô lhê lú?" nghú saí é Sù lé wó taí râ lú?

21 Tso-au saí sù gi, tsohtung ralhú mai za, hkik é tso-au pé eq a hkik é tso-au pé saí râ ahkáng wó lhê a nghut kô lú?

22 Garai Gasang gi, Yhâng é nhikmo-yo hkyô tún shit luí, Yhang é a-tsam lé sé nhâng nau kôlhang, htên byoq râ matú hen tô é, nhikmo-yo gíng é tso-au pé lé, myit hng hng shirang pyâm nyi é hkyô lé, taí râ jang haí joq ashí lú?

23 Hpungwup shingkâng é matú noq mai hen to bang nghut é, Yhang shogyo nhikmyin hui é bang lé, Yhâng é agùn agó é hpungwup shingkang lé sé nhâng nau mù, Yhang haù su kut é nghut jáng, taí râ haí joq ashí lú?

24 Haù bang gi, Yudaq byu pé mai za a nghut, túngbaù pé mai le ji yù hui é bang nga-nhúng nghut lhê.

25 Haù eq rajung za, Hosea laiká má Yhang taí tô é gi, "Ngá é byù myú a nghut é bang lé, 'Ngá é byù myú' nghú;

Ngò a chyt é byizo lé 'Ngò chyt sù' nghú wut râ nghut lhê." ✧

gâ ri.

26 Haù mù,

"Nungmoq gi, ngá é byù myú pé a nghut." nghú yhangmoq lé taí é jowò má yhang,

yhangmoq gi, 'Rù dui nyi é Garai Gasâng yhangzô pé' ga wut é hui kó râ nghut lhê." ✧

gâ ri.

27 Esai-aq le, Israelaq byu pé eq séng luí garu taí é gi,

"Israelaq yhangzo yhangshú pé gi, wuìshuq lung-aù yàm mâ é semuí su myo kôlhang,

myit gyó tô é bang za sheq hkyi yu é hui kó râ nghut lhê.

28 Hkâsu mù gâ le, haù Yhumsing gi, myidàm htoq má Yhâng é tará jéyang hkyô lé hân hân lhoq dik lhoq htúm pyâm râ nghut lhê." ✧

gâ ri.

29 Haù eq rajung za, hí lé Esai-aq taí tô é gi,

"A-tsam dik shoq bò sù haù Yhumsing za, nga-nhúng lé, awut ashín a myhit to byí é nghut jáng,

nga-nhúng gi, Sodom wà su dut byuq luí, Gomoraq myuq eq pung byuq râ nghut lhê." ✧

gâ ri.

Israellaq Byu Pé A Lumjǐng Kô É Hkyô

³⁰ Haù mù, nga-nhúng hkâsu nghũ tai rá lhu? Dingmán hkyô lé a châng hkat é tǔngbaù pé gi, haù lé wó yù bekô; haù gi, lumjǐng hkyo é yanmai wó yu é dingmán hkyô nghut ri.

³¹ Nghut kôlhang, tarâ eq sêng é dingmán hkyô lé châng hkat é Israellaq byu pé gi, haù lé a wó yù kó nghut ri.

³² Hai mù a wó yù kô é lhu? Yhangmoq gi, lumjǐng myit eq châng hkat kô é a nghut é za, muzó pé eq châng hkat kô é yanmai, a wó yù kô é nghut ri. Yhangmoq gi, "htung htê rá luqgok" má htǔng leng bekô nghut ri.

³³ Haù,

"Wú keq, htǔng leng rá luqgok eq myit leqbat nhâng rá luqmó cham lé, Ngò, Zi-un bùm má lheq to lui,

Yhang lé lumhkaù sù gi, hkâ-nhám le hoq hpu é hui rá a nghut."^{*}

ga kâ tô é eq rajung za nghut ri.

10

¹ Gumang wui ê, ngò gi, haù Israellaq byu pé hkyi yu é hui kó sháng gaq nghũ, gyai yhang myit shirông lui, Garai Gasâng chyáng yhangmoq é matú kyũdung byi nyi lhê.

² Hkâsu mù gà le, yhangmoq gi, Garai Gasâng é hkyô lé gyai yhang myit zuq é bang nghut é lé, ngò saksé hkâm lhê; nghut kôlhang, yhangmoq myit zuq é hkyô gi, hpaqchyí bo é đông a nghut kó.

³ Yhangmoq gi, Garai Gasâng chyáng mai jé lé é dingmán hkyô lé a sé kômù, yhumǝng dingmán bũn é hkyô lé za ho shikut nyi kô é yanmai, Garai Gasâng é dingmán hkyô hkaù má a nyi kó nghut ri.

⁴ Hkrisduq gi, lumjǐng bang yuq hkgangmó, dingmán é má wó jé kó sháng gaq ga, jep é tarâ ló htũm jang dut bê nghut ri.

⁵ Mosheq gi, "Haù pé đông châng é sù gi, haù pé mai asak ùi rá nghut lhê."^{*} ga, jep é tarâ eq sêng é dingmán hkyô lé kâ sân kyô tô é nghut lhê.

⁶ Nghut kôlhang, lumjǐng hkyô eq sêng é dingmán hkyô gi, "Náng é myit nhiklhum má, 'Mauhkũng má, ó yuq doq ló rá lhu?'"^{*} (Haù gi, Hkrisduq lé shuí gyó lò rá gà nau é nghut lhê),

⁷ haù a nghut jáng, 'Nik é jang má, ó yuq gyó wâng rá lhu?'"^{*} (Haù gi, Hkrisduq lé, shi é mai ùi toq nhâng rá gà nau é nghut lhê.), nghũ hkâtaí kó." gà tô ri.

⁸ Haù jáng, hkâsu gà tô ri lhu? "Haù mungdang gi, nàng eq chyàng nyi ri; náng é nhut má le, náng é myit nhiklhum má lé nghut nyi ri."^{*} gà tô ri. Haù gi, ngamoq hko tai é lumjǐng hkyô eq sêng é mungdang nghut lhê.

⁹ Haù mù, "Yesuq gi, Yhumsǝng nghut ri." nghũ náng é nhut eq yin yù mù, Garai Gasang gi, Yhang lé, shi é mai ùi toq nhâng bê nghut lhê nghũ, náng é myit nhiklhum má lumjǐng é nghut jáng, nàng gi, hkyi yu é hui rá nghut lhê.

¹⁰ Hkâsu mù gà le, byù gi, myit nhiklhum má lumjǐng jáng, mara hkyut san byí é hui mù, nhut mai yin yù jáng, hkyi yù huí é nghut lhê.

¹¹ Haù Chyũmdang tai é gi, "Yhang lé lumhkaù é sù ó yuq le, hkâ-nhám lháng hoq hpù é hui rá a nghut."^{*} gà ri.

^{*} 9:33 Esai 8:14; 28:16

^{*} 10:5 Nhong 18:5

^{*} 10:6 Tarâ Pun 30:12

^{*} 10:7 Tarâ Pun 30:13

^{*} 10:8 Tarâ Pun 30:14

^{*} 10:11 Esai 28:16

¹² Hkâsu mù gâ le, Yudaq byù eq tûngbaù pè é gyoro má gam hkoq é hkyô hai le a joq é za, haù Yhumsing gi, banshoq bâng é Yhumsing nghut lhê mù, Yhang lé wut dung bang lhunglhang lé, agùn agó shimân byi ri.

¹³ Hkâsu mù gâ le, "Haù Yhumsing é mying lé lêng é bang yuq hkgangmó gi, hkyi yu é hui râ nghut lhê." ✧ gâ tô ri.

¹⁴ Haù nghut lé gi, yhangmoq a lumjing é sù lé nhing, hkâsu wó wut dung kó râ lú? Yhangmoq a wó gyô wú é sù lé nhing, hkâsu wó lumjing kó râ lú? Hko kyô é sù a nyi le nhing, hkâsu wó gyo kó râ lú?

¹⁵ Nhang kat é a hui le gi, yhangmoq hkâsu kut wó hko kyo kó râ lú? Haù eq rajung za, "Gabú danglù pé hko kyo bâng é hkyi-kám pé gi, hkâ-i yhang yung ri myhi-nhung!" ✧ ga kê tô ri.

¹⁶ Nghut kôlhang, Israelaq byu pé banshoq bang gi, gabú danglù lé hap yù kô é a nghut. Hkâsu mù gâ le, Esai-aq gi, "Yhumsing ê, ngamoq é danglù lé ó yuq wá lumjing é lú?" ✧ ga tai ri.

¹⁷ Haù nghut mù luí, lumjing myit gi, danglù lé wó gyô é mai lò mù, danglù gyô yu é gi, Hkrisduq é mungdang mai lo é nghut lhê.

¹⁸ Nghut kôlhang, ngò myi kó lé: yhangmoq gi, a wó gyô wú kô é nghut lhê lú? Yhangmoq gi, wó gyo gù za nghut lhê, haù eq rajung za, "Yhangmoq é hte gi, myidâm htoq banshoq má jam bê nghut ri; yhangmoq é mungdang pé gi, mingkan htungchyûn hkgangmó má jé bê nghut ri." ✧

gâ tô ri.

¹⁹ Ngò dum myi kó lé: Israelaq byu pé gi, a sê gyo kô é nghut lhê lú? Mosheq sâng-hi má tai é gi,

"Byù rahú lhang a nghut bang eq, Ngò, nungmoq lé manôn nhâng râ; sê gyo nyan a bo é amyú eq, Ngò, nungmoq lé wú nhik-yo nhâng râ nghut lhê." ✧

gâ ri.

²⁰ Hau htoq agó, Esai-aq a gyuq a wàm tai é gi,

"Ngo lé a ho é bang gi, Ngo lé myang hô bekô nghut ri;

Ngá hkyô lé a myí é bang lé, Ngò htoq shit bê nghut lhê." ✧

gâ ri.

²¹ Nghut kôlhang, Israelaq byu pé eq séng luí, Yhang tai é gi,

"Ngò gi, jìno a gyô é eq negáng-htu é byù myú lé, nyí wuí Ngá loq lham mù ji nyi lhê." ✧

gâ ri.

11

Israelaq Byu Pé Lé A He-ngik Pyám

¹ Haù mù luí, ngò myi kó lé, Garai Gasang gi, Yhâng é byu pé lé he-ngik pyám bê nghut lhê lú? Ratsuí lhang a nghut! Ngò yhang le, Israelaq byù myú nghut luí, Abraham é awut ashín eq Ben-yamyin hú má é sù nghut lhê.

² Garai Gasang gi, Yhang te sê to gù nghut é, Yhâng é byu pé lé a he-ngik pyám é nghut lhê. Eliyaq eq séng é hkyô Chyúmdang má bo tô é lé, nungmoq a sé kó lú? Garai Gasang é hí má, yhang, Israelaq byu pé lé mara hún é gi,

³ "Yhumsîng ê, yhangmoq gi, Náng é myiqhtoi pé lé sat pyám kô é eq Náng é hkungga gyap pé lé tu lhêng pyâm akô nghut ri; ngò rayuq za myit gyó tô é nghut lui, ngo lé sat rà matú le yhangmoq ho nyi akô nghut ri."* gâ ri.

⁴ Garai Gasang gi, yhang lé, hkâsu ga tú tai é nghut lhê lú? Haú gi, "Balaq hpara é hí má hkyihput a htuoq shî é byù nyhit hkyíng lé, Ngá é matú myhit to lhê."* gâ é nghut lhê.

⁵ Haú eq rajung za, ahkuí gi, jeju yanmai hkyin yù huí é bang za myit gyó tô é nghut lhê.

⁶ Jeju yanmai nghut é nghut le gi, muzó é yanmai a nghut lo; muzó dông ru nghut le gi, jeju gi, jeju a nghut lo.

⁷ Haú nghut jáng, hkâsu lú? Israelaq byu pé gyai ho shikut kôlhang, a wó kô é lé, hkyin htoq yù huí é bang kúm gi, wó bekô nghut ri. Góbang gi, myit lhoq htân byí é huí akô nghut ri;

⁸ haú gi,

"Garai Gasang gi, hkû-nyí jé shoq, yhangmoq lé nhikshi jit é woi-nyí lé le, a wó myang é myoqjí lé le, a wó gyô é nohkyap lé le, byí to bê nghut ri."* ga kâ tô é eq rajung za nghut ri.

⁹ Dawiq tai é le,

"Yhangmoq é zangbó gi, yhangmoq é matú, dumzo eq lhai, myit leqbat jowò eq lató hpuq hkyô dut sháng gaq;

¹⁰ Yhangmoq myoq a wó myâng shoq, myoqjí lhoq chut pyám byí é huí sháng gaq;

yhangmoq é nunghkûng gi, ayang wòlai wun goí nhang é huí sháng gaq."*

gâ ri.

Tûngbau Pé Lé Hkyi Yu É Hkyô

¹¹ Ngò dum myi kó lé: Israelaq byu pé gi, a wó dum gè rà í leqbat byuq bekô lú? Ratsuí lháng a nghut! Yhangmoq é tarâ lu lai hkyo é yanmai, yhangmoq lé manôn nhâng rà matú, hkyi yù hkyô gi, tûngbau pé chyáng jé byuq é nghut lhê.

¹² Nghut kôlhang, yhangmoq é tarâ lu lai hkyô gi, mingkân é matú wó sùt hkyô eq, yhangmoq sum pyâm é hkyô gi, tûngbau pé é matú wó sùt hkyô dut é nghut jáng, yhangmoq é byíng jup hkyô gi, je riyhang kô é wó sùt hkyô dut rà nghut ri-nhung!

¹³ Nungmoq tûngbau pé lé ngò tai nyi lhê: ngò gi, tûngbau pé é lagyo nghut nyi é u má, ngá é hpungmù lé hpautap nyi lhê.

¹⁴ Haú gi, ngá é amyù pé lé manôn myit wó bô nhâng mù, yhangmoq ra-am lé wó hkyi yù rà lé myit myoqbyu é hkyô nghut lhê.

¹⁵ Hkâsu mù gâ le, yhangmoq lé he-ngik pyâm é hkyô gi, mingkân é matú Garai eq buinùm xoq hkyô dut bê nghut jáng, yhangmoq lé dum hap yu é hkyô gi, shi é mai dui toq é dông dut bê a nghut lhi?

¹⁶ Hau htoq agó, sâng-hí ashi dông nhông byí é mún ra-am gi, chyoiyúng é nghut jáng, muk htung gón gi, chyoiyúng é nghut lhê; haú amyit gi, chyoiyúng é nghut jáng, akoq pé le chyoiyúng é nghut lhê.

17 Haû tsanlun akoq pé* ra-am gi, lhoq hkyui pyâm é hui luî, yosô tsanlun a-nyuq† nghut sù nàng gi, haû pé má xoq é hui mù, haû tsanlun amyit é xù lé bo shuq lom é nghut jáng,

18 akoq haû pé lé hkâwú tiq pyâm kó. Nungmoq haû su kut é nghut jáng, nungmoq gi, haû amyit lé htuoq é a nghut é za, amyit haû sheq nungmoq lé htuoq é hkyô lé, nungmoq myit sé keq.

19 Nungmoq kúm gi, "Ngò, haû má xoq é hui rà matú sheq, akoq haû pé gi, lhoq hkyui pyâm é hui é ru nghut lhê." ga taí rà nghut lhê.

20 Haû su gi, nghut lhê. Nghut kôlhang, yhangmoq gi, a lumjîng é yanmai, lhoq hkyui pyâm é hui kômù, nungmoq kúm gi, lumjîng é yanmai, wó ging tîng nyi é nghut lhê. Hkâ gumrong nyi, gyuq kyum nyi keq.

21 Hkâsu mù gâ le, Garai Gasang gi, akoq akying pé lé a ha bûn é nghut le gi, nungmoq lé le ha bun rà a nghut.

22 Haû mù luî, Garai Gasâng é shogyo nhikmyin hkyô eq htân htân kut pyâm é hkyô lé, myit wú keq: leqbat é bang lé htân htân kut pyâm kôlhang, nungmoq gi, Yhâng é shogyo nhikmyin hkyô má xoq nyi nyi é myhâng, nungmoq lé gi, shogyo nhikmyin nyi rà nghut lhê. Haû a nghut jáng, nungmoq le, zân hpyit pyâm é hui rà nghut lhê.

23 Yhangmoq gi, a lumjîng hkyô lé tô pyâm kô é nghut jáng, dum xoq yu é hui kó rà nghut lhê; hkâsu mù gâ le, Garai Gasang gi, yhangmoq lé dum wó xoq yu é Sù nghut lhê.

24 Haî mù gâ le, yosô tsanlun gàm akoq nghut gù nungmoq lé hpyit yû mù, htûng a nghut é ðông, hô é tsanlun agàm má xoq é nghut le gi, haû akoq akying pé nghut é yhangmoq gi, ó le ó é tsanlun-ngut akying má xoq yu é lé je riyhang hui rà nghut lhê ô!

Israellaq Byu Pé Hkyi Yu É Hui Râ Hkyô

25 Haû mù, gumang wui ê, nungmoq a nghutbun kó sháng gaq nghû, zau tô é hkyô shî lé, nungmoq a sé dut rà lé, ngò a ô nau é nghut lhê: haû gi, tûngbaù pé wang lo é laké byîng é hkûn jé shoq, Israellaq byu pé ra-am gi, myit lhoq htan é hui é hkyô nghut lhê.

26 Hau htâng sheq, Israellaq amyû banshoq bang hkyi yu é hui rà nghut lhê. Haû gi,

"Hkyi yù Sù gi, Zi-un bùm mai htoq lô rà nghut lhê;
Yhang gi, Garai lé nunghtáng tô pyâm é hkyô lé, Yakup é awut ashín mai hui sêng pyâm byi rà nghut lhê.

27 Ngò, yhangmoq é yubak mara lé hui sêng pyâm byi jáng,
haû gi, yhangmoq lé Ngò byî tô é Ngá é dangshikaq nghut lhê."✧
ga kâ tô é eq rajung za nghut ri.

28 Haû gabú danglù eq séng luî ga jang, yhangmoq gi, nungmoq é matú gye nghut akô; nghut kôlhang, hkyin htoq yû hkyô eq séng luî ga jang, yhangmoq gi, myîng hû é îchyî îwa pé é yanmai, chyitdap é hui akô nghut ri;

29 hkâsu mù gâ le, Garai Gasâng é chyunghuq pé eq Yhang ji yu é hkyô lé gi, wó htaî lhik pyâm é a nghut.

30 Nungmoq gi, Garai Gasâng é jîno a gyô é bang radàm dut wú kô é nghut kôlhang, yhangmoq jîno a gyô é yanmai, ahkuî kúm, shogyo nhikmyin hkyô wó hkam yu bekô nghut é su,

* 11:17 Tsanlun akoq pé gi, Israellaq byu pé lé taí nau é nghut lhê. † 11:17 Yosô tsanlun a-nyuq gi, tûngbaù pé lé taí nau é nghut lhê. ✧ 11:27 Esai 59:20-21; 27:9

³¹ ahkuí, yhangmoq gi, nungmoq wó hkam yu é Garai Gasâng é shogyo nhikmyin hkyo é yanmai, shogyo nhikmyin hkyô lé wó hkam yù kó sháng gaq ga, yhangmoq le, ahkuí, jìno a gyo bang dut bekô nghut ri.

³² Hkâsu mù gâ le, Garai Gasang gi, byù lhunglhang bang lé, shogyo nhikmyin hkyô wó tún shit shoq ga, lhunglhang bang lé, jìno a gyo hkyo é shúm dut nhang to bê nghut ri.

Hkya-on Kungtôn Dang

³³ Ô! Garai Gasâng é agùn agó é sùt nghut é, hpaqchyí byéng-yá eq nyan hpaqchyí gi, hkâ-í yhang nik ri-nhung!

Yhâng é tará jéyâng hkyô gi, ung sê jung a nghut nhung!

Yhang kut é hkyô pé gi, hkâ-í yhang ho htoq wuí jung nghut ri-nhung!

³⁴ "Haù Yhumsing é myit lé, ó yuq wá ung sê lhê lú? Yhâng é hpaqchyí byi sù gi, ó yuq wá dut wú é lú?"^{*}
gâ ri.

³⁵ "Garai Gasâng eq jeju dum tau byi râ dut shoq, ó yuq wá, Garai Gasang lé byí wú é lú?"^{*}
gâ ri.

³⁶ Hkâsu mù gâ le, joq mijoq gi, Yhâng chyáng mai nghut mù, Yhang dông mai nghut lui,

Yhâng é matú chyat nghut ri. Haù hpungwup shing kang gi,

Yhâng chyáng ahtum abyuq ru joq nyí sháng gaq ô! Amen.

12

Dui É Hkungga Pé Dut Râ Hkyô

¹ Haù mù lui, gumang wuí ê, nungmoq é gungdu pé lé, Garai Gasang myit nguí ô nau é eq choyiýung é, dui é hkungga dông nhông byi keq nghù, Garai Gasâng é shogyo nhikmyin hkyô mai, ngò, nungmoq lé wum byí kat lhê. Haù gi, woi-nyí hkyô dông nungmoq noqkuq dojaú é hkyô nghut lhê.

² Míngkan shí lhum é sâmlai dông a cháng lo é za, myit sik wó yú râ dông nungmoq é a-kyang lé htaí pyám byi nhâng keq. Haù hkùn sheq, Garai Gasâng é ge é, myit nguí é eq gumjup é ô nau hkyô lé, nungmoq wó chyâm, wó sê gàm hkoq yú kó râ nghut lhê.

³ Hkâsu mù gâ le, ngo lé byí tô é jeju yanmai, nungmoq yuq hkan gmó lé ngò taí kôlé: nungmoq gi, yhumsing gùng lé lai shoq a nghutbùn é za, ó le ó lé, Garai Gasâng eq lumjíng myit tsing gàm byí to bê eq rajung za, myit yù gíng é í za myit yù keq.

⁴ Nga-nhúng yuq hkan gmó é gungdu ralhú má gi, gungdu showui showang pé myo myo bo é nghut lui, gungdu showui showang haù pé banshoq gi, jai chùng jang a pung é nghut lhê.

⁵ Haù eq rajung za, myo myo nghut é nga-nhúng le, Hkrisduq má gungdu ralhú má dut lui, yuq hkan gmó gi, rayuq eq rayuq gungsho sêng lhum é bang chyat nghut lhê.

⁶ Nga-nhúng lé byí tô é jeju yanmai, nga-nhúng wó é chyunghuq gi, gotú tù nghut lhê. Byù rayuq é chyunghuq gi, myiqhtoi htoí é nghut jáng, yhâng é lumjíng hkyô eq rajung za htoi sháng gaq;

⁷ dojaú é nghut jáng, dojaú sháng gaq; mhoq kyô é nghut jáng, mhoq kyo sháng gaq;

⁸ myit wum byi é nghut jáng, myit wum byi sháng gaq; ra châ é bang lé garúm byi é nghut jáng, a ha bûn é za byi sháng gaq; shuí u é nghut jáng, lumluq tung shuí u sháng gaq; shogyo nhikmyin hkyô shit é nghut jáng, gabú myit èq kut sháng gaq.

Chyitdap Myit

⁹ Chyitdap myit má gegùn labyoq a ge bò. Agè ashop dut é lé, nhik noq pyám keq; ge é lé, myit tuí nyi keq.

¹⁰ Rayuq eq rayuq, gumang chyitdap myit mai lhumzui lhum keq. Rayuq eq rayuq, yhumsing gung htoq je hpautap lhum keq.

¹¹ Myit zuq hkyô má, hkâ-nhâm le wum a lhoq shôm é za, nungmoq é woi-nyí hkyô má myit toq nyí mù, haú Yhumsing lé dojaú nyí keq.

¹² Myit myoqbyù hkyô má gabú keq; wuìhke hkyô má hkam jan keq; kyúdung hkyô má lhumzui keq.

¹³ Ra châ tô é Garai Gasâng é byu pé lé gàm byi keq. Bíng hkulum é lé rago kut keq.

¹⁴ Nungmoq lé zing-rí é bang lé shimân byi keq; shimân byi keq, hkâ-nhing kó.

¹⁵ Gabú é bang eq rahá bo gabú keq; yón é bang eq rahá bo yón keq.

¹⁶ Rayuq eq rayuq byin hpyé gohut huí nyi keq. A nghutbûn é za, nyi yap hkyô nyhúm bang eq zùm yap keq. Hpaqchyí bo é sù su hkâ-myt ngàm kó.

¹⁷ Ó yuq lé le, agè ashop é yanmai, agè ashop é đông lató hkâhpuq kó. Yuq hkangmó é myoq hí má ge é lé kut râ rago myit keq.

¹⁸ Wó dut é nghut jáng, nungmoq wó dut é í, yuq hkangmó eq nguingón shoq nyi keq.

¹⁹ Ngá é buinùm wui ê, lató a hpuq é za, Garai Gasâng é nhikmo-yo hkyô lé sheq láng nyi keq. Hkâsu mù gà le, "Ngò sheq lató hpuq râ sù nghut lhê; ngò lató hpuq râ."✧ ga, haú Yhumsing tai ri ga kê tô ri.

²⁰ Haú mù,

"Nungmoq lé gyè kut sù zòmút é nghut le gi, byi tso keq; yhang wuìshit é nghut le gi, rajung jung byi huq keq.

Haú đông kut jáng, nàng, yhâng é ulhum htoq má gyúng é myigyè bum to byi é nghut lhê."✧

ga le kê tô ri.

²¹ Agè ashop é gi, nungmoq lé a ung pyám sháng gaq, ge é hkyo èq agè ashop é lé ung pyám keq.

13

Ahkáng Ayá Wó Bàng Ô Má Nyi Râ É Hkyô

¹ Yuq hkangmó gi, up é ahkáng ayá wó bàng é a-ô má nyi ra râ nghut lhê; hkâsu mù gà le, Garai Gasâng chyáng mai za a nghut le gi, up é ahkáng ayá joq é a nghut. Joq tô é ahkáng ayá pé gi, Garai Gasâng èq byi tô é chyat nghut lhê.

² Hau é yanmai, up é ahkáng ayá lé gumlau toq é sù gi, Garai Gasang byi tô é up é ahkáng ayá lé gumlau toq é sù nghut ri; haú su kut é bang gi, tará jéyáng é hui zo râ hkyô lé ho yù nyi é bang nghut akô.

³ Hkâsu mù gà le, uphâng é bang gi, ge é hkyô kut bàng é matú gyuq nán hpo a dut é za, shut shái hkyô kut bàng é matú sheq dut é ru nghut lhê. Up é

ahkáng wó sù lé gyuq é mai lut nau lhê a nghut lí? Haù jáng, ge é hkyô kut aq, haù hkûn, yhang, nang lé hkya-on rá nghut lhê.

⁴Hkâsu mù gà le, yhang gi, náng é matú ge é akyû kut byi rá nghut é, Garai Gasâng é dui-nhâng zoshâng nghut lhê. Nghut kôhang, náng, shut shaí hkyô kut é nghut le gi, gyuq nán nyí aq; haí mù gà le, yhang gi, shâm lé ajè wun tô é a nghut. Yhang gi, Garai Gasâng é dui-nhâng zoshâng nghut mù, shut shaí hkyô kut sù lé dam byi rá matú nhikmo-yo Su é gunglik nghut lhê.

⁵Haù mù luí, dam byi rá lé chiq é yanmai za a nghut, yhumsing nhik bô rá é yanmai le, haù up é ahkáng ayá wó bâng é a-ô má nyi rá dut lhê.

⁶Nungmoq hkansê kat rá é gi, hau é yanmai le nghut lhê; hkâsu mù gà le, haù up é ahkáng ayá wó bang gi, Garai Gasâng é dui-nhâng zoshâng wui nghut lhê mù, uphkang é mù lé, ahkying bying shoq wun waq nyi akò nghut ri.

⁷Yuq hkangmó lé byi âng é eq rajung za byi keq; hkansê kat byi ang sù lé gi, hkansê kat byi keq; kang kat byi ang sù lé gi, kang kat byi keq; gyuq kyum ang sù lé gi, gyuq kyum keq; hkungga ang sù lé gi, hkungga keq.

Rayuq Eq Rayuq Chyitdap Lhum Râ Hkyô

⁸Rayuq eq rayuq chyitdap lhum é chyin mai lai luí, hai chyin le hkâdap lhum kó; hkâsu mù gà le, góyuq lé chyitdap é sù gi, haù jep é tará lé lhoq dik bê sù nghut ri.

⁹"Su-myi sulàng lú hkyô hkâkut," "Byù hkâsat," "Hkâhkau," "Hkâ-myoqnoq,"* gâ tô é hkunmó pé eq gotú hkunmó haí nghut nghut, "Náng gûng lé náng chyitdap é su, náng é chyangnâm mâ é bang lé le chyitdap aq."* gâ é tará má lo jup to bê nghut lhê.

¹⁰Chyitdap myit gi, chyangnâm mâ é byù lé a ge é haí le a kut é nghut lhê. Haù mù luí, chyitdap myit gi, haù jep é tará lé lhoq dik é hkyô nghut ri.

¹¹Haù mù, ahkuí lhê é ahkying yàm-yoq lé sê gyo luí, haù hkyô lé kut keq. Nungmoq yhup mui é mai bûn gyng rá ahkying jé bê; haí mù gà le, nga-nhûng é hkyi yù hkyô gi, lumjing hi é hkun lhê htoq má ahkuí je chyáng bê nghut ri.

¹²Haù myin ahkying gi, lai byuq ló rá za nghut bê; nyí ahkying gi, jé lô berâ nghut lhê. Haù mù luí, mauchut é muzó lé tô pyám mù, maubó é gyeiking lé wut to sháng.

¹³Ye lhaí é eq shuq wut é, ashop é đông gungsho zùm yap é eq shut é đông nyi zô lhum nau é myit bo é, mabyoq jishum htoq é eq manon é pé a kut é za, nyí-káng lhê su, ge é a-kyang đông nyi yap sháng.

¹⁴Hau htoq agó, Yhumsing Yesuq Hkrisduq lé, mebu su wut to keq; yubak gungsho ô nau é đông lhoq dik rá matú hkâ-myt kó.

14

Gumang Wui Lé A Jéyáng Râ Hkyô

¹Lumjing myit má wum nyhóm sù lé, mying myo nhô zâ é hkyô pé lé a jéyáng byí é za hap yù keq.

²Byù rayuq é lumjing myit gi, jung hkangmó zô ri; nghut kôhang, lumjing myit nyhóm sù gotú rayuq gi, mhan-haq hpoqnoq za zô ri.

³Jung hkangmó zo sù gi, a zo sù lé a ge wú tiq pyám; jung hkang jung mó a zo sù gi, zo sù lé mara a ge byi; hkâsu mù gà le, Garai Gasang gi, yhang lé hap yu to bê nghut ri.

⁴ Nàng gi, ó yuq wá nghut mù, góyuq é dui-nhâng zoshâng lé jéyáng lhê lú? Yhang, yap ging kôlhang, leqbat kôlhang, yhâng é yhumsing myit za nghut lhê. Yhang gi, wó yap ging rá nghut lhê; hkâsu mù gâ le, haû Yhumsing gi, yhang lé wó yap ging nhâng Sû nghut lhê.

⁵ Rayuq myit é gi, buinyi ra-nyí gi, gó nyí htoq je ge lhê gâ ri; dum rayuq myit é gi, nyi wú rajung za nghut lhê gâ ri. Yuq hkangmó gi, yhumsing myit yu é lé a úng-âng nyi sháng gaq.

⁶ Buinyi ra-nyí lé, ahkyak lhê ga myit yù sù gi, haû Yhumsing é matú kut é nghut ri. Zô é sù gi, Garai Gasang lé jeju hkya-ôn é yanmai, haû Yhumsing lé bun luí zô nyi ri; a zo sù le, haû Yhumsing lé bun luí Garai Gasang lé jeju hkya-ôn nyi ri.

⁷ Hkâsu mù gâ le, nga-nhúng ó yuq nghut kôle, yhumsing matú za asak dui é a nghut; ó yuq nghut kôle, yhumsing matú za shí é a nghut.

⁸ Nga-nhúng asak dui nyi le gi, haû Yhumsing é matú dui é ru nghut lhê; nga-nhúng shí byuq le gi, haû Yhumsing é matú shí é ru nghut lhê. Haû mù, asak dui nyi kôlhang, shí byuq kôlhang, nga-nhúng gi, haû Yhumsing eq sêng é bang nghut lhê.

⁹ Haû su mù, Hkrisduq gi, shí byuq bang eq asak dui bâng é Yhumsing dut sháng gaq ga, shí hkám mù dum dui toq é nghut lhê.

¹⁰ Haû mù, nàng gi, haí mù náng é gumang hpó lé jéyáng nyi lhê lú? Haí mù náng é gumang hpó lé wú tiq nyi lhê lú? Nga-nhúng lhunglhâng bang gi, Garai Gasang é tarâ jéyáng tanghkuq hí má yap rá bang chyat nghut lhê.

¹¹ Hkâsu mù gâ le,

"Haû Yhumsing gi, 'Ngò rû dui nyi é eq rajung za, Ngá é hí má hkyihput hkangmó htuq rá nghut lhê;

Garai Gasang lé, shô hkangmó eq yín yú kó rá nghut lhê.' ga tai ri."^{*}
ga kâ tô ri.

¹² Haû mù luí, nga-nhúng yuq hkangmó gi, yhumsing kut lai lo é hkyô lé, Garai Gasang chyáng shit ra rá nghut lhê.

¹³ Haû nghut mù, nga-nhúng gi, rayuq eq rayuq tarâ jéyáng lhùm é hkyô lé tô pyám sháng. Ó yuq nghut kôlhang, yhumsing é gumang é hkyowui má, myit leqbat jowò eq htung hê jowò a to byi rá matú, myit sidiq keq.

¹⁴ Haû Yhumsing Yesuq má nghut nyi é sù ngò gi, haí jung zoshuq nghut kôlhang, yhang baú yhang a sansêng a dut é hkyô lé, hkyak wó sé luí, jing nyi lhê. Nghut kôlhang, ó yuq le, rajung jung lé a sansêng ga myit yu é nghut jáng, yhang é matú, zè haû gi, a sansêng é nghut lhê.

¹⁵ Nàng zô é zoshuq yanmai, náng é gumang hpó myit a ngón é nghut le gi, nàng, chyitdap myit mai sô nyi é sù a nghut lo. Hkrisduq shí hkám byi bê sù nghut é, náng é gumang hpó lé, nàng zoshuq é đông mai hkâlhoq hten pyám.

¹⁶ Nàng, ge ri ngû myit yu é hkyô lé, agè ashop é đông hkâtaí pyám nhâng.

¹⁷ Hkâsu mù gâ le, Garai Gasang é mingdán gi, zo zo shuq shuq hkyô a nghut é za, dingmán hkyô, nguingón hkyô eq Chyoiyúng Woi-nyí má gabú é hkyô ru nghut lhê.

¹⁸ Haí mù gâ le, shí hkyô đông mai Hkrisduq lé dojaú é sù gi, Garai Gasang ô nau é sù eq byu pè eq hkya-ôn é hui sù nghut ri.

¹⁹ Haû mù luí, nguingón hkyô má nyi rá eq, rayuq eq rayuq wum byí lhum rá hkyô lé, shikut nyi keq.

^{*} 14:11 Esai 45:23

²⁰ Zoshuq é yanmai, Garai Gasâng é muzó lé hkâlhoq hten pyám. Zoshuq lunglhang gi, sansêng é chyat nghut lhê; nghut kôlhang, góyuq lé myit leqbat nhang é jung lé zô é sú gi, shut é nghut lhê.

²¹ Tsibiyiq wing shuq é eq sho zô é hkyô má nghut kôlhang, gotú hái jung kut é nghut kôlhang, náng é gumang hpó lé myit leqbat nhang é nghut le gi, a kut le je ge lhê.

²² Haú mù, haú pé eq séng luí, nàng lumjínq é hái nghut kôle, nàng eq Garai Gasâng gyoro má za joq nyi sháng gaq. Yhumsing ge lhê gâ é èq, yhumsing gùng yhumsing mara byi jang a joq é sú gi, hkungsô wó nyi ri.

²³ Nghut kôlhang, úng-âng é myit èq zô é nghut le gi, mara byi é hui ri, hái mù gâ le, yhang zô é gi, lumjínq myit mai a nghut; lumjínq myit mai a kut é hái nghut kôlhang, mara nghut ri.

15

Góyuq Lé Myit Ngón Nhâng Râ Hkyô

¹ Lumjínq hkyô má wum-o bo é nga-nhúng gi, yhumsing myit ngón râ hkyô lé a ho é za, wum-o a bò bâng é wum nyhóm hkyô lé, hkam jan byi nyi rá dut lhê.

² Nga-nhúng yuq hkanqmó gi, yhumsing é chyangnâm mâ é su é ge é hkyô dut rá matú, yhang wó kô myhang lò shoq, yhang lé lhoq ngón byi nyi sháng.

³ Hkâsu mù gâ le, Hkrisduq lháng gi, Yhânggùng yhang lhoq ngón é a nghut; haú gi, "Nang lé rhoi bâng é dang gi, Ngá chyáng gyó ke bê nghut ri."* ga, kâ tô é eq rajung za nghut ri.

⁴ Hkâsu mù gâ le, lai lò bê hkún kâ tô é lunglhang gi, nga-nhúng lé mhoq byi rá matú chyat kâ tô é nghut lhê; haú gi, Chyúmdang mã é hkam jan hkyô eq myit wum byi hkyô đông mai, nga-nhúng myit myoqbyu hkyô wó rá matú nghut lhê.

⁵ Haú hkam jan hkyô eq myit wum byi hkyô lé byi é Garai Gasang gi, nungmoq, Hkrisduq Yesuq é htâng châng nyi é u lé, nungmoq yhangchang rading ralhú za dut é woi-nyí byi sháng gaq;

⁶ haú jáng sheq, nungmoq gi, i-myt rahkat eq nhut htê ralhú èq za, nga-nhúng é Yhumsing Yesuq Hkrisduq é Yhângwa nghut Sû, Garai Gasang lé, wó hkyá-on kungtôn kó rá nghut lhê.

⁷ Haú mù luí, Hkrisduq gi, nungmoq lé hap yù bê é eq rajung za, Garai Gasâng é hpungwup shingkanq lé lhoq htoq shit rá matú, nungmoq le, rayuq eq rayuq hap yu lhum keq.

⁸ Hkâsu mù gâ le, ngò, nungmoq lé tái kôlé, haú mying hù é íchyí iwâ pé lé byi tô é danggidíq pé lé lhoq ging rá matú, Hkrisduq gi, Garai Gasâng é tengmán hkyô é malaí, Yudaq byu pé é dui-nhâng zoshâng dut bê nghut ri.

⁹ Haú mù, Garai Gasâng é shogyo nhikmyin hkyô é yanmai, haú tungbaù pé, Garai Gasang lé wó hkyá-on kungtôn kó rá nghut lhê. Haú hkyô gi, "Haú mù luí, tungbaù pé chyáng má, Nang lé, ngò hkyá-on rá nghut lhê;

Náng é mying lé, ngò hkyá-on mahkôn rá nghut lhê."*
ga kâ tô é eq rajung za nghut ri.

¹⁰ Dum,

"Tungbaù pé ê, Yhâng é byu pé eq rahá gabú nyi keq."*
gâ tô ri.

11 Dum,

"Nungmoq tũngbaù pé lhunghâng bang ê, haù Yhumsing lé hkya-on keq, byù myù lhunghâng bang ê, Yhang lé hkya-on mahkôn hkôn keq."[☆]
gâ tô ashî nghut ri.

12 Hau htoq agó, Esai-aq taí é gi,

"Yese é Amyit gi, yuq htoq lô lui, Yhang gi, byù myù chãngjup é ahtoq má up
râ sũ nghut lhê;
tũngbaù pé gi, Yhang má myit myoqbyù kó râ nghut lhê."[☆]
gâ ri.

13 Haù myit myoqbyù hkyô byí é Garai Gasang gi, Yhang lé lumhkau nyi é bang nungmoq lé, gabú hkyô banshoq eq nguingón hkyô lhoq pyíng byi sháng gaq; haù jáng sheq, nungmoq gi, Choyiýung Woi-nyí é wum-o a-tsâm eq, myit myoqbyù hkyô wó byíng mui nyi kó râ nghut lhê.

A Gyuq A Wam É Za, Poluq Laiká Kâ É Hkyô

14 Ngá é gumang wui ê, nungmoq gi, ge é hkyô byíng jup é bang, hpaqchyí má gumjup é bang, rayuq eq rayuq mhoqshit lhùm é má kúng é bang nghut é lé, ngá gũng ngò yhang hkyak lumjíng lhê.

15 Ngò gi, nungmoq lé dum lhoq pũn é dõng, ahkyak é pé ra-am lé a gyuq a wám kâ kat bê nghut lhê.

16 Hkâsu mù gâ le, tũngbaù pé gi, Choyiýung Woi-nyí dõng mai lhoq sân-yúng é hui lui, Garai Gasang eq hap yù gíng é hkungga wó dut kó sháng gaq ga, Garai Gasang é gabú danglù lé hkô râ hkyangjong é wò dõng, tũngbaù pé chyáng, Hkrisduq Yesuq é hpungmũ wũn sũ dut râ matù, Garai Gasang, ngo lé jeju byí é yanmai nghut lhê.

17 Haù mù lui, ngò gi, Garai Gasang lé dojaù é hkyô eq séng lui, Hkrisduq Yesuq má nghutbũn nyi lhê.

18 Ngò gi, ngò taí é eq zui saí é muzó dõng le, haù Woi-nyí é a-tsam chũng mù, kumlhá pé eq laklai kumlhá pé dõng le, tũngbaù pé lé, Garai Gasang é jìno gyo shoq shuì ù é má, ngo lé Hkrisduq nhang é muzó hkyô lé taí é mai lai lui, gotù hai lé le wám taí é a nghut.

19 Haù mù lui, ngò gi, Yerusalem wà mó mai Ilurikhkam mau jé shoq é hkyô awui ayàm jàm shoq, Hkrisduq é gabú danglù lé hko kyo bê nghut lhê.

20 Ngò hkâ-nhám le myit tuí nyi é hkyô gi, góyuq hi tô é apũn awang má dum a puq saí pyâm é za, Hkrisduq lé a sé shí é jowò má gabú danglù hko kyo râ hkyô nghut lhê.

21 Haù gi,

"Yhâng é hkyô lé, taí kyô é a hui shí é bang, myàng kó râ nghut lui,
a wó gyô wú é bang, sê gyo kó râ nghut lhê."[☆]
ga kâ tô é eq rajung za nghut ri.

22 Haù mù lui, ngò, nungmoq chyáng lé jé râ lé, anum num hkyikyo luqlhum dut nyi é gi, muzó hau é yanmai nghut lhê.

Romaq Myuq Lé Lô Kum Râ Sôn É Hkyô

23 Nghut kôlhâng, ahkuí gi, shí mau pé má ngò zui saí râ jowò a joq lo é nghut mù, nungmoq lé myàng nau nyi é zanwut myo myo nghut bê eq rajung za,

24 ngò, Sipin ming shut ló é hkũn, nungmoq chyáng wàng râ sôn tô lhê. Ngò gi, lai ló é hkũn, nungmoq lé lò sô kum mù, nungmoq eq rayoq zo zùm yap

ngón é htâng má sheq, ngá é hkyowui matú, nungmoq haú mai htuqbang kat rá lé, ngò myoqbyu tô lhê.

²⁵ Ahkuí, ngò kúm gi, Yerusalem wà mó mã é sãn-yúng bang lé dojaú rá matú, haú wâ shut e ló é hkyolat má nghut nyi lhê.

²⁶ Hkâsu mù gâ le, Makedoni eq Ahkaia mau mã é bang gi, Yerusalem wà mó mã é sãn-yúng bãng chyáng mã é myúng bãng é matú, garúm chyunguq hkyui tsing nau bùm bekô nghut ri.

²⁷ Yhangmoq gi, haú su kut nau bùm bekô nghut ri, gè gè ga jáng, haú gi, yhangmoq chyín dap tô é đông ru nghut lhê. Hkâsu mù gâ le, haú Yudaq byu pé é woi-nyí eq sêng é shimân jeju lé, tũgbaù pé bo hkam yù bê nghut le gi, yhangmoq é sutzê shimân jeju lé, Yudaq byu pé eq chòm chũng rá chyín dap tô é đông nghut lhê.

²⁸ Haú mù luí, ngò gi, muzó shí lhum ban kut mù, garúm chyunguq shí lé, yhangmoq wó hap yù bê lé hkyak sê é htâng má, Sipin ming shut ló rá nghut mù, lai ló uchyang, nungmoq chyáng lé sô kum rá nghut lhê.

²⁹ Ngò gi, nungmoq chyáng lé jé é hkũn, nungmoq é matú Hkrisduq é shimân jeju bying jup é èq jé lé rá nghut é lé, ngò sê lhê.

³⁰ Gumang wui ê, ngá é matú Garai Gasâng chyáng kyũdung byí é đông, ngò wum kat yhang shikut é hkyô mã nungmoq bo wãng lòm rá matú, nga-nhũng é Yhumsing Yesuq Hkrisduq eq Woi-nyí é chyitdap myit é yanmai, ngò, nungmoq lé wum tai tsuq kat lhê.

³¹ Yuda mau mã é a lumjing bãng chyáng mai, ngò hkyi yu é wó hui luí, Yerusalem wà mó mã ngò wùn waq é muzó lé, haú mã é sãn-yúng bang hap yù gíng é wó dut rá matú kyù bo dung byi keq.

³² Haú jáng sheq, ngò gi, Garai Gasang ô nau é đông mai, gabú myit èq nungmoq chyáng wó jé lé mù, nungmoq eq rahá wum-o wó yù rá nghut lhê.

³³ Haú nguóngon hkýo é Garai Gasang gi, nungmoq banshoq bang eq rahá rû nyi nyi sháng gaq ô. Amen.

16

Shi-kyám Dang

¹ Ngò gi, Kenhkrea noqkuq hpúng mã é hpungtê, nga-nhũng é gu-nhá Hpobe lé, nungmoq chyáng shichyen byí kat lhê.

² Nungmoq gi, sãn-yúng bang kut gíng é eq rajung za, haú Yhumsing mã yhang lé hap yù luí, yhang rá tô é hkyô hai nghut kôle, yhang lé htuqbang keq. Hkâsu mù gâ le, yhang gi, byù myo myo lé le, ngo lé le, gyai yhang garúm lai bê sù nghut lhê.

³ Hkrisduq Yesuq má ngò eq mù wùn luzúm nhik nghut é, Priskila eq Akula lé bo shi-kyám byi keq.

⁴ Yhangnhik gi, ngá é asak é matú, yhangnhik é asak sum rá í yhang dut wú kô é nghut mù, ngò za a nghut, tũgbaù pé é noqkuq hpúng pé banshoq le, yhangnhik lé jeju bũn lhê.

⁵ Yhangnhik é yhũm mã chòm huí zup é noqkuq hpúng lé le, bo shi-kyám byi keq.

Asia mau mã, Hkrisduq lé sâng-hi lumjing wang lo é, ngò chyitdap é Epanetu lé bo shi-kyám byi keq.

⁶ Nungmoq é matú gyai yhang shikut wú bê sù nghut é Mariq lé bo shi-kyám byi keq.

7 Ngò eq rahá htóng lúng wú bê nghut é, ngá é buinùm, Androniku eq Yunia nhik lé bo shi-kyám byi keq. Yhangnhik gi, lagyô pé má myoqdong wó su nhik nghut é htoq agó, ngá é hí má, Hkrisduq má ngò a nyi shí le nyi bê sú nhik nghut akô.

8 Haù Yhumsíng má, ngò chyitdap é sù, Ampliatu lé bo shi-kyám byi keq.

9 Hkrisduq má, ngamoq é mú zui luzúm nghut é Orban eq ngá é chyitdap luzúm Staku lé, bo shi-kyám byi keq.

10 Hkrisduq má chyam é hui mù, wó lùm bê sú, Apele lé bo shi-kyám byi keq.

Aristobulu eq sêng é yhumbyù wui lé bo shi-kyám byi keq.

11 Ngá é buinùm Herudion lé bo shi-kyám byi keq.

Haù Yhumsíng má nghut nyí bê bang, Narkiso é yhumbyù wui lé bo shi-kyám byi keq.

12 Haù Yhumsíng má mú zui shikut é myiwê nhik, Truhpena eq Truhposa lé bo shi-kyám byi keq.

Haù Yhumsíng má mú zui gyai yhang shikut é myiwe góyuq, ngá é chyitdap luzúm Persi lé bo shi-kyám byi keq.

13 Haù Yhumsíng má hkyin yu é hui bê sú, Ruhpu lé le, ngá nu dông nghut wú bê nghut é Ruhpù é yhângnu lé le, bo shi-kyám byi keq.

14 Asunkritu, Hpelegon, Herme, Patroba, Herma eq yhangmoq eq rahá nyi é gumang wui lé, bo shi-kyám byi keq.

15 Hpilologu, Yulia, Nerea eq yhâng é nhammó eq, Olumpa, yhangmoq eq rahá nyi é sân-yúng bang banshoq lé, bo shi-kyám byi keq.

16 Rayuq eq rayuq, chyoiyúng bopuq é èq shi-kyám lhum keq.

Hkrisduq é noqkuq hpúng pé banshoq gi, nungmoq lé shi-kyám dang sang kat akô nghut ri.

17 Gumang wui ê, nungmoq é lumjíng hkyô má, nungmoq mhoq hkam yù bê nghut é mhoqshit hkyô eq shai lhùm é, gam hkoq hkyô pé eq myit leqbat hkyô pé lhoq htoq é bang lé sidiq keq nghù, wum taí tsuq kat lhê. Yhangmoq lé koi pyám keq.

18 Hkâsu mù gâ le, haù sù é bang gi, nga-nhùng é Yhumsíng Hkrisduq lé dojaú é bang a nghut é za, yhumsíng é wamdaù matú dojaú é bang nghut akô. Yhangmoq gi, myit nú-nhâm é bang lé, dang ngón dang nguí dông mhaù zô akô nghut ri.

19 Nungmoq, jìno gyo kô é hkyô lé, yuq hkangmó wó gyo bê nghut ri; haù mù, ngò gi, nungmoq é matú gyai yhang gabú nyi lhê; nghut kôlhang, ge é hkyô eq séng luí gi, nungmoq hpaqchyí bò mù, agé ashop hkyô eq séng luí gi, nungmoq a bo lòm rá lé, ngò ô nau ri.

20 Nguóngón hkyo é Garai Gasang gi, a myáng má, nungmoq é hkyiwa ô má Tsadán lé nang pyeq pyám rá nghut lhê.

Nga-nhùng é Yhumsíng Yesuq é jeju gi, nungmoq eq rahá nghut nyí sháng gaq ô.

21 Ngá é mú zui luzúm Timohti gi, nungmoq lé shi-kyám dang sang kat ri; haù eq rajung za, ngá é buinùm wui Luki, Yason eq Sosipata pé le, shi-kyám dang sang kat akô nghut ri.

22 Laiká shí lé bo ká sú ngò Tertiu gi, haù Yhumsíng má nungmoq lé shi-kyám kat lhê.

23 Ngo lé le, noqkuq hpúng gón lé le, bíng hkulum é sù Ge-u gi, nungmoq lé shi-kyám dang sang kat ri.

Haû wa mâ é ngùnzui sù Erastu eq nga-nhông é gumang hpó Kuartu gi, nungmoq lé shi-kyám dang sang kat akô.

²⁴ Nga-nhông é Yhumsing Yesuq Hkrisduq é jeju gi, nungmoq lhunglhang bang eq rahá nghut nyí sháng gaq. Amen.*

²⁵ Byù myû chângjup bang lumjing luí, Yhang é jìno gyo sháng gaq ga, a-nham pyat mai haq tô é hui kôlhang,

²⁶ ahkuí, ahtum abyuq é Garai Gasâng é hkunmó é yanmai, myiqhtoi laiká pé đông hpông shit é eq sé nhâng bê nghut é, sê gyo wui é hkyo é shing-rán má cháng luí, ngá é gabú danglù eq Yesuq Hkrisduq é hkyô tai pyo é đông, nungmoq lé wó lhoq ging títg byí é,

²⁷ rayuq za é hpaqchyí bo sù Garai Gasâng chyáng, Yesuq Hkrisduq đông mai, hpungwup shing kang gi, ahtum abyuq ru joq nyí sháng gaq ô! Amen.

* 16:24 Chyúmding ra-am má chyúmbun 24 shí a bo é nghut lhê.

KORINHTUQ Pê Chyáng Hî Dàm Hun Kat é Laiká (1 Corinthians)

¹ Garai Gasang ô nau é eq rajung za, Hkrisduq Yesuq é lagyo dut râ matú ji yù huí é sù ngò Poluq eq, ngamoq é gumang hpó Sositeni gi,

² jowò hkangmó má nga-nhùng é Yhumsing Yesuq Hkrisduq é mying lé lêng é bang eq rahá, chyoiyung bang dut râ matú ji yù huí é eq Hkrisduq Yesuq má lhoq sân-yung é huí é bang nghut é, Korinhtuq myuq mâ é, Garai Gasang é noqkuq hpúng lé, dang kyô kat lhê; Hkrisduq gi, ngamoq é eq yhangmoq é Yhumsing nghut lhê.

³ Nga-nhùng é Îwa Garai Gasang eq Yhumsing Yesuq Hkrisduq chyáng má é jeju eq nguingón hkyô gi, nungmoq chyáng ru joq nyí sháng gaq ô.

Hkrisduq É Yanmai Wó É Jeju

⁴ Garai Gasang jeju lé Hkrisduq Yesuq đông mai nungmoq lé byi bê nghut mù luí, ngò gi, nungmoq é matú Garai Gasang lé ayang jeju hkya-ôn nyi lhê.

⁵ Hkâsu mù gâ le, nungmoq gi, Hkrisduq đông mai, nungmoq dang tai é hkyô banshoq eq nungmoq é sumsé hpaqchyí banshoq má je lhoq gumjup é hui bekô nghut ri.

⁶ Haù gi, Hkrisduq Yesuq eq séng luí, ngamoq saksé hkâm é hkyô têng é lé, nungmoq chyáng shit nyi é nghut lhê.

⁷ Haù mù, nga-nhùng é Yhumsing Yesuq Hkrisduq dum htoq shit râ lé, nungmoq gyai myoqbyu láng nyi é u má, nungmoq gi, woi-nyí hkyô eq séng é chyunghuq hai lé le langhpyut kó râ a nghut.

⁸ Nga-nhùng é Yhumsing Yesuq Hkrisduq é buinyi má, nungmoq lé mara hûn râ hkyô a bò shoq, Hkrisduq gi, nungmoq lé, htáng shoq gíngtíng nhang nyi râ nghut lhê.

⁹ Nga-nhùng é Yhumsing nghut é Yhang Zo Yesuq Hkrisduq eq rahá zùm yap râ matú, nungmoq lé ji yù bê sù Garai Gasang gi, lhumzui Sù nghut ri.

Noqkuq Hpúng Má Gam Hkoq Lhùm É Hkyô

¹⁰ Gumang wui ê, nungmoq hkaù má gam hkoq lhùm é hkyô pé a joq é za, nungmoq é myit eq myit sôn wú é hkyô má gumjup shoq rading ralhum za dut nyi sháng gaq, nungmoq lhunglhang bang rayuq eq rayuq byin hpyé gohut huí nyi keq nghú, ngò, nungmoq lé, nga-nhùng é Yhumsing Yesuq Hkrisduq é mying mai dúng tóngbán kat lhê.

¹¹ Ngá é gumang wui ê, Hkloe é yhùm byù wui gi, nungmoq hkaù má mabyoq htoq hkyô joq é lé, ngo lé hkyáng lo shit akô.

¹² Ngò haù su nghú tai é gi, nungmoq mâ é rayuq yuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga, dum rayuq gi, "Ngò gi, Kehpa htâng châng lhê." ga, dum góyuq gi, "Ngò gi, Hkrisduq htâng châng lhê." ga, tai bùm kô é yanmai nghut lhê.

¹³ Hkrisduq gi, gam hkoq é hui bê lúhú? Ngò Poluq gi, nungmoq é matú tapzîng má jén sat é hui bê lúhú? Nungmoq gi, ngá é mying mai wui-myhup hkâm yù kô é lúhú?

14 Ngò gi, Krispu eq Ge-u nhik mai lai lui, nungmoq ó yuq lé le wui-myhup a hkám byí wú é yanmai,

15 nungmoq ó yuq le, ngá é myìng mai wui-myhup hkám yù bê nghù a wó tai é nghut mù, ngò, Garai lé jeju hkya-ôn lhê.

16 (Stehpana é yhumbyù wui lé le, ngò wui-myhup hkám byí é nghut lhê, haù mai lai lui gotù ó lé hkám byí zàng ashì laq, ngò a myit bun lo nghut ri.)

17 Hkâsu mù gà le, Hkrisduq, ngo lé nhang kat é gi, wui-myhup hkám byi râ matú a nghut, gabú danglù hko kyo râ matú sheq nhang kat é ru nghut lhê; nghut kôlhang, waxâng zô wui é hpaqchyí byéng-yá dang đông hko kyô é a nghut mù, Hkrisduq é tapzing é a-tsam gi, akôm a dut byuq é nghut lhê.

Garai É A-tsam Eq Hpaqchyí Byéng-yá Gi, Hkrisduq

18 Hkâsu mù gà le, tapzing má Yesuq shí hkám é hkyô eq sêng é danglù gi, htên byoq hui râ bâng é matú, danggang dut byuq ri; nghut kôlhang, hkyi yu é hui nyi bang nga-nhùng é matú gi, Garai Gasâng é a-tsam nghut ri.

19 Hkâsu mù gà le, Chyúmdang má kê tô é gi, "Hpaqchyí bò bâng é hpaqchyí byéng-yá lé, Ngò lhoq htên pyám râ nghut lhê; nyan bò bâng é nyan lé, Ngò, ajè dut pyám nhâng râ nghut lhê."✠

20 Hpaqchyí byéng-yá bò bang gi, hkámá lhu? Hpaqchyí laiká kung bang gi, hkámá lhu? Ipyat shí é dang tai kung bang gi, hkámá lhu? Garai Gasang gi, mingkân é hpaqchyí byéng-yá lé lhoq ngok pyám bê a nghut lhu?

21 Hkâsu mù gà le, Garai Gasâng é hpaqchyí byéng-yá mai ga jang, mingkan zo wui gi, yhumsing é hpaqchyí byéng-yá đông mai Garai Gasang lé a wó sé kô é yanmai, danggang gà pyám byi kô é mungdang lé hko kyô é đông lumjing bang lé hkyi yù râ matú, Garai Gasang myit hpyit é nghut lhê.

22 Yudaq byu pé gi, limik kumlhá pé lé dúng akô; Grik byu pé gi, hpaqchyí byéng-yá lé ho akô nghut ri.

23 Nghut kôlhang, ngamoq gi, tapzing má jén sat hui é Hkrisduq é hkyô lé hko kyô lhê. Haù gi, Yudaq byu pé é matú myit leqbat jowò eq tungbaù pé é matú danggang dut byuq ri.

24 Nghut kôlhang, Garai Gasâng eq ji yù hui é Yudaq byu pé eq Grik byu pé é matú, Hkrisduq gi, Garai Gasâng é a-tsam eq Garai Gasâng é hpaqchyí byéng-yá nghut ri.

25 Hkâsu mù gà le, Garai Gasâng é ngok hkyô gà é lhang gi, byu é hpaqchyí byéng-yá htoq má je gyaù ri; Garai Gasâng é wum nyhóm hkyô gà é lhang gi, byu é wum-o htoq má je gyaù ri.

26 Gumang wui é, Garai Gasang, nungmoq lé ji yu é hkùn, nungmoq hkâsu dut nyi é hkyô lé myit wú keq. Waxâng zô wui é nyi yap a-tsáng đông hpaqchyí byéng-yá bo é bang, ahkáng ayá wó é bang, zaugun suwún amyú mã é bang a myô é nghut lhê.

27 Nghut kôlhang, Garai Gasang gi, hpaqchyí byéng-yá bò bang lé hoq lhoq hpu râ matú, mingkan mã é ngok bang gà é lé hkyin yu é nghut lhê; Garai Gasang gi, wum bò bang lé hoq lhoq hpu râ matú, mingkan mã é wum nyhóm bang gà é lé hkyin yu é nghut lhê.

28 Yhang gi, mingkân eq ahkyak tô é lé lhoq htên pyám râ matú, hai a nghut é lé le, mingkan mã é aróng a bo é eq wú tiq pyám hui é lé le, hkyin yu é nghut lhê.

✠ 1:19 Esai 29:14

²⁹ Haù gi, ó yuq le, Yhâng é hí má a ge nghutbun râ matú nghut ri.

³⁰ Garai Gasâng é yanmai, nungmoq gi, Hkrisduq Yesuq má nghut nyî bekô nghut ri; Hkrisduq gi, nga-nhúng é matú, Garai Gasâng chyáng mã é hpaqchyî byéng-yá dut bê nghut ri. Haù gi, nga-nhúng é dingmán hkyô, chyoiyúng hkyô eq hkyi yù hkyô nghut ri.

³¹ Haù mù luí, "Gumrong é sù gi, haù Yhumsîng má gumrông sháng gaq."[✠] ga kâ tô é eq rajung za nghut ri.

2

Woi-nyî Mai Lo É Garai Gasâng É Hpaqchyî Byéng-yá

¹ Gumang wui ê, ngò gi, Garai Gasang eq sêng é saksé hkyô lé nungmoq chyáng tai pyô râ matú jé lé é hkûn, dang tai kûng é eq hpaqchyî byéng-yá mó bo é dông lé é a nghut.

² Hkâsu mù gà le, ngò, nungmoq eq rahá nyi é u lé, Yesuq Hkrisduq eq Yhang tapzîng má jén sat huí é hkyô mai lai luí, jung hkangmó lé tô-myî pyám râ ngû myit hpyit yù bê nghut lê.

³ Ngò gi, nungmoq chyáng jé lé é hkûn, wum nyhôm é eq gyai yhang gyuq nán é nghut lê.

⁴ Ngá é danglù eq ngò hko kyô é hkyô gi, hpaqchyî bo é eq mhuí yu é dang pé dông a nghut é za, Woi-nyî é a-tsâm èq nungmoq lé shit é dông ru nghut mù,

⁵ nungmoq é lumjîng myit gi, byù é hpaqchyî byéng-yá má a nghut é za, Garai Gasâng é hpungwup a-tsam má nghut nyi lê.

⁶ Nghut kôlhang, ngamoq gi, myit ding bê bang lé hpaqchyî byéng-yá dông nyo lê; shí pyat lê é hpaqchyî byéng-yá eq htên byoq nyi huí é shí pyat mã é zâu wui é hpaqchyî byéng-yá dông kum a nghut.

⁷ Ngamoq tai é gi, haq tô é eq, ahkyîng nghu é lhang a joq shi mai nga-nhúng é hpungwup shingkang é matú Garai Gasang tô to byî é hpaqchyî byéng-yá nghut é, Garai Gasâng é zâu tô é hpaqchyî byéng-yá lé tai é ru nghut lê.

⁸ Shí pyat lê é zau wui gi, hpaqchyî byéng-yá haù lé rayuq lhang a sê gyo kó nghut ri; yhangmoq sê gyo kô é ru nghut le gi, hpungwup shingkang bo é Yhumsîng lé tapzîng má jén sat pyám kô râ a nghut.

⁹ Nghut kôlhang, Chyúmdang má,

"Ó yuq èq le a myang wú, ó yuq èq le a wó gyô wú, ó yuq èq le a bûn myit wú é hkyô lé, Garai Gasang gi, Yhang lé chyitdap bang é matú lajang to byi bê nghut ri."[✠]

ga kâ tô é eq rajung za nghut ri.

¹⁰ Nghut kôlhang, Garai Gasang gi, haù hkyô lé, Yhâng é Woi-nyî dông nga-nhúng lé hpông shit bê nghut ri.

Woi-nyî haù gi, jung hkangmó lé ho gôn wú é nghut luí, Garai Gasâng é zâu tô é hkyô lé lhang ho gôn wú é sù nghut ri.

¹¹ Byù má lúng é woi-nyî za a nghut jang gi, byù rayuq myit é hkyô pé lé, ó yuq wá wó sê lê lú? Haù eq rajung za, Garai Gasâng é Woi-nyî za a nghut jang, Garai Gasang myit é hkyô lé, ó yuq le wó sê é a nghut.

¹² Nga-nhúng gi, mingkân é woi-nyî lé hap yu tô é a nghut é za, Garai Gasâng èq nga-nhúng lé byî to bê jeju lé, ngamoq wó sê gyo râ matú, Garai Gasâng chyáng mã é Woi-nyî lé sheq hap yu tô é ru nghut lê.

¹³ Haù mù luí, ngamoq gi, waxâng zô wui é hpaqçhyí byéng-yá èq mhoq byí é dang đông taí é a nghut, Garaí é Woi-nyí èq mhoq byí é dang đông taí é sheq ru nghut mù, woi-nyí eq sêng é tengmán hkyô lé woi-nyí eq sêng é dang đông taí sân kyô é nghut lhê.

¹⁴ Haù Woi-nyí lé a wó é sù gi, Garaí Gasâng é Woi-nyí mai lo é hkyô pé lé a hap yu é nghut lhê; haí mù gà le, haù pé gi, yhâng é matú ngok é hkyô nghut luí, woi-nyí hkyô đông mai haù hkyô lé a wú é yanmai, yhang gi, haù pé lé a wó sê gyo nghut ri.

¹⁵ Woi-nyí eq sêng é byù gi, lunglhang lé wó jéyáng lhê, nghut kôlhang, yhang lé kúm gi, ó yuq èq le wó jéyáng é a nghut.

¹⁶ Chyúmdang má,
"Hkâsu mù gà le, ó yuq wá, haù Yhumsing é myit lé sé mù, Yhang lé wó mhoqshít wú é lúh?"^{*}
ga kâ tò ri. Nghut kôlhang, nga-nhúng gi, Hkrisduq é myit lé wó é bang nghut lhê.

3

Noqkuq Hpúng Má Gam Hkoq Lhúm É Hkyô

¹ Gumang wui ê, hí hkún, ngò gi, nungmoq lé, Woi-nyí eq sêng é bang lé đông wó taí é a nghut; mingkan eq sêng é bang đông nghut kômù, Hkrisduq má zonú su dut bang lé đông sheq taí wú é nghut lhê.

² Nungmoq gi, zoshuq apat lé a wó zo shi kó nghut é yanmai, ngò gi, nungmoq lé naù byi huq é nghut lhê.* Ahkuí lhang, nungmoq gi, zoshuq apat lé a wó zo shi kó nghut ri.

³ Nungmoq gi, mingkan eq sêng é bang ru nghut nyi ashí kó nghut ri. Hkâsu mù gà le, manôn hkyô eq byoq lhum hkyô gi, nungmoq chyáng joq nyi é yanmai, nungmoq gi, mingkan eq sêng é bang nghut lhê a nghut kó luq? Mingkan zo wui su nyi yap bum lhê a nghut kó luq?

⁴ Rayuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga taí nyi bùm kô é nghut jáng, nungmoq gi, mingkan zo wui nghut nyi bum lhê a nghut kó luq?

⁵ Apolo gi, ó wá nghut lhê? Poluq gi, ó wá nghut lhê? Nga-nhik gi, Garaí é dui-nhâng zoshâng za nghut luí, ó le ó lé, haù Yhumsing èq hun tô é muzoq eq rajung za wùn waq é nghut luí, nungmoq gi, ngá-nhik đông mai wó lumjúng kô é ru nghut lhê.

⁶ Ngò gi, gabú danglù amyui lé hô kat, Apolo gi, wui hpyun byi, nghut kôlhang, yuq kô lò nhang é gi, Garaí Gasang za ru nghut lhê.

⁷ Haù mù, amyui hô kat sù eq wui hpyun byi sù gi, ahkyak mó a nghut, yuq kô lò nhang é Garaí Gasang za sheq ahkyak ru nghut lhê.

⁸ Amyui hô kat sù eq wui hpyun byí su nhik myoqbyu tô é hkyô gi, rajung za nghut ri; nghut kôlhang, yhumsing shikut é eq rajung za, ó le ô é shigyaú chyunghuq wó yú kó rà nghut lhê.

⁹ Hkâsu mù gà le, ngamoq gi, Garaí Gasâng é mù zui luzúm wui nghut lhê; nungmoq gi, Garaí Gasâng é yò, Garaí Gasâng é yhúm nghut nyi akô.

¹⁰ Garaí Gasang, ngo lé byí to bê jeju eq rajung za, yhúm saí kung sù rayuq đông, ngò gi, yhúm apùn awang hí to bê nghut lhê; gotú byù gi, hau é ahtoq

^{*} 2:16 Esai 40:13 * 3:2 Nungmoq lé naù byi huq é, gà é gi, lui é hkyô pé lé hí mhoq byí é lé gà lhê.

má saí toq jat nyi é nghut lhê. Nghut kôlhang, yuq hkgangmó gi, yhumsing sai é má rago sidiq râ lhê.

¹¹ Hkâsu mù gâ le, hi to gù nghut é, Yesuq Hkrisduq nghu é yhùm apùn awang mai lai lui, ó yuq le, gotù yhùm apùn awang lé wó sai é a nghut.

¹² Yhùm apùn awang hau é ahtoq má, hîng, ngùn, hpaudap luqgok pé, sik, mhan, hkowá pé lé chúng mù sai jat kô é nghut jáng,

¹³ yuq hkgangmó é muzó hkâsu nghut é hkyô lé lhoq htoq shit é hui râ nghut lhê. Haí mù lui gâ le, haú Yesuq é Buinyi gi, haú lé byu-myàng nhâng mù, haú buinyi lé gi, myí eq lhoq htoq shit râ nghut lhê. Haú myi gi, yuq hkgangmó sai é muzó hkasú é nghut é lé chyâm râ nghut lhê.

¹⁴ Rayuq yuq sai é yhùm gi, ru gîng nyi é nghut jáng, haú yuq gi, yhang é shigyaú chyunghuq wó yú râ nghut lhê.

¹⁵ Nghut kôlhang, yhùm haú nyé gyó byuq é nghut jáng, yhang gi, yhùm sùm byuq é hui zo râ nghut lhê; yhang gi, asak lut kôlhang, myishâm mai wó lut é byù su dut râ nghut lhê.

¹⁶ Nungmoq gi, Garai Gasâng é noqkuq yhùm nghut lui, Garai Gasâng é Woi-nyí gi, nungmoq má lúng nyí bê hkyô lé a sé kó lúh?

¹⁷ Rayuq yuq, Garai Gasâng é noqkuq yhùm lé lhoq htên é nghut jáng, Garai Gasang gi, haú yuq lé lhoq htên pyám râ nghut lhê. Hkâsu mù gâ le, Garai Gasâng é noqkuq yhùm gi, chyoiyúng lhê; nungmoq gi, noqkuq yhùm haú nghut akó.

¹⁸ Nungmoq gi, yhumsing gùng yhumsing hkâlhoq nghoq kó. Nungmoq má é rayuq yuq, shi ipyat má é byù nyi a-tsáng đông hpaqchyí byéng-yá bò sù ga myit é nghut jáng, hpaqchyí byéng-yá akying bò sù wó dut sháng gaq, yhang gi, a-ngok sù dut râ lhê.

¹⁹ Hkâsu mù gâ le, mingkan shi má é hpaqchyí byéng-yá gi, Garai Gasâng é hí má ngok é hkyô nghut ri. Haú gi, "Garai Gasang gi, hpaqchyí byéng-yá bò bang lé, yhangmoq é hpaqchyí má yhang myí to nhang ri."* ga kâ tô é eq rajung za nghut ri.

²⁰ Hau htoq agó, "Haú Yhumsing gi, hpaqchyí byéng-yá bò bang myit é hkyô pé akôm nghut é lé sê lhê."* ga le kâ tô ri.

²¹ Haú mù lui, ó yuq le, byù eq sêng é hkyô má gyáng é dang a taí kó sháng gaq! Lhunglhang gi, nungmoq é chyat nghut lhê.

²² Poluq le, Apolo le, Kehpa le, mingkan le, dui nyi é hkyô le, shi é hkyô le, ahkuí lhê hkyô eq htàngnùng má é hkyô le, banshoq gi, nungmoq é chyat nghut ri.

²³ Nungmoq gi, Hkrisduq é nghut akó; Hkrisduq gi, Garai Gasâng é nghut ri.

4

Hkrisduq É Lagyô Pé

¹ Haú mù lui, byu pé gi, ngamoq lé, Hkrisduq é dui-nhâng zoshâng wui đông eq Garai Gasâng é záu tô é hkyô pé lé taí pyô râ matú ap byí tô é hui bang đông sôn yú râ lhê.

² Haú đông nghut jáng, ap byí tô é hui bang gi, yhumsing lhumzui hkyô lé saksé shit râ dut lhê.

³ Nungmoq eq nghut nghut, waxâng zô wui é tará rûng mai nghut nghut, ngo lé jéyáng kô le, ngá é matú atiq azo za nghut lhê; gè gè ga jáng, ngá gûng ngò lhang a jéyáng é nghut lhê.

⁴ Haî mù gâ le, ngá gûng ngò mara a bò bûn é nghut kôlhang, haû gi, ngo lé wó lhoq sân-yúng byí é a nghut. Ngo lé jéyáng é sù gi, haû Yhumsing nghut lhê.

⁵ Haû mù, masat tô é ahkýing a jé shimá haî lé le a jéyáng é za, haû Yhumsing jé lé shoq, láng nyí keq. Yhang gi, mauchut hkaû má haq tô é pé lé byu-myang nhâng mù, byu pé é myit nhikhlum má lúng é hkyô lé lhoq htoq shit rá nghut lhê. Haû hkûn, yuq hkgangmó gi, ó le ó wó gíng é hkya-ôn hkyô lé, Garai Gasâng chyáng mai wó yù rá nghut lhê.

⁶ Gumang wui é, ngò gi, "Kâ tô é gû mai hkâlai." gâ é sanghkyâng é lichyúm lé, ngamoq chyáng mai nungmoq wó mhoq yú sháng gaq nghú, nungmoq é akyu é matú, ngò eq Apolo má haû pé lé yù mù dangtú kut é nghut lhê. Haû hkûn, nungmoq gi, nghutbûn é đông, rayuq lé gi, wú ko, góyuq lé gi, wú shóm, a kut kó rá nghut lhê.

⁷ Ó yuq wá, nang lé, góyuq eq shaî shoq kut lhê lú? Nang hap yu é a nghut le gi, wó rá lú? Nang, hap yu é nghut le gi, a hap yu é đông haî mù nghutbûn nyi lhê lú?

⁸ Nungmoq gi, rá é lhunglhang gumjup bang nghut bekô nhung! Nungmoq gi, wó bang dut gù nghut bekô nhung! Ngamoq a lom é za, nungmoq gi, hkohkam pé dut bekô nhung! Ngamoq le, nungmoq eq rahá hkohkam pé wó dut sháng gaq, nungmoq gi, gè gè yhang hkohkam pé dut to bekô rá lé, ngò hkâ-í yhang ô nau nyi lhê ô!

⁹ Nghut kôlhang, sat rá matú doqdan huí é shúm byú pé lé su, Garai Gasang gi, lagyô pé nghut é ngamoq lé de de kut htoq shit bê nghú, ngò wó myit ri. Ngamoq gi, nyi mi-nyí, joq mijog, maumang lagyô pé eq waxâng zô wui é hí má, wú kûn jung đông dut nhang é huí nyi gù bê nghut lhê.

¹⁰ Ngamoq gi, Hkrisduq é yanmai ngok é bang đông sôn yu é huí kôlhang, nungmoq kúm gi, Hkrisduq má hpaqchyí gyaí bo é bang đông dut bekô nhung! Ngamoq gi, wum nyhôm é bang đông sôn yu é huí kôlhang, nungmoq kúm gi, wúm bo é bang đông dut bekô nhung! Nungmoq gi, hkunggá é huí akò; ngamoq kúm gi, hkunggá é a huí nhung!

¹¹ Shí hkýing shí u jé shoq, ngamoq gi, zòmut wuìshit huí é, mebu ajeq amyhá dut huí é, nhuq bat huí é, yhumsing é nyi jowò a wó é bang nghut nyi lhê.

¹² Ngamoq gi, yhumsing loq eq yhang mù zui wum kat nyi lhê. Ngamoq gi, nhing pyâm é huí jáng, shimân byí, zing-rí é huí jáng, jân pyám kut lhê.

¹³ Ngamoq gi, lumù gansang é huí jáng, dang ngón dang nguí tû nyo lhê. Ngamoq gi, ahkuí jé shoq, myidàm htoq má é hpoqkyuq hpoqpyâng eq mingkân é buzaq pé đông sôn yu é huí nyi lhê.

¹⁴ Ngò gi, nungmoq lé hoq lhoq hpu rá matú haû pé lé kâ é a nghut, ngá é chyitdap zo wuì lé đông lhoq pûn kying rá matú ru nghut lhê.

¹⁵ Nungmoq gi, Hkrisduq má mhoqshit bang ra mun wó kô é nghut kôlhang, íwá pé myo shoq wó kô é a nghut; hkâsu mù gâ lé, ngò gi, haû gabú danglù đông mai, Hkrisduq Yesuq má nungmoq é íwa dut é nghut lhê.

¹⁶ Haû mù luí, ngò kut é su cháng keq nghú, ngò, nungmoq lé lung kat lhê.

¹⁷ Hau é yanmai, ngò gi, haû Yhumsing má lhumzui sù nghut é, ngò chyitdap é ngá zo đông nghut sù Timohti lé, nungmoq chyáng nhang kat é

nghut lhê. Yhang gi, Hkrisduq Yesuq mâ é ngá é asak duì hkyô lé, jowò hkanmó mâ é noqkuq hpúng hkanmó lé ngò mhoq byí é eq rajung za, nungmoq lé lhoq pun byi rà nghut lhê.

¹⁸ Nungmoq mâ é ra-am gi, nungmoq chyáng ngò a dum jé lé râ su ngam pyám kômù, nghutbùn byuq bekò nghut ri.

¹⁹ Nghut kôlhang, haù Yhumsing gyô é nghut jáng, ngò gi, nungmoq chyáng hân za jé lé râ nghut lhê; haù hkùn, ngò gi, nghutbùn é byù haù bang haí tai é hkyô lé za a nghut, yhangmoq hai a-tsam wó é hkyô lé le gôn htoq rà nghut lhê.

²⁰ Hkâsu mù gâ le, Garai Gasâng é mingdán gi, tai é dang má bo é a nghut, a-tsam má sheq ru nghut lhê.

²¹ Nungmoq hká dòng ô nau akò lhuí? Ngò gi, nungmoq chyáng, nuichùm hkat èq, a nghut jáng, chyitdap é eq nú-nhâm é myit mai lé lô ra rà lhuí?

5

Ashop É Đông Gungsho Zùm Yap É Hkyô Kut É Sù Lé Lhoq Htoq Pyám Râ Hkyô

¹ Nungmoq chyáng, ashop é đông gungsho zùm yap é hkyô joq é lé, hkyak tai hù lò bekò; haù gi, a lumjúng bãng chyáng lhang a dut wú é hkyô ngut é, yuqg rayuq gi, yhangwâ é myiwe eq nyi zò lhum nyi é hkyô ngut ri.

² Nghut kôle, nungmoq gi, nghutbùn nyi bum akò nhung! Haù dòng a nghut é za, nungmoq gi, yón é myit tûn shit mù, haù su kut é byù lé, nungmoq é hpúng mai lhoq htoq pyám le, a gè kó lhuí?

³ Ngò gi, ngá gungdu, nungmoq eq rahá a nyi to kôlhang, ngá é i-myt gi, nungmoq eq rahá ngut nyi luí, gungdu jé nyi tô é dòng mai, haù hkyô kut é sù lé jéyáng doqdan gù ngut lhê.

⁴ Nungmoq gi, nga-nhung é Yhumsing Yesuq é mying mai zup zing mù, ngá é i-myt gi, nungmoq eq rahá ngut nyi luí, nga-nhung é Yhumsing Yesuq é a-tsam le, nungmoq eq rahá ngut nyi é hkùn,

⁵ byù haù yuq lé, Tsadán é loq má ap byí pyám keq.* Haù jáng, Yhumsing é buinyi má, yhang é woi-nyí gi, hkyi yu é hui rà matú, yhang é yubak gungsho gi, lhoq htên pyám é hui rà ngut lhê.

⁶ Nungmoq é nghutbun hkyô gi, ge é a ngut. Mún† ra tsuí zo gi, muk long gón lé wó lhoq daú nhang é lé, nungmoq a sé kó lhuí?

⁷ Nungmoq gi, múnchi a bo é bang ngut nyi kô é eq rajung za, múnchi a bo é muk htung asik su wó dut kô sháng gaq, múnchi axau lé lhuí pyám keq. Hkâsu mù gâ le, nga-nhung é Lhoqlhai Poi sauzo, Hkrisduq gi, hkungga nhong é hui bê ngut lhê.

⁸ Haù mù luí, nga-nhung gi, agè agaú hkyô eq hpuzo nhâng hkyô ngut é múnchi axau bo é dòng a ngut é za, lhumzui hkyô eq tengmán hkyo é muk ngut é, múnchi a bo é muk èq, Poi haù lé kut nyi sháng.

⁹ Ashop é đông gungsho zùm yap é bang eq hkâzùm kó nghù, ngò, nungmoq lé, ngá é laiká má kâ kat byi bê ngut lhê.

¹⁰ Nghut kôlhang, mingkan shí eq sêng é, ashop é đông gungsho zùm yap é bang, myoqnoq é bang, mhaù zô é bang eq hparà noq é bang lé hkâzùm yap

* 5:5 Tsadán é loq má ap byí pyám keq gâ é gi, hpúng byù wuì eq a zùm yap nhâng lo rà lé tai é ngut lhê. † 5:6 Mún gâ é gi, yubak mara lé tai nau é ngut lhê. Lhoqlhai Poi jé jáng, Israelaq byu pé gi, yhangmoq wó é múnchi banshoq lé lhuí pyám mù, múnchi a bo é muk sai kô é ngut lhê.

kó nghû é gi, a nghut. Haû su ru nghut le gi, mingkan htoq shî mai nungmoq htoq ló byuq ra kô râ nghut lhê.

¹¹ Nghut kôlhang, yhânggùng yhang gi, gumang ga kôle, ashop é dông gungsho zùm yap é, myoqnoq é, hparà noq é, lumù gansang é, î shuq wut é, mhaû zô é sù ó yuq eq le a ge zùm yap kô râ nghut lhê nghû, ahkuî, ngò, nungmoq lé kâ kat nau é nghut lhê. Haû sù é byù eq gi, rahá lháng hkâzo kó.

¹² Haû noqkuq hpúng shinggan mâ é bang lé jéyáng râ gi, ngò eq haî sêng lhê lú? Nghut kôlhang, hpúng ahkaû mâ é bang lé nungmoq jéyáng râ dut lhê.

¹³ Hpúng shinggan mâ é bang lé gi, Garai Gasang jéyáng râ nghut lhê. Nghut kôlhang, "Haû agè agau é sù lé, nungmoq chyáng mai lhoq htoq pyám keq."✧ gâ tô ri.

6

Lumjìng Bàng Hkaû Má Jéyáng Lhùm É Hkyô

¹ Nungmoq mâ é rayuq yuq gi, gumang góyuq eq dang-rhâng lhùm tô é nghut jáng, haû hkyô lé jéyáng nhâng râ matú, haû sân-yúng bâng é hí má tai rá malaî, Garai a wó bâng é hí má wam tai rá lú?

² Haû sân-yúng bang gi, mingkan lé jéyáng râ nghut é hkyô lé, nungmoq a sé kó lú? Nungmoq gi, mingkan lé jéyáng râ bang nghut kôle nhíng, tiq é mù pé lé wó jéyáng é bang a nghut kó lú?

³ Nga-nhúng gi, maumâng pé lé jéyáng râ nghut é hkyô lé, nungmoq a sé kó lú? Haû mù, shí pyat mâ é hkyô pé lé, gè gè yhang wó jéyáng kô râ nghut lhê ô!

⁴ Haû mù luî, nungmoq gi, dang-rhâng lhùm é mù pé joq é nghut jáng, noqkuq hpúng má ahkyak a nghut é bang lé tarà agyi kut nhâng kô râ lú?

⁵ Ngò, haû su nghû tai é gi, nungmoq lé hoq hpu nhâng râ matú nghut lhê. Lumjìng bâng chyáng dang-rhâng lhùm é hkyô lé wó jéyáng râ hpaqchyî luq shoq bo é byù, nungmoq chyáng rayuq lháng a nyi dut kô râ lú?

⁶ Nghut kôlhang, nungmoq gi, gumang yhangchang rayuq eq rayuq, a lumjìng bâng é hí má lháng rùng shok lhum akò nhung!

⁷ Nungmoq hkaû má mù jéyáng lhùm é hkyô joq é nghut jáng, nungmoq gi, sum lugú nghut bê. Góyuq eq shut le lháng rù ge lhê a nghut kó lú? Mhaû zô é huî le lháng rù gè lhê a nghut kó lú?

⁸ Nghut kôle, nungmoq yhang gi, mhaû zo kô é eq shut kô é nghut luî, haû gi, nungmoq é gumang wui lé kut é nghut lhê.

⁹ Agè agau é bang gi, Garai Gasâng é mingdán mâ é shimân jeju a myang hkam yù kó râ nghut é hkyô lé, nungmoq a sé kó lú? Hkâ-nâ nyi kó. Ashop é dông gungsho zùm yap é bang le, hparà noq é bang le, su-myi sulàng lú é bang le, shiwa hpó kut é bang le, yuqgè yhangchang nyi zô lhùm é mara kut shut é bang le,

¹⁰ hkau bang le, myoqnoq bang le, î shuq wut bang le, lumù gansang é bang le, mhaû zô é bang le, Garai Gasâng é mingdán mâ é shimân jeju lé myang hkam yù kô râ a nghut.

¹¹ Nungmoq mâ é ra-am gi, haû su kut kô é bang nghut akò. Nghut kôlhang, nungmoq gi, nga-nhúng é Garai Gasâng é Woi-nyî eq Yhumsing Yesuq Hkrisduq é mying mai, mara hkyut san byî é, lhoq sân-yúng é eq chí sân pyám byî é huî bekò nghut ri.

Ashop É Đông Gungsho Zùm Yap É Hkyô

¹²"Jung hkgangmó kut rã ahkáng ngò wó lhê." Nghut kôlhang, jung hkgangmó gi, akyû byí é a nghut. "Jung hkgangmó kut rã ahkáng ngò wó lhê." Nghut kôlhang, haí júng èq le ngo lé wó sing pyám rã a nghut.

¹³"Zoshuq gi, wamdaù é matú nghut mù, wamdau gi, zoshuq é matú nghut ri." ga nungmoq ra-am tái kó rã nghut lhê. Nghut kôlhang, Garai Gasang gi, haù í júng é lé lhoq htên pyám rã nghut lhê. Gungdu gi, ashop é đông gungsho zùm yap hkyô é matú a nghut é za, haù Yhumsing é matú nghut mù, haù Yhumsing gi, gungdù é matú nghut ri.

¹⁴Garai Gasang gi, Yhâng é a-tsâm èq, haù Yhumsing lé, shi é mai lhoq dui toq yû bê nghut mù, nga-nhúng lé le lhoq dui toq yû rã nghut lhê.

¹⁵Nungmoq é gungdu pé gi, Hkrisduq é gungsho showui showang pé yhang nghut é lé, nungmoq a sé kô lú? Haù nghut le nhîng, Hkrisduq é gungsho showui showang pé lé yù mù, shiwa myhî pé eq rading ralhum za kut pyám nhâng kô rã lú? Hkâ-nhám le a ge dut nhâng!

¹⁶Shiwa myhî eq gungsho zum é sù gi, yhang eq gungsho ralhum za dut bê hkyô lé, nungmoq a sé kô lú? Hkâsu mù gà le, "Yhangnhik gi, gungsho ralhum za dut kô rã nghut lhê."* ga tái tô ri.

¹⁷Nghut kôlhang, haù Yhumsing eq rading ralhum za dut é sù gi, woi-nyí má Yhang eq ralhum za dut bekô nghut ri.

¹⁸Ashop é đông gungsho zùm yap é hkyô lé koi pyám keq. Byù rayuq kut shut é gotú mara pé banshoq gi, yhâng é gungdu shinggan má nghut lhê; nghut kôlhang, ashop é đông gungsho zùm yap é hkyô kut shut é sù gi, yhumsing gùng lé mara shut é sù nghut ri.

¹⁹Nungmoq é gungdu gi, Garai Gasang chyáng mai nungmoq wó yû bê nghut é, nungmoq má lúng nyi é Chyoiyúng Woi-nyí é noqkuq yhùm nghut é lé, nungmoq a sé kô lú? Nungmoq gi, yhumsing gùng lé sing é bang a nghut.

²⁰Hkâsu mù gà le, nungmoq gi, ahpau ralhum byi mù wui hpyit tô é hui bê bang nghut akô. Haù mù luí, nungmoq é gungdù èq, Garai Gasang lé, hkunggã é hkyô shit nyí keq.

7

Myí Yu É Eq Sêng É Hkyô

¹Ahkuí, nungmoq kã kat é hkyô pé eq séng luí ga jang, yuqgè rayuq gi, myi a yu le gè ri.

²Nghut kôlhang, ashop é đông gungsho zùm yap é hkyô gyai myô é yanmai, yuqgè hkgangmó gi, yhumsing é myiwe wó rã lhê; myiwe hkgangmó gi, yhumsing é yuqgè wó rã lhê.

³Haù yhumsing hpó gi, wò joq é eq rajung za, yhâng yhumsing myhî eq zùm sháng gaq; haù đông za, yhumsing myhî le, yhâng yhumsing hpó eq zùm sháng gaq.

⁴Haù yhumsing myhî é gungdu gi, yhânggùng yhang za sêng é a nghut, yhâng é yhumsing hpó eq le sêng lhê. Haù eq rajung za, yhumsing hpó é gungdu gi, yhânggùng yhang za sêng é a nghut, yhâng é yhumsing myhî eq le sêng lhê.

⁵Nungmoq myit huí lhum luí, kyûdùng é má rago ap nóng rã ahkyíng ayoq za a nghut jáng gi, rayuq eq rayuq hkâhe lhum kó. Nungmoq yhumsing gùng

lé a wó hkang é yanmai, Tsadán èq gunlaú é a hui kô sháng gaq, ahkýing ayoq haú lai jáng, rahá dum zùm keq.

⁶ Ngò, haú su nghú taí é gi, hkunmó hkyô é đông a nghut, ahkáng byí kat é đông ru nghut lhê.

⁷ Byù banshoq bang gi, ngò su nyi râ lé ô nau ri. Nghut kôlhang, yuq hkangmó gi, ó le ô é chyunghuq lé Garai Gasâng chyáng mai wó bum akò nghut ri; rayuq gi, rajung chyunghuq, góyuq gi, gó jung chyunghuq wó bum akò.

⁸ Ahkuí, myiwe a yù lô é bang eq chuimó pé lé ngò taí kôlé, ngò su, haú đông jáng nyi pyám kô é nghut le, yhangmoq é matú ge é hkyô nghut ri.

⁹ Nghut kôlhang, yhumsing gùng lé a wó hkâng kô é nghut le gi, yhangmoq, myi yù myi lô râ lhê; hkâsu mù gâ le, myi su nyé luí ô nau nyi râ malaí, myi yu myi lô le je ge lhê.

¹⁰ Myi yù bê bang lé, ngò, hkunmó hkyô kôlé, shí gi, ngò đông hkyô é a nghut, Yhumsing chyáng mâ é ru nghut lhê: Yhumsing myhí gi, yhâng é yhumsing hpó chyáng mai a ge gang râ nghut lhê.

¹¹ Nghut kôlhang, yhang gâng é nghut jáng, myi a dum lô é za nyi râ lhê, haú a nghut jáng, yhâng é yhumsing hpó eq dum xoq yù râ lhê. Yhumsing hpó le, yhâng é yhumsing myhí lé a ge kâng pyám râ nghut lhê.

¹² Góbang lé ngò shí su nghú taí kôlé, shí gi, Yhumsing chyáng mâ é a nghut, ngò đông mai taí é ru nghut lhê. Gumang rayuq yuq gi, lumjǐng sù a nghut é yhumsing myhí wó é nghut le, myiwe haú, yhang eq rahá nyi nau é nghut jáng, yhang lé a ge kâng pyám râ nghut lhê.

¹³ Myiwe rayuq gi, lumjǐng sù a nghut é yhumsing hpó wó é nghut le, yuqgè haú, yhang eq rahá nyi nau é nghut jáng, yhang eq a ge gang râ nghut lhê.

¹⁴ Hkâsu mù gâ le, haú a lumjǐng sù yhumsing hpó gi, yhâng yhumsing myhí đông mai lhoq sân-yúng é hui bê nghut mù, a lumjǐng sù yhumsing myhí le, lumjǐng sù nghut é yhâng é yhumsing hpó đông mai lhoq san lhoq yúng é hui bê nghut ri. Haú a nghut jáng, nungmoq é zo wuí gi, a sanséng dut kô râ nghut lhê; nghut kôlhang, yhangmoq gi, haú đông mai, chyoiyúng bekô nghut ri.

¹⁵ Nghut kôlhang, haú a lumjǐng sù gâng ló nau jáng gi, gâng ló sháng gaq. Lumjǐng é yuqgè nghut nghut, myiwe nghut nghut, haú sù é hkyô pé má gi, hkùm zing tô é hkyô a joq é nghut lhê. Garai Gasang gi, nga-nhúng lé, nguínón shoq nyi sháng gaq ga jí yù bê nghut lhê.

¹⁶ Yhumsing myhí ê, náng é yhumsing hpó lé wó hkyi yù râ nghú, hkâsu wó sé râ lúh? Yhumsing hpó ê, náng é yhumsing myhí lé wó hkyi yù râ nghú, hkâsu wó sé râ lúh?

¹⁷ Hká đông nghut kôlhang, yuq hkangmó gi, Garai Gasang, yhang lé jí yu tô é hkùn, haú Yhumsing mai yhang lé nyi nhang tô é đông asak dui nyi râ lhê. Haú gi, noqkuq hpúng pé banshoq má ngò tô to byí é tarâ nghut lhê.

¹⁸ Byù rayuq gi, jí yu é huí é hkùn, ahpyo-kuq hpyit hkam yu to gù bê nghut jáng, ahpyo-kuq hpyit a hkâm sù đông a dut byuq sháng gaq. Byù rayuq gi, jí yu é huí é hkùn, ahpyo-kuq hpyit a hkam yu to shí é nghut jáng, ahpyo-kuq hpyit a hkam yù sháng gaq.

¹⁹ Ahpyo-kuq hpyit hkâm hkyô gi, haí ahkyak a nghut; ahpyo-kuq hpyit a hkâm hkyô gi, haí ahkyak a nghut. Garai Gasâng é hkunmó pé lé cháng nyi é za sheq ahkyak nghut lhê.

²⁰ Yuq hkangmó gi, yhang lé Garai Gasâng èq jí yu é hkùn lhê su xoq nyi nyi râ lhê.

21 Nàng gi, ji yù huí é hkûn jùn dut nyi é lúh? Haú hkyô lé hkâ-myt chiq. Nghut kôlhang, nàng gi, luthkyô wó yu é nghut jáng, haú dông nyi aq.

22 Hkâsu mù gâ le, haú Yhumsing eq ji yu é huí é hkûn, jùn dut nyi é sù gi, haú Yhumsing eq lhoq lhut yu é byù nghut bê. Haú eq rajung za, ji yu é huí é hkûn, luthkyô wó é sù gi, Hkrisduq é jùn nghut ri.

23 Nungmoq gi, Garaí Gasâng eq ahpau byi mù wui hpyit yu é hui bê bang nghut akò. Haú mù, byu pê é jùn hkâdut kó.

24 Gumang wui ê, yuq hkgangmó gi, yhumsing lé Garaí Gasâng eq ji yu é huí to bê dông, Yhâng é hí má xoq nyi nyi râ lhê.

25 Ahkuí, zomyi zorâm wui é hkyô taí kôlé. Haú Yhumsing chyáng má é hkunmó gi, ngò a wó; nghut kôlhang, Yhumsing é shogyo nhikmyîn é yanmai, lumgíng sù rayuq nghut nyi é dông, ngò, nungmoq lé hkyô shit râ nghut lhê.

26 Ahkuí hui zò é wuîhke hkyo é yanmai, nungmoq gi, yhumsing nyi to é su xoq nyi nyi le je ge ri ngû, ngò wó myit ri.

27 Nàng, myihâng bê a nghut lhi? Lhoq kang râ hkâda lo. Nàng, myi a háng shi a nghut lhi? Myi hkâhò lo.

28 Nghut kôlhang, nàng, myihâng é nghut le gi, mara a nghut. Zomyi gi, myi ló é nghut jáng, mara a nghut. Nghut kôlhang, myihâng é bang gi, shí pyat má wuîhke hkyô pé myo myo hui kó râ nghut mù, ngò, nungmoq lé haú mai hkyi yù nau ri.

29 Gumang wui ê, ngò taí nau é lichyúm gi, ahkyíng tot byuq bê nghut mù, ahkuí mai, myi wó é bang gi, a wó é bang dông nyi kó sháng gaq.*

30 Yón ngaú huí é bang gi, a huí é bang su; gabú é bang gi, a gabú é bang su; sutzè lé wui yu é bang gi, sutzè a wó é bang su;

31 haú mingkan zè pé lé chung é bang gi, haú pé lé a myit tuí é bang su, nghut kó sháng gaq. Hkâsu mù gâ le, shí mingkân é ahkuí lhê é azòng isâm gi, láí ló nyi é nghut lhê.

32 Ngò gi, nungmoq lé a myit myo nhâng nau. Myi a yù shí é sù gi, haú Yhumsing lé hkâsu wó gabú nhâng râ matú, haú Yhumsing é muzó lé myit chiq nyi ri.

33 Nghut kôlhang, myi yù bê sù gi, yhâng é yhumsing myhí lé hkâsu wó gabú nhâng râ matú, mingkan shi é muzó eq séng luí myit chiq nyi ri.

34 Haú mù, yhâng shirong é myit gi, byo myín nyi ri. Myi a ló é myiwe nghut nghut, zomyi gyíng nghut nghut gi, yhâng é gungdu eq woi-nyí má haú Yhumsing lé rago wó ap nóng râ matú, Yhumsing é muzó pé eq séng luí myit chiq nyi ri. Nghut kôlhang, myi ló bê myiwe gi, yhâng é yhumsing hpó lé hkâsu wó gabú nhâng râ matú, mingkan shi é muzó eq séng luí myit chiq nyi ri.

35 Ngò, haú su ngû taí é gi, nungmoq é matú ge é hkyô nghut lhê; nungmoq lé tara eq zú zing é a nghut é za, myit a byò lo shoq Yhumsing lé wó ap nóng râ matú, jò é dông asak wó duí kô sháng gaq nghu é hkyô ru nghut lhê.

36 Nghut kôlhang, rayuq yuq gi, yhang dúng tô é zomyi gyíng lé a htuk é dông kut nyi é su wó myit ngâm jáng, myiwe haú asak kô lo nyi mù, hâng yù râ dut bê ngû myit é nghut le gi, yhang ô nau é dông kut sháng gaq. Yhang mara kut é a nghut. Yhangnhik gi, hâng lhum râ lhê.

37 Nghut kôlhang, yhang gi, haú hkyô lé yhâng é myit mai wó lhoq zím pyâm é nghut mù, yut yut ô nau hkyo é ahkaú má a nghut é za, yhumsing ô nau é hkyô lé wó hkûm zing pyâm é sù nghut luí, haú zomyi gyíng lé a hâng yù râ

* 7:29 A wó é bang dông nyi kó sháng gaq gâ é gi, Garaí mù lé je myit zuq nyi sháng gá nau é nghut lhê.

matú wó myit hpyit bê sù nghut é nghut jáng, yhang gi, ge é hkyô kut bê nghut ri.

³⁸ Haù mù luí, zomyi gyíng haù lé hâng yu é sù gi, jô é hkyô kut bê nghut ri; nghut kôlhang, zomyi gyíng haù lé a hâng yu é sù gi, je ge é hkyô kut bê nghut ri.

³⁹ Myiwe rayuq gi, yhâng é yhumsíng hpó rú dui nyi nyi, yhang eq xoq tô ashí nghut lhê. Nghut kôlhang, yhâng é yhumsíng hpó shí byuq é nghut jáng, yhang gi, myi ló rá ahkáng dum wó bê nghut lhê, nghut kôle, haù yuq gi, Yhumsíng eq sêng é sù dut rá lhê.

⁴⁰ Ngò jéyáng é đông ga jáng, myi a dum ló é wó nyi le gi, yhâng é matú je gabú hkyô dut rá nghut lhê. Ngò le, Garai Gasâng é Woi-nyí wó sù nghu wó myit ri.

8

Hparà Lhò Lé Tíng Byí É Zoshuq

¹ Ahkuí, hparà lhò pé lé tíng byí é zoshuq hkyô: nga-nhúng banshoq bang gi, haù hkyô eq séng luí sê lhê. Sê é hkyô gi, nghutbun sê lhê; nghut kôlhang, chyitdap myit gi, lhoq kô myhang lhê.

² Byù rayuq yuq gi, rajung jung lé sé bûn é nghut le, yhang sé âng é lé lhang a sé shí nghut ri.

³ Nghut kôlhang, Garai Gasang lé chyitdap é sù gi, Garai Gasâng eq sê é sù nghut ri.

⁴ Haù mù luí, hparà lhò pé lé tíng byí é zoshuq lé zô é eq séng luí gi: hparà lhò gi, mingkan má hai lhang a nghut é hkyô lé le, Garai Gasang gi, Yhang rayuq mai lai luí gotù a nyi é lé le, nga-nhúng sê lhê.

⁵ Hkâsu mù gâ le, mauhkúng htoq má nghut nghut, myigùng htoq má nghut nghut, byù ra-am mai hparà pé ga bang nyi mù, "hparà pé" myo myo eq "yhumsíng pé" myo myo nyi kôlhang

⁶ nga-nhúng é matú gi, Íwa nghut é Garai Gasang rayuq za nyi é nghut mù, lhunglhang gi, Yhang mai hpan é nghut luí, nga-nhúng gi, Yhâng é matú asak dui nyi é nghut lhê. Yesuq Hkrisduq nghu é Yhumsíng rayuq za nyi é nghut mù, lhunglhang gi, Yhang đông mai hpan é nghut luí, nga-nhúng gi, Yhang đông mai asak dui nyi é nghut lhê.

⁷ Nghut kôlhang, yuq hkangmó gi, haù hkyô lé sê gam hkoq yu é a nghut. Ra-am gi, ahkuí je shoq hparà lhò pé má mán byuq kô é yanmai, haù sù é zoshuq lé yhangmoq zô é hkûn, hparà lhò lé tíng byí é zoshuq đông myit sôn yu akô. Yhangmoq myit sôn sé é hkyô wum nyhôm é yanmai, mara wó bûn akô nghut ri.

⁸ Nghut kôlhang, zoshuq gi, nga-nhúng lé, Garai Gasâng shut shuí chyâng é a nghut. Nga-nhúng a zô é nghut le gi, je sùm byuq ló é a nghut, zô é nghut le gi, je ge lo é a nghut.

⁹ Haù su ga kôlhang, nungmoq a htung a htê zô é hkyô gi, lumjíng myit wum nyhôm bâng é matú myit leqbat jowò a dut shoq sidiq keq.

¹⁰ Hkâsu mù gâ le, sùmsé hpaqchyí wó é bang nungmoq gi, hparà lho é noqkuq yhùm má zô nyi kô é lé, haù myit sôn sé é hkyô má wum nyhôm é sù rayuq yuq myang é nghut jáng, hparà lhò pé lé tíng byí é zoshuq lé, yhang wám zo rá lé wum byí é a dut kó rá lúh?

¹¹ Haû mù, Hkrisduq shî hkám byi bê nghut é, wum nyhôm é gumang hpó haú yuq gi, nungmoq é sumsé hpaqchyi èq lhoq htên pyâm é hui berâ nghut lhê.

¹² Nungmoq gi, haú hkyô dông mai, nungmoq é gumang wui lé mara kut shut é eq, yhangmoq é myit sôn sê é hkyô wum nyhôm é lé nò nhang é hkún, Hkrisduq lé mara kut shut é nghut bekô.

¹³ Haû mù luí, ngò zô é gi, ngá é gumang hpó lé mara kut shut nhang é nghut jáng, yhang lé myit a leqbat nhâng sháng gaq, ngò, hkâ-nhám le, sho lé a zo lo rà nghut lhê.

9

Lagyo Rayuq É Ahko Ahkáng

¹ Ngò gi, lut sù a nghut lúh? Ngò gi, lagyo rayuq, a nghut lúh? Ngò gi, nga-nhùng é Yhumsing Yesuq lé myang wú bê sù, a nghut lúh? Nungmoq gi, haú Yhumsing má, ngò zui sai é muzó é ashi pé chyat, a nghut kô lúh?

² Ngò gi, góbang chyáng lagyo a nghut kôlháng, nungmoq chyáng gè gè nghut lhê! Hkâsu mù gà le, nungmoq gi, haú Yhumsing má, ngò lagyo nghut é hkyô saksé dizik nghut bum akô.

³ Ngá ahtoq má jéyáng bang lé, ngá gûng ngò taí hung kat kôlé.

⁴ Ngamoq gi, zo rà shuq rà ahko ahkáng a wó é bang nghut lhê lúh?

⁵ Gotú lagyo pé eq Yesuq é yhanggu yuqzô pé eq Kehpa kut é su, lumjing sù nghut é yhumsing myhí shuí chùng rà, ngamoq, ahko ahkáng a wó é nghut lhê lúh?

⁶ Ngò eq Barnaba baú za, asak duí hkyo é matú mù zui ra rà lúh?

⁷ Ó yuq wá, yhumsing zoshuq wùn luí, gyè mù wùn waq rà lúh? Ó yuq wá, tsibiyiq hkyâm sai mù, haú má é tsibiyiq shi a zo kut rà lúh? Ó yuq wá, sau rém mù, sau naú a shuq kut rà lúh?

⁸ Ngò gi, shí hkyô pé lé xângzo hkyam dông za taí é nghut lhê lúh? Haú tarâ má le, rajung za taí tô lhê, a nghut lúh?

⁹ Hkâsu mù gà le, haú Mosheq é tarâ má, "Guq nâng nyi é no lé nhuttsung hkâ-tsung to byi."* ga kâ tô ri. Garai Gasang gi, no eq séng luí za chiq é nghut lhê lúh?

¹⁰ Gè gè yhang, yhang gi, nga-nhùng é matú taí é a nghut kô lúh? Nghut lhê, haú gi, nga-nhùng é matú kâ to byi é nghut lhê. Haí mù gà le, yò hpuq sù, yò hpuq é eq, guq bat sù, guq bat é gi, kyô chôm shù yù rà lé myoqbyù luí, kut kô é nghut lhê.

¹¹ Ngamoq gi, nungmoq chyáng woi-nyí amyui sân kat bê nghut mù, nungmoq chyáng má é mingkan zè lé shù yu é nghut jáng, lùm myô é dut byuq bekô lúh?

¹² Góbang gi, nungmoq chyáng mai garúm é ahko ahkáng wó kô é nghut jáng, ngamoq gi, haú lé je wó rà lhê a nghut kô lúh?

Nghut kôlháng, ngamoq gi, ahko ahkáng haú lé a yu é nghut lhê. Haú yù rà malaí, Hkrisduq é gabú danglù gi, hkùm zing pyâm é a hui rà matú sheq, jung hkangmó lé ngamoq hkam jân nyi lhê.

¹³ Haú noqkuq yhùm má mù zuí é bang gi, yhangmoq é zoshuq lé haú noqkuq yhùm mai wó é hkyô eq, hkungga gyap má dojaú é bang gi, hkungga gyap má nhông byi é ra-am lé myàng zô é hkyô lé, nungmoq a sé kô lúh?

* 9:9 Tarâ Pun 25:4

14 Haù eq rajung za, gabú danglù hko kyô é bang gi, gabú danglù hkyô mai yhangmoq é asak baú râ lhê ga, haù Yhumsing hkunmó hkyô to bê nghut ri.

15 Nghut kôlhang, ngò gi, ahko ahkáng haù pé haì lé le a yu é nghut lhê. Nungmoq, ngo lé haù su lhom kut byi râ lé myoqbyù mù, ngò, shí hkyô lé kâ é a nghut. Hkâsu mù gâ le, ngò haù su gumrong é hkyô lé, rayuq yuq lhoq htên pyám byi râ htoq má, ngò shi byuq le lhang je ge ri.

16 Nghut kôlhang, gabú danglù lé ngò hko kyô é hkùn, ngò gumrông jang a joq; hkâsu mù gâ le, haù gi, ngò a kut a ge é ngá wô nghut lhê. Haù gabú danglù lé ngò a hko kyô é nghut le gi, ngò dingnyé wó râ nghut lhê.

17 Yhumsing nau é myit mai ngò hko é nghut jáng, shigyaú chyunghuq wó râ nghut lhê; yhumsing nau é myit mai a nghut jáng gi, ngo lé lùm luí ap tô é lé, agon za wùn waq nyi é dut râ nghut lhê.

18 Haù mù luí, ngá é shigyaú chyunghuq gi, haì nghut lhê lhu ga jang, haù gabú danglù lé hko kyô é hkùn, ngò gi, ahpau a yu é za wó ap nóng luí, gabú danglù hko kyo hkyô má é ngá é ahko ahkáng pé lé ngò a yu é amyat nghut lhê.

19 Ngò gi, ó yuq é a-ô má le a nyi é za, lut sù nghut kôle, byù wó myô é myhó shuí lhing yù râ matú, ngá gúng ngò, yuq hkanmó é jùn kut nyi lhê.

20 Ngò gi, Yudaq byu pé lé shuí lhing yù râ matú, Yudaq byu pé chyáng nghut nyi é hkùn, Yudaq byù rayuq đông dut nyi lhê. Ngò gi, tarâ hkaú má nyi sù a nghut kôlhang, tarâ hkaú má é bang lé shuí lhing yù râ matú, tarâ hkaú má nyi bâng chyáng nghut nyi é hkùn, tarâ hkaú má é byù rayuq đông dut nyi lhê.

21 Ngò gi, tarâ a wó bang lé shuí lhing yù râ matú, tarâ a wó bâng chyáng nghut nyi é hkùn, tarâ a wó sù rayuq đông dut nyi lhê. Nghut kôlhang, gè gè ga jáng, Garai Gasâng é tarâ mai a lut htoq é za, Hkrisduq é tarâ hkaú má nyi sù nghut lhê.

22 Ngò gi, wum nyhóm bang lé shuí lhing yù râ matú, wum nyhóm bâng chyáng nghut nyi é hkùn, wum nyhóm sù rayuq đông dut nyi lhê. Ngò gi, wó dut é hkyô đông mai byù ra-am lé wó hkyí sháng gaq nghú, byù lhunglhang bâng chyáng, byù ajà jà đông nyi nyi lhê.

23 Ngò gi, gabú danglù mai wó é shimân jeju pé lé wó chôm hkam yù sháng gaq nghú, gabú danglù é yanmai haù pé banshoq lé kut é nghut lhê.

24 Dìn shingjóng poi má dìn râ bang banshoq dìn kôlhang, rayuq za shigyaú chyunghuq wó é hkyô lé, nungmoq a sé kô lhu? Chyunghuq wó râ matú dìn keq.

25 Sup poi má shingjóng lhum é bang yuq hkanmó gi, yhumsing gùng yhumsing tarâ htan é đông lhoq mhân yù râ lhê. Yhangmoq gi, gíng nyi râ a nghut é janmaú wó râ matú, haù su kut é nghut akò; nghut kôlhang, nga-nhúng gi, ahtum abyuq gingtíng nyi râ nghut é janmaú wó râ matú shikut é nghut lhê.

26 Haù mù luí, ngò gi, jum dìn dìn é byù rayuq su dìn é sù a nghut. Ngò gi, lai lé bat é byù rayuq su, akôm má bat é sù le a nghut.

27 Ngò gi, góbâng chyáng mungdang hko é htâng má, ngá gúng ngò, shigyaú chyunghuq eq a gingdán sù a dut sháng gaq nghú, ngá gúng lé gyai yhang lhoq mhân yù mù, ngá gung lé jùn kut yu nyi lhê.

10

¹ Gumang wui ê, ngò gi, dut lai lo é hkyô lé, nungmoq lé a sé a dut nhâng nau é nghut lhê; hí hkûn, nga-nhúng é ichyí iwa pé banshoq bang gi, mhutdúm ô má nyi mù, Nhông Nè mai wó lai byit kô é nghut lhê.*

² Yhangmoq banshoq bang gi, mhutdúm eq Nhông Nè má, Mosheq é chángzô pé đông baptisma hkam yu é bang chyat nghut bekô.

³ Yhangmoq banshoq bang gi, rajung zâ é woi-nyi zang zo kô é eq,

⁴ rajung zâ é woi-nyi wui shuq kô é nghut lhê; hkâsu mù gà le, yhangmoq eq rahá nghut nyi é woi-nyi eq sêng é luqbum mó mai, yhangmoq shuq kô é nghut lhê; luqbum mó haú gi, Hkrisduq nghut bê.

⁵ Nghut kôlhâng, yhangmoq myo hpyang lé, Garai Gasang a nau é nghut mù, yhangmoq é gùng sôm lé yoso pé má myhîn so san kut pyâm é hui bekô nghut ri.

⁶ Haú hkyô pé dut htoq é gi, agè ashop hkyô má yhangmoq myit tuí bùm é su, nga-nhúng a myit tuí nyi rá matú nga-nhúng é azông dut bê nghut ri.

⁷ "Byu pé gi, zùng mù, zo lui shuq lui, a lumjúng bang kut é đông, toq mù, ye bum akô."[†] ga kâ tô é eq rajung za, yhangmoq mâ é ra-am hparà noq é bang dut byuq é su, nungmoq hkâdut kô.

⁸ Yhangmoq mâ é ra-am gi, ashop é đông gungsho zùm yap é hkyô shut kômù, ra-nyi má za í mûn sum hkying yuq shi byuq é su, ashop é đông gungsho zùm yap é hkyô le, nga-nhúng gi, a ge kut shut rá nghut lhê.

⁹ Yhangmoq mâ é ra-am gi, haú Yhumsing lé chyâm lui, lhangmui pé eq hte sat é hui bùm kô é su, haú Yhumsing lé, nga-nhúng gi, a ge chyâm rá nghut lhê.

¹⁰ Yhangmoq mâ é ra-am gi, nhutluq shô-myo kôlui, lhoq htên é maumâng eq sat pyâm é hui kô é su, nungmoq gi, nhutluq shô-myo hkâdut kô.

¹¹ Yhangmoq chyáng wú yû rá azông đông haú pé dut htoq lui, ló htáng rá ipyat pé má nyi âng to bang nga-nhúng é matú sidiq byi rá đông kâ to bê nghut ri.

¹² Haú mù lui, nungmoq gi, yap gîng nyi bê su ngàm kô é nghut jáng, a leqbat rá matú sidiq nyi keq!

¹³ Byu chyáng htoq sê é gunglaú hkyô za nungmoq hui rá nghut lhê. Garai Gasang gi, lhumzui sù nghut lhê mù, nungmoq a wó jân é gunglaú hkyô lé hui nhâng rá a nghut. Nghut kôlhâng, nungmoq gunglaú hui é hkûn, Yhang gi, haú lé nungmoq wó jan rá matú, hkyô htong byi rá nghut lhê.

Hparà Lhô Noq Hkyô Lé Koi Pyám Râ Hkyô

¹⁴ Haú mù lui, ngò chyitdap é luzùm wui ê, hparà hô noq hkyô lé koi pyám keq.

¹⁵ Nhik gyíng bang lé ngò tai lhê; ngò hai tai nyi é hkyô lé nungmoq gùng myit sôn yù keq.

¹⁶ Nga-nhúng, jeju bûn nyi é jeju góm lé shuq é hkûn, Hkrisduq é sui má chôm zùm bê a nghut kô lui? Nga-nhúng, myhik hpê é muk lé zô é hkûn, Hkrisduq é gungdu má chôm zùm bê a nghut kô lui?

¹⁷ Hai mù gà le, muk htong rahum za nghut mù, nga-nhúng gi, myo myo nghut kôle ragùng za nghut nyi lhê. Hkâsu mù gà le, nga-nhúng banshoq bang gi, haú rahtung zâ é muk lé chôm gâm zô é bang chyat nghut lhê.

¹⁸ Israelaq byu pé é hkyô lé myit wú keq. Haú hkungga lé zô é bang gi, hkungga gyap má chôm lom é bang nghut lhê, a nghut kô lui?

* **10:1** Bun zo rahum mai raxê lhum gi, Htoq Lô Laiká má bo é Mosheq htâng cháng bâng é hkyô lé kâ tô é nghut lhê. † **10:7** Htoq Lô 32:6

19 Hparà lhô, a nghut jáng, hparà lhô lé títng byí é hkungga gi, rajung jung nghut lhê nghû, ngò tai é lhú?

20 Haù su tai é a nghut, a lumjítng bâng é hkungga gi, Garai Gasang lé nhông byí é a nghut, nat gâng pé lé títng byí é ru nghut lhê. Ngò gi, nungmoq, nat gâng pé eq chôm zum nyi bang dut rá lé a ô nau é nghut lhê.

21 Nungmoq gi, haù Yhumsítng é góm lé le, nat gâng pé é góm lé le, ge shuq rá a nghut; nungmoq gi, haù Yhumsítng é zangbó má le, nat gâng pé é zangbó má le, rahá ge bo lòm rá a nghut.

22 Nga-nhúng gi, haù Yhumsítng lé manôn nhâng nau é bang dut rá a nghut kô lhú? Nga-nhúng gi, Yhâng htoq je wúm bo é bang nghut lhê lhú?

Lumjítng Su É Luthkyô

23 "Jung hkangmó kut rá ahkáng wó lhê." nghut kôlhang, jung hkangmó gi, akyú wó é a nghut. "Jung hkangmó kut rá ahkáng wó lhê." nghut kôlhang, jung hkangmó gi, byú lé wó kô làm nhang é a nghut.†

24 Ó yuq le, yhumsítng é gè hkyo matú ho é a nghut é za, góbâng é gè hkyo é matú hô rá dut lhê.

25 Sho úng gài má úng é haí lé lé, úng-âng é myit eq a myí gôn é za zo keq.

26 Hkâsu mù gà le, "Myidàm htoq eq haù má joq é jung hkangmó gi, Yhumsítng é chyat nghut lhê."* gà tô ri.

27 A lumjítng bang ra-am, nungmoq lé zang zo jì mù, nungmoq é nau é nghut jáng, úng-âng é myit eq a myí gôn é za, nungmoq hí má to byí é gú lé zo keq.

28 Nghut kôlhang, rayuq yuq, nungmoq lé, "Shí gi, hparà lhô lé títng byi bê nghut lhê." ga tai kyô é nghut jáng, nungmoq lé tai kyo su é yanmai le, myit úng-âng é yanmai le, haù lé hkâzo kó.

29 Úng-âng é myit haù gi, nungmoq é a nghut, góyuq é úng-âng é myit lé tai nau é ru nghut lhê. Ngá é luthkyô lé, haí mù góyuq é úng-âng é myit eq jéyáng é hui nhang lhê lhú?

30 Ngò jeju bûn é myit mai bo zo bo shuq yu é nghut jáng, Garai Gasang lé jeju hkya-on bê nghut é zoshuq hau é yanmai, haí mù lumu pyâm é ngò hui rá lhú?

31 Haù mù luí, nungmoq zo kôlhang, shuq kôlhang, haí kut kôlhang, Garai Gasang é hpungwup shíngkâng é matú chyat kut keq.

32 Ngò gi, yuq hkangmó lé, hkyô hkangmó má shikut luí myit ngón nhang é eq rajung za, nungmoq gi, Yudaq byu pé lé nghut nghut, Grik byu pé lé nghut nghut, Garai Gasang é noquq hpúng mã é byú lé nghut nghut, ó yuq lé le myit hkâleqbat nhâng kó.

33 Hkâsu mù gà le, ngò gi, yhangmoq hkyi yu é wó hui kó sháng gaq nghû, ngá é gè hkyô ho é a nghut é za, myo myô é matú gè hkyô ho nyi é ru nghut lhê.

11

1 Ngò gi, Hkrisduq é alik châng é su, nungmoq gi, ngá é alik cháng keq.

Noquq É Má Htap Htuk Râ Hkyô

2 Nungmoq gi, hkyô hkangmó má ngo lé bûn nyi kô é yanmai le, nungmoq lé ngò lai byi bê mhoqshit hkyô pé lé myhik zing nyi kô é yanmai le, ngò, nungmoq lé hkya-ôn lhê.

† 10:23 Bun zo 23 mã é danggho gi, Korinhtuq byu pé lhaq tai é dang nghut lhê. * 10:26 Hkya-on 24:1

³ Ahkuí, ngò, nungmoq lé sê hkyâng nhâng nau é hkyô gi: yuqgè hkanmó é ulhum gi, Hkrisduq nghut ri; myiwe hkanmó é ulhum gi, yuqgè nghut ri; Hkrisduq é ulhum kúm gi, Garai Gasang nghut ri.

⁴ Yuqgè hkanmó gi, kyûdûng le nghut nghut, myiqhtoi htoí le nghut nghut, yhâng é ulhum lé nghop tô é nghut jáng, yhâng é ulhûm é aróng lé lhoq hpoi pyâm é nghut bê.

⁵ Myiwe hkanmó gi, kyûdûng le nghut nghut, myiqhtoi htoí le nghut nghut, yhâng é ulhum lé a nghop tô é nghut jáng, yhâng é ulhûm é aróng lé lhoq hpoi pyâm é nghut bê. Haú gi, yhâng é ulhum lé wuq pyâm é eq rajung za nghut ri.

⁶ Myiwe rayuq gi, yhâng é ulhum lé a nghop pyâm é nghut jáng, yhâng é xâm lé nyhâm pyâm ra rà nghut lhê. Nghut kôlhâng, xâm nyhâm pyâm é nghut nghut, xâm wuq pyâm é nghut nghut, myiwe rayuq é matú aróng hpoi lhê nghut jáng, yhang gi, yhâng é ulhum lé nghop to ra rà nghut lhê.

⁷ Yuqgè gi, Garai Gasâng é azòng isâm eq hpungwup shingkang nghut é yanmai, yhâng é ulhum lé a nghop rà é nghut lhê. Myiwe kúm gi, yuqgè é hpungwup shingkang nghut ri.

⁸ Hkâsu mù gâ le, a-nham sâng-hi má, yuqgè gi, myiwe mai lo é a nghut, myiwe sheq yuqgè mai lo é ru nghut lhê.*

⁹ Hau htoq agó, yuqgè lé gi, myiwê é matú hpan tô é a nghut, myiwe lé sheq, yuqgè é matú hpan tô é ru nghut lhê.

¹⁰ Haú nghut é yanmai le, maumang lagyo pê é yanmai le, myiwe gi, ahko ahkáng kumlhá đông yhâng é ulhum lé nghop rà dut lhê.

¹¹ Nghut kôlhâng, haú Yhumsing hí má, myiwe gi, yuqgè lé nghehkau é su, yuqgè le, myiwe lé nghehkau é nghut lhê.

¹² Hkâsu mù gâ le, myiwe gi, yuqgè mai lo é su, yuqgè le, myiwe mai hku lé é nghut lhê. Nghut kôlhâng, jung hkanmó gi, Garai Gasang mai lo é nghut lhê.

¹³ Myiwe rayuq, ulhum a nghop é za Garai Gasang lé kyûdûng é gi, htuk kô rà rhú? Nungmoq, yhumsing gung é matú doqdân yù keq.

¹⁴ Yuqgè xâm hîng tô é nghut jáng, yhâng é matú aróng hpoi é hkyô dut é nghut kôle,

¹⁵ myiwe xâm hîng tô é nghut jáng, yhâng é matú hpungwup shingkang nghut é hkyô lé, htungli eq nungmoq lé mhoqshit lhê, a nghut kô rhú? Hkâsu mù gâ le, xâm hîng tô é gi, nghop rà zè đông yhang lé byí tô é nghut lhê.

¹⁶ Rayuq yuq, haú hkyô lé tai dang-rháng nau é nghut jáng, ngamoq chyáng le, Garai Gasâng é noqkuq hpung pê chyáng le, gotú htungli a joq é nghut lhê.

Yhumsing É Myinzang

¹⁷ Nungmoq é zuphong pé gi, gè hkyô kut rà htoq má akyú a bo é hkyô je kut kô é yanmai, a-ô má hkyô shit tô é pé má, ngò, nungmoq lé hkya-ôn é a nghut.

¹⁸ Sâng-hi má, noqkuq hpung ralhum đông nungmoq zup zîng é hkún, nungmoq hkaú má gam hkoq hkyô joq é lé wó gyô é nghut luí, têng é le bò rà ngû, ngò lumjîng lhê.

¹⁹ Ô pé gi, Garai Gasang o é hkyam shut nghut é lé wó shit rà matú, nungmoq ahkaú má gam hkoq lhum hkyô joq rà dut lhê.

* 11:8 Apûn 2:21-23

²⁰ Nungmoq rahá zup zing kô é hkûn, nungmoq gi, haû Yhumsing é myinzang zô é a nghut kó.

²¹ Hkâsu mù gà le, nungmoq zô é hkûn, góyuq lé le a láng é za, ó le ó hí yù zô akô. Haû mù, rayuq gi, zo mut huí nyí, góyuq gi, shuq wut to dut akô nghut ri.

²² Nungmoq gi, zo jang shuq jang yhûm a wó bang nghut akô lú? Garai Gasâng é noqkuq hpúng lé wú tiq pyám kô é eq, a wó bang lé hoq hpu nhâng kô é, nghut akô lú? Nungmoq lé ngò hkâsu ngù táí kó rá lú? Haû pé é yanmai, ngò, nungmoq lé hkya-on rá lú? Ratsui lhang a wó dut!

²³ Hkâsu mù gà le, haû Yhumsing chyáng mai ngò wó hap yu é gû lé, nungmoq lé hai byi bê nghut lhê: Haû Yhumsing Yesuq gi, Yhang lé ap pyám huí é myin má, muk lé yù mù,

²⁴ jeju hkya-ôn é htâng má, haû lé myhik hpé mù, taí é gi, "Shí gi, nungmoq é matú Ngá é gungsho nghut lhê; Ngo lé bûn nyí rá matú, shí su kut nyí keq." gà ri.

²⁵ Haû eq rajung za, myinzang bàn zô é htâng má, Yhang gi, góm lé le yù mù, "Góm shí gi, Ngá é sui má é dangshikaq asik nghut lhê; hkâ-nhâm le, nungmoq shí shuq é hkûn, Ngo lé bûn nyí rá matú shí su kut keq." gà taí ri.

²⁶ Hkâsu mù gà le, nungmoq gi, muk shí lé zo luí, góm shí lé shuq é hkangmó, haû Yhumsing shí hkâm é hkyô lé, Yhang jé lé shoq, shit kyô nyí rá lhê.

²⁷ Haû mù luí, ó yuq nghut kôle, a gingdán é dông Yhumsing é muk haû lé zo mù, góm haû lé shuq é nghut jáng, haû Yhumsing é gungdu eq sui lé shut é mara wó bê nghut lhê.

²⁸ Haû mù, ó yuq le, muk zo góm shuq rá hí má, yhumsing gùng yhumsing jep wú ra rá nghut lhê.

²⁹ Hkâsu mù gà le, ó yuq nghut kôle, haû Yhumsing é gungdu eq sêng é hkyô lé a sê gyô é za muk zo góm shuq é nghut jáng, yhanggùng yhang mara zô bô shuq bo yu é nghut lhê.

³⁰ Haû nghut é yanmai, nungmoq má é byù myo myo gi, wum nyhôm é, nõhpyo huí é nghut bum akô. Ra-am gi, shí ló byuq bekô nghut ri.

³¹ Nghut kôlhang, nga-nhúng gi, yhumsing gùng yhumsing hí sôn sê yu é nghut jáng tarâ jéyáng é huí rá a nghut.

³² Nga-nhúng gi, mingkan eq rahá, mara byí é a hui zo sháng gaq ga, nga-nhúng lé haû Yhumsing eq jéyáng é hkûn, nga-nhúng gi, mhoqshit é huí nyí gò bê nghut lhê.

³³ Haû mù luí, ngá é gumang wui ê, nungmoq gi, zo rá ngù rahá zup zing é hkûn, rayuq eq rayuq láng lhum keq.

³⁴ Nungmoq rahá zup zing é hkûn, jéyáng é a hui zo kó sháng gaq, rayuq yuq zòmut é nghut jáng, yhûm má zô chúng rá lhê.

Gotû myit tô é hkyô pé gi, ngò jé lé é hkûn sheq shit kyo rá nghut lhê.

12

Woi-nyí Hkyô Eq Sêng É Chyunghuq Pé

¹ Gumang wui ê, woi-nyí hkyô eq sêng é chyunghuq pé lé, nungmoq a sê gyo rá lé ngò a ô nau é nghut lhê.

² Nungmoq gi, a lumjing bang nghut nyí kô é hkûn lé, dang a nyo é hpara lô noq rá matú hkyô shuí nghoq é hui kô é hkyô lé, nungmoq sê lhê.

³ Haù mù luí, "Yesuq gi, nhing pyâm é hui sháng gaq." ga, Garai Gasâng é Woi-nyí mai taí é byù ó yuq le a nyí é eq, haù Chyoiyúng Woi-nyí mai za a nghut jáng, "Yesuq gi, Yhumsing nghut lhê." ga, ó yuq le a wó taí é nghut lhê nghû, ngò, nungmoq lé taí kyô é nghut lhê.

⁴ Woi-nyí hkyô eq sêng é chyunghuq ajung jung joq lhê; nghut kôlhang, Chyoiyúng Woi-nyí mai chyat nghut lhê.

⁵ Dojaú é hkyô ajung jung joq lhê; nghut kôlhang, Yhumsing rayuq lé za dojaú é nghut lhê.

⁶ Zui saí é hkyô ajung jung joq lhê, nghut kôlhang, Garai Gasang yhang za, byù lhunglhang bang má, haù pé banshoq lé kut é nghut lhê.

⁷ Woi-nyí é hpông shit hkyô gi, byù pé é gè hkyô matú, yuq hkangmó lé byi bê nghut ri.

⁸ Rayuq lé gi, Woi-nyí haù mai, hpaqchyí byéng-yá bying é danglù byí é nghut ri; góyuq lé gi, Woi-nyí hau eq za, sumsé hpaqchyí bying é danglù byí é nghut ri;

⁹ góyuq lé gi, Woi-nyí hau eq, lumjing myit byí é nghut ri; dum góyuq lé gi, Woi-nyí hau eq, nò lhoq ge é chyunghuq byí é nghut ri;

¹⁰ dum, góyuq lé gi, hpungwup a-tsam pé; dum, góyuq lé gi, myiqhtoi htoi é ahkáng; dum, góyuq le gi, woi-nyí pé lé sê gam hkoq é ahkáng; dum, góyuq lé gi, laklai dang ahú hú ge taí é ahkáng; dum, góyuq lé gi, dang haù pé é lichyúm taí sân kyô é ahkáng, byí é nghut ri.

¹¹ Chyunghuq haù pé banshoq gi, Woi-nyí hau eq za kut é loqmú chyat nghut mù, Yhang myit hpyit é đông yuq hkangmó lé haù pé tsing gam byí é nghut ri.

Gungbun Myo Kôlhang, Ra Gùng Za

¹² Gungdu gi, gungsho showui showang pé myo myo lé pong tô é nghut kôlhang, ragùng za nghut ri; gungsho showui showang pé banshoq myo myo nghut kôlhang, gungdu ra gùng za dut tô é nghut ri. Haù eq rajung za, Hkrisduq eq le haù đông nghut ri.

¹³ Hkâsu mù gà le, nga-nhúng banshoq bang gi, Yudaq byù nghut nghut, Grik byù nghut nghut, jùn nghut nghut, lut bang nghut nghut, gungdu ra lhum za dut râ matú, Woi-nyí rayuq mai za wui-myhup hkâm yù bê nghut luí, Woi-nyí rayuq lé za chôm shuq yù bê bang nghut lhê.

¹⁴ Haù gungdu gi, gungsho showui showang ra bun lé za kut tô é a nghut é za, myo myo lé pong tô é nghut lhê.

¹⁵ Haù hkyí gi, "Ngò, loq a nghut é yanmai, gungdu eq a sêng é nghut lhê." gà é nghut jáng, hau é yanmai, gungdu eq a séng wó dut é a nghut.

¹⁶ Dum, haù nohkyap gi, "Ngò, myoqjí a nghut é yanmai, gungdu eq a sêng é nghut lhê." gà é nghut jáng, hau é yanmai, gungdu eq a séng wó dut é a nghut.

¹⁷ Ragùng dù é gi, myoqjí za nghut é nghut jáng, gyô é hkyô gi, hkâmá nghut râ lúh? Ragùng du é gi, nohkyap za nghut é nghut jáng, shôm nam é hkyô gi, hkâmá nghut râ lúh?

¹⁸ Nghut kôlhang, Garai Gasang gi, gungsho showui showang hkangmó lé, Yhang dut nhâng nau é eq rajung za, gungdu má kut to bê nghut ri.

¹⁹ Gungsho showui showang gi, ra bun za nghut é nghut jáng, gungdu gi, hkâmá nghut râ lúh?

²⁰ Hkyak ga jang, gungsho showui showang pé myo kôlhang, gungdu gi, ragùng za nghut ri.

²¹ Haù myoqjí gi, loq lé, "Ngò, nang lé a ra!" nghû a ge taí. Haù ulhum gi, hkyí lé, "Ngò, nang lé a ra!" nghû a ge taí.

²² Haù za a nghut, gungdu má é gungsho showui showang pé má wum je nyhôm é su dut é pé le, a bò a ge é chyat nghut lhê.

²³ Hau htoq agó, hpau a lúm tap râ su myit ngam é gungsho showui showang pé lé, nga-nhông je hpautap râ lhê. Haù a shit é jung gungsho pé lé, nga-nhông hpautap é dòng rago nghop râ lhê.

²⁴ Nga-nhông é wó shit é gungsho pé kúm gi, haù hkyô a ra nghut ri. Nghut kôlhang, Garai Gasang gi, gungdú é gungsho showui showang pé lé pong to mù, arông nyhum é lé, je riyhang arông byi bê nghut ri.

²⁵ Haù mù, gungdu má gamhkuí lhúm é hkyô a bo é za, gungsho showui showang pé ralhúmq ralhúmq, rajung za kut wó myit tê byí lhúmq kó râ nghut lhê.

²⁶ Haù gungsho showui showang ralhúmq jamjau huí é nghut jáng, lhúmq hkgámó bo jamjau râ nghut lhê. Ralhúmq hpautap huí é nghut jáng, lhúmq hkgámó bo gabú é nghut lhê.

²⁷ Ahkuí, nungmoq gi, Hkrisduq é gungdu nghut kôluí, nungmoq yuq hkgámó gi, haù é gungsho showui showang pé nghut akô.

²⁸ Garai Gasang gi, noqkuq hpúng má, sâng-hi lé, lagyô pé, í lhúmq nghû râ má, myiqhtoí pé, sùm lhúmq nghû râ má, mhoqshit bang, hau htàng má, laklaí kumlhá pé kut râ bang, nò wó lhoq gè râ chyunghuq wó é bang lé le, góbang lé wó garúm é bang, shuí-ú râ chyunghuq wó é bang, laklaí dang ahú hú ge taí é bang lé, masat to bê nghut ri.

²⁹ Banshoq bang gi, lagyô pé nghut lhê lhú? Banshoq bang gi, myiqhtoí pé nghut lhê lhú? Banshoq bang gi, mhoqshit bang nghut lhê lhú? Banshoq bang gi, laklaí kumlhá kut akô lhú?

³⁰ Banshoq bang gi, nò lhoq ge é chyunghuq wó é nghut lhê lhú? Banshoq bang gi, laklaí dang ahú hú ge taí lhê lhú? Banshoq bang gi, dang haù pé é lichyúm ge taí sân kyô lhê lhú?

³¹ Nghut kôlhang, nungmoq gi, je gyaú é chyunghuq lé gyai yhang ô nau nyi keq.

Chyitdap Myit

Hau htoq agó, ahkuí, ngò, nungmoq lé, je gyaú dik é hkyô ralhúmq shit kôlé.

13

¹ Ngò gi, byu pé é eq maumang lagyô pé é myíng pé lé sê taí é nghut kôlhang, chyitdap myit a bo é nghut jáng, myíng hung htê bo é ut eq myíng tui htê bo é chapchéng su za dut byuq râ nghut lhê.

² Ngò gi, myiqhtoí htoí é chyunghuq, zaú tô é hkyô pé banshoq lé sê gyô é nyan, sumsé hpaqchyí banshoq lé wó é eq, bùm pé lé wó htot nhang é lumjúng myit bo é nghut kôlhang, chyitdap myit a bo é nghut jáng, ngò haí a nghut sú dut berá nghut lhê.

³ Ngò gi, wó é sutzè banshoq myùng bang lé byí pyâm é eq, ngá é gungdu lé nyhê pyâm râ matú ap pyâm é nghut kôlhang, chyitdap myit a bo é nghut le gi, haí akyú a bò nghut ri.

⁴ Chyitdap myit gi, myit hing lhê, nú-nhâm lhê. Chyitdap myit gi, a manôn, gyáng dang a taí, a nghutbùn é nghut lhê.

⁵ Chyitdap myit gi, hpau a dap é hkyô a kut, yhumsing é akyú baú za a hò, lui za nhikjum a yo, shut é mara a matsíng é nghut lhê.

⁶ Chyitdap myit gi, agè ashop é má a gabú é za, haù tengmán hkyô má gabú nyi ri.

⁷ Chyitdap myit gi, hkâ-nhám le wú magum ri, hkâ-nhám le lumhkau ri, hkâ-nhám le myit myoqbyu ri, hkâ-nhám le hkam jân ri.

⁸ Chyitdap myit gi, hkâ-nhám le htûm byuq é a nghut. Myiqhtoi htoí é hkyô pé gi, byuq byuq râ nghut lhê; laklaí dang ahú hú ge tai é hkyô gi, zim byuq râ nghut lhê; sumsé hpaqchyí hkyô gi, lai ló byuq râ nghut lhê.

⁹ Hkâsu mù gâ le, nga-nhúng sê é gi, ra-am rahtâng ru nghut lhê. Nga-nhúng myiqhtoi htoí é gi, ra-am rahtâng ru nghut lhê.

¹⁰ Nghut kôlhang, gumjup hkyô jé lé é hkûn, a gumjup hkyô gi, byuq byuq râ nghut lhê.

¹¹ Ngò, zoshâng nghut ashí hkûn gi, zoshâng dông dang tai, zoshâng dông myit, zoshâng dông myit sôn wú é nghut lhê. Ngò, suwún nghut jáng gi, zoshâng nyi yap hkyô pé lé tô pyám bê nghut lhê.

¹² Ahkuí, nga-nhúng gi, myoqjâm hkaú mâ é rago a sân é wupzo lé za myàng é nghut lhê; nghut kôlhang, htâng má, myoqdong hkyúm wó myàng râ nghut lhê. Ahkuí, ngò gi, ra-am rahtâng za sê é ru nghut lhê; nghut kôlhang, Garai Gasang gi, ngo lé gumjup shoq sê é su, ngò le, htâng má, gumjup shoq sé râ nghut lhê.

¹³ Ahkuí, lumjínng myit, myit myoqbyú hkyô, chyitdap myit shi sùm lhum myit tô ri. Nghut kôlhang, haù pé mâ é kô dik é gi, chyitdap myit nghut ri.

14

Myiqhtoi Htoi É Chyunghuq Pé Eq Laklaí Dang Nyo É Chyunghuq Pé

¹ Chyitdap hkyô má le cháng mù, woi-nyí hkyô eq sêng é chyunghuq lé le gyaí yhang myit o nyi keq. Myiqhtoi htoí é chyunghuq lé je riyhang myit o nyi keq.

² Hkâsu mù gâ le, laklaí dang ahú hú nyo é sù ó yuq le, byù lé nyo é a nghut é za Garai Gasang lé nyo é ru nghut lhê. Yhang lé ó yuq eq le a sê gyo byi, zaú tô é hkyô pé lé haù Woi-nyí eq nyo htoq é nghut ri.

³ Nghut kôlhang, myiqhtoi htoí é sù yuq hkangmó gi, byu pé lé wum byi dang eq nhik títng dang tai ri.

⁴ Laklaí dang rahú nyo é sù gi, yhumsing gùng lé htuqbang byí ri, nghut kôlhang, myiqhtoi htoí é sù gi, noqkuq hpúng lé htuqbang byí ri.

⁵ Ngò gi, nungmoq yuq hkangmó laklaí dang ahú hú pé nyò rà lé ô nau ri, nghut kôlhang, nungmoq myiqhtoi htoí rà lé je ô nau é nghut lhê. Hkâsu mù gâ le, laklaí dang ahú hú nyo é sù gi, haù noqkuq hpúng lé wó htuqbang râ matú, lichyúm lé tai sân kyô é za a nghut jáng, myiqhtoi htoí sù gi, yhang htoq je gyaú é nghut lhê.

⁶ Ahkuí, gumang wui ê, ngò gi, nungmoq chyáng lé jé mù, laklaí dang pé nyo é nghut kôle, shing-rán nghut nghut, sumpsé hpaqchyí nghut nghut, myiqhtoi dang nghut nghut, mhoqshit dang nghut nghut, nungmoq lé a tai kyô é nghut le gi, nungmoq é matú ngò hai akyú htoq râ lúh?

⁷ Htê lhoq htoq é asak a bo jung zè pé má háng gi, sampyí nghut nghut, títng nghut nghut, gam hkoq tô é htê a joq é nghut jáng, mut myhíng bat myhíng é htê haí nghut é lé, hkâsu wó sé râ lúh?

⁸ Dum, tut htê le gam hkoq é dông a mut kyô é nghut jáng, majan htoq rà ri rí ó yuq wá hên râ lúh?

⁹ Nungmoq chyáng le haú dông nghut lhê. Nàng, laklaí dang ahú hú nyo le, sê gyô é danghkun mai nyo é za a nghut jáng, nàng haí taí nyi é lé ó yuq wá hkâsu wó sé râ lhú? Nungmoq gi, maulat má za taí háng pyâm nyi kó râ nghut lhê.

¹⁰ Míngkan má dang ahú hú yhang joq é nghut lhê, nghut kôle, dang lichyúm a htoq é dang gi, a joq é nghut lhê.

¹¹ Haú mù luí, rayuq yuq haí taí nyi é lichyúm lé ngò a dat chyup é nghut jáng, ngò gi, haú dang taí su é matú maigan byù dut mù, yhang gi, ngá é matú maigan byù dut é nghut lhê.

¹² Nungmoq chyáng le haú dông nghut lhê. Nungmoq gi, woi-nyí hkyô eq sêng é chyunghuq pé lé gyai yhang ô nau nyi bekò nghut mù, haú noqkuq hpúng lé kô myhâng nhang é chyunghuq pé lé je ho shikut nyi keq.

¹³ Haú nghut é yanmai, laklaí dang ahú hú taí é sú ó yuq le, yhang haú taí é lichyúm wó taí sân kyo sháng gaq, kyúdung râ dut lhê.

¹⁴ Hkâsu mù gâ le, laklaí dang ahú hú dông ngò kyúdung é nghut jáng, ngá é woi-nyí mai dúng é nghut lhê; nghut kôlháng, ngá é myitnyân é matú, hai akyú a wó nghut ri.

¹⁵ Haú mù, ngò hkâsu kut râ lhú? Ngò gi, ngá é woi-nyí mai le kyúdung râ, ngá é myitnyan mai le kyúdung râ nghut lhê; ngò gi, ngá é woi-nyí mai le mahkôn hkôn râ, ngá é myitnyan mai le mahkôn râ nghut lhê.

¹⁶ Nungmoq gi, nungmoq é woi-nyí mai za Garai Gasang lé hkya-on kô é nghut jáng, a sê gyô é bang má é rayuq gi, nungmoq haí taí é lé a sê é nghut mù, nungmoq jeju hkya-ôn é hkún, "Amen" ga hkâsu wó taí râ lhú?

¹⁷ Nungmoq gi, ge dik shoq jeju hkya-on kô é abe, nghut kôlháng, góbang gi, htuqbâng é a hui kó nghut ri.

¹⁸ Ngò gi, nungmoq banhoq bâng htoq má laklaí dang ahú hú je wó taí é yanmai, Garai Gasang lé jeju bûn ri.

¹⁹ Nghut kôlháng, noqkuq hpúng má, laklaí dang rahú dông danghkun ramun ngò taí râ htoq má, góbang lé mhoqshit râ akyú bo é dang ngo hkun taí râ lé ngò je ô nau ri.

²⁰ Gumang wuì è, zoshâng wuì su myit nyi é lé nô pyám keq. Agè ashop hkyô eq sêng é má gi, nyheqnú dông kut mù, nungmoq myit é hkyô má gi, ko bang dông kut keq.

²¹ Haú jep é tará má kê tô é gi,
 "A wó gyô wú é dang dông mai le, góming byu pé é nhutwuì dông mai le, byù shí bang lé ngò taí râ nghut lhê;
 nghut kôlháng, yhangmoq gi, ngá dang gyo kó râ a nghut."
 ga Yhumsíng taí ri."[☆]
 gâ ri.

²² Haú mù, laklaí dang ahú hú nyo é hkyô gi, lumjíng bâng matú kumlhá a nghut é za, a lumjíng bâng matú sheq ru nghut lhê. Myiqhtoi dang kúm gi, a lumjíng bâng matú a nghut é za, lumjíng bâng matú sheq ru nghut lhê.

²³ Haú nghut mù, noqkuq hpúng gón chôm zing mù, yuq hkanmó laklaí dang ahú hú nyo kô é nghut jáng, a sê gyô é bang nghut nghut, a lumjíng é bang nghut nghut, wang lé kô é hkún, yhangmoq gi, nungmoq nâ bùm bekò ga a taí kó râ nghut lhê lhú?

²⁴ Nghut kôlháng, yuq hkanmó, myiqhtoi dang taí nyi é u má, a lumjíng sú nghut nghut, a sê gyô é sú nghut nghut, wang lé é nghut jáng, yhang gi, yubak

dap sù rayuq nghut é lé, banshoq èq lhoq pùn kyîng é hui râ eq, banshoq èq jéyáng é hui râ nghut é htoq agó,

²⁵ yhâng é i-myt má zaú tô é hkyô pé lé de de lhoq htoq shit é hui râ nghut lhê. Haú mù, yhang gi, ngóm gop luí, Garai Gasang lé noqkuq mù, "Garai Gasang gi, gè gè yhang, nungmoq chyáng rahá nghut nyi ri!" ga taí pyo htoq kat râ nghut lhê.

Shuq Shuq Tap Tap Za Noqkuq Râ Hkyô

²⁶ Haú jáng, gumang wui ê, nga-nhúng haí taí râ lúh? Nungmoq rahá lé chôm zîng é hkún, yuq hkangmó gi, Garai hkyá-on mahkôn nghut nghut, mhoqshit é dang nghut nghut, shîng-rán nghut nghut, laklaí dang ahú hú nyo é hkyô nghut nghut, taí sân kyô é nghut nghut pé lé, wó le ge ri. Haú pé banshoq gi, noqkuq hpúng lé wum-o byi râ matú chyat kut é dut râ lhê.

²⁷ Rayuq yuq, laklaí dang ahú hú nyo é nghut jáng, í yuq eq myô htuq sum yuq mai a lai é za, rayuq htâng rayuq nyò râ dut é htoq agó, rayuq yuq haú lé taí sân kyo ra râ dut lhê.

²⁸ Taí san kyô é sù a nyi é nghut jáng, laklaí dang ahú hú nyo é sù gi, noqkuq hpúng má zim za nyi râ dut mù, yhânggùng yhang eq Garai Gasang lé za nyo râ dut lhê.

²⁹ Myiqhtoi í yuq nghut nghut, sum yuq nghut nghut taí kyo râ dut lhê; góbang gi, haí taí é lé rago gyô chyam wú râ dut lhê.

³⁰ Nghut kôlhang, zung tô é sù rayuq yuq chyáng shîng-rán jé é nghut jáng, hí taí nyi é sù gi, nô byuq râ dut lhê.

³¹ Hkâsu mù gâ le, yuq hkangmó gi, mhoqshit é eq myit wum byí é wó hui kó sháng gaq, nungmoq banshoq bang gi, rayuq htâng rayuq myiqhtoi wó htoi é nghut lhê.

³² Haú myiqhtoi pé é woi-nyí pé gi, myiqhtoi pé uphkan é a-ô má nghut nyi ri.

³³ Hkâsu mù gâ le, Garai Gasang gi, atau ahú dut é Garai Gasang a nghut é za, nguîngón hkyo é Garai Gasang ru nghut lhê.

Sân-yúng bâng zîng tô é hpúng banshoq mâ é eq rajung za,

³⁴ myiwe wui gi, noqkuq hpúng pé má zim za nyi râ dut lhê. Yhangmoq gi, dang taí ahkáng a wó é nghut mù, haú jep é tarâ má bo é eq rajung za a-ô má nyi kó sháng gaq.

³⁵ Yhangmoq gi, rajung jung sé naú kô é nghut jáng, yhûm má yhangmoq é yhumsîng hpò pé chyáng myi kó sháng gaq; hkâsu mù gâ le, myiwe rayuq noqkuq hpúng má dang taí é gi, ahoq ahí hkyô nghut ri.

³⁶ Haú Garai Gasang é mungdang gi, nungmoq chyáng mai htoq lo é nghut lhê lúh? Haú gi, nungmoq chyáng za lé jé bê nghut lhê lúh?

³⁷ Rayuq yuq, yhang gi, myiqhtoi, a nghut jáng, woi-nyí chyunghuq byí é hui sù nghut lhê ga myit é nghut jáng, ngò, nungmoq lé ká byí é pé gi, haú Yhumsîng é hkunmó nghut é lé, yhang sê yù sháng gaq.

³⁸ Yhang gi, haú lé haí su a ngàm kut é nghut jáng, yhânggùng le, haí su a ngàm kut é hui zo râ nghut lhê.

³⁹ Haú mù luí, ngá é gumang wui ê, myiqhtoi htoi râ lé ô nau nyi mù, laklaí dang ahú hú nyo é lé hkâhkûm pyám kó.

⁴⁰ Nghut kôlhang, jung hkangmó gi, htuk é dông eq shuq shuq tap tap zâ é hkyô dông kut é dut râ lhê.

15

Hkrisduq É Dui Toq Hkyô

¹ Gumang wui ê, ngò, nungmoq lé hko kyo bê nghut mù, nungmoq le hap yù luí, nungmoq yap gíng tó é jowò nghut é gabú danglù hkyô lé, ahkuí, ngò, nungmoq lé lhoq pún kat nau ri.

² Ngò, nungmoq lé hko kyo bê é mungdang lé, nungmoq gíng gíng myhik zing nyi kô é nghut jáng, nungmoq gi, gabú danglù hau é yanmai hkyi yù huí é nghut akò. Haú a nghut jáng, nungmoq lumjíng é gi, akòm dut bê nghut lhê.

³ Ngò hap yu tó é pé lé, sâng-hi ahkyak é dông, ngò, nungmoq lé lhai byi bê nghut lhê. Haú pé gi: Chyúmdang eq rajung za, Hkrisduq gi, nga-nhúng é yubak mará é matú shí hkám byi bê gá é nghut ri;

⁴ Yhang gi, myhup yhúm é huí luí, Chyúmdang eq rajung za sum nyí nghu é nyí má lhoq dui toq é huí bê nghut mù,

⁵ Petruq lé htoq shit luí, haú lagyo raxe í yuq lé le htoq shit ri.

⁶ Hau htâng má, Yhang gi, ra-u má za, gumang wui ngo shò yuq chyân lé htoq shit ri. Haú bang má é myo hpyang gi, ahkuí jé shoq asak dui nyi bum akò; ra-am kúm gi, shí ló byuq bekò nghut ri.

⁷ Hau htâng, Yhang gi, Yakuq lé htoq shit mù lagyô pé banshoq bang lé htoq shit ri.

⁸ Ló htâng má, Yhang gi, hkú buinyi a jé shí é má hku é dông nghut sù ngo lé le htoq shit bê nghut ri.

⁹ Hkâsu mù gá le, ngò gi, lagyô pé má é tiq dik sù nghut lhê. Haú Garai Gasâng é noqkuq hpúng lé zing-ri sù nghut é yanmai, ngò gi, lagyo rayuq nghú râ lháng a gíngdán é sù nghut lhê.

¹⁰ Nghut kôlháng, ngò ahkuí Ísu wó nghut nyi é gi, Garai Gasâng jeju mai nghut lhê. Yhâng é jeju gi, ngá chyáng akòm a dut é za, ngò gi, yhangmoq banshoq bâng htoq má je riyhang mù wùn waq shikut lhê. Haú gi, ngò kut é a nghut, ngò eq rahá nghut nyi é Garai Gasâng jeju sheq ru nghut lhê.

¹¹ Haú mù luí, ngò nghut nghut, yhangmoq nghut nghut, ngamoq hko kyô é gi, haú hkyô chyat nghut lui, nungmoq lumjíng é le, haú hkyô nghut ri.

Shi Byuq Bâng É Dui Toq Hkyô

¹² Nghut kôlháng, haú Hkrisduq shi é mai lhoq dui toq é huí bê hkyô lé hko kyô nyi bê nghut mù, nungmoq má é ra-am gi, shi byuq bâng é dui toq hkyô a joq nghú, hkâsu wó tái kó râ lhú?

¹³ Shi byuq bâng é dui toq hkyô a joq é ru nghut le gi, Hkrisduq le lhoq dui toq é huí berá a nghut.

¹⁴ Hau htoq agó, Hkrisduq gi, lhoq dui toq é a huí é ru nghut le gi, ngamoq hko kyô é hkyô eq, nungmoq é lumjíng hkyô gi, akòm dut byuq râ nghut lhê.

¹⁵ Hau htoq agó, Garai Gasang gi, haú Hkrisduq lé shi é mai lhoq dui toq bê hkyô lé, ngamoq saksé hkám bê nghut é yanmai, ngamoq gi, Garai Gasâng é hkyô má saksé apyoq pé dut byuq râ za nghut lhê. Nghut kôlháng, shi byuq bang lhoq dui toq huí é hkyak a joq é ru nghut le gi, Garai Gasang, Yhang lé lhoq dui toq kat râ a nghut.

¹⁶ Hkâsu mù gá le, haú shi byuq bang lhoq dui toq é a huí é nghut jáng, Hkrisduq le, lhoq dui toq é huí berá a nghut.

¹⁷ Hkrisduq gi, lhoq dui toq é a huí é nghut jáng, nungmoq é lumjíng hkyô gi, akòm dut lui, nungmoq gi, nungmoq é yubak mara hkaú má ru nyi nyi shi kó râ nghut lhê.

18 Haû nghut jáng, Hkrisduq má shi lô byuq bê bang le, htên byoq byuq râ za nghut lê.

19 Nga-nhúng gi, shí ipyat lê é matú za, Hkrisduq má myit myoqbyu hkyô wó é nghut jáng, byù banshoq bâng htoq má shogyo rayhup dut é je hui zo bang dut kó râ nghut lê.

20 Nghut kôlhang, Hkrisduq gi, gè gè yhang shi é mai lhoq dui toq é hui bê nghut mù, shi lô byuq bâng é sâng-hi ashí dut bê nghut ri.

21 Hkâsu mù gâ le, shî-nò hkyô gi, byù rayuq đông mai lò bê nghut é eq rajung za, shi byuq bâng é dui toq hkyô le, byù rayuq đông mai lò é nghut lê.

22 Hkâsu mù gâ le, lhunglhang bang gi, Adam é yanmai shi byuq é su, lhunglhang bang gi, Hkrisduq eq rading ralhum za nghut é yanmai lhoq dui toq é hui râ nghut lê.

23 Nghut kôlhang, yuq hkangmó gi, ó le ó âng é hkûn lhoq dui toq é hui râ nghut lê: Hkrisduq gi, sâng-hi lhoq dui toq huí é sù nghut lê. Hau htâng má, Yhang jé lé é hkûn, Yhang eq sêng é bang lhoq dui toq é hui râ nghut lê.

24 Hau htâng, jìhtùm jé râ nghut lê; haù hkûn, Yhang gi, up é bang banshoq, ahkáng ayá eq a-tsam pé lé ban lhoq htên pyâm é htâng, haù Íwa nghut sù Garai Gasang lé mingdang ap byi râ nghut lê.

25 Hkâsu mù gâ le, Yhang gi, Yhâng é gye pé banshoq lé, Yhâng é hkyi wang ô má tô pyâm é hkûn jé shoq up nyi ra râ nghut lê.

26 Haù lhoq htên pyâm é hui râ nghut é lô htâng é gye gi, shî-nò hkyô nghut ri.

27 Hkâsu mù gâ le, "Garai Gasang gi, jung hkangmó lé, Yhâng é hkyi wang ô má tô pyâm bê nghut ri."* gâ Chyúmdang má kâ tô ri. "Jung hkangmó lé" Yhâng é a-ô má tô pyâm bê ga tai é hkûn, jung hkangmó lé Hkrisduq é a-ô má tô pyâm bê sù Garai Gasang yhang kúm a lom é hkyô, san za nghut nyi ri.

28 Yhang gi, haù hkyô ban kut é htâng má, haù Zo yhang le, jung hkangmó lé Yhâng é a-ô má to byi bê sù Garai Gasang é a-ô má nyi sù dut nhang é hui râ nghut mù, Garai Gasang gi, lhunglhang htoq má gyaù sù nghut lui, lhunglhang lé sîng sù nghut râ nghut lê.

29 Dui toq hkyô a joq é ru nghut le gi, shi byuq bê bâng é matú wui-myhup hkâm byi bùm kô é gi, hai akyù bò kó râ lú? Haù shi byuq bang lhoq dui toq é a hui kô é ru nghut le gi, yhangmoq matú haí mù byu pé wui-myhup hkâm yù kó râ lú?

30 Ngamoq gi, ngamoq é matú, hkying hkangmó haí mù chiq râ jowò má nyi râ lê lú?

31 Gumang wui ê, ngò gi, nyí wui aluq shoí shoí shi é hui zô é nghut lê. Haù su nghù é gi, nga-nhúng é Yhumsîng Hkrisduq Yesuq má, nungmoq é hkyô lé ngò hkyak wó gumrong é yanmai nghut lê.

32 Ngò gi, xângzo hkyam đông mai za, Ehpesu myuq má tân jung dusak pé lé majan zân nyi é nghut jáng, ngá é matú hai akyù bò râ lú? Shi byuq bang lhoq dui toq é a huí é ru nghut le gi,

"Nga-nhúng gi, napmá shî râ nghut é yanmai,

zo sháng, shuq sháng."*

ngô râ za nghut lê.*

* 15:27 Hkyá-on 8:6 * 15:32 Esai 22:13 * 15:32 Dang ngho shí gi, a lumjîng bang tai é dang nghut lê.

33 "A ge é zùm yap luzúm wui gi, ge é nyì yap sâmlai lé hten nhang é nghut lhê." gâ é sanghkyang eq rajung za, hkyô shuí ngoq é hkâhui zo kó!

34 Nungmoq gi, tau bûn gyîng lò mù, mara hkâkut shut lo kó; hkâsu mù gâ le, Garai Gasang lé a sê é byù ra-am nyi akô. Ngò haù su nghù taí é gi, nungmoq hoq bun rà matú nghut lhê.

Dui Toq É Gungdu

35 Nghut kôlhang, rayuq yuq gi, "Haù shi byuq bê bang, hkâsu kut lhoq dui toq é hui kó rà lú? Yhangmoq gi, hkâsú é gungdu nghut kó rà lú?" ga myi rà nghut lhê.

36 Haù-í nghá sù ê! Nàng hô hkyô kat é pé gi, shi byuq é za a nghut jáng, yuq htoq lò rà a nghut mhai.

37 Nàng, kyô hkyô é hkûn, yuq lò rà nghut é agàm lé hô hkak e a nghut é za, sungso amyui nghut nghut, gotú amyui rajung jung nghut nghut lé za hô kat é ru nghut lhê.

38 Nghut kôlhang, Garai Gasang gi, Yhang myit hpyit to bê eq rajung za haù lé gungdu ralhum byi mù, kyôshi myui hkangmó lé, ó le ô é gungdu byi ri.

39 Gungsho lhunglhang gi, rajung za a nghut. Byù pê é gungsho gi, rajung, dusak pê é gi, gó jung, ngoq pê é gi, gó jung, ngozo pê é gi, gó jung ru nghut lhê.

40 Mauhkûng gùng pé le joq é nghut luí, myidam gùng pé le joq ri; nghut kôlhang, mauhkûng gùng pê é shing kang gi, rajung, myidam gùng pê é shing kang gi, gó jung ru nghut lhê.

41 Haù bui má bo é shing kang gi, rajung, lhamó má é gi, gó jung, kyí pé má é gi, gó jung ru nghut lhê; kyí racham eq rachâm é shing kang le gotú tú shai lhum lhê.

42 Haù mù, shi byuq bê bâng é dui toq hkyô le, haù eq rajung za nghut ri. Haù hô hkyô kat é gungdu gi, htên byoq sê é nghut luí, lhoq dui toq huí é gungdu kúm gi, htên byoq a sê é nghut lhê.

43 Hô hkyô kat é hkûn gi, aróng a bò, lhoq dui toq huí é hkûn gi, hpungwup shing kang bo ri. Hô hkyô kat é hkûn gi, wum nyhóm mù, lhoq dui toq huí é hkûn gi, a-tsam bo ri.

44 Gungsho gungdu gi, hô hkyô é hui mù, woi-nyí gungdu gi, lhoq dui toq é huí ri.

Gungsho gungdu joq é nghut le gi, woi-nyí gungdu le joq é nghut lhê.

45 Haù nghut mù, "Haù sâng-hi yuq byù Adam gi, asak dui é xângzo dut bê nghut ri."* ga kâ tò ri. Haù ló htâng é Adam kúm gi, asak byí é woi-nyí nghut ri.†

46 Haù woi-nyí eq sêng é hí lé joq é a nghut é za, gungsho eq sêng é hí lé joq é htâng má sheq, woi-nyí eq sêng é lé joq é ru nghut lhê.

47 Haù sâng-hi yuq byù gi, myidàm má é tseyùn lé saí é nghut mù, htang lhé yuq byù gi, mauhkûng htoq má é nghut ri.

48 Haù myidàm byù nghut sú su, myidàm eq sêng é bang le nghut nyi akô; haù mauhkûng htoq má é byù nghut sú su, mauhkûng eq sêng é bang le nghut nyi akô.

49 Nga-nhúng gi, myidàm byù é gungghkyâng isâm lé hkam yù bê nghut é su, mauhkûng htoq má é byu é gungghkyâng isâm lé le myang hkam yù rà nghut lhê.

* 15:45 Apûn 2:7 † 15:45 Ló htâng é Adam gi, Yesuq lé tai nau é nghut lhê.

⁵⁰ Gumang wuì ê, ngò, nungmoq lé shit kyo kôlé, gungsho eq sui gi, Garai Gasâng é mingdán é sili wunlí lé wó yû rà a nghut, htên byoq sê é le, htên byoq a sê é sili wunlí lé wó yû rà a nghut.

⁵¹ Gyo to keq, zaú tô é hkyô lé, ngò, nungmoq lé tai kyo kôlé: Nga-nhúng banshoq bang gi, shi byuq rà a nghut é za, htaí lhik é hui rà ru nghut lhê.

⁵² Haú gi, ló htâng é tut htê mying é hkûn, ralhap za, myoququq ralap má dut rà nghut lhê. Hkâsu mù gà le, tut htê mying rà nghut lhê, haú hkûn, shi byuq bê bang gi, htên byoq a sê é shut lhoq dui toq yu é hui rà nghut mù, nga-nhúng gi, htaí lhik é hui rà nghut lhê.

⁵³ Hkâsu mù gà le, htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù rà dut é nghut lhê.

⁵⁴ Haú htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yu é hkûn sheq, "Shî-nò hkyô gi, ùng budang eq myui pyâm é hui bê nghut ri." ✧ ga kê tô é eq,

⁵⁵ "Shî-nò hkyô ê, náng é ùng budang gi, hkâmá l hú? Shî-nò hkyô ê, náng é nyin gi, hkâmá l hú?" ✧

gâ tô é sanghkyang gi, dik rà nghut lhê.

⁵⁶ Haú shî-nò hkyo é nyin gi, yubak mara nghut ri; yubak marâ é a-tsam gi, jep é tarâ nghut ri.

⁵⁷ Nghut kôlhang, Garai Gasang lé jeju hkya-ôn lhê! Yhang gi, nga-nhúng é Yhumsing Yesuq Hkrisduq dông mai, nga-nhúng lé ùng budang byí é nghut ri.

⁵⁸ Haú mù luí, ngá é chyitdap gumang wuì ê, yap gingtng nyi keq. Hai eq le, nungmoq lé hkâlhoq dui nún nhâng kó. Nungmoq gi, haú Yhumsing má nungmoq wùn waq é muzó akôm a nghut é lé sé kô é nghut lhê yanmai, haú Yhumsing é muzó lé ayang wùn waq shikut nyi keq.

16

Yerusalem Wà Mó Mã É Lumjng Bâng É Matú Alu Hkyuì Râ Hkyô

¹ Ahkuí, Garai Gasâng é byu pè é matú alu hkyuì rà hkyô eq séng luí gi, haú Galatiq mau mã é noqkuq hpung pé lé ngò kut nhang é su kut keq.

² Ngò jé lé é hkûn, alu hkyuì rà hkyô a kut ra rà dông, bat hkangmó mã é sâng-hi nyi má, yuq hkangmó gi, yhumsing wó ho é má cháng mù, gam tô to láng keq.

³ Ngò jé lé é hkûn, ngò gi, nungmoq hkyin tô é byu pé lé, shit kyô é laiká pé byi mù, nungmoq é chyunghuq lé, Yerusalem wà mó mã é dé nhâng rà nghut lhê.

⁴ Ngò le ê ang rà dut é nghut jáng, yhangmoq gi, ngá é byinzùm kut rà nghut lhê.

Poluq Lum Kat É Hkyô Pé

⁵ Ngò gi, Makedoni mau lai byit é htâng, nungmoq chyáng jé lé rà nghut lhê. Hkâsu mù gà le, ngò gi, Makedoni mau lai byit rà za nghut lhê.

⁶ Ngò hkâmá ê kôlhang, ngá é hkyowuì má nungmoq wó garúm kat kó rà matú, ngò gi, rayoq zo nghut nghut, gyoqmyò l háng lai shoq nghut nghut, nungmoq eq rahá nyi abe.

⁷Ngò gi, lai lô uchyang za nungmoq lé lé kum râ nghut mù, ahkuí wó myâng râ lé a nau é nghut lhê; ngò gi, haù Yhumsing dóng é nghut jáng, nungmoq eq rahá rayoq nyi râ lé myit myoqbyu lhê.

⁸Nghut kôlhang, ngò gi, Penteko-ti poi buinyi jé shoq Ehpesu myuq má nyi râ nghut lhê.

⁹Haí mù gà le, ngo lé htuq hting é bang myo myo nyi é nghut kôlhang, akyú htoq é muzó é matú hkum mó ngo lé hpông to byí é yanmai nghut lhê.

¹⁰Timohti jé lé jáng, yhang, nungmoq eq rahá nyi é u má, gyuq é hkyô haí le a joq râ matú wú byi keq; hkâsu mù gà le, yhang gi, haù Yhumsing é muzó lé, ngò su wùn waq wùn é sù nghut lhê.

¹¹Haù mù, ó yuq le, yhang lé hkâwú shóm kó. Yhang gi, ngá chyáng wó dum taù jé sháng gaq, yhang é hkyowui má nguóngón é dông nhang kat keq. Haù gumang wui eq rahá lò kó râ lé, ngò myit láng nyi lhê.

¹²Ahkuí, nga-nhùng é gumang Apolo é hkyô eq séng luí ga jang; yhang gi, haù gumang wui eq rahá nungmoq chyáng lé râ lé, ngò, gyai yhang wum taí tsuq lhê. Yhang kúm gi, ahkuí lé nau é myit a dê bò shi, nghut kôlhang, yuqyo é ahkyíng wó jáng, yhang lé lô râ nghut lhê.

¹³Machya nyi keq; lumjíng hkyô má ging ging tíng tíng yap nyi keq; gyuq kym myit hkâbô kó; wum bo nyi keq.

¹⁴Jung hkangmó lé, chyitdap myit eq zui saí keq.

¹⁵Stehpana eq yhang é yhumbyù wui gi, Ahkaia ming má sâng-hi hpúng wâng bang nghut luí, yhangmoq gi, yhumsing gùng lé, haù sán-yúng bâng é dojaù hkyô má ap nóng bekô lé, nungmoq sê akô nghut ri. Gumang wui é, ngò, nungmoq lé wum taí tsuq kat kôlé,

¹⁶haù sù é bâng é a-ô má le, haù muzó má bo wang lòm mù, mù zui shikut bang yuq hkangmó é a-ô má le, nyi keq.

¹⁷Ngò gi, Stehpana, Hportunatu eq Ahkaiku pé jé lo é hkún, gyai gabú é nghut lhê, haí mù gà le, yhangmoq gi, nungmoq a kut byí é hkyô lé, lhoq pyíng byi bekô nghut ri.

¹⁸Hkâsu mù gà le, yhangmoq gi, ngá é woi-nyí eq nungmoq é woi-nyí lé lhoq ngón byi bekô nghut ri. Haù sù é bang lé, hpautap nyi keq.

Ló Htâng É Shi-kyâm Dang

¹⁹Asia mau má é noqkuq hpúng pé gi, nungmoq lé shi-kyâm kat akô. Akula eq Priskila nhik le, yhangnhik é yhùm má chôm huí é noqkuq hpúng lé, haù Yhumsing má nungmoq lé gyai yhang shi-kyâm kat akô.

²⁰Shí má nyi é gumang wui banshoq bang gi, nungmoq lé shi-kyâm kat akô. Rayuq eq rayuq chyoiyúng é chyitpuq èq shi-kyâm lhum keq.

²¹Ngò, Poluq gi, shi-kyâm dang shí lé, ngá é loq èq yhang ká é nghut lhê.

²²Rayuq yuq, haù Yhumsing lé a chyitdap é nghut jáng, haù yuq gi, nhing pyâm é huí sháng gaq. Yhumsing ê, jé lé aq hkoil!

²³Haù Yhumsing Yesuq é jeju gi, nungmoq eq rahá nghut nyi sháng gaq.

²⁴Ngá é chyitdap myit gi, Hkrisduq Yesuq má nungmoq banshoq bâng chyáng joq nyi sháng gaq. Amen.

KORINHTUQ

Pê Chyáng Htang Dàm Hun Kat é Laiká (2 Corinthians)

¹ Garai Gasang ô nau é eq rajung za, Hkrisduq Yesuq é lagyo rayuq dut sù ngò Poluq gi, nga-nhùng é gumang Timohti le kut, Korinhtuq myuq mã é, Garai Gasâng é noqkuq hpúng lé le, Ahkaia mau gón mã é sâ-n-yúng bang banshoq chyáng le, dang kyô kat lâ:

² Nga-nhùng é Íwa nghut é Garai Gasang eq haù Yhumsing Yesuq Hkrisduq chyáng mã é jeju eq nguingón hkyô gi, nungmoq chyáng ru joq nyí sháng gaq.

Nhik títng hkyô banshoq é Garai Gasang

³ Nga-nhùng é Yhumsing Yesuq Hkrisduq é Yhângwa eq Garai Gasang, shogyo nhikmyin hkyo é Íwa eq nhik títng hkyô banshoq é Garai Gasang gi, hkya-on kungton é huí nyí sháng gaq.

⁴ Garai Gasâng chyáng mai ngamoq wó yû bê nghut é nhik títng hkyo éq, hkasù é wuîhke hkyô hui bang lé le nga-nhùng wó nhik títng byi sháng gaq ga, Yhang gi, ngamoq é wuîhke hkyô banshoq mã nhik títng byí ri.

⁵ Hkâsu mù gà le, Hkrisduq hui zô é jamjau hkyô myo myo lé ngamoq bo hui zô é su, Hkrisduq dông mai, ngamoq é nhik títng hkyô le byíng mui nyi é nghut lâ.

⁶ Ngamoq, myit myo uhkyí é huí é nghut jáng, nungmoq é nhik títng hkyô eq hkyi yù hkyo é matú nghut nyi ri; ngamoq, nhik títng é huí é nghut jáng, nungmoq é nhik títng hkyo é matú nghut luí, haù gi, ngamoq jamjaù é eq rajung za nghut é jamjau hkyô lé, myit hing é dông mai wó jân pyâm rà a-tsam, nungmoq chyáng lhoq htoq byí é nghut lâ.

⁷ Haù mù, ngamoq é jamjau hkyô pé mã nungmoq bo lòm bekô nghut é su, ngamoq é nhik títng hkyô mã le nungmoq bo lòm bekô nghut é hkyô lé, ngamoq sê é yanmai, nungmoq lé ngamoq myit myoqbyu kat é hkyô gi, hkyak wó lum to bê nghut lâ.

⁸ Gumang wuî ê, Asia mau mã, wuîhke jamjaù é ngamoq gyai yhang hui zô é hkyô lé, ngamoq gi, nungmoq lé kyô kat nau ri. Ngamoq wó jân é a-tsam lhang htm shoq hpuzô é nghut luí, ngamoq gi, asak duì lo rà lhang a myit myoqbyù lô é nghut lâ.

⁹ Gè gè yhang, ngamoq gi, sat hui berâ nghù, ngamoq é i-myt mã lumjítng pyâm é nghut lâ. Nghut kôlhang, haù gi, ngamoq gùng ngamoq a lumhkau é za, shí bê bang lé lhoq dui toq sù Garai Gasang lé lumhkaù rà matú dut é nghut lâ.

¹⁰ Garai Gasang gi, haù sù é shí rà hkyô mai hkyi yù bê nghut mù, ngamoq lé hkyi yù rà za nghut lâ. Yhang gi, ngamoq é matú nungmoq kyûdung byí nyi é u mã, xoq luí ngamoq lé hkyi yù rà za nghut lâ nghù, ngamoq gi, Yhang lé myit myoqbyu to bê nghut luí,

¹¹ myo myo kyûdung byí é lé gyo byí é mã ngamoq shimân jeju wó mù, byù myo myo gi, ngamoq wó é shimân jejú é yanmai Garai Gasang lé jeju hkya-on kó rà nghut lâ.

Poluq, Hen Tô É Muzó Htaì Pyâm É Lé Tai Hung É Hkyô

¹² Ngamoq nghutbùn é gi, Garai Gasâng chyáng mà é chyoiyúng hkyô eq lhumzui hkyô má, mingkan zo wuì eq ngamoq asak dui bê hkyô lé le, je luì nungmoq eq zùm yap é hkyô lé le, ngamoq é myit sôn sê é hkyo eq, saksé hkám byí é hkyô nghut lhê. Ngamoq haù su kut é gi, mingkan hpaqchyí byéng-yá dông mai kut é a nghut é za, Garai Gasâng é jeju dông mai kut é ru nghut lhê.

¹³ Hkâsu mù gâ le, ngamoq gi, nungmoq a dat nghap é eq a sê gyô é haì le a ká byí kat é nghut lhê. Ngò, myit myoqbyu kat é gi,

¹⁴ nungmoq gi, ngamoq é hkyô ra-am lé wó sê gyô yù bê eq rajung za, haù Yhumsing Yesuq é buinyi má nungmoq é hkyô lé ngamoq nghutbun rà nghut é su, ngamoq é hkyô lé nungmoq wó nghutbun rà matú, nungmoq, banshoq lé sê gyo kó rà nghut lhê.

¹⁵ Haù hkyô lé, ngò hkyak myit lum to bê nghut é yanmai, nungmoq gi, akyú í dam wó hkam yù kó sháng gaq nghù, ngò gi, nungmoq chyáng hí lé kum rà matú hen to bê nghut lhê.

¹⁶ Ngò gi, Makedoni mau shut e ló é hkyowuì má nungmoq lé hí lé kum mù, Makedoni mau mai nungmoq chyáng dum taù lò luì, Yuda mau shut e é hkyowuì má, nungmoq, ngo lé garúm kat kó rà lé myit lum to bê nghut lhê.

¹⁷ Ngò gi, haù hkyô hen é hkùn, agon za hen hkyut é nghut lhê lhu? Haù a nghut jáng, ngò hen é pé gi, ra-u má za, "Nghut lhê, nghut lhê." nghù é eq, "A nghut, a nghut." nghu é wó tai rà matú, mingkan myit dông hen é nghut lhê lhu?

¹⁸ Gè gè yhang, Garai Gasang gi, lhumzui sù yhang nghut é eq rajung za, ngamoq é danglù gi, nungmoq chyáng "Nghut lhê" lé, "A nghut" nghu é a nghut.

¹⁹ Hkâsu mù gâ le, ngo èq le, Sila èq le, Timohti èq le, nungmoq chyáng hko kyo bê nghut é sù, Garai Gasâng é Yhangzo Yesuq Hkrisduq gi, "Nghut lhê" nghu é eq "A nghut" nghu é sù a nghut é za, Yhang má gi, hkâ-nhám le "Nghut lhê" nghu é za joq lhê.

²⁰ Hkâsu mù gâ le, Garai Gasang gi, danggididq hkâ-myhó to kôle, haù pé gi, Hkrisduq má "Nghut lhê" chyat nghut lhê. Haù mù, Garai Gasâng é hpungwup shingkâng é matú, Yhâng dông mai, nga-nhúng gi, "Amen" nghù tai é nghut lhê.

²¹ Ngamoq eq nungmoq lé Hkrisduq má yap gingting nhang é sù gi, Garai Gasang nghut ri. Yhang gi, nga-nhúng lé masat é xù but byi mù,

²² Yhang sing lhê gâ é dizik, nga-nhúng lé htung tap byi luì, jé lô rà hkyô pé hkyak joq lhê nghu é masat zè dông, Yhâng é Woi-nyí lé nga-nhúng é i-myyit unghkau má kat byi bê nghut ri.

²³ Ngò gi, nungmoq hkyamsa rà matú, Korinhtuq myuq má a dum taù lé é hkyô têng é lé, ngá é saksé dut rà dông Garai Gasang lé wut dúng lhê.

²⁴ Haù gi, nungmoq é lumjing hkyô lé ngamoq sing pyám byí é a nghut é za, nungmoq é gabú hkyo é matú, nungmoq eq rahá chôm zui saí é ru nghut lhê; haì mù gâ le, lumjing myit mai za nungmoq wó yap ging nyi bùm kô é ru nghut lhê.

2

¹ Haù mù luì, ngò gi, nungmoq lé myit nò nhâng é dut rà dông, lé dum kùm é a kut rà nghù, myit hpyit to bê nghut lhê.

² Hkâsu mù gâ le, nungmoq lé ngò yón kuq nhang é nghut le gi, ngò yón kuq nhâng bê bang nungmoq mai lai luì, ó yuq wá ngo lé wó gabú nhâng rà lhu?

³ Ngò jé lé é hkùn, ngo lé gabú nhâng rã âng é bãng èq, ngo lé myit nò nhang é a hui sháng gaq nghũ, ngò gi, ngò kut é eq rajung za laiká kã kat bê nghut lhê. Ngá é gabú hkyô lé nungmoq banshoq bang wó bo gabú kó rã nghut lhê nghũ, nungmoq banshoq bang lé ngò hkyak myit lum tó lhê.

⁴ Hkâsu mù gã le, ngò gi, nungmoq lé laiká kã é hkùn, myit myo uhkyí mó èq le, myit má yón kuq é èq le, ngaubyi ngau-nhap é èq le, kã kat bê nghut lhê. Haú gi, nungmoq lé yón kuq é hui nhâng rã matú a nghut é za, nungmoq lé ngò hkã-í chyitdap é hkyô lé sé nhâng rã matú ru nghut lhê.

Mara Hkyut Byí Lhum Rã Hkyô

⁵ Yón kuq hkyô lhoq htoq é sú gi, yhang, nungmoq banshoq bang lé ahkyô hkyô pé má yón kuq nhang é su, ngo lé gyai wá yón kuq nhang é a nghut. Haú hkyô eq séng luí, ngò gyai wá yhang zuq zuq a taí nau é nghut lhê.

⁶ Nungmoq myo hpyâng èq yhang lé mara dam byí é hkyô gi, yhâng é matú gé bê nghut rí.

⁷ Nghut kôlhang, ahkuí, nungmoq gi, yhang a wó jan loshoq myit yón é a hui zo rã matú, yhang lé mara hkyut pyám byi mù, nhik tíng byi keq.

⁸ Haú mù luí, nungmoq é chyitdap myit gi, yhang é ahtoq má dum lhoq gíng shit nyí keq nghũ, nungmoq lé ngò wum taí tsuq kat lhê.

⁹ Ngò, nungmoq lé haí mù laiká kã byí kat é hkyô gi, nungmoq chyam wú huí é hkyô lé wó jân é hkyô eq jung hkangmó má jino gyo hkyô bò a bo é lé, wó sé rã matú le nghut lhê.

¹⁰ Nungmoq, rayuq yuq lé mara hkyut byí é nghut le gi, ngò le, haú yuq lé mara hkyut byí lhê. Mara hkyut rã rajung jung joq é nghut jáng, ngò mara hkyut é gi, Tsadán èq nga-nhúng lé a wó ùng rã matú, nungmoq é yanmai, Hkrisduq é myoq hí má ngò mara hkyut byi bê nghut lhê.

¹¹ Hkâsu mù gã le, Tsadán hen é hkyô pé lé nga-nhúng a sê é a nghut.

Dangshikaq Asik Mã É Hpungmũ Wùn Bang

¹² Ngò gi, Hkrisduq é gabú danglù hko kyo rã matú, Troa myuq má è jé é hkùn, haú Yhumsíng gi, ngo lé hkum hpóng byí é lé, ngò myang rí.

¹³ Nghut kôlhang, ngò gi, ngá é gumang Tituq lé haú má a myang ho é yanmai, myit myo mù, yhangmoq lé shi-kyâm to luí, Makedoni mau shut xoq e ló é nghut lhê.

¹⁴ Nghut kôlhang, Hkrisduq má, ngamoq lé hkã-nhám le ùng budang hkyô shut shuí-ù yù mù, Hkrisduq lé sê é sumsé hpaqchyí é nam ngón shôm lé, ngamoq đông mai jowó hkangmó má taí pyo é sú, Garai Gasang gi, jeju hkyã-ôn é huí nyí sháng gaq.

¹⁵ Hkâsu mù gã le, ngamoq gi, hkyi yu é huí nyí bãng chyáng le, htên byoq ló é huí nyí bãng chyáng le, Garai Gasâng é matú Hkrisduq é nam ngón shôm nghut nyí lhê.

¹⁶ Ngamoq gi, htên byoq nyí bãng é matú shí-nò hkyo é shôm dut mù, hkyi yù huí nyí bãng é matú nghut jáng, asak hkyo é nam ngón shôm dut é nghut lhê. Haú mù, ó yuq wá muzó shí eq htuk rã lú?

¹⁷ Ngamoq gi, amyat wó rã matú Garai Gasâng é mungdang lé hkat ung zó é byu myo myo su a nghut é za, Garai Gasâng chyáng mai nhang é byu pé su, Garai Gasâng é hí má, Hkrisduq é byu pé đông lhumzui myit mai taí é nghut lhê.

3

1 Ngamoq gi, yhumsing gùng yhumsing dum owaq hi ló é nghut lhè lúh? Byù ra-am kut é su, nungmoq chyáng, ngamoq é matú htuqluq htuqbáng laiká ká byi kô é ngamoq ra râ luq, nungmoq yuq ngamoq é matú ká byi ra kó râ luq?

2 Nungmoq gùng yhang gi, ngamoq é myit nhiklhum má kâ tô é, yuq hkangmò èq nghap luí sê yu é laiká gùng pé nghut akò.

3 Nungmoq gi, nungmoq chyáng ngamoq hpungmù wùn waq é yanmai, Hkrisduq chyáng mã é laiká nghut kô é hkyô lé shit nyi akò. Haù gi, kâ jung chí èq kâ tô é dông a nghut é za, rù dui nyi é Garai Gasâng é Woi-nyí èq kâ tô é nghut é htoq agò, luqlong pé má kâ tô é dông a nghut é za, xângzo byu é myit nhiklhum long pé má kâ tô é ru nghut lhè.

4 Haù su nghù hkyak wó myit lum é hkyô gi, Garai Gasâng é hí má, Hkrisduq dông mai ngamoq wó yu é nghut lhè.

5 Ngamoq gi, yhumsing gùng haì lé le wó kut lhè nghu é a nghut, ngamoq é a-tsam gi, Garai Gasâng chyáng mai lo é nghut lhè.

6 Yhang gi, ngamoq lé, dangshikaq asik lé wó wùn waq râ a-tsam byi bê nghut ri. Dangshikaq asik haù gi, tarâ laiká mai lo é a nghut é za, Woi-nyí mai lo é ru nghut lhè. Hkâsu mù gà le, laiká gi, shí dàm byi lhè, Woi-nyí kúm gi, asak byí é nghut lhè.

Dangshikaq Asik É Hpungwup Shingkang

7 Ahkuí, haù Mosheq é myoqdong mã é hpungwup shingkang é yanmai, haù Israelaq byu pé gi, yhâng é myoqdong lé a wó wú tsuq to kó nghut ri. Hpungwup shingkang haù shùm lo byuq sê é nghut kôlháng, luqlong má dok kâ tô é, shí-nò hkyô lhoq htoq é tarâ muzó gi, hpungwup shingkang eq rahá jé lé é nghut lhè.

8 Haù su nghut jáng, haù Woi-nyí é muzó gi, hpungwup shingkang je riyhang dut râ a nghut kó lúh?

9 Gè gè yhang, haù byù lé mara byí é tarâ muzó lháng, hpungwup shingkang bo é nghut le gi, dingmán nhang é hkyô sik gi, je riyhang hpungwup shingkang bo é nghut lhè ô!

10 Hkâsu mù gà le, hpungwup shingkang bo é tarâ muzó gi, hpungwup shingkang je bo é dangshikaq asik eq whuí é hkûn, hpungwup shingkang a bò lo dut byuq bê nghut ri.

11 Shum byuq ló é tarâ lháng gi, hpungwup shingkang eq rahá lé jé bê nghut le gi, ru gíng nyi é dangshikaq asik é hpungwup shingkang gi, je riyhang gyaù râ nghut lhè ô!

12 Haù mù luí, ngamoq gi, haù sù é myoqbyù hkyô wó é yanmai, gyuq kyum myit a bo é hkyô shit é nghut lhè.

13 Ngamoq gi, Mosheq su a nghut. Yhang gi, duqbáng é hkyô shùm byuq ló é hkûn, haù Israelaq byu pé haù lé a wú tsuq râ matú, yhâng é myoqdong lé myoqgo èq nghop pyâm é sù nghut ri.

14 Nghut kôlháng, yhangmoq é myit gi, lhoq chut byí é hui bekò nghut ri; hkâsu mù gà le, hkû-nyí jé shoq, dangshikaq axau lé nghap é hkûn, rajung zâ é myoqgo gi, ru nghop to byí ashí nghut ri. Haù gi, huí sêng pyâm é a hui shí, haì mù gà le, Hkrisduq dông za haù lé wó yu pyâm é nghut lhè.

15 Hkû-nyí jé shoq lháng, Mosheq é laiká lé nghap é hkûn, yhangmoq é myit nhiklhum má myoqgo èq nghop tô é nghut ri.

¹⁶ Nghut kôlhang, ó yuq le, Yhumsing chyáng hká u lhang lò kôlhang, haú hkún jáng, myoqgò gi, hí pyám byí é hui rá nghut lhê.

¹⁷ Yhumsing gi, haú Woi-nyí nghut mù, Yhumsing é Woi-nyí nyi é jowò má, luthkyô le joq lhê.

¹⁸ Haú Yhumsing é hpungwup shingkang lé lhoq htoq shit é bang banshoq nghut é myoqdong má myoqgò a nghop é bang nga-nhung gi, ru myo jat nyi é hpungwup shingkang lhoq htoq byi hkyô nghut é, Yhang é isâm shut htaí lhik wang é hui nyi bê nghut lhê. Haú hkyô gi, haú Woi-nyí nghut sù Yhumsing chyáng mai lo é nghut lhê.

4

Tseyam Pé Má Bo É Sutzè

¹ Ngamoq gi, Garai Gasâng jeju mai muzó hkyô haú wó é nghut mù, myit wum a gyuí é nghut lhê.

² Ngamoq gi, záu tô é eq hoq htoq é hkyô pé lé tô pyám luí, mhaú zô é hkyô le a kut, Garai Gasâng é mungdang lé le ahpuc alhik a kut é bang nghut lhê. Haú su kut rá malaí, ngamoq gi, haú tengmán hkyô lé san za lhoq htoq shit é dong, Garai Gasâng é hí má yuq hkangmó é myit sôn sê é hkyô má, yhumsing gung yhumsing htuk shoq nyi lhê.

³ Ngamoq é gabú danglù gi, myoqgo eq nghop pyám é hui é nghut jáng, haú gi, htên byoq nyi bang chyáng za nghop pyám hui é ru nghut lhê.

⁴ Haú Garai Gasâng é azòng isâm nghut sù, Hkrisduq é hpungwup shingkang bo é gabú danglù é maubó lé, a lumjing bang a wó myang kó sháng gaq ga, ipyat shi é garai* gi, yhangmoq é myit lé lhoq chit byi bê nghut ri.

⁵ Haú nghut é yanmai, ngamoq gi, yhumsing gung eq séng luí hko kyô é a nghut é za, Yesuq Hkrisduq gi, Yhumsing nghut é hkyô lé le, Yesuq é matú, ngamoq gung yhang gi, nungmoq é jùn pé nghut é hkyô lé le, hko kyô é ru nghut lhê!

⁶ Hkâsu mù gâ le, "Mauchut hkaú mai maubó htoq lô sháng gaq."† ga taí é Garai Gasang gi, Yesuq Hkrisduq é myoqdong mâ é Garai Gasâng é hpungwup shingkang é maubó lé sê gyô é nyan lé, nga-nhung lé byi é dong, Yhang é maubó lé, nga-nhung é i-myt unghkaú má duqbó nhâng bê nghut ri.

⁷ Nghut kôlhang, ngamoq gi, sutzè haú bo é tseyam pé† nghut nyi lhê. Haú gi, gyaú dik é a-tsam mó gi, ngamoq chyáng mâ é a nghut é za Garai Gasâng chyáng mâ é nghut é hkyô lé tûn shit rá matú nghut lhê.

⁸ Ngamoq gi, wuîhke hkyo eq lhanghkyuq mai gyai yhang nhê zik é hui kôlhang, a gyop byuq é nghut lhê; myit lhoq nhung pyám é hui kôlhang, myit a htum byuq é nghut lhê;

⁹ zing-rí é hui kôlhang, kâng pyám hui é a nghut; bat lhang pyám é hui kôlhang, htên byoq hui é a nghut.

¹⁰ Haú Yesuq é asak duí hkyô le, ngamoq é gungdu má lhoq htoq shit é hui sháng gaq nghú, ngamoq gi, Yesuq shi é hkyô lé, hkâ-nhám le, ngamoq é gungdu má wùn waq wún é nghut lhê.

¹¹ Hkâsu mù gâ le, Yesuq é asak duí hkyô gi, nga-nhung é shi sê é gungdu má lhoq htoq shit é hui sháng gaq nghú, asak duí nyi é bang ngamoq gi, Yesuq é matú é yanmai, hkâ-nhám le, shi byuq hkyô shut ap pyám é hui nyi ri.

* 4:4 Ipyat shi é garai gâ é gi, Tsadán lé gâ é nghut lhê. † 4:6 Apùn 1:3 ‡ 4:7 Tseyam pé gâ é gi, nga-nhung é wum nyhôm é gungdu lé gâ é nghut lhê.

12 Haù mù luí, shi byuq hkyô gi, ngamoq má mù zuí nyi ri; asak ùi hkyô kúm gi, nungmoq má mù zuí nyi é nghut ri.

13 "Ngò gi, lumjǐng bê nghut lhê, haù mù, ngò taí é nghut lhê."* ga kâ tô é eq rajung za, ngamoq le, lumjǐng hkyô hau eq yhang, lumjǐng bê nghut mù taí é nghut lhê.

14 Haì mù gâ le, haù Yhumsǐng Yesuq lé shi é mai lhoq ùi toq é Sù gi, ngamoq lé le, Yesuq eq rahá lhoq ùi toq mù, nungmoq eq rahá, ngamoq lé Yhâng é hí má shuì jé rà nghut é lé, ngamoq sê lhê.

15 Haù jeju wó é byu pé gi, je riyhang myô jat lò mù, Garai Gasâng é hpungwup shingkâng é matú, jeju hkya-ôn é hkyô gi, byǐng mui nyi sháng gaq ga, haù pé banshoq gi, nungmoq é akyu é matú nghut nyi ri.

16 Haù mù luí, ngamoq gi, myit wum a gyuì é nghut lhê. Ngamoq é shinggan gungdu gi, htên byoq lò nyí kôhlang, i-myt unghkaù gi, ra-nyí eq ra-nyí asik dut nhang é huí nyi ri.

17 Hkâsu mù gâ le, ngamoq é tiq é eq razup zâ é wuìhke hkyô pé gi, ngamoq é matú hau pé htoq gyai hkik é ahtum abyuq é hpungwup shingkang lé, wó yù nhang ri.

18 Haù mù, nga-nhúng é myoq gi, byu-myang é lé wú tsuq nyi é a nghut é za, a byu-myang é lé sheq wú tsuq nyi é ru nghut lhê. Hkâsu mù gâ le, byu-myang é gi, razup rahtâng zâ é nghut mù, a byu-myang é kúm gi, ahtum abyuq é nghut lhê.

5

Mauhkúng Htoq Mã É Yhùm

1 Haù myidàm zúm nghut é nga-nhúng lúng nyi é gungdu gi, htên byoq sê é nghut kôhlang, byu loq eq saí é a nghut é za, mauhkúng htoq má joq é ahtum abyuq é yhùm* nghut é, Garai Gasâng chyáng mã é yhùm lé, nga-nhúng wó é hkyô lé, nga-nhúng sê lhê.

2 Nghut kôhlang, ahkuí, nga-nhúng gi, nga-nhúng é mauhkúng yhùm lé tù hut byí é lé gyai yhang hui naù mù, nò-kying su kyǐng nyi lhê.

3 Haì mù gâ le, nga-nhúng gi, hut byí é hui jáng, gungdu a bò bang a dut lo rà nghut lhê.

4 Hkâsu mù gâ le, nga-nhúng gi, zúm shí má lúng nyi é u lé, wòlai wùn mù, nò-kying su kyǐng nyi lhê; haù gi, shí byuq sê é lé, asak ùi é eq wó htaí lhik pyám sháng gaq nghù, nga-nhúng gi, a hut byí é hui rà lé a ô nau é za, nga-nhúng é mauhkúng yhùm lé tù hut byí é hui rà lé ô nau é yanmai nghut lhê.

5 Ahkuí kúm, jeju haù hkam yù rà matú, nga-nhúng lé lajáng to byí é sù gi, Garai Gasang nghut mù, jé lô rà hkyô gi, hkyak joq lhê nghù é masat zè òng, nga-nhúng lé haù Woi-nyí byi bê nghut ri.

6 Haù mù luí, ngamoq gi, hkâ-nhám le hkyak lum tô lhê. Gungdu shí má yhùm òng ru lúng nyí nyí gi, haù Yhumsǐng eq wê gâng nyi ashí nghut é lé ngamoq sê nyi lhê.

7 Ngamoq gi, byu-myang é òng mai a nghut é za, lumjǐng myit mai asak ùi é ru nghut lhê.

* 4:13 Hkya-on 116:10 * 5:1 *Mauhkúng htoq mã joq é ahtum abyuq é yhùm gâ é gi, nga-nhúng, mauhkúng mingdán mã jé é hkùn wó rà gungdu asik lé gâ é nghut lhê.*

⁸ Ngamoq gi, hkyak myit lum tô lê nghũ, ngò tái lê, haũ mù, gungdu shĩ mai wê gang luĩ, haũ Yhumsĩng eq rahá nyi rã lé ngamoq je riyhang ô nau é nghut lê.

⁹ Haũ mù, ngamoq gi, gungdu shĩ má yhũm đông lúng nyi é nghut nghut, haũ mai wê gang é nghut nghut, ngamoq myit myoqbyu tô é jowò gi, Yhang lé gabũ nhãng rã matũ nghut lê.

¹⁰ Hkãsu mù gã le, yuq hkangmó gi, gungdu shĩ má yhũm đông lúng nyi é u lé, ge é nghut nghut, a ge é nghut nghut, kut é eq rajung za hkam yũ rã matũ, Hkrisduq é tarã jéyáng tanghkuq hí má, nga-nhúng banshoq bang htoq shit ra rã nghut lê.

Nguingón Hkyô Xoq É Muzó

¹¹ Haũ mù, Yhumsĩng lé gyuq hkungga rã hkyô haĩ nghut é lé ngamoq sê é nghut luĩ, ngamoq gi, byu pé lé tái pũn kyĩng shikut lê. Ngamoq haĩ nghut é gi, Garai Gasang chyáng san za nghut nyi mù, nungmoq é myit sôn sê é hkyô má le san za nghut rã lé, ngò myit lum lê.

¹² Haũ myit nhiklum má bo é lé gumrông rã malaĩ, byu-myang é lé gumrong é bang lé, nungmoq wó tú tái kó sháng gaq nghũ, ngamoq gi, nungmoq chyáng yhumsing gũng lé dum owaq shikut é a nghut é za, ngamoq é hkyô lé, nungmoq wó gumrông rã ahkáng, nungmoq lé byĩ é ru nghut lê.

¹³ Ngamoq a gyĩng é đông nghut le gi, Garai Gasang é matũ a gyĩng é nghut lê; ngamoq gyĩng é đông nghut le gi, nungmoq é matũ gyĩng é nghut lê.

¹⁴ Hkãsu mù gã le, Hkrisduq é chyitdap myit eq ngamoq lé kut nhang nyi é nghut lê. Haũ gi, banshoq bãng é matũ rayuq shĩ hkám byi bê nghut mù, banshoq bang shi é đông nghut bê nghũ, ngamoq hkyak sê gyô é yanmai nghut lê.

¹⁵ Yhang gi, asak dui nyi é bang, yhangmoq yhumsing gung é matũ a dui lô é za, yhangmoq é matũ shĩ hkám byi luĩ, lhoq dui toq é huĩ Su é matũ dui kó sháng gaq ga, banshoq bãng é matũ shĩ hkám byi bê nghut ri.

¹⁶ Haũ mù, ngamoq gi, ahkuĩ mai, ó yuq eq séng luĩ le, mingkan hkyam đông mai a wũ lô é nghut lê. Ngamoq gi, hí hkũn Hkrisduq lé haũ đông wũ é nghut kôlhng, haũ su hkã-nhãm le a kut lô é nghut lê.

¹⁷ Haũ nghut mù luĩ, rayuq yuq gi, Hkrisduq má nghut nyi é nghut jáng, yhang gi, asik hpãn hui sũ dut bê nghut ri; haũ axau gi, byuq byuq mù, lunglhang asik dut bu-nhung!

¹⁸ Haũ pé banshoq gi, Garai Gasang chyáng mã é chyat nghut lê. Yhang gi, Hkrisduq đông mai nga-nhúng lé Yhànggũng eq nguingón hkyô xoq yũ luĩ, nguingón hkyô xoq é muzó ngamoq lé byi bê nghut ri.

¹⁹ Haũ gi, Garai Gasang gi, byu pé é mara lé a matsĩng byĩ é za, Hkrisduq đông mingkan lé Yhànggũng eq nguingón hkyô xoq yũ bê nghut luĩ, Yhang gi, nguingón hkyô xoq yu é mungdang haũ lé, ngamoq lé ap byĩ to bê nghũ nau é nghut lê.

²⁰ Haũ mù luĩ, ngamoq gi, Hkrisduq é gunglik pé nghut lê mù, Garai Gasang gi, ngamoq đông mai nungmoq lé lhoq pũn kyĩng nyi é nghut lê. Garai Gasang eq nguingón hkyô xoq yũ keq nghũ, ngamoq gi, Hkrisduq é gunglik đông nungmoq lé dũng tốngbãn nyi lê.

²¹ Nga-nhúng gi, Hkrisduq đông mai Garai Gasang é dingmán bang wó dut kó sháng gaq ga, Garai Gasang gi, yubak mara a bò Sũ lé, nga-nhúng é matũ yubak mara hkungga dut nhãng bê nghut ri.

6

1 Ngamoq gi, Garai Gasâng é mù zui byinzùm wùi nghut nyi é eq rajung za, Garai Gasâng jeju lé akyù a bo é dông hkâhap yù kó nghù, nungmoq lé wum tai tsuq kat lhê.

2 Hkâsu mù gâ le,

"Ngò ô nau é ahkyíng má, nang lé ngò gyo byi bê nghut mù, hkyi yù hui rá buinyi má, nang lé ngò garúm bê nghut lhê."*

ga luí, Yhang tai ri. Ngò, nungmoq lé tai kyo kôlé, ahkuí gi, Garai Gasang ô nau é ahkyíng, ahkuí gi, hkyi yu é buinyi nghut ri.

Poluq É Wuíhke Hkyô Pé

3 Ngamoq é hpungmù gi, tai hpoi pyâm é a hui sháng gaq nghù, ngamoq gi, ó yuq é hkyô má le, leqbat jung a to byí é nghut lhê.

4 Haù kut rá malaí, ngamoq gi, Garai Gasâng é dui-nhâng zoshâng wui nghut é hkyô lé, hkyô hkangmó má yhumsing gùng yhumsing shit nyi lhê. Gyai hkam jân é hkyô má le, jamjau hkyô pé má le, wuíhke hkyô pé má le, myit myo uhkyí hkyô pé má le shit nyi lhê.

5 Nhuq bat huí é pé má le, htóng lhúng huí é eq toq gabyông é má htím é huí é má le, mù zui shikut é má le, a myang yhup é myín pé má le, zòmut huí é má le, shit nyi lhê.

6 Sân-yúng é má le, sê gyô é hkyô má le, myit hing é eq myit ge é má le, Chyoiyúng Woi-nyí eq chytidap myit akying má le,

7 tengmán é mungdang hko é má le, Garai Gasâng é a-tsam má le, loqyò loqpai má dingmán hkyô nghù é laknak pé dông le, shit nyi lhê.

8 Hpungwup shingkang byí é hui kô é dông eq a hkunggâ é hui kô é dông nghut kôle, a ge é luhkyang eq ge é luhkyang tai kôle, shit nyi lhê. Ngamoq gi, tengmán kôlháng, mhaù zo bang dông sôn yu akô nghut ri.

9 Ngamoq lé sé kôlháng, a sé é dông kut akô nghut ri; shi ló nyí kôlháng, rù dui nyi é bang nghut lhê; nhuq bat é hui kôlháng, sat pyâm é a hui shí é bang nghut lhê.

10 Yón hkyô byíng nhâng kôlháng, hkâ-nhám le gabú nyi lhê; myùng kôlháng, byù myo myo lé wó sùt nhang nyi lhê; hai le a wó kôlháng, jung hkangmó lé síng é dông nghut lhê.

11 Korinhtuq bang ê, ngamoq gi, nungmoq lé san za tai bê nghut luí, ngamoq é myit nhiklhúm lé, nungmoq é matú làm shoq hpông to byi bê nghut lhê.

12 Ngamoq gi, ngamoq é chytidap myit lé, nungmoq chyáng mai lãng taù yu nyi é a nghut, nungmoq sheq, ngamoq chyáng mai lãng taù yu nyi kô é ru nghut lhê.

13 Nungmoq le, myit nhiklhúm lé làm shoq dum taù hpóng keq nghù, ngò gi, ngá zô pé lé dông tai lhê.

A Lumjìng Bang Eq A Nhungkut Râ Hkyô

14 A lumjìng bang eq rahá kandang hkâwaq kó. Hkâsu mù gâ le, dingmán é hkyô eq agè ashop é hkyô gi, hai sêng lhum lhê lú? Maubó eq mauchut gi, hkâsu wó zùm yap kó râ lú?

15 Hkrisduq eq Beliala* gi, hkâsu kut myit wó huí lhum kó râ lú? Lumjìng sù rayuq eq lumjìng sù gi, hkâsu wó pung lhum kó râ lú?

* 6:2 Esai 49:8 * 6:15 Beliala gâ é gi, Tsadán é myíng rajà nghut lhê.

16 Garai Gasâng é noqkuq yhûm eq hparà lhô pé gi, hkâsu wó húm râ lúh? Hkâsu mù gâ le, nga-nhúng gi, rû dui nyi é Garai Gasâng é noqkuq yhûm nghut lhê. Haû gi, "Ngò gi, yhangmoq eq rahá nyi mù, yhangmoq chyáng sô nyi râ nghut luí, Ngò gi, yhangmoq é Garai Gasang dut mù, yhangmoq gi, Ngá é byu pé dut kó râ nghut lhê."✠ ga Garai Gasang taí tô é eq rajung za nghut ri.

17 "Haû mù luí, yhangmoq chyáng mai htoq lô mù, gotú san za nyi keq. A sansêng é zè lé hkâzáng kó, haû hkûn, Ngò, nungmoq lé lhom hap yù râ nghut lhê."✠
ga haû Yhumsing taí ri.

18 "Ngò gi, nungmoq é Íwa dut mù, nungmoq gi, Ngá é byizo yuqzô pé dut kó râ nghut lhê."✠
ga haû wum-o a-tsam dik shoq bò Sû Yhumsing taí ri.

7

1 Chyitdap é luzúm wui ê, nga-nhúng gi, danggidiq haû pé lé wó tô é bang nghut é yanmai, gungdu eq woi-nyí lé agot a-ù dut nhang é jung hkangmó mai, yhumsing gùng yhumsing lhoq sân-yúng yù luí, Garai Gasang lé gyuq hkunggâ é myit eq chyoiyúng hkyô má lhoq gumjup yu nyi sháng.

Poluq É Gabú Hkyô

2 Nungmoq é i-myt unghkaû má ngamoq lé jowò byi keq. Ngamoq gi, ó yuq lé le a shut wú, ó yuq lé le a lhoq htên wú, ó yuq lé le a mhaû zô wú é nghut lhê.

3 Ngò gi, nungmoq lé mara byi râ matú haû su taí é a nghut. Ngamoq gi, asak dui kôle, shí kôle, nungmoq eq rahá wó dut shoq, nungmoq gi, ngamoq é i-myt unghkaû má lúng nyi é nghut lhê nghû, hí hkûn ngò taí wú bê nghut lhê.

4 Ngò gi, nungmoq lé, hkyak yhang myit lum to bê nghut lhê. Ngò gi, nungmoq é yanmai gyai yhang gumrong nyi lhê. Ngò gi, myit wum byí é gyai yhang huí ri; jamjau hkyô pé myo myo ngamoq hui kôlhang, ngò, gyai yhang gabú nyi lhê.

5 Hkâsu mù gâ le, ngamoq gi, Makedoni mau má jé é hkûn, ngamoq é gungdu gi, zim za a myang nyi é htoq agó, hkyô hkangmó má ngamoq wuihke jamjau hui zô é nghut lhê. Shinggan má gi, mabyoq htoq, ahkaû má gi, gyuq kyum nyi é nghut lhê.

6 Nghut kôlhang, nhik ngê bang lé nhik tìng é Garai Gasang gi, Tituq lé jé lé nhang é dông mai, ngamoq lé nhik tìng byi bê nghut ri.

7 Yhang jé lé é dông mai za a nghut, yhang lé nungmoq nhik tìng byí é hkyô dông mai le nghut lhê. Ngá é gabú hkyô gi, gó nám lhê htoq má je myo sháng gaq ga, yhang gi, nungmoq ngo lé myit tuí nyi é hkyô, nungmoq gyai yhang shut bún é hkyô, ngá é matú nungmoq gyai myit chiq byí é hkyô pé lé, ngamoq lé taí kyo bê nghut ri.

8 Ngá é laikâ èq, nungmoq lé yón nhang é nghut kôle, ngò gi, nungngham wó é a nghut. Sâng-hi le, ngò nungngham wó é nghut kôlhang, ngá é laiká gi, nungmoq lé rayoq zo za lhoq yón nhang é lé, ngò sê lhê.

9 Nghut kôlhang, ngò gi, ahkuí gabú lhê; haû gi, nungmoq lé yón hui nhang é yanmai a nghut é za, nungmoq é yón hkyo èq, nungmoq lé myit lêng nhang é yanmai ru nghut lhê. Nungmoq gi, Garai Gasang ô nau é dông yón huí é

bang dut bekô nghut mù, nungmoq lé, ngamoq èq hai akyû le a lhoq yôm byí é nghut lhê.

¹⁰ Hkâsu mù gâ le, Garai o é đông yón kuq huí é hkyô gi, nungngham wó hkyô a bo é za, hkyi yù hkyô wó shoq, myit lhing nhang é nghut ri. Nghut kôlhang, mingkân é yón kuq hkyô gi, shi é hkyô lhoq htoq é nghut ri.

¹¹ Garai o é đông, nungmoq chyáng akyû lhoq htoq byí é yón kuq hkyô lé wú wú keq! Haú gi, gyai yhang myit zuq é hkyô, yhumsing gùng mara a bo é lé tân shit râ lé myit ngui é hkyô, nhikmo-yo é hkyô, gyuq dan é hkyô, myit ô nau nyi é hkyô, myit chiq byí é hkyô, tengmán hkyô kut râ rì rì nghut é hkyô pé nghut lhê. Nungmoq gi, haú hkyô má mara a bo é lé hkat hhangmó má saksé tân shit bekô nghut ri.

¹² Haú mù luí, ngò, nungmoq lé kê kat é nghut kôlhang, kut shut su é yanmai le a nghut, kut shut é huí zo su é yanmai le a nghut é za, ngamoq lé nungmoq hkâ-i ap nóng byí é hkyô lé, Garai Gasâng hí má nungmoq gùng nungmoq wó myâng râ matú kê kat é sheq ru nghut lhê.

¹³ Haú pé banshoq đông mai, ngamoq gi, myit wum byí é huí ri.

Ngamoq myit wum byi huí é htoq agó, Tituq hkâ-í yhang gabú é lé myàng mù, ngamoq gi, je riyhang myit gabú é nghut lhê. Haí mù yhang gabú é gâ lé, nungmoq banshoq bâng èq yhâng é myit lé lhoq nguingón byi kô é yanmai nghut ri.

¹⁴ Ngò gi, nungmoq eq séng é hkyô, yhang lé gumrong kyô é nghut kôle, nungmoq é yanmai hoq a hpú é nghut lhê. Nungmoq lé ngamoq tai é lhunglhang gi, têng é eq rajung za, Tituq hí má, nungmoq é hkyô lé ngamoq gumrong é le têng lhê.

¹⁵ Nungmoq banshoq bang jìno gyo kômù, gyuq nán é myit mai yhang lé lhom hap yù kô é lé, yhang myitbùn é hkûn, yhang nungmoq lé chyitdap é myit gi, je riyhang kô dik nyi ri.

¹⁶ Ngò gi, nungmoq lé banshoq wó lum to bê lé sê é yanmai, gabú nyi lhê.

8

Byí É Hkyô

¹ Gumang wui ê, ahkuí, ngamoq gi, Makedoni mau mâ é noqkuq hpûng pé lé Garai Gasang byí é jeju eq séng é hkyô, nungmoq lé sé nhâng nau ri.

² Yhangmoq gi, wuîhke jamjau hkyô myo myô èq chyam lik é huí é nghut kôlhang, yhangmoq é a ung tai loshoq gabú é hkyô eq yhangmoq é gyai yhang myung é hkyô gi, agùn agó byí nau é myit bò nhang ri.

³ Hkâsu mù gâ le, yhangmoq gi, yhangmoq wó dut é myhó byi kô é htoq agó, yhangmoq é a-tsam lai shoq lhang byi kô é hkyô lé, ngò saksé hkám lhê. Yhangmoq gi, yhangmoq é myit hkaú mai yhang haú su kut kô é nghut ri.

⁴ Yhangmoq gi, haú sân-yúng bang lé wó bo dojaú râ matú, ngamoq lé gyai yhang ahkáng dung kô é nghut ri.

⁵ Yhangmoq gi, ngamoq myit ngam tô é htoq má lhang lai shoq, Garai Gasang ô nau é hkyô lé châng é đông, yhangmoq gùng lé hí haú Yhumsing lé ap byí pyám kômù, hau htâng sheq ngamoq lé ap kô é nghut ri.

⁶ Haú mù luí, Tituq yhang hí kut hí nyi bê nghut é yanmai, ngamoq gi, jeju haú lé nungmoq chyáng le shuí lhoq bying jup byi râ matú, yhang lé wum byi bê nghut lhê.

⁷ Nungmoq gi, lumjıng myit má, dang nyo é hkyô má le, sumsé hpaqchyı hkyô má le, myit zuq hkyô banshoq eq ngamoq lé nungmoq chyitdap é hkyô má le, jung hkangmó má agùn agó dut bekó eq rajung za, nungmoq gi, byı nau é jeju shı má le agùn agó dut râ lé, bún nyı keq.

⁸ Ngó gi, nungmoq lé hkunmó hkyô é a nghut, nghut kôlhang, góbang é myit zuq é hkyô eq whuí wú é dıng, nungmoq é chyitdap myit jet é hkyô lé chyam wú nau luı sheq ru nghut lhê.

⁹ Hkâsu mù gâ le, nungmoq gi, nga-nhıng é Yhumsıng Yesuq Hkrisduq é jeju lé sê akó nghut ri. Yhang gi, Yhâng é myıng hkyô dıng mai nungmoq wó bang dut kó sháng gaq ga, jung hkangmó wó sù nghut kôlhang, nungmoq é matú é yanmai, myıng sù dut bê nghut ri.

¹⁰ Shı hkyô eq sêng é má, nungmoq é matú ge dik é hkyô ngó hpaqchyı byı kôlê: A-nhık, nungmoq gi, sâng-hı, byı hí kô é za a nghut, haú su kut nau é myit bo é bang le nghut akó.

¹¹ Nungmoq wó dut é eq rajung za, haú lé lhoq pân é dıng nungmoq é gyai yhang kâm kut é myit lé wó lhoq dik ko sháng gaq, ahkuı, muzó haú lhoq pân keq.

¹² Hkâsu mù gâ le, byı nau é myit bo é nghut jáng, chyunghuq haú gi, yhang a wó é má cháng luı a nghut é za, yhang wó é má cháng luı, hap yù gıng é nghut lhê.

¹³ Nungmoq é matú gi, wólai dut, góbang gi, hkyamsâ nyı râ lé, ngamoq ô nau é a nghut, rawuí za wó dut kó râ lé sheq ô nau é ru nghut lhê.

¹⁴ Nungmoq haı râ tô é lé, yhangmoq agùn agó wó é mâ é wó dum taú htuqbang byı kó sháng gaq, ahkuı lhê é ahkyıng má, yhangmoq haı râ tô é lé, nungmoq agùn agó wó é mâ é htuqbang byı keq. Haú jáng sheq, wuí wuí za wó dut kó râ nghut lhê.

¹⁵ Haú gi, "Myo myo tsıng yu é sù gi, lûm myo shoq wó é a nghut, shau za tsıng yu é sù gi, lûm shau shoq wó é a nghut."* ga kâ tô é eq rajung za nghut ri.

Tituq Lé Korinhtuq Myuq Shut Nhang Kat É Hkyô

¹⁶ Nungmoq é matú ngó myit chıq byı é eq rajung zâ é myit lé, Tituq é i-myit má kat byı é Garai Gasang lé, ngó jeju hkya-ôn lhê.

¹⁷ Hkâsu mù gâ le, Tituq gi, ngamoq dıng tıngbán é lé za lhom hap yu é a nghut, gyai yhang myit toq mù, yhânggıng yhang myit hpyit yú luı, nungmoq chyáng lé lô gú za nghut ri.

¹⁸ Ngamoq gi, haú gabú danglú lé dojaú é má noqkuq hpıng pé banshoq eq hkya-on huı é gumang hpó haú lé le, yhang eq rahá nhang kat lhê.

¹⁹ Hau htoq agó, ngamoq garúm râ myit bo nyı é hkyô lé tın shit mù, haú Yhumsıng lé hkungga râ matú ngamoq wú gôn nyı hkyô nghut é, alu lé ngamoq yu chung é hkún, ngamoq é byinzùm kut râ matú, noqkuq hpıng pé eq hkyin yu é sù le yhang nghut lhê.

²⁰ Ngamoq gi, myit lòm luı byı é chyunghuq shı lé ngamoq wú gôn nyı é hkyô má, ó yuq eq le mara hô râ hkyô a htoq shoq sidiq nyı lhê.

²¹ Hkâsu mù gâ le, jô é hkyô kut râ matú ngamoq shıkut nyı é gi, haú Yhumsıng é myoq hí má za a nghut, byu pê é myoq hí má le nghut lhê.

²² Hau htoq agó, ngamoq gi, hkyô myo myo má shırong é myit bo é hkyô le anum num ngamoq chyáng saksé shit é sù, ngamoq é gotú gumang hpó lé

le yhangnhik eq rahá nhang kat lhê. Yhang gi, ahkuí lháng, nungmoq lé gyai yhang myit lum tô é yanmai, shirông myit je riyhang bo nyi ri.

²³ Tituq é hkyô ga jáng, yhang gi, ngá é zùm yap luzúm eq ngò eq rahá nungmoq chyáng mù zui sù nghut ri. Nga-nhông é gumâng nhik é hkyô ga jáng, yhangnhik gi, noqkuq hpông pê é gunglik eq Hkrisduq é arông nghut akò.

²⁴ Haù mù luí, haù noqkuq hpông pé wó myâng kó sháng gaq, nungmoq má ngamoq haì mù gumrong é hkyô eq nungmoq é chytidap myit é saksé lé, haù bang lé tân shit keq.

9

¹ Ngò gi, haù sân-yúng bang lé htuqbang rà hkyô eq séng luí, nungmoq lé kâ kat rà a ra nghut ri.

² Hkâsu mù gâ le, nungmoq gyai garúm nau é myit lé ngò sê lhê, haù mù, ngò gi, Makedoni mau bang lé, haù hkyô eq séng luí gumrong kyo mù, a-nhik mai yhang, Ahkaia mau má nungmoq byi rà rì rì nghut bê hkyô lé, yhangmoq lé tai kyô é nghut lhê. Nungmoq é gyai yhang myit toq é hkyô gi, yhangmoq myo hpyang lé, htuqbang nau é myit nhaù toq byi bê nghut ri.

³ Nghut kôlhang, shí hkyô má nungmoq eq séng luí ngamoq gumrong é gi, hká dông le dangsôm a dut byuq sháng gaq, ngò tai bê eq rajung za nungmoq rì rì wó hen to rà matú, ngò gi, gumang wui lé nhang kat é nghut lhê.

⁴ Hkâsu mù gâ le, Makedoni mau bang gi, ngò eq rahá lé mù, nungmoq rì rì a hen tô é lé, lé myang ang kô é nghut jáng, nungmoq za hoq hpu rà a nghut, ngamoq le, nungmoq lé lùm yhang lum pyâm é yanmai, hoq bo hpu rà nghut lhê.

⁵ Haù mù luí, nungmoq danggidiq byi to bê nghut é, chyunghuq lé rago wó lajáng pân to rà matú, gumang wui lé wum tai tsuq mù, nungmoq lé hí, lé kum nhâng rà gi, ra yhang rà lhê nghù ngò wó myit ri. Haù hkùn sheq, a nau é dông byi é a nghut é za, byi nau é chyunghuq dông hen tô é dut rà nghut lhê.

Agùn Agó Byi É Hkyô

⁶ Shau za sân hkyô sù gi, shau za shù yù rà nghut mù, agùn agó sân hkyô sù gi, agùn agó shù yù rà nghut lhê gâ é dang lé, myitbùn nyi keq.

⁷ Yuq hkanmó gi, a kâm byi é eq byi nhang é dông a nghut é za, yhumsing myit má byi nau é myhó lé myit hpyit yù mù byi é dông dut rà lhê. Hkâsu mù gâ le, Garai Gasang gi, gabú myit eq byi sù lé chytidap ri.

⁸ Haù mù, ahkying hkanmó jung hkanmó má, nungmoq rà é banshoq wó mù, ge é muzó hkanmó lé nungmoq je myo wó kut kó sháng gaq ga, Garai Gasang gi, jeju lhunglháng lé, nungmoq lé wó byi é sù nghut lhê.

⁹ Haù gi,

"Yhang gi, a ha bún é za myùng bang lé yhâng é chyunghuq tsing gàm byi bê nghut ri; Yhâng é dingmán hkyô gi, ahtum abyuq gíng nyi ri."^{*}
ga kâ to eq rajung za nghut ri.

¹⁰ Kyô hkyô sù lé kyôshi, zoshuq matú muk byi é Sù gi, nungmoq lé kyôshi byi mù, lhoq myô jat byi rà eq, nungmoq é dingmán hkyô é ashi lé myô lò nhâng rà nghut lhê.

¹¹ Nungmoq gi, ayoq abun hkanmó má agùn agó byi é bang wó dut kó rà matú, hkyô hkanmó má sùt wó é bang dut é hui kó rà nghut lhê. Nungmoq

^{*} 9:9 Hkya-on 112:9

agùn agó byí é hkyô lé, ngamoq lhai byi mù, Garai Gasang lé jeju hkya-ôn é hkyô dut rã nghut lhê.

¹² Nungmoq dojaú é hkyô shí gi, Garai Gasang é byu pé rá é hkyô lé lajang byí é za a nghut, Garai Gasang lé jeju bún é dang byíng mui nyí nhang é le nghut lhê.

¹³ Dojaú hkyô hau é yanmai, nungmoq lhumzui hkyô saksé tûn shit bekô nghut mù, byu pé gi, Hkrisduq é gabú danglù lé nungmoq yín yû luí jìno gyo kô é yanmai le, yhangmoq eq yuq hkangmó lé, nungmoq é a ha bún é myit mai shuí gam chûng kô é yanmai le, Garai Gasang lé hkya-on kó rá nghut lhê.

¹⁴ Hau htoq agó, Garai Gasang gi, nungmoq lé jeju lai shoq byí tô é yanmai nungmoq é matú yhangmoq kyúdung byí é u má, yhangmoq é myit nhikhlum gi, nungmoq chyáng htoq jé rá nghut lhê.

¹⁵ A ung htoq taí é Garai Gasang é chyunghuq é yanmai, jeju hkya-on hkyô gi, Yhâng chyáng ru nghut nyí sháng gaq ô!

10

Poluq, Yhâng É Hpungmû Lé Tai Hung É Hkyô

¹ Nungmoq eq myoqdong hkyûm nghut é hkûn gi, gyuq kyûm myit bo ri ga, wê gâng é hkûn gi, a gyuq a wam dut ri ga kô é sù, ngò Poluq gi, Hkrisduq é nûm é hkyô eq nú-nhâm é hkyô dông mai, nungmoq lé pying kat lhê.

² Shí mingkân é nyi yap a-tsang dông ngamoq asak dui ri ga myit ngam é byù ra-am lé, ngò a gyuq a wam é myit lé shit rá dà tô lhê. Ngò jé lé é hkûn, nungmoq lé haù sù é myit a shit ra sháng gaq, ngò nungmoq lé dúng tóngbán kat lhê.

³ Hkâsu mù gâ le, ngamoq gi, mingkan shí má asak dui nyi kôlhâng mingkan byu pé kut é dông majan zân é a nghut.

⁴ Ngamoq majan zân é laknak gi, mingkan shi é laknak a nghut é za, shut shai é dông dang-rháng hkyô nghut é, gingtûng é gyedap pé lé lhoq htên pyám rá matú Garaí é a-tsam byíng é laknak ru nghut lhê.

⁵ Ngamoq gi, dang-rháng rhâng lhûm é hkyô pé eq Garai Gasang lé sê é hkyô lé shut shai shoq yhumsing gùng yhumsing lhoq myhang mhaù é hkyô hkangmó lé lhoq htên pyám mù, Hkrisduq é jìno gyo rá matú, myit sôn é hkyô hkat hkangmó lé shúm kut yu é nghut lhê.

⁶ Nungmoq é jìno gyo hkyô gi, gumjup é hkûn, jìno a gyô é hkyô hkangmó lé ngamoq dam byi rá rì rì dut rá nghut lhê.

⁷ Nungmoq gi, ahtoq pyám lé za wú nyi é bang nghut akô. Rayuq yuq gi, Hkrisduq eq sêng é sù hkyak nghut lhê ga myit lum tô é nghut jáng, ngamoq le, yhang eq rajung za, Hkrisduq eq sêng é bang nghut é lé, yhang dum bún sê nyi sháng gaq.

⁸ Hkâsu mù gâ le, nungmoq lé lãng hkyô rá nó gi, nungmoq lé kô myhâng nhâng rá matú, ngamoq lé haù Yhumsing byí é ahko ahkáng lé gyai gumrong le lháng, ngò gi, hoq hpú é hui rá a nghut.

⁹ Ngò gi, ngá é laiká pé èq nungmoq lé kyuq é su a dut nhâng nau é nghut lhê.

¹⁰ Hkâsu mù gâ le, ra-am gi, "Yhâng é laiká pé gi, gàng bo é eq wum-o bo é nghut ri; nghut kôlhâng, yhânggùng gi, byuwup a bo é nghut mù, yhang taí é dang pé gi, haí a nghut." ga taí akô.

¹¹ Ngamoq gi, wê gânq é hkûn, ngamoq é laiká pé má bo é eq rajung za nghut é hkyô eq, rahá nghut nyi é hkûn, ngamoq zui saí rá nghut é hkyô lé, haú sù é bang sé gyo rá dut lhê.

¹² Ngamoq gi, haú yhumsing gùng yhumsing owaq é bâng é hpúng má bo lom é hkyô nghut nghut, yhangmoq eq whuí é hkyô nghut nghut, a wám kut é nghut lhê. Yhangmoq gi, yhangmoq gùng yhangmoq chín lhum wú é eq yhangmoq gùng yhangmoq whuí lhum wú kô é hkûn, hpaqchyí a bo é bang dut bekô nghut ri.

¹³ Nghut kôlhang, ngamoq gi, âng é mai lai shoq gumrông rá a nghut é za, ngamoq lé Garai Gasang masat to byí é, nungmoq chyáng lháng hkyit jé shoq nghut é maukyo hkaú má za gumrông rá nghut lhê.

¹⁴ Ngamoq gi, nungmoq chyáng a jé lé wú é đông mai, gyai yhang gumrong nyi rá a nghut; hkâsu mù gâ le, ngamoq gi, Hkrisduq é gabú danglù chung mù, nungmoq chyáng lháng lé jé bê nghut lhê.

¹⁵ Dum, ngamoq gi, gôbang kut é muzó lé le, âng é mai lai luí gumrong lhai é a nghut. Ngamoq myoqbyu é hkyô gi, nungmoq é lumjینگ myit kô myhang jat nyi jáng sheq, nungmoq chyáng ngamoq zui saí é jowò gyai wó lhoq lâm rá nghut lhê.

¹⁶ Haú gi, nungmoq é mau lháng lai shoq, gabú danglù lé ngamoq wó hko kyo rá matú nghut lhê. Hkâsu mù gâ le, ngamoq gi, góyuq eq zui saí to bê loqzô eq séng luí, gumrông nau é a nghut.

¹⁷ Nghut kôlhang, "Gumrong é sù gi, haú Yhumsing má gumrông sháng gaq."* ga kê tô ri.

¹⁸ Hkâsu mù gâ le, yhumsing gùng yhumsing owaq é sù gi, hap yù huí é a nghut é za, haú Yhumsing eq owaq byí é sù sheq, hap yù huí é ru nghut lhê.

11

Lagyo Apyoq Pé Eq Poluq

¹ Ngò gi, ngá é ratsuí ngok é dang lé, nungmoq jân pyám byi rá lé myoqbyu é nghut lhê; gè gè yhang, nungmoq gi, haú su kut nyí gù nghut bekô.

² Haí mù gâ le, ngò gi, Garai Gasang mai nungmoq lé magum é myit eq, nungmoq é matú magum byí lhê. Ngò gi, nungmoq lé, sân-yúng é zomyi gyíng lé su, Hkrisduq chyáng wó shit sháng gaq nghú, Hkrisduq nghut é yhumsing hpô chyáng za nungmoq lé byi zo rá nghú, danggidiq byí to bê nghut lhê.

³ Nghut kôlhang, Ewaq gi, lhangmui hpaqchyí dâ é eq mhaú zô é huí é su, nungmoq myit é hkyô pé gi, Hkrisduq chyáng nungmoq é lhumzuí é eq sansêng é i-myit ap nóng é hkyô mai shuí ngoq ló byuq é hui rá lé, ngò myit chiq ri.

⁴ Hkâsu mù gâ le, rayuq yuq gi, nungmoq chyáng lé jé mù, ngamoq hko kyô é Yesuq é hkyô eq shai é đông hko kyô é nghut nghut, nungmoq hap yu to bê Woi-nyí eq a pung é woi-nyí lé nungmoq hap yu é nghut nghut, nungmoq lhom yu to bê gabú danglù eq a pung é danglù lé lhom yu é nghut nghut, nungmoq gi, haú lé lui lui za lhom hap yu é dut bekô nghut ri.

⁵ Nghut kôlhang, ngò gi, "Ahkyak-lagyô pé" ga bâng é htoq má ratsuí lháng gyamgyi gyó sù a nghut nghú myit ngam é nghut lhê.

* 10:17 Yer 9:24

⁶Ngò gi, dang tái hpaqchyí kung sù rayuq a nghut kôlhang, sumsé hpaqchyí bò sù nghut lê. Ngamoq gi, hkyô hkangmó má, nungmoq lé háu hkyô hkyâng shoq sé nhâng bê nghut lê.

⁷Ngò, nungmoq lé, Garai Gasâng é gabú danglù lé ahpau a yu é za hko kyô é đông, nungmoq lé waq toq rã matú, ngá gùng ngò lhoq nyhum é gi, ngá é mara dut byuq bê lúh?

⁸Ngò, nungmoq lé dojaú rã matú, gotú noqkuq hpông pé mai htuqbang é lé hap yu é gi, háu bâng chyáng mai ngò zik lú yu é đông dut bê nghut lê.

⁹Ngò gi, nungmoq eq rahá nyi mù, rajung jung rã é hkùn, ó yuq lé le wòlai a dut nhang é nghut lê; hkâsu mù gâ le, Makedoni mau mai lé jé é gumang wui gi, ngò hái rã é lé htuqbang byi kô é yanmai nghut lê. Hká đông nghut kôlhang, ngò gi, ngá gùng lé, nungmoq é matú wòlai a dut nhâng shoq kut bê nghut mù, xoq luí le háu đông kut nyí rã nghut lê.

¹⁰Háu Hkrisduq é tengmán hkyô gi, ngò má hkyak yhang bo é nghut lê mù, Ahkaia mau má é bang ó yuq lhang, ngò háu su gumrong é hkyô lé wó hkùm zìng rã a nghut.

¹¹Hái mù lúh? Ngò, nungmoq lé a chyitdap é yanmai nghut lê lúh? Ngò, nungmoq lé chyitdap é hkyô lé, Garai Gasang sé lê.

¹²Ngò gi, yhangmoq zui sai é lé gumrong é hkyô pé má ngamoq eq rawui za són byi rã ahko ahkáng ô nau é bang lé ahkáng a byi rã matú, ngò kut nyi é su xoq luí kut shi rã nghut lê.

¹³Hkâsu mù gâ le, háu sù é bang gi, lagyo apyoq pé, mhaú zô é mù zui bang, Hkrisduq é lagyo pé đông kut mhaú é bang nghut akô.

¹⁴Háu gi, mau rã hkyô a joq, hkâsu mù gâ le, Tsadán lhang gi, maubó é maumang lagyo rayuq đông kut mhaú é sù nghut lê.

¹⁵Háu mù, Tsadán é dui-nhâng zoshâng wui gi, dingmán hkyô é dui-nhâng zoshâng wui đông kut mhaú é nghut jáng, mau dân rã hkyô a joq é nghut lê. Yhangmoq é ló htâng má gi, yhangmoq kut é eq rajung za hui zo kó rã nghut lê.

Yhâng É Wuíhke Jamjau Hkyô Eq Séng Luí, Poluq Gumrong É Hkyô

¹⁶Ngò puq tái kôlé, ó yuq le, ngo lé byù gò đông a sôn yù kó sháng gaq. Nghut kôlhang, nungmoq sôn yu é nghut jáng, ngò ratsui wó gumrong sháng gaq, byù gò lé nungmoq hap yu é su, ngo lé hap yù kó laq.

¹⁷Ngò, háu su gumrong é hkyô gi, háu Yhumsing o é đông ngò tái nyi é a nghut, byù gò rayuq đông tái nyi é ru nghut lê.

¹⁸Byù myo myo gi, mingkân é hkyô đông gumrong nyi bum lê nghut mù, ngò le gumrong rã nghut lê.

¹⁹Nungmoq gi, hpaqchyí lùm bo kô é nghut mù, byù go pé lé gabú myit eq jân nyi akô nhưng!

²⁰Gè gè yhang, nungmoq gi, nungmoq lé jùn kut é sù lé le, nungmoq lé rhoi zô é sù lé le, nungmoq chyáng akyù hô zô yu é sù lé le, yhang gùng yhang owaq é sù lé le, nungmoq lé bo-pyuq pyuq é sù lé le, jân nyi akô nghut ri.

²¹Ngamoq gi, nungmoq lé háu hkyô kut rã má wum gyai nyhôm lê ngú yín yù rã lé, ngò, hoq ri!

Rayuq yuq, hái lé wám gumrong é nghut jáng, ngò le, háu lé wám gumrong lê ngú, byù gò rayuq đông ngò tái nyi é nghut lê.

²² Yhangmoq gi, Hebre byu pé nghut akô lúh? Ngò le nghut lhê. Yhangmoq gi, Israelaq byu pé nghut akô lúh? Ngò le nghut lhê. Yhangmoq gi, Abraham é awut ashîn pé nghut akô lúh? Ngò le nghut lhê.

²³ Yhangmoq gi, Hkrisduq é dui-nhâng zoshâng wui nghut akô lúh? (Ngò gi, myit a gyiêng é sù dông haù su tai é nghut lhê.) Ngò gi, je nghut lhê. Ngò gi, mù zui je shikut bê, htông anum num je lúng wú bê, je riyhang bat é huí wú bê, shí rá í é adàm dàm huí wú bê nghut lhê.

²⁴ Ngò gi, Yudaq byu pé nuichum èq bat é myi xê dàm byiêng rá radàm ra ra dut é, ngo lhiêng hui zô wú é nghut lhê.

²⁵ Ngò gi, dumbáng èq nhuq huí é sum dàm, shí sháng gaq ga luqgok èq dú huí é radàm, wui-sanghpo byoq huí é sum dàm, wuimau má myû byôm é ra-nyí ra-myìn hui zô wú bê nghut lhê.

²⁶ Ngò gi, xoq xoq hkyowui htoq e lo é hkûn, wui gû é gyuq chiq jung, damyaq huí é gyuq chiq jung, ngá é amyû wui chyáng mã é gyuq chiq jung, tûngbaù pé chyáng mã é gyuq chiq jung, myuq hkaù pé mã é gyuq chiq jung, yoso pé mã é gyuq chiq jung, wuimau mã é gyuq chiq jung eq gumang apyoq pé chyáng mã é gyuq chiq jung pé hui zô wú bê nghut lhê.

²⁷ Ngò gi, mù lé zui nú zui hkyik mù, anum num a myang yhup shoq dut wú bê nghut lhê. Ngò gi, zòmut wui shit huí é eq zoshuq a wó é anum num huí lai lo wú bê nghut lhê. Ngò gi, gyoq hpû é eq gûngchín dut é huí wú bê nghut lhê.

²⁸ Haù pé lhunglhang htoq má, noqkuq hpûng pé banshoq é matú ngò myit chiq byí é hkyô gi, nyí wui ngò má wòlai dut nyí ri.

²⁹ Rayuq yuq wum nyhóm le, ngò le wum a nyhóm rá lúh? Rayuq yuq mara shuí kut shut é hui le, ngò myit a nyé rá lúh?

³⁰ Ngò gumrông rá dut é nghut le gi, ngò wum nyhóm é hkyô lé tûn shit é pé lé gumrông rá nghut lhê.

³¹ Ngò a mhaù nyi é hkyô lé pyat dedu hkya-on huí é sù, haù Yhumsîng Yesuq é Íwa eq Garai Gasang sê lhê.

³² Damaskuq myuq má, Hkohkâm Areta é a-ô mã é mauzau gi, ngo lé chyup rá matú, myuq lé zúng nhang é nghut lhê.

³³ Nghut kôlhang, ngò gi, manghkoq má lúng mù, myuq xêwâm mã é hkohot dong mai lhoq hkyô kat é hui lui, yhang é loq mai wó lut é nghut lhê.

12

Poluq É Myoqwup Shing-rán Pé

¹ Ngò gi, rù gumrông nyi rá za nghut lhê. Akyû wó rá a nghut kôlhang, haù Yhumsîng chyáng mai lo é myoqwup shing-rán pé eq hpông shit é shing-rán pé lé gumrông rá nghut lhê.

² Ngò gi, lai lò bê raxe myi zân hkûn, mauhkûng sum tsáng nghu é má shuí toq yu huí é, Hkrisduq mã é byù rayuq* é hkyô lé sê lhê. Yhang gi, gungdu eq nghut é luq, a nghut é luq, ngò a sé, nghut kôlhang, Garai Gasang gi, sê lhê.

³ Yhang hparadisú má shuí toq yû huí é gi, ngò sê lhê. Yhang gi, gungdu eq nghut lhê luq, a nghut é luq, ngò a sé, nghut kôlhang, Garai Gasang gi, sê lhê.

⁴ Yhang gi, byu pé tai kyô htoq rá ahkáng a wó é hkyô pé nghut é, a wó tai sân kyô é hkyô pé lé wó gyô ri.

* 12:2 Hkrisduq mã é byù rayuq gâ é gi, Poluq yhanggung yhang lé tai nyi é nghut lhê.

⁵ Ngò gi, haú yuq sù é byu é hkyô eq séng luí gumrông rã nghut lhê; nghut kôlhang, ngò gi, ngá é wum nyhóm hkyô eq séng luí, gumrong é mai lai luí, ngá gûng ngò gumrông rã a nghut.

⁶ Ngò gi, gumrông hkyô lé hkyin yù rã dut é nghut jáng lhang, byù gò dut rã a nghut, haí mù gâ le, ngò gi, tengmán hkyô taí nyi rã nghut lhê. Nghut kôlhang, ó yuq le, ngò kut é eq ngò taí é mai myit lum to kô é htoq má, ngo lé, je a myit lo ko sháng gaq nghú, ngò a gumrông kut pyâm nyi lhê.

⁷ Haú laklaí dik é đông ngo lé hpông shit é shing-rán mó pé é yanmai, ngò a nghutbún byuq sháng gaq ga, ngo lé gunjang rã matú, Tsadán é lagyo nghut é zu lé, ngá é gungsho má kat byí to bê nghut ri.

⁸ Haú lé ngá chyáng mai yu pyám byi rã matú, ngò, Yhumsing lé sum dâm dúng tôngbán wú bê nghut lhê.

⁹ Nghut kôlhang, Yhang gi, "Ngá é jeju gi, náng é matú luqđun é nghut lhê; hkâsu mù gâ le, Ngá é a-tsam gi, wum nyhóm é hkyô má lhoq gumjup é hui ri." ga luí, ngò lé taí ri. Haú mù luí, Hkrisduq é a-tsam gi, ngò má wó joq nyi sháng gaq nghú, ngò gi, ngá é wum nyhóm é hkyô pé eq séng luí, gabú myit mai je riyhang gumrông rã nghut lhê.

¹⁰ Haú nghut mù luí, ngò gi, Hkrisduq é yanmai, wum nyhóm é hkyô pé má le, rhoi hui é hkyô pé má le, wuĩhke jamjau hui é hkyô pé má le, zing-ri hui é hkyô pé má le, awui ahke dut é hkyô pé má le, gabú nhik dik nyi lhê. Hkâsu mù gâ le, ngò wum nyhóm é hkûn sheq, ngò wúm bo é nghut lhê.

Poluq Chiq Byí É Hkyô

¹¹ Ngò gi, ngá gûng ngò byù gò lhoq kut yú bê nghut ri, nghut kôlhang, haú gi, nungmoq kut nhang é nghut lhê. Ngò gi, nungmoq eq owaq é hui ang sù nghut lhê; hkâsu mù gâ le, ngò gi, haí a nghut kôlhang, "Ahkyak lagyo pé" ga bãng é htoq má ratsui lhang gyamgyi gýo sù a nghut.

¹² Lagyo rayuq é masat kumlhá nghut é, kumlhá pé, mauhpo muzó pé eq laklaí kumlhá pé lé, ngò gi, gyai yhang hkam jan mù nungmoq chyáng kut bê nghut lhê.

¹³ Ngò gi, nungmoq é matú, hkâ-nhám le wòlai a dut é nhing, nungmoq gi, hkâsu mù, gotú noqkuq hpúng pé htoq má gyamgyi gýo nyi akò lhú? Ngò, haú hkyô má shut é nghut jáng, mara hkyut pyám byi kó laq!

¹⁴ Ahkuí, ngò gi, nungmoq lé, sum lhang nghú rã dâm, lé kum rã rì rì nghut bê mù, nungmoq é matú wòlai gi, a dut rã nghut lhê. Haí mù gâ le, ngò gi, nungmoq é sutzè lé ô nau é a nghut, nungmoq lé sheq ru nghut lhê. Hká đông nghut kôle, zo wui gi, mó wui é matú sutzè hkong to byi rã dut é a nghut, mó wui sheq, zô wui é matú hkong to byi rã dut é nghut lhê.

¹⁵ Haú mù luí, ngò gi, gyai yhang gabú é myit mai, ngò wó é jung hkangmó lé nungmoq é matú chung jai rã nghut mù, ngá gûng lé lhang chùng jai rã nghut lhê. Ngò, nungmoq lé myô chyitdap é yanmai, nungmoq gi, ngo lé shaú chyitdap kó rã lhú?

¹⁶ Ngò gi, nungmoq chyáng wòlai a dut é hkyô têng lhê. Nghut kôlhang, ngò gi, hpaqchyí haq da sù dut mù, mhaú lhik é đông nungmoq lé chyup yú sù dut byuq bê ga nungmoq ra-am myit akò myhi-nhung!

¹⁷ Ngò gi, nungmoq chyáng nhang kat byí é byù đông, nungmoq chyáng amyat kut zô yù bê nghut lhê lhú?

¹⁸ Ngò gi, Tituq lé nungmoq chyáng lé rã matú wum taí tsuq mù, ngamoq é gumang lé, yhang eq rahá nhang kat bê nghut lhê. Tituq gi, nungmoq chyáng

amyat kut zô é nghut lhê lú? Nga-nhik gi, rajung zâ é myit đông chyat kut mù, rajung zâ é hkyô lé chyat châng é su nhik nghut lhê, a nghut kó lú?

¹⁹ Ngamoq gi, nungmoq hí má ngamoq gùng ngamoq taí hung yu nyi ri nghú, ahkuí jé shoq myit nyi akô lú? Ngamoq gi, Hkrisduq má é byu pé đông, Garai Gasâng hí má taí nyi é nghut lhê. Chyitdap é gumang wui ê, ngamoq kut é jung hkangmó gi, nungmoq é akyu matú chyat nghut lhê.

²⁰ Hkâsu mù gâ le, ngo lé jé é hkûn, ngo, nungmoq lé dut nhâng nau é su, nungmoq a wó dut kó râ eq, nungmoq, ngo lé dut nhâng nau é su, ngo a wó dut râ lé, ngo myit gyuq ri. Ngo gi, mabyoq jishûm htoq é, manon é, nhik-ûn buq é, byù hpûng gam é, gansang é, lumu é, gyai nghutbûn é eq atau ahú dut é hkyô pé joq râ lé gyuq ri.

²¹ Ngo dum lé jé é hkûn, ngá é Garai Gasang gi, nungmoq é hí má ngo lé myit nyhôm nhâng mù, yhangmoq ô nau é myit châng é má shut é đông nyi zô lhum nau é i-myt, gungsho zùm yap é yubak mara eq a sân-yúng é hkyô kut shut é mai myit a lhîng bang myo myô é yanmai, yón kuq é hui zo râ lé, ngo myit chiq ri.

13

Ló Htáng Má Sidiq Byi É Dang Pé

¹ Ahkuí, ngo, nungmoq chyáng lé kum râ gi, sum lhîng nghú râ dàm nghut lhê. Haù gi, "Mara hun é hkyô hkangmó lé, í yuq sum yuq saksé hkâm é eq lhoq teng ra râ nghut lhê."* ga kâ tô é eq rajung za nghut lhê.

² Ngo gi, í lhîng nghú râ dàm nungmoq eq rahá nyi é hkûn, nungmoq lé sidiq byi gû bê nghut lhê. Ahkuí le, nungmoq eq wê gâng tô é u lé, dum taí kólé, ngo dum lé lé é hkûn, noq mai mara shut tô é bang lé nghut nghut, góbang ó yuq lé nghut nghut, hkyamsa a byi lo râ nghut lhê.

³ Haù gi, ngo đông mai Hkrisduq dang taí nyi é hkyô saksé shit râ lé, nungmoq dúng nyi kômù nghut lhê. Yhang gi, nungmoq é hkyô lé hkâsu kut shuí-û é hkyô má wum nyhôm é a nghut, nungmoq chyáng a-tsam mó shit sù sheq ru nghut ri.

⁴ Hkâsu mù gâ le, Yhang gi, wum nyhôm é má jén sat é hui bê nghut kôlhang, Garai Gasâng é a-tsâm eq dui nyi é gi, hkyak têng lhê. Haù eq rajung za, ngamoq gi, Yhang su wum nyhóm kôlhang, nungmoq lé dojaú râ matú, Garai Gasâng é a-tsâm eq, Yhang eq rahá dui nyi râ nghut lhê.

⁵ Nungmoq gi, lumjîng hkyô má nghut nyi lhê luq, yhumsing gùng yhumsing myí wú keq. Yhumsing gùng yhumsing chyam wú keq. Nungmoq gi, chyam é má sùm byuq é za a nghut jâng, nungmoq chyáng Hkrisduq Yesuq lúng nyi bê hkyô lé sé kó râ nghut lhê.

⁶ Ngamoq gi, chyam é má a sùm é hkyô lé, nungmoq wó sé kó râ nghut lhê nghú, ngo hkyak lum tô lhê.

⁷ Ahkuí, ngamoq gi, nungmoq shut é hkyô haí a kut kó râ matú, Garai Gasâng chyáng kyúdung byi lhê. Haù gi, ngamoq chyâm hui lui wó lut é hkyô lé byu pé myàng kó râ matú a nghut é za, ngamoq sùm é su dut kôlhang, nungmoq ge é hkyô kut kó râ lé myàng râ matú nghut lhê.

⁸ Hkâsu mù gâ le, ngamoq gi, haù tengmán hkyô eq shaí é đông haí le a ge kut é za, tengmán hkyô é matú za kut râ dut é nghut lhê.

⁹ Ngamoq wum nyhóm kôlhang, nungmoq wúm bo é hkûn, ngamoq gabú é nghut lhê; ngamoq kyûdûng é gi, nungmoq gumjup râ matú nghut lhê.

¹⁰ Ngò gi, wê gâng tô é hkûn, haú hkyô pé lé hai mù kê é gâ le, ngò jé lé é hkûn, ahkáng ayá lé ngò chung é má htân htân a kut râ matú nghut lhê. Ahkáng ayá haú gi, nungmoq lé lhoq htên pyám râ matú a nghut, nungmoq lé kô myhang lo nhâng râ matú, haú Yhumsîng ngo lé byî é sheq ru nghut lhê.

Ló Htâng É Shi-kyâm Dang

¹¹ Ló htâng má ngò tái nau é gi, gumang wui ê, nguingón yuqyo nyi keq. Gumjup hkyô shut sô nyi keq, ngò dúng tôngbán é dang lé gyo keq, myit rahkat za dut nyi keq, nguingón shoq asak dui nyi keq. Haú hkûn, chyitdap hkyô eq nguingón hkyo é Garai Gasang gi, nungmoq eq rahá nyi nyi râ nghut lhê.

¹² Chyoiyúng é bopuq puq é èq, rayuq eq rayuq shi-kyâm lhum keq.

¹³ Sân-yúng bang banshoq gi, nungmoq lé shi-kyâm kat akô.

¹⁴ Haú Yhumsîng Yesuq Hkrisduq é jeju, Garai Gasâng é chyitdap myit eq Chyoiyúng Woi-nyí é zùm yap hkyô gi, nungmoq banshoq bâng chyáng ru joq nyí sháng gaq ô.

GALATIQ

Mau Bâng Chyáng Hun Kat é Laiká (Galatians)

¹ Byu pê chyáng mai le a nghut, ó yuq èq nhang é le a nghut e za, haù Yesuq Hkrisduq lé shí bê mai dum lhoq ùi toq yu é sù Íwa Garai Gasang eq Yesuq Hkrisduq chyáng mai nhang kat é lagyo rayuq nghut sù, òngò Poluq gi,

² òngò eq rahá nyi é gumang wui banshoq bang le mù, Galatiq mau mâ é noqkuq hpúng pê chyáng dang kyô kat lhê.

³ Nga-nhúng é Íwa Garai Gasang eq Yhumsîng Yesuq Hkrisduq chyáng mâ é, jeju eq nguingón hkyô gi, nungmoq chyáng ru joq nyi sháng gaq ô.

⁴ Haù Hkrisduq gi, nga-nhúng é Íwa Garai Gasang ô nau é eq rajung za, agè ashop é ipyat shí mai, nga-nhúng lé xe yù rà ga, nga-nhúng é yubak marâ é matú yhanggùng lé Yhang byí pyám bê nghut ri.

⁵ Haù hpungwup shinggang gi, Garai Gasâng chyáng pyat dedu ahtum abyuq ru joq nyi sháng gaq ô. Amen.

Gotù Gabù Danglù A Joq É Hkyô

⁶ Òngò gi, haù Hkrisduq é jeju mai nungmoq lé ji yù Sù lé, nungmoq haù-í han kâng pyám to kòluí, shái é gabù danglù shut lhing ló nyi kô é hkyô lé, gyai yhang mau nyi ri.

⁷ Danglù haù gi, gabù danglù ratsuí lháng a nghut. Byù ra-am mai nungmoq lé lhoq shuk byi luí, haù Hkrisduq é gabù danglù lé, shikut luí lhoq shai nhang pyám nyi kô é hkyô za nghut lhê.

⁸ Nghut kôlháng, nungmoq lé ngamoq hkô kyo bê gabù danglù mai lai luí, ngamoq nghut nghut, mauhkúng htoq mâ é maumang lagyo rayuq nghut nghut, shái é gabù danglù, nungmoq lé hko kyô é nghut jáng, haù yuq gi, ahtum abyuq dam byí é hui zo sháng gaq ô!

⁹ Ngamoq taí wú bê eq rajung za, ahkuí le, òngò dum taí kôlé: rayuq yuq mai, nungmoq hap yu to bê é gabù danglù mai lai luí, gotù hko nyi e nghut jáng, haù yuq gi, ahtum abyuq dam byí é hui zo sháng gaq ô!

¹⁰ Haù su nghu taí é gi, ahkuí, òngò, byù é hí má myoqdong wó rà matú shikut nyi é nghut lhê lhú? Haù a nghut jáng, Garai Gasâng é hí má myoqdong wó rà matú shikut nyi é nghut lhê lhú? Byù lé gabù nhâng rà matú, òngò shikut nyi é nghut lhê lhú? Òngò gi, byu pé lé za ru gabù nhâng nau nyi é nghut le gi, Hkrisduq é ùi-nhâng zoshâng dut rà a nghut.

Poluq Lé, Garai Gasang Ji Yu É Hkyô

¹¹ Gumang wui ê, òngò hko kyô é gabù danglù haù gi, byu èq kut htoq é hkyô a nghut é lé, òngò, nungmoq lé sé nhâng nau ri.

¹² Òngò gi, haù lé, byu chyáng mai wó yu é le a nghut, góyuq èq mhoq byí é le a nghut e za, Yesuq Hkrisduq èq shing-rán byí é òngò wó hap yu é ru nghut lhê.

¹³ Òngò, Yudaq noqkuq htùng má nghut nyi ashí hkún, Garai Gasâng é noqkuq hpúng lé ladù lai shoq hkásu kut zing-ri luí, haù lé lhoq htên shikut wún é, ngá é hí hpyang lhê é asak ùi hkyô lé, nungmoq wó gyô wú bekô rà nghut lhê.

¹⁴ Ngò gi, ngò eq ra-kyam zâ é Yudaq byu pé myo myô é htoq má, Yudaq noqkuq htúng lé je cháng sù nghut é htoq agó, ngá é íchyí íwa pê é htúngli lé lađu lai shoq myit zing zuq sù nghut lhê.

¹⁵ Nghut kôlhang, ngá nú é unghkaú mai yang hkyin to lui, Yhang é jeju yanmai ngo lé ji yu é Garai Gasang gi,

¹⁶ haú Yhang Zô é hkyô gabú danglù lé, ngò mai tûngbaù pê chyáng hko kyo sháng gaq ga, Yhang Zo lé ngá chyáng htoq shit nhâng rà matú myit hpyit yu é hkùn, ngò gi, ó yuq eq le a hpyê yù,

¹⁷ Yerusalem wà mó má doq ló lui, ngá hí má lagyo kut é bang lé le a ló huí e za, radá dâm Arabiq mau shut ê lui, Damaskuq myuq má dum taú ló bê nghut lhê.

¹⁸ Sum zân lai é htâng má, ngò gi, Yerusalem wà mó má doq ló mù, Petruq* lé ló lui lui, yang eq raxe ngo nyí, ló nyi nyi é nghut lhê.

¹⁹ Haú má, Yhumsing é yanggu Yakuq mai lai lui, lagyo góbang lé ngò a myàng nghut ri.

²⁰ Nungmoq lé ngò ká byí kat é má, mhaú é hkyô a bò nghù lui, Garai Gasang hí má, hkyak, ngò tai lhê.

²¹ Hau htâng má, ngò gi, Suriq mau eq Kiliki mau má é jê é nghut lhê.

²² Haú hkùn, haú Hkrisduq má nghut é, Yuda mau má é noqkuq hpúng byú wui gi, ngo lé myoqno a shú kó nghut ri.

²³ Yhangmoq gi, "Hí hkùn, nga-nhúng lé zing-ri sù gi, yang mai lhoq hten rà matú radàm shikut wú é lumjing hkyô haú lé, ahkuí hko nyi ri." gâ é hkyanglù lé wó gyô wú kôlui za,

²⁴ ngá é yanmai, Garai Gasang lé hkya-ôn bum akò nghut ri.

2

Poluq Lé Lagyô Pé Lhom Hap Yu É Hkyô

¹ Raxe myi zân lai é htâng má, ngò gi, Barnaba eq rahá Yerusalem wà mó má dum doq ló é hkùn, Tituq lé le shuí chung é nghut lhê.

² Garai Gasang byí é shing-rán eq rajung za doq ló lui, ngò kut wú bê muzó eq ahkuí kut é muzó pé akôm a dut pyám sháng gaq nghù, tûngbaù pê chyáng ngò hko kyô nyi é gabú danglù lé, haú suwún dut bâng é hí má za shap kyô é nghut lhê.

³ Nghut kôlhang, ngò eq rahá nghut é Tituq gi, Grik byù nghut kôle, yang lé ahpyo-kuq a hpyit nhâng kó nghut ri.

⁴ Haú hkaú wang lo é mhaú é gumang wui gi, Hkrisduq Yesuq má ngamoq wó é luthkyô má jowú lui, nga-nhúng lé jùn dut nhâng rà dâ kô é yanmai, haú hkyô gabyông htoq lo é nghut ri.*

⁵ Nghut kôlhang, haú gabú danglù é tengmán hkyô gi, nungmoq chyáng joq gîng nyi sháng gaq nghù, razup za lhang, yangmoq é dang lé ngamoq gyo byí é a nghut.

⁶ Ahkyak é byù su dut é bang gi, yangmoq haí jung kut kôlhang, ngò eq a séng nghut ri; Garai Gasang gi, du lé wú mù jéyang é sù a nghut; byù haú bang gi, ngá é mungdang má hai le a jat kat e za,

* **1:18** Petruq lé Kehpa le gâ lhê. * **2:4** Yudaq byu pé ra-am gi, hpúng asik wang é bang lé Yudaq htúng tará cháng nhâng nau akò nghut ri.

⁷ Petruq gi, Yudaq byu pé[†] lé, haù gabú danglù hko kyo râ mù má lum tô é hui bê eq rajung za, ngò gi, tûngbaù pé[‡] lé, haù gabú danglù hko kyo râ mù má lum tô é hui bê hkyô lé za, yhangmoq myang akò nghut ri.

⁸ Hkâsu mù gâ le, Yudaq byu pê é matú Petruq lé lagyo ayá dâng byi é sù Garai Gasang gi, tûngbaù pê matú ngo lé le lagyo ayá dâng byi bê nghut lhê.

⁹ Haù hkungmó-zîng su ahkyak é, Yakuq, Petruq eq Yohan pé gi, ngo lé byi tô é jeju lé myang sê kôjâng, ngò eq Barnaba lé, zùm yap hkyô gâ é loqyo loq èq shi-kyâm yù kôluí, yhangmoq gi, Yudaq byu pê shut, ngá-nhik lé gi, tûngbaù pê shut é râ lhê ga, myit hui bekò nghut ri.

¹⁰ Yhangmoq gi, ngá-nhik mai myûng bang lé ru bûn nyi râ matú za pying kat akò; haù gi, ngò gyai yhang kut nau nyi é hkyô nghut lhê.

Petruq Lé Poluq Htuq Htîng É Hkyô

¹¹ Antioku và mó má Petruq jé lé é hkûn, yhang lé mara hûn râ hkyô joq é yanmai, ngò gi, byu hí má yhang, yhang lé lhom htuq htîng é nghut lhê.

¹² Hkâsu mù gâ le, Yakuq chyáng mai lé é bang a jé shí é u lé, yhang gi, tûngbaù pé eq rahá chòm zo chòm shuq lhaq kut ri. Nghut kôlhang, haù bang jé é hkûn, yhang gi, ahpyo-kuq hpyit râ lhê gâ é hpúng má lom é bang lé gyuq é yanmai, tûngbaù pê chyáng mai htoq gang luí, yhang baù nyi tô ri.

¹³ Yhang, gegùn labyoq kut é hkyô má, gotù Yudaq byu pé le bo châng kut akò nghut mù luí, Barnaba háng yhangmoq kut é gegùn labyoq hkyô má bo châng nghoq ló bê nghut ri.

¹⁴ Haù gabú danglù é tengmán hkyô eq rajung za, yhangmoq a cháng kô é lé myàng jâng, ngò gi, yhangmoq banshoq bâng é hí má, Petruq lé, "Nàng gi, Yudaq byù nghut to mù luí, Yudaq byù rayuq đông a nyi e za, tûngbaù rayuq đông nyi luí nhîng, tûngbaù pé lé Yudaq byu pê é htûngli hkâsu kut wó châng nhâng râ lhu?

¹⁵ Ngamoq gi, yubak dap bang gâ é tûngbaù pé a nghut e za, hkû é buinyi mai yhang, Yudaq byù nghut gû bê nghut lhê.

¹⁶ Byù gi, jep é tará lé cháng luí mara hkyut san byi hui é a nghut e za, Yesuq Hkrisduq lé lumjîng é yanmai sheq mara hkyut san byi hui é hkyô lé, ngamoq sê lhê. Haù mù luí, ngamoq gi, jep é tará lé cháng luí a nghut e za, Yesuq Hkrisduq lé lumjîng é yanmai, mara hkyut sân pyám byi é hui sháng gaq nghù, Yesuq Hkrisduq lé lumjîng bê nghut lhê; hkâsu mù gâ le, ó yuq le, jep é tará lé châng é yanmai, mara hkyut san byi é hui râ a nghut.

¹⁷ Ngamoq gi, Hkrisduq má ngamoq é mara hkyut san byi é hui râ hkyô ho nyi é hkûn, yubak dap é bang ngamoq nghut é lé myang é nghut jâng, mara lé gi, Hkrisduq mai kut nhang é nghut lhê lhu? Ratsuí le a nghut.

¹⁸ Ngò gi, ngò hpyoq pyám bê hkyô lé dum saí kut é nghut jâng, tará lu lai é byù ngò nghut é lé tûn shít ri.

¹⁹ Ngò gi, jep é tarâ eq sêng é má, jep é tarâ é yanmai shí jâng sheq, Garai Gasâng é matú wó dui nyi râ nghut lhê.

²⁰ Ngò gi, Hkrisduq eq rahá jén sat é hui bê nghut mù luí, ngá gûng ngò dui nyi é a nghut lo, Hkrisduq sheq ngò má dui nyi é ru nghut lhê. Ahkuí, ngò gungsho má asak dui nyi é gi, ngo lé chyitdap luí, ngá é matú yhânggùng lé Yhang byi pyâm é, haù Garai Gasâng é Yhangzo lé lumjîng é yanmai ru nghut lhê.

[†] 2:7 Grik má ahpyo-kuq hpyit hkam é bang ga bo tô ri. [‡] 2:7 Grik má ahpyo-kuq hpyit a hkam é bang ga bo tô ri.

²¹Ngò gi, Garai Gasâng é jeju lé tô pyâm é a nghut, hkâsu mù gà le, dingmán é hkyô lé, jep é tarâ dông wó yu é ru nghut le gi, Hkrisduq shî hkâm é gi, akôm dut byuq râ nghut lhê." nghú taí é nghut lhê.

3

Lumjîng Myit Lhú? Jep É Tarâ Lhú?

¹Galatiq mau mã é byùbâm pé è! Yesuq Hkrisduq gi, tapzîng má jén sat hui bê hkyô lé, nungmoq é myoq má bò nhang to bê le nhîng, ó yuq èq wá nungmoq lé lîng nghoq yù bekô lhú?

²Nungmoq gi, haù Woi-nyí lé, jep é tarâ cháng luí wó yù kô é nghut lhê lhú? A nghut jâng, nungmoq wó gyô yu é gabú danglù lé lumjîng luí wó yù kô é nghut lhê lhú? Haù rahkat lé za, ngò sê yù nau ri.

³Nungmoq gi, haù-í yhang bâm akô lhú? Haù Woi-nyí lé lumhkaù mù kut hí kôluí nhîng, ahkuí, gungsho wum-o lé lumhkaù mù, yhumsîng myit tô é hkyô lé lhoq pán râ matú shikut nyi akô lhú?

⁴Nungmoq, myo myo hpuzô pyâm é gi, akôm nghut akô lhú? Gè gè yhang, haù gi, akôm nghut byuq bekô lhú?

⁵Garai Gasang, nungmoq lé Yhâng é Woi-nyí byí é htoq agó, nungmoq chyáng laklai kumlhá kut é gi, jep é tarâ lé nungmoq châng é yanmai nghut akô lhú? A nghut jâng, nungmoq wó gyô é gabú danglù lé, nungmoq lumjîng é yanmai nghut akô lhú?

⁶"Abraham gi, Garai Gasang lé lumjîng luí, yhang lé dingmán sù ga sôn yu é hui bê nghut ri."* ga, Abraham eq séng luí taí tô é lé myit wú keq.

⁷Haù mù luí, lumjîng myit bo é bang gi, Abraham é yhangzô pé* yhang dut bê nghut é hkyô lé sé keq.

⁸Lumjîng myit é yanmai, tûngbaù pé lé Garai Gasang mara hkyut san byi râ nghut lhê ga, Chyúmdang mai hí byu-myang to bê nghut mù luí, Abraham lé hí shít kyô tô é gabú danglù gi, "Nang é yanmai, byuhú chângjup gi, shimân jeju wó yù kó râ nghut lhê."* gà ri.

⁹Haù mù luí, lumjîng myit bo é bang gi, lumjîng myit bo é Abraham eq rahá, shimân jeju lé myang hkam yù kó râ nghut lhê.

¹⁰Jep é tarâ châng é hkyô má nègè hkau é lhunglhang bang gi, nhîng pyâm é hui bang chyat nghut lhê. Hkâsu mù gà le, "Tarâ laiká má kê tô é lhunglhang lé a xoq kut é sù, ó yuq nghut kôle, nhîng pyâm é hui kó râ nghut lhê."* ga luí, kê tô ri.

¹¹Hau htoq agó, "Haù dingmán sù gi, lumjîng myit mai asak duí râ nghut lhê."* ga kê tô é yanmai, ó yuq nghut kôle, Garai Gasâng é hí má jep é tarâ lé châng luí, mara hkyut san byí é a huí é hkyô gi, san za nghut bê nghut ri.

¹²Haù jep é tarâ gi, lumjîng myit eq haí a sêng é nghut luí, "Haù pé dông châng é sù gi, haù pé mai asak duí râ nghut lhê."* ga kê tô ri.

¹³Haù Chyúmdang má, "Sik zîng má jén lhang to huí é sù ó yuq nghut kôle, nhîng pyâm é hui sù nghut ri."* ga kê tô é eq rajung za, Hkrisduq gi, nga-nhûng é matú nhîng pyâm é hui sù dut bê nghut é yanmai, jep é tarâ mã é nhîng é hkyô mai nga-nhûng lé hkyi yù bê nghut ri.

¹⁴Haù Abraham lé byí tô é shimân jeju gi, Hkrisduq Yesuq é yanmai tûngbaù pé chyáng le jé sháng gaq ga, Yhang nga-nhûng lé hkyi yu é nghut

* **3:6** Apûn 15:6 * **3:7** Abraham é yhangzô pé gà é gi, Garai Gasâng é yhangzô pé lé gà é nghut lhê.

* **3:8** Apûn 12:3 * **3:10** Tarâ Pun 27:26 * **3:11** Hbk 2:4 * **3:12** Nhong 18:5 * **3:13** Tarâ Pun

ri; haù mù, nga-nhúng gi, danggidiq byí tò é Woi-nyí haù lé, lumjínq myit mai wó yú rá nghut lhê.

Jep E Tarâ Eq Danggidiq

¹⁵ Gumang wui ê, nyí wui é asak duì hkyô mâ é lé dangtú yù mù, ngò nungmoq lé taí kôlé, byù mai chòm tò é dangshikaq lé, ó yuq èq le wó lhoq hpyoq pyám rà a nghut, ó yuq èq le haù má wó jat kat rà a nghut.

¹⁶ Abraham eq yhang é awut ashín lé byi tò é danggidiq le haù eq rajung za nghut ri. "Awut ashín pé lé" gâ é dang gi, byù myo myo lé gâ lhê; nghut kôlhang, haù Chyúmdang má, haù lé taí nau é a nghut e za, "náng é awut ashín lé"[☞] ga taí nau é ru nghut lhê, haù é lichyúm gi, byù rayuq lé za taí é nghut lhê, haù gi, Hkrisduq nghut ri;

¹⁷ haù mù luí, ngò taí nau é gi, Garai Gasang, dangshikaq tò tò é htàng, myí sho sum xê zàn má lé joq é tarâ gi, dangshikaq haù lé le wó lhoq hpyoq pyám rà a nghut, danggidiq lé le wó lhoq htên pyám rà a nghut.

¹⁸ Hkâsu mù gâ le, haù silí wunlí gi, jep é tarâ eq séng lhùm é nghut jáng, danggidiq eq gi, haí le a séng lhum lo nghut ri; nghut kôlhang, Garai Gasang gi, Yhang é jeju yanmai, Abraham lé danggidiq đông silí wunlí haù byí to bê nghut ri.

¹⁹ Haù su nghut jáng, haù jep é tarâ gi, hai akyû bò rá lhú? Haù gi, danggidiq đông lhoq âng tò é Awut ashín nghut é sù jé lé é hkùn jé shoq, mara kut shut nyi bùm kô é yanmai, jat kat tò é nghut lhê; jep é tarâ haù gi, maumang lagyô pé mai gyoro sô xoq byi sù[†] é loq đông byí tò é ru nghut lhê.

²⁰ Gyoro sô xoq byi sù gi, rahkyam shut mâ é bang eq baú sêng é a nghut, nghut kôlhang, Garai Gasang gi, rayuq za nghut lhê.

²¹ Haù mù luí, jep é tarâ gi, Garai Gasâng é danggidiq pé eq htuq htíng lhùm lhê lhú? Ratsuí le a nghut. Hkâsu mù gâ le, duì é asak wó byí é jep é tarâ lé byi to bê nghut le gi, gè gè yhang, dínmán hkyô gi, jep é tarâ mai lò rá nghut lhê.

²² Nghut kôlhang, mingkan gón mâ é bang gi, yubak marâ é htongbyu pé chyat nghut akô ga Chyúmdang má bo tò ri; haù mù luí, haù byí to bê danggidiq lé gi, Yesuq Hkrisduq lé lumjínq é bang lé byi rá nghut lhê.

²³ Lumjínq hkyô haù a jé shimá, nga-nhúng gi, haù jep é tara èq htongbyú đông lhùng tò é hui luí, lumjínq hkyô haù htoq shit é hkùn jé shoq myhí lhúng tò é hui wú bê nghut lhê.

²⁴ Haù mù luí, nga-nhúng gi, lumjínq é yanmai mara hkyut san byí é hui sháng gaq ga, jep é tarâ gi, nga-nhúng lé Hkrisduq chyáng shuí é rá matú, nga-nhúng é hkyô-u shê sù dut bê nghut ri.

²⁵ Ahkuí kúm gi, haù lumjínq hkyô jé bê nghut é yanmai, nga-nhúng gi, haù jep é tarâ mai hkyô-u shê é loq hkaú má a nghut lo.

Garai Gasâng É Yhangzô Pé

²⁶ Nungmoq lhunglhang bang gi, Hkrisduq Yesuq lé lumjínq é yanmai, Garai Gasâng é yhangzô pé nghut bê;

²⁷ Hkrisduq má wui-myhup hkám bê é bang nungmoq banshoq gi, Hkrisduq lé mebu su wut to beko nghut ri.

☞ 3:16 Apùn 12:7; 13:15; 24:7 † 3:19 Gyoro so xoq byi sù gi, Mosheq nghut ri.

²⁸ Nungmoq lhunglhang bang gi, Hkrisduq Yesuq má rading ralhum za nghut é yanmai, Yudaq byù nghù é eq Grik nghu é, jùn nghu é eq luthkyò nghu é, yuqgè nghu é eq myiwe nghu é, a gam hkoq lo nghut ri.

²⁹ Nungmoq gi, Hkrisduq eq séng bekò nghut jáng, Abraham é awut ashin pé le, haù danggidiq eq rajung za silí wunlí hkam yù bang le, nghut akò nghut ri.

4

¹ Ngò tái nau é lichyúm gi, haù amyù hkúng xoq dut rá sù gi, ikun sutzè banshoq lé sng ang sù nghut kôlhang, yhang, zoshâng nghut ashí hkún gi, jùn hpó eq haí a shaí nghut ri.

² Yhang gi, yhâng wa masat tô é ahkyíng jé shoq, yhang lé zúng é sù eq yhúm lé up su é a-ô má ru lúng nyi ashí nghut ri.

³ Haù eq rajung za, nga-nhúng le zoshâng* nghut é hkún gi, mingkan uphkang tarâ ô má jùn dut nyi é bang nghut lhê.

⁴ Nghut kôlhang, ahkyíng lo ngap jáng, zo dut rá ahkáng lé byíng shoq, nga-nhúng wó yù sháng gaq ga, Garai Gasang gi, jep é tarâ hkaù má é byu pé lé hkyi yù rá matú,

⁵ jep é tarâ hkaù má, myiwe mai hku kat nhang é Yhang Zo lé, nhang kat byi bê nghut ri.

⁶ Hkâsu mù gâ le, nungmoq le, zo wuì nghut bê yanmai, "Aba, Áwa ê." ga dat wut é, Yhang Zô é Woi-nyí lé, Garai Gasang gi, nga-nhúng é i-myt unghkaù má kat byi bê nghut ri.

⁷ Haù mù luí, nàng gi, jùn a nghut lô e za, zo rayuq nghut bê nghut ri; nàng gi, zo rayuq nghut é yanmai, Garai Gasang gi, nang lé Yhâng é amyù hkúng xoq dut nhâng bê nghut ri.

Galatiq Mau Bang Lé Poluq Myit Chiq Byí É Hkyò

⁸ Hí hkún, Garai Gasang lé nungmoq a sé shí é u lé, nungmoq gi, nat hparà lhang a nghut bâng é a-ô má jùn dut é bang nghut ri.

⁹ Ahkuí kúm, Garai Gasang lé nungmoq sé bê nghu é htoq agó, Garai Gasang gi, nungmoq lé sé bê nghut le nhing, nungmoq gi, hkâsu mù, haù wum nyhôm é eq akyú a byí é, mingkan uphkang é tarâ shut dum lhing taù ló nyi akò lú? Nungmoq gi, haù pé eq jùn zô é dum hui zó nau akò lú?

¹⁰ Nungmoq gi, buinyi wú, lhohkyap wú, ahkyíng yam-yoq wú, zanwut wú é hkyô pé lé, ahkyak kut nyi ashí kó nhung!

¹¹ Nungmoq chyáng ngò wum kat pyâm é hkyô gi, akôm dut bê abe nghù, nungmoq é matú ngò myit chiq nyi ri.

¹² Gumang wuì è, ngò gi, nungmoq su dut bê nghut é yanmai, nungmoq le ngò su dut keq† nghù, nungmoq lé dúng tóngbán kat lhê. Nungmoq gi, ngo lé haí le a kut shut wú kô é nghut lhê.

¹³ Sâng-hí dàm ngò nungmoq lé gabú danglù hko kyo é hkyô gi, nungmoq sé é eq rajung za, ngò nòhpyo huí é yanmai nghut lhê.

¹⁴ Ngá é nòhpyo gi, nungmoq é matú wuìhke hkyò dut kôlhang, nungmoq gi, ngo lé a wú tiq pyám kô é htoq agó, a wú chaq pyám kô e za, Garai Gasang é maumang rayuq lé su le, Hkrisduq Yesuq lé su yhang le, ngo lé lhom hap yù kô é nghut lhê.

* 4:3 Bun zo shí má, zoshâng gâ é lichyúm gi, Yesuq lé a lumjng shí é bang lé gâ lhê. † 4:12 Ngò su dut keq gâ é lichyúm gi, nungmoq le ngò su jep é tarâ mai lut htoq keq gâ nau é nghut lhê.

15 Haù sù é nhîng, nungmoq é gabú hkyô banshoq gi, haì dut byuq bekô lúh? Nungmoq gi, ru wó dut é nghut jáng, nungmoq é myoqjí lé choq yù mù, ngo lé wám byí pyám kó rà í dut laì lò bê hkyô lé, ngo saksé wó hkâm lhê.

16 Ahkuí, ngò gi, nungmoq lé haù tengmán hkyô taí kyô é yanmai, nungmoq é gyè dut to bê nghut lhê lúh?

17 Haù byù góbang gi, nungmoq lé gyai shirong é hkyô tûn shit ri; nghut kôlhang, ge é hkyô haì a bò; yhangmoq ô nau é hkyô gi, yhangmoq lé nungmoq taù shirông kó abe ga, nungmoq lé ngamoq chyáng mai lhoq kâng yù rà matú ru nghut lhê.

18 Ge é hkyô lé shirong é gi, ge lhê; ngò eq rahá nyi é hkûn za a nghut, hkâ-nhám le haù su shirong le ge lhê.

19 Ngò chytidap é zo wuì ê, Hkrisduq é a-kyang nungmoq má gumjup lo é jé shoq, ngò gi, zo hkû nò no é su radàm dum hkâm zô nyi luí,

20 nungmoq é hkyô lé myit wuìhkê tô é yanmai, ahkuí, nungmoq eq rahá myang nyi mù, ngò taí é danghtê wó htaí rà matú, gyai yhang myoqbyu nyi lhê ô.

Hagara eq Sarah Nhik É Hkyô

21 Haù jep é tarâ ô má nyi nau é bang ê, jep é tarâ má taí é hkyô lé a sê gyo kô é nghut lhê lúh? Ngo lé taí kyô wú kó laq.

22 Hkâsu mù gâ le, Abraham gi, yuqzo í yuq wó ri; rayuq gi, jùn myhí é yhangzo, rayuq gi, jùn myhí a nghut su é yhangzo, ga kâ tô ri.

23 Haù jùn myhí é yhangzo gi, gungsho dông hku lé é sù nghut kôlhang, jùn myhí a nghut su é yhangzo kúm gi, danggidiq eq rajung za hku lé é sù ru nghut lhê.

24 Haù hkyô pé gi, dangtú ru nghut lhê, myiwe haù í yuq gi, dangshikaq í lhum eq wuì lhê; dangshikaq ralhum gi, Sinaq Bùm mâ é[‡] nghut luí, jùn dut rà nghut é zo wuì lé hku kat é Hagara lé taí nau é nghut ri.

25 Hagara haù gi, Arabiq mau mâ é Sinaq Bùm lé taí nau é nghut luí, ahkuí lhê é Yerusalem eq wuì nyi ri. Hkâsu mù gâ le, Yerusalem haù gi, yhang zô pé eq rahá, jep é tara é jùn dut nyi kô é yanmai nghut lhê.

26 Nghut kôlhang, ahtoq mâ é Yerusalem gi, jùn myhí a nghut sù nghut luí, nga-nhông é Ìnu nghut ri.

27 Hkâsu mù gâ le,

"Zoshâng a hku é baùdung myhí ê, gabú nyí aq. Zo hkû nò a no wú shí é myiwe gi, gabú luí, gabú garú nyi aq;

hkâsu mù gâ le, haù chamchuyiuyí dut é myiwe myhí gi, làng wó é myiwé htoq má zo wuì je myô wó bê nghut ri."

ga kâ tô ri.[☆]

28 Gumang wuì ê, ahkuí, nungmoq gi, Isak su, danggidiq byí tô é zo wuì nghut bê nghut ri.

29 Haù hkûn lé, haù gungsho dông hku lé lo é sù gi, Woi-nyí wum-o dông hku lé lo é sù lé zing-rí ri. Haù eq rajung za, ahkuí le dut nyi ri.

30 Nghut kôlhang, Chyúmdang má hkâsu ga kâ tô ri lúh gâ le, "Haù jùn myhí eq yhangzo yuqzo lé hkat htoq pyám aq; hkâsu mù gâ le, haù jùn myhí é yhangzo yuqzo gi, jùn myhí a nghut su é yhangzo yuqzo eq rahá, silí wunlí lé wó chôm hkam yù rà a nghut."[☆] gâ ri.

[‡] 4:24 Sinaq Bùm mâ é dangshikaq gi, jep é tarâ eq sêng é dangshikaq nghut lhê. [☆] 4:27 Esai 54:1

[☆] 4:30 Apùn 21:10

³¹ Haû mù luí, gumang wuì ê, nga-nhúng gi, jùn myhí é yhangzô pé a nghut e za, jùn myhí a nghut su é yhangzô pé ru nghut lhê.

5

Hkrisduq Mã É Luthkyô

¹ Nga-nhúng luthkyô wó rà matú, Hkrisduq gi, nga-nhúng lé lhoq lhut kat bê nghut ri. Haû mù luí, haû má ru gíng nyi mù, yhumsing gùng lé jun é wòlai hkaû má hkâtaû bainaí nyi kó.

² Ngá dang lé matsing yù keq! Ngò Poluq, nungmoq lé taí kyo kôlé, nungmoq ahpyo-kuq hpyit hkam yù kô é nghut jáng, Hkrisduq gi, nungmoq é matú hai akyù le bò kó rà a nghut.

³ Hau htoq agó, ahpyo-kuq hpyit hkam yu é sù ó yuq lé nghut kôle, ahpyo-kuq hpyit é sù gi, jep é tarâ lhunglhang lé châng kut rà lhê nghù, ngò kyô kat lhê.

⁴ Jep é tarâ châng shikut é dông mara hkyut san byí é hui naû bang, nungmoq gi, Hkrisduq eq gâng lhum to bekô nghut luí, haû Garaí jeju mai le byit gyó byuq bekô nghut ri.

⁵ Ngamoq kúm gi, myit myoqbyu tô é dingmán hkyô lé, haû Woi-nyí é yanmai lumjिंग myit eq gyai yhang lánng nyi é bang nghut lhê.

⁶ Hkâsu mù gâ le, Hkrisduq Yesu má gi, ahpyo-kuq hpyit é nghut nghut, ahpyo-kuq a hpyit é nghut nghut, hai akyù a bò nghut ri; chyitdap myit mai htoq lo é lumjिंग myit za sheq, akyù bo lhê.

⁷ Nungmoq gi, rago din wú bekô* nghut é wá, haû tengmán hkyô lé a cháng sháng gaq ga, nungmoq lé ó yuq eq hkùm zing pyám kô é l hú?

⁸ Haû su kut mhoq hpyoq yu é hkyô gi, nungmoq lé ji yù Su chyáng mai htoq lo é a nghut.

⁹ Mún ratsuí zo gi, muk long gón lé wó lhoq daù lhê.† gâ é dang joq lhê.

¹⁰ Nghut kôlhang, nungmoq gi, gotú hkyô dông a lhom yù kó rà nghut lhê nghù, Hkrisduq má hkyak ngò myit lum nyi lhê. Nungmoq lé lhoq byok byí é sù, ó yuq nghut kôle, yhumsing é mara eq rajung za dam byí é hui zo rà nghut lhê.

¹¹ Gumang wuì ê, ahpyo-kuq hpyit é hkyô lé, ngò rú hko nyi ashí nghut le gi, haí mù luí, zing-rí é lé ngò hui zô nyi rá l hú? Haû su kut é nghut jáng, haû tapzिंग eq séng luí, manghkáng joq rà a nghut lo.

¹² Nungmoq lé lhoq byok nyi é bang gi, hau htoq chyân luí, yhumsing gùng yhumsing banshoq hpyit pyám kó sháng gaq nghù, ngò wó myit ri.

¹³ Gumang wuì ê, nungmoq gi, luthkyô wó rà matú ji yù huí é bang nghut akò; nghut kôlhang, nungmoq é luthkyô ahkáng lé, yubak gungsho má hkácháng nhâng kó, chyitdap myit mai kúm gi, rayuq eq rayuq dojaú lhum nyi keq.

¹⁴ Hkâsu mù gâ le, "Náng gùng lé nàng chyitdap é su, náng é chyangnâm má é bang lé le chyitdap aq."* gâ é hkunmó má za, jep é tarâ banshoq lo bo to bê nghut lhê.

¹⁵ Nungmoq, rayuq eq rayuq ngat lhum myui lhum nyi kô é nghut le gi, rayuq eq rayuq lhoq htên pyám lhum kó rà nghut é lé, sidiq nyi keq.

* **5:7** Rago din wú bekô gâ é gi, woi-nyí hkyô má kó myhang lai lò bê lé taí nau é nghut lhê. † **5:9** Shut é dông mhoqshit é hkyô ratsuí gi, muk long gón lé mún eq wó lhoq daù é su, nungmoq banshoq lé wó lhoq nghoq yu pyám lhê. ☆ **5:14** Nhung 19:18

Woi-nyí Êq Asak Dui Râ Hkyô

¹⁶ Nghut kôlhang, ngò tai kôlé, Woi-nyí shuí ù é đông asak dui nyi keq; haú hkûn, nungmoq gi, yubak gungsho ô nau é hkyô cháng kó râ a nghut.

¹⁷ Hkâsu mù gâ le, yubak gungsho ô nau hkyô gi, Woi-nyí eq shai lhum nyi; Woi-nyí gi, yubak gungsho ô nau hkyô eq shai lhum nyi, dut ri. Haú í lhum gi, gyê dut lhum ri; haú mù, nungmoq gi, yhumsing ô nau é đông hkâkut kó.

¹⁸ Nghut kôlhang, nungmoq lé Woi-nyí eq hkyô hí é nghut jáng, nungmoq gi, jep é tarâ ô má a nghut lo nghut ri.

¹⁹ Yubak gungsho é muzô gi, de de yhang nghut lhê; haú pé gi, ashop é đông gungsho zùm yap é hkyô, a sân-yúng é hkyô, shut é đông nyi zô lhum nau é myit,

²⁰ hparà noq hkyô, myoqheq mù kut é hkyô, a jú é hkyô, byoq lhum é hkyô, manon é hkyô, nhiksoq sup é hkyô, yhumsing wuizat é hkyô, gâng lhum sê é hkyô, hpúng gam é hkyô,

²¹ ningsù é hkyô, í shuq wut é hkyô, zo yê shuq yê mù achayut kut é hkyô pé eq haú pé su kut é gotù hkyô pé nghut ri; haú su kut nyi yap é bang gi, Garai Gasâng mingdán é silí wunlí lé wó hkam yù râ a nghut nghú, ngò, hí hkûn nungmoq lé tai wú bê eq rajung za, ahkuí lé, nungmoq lé ngò sidiq byí nyi lhê.

²² Nghut kôlhang, Woi-nyí é ashi gi, chyitdap hkyô, gabú hkyô, nguingón hkyô, myit hng hkyô, nhik-u nú é hkyô, ge é hkyô, lhumzui hkyô,

²³ nûm é hkyô, yhumsing gùng lé wó hkang é hkyô pé nghut ri. Haú hkyô pé lé hkûm zing pyám râ tarâ haí le a joq nghut ri.

²⁴ Hkrisduq Yesuq eq séng bê bang kúm gi, yubak gungsho ô nau hkyô lé le, hau é yut yut ô nau myit eq shirong é hkyô pé lé le, tapzing má jén sat pyám bekô nghut ri.

²⁵ Nga-nhúng gi, Woi-nyí mai asak dui bê nghut mù, haú Woi-nyí htâng châng nyi sháng.

²⁶ Nga-nhúng gi, akôm gyáng dang tai luí, rayuq eq rayuq jeq ho lhum é eq manon lhum é bang, a dut nyi sháng gaq.

6*Lhunglhang Bang Lé, Ge É Hkyô Kut Byi Râ Hkyô*

¹ Gumang wui ê, rayuq yuq gi, mara záng kut shut é nghut jáng, Woi-nyí wum-o bò bê bang nungmoq gi, nûm é myit eq haú yuq lé lhoq pun lhoq kyíng yù keq. Nghut kôlhang, nàng gi, gunglaú é a hui sháng gaq, sidiq nyi aq.

² Rayuq eq rayuq é wôlai lé tê byí lhum nyi keq; haú đông mai, nungmoq gi, Hkrisduq é tarâ lé wó lhoq dik kó râ nghut lhê.

³ Rayuq yuq gi, yhumsing gùng haí le a nghut é wá, ahkyak su ngam é nghut jáng, haú yuq gi, yhumsing gùng lé mhaú pyám é sù nghut ri.

⁴ Yuq hkangmó gi, yhumsing nyi yap é hkyô lé taú myit wú keq; haú hkûn, yhumsing gùng lé góbang eq whuí nó a râ é za, yhumsing gùng má aróng wó yù râ nghut lhê.

⁵ Hkâsu mù gâ le, yuq hkangmó gi, ó le ô wò lé wùn waq ra râ dut lhê.

⁶ Haú mungdang lé mhoq yu é sù gi, mhoqshít byi sù lé, ge é zè banshoq gàm byi sháng gaq.

⁷ Garai Gasang lé gi, wó rhoi râ a nghut, yhumsing gùng yhumsing mhauzô é hkâhui nhâng kó; byù gi, hô kat é eq rajung za, shù yù râ nghut lhê.

⁸ Haù yhumsing é yubak gungsho lé lhoq ngón râ matú hô kat é sù gi, myit haù mai htên byoq é hkyô lé myang hkam yù râ nghut lhê; haù Woi-nyí lé lhoq ngón râ matú hô kat é sù kúm gi, Woi-nyí haù mai ahtum abyuq é asak lé myang hkam yù râ nghut lhê.

⁹ Nga-nhúng gi, ge é hkyô kut é má nú byuq é bang a dut sháng gaq, hkâsu mù gâ le, haù lé nga-nhúng a tô pyâm é nghut jáng, ahkyíng yam-yoq jé é hkún, nga-nhúng gi, akyú myang hkam yù râ nghut lhê.

¹⁰ Haù mù luí, nga-nhúng gi, kut râ ahkyíng wó tô é u lé, byù lhunglhang bang lé ge é hkyô kut byi sháng, haù lumjíng hkyô eq séng é ikun byu pé lé, je riyhang kut byi sháng.

Ahpyo-kuq Hpyit É Hkyô A Nghut E Za, Byù Sik Hpân Huí É Hkyô

¹¹ Ngò, nungmoq lé, ngá é loq eq hkâ-í kô é laiká cham kê kat byí é lé, wú wú keq!

¹² Ahtoq pyâm za ge é hkyô lé kut shit nau é bang gi, ahpyo-kuq hpyit kó sháng gaq ga, nungmoq lé zik shikut nyi é bang nghut akò; yhangmoq haù su kut é hkyô gi, Hkrisduq é tapzing é yanmai zing-ri huí é hkyô lé, koi pyâm râ matú za nghut ri.

¹³ Hkâsu mù gâ le, haù ahpyo-kuq hpyit é bang lháng jep é tarâ lé a cháng kó nghut ri; nghut kôlhang, yhangmoq gi, nungmoq é gungsho eq séng luí wó gumrông kó sháng gaq ga, nungmoq lé ahpyo-kuq hpyit nhâng nau akò nghut ri.

¹⁴ Ngò kúm gi, nga-nhúng é Yhumsing Yesuq Hkrisduq é tapzing eq séng luí gumrông é mai lai luí, hai má le a gumrông sháng gaq; Yhang é yanmai, mingkan gi, ngá é matú jén sat é hui bê; ngò gi, mingkân é matú jén sat é hui bê nghut lhê.

¹⁵ Ahpyo-kuq hpyit é hkyô nghut nghut, a hpyit é nghut nghut, hai akyú a bò; byù sik hpân huí é hkyô za sheq, ahkyak é nghut lhê.

¹⁶ Tarâ haù lé châng é lhunglhang bâng é ahtoq má le, haù Garai Gasâng é Israelaq byu pé* é ahtoq má le, nguínón hkyô eq shogyo nhikmyin hkyô gi, ru joq nyí sháng gaq ô.

¹⁷ Ahkuí mai gi, ó yuq le ngo lé jamjau a lhoq htoq byi lo sháng gaq; hkâsu mù gâ le, ngò gi, Hkrisduq é dui-nhâng zoshâng nghut é saksé damhkô lé wun wun lhê.

¹⁸ Gumang wui ê, nga-nhúng é Yhumsing Yesuq Hkrisduq é jeju gi, nungmoq é woi-nyí eq ru joq nyí sháng gaq. Amen.

* **6:16** Bun zo shí lhum mà é *Israelaq byu pé gâ* é gi, hpúng byù wui banshoq lé tai nau é nghut lhê.

EHPESU Pê Chyáng Hun Kat é Laiká (Ephesians)

¹ Garai Gasang ô nau é eq rajung za, Hkrisduq Yesuq é lagyo nghut sù, ngò Poluq gi, Ehpesu myuq má nyí é, Hkrisduq Yesuq má lhumzui bang nghut é, haú sên-yúng bâng chyáng nguingón dang shit kyô kat lhê.

² Nga-nhúng é Íwa Garai Gasang eq Yhumsing Yesuq Hkrisduq chyáng má é, jeju eq nguingón hkyô gi, nungmoq chyáng ru joq nyí sháng gaq ô!

Hkrisduq Mã É, Woi-nyí Hkyô Shimân Jeju Pé

³ Mauhkúng htoq tsáng myhâng má, woi-nyí hkyô eq sêng é shimân jeju jung hkangmó lé, Hkrisduq má nga-nhúng lé shimân byi sù, nga-nhúng é Yhumsing Yesuq Hkrisduq é Yhângwa, Garai Gasang gi, hkungsô wó nyí sháng gaq.

⁴ Hkâsu mù gâ le, nga-nhúng gi, Garai Gasâng é hí má, chyoiyúng é bang eq mara a bo é bang dut râ matú, Garai Gasang gi, mingkan lé a hpân shi mai, Hkrisduq Yesuq má nga-nhúng lé hkyin yu to bê nghut ri.

⁵ Hau htoq agó, Yhang, nga-nhúng lé chyitdap é yanmai, Yhang myit ngùi ô nau é eq rajung za, Yesuq Hkrisduq mai yhangzô pé kut yu râ matú, hí mai nga-nhúng lé masat to bê nghut ri.

⁶ Haú mù, Yhang chyitdap é Sù* má, nga-nhúng lé láí láí byi bê nghut é, hpungwup shingkan bo é jeju chyunghuq lé, chôm hkya-on sháng.

⁷ Garai Gasâng é agùn agó é jeju yanmai, nga-nhúng mara hkyut byí é hui lui, Yhang Zô é sui đông mai, nga-nhúng gi, Yhang má hkyi yù hkyô wó yu é nghut lhê.

⁸ Jeju haú lé gi, hpaqchyí byéng-yá eq sê gyô é nyan banshoq le kut, Yhang, nga-nhúng lé agùn agó byi bê nghut lhê.

⁹ Garai Gasang gi, Yhang myit ngùi é eq rajung za, Hkrisduq đông mai kut râ matú hen to bê nghut é, Yhâng é záu tô é hkyô lé, nga-nhúng lé shit bê nghut ri.

¹⁰ Sê gyo wui é hkyô haú gi, lhoq dik râ ahkying jé jáng, mauhkúng htoq eq myigùng htoq mã é lhunglhang lé, Hkrisduq má rading ralhum za kut râ nghut é hkyô nghut lhê.

¹¹ Hkrisduq mã sâng-hi myit myoqbyù bang nghut é nga-nhúng gi, Yhâng é hpungwup shingkan lé hkya-on kungtôn sháng gaq ga,

¹² Garai Gasang gi, Yhang myit sôn tô é lhunglhang lé ban kut mù, Yhâng ô nau é đông, hí mai myit hpyit doqdân to bê eq rajung za, nga-nhúng lé le, Hkrisduq má hkyin yu to bê nghut ri.

¹³ Hau htoq agó, nungmoq le, nungmoq é hkyi yù hkyô é gabú danglù gâ é tengmán mungdang lé wó gyo kô é hkùn, Hkrisduq eq sêng é bang dut bekô nghut ri. Nungmoq gi, Hkrisduq lé lumjing bekô nghut é yanmai, haú gididq byí tô é Chyoiyúng Woi-nyí dizik htung tap byí é hui bekô nghut ri.

¹⁴ Garai Gasâng é hpungwup shingkan lé hkya-on râ matú, Yhang eq sêng é byu pé hkyi xe yù hui é hkying jé shoq, Chyoiyúng Woi-nyí haú gi, nga-nhúng é muizê lé hkyak wó yù râ nghu é masat nghut ri.

* 1:6 *Yhang chyitdap é Sù gâ é gi, Yesuq lé tái nau é nghut lhê.*

Poluq Kyûdung Byî Ê Hkyô

¹⁵ Haû mù luí, Yhumsing Yesuq lé nungmoq lumjing é hkyô eq sân-yung bang lunglhang lé nungmoq chyitdap é hkyô lé, ngò wó gyô é yanmai,

¹⁶ ngò gi, ngá é kyûdung dang má nungmoq lé myit bun uchang, anum yhang, nungmoq é matú jeju hkyá-ôn nyi lhê.

¹⁷ Nga-nhung é Yhumsing Yesuq Hkrisduq é Garai Gasang nghut é, hpungwup shingkang bò sú haû Íwa gi, Yhang lé nungmoq je sé rã matú, hpaqchyí byéng-yá wó byí é eq san za wó sé nhang é Woi-nyí, nungmoq lé byi sháng gaq ngû, ngò, Yhâng chyáng dúng nyi lhê.

¹⁸ Hau htoq agó, Yhang, nungmoq lé ji yu é myit myoqbyù hkyô, hkasú é nghut é lé le, Yhâng é hpungwup shingkang bo é muizè gi, sân-yung bang chyáng agùn agó joq nyi é hkyô lé le, Yhâng é kô dik é a-tsam mó gi, lumjing bang nga-nhung é matú nghut é lé le,

¹⁹ nungmoq wó sé rã matú, nungmoq é myit myoqjí lhoq gyeng byí é hui sháng gaq ngû, ngò kyûdung byí nyi lhê. A-tsam mó haû gi, Garai Gasang, Hkrisduq lé shi é mai lhoq dui toq yû mù,

²⁰ mauhkung htoq tsáng myhâng má, Yhâng é loqyò hkyam shut zùng nhang é hkún, chung é wum-o a-tsam mó eq rajung za nghut ri.

²¹ Hkrisduq gi, uphkan é, ahkáng ayá wó é, a-tsam bo é eq up zô é bang banshoq htoq má le, ahkuí pyat eq htang pyat má myhing é mying lunglhang é htoq má le, je gyaú é sù nghut lhê.

²² Hau htoq agó, Garai Gasang gi, lunglhang lé Yhâng é hkyiwa ô má tô to luí, haû noqkuq hpung é matú, Yhang lé, jung hkanmó é ushuq dut rã đông masat to bê nghut ri.

²³ Noqkuq hpung haû gi, Hkrisduq é gungdu nghut luí, hkyô hkanmó má jung hkanmó lhoq bying jup é Hkrisduq bying nyi é nghut ri.

2

Hkrisduq Má Asak Dui Ê Hkyô

¹ Lai ló bê hkún, nungmoq gi, tarã lu lai é eq mara kut shut é hkyô pé é yanmai, shi tô é bang dut kô é nghut lhê.

² Haû hkún, nungmoq gi, mingkan ngón hkyô pé má lhaq châng nyi kô é htoq agó, haû tarã a cháng bâng é myit má ahkuí mù zuí nyi é sobyô nghut é, maulat lé up sú htang châng nyi kô é bang nghut lhê.

³ Nga-nhung banshoq bang le, yhangmoq su kut nyi lai lo é bang chyat nghut mù, yubak mara bying é suisho ô nàu gadaú hkyô má nyi é bang nghut é htoq agó, gungsho ô nau é hkyô pé eq myit é hkyô pé đông za châng wú é bang nghut lhê. Haû mù, góbang eq rajung za, nga-nhung gi, Garai Gasang é nhikmo-yo hkyô eq gingdán wú é bang chyat nghut lhê.

⁴ Nghut kôlhang, shogyo nhikmyin myit gyaí bo é Garai Gasang gi, nga-nhung, tarã lu lai luí shi byuq bê bang dut kôlhang, Yhâng é chyitdap myit mó eq, nga-nhung lé chyitdap luí, Hkrisduq eq rahá asak dui nhang bê nghut ri.

⁵ Haû mù, nungmoq gi, Garai jejú eq za hkyi yu é hui bekô nghut ri.

⁶ Garai Gasang gi, Hkrisduq Yesuq má, nga-nhung lé, Yhâng é ge é hkyô shit bê nghut mù, a ung tai é Yhâng é jeju lé, htang pyat má wó shit sháng gaq ga,

⁷ nga-nhung lé, Hkrisduq eq rahá lhoq dui toq yû mù, mauhkung htoq tsáng myhâng má, Yhang eq rahá zùng nhang to bê nghut ri.

⁸ Hkâsu mù gâ le, nungmoq gi, lumjing é đông mai Garaî jejú êq za hkyi yu é hui bekô nghut ri. Haû gi, nungmoq chyáng mã é a nghut, Garaî Gasâng jeju chyungquq za ru nghut lhê.

⁹ Haû gi, yhumsing é muzó mai wó é a nghut é yanmai, ó yuq le nghutbun rà hkyô a joq.

¹⁰ Hkâsu mù gâ le, nga-nhúng gi, Garaî Gasâng é loqmú pé nghut mù, nga-nhúng zui saí rà matú, hí hí mai, Garaî Gasang hen lajãng tô é ge é muzó pé lé zui saí rà matú, Hkrisduq Yesuq má hpan to hui bê bang nghut lhê.

Hkrisduq Má Rading Ralhum

¹¹ Haû mù luí, nungmoq gi, hí hkûn, hku lé lo é mai yhang tungbaù pé nghut é hkyô lé le, byu loq êq za gungsho mã kut é, "ahpyo-kuq hpyit hkâm bang" gâ é bang mai, nungmoq lé, "ahpyo-kuq hpyit a hkâm bang" ga byi kô é hkyô lé le, myitbun keq.

¹² Haû u lé, nungmoq gi, Hkrisduq eq gâng lhùm tô é bang; Israelaq mingbyû a nghut é bang; danggidiq eq sêng é dangshikaq pé mã gó ming byû nghut é bang; mingkan htoq mã, myoqbyû jowò a joq é eq Garaî a wó é bang nghut é lé, myitbun keq.

¹³ Nungmoq gi, hí hkûn wê gâng nyi é bang nghut kôlhang, ahkuí kúm, Hkrisduq é sui đông mai Hkrisduq Yesuq mã shuí chyâng htep é hui bekô nghut ri.

¹⁴ Hkâsu mù gâ le, Yhânggùng yhang gi, nga-nhúng é nguingón hkyô nghut ri. Yhang gi, gyoro mã kyo tô é madin nghut é a naù a wom hkyô lé hpyoq hpyi pyám byi luí, haû í myû* dut nyi é lé, rahú za dut nhâng bê nghut ri.

¹⁵ Haû hkunmó pé eq hkgang tô é tará pé bo é jep é tará lé, Yhâng é gungsho mã lhoq htùm pyám bê nghut ri. Haû mù, Yhang ô nau é hkyô gi, haû í myû dut tô é lé, Yhânggùng mã yhang, byù sik ra-myû za hpan to rà matú nghut ri; haû dông, simsaq hkyô kut byi bê nghut ri.

¹⁶ Yhang gi, a naù a wom lhùm é hkyô lé, haû tapzîng mã lhoq htùm pyám byi mù, haû tapzîng dông mai, byù myu í myu é lé ragùng za kut luí, Garaî Gasang eq xoq byi bê nghut ri.

¹⁷ Yhang gi, wê gâng nyi é bang† nungmoq lé le, chyâng htep nyi é bang‡ lé le, simsaq hkyo é danglù lé hko kyo bê nghut ri.

¹⁸ Hkâsu mù gâ le, nga-nhúng í myû gi, Yhang dông mai, Woi-nyí ralhumm zâ eq, haû Íwâ chyáng wàng rà hkyô dong bê nghut ri.

¹⁹ Hau é yanmai, nungmoq gi, tungbaù pé eq byù bíng pé a nghut lô é za, Garaî é byu pé eq rahá, mingbyû wui eq yhumbyû wui chyat nghut bekô nghut luí,

²⁰ haû lagyô pé eq myiqhtoí pé, hi tô é apûn awang htoq mã xuq tô é bang chyat nghut akô; Hkrisduq Yesuq yhang, haû mã é ahkyak é htungchyûn luggok dut bê nghut ri.

²¹ Yhang mã, wahpang lhum gón xoq lhùm bùm é nghut mù, haû Yhumsing mã chyoiyúng noqkuq yhùm ralhumm dut lò bê nghut ri.

²² Woi-nyí dông mai, Garaî Gasang nyi rà jang dut rà matú, nungmoq le, Yhang mã, wahpang su tsuq é chôm huí nyi bùm bekô nghut ri.

* **2:14** *I myû gâ é gi, Israelaq byu pé eq tungbaù pé lé gâ lhê.* † **2:17** *Wê gâng nyi é bang gâ é gi, tungbaù pé lé gâ lhê.* ‡ **2:17** *Chyâng htep nyi é bang gâ é gi, Israelaq byu pé lé gâ lhê.*

3

Poluq, Tungbaù Pê É Tarâ Hkô Sará

¹ Haù su nghut mù, Hkrisduq Yesuq é hkyô lé, nungmoq tungbaù pê chyáng hko kyô é yanmai, htongbyú dut sù, ngò Poluq gi, nungmoq é matú kyúdung byi lhê.

² Nungmoq lé dojaù rà é matú, ngo lé byi tô é Garai Gasâng jeju ayá shí lé, nungmoq gè gè wó gyô wú bekô rà nghut lhê.

³ Haù gi, hí hkûn, ngò, tot é đông kê tô wú bê eq rajung za, haù zaù tô é hkyô lé, shing-rán đông ngo lé sé nhang é nghut ri.

⁴ Haù hkyô lé, nungmoq nghap wú é hkûn, Hkrisduq eq sêng é zaù tô é hkyô, ngò rago sé é lé, nungmoq wó sé kó rà nghut lhê.

⁵ Haù lé, lai lò bê ipyat pé mâ é byu pé lé a sé nhang é nghut kôlhang, ahkuí gi, Garai Gasâng é chyoyúng é, lagyô pé eq myiqhtoí pé lé, haù Woi-nyí eq hpông shit bê nghut ri.

⁶ Zaù tô é hkyô haù gi, gabú danglù đông mai, Hkrisduq Yesuq má, Israelaq byu pé eq rahá, tungbaù pé le, hkûng xoq bang wó dut luí, gungdu ralhûm é gungsho showui showang pé chyat dut é eq, danggidiq byi tô é lé wó chôm hkam yu é bang dut é hkyô nghut ri.

⁷ Yhâng é hpungwup a-tsam mai, ngo lé byi tô é Garai Gasâng jeju chyunghuq é yanmai, ngò gi, gabú danglù shí tai rà dui-nhâng zoshâng dut é nghut lhê.

⁸ Ngò gi, haù Garai Gasâng é byu pé mâ é tiq dik sù htoq má lhang je tiq sù nghut kôlhang, haù Hkrisduq é a ung htoq tai é wó sùt hkyô lé, tungbaù pé chyáng hko kyo rà matú le,

⁹ haù lhunglhang lé hpan é Garai Gasang má, lai lò bê ipyat pé má zaù tô é, zaù tô é hkyô haù lé hkâsu kut tô é lé, yuq hkangmó lé tai sân kyo rà matú le, jeju shí, ngo lé byi bê nghut ri.

¹⁰ Haù gi, nga-nhûng é Yhumsing Hkrisduq Yesuq má lhoq pán bê nghut é, Yhang ahtum abyuq myit hpyit tô bê eq rajung za,

¹¹ haù Garai Gasâng é hpaqchyí mó góng lé, noqkuq hpúng đông mauhkung htoq tsáng myhâng mâ é uphkang bang eq ahkáng ayá wó bang lé, ahkuí sé nhâng rà matú nghut lhê.

¹² Nga-nhûng gi, nga-nhûng é Yhumsing Hkrisduq Yesuq eq rading ralhum za nghut é yanmai le, Yhang lé lumjínng é yanmai le, Garai Gasang chyáng, wám é myit eq a gyuq a wám é myit eq wó htep ê é nghut lhê.

¹³ Haù mù luí, ngò, nungmoq lé dúng tóngbán nau é gi, nungmoq é matú, ngò wuihke jamjau hui zô é yanmai, nungmoq i-myit hkâgyui kó; haù gi, nungmoq é matú akýú bò rà hkyô nghut lhê.

Ehpesu Myuq Byu Pé Lé Kyúdung Byi É Hkyô

¹⁴ Haù pê é yanmai, ngò gi, haù Íwá é hí má hkyihput htuq luí kyúdung é nghut lhê.

¹⁵ Mauhkung eq myigùng htoq mâ é Yhâng é ikun byu lhunglhang gi, Yhâng chyáng mai mying wó yu é chyat nghut lhê.

¹⁶ Nungmoq é lumjínng myit mai, nungmoq é i-myit unghkaù má Hkrisduq wó nyi nyi sháng gaq nghú,

¹⁷ Yhang é hpungwup shingkang bo é agùn agó wó sùt é mai, nungmoq é i-myt unghkaù má é sù lé, Yhâng é Woi-nyí dông, hpungwup a-tsâm èq wum-o lhoq kíng byi rà matú, ngò kyúdung byi lhê. Hau htoq agó, nungmoq gi, chyitdap myit má amyit chín to luí, awang hi to mù,

¹⁸ sãn-yúng bang eq rahá, hau é apyí, a-tsúng, myhâng, nik, hkâ-í nghut é lé, ragó wó sé kôluí,

¹⁹ Garai Gasâng é gumjup é hkyô lhunglhâng èq wó lhoq gumjup yù kó sháng gaq nghû, sê é nyan htoq má gyaù é Hkrisduq é chyitdap hkyô lé, nungmoq wó sé rà matú, ngò kyúdung byi lhê.

²⁰ Ahkuí, nga-nhúng é hkaù má mù zuí nyi é, Yhâng é wum-o a-tsâm é yanmai, nga-nhúng dúng é banshoq eq myit é hkyô lhunglháng htoq je wó kut byí é Su chyáng,

²¹ haù noqkuq hpúng é yanmai le, Hkrisduq Yesuq é yanmai le, pyat pyat zaí zaí, ahtum abyuq, hpungwup shingkang rù bo nyi sháng gaq ô! Amen.

4

Hkrisduq É Gungdu Má Rading Ralhum Za

¹ Haù mù luí, nungmoq gi, nungmoq lé wut yù bê nghut mù, wut yu é hkyô eq gíngdán é dông asak ùi keq nghû, haù Yhumsing é yanmai, htóng lúng sù ngò Poluq gi, nungmoq lé lhoq pun lhoq kyíng kat lhê.

² Hkyô hkat hkangmó má i-myt lhoq nyhum é eq i-myt nú-nhâm nyi keq; myit hìng é eq chyitdap myit mai rayuq eq rayuq hkam jân lhùm nyi keq.

³ Haù Woi-nyí èq byí é myit hui hkyô lé, nguínón hkyô dông mai châng nyi rà matú, wó dut é í shikut nyi keq.

⁴ Nungmoq gi, wut yù hui kô é hkùn, myit myoqbyù hkyô rashut za wut yù hui bekò nghut é eq rajung za, gungdu ralhum eq Woi-nyí ralhum za nghut nyi ri.

⁵ Yhumsing rayuq za, lumjínng hkyô rahkat za, baptisma ralhum za nghut nyi ri.

⁶ Banshoq bâng é Íwa nghut sù Garai Gasang le, rayuq za nghut nyi ri; Yhang gi, banshoq bâng é ahtoq má nghut luí, lhunglháng dông mai mù kut é eq lhunglhâng é ahkaù má lúng nyi sù nghut ri.

⁷ Nghut kôlháng, nga-nhúng yuq hkangmó gi, jeju chyunghuq lé, Hkrisduq mai ké byí é dông wó yu é nghut lhê.

⁸ Hau é yanmai,

"Yhang gi, myhang é jowò shut doq ló é hkùn, shúm zung é bang lé gi, shuí chúng mù, byu pé lé gi, chyunghuq tsing gãm byí ri."^{*}
ga, Chyúmdang má tai tô é nghut lhê.

⁹ Haù "doq ló" gá é lichyúm gi, myigùng é a-o tsáng má le, Yhang gyó jé bê nghut lhê, gá naù é a nghut lhi?

¹⁰ Haù gyó lé é Sù gi, junghkang jungmó lé lhoq byíng jup rà matú, mauhkúng banshoq é ahtoq má doq ló é Sù yhang nghut lhê.

¹¹ Yhang gi, ra-am lé, lagyô pé, ra-am lé, myiqhtoí pé, ra-am lé, gabú danglù hko kyo rà bang, ra-am lé, hpúng-up pé eq sará pé kut tsing byí to bê nghut ri.

¹² Haù bang gi, Garai Gasâng é byu pé lé wùn waq âng é muzó pè é matú, hen lajâng é bang nghut ri. Haù hkùn sheq, Hkrisduq é gungdu gi,

^{*} 4:8 Hkya-on 68:18

¹³ haù lumjìng hkyô eq Garai Gasâng é Yhangzo lé sê é hkyô má, nga-nhúng banshoq bang rading ralhum za wó dut mù, kô òng bang dut luí, Hkrisduq é gumjup é isâm banshoq lé wó yu é hkún jé shoq, wó kô jat nyi rá nghut lhê.

¹⁴ Haù mù, nga-nhúng gi, wuibaù pè èq hí shut htâng shut bat myhú é su dut é eq, byu pè é agè ashop é eq haq dá é mhoq hpyoq hpaqchyí pé eq mhoqshit hkyô laidun hkangmó èq, shí shut hé shut mut tâng é su dut é lé hui zô é zoshâng wui su a nghut lô é za,

¹⁵ chyitdap myit mai tengmán é dang lé tai nyi jáng, Hkrisduq nghu é ulhum má hkyô hkangmó kô myhang lò rá nghut lhê.

¹⁶ Yhang òng mai, gungdu gón gi, ralhum eq ralhum htuqbâng é gungsho showui showang pé lé xoq byí to bê nghut mù, gungsho showui showang haù pé gi, yhumsing é muzó lé zui sai nyi é nghut jáng, gungdu haù gi, chyitdap myit má, yhânggùng yhang kô lò myhang lò rá nghut lhê.

Byù Sik Đông Asak Dui Râ Hkyô

¹⁷ Haù mù luí, haù Yhumsing é ahko ahkáng mai ngò nungmoq lé tai nau é hkyô gi, haù tûngbaù pé gi, akyú a bo é lé myit mù, asak dui kô é su, nungmoq gi, hkâkut kó.

¹⁸ Yhangmoq gi, sê gyô é nyan chut byuq bekô nghut é eq yhangmoq myit htan nyi kô é nghut mù, haí le a sé kô é yanmai, Garai Gasang byí é asak eq wê gâng byuq bekô nghut ri.

¹⁹ Yhangmoq gi, gyuq hoq hkyô a bo byuq lo kô é yanmai, myoqnoq myit òng a sansêng é hkyô jung hkangmó lé jé wó kut xoq nyi shoq ga, yhumsing gung lé, gungsho ô naù gadaú é hkyô má ap pyám bekô nghut ri.

²⁰ Nungmoq kúm gi, Hkrisduq é hkyô lé haù òng mhoq yú kô é a nghut.

²¹ Nungmoq gi, Yesuq chyáng mã é tengmán hkyô òng, Yhâng é hkyô lé wó gyô wú é eq mhoq yu wú bekô nghut lhê.

²² Haù mù, nungmoq gi, hí hpyang lhê é nungmoq é nyi yap sâmlai nghut é, ô naù gadaú luí, yhumsing gùng yhumsing mhaù pyám é òng htên byoq lô nyi é nungmoq é byù xau lé tô pyám rá matú mhoq yú bê eq rajung za,

²³ nungmoq é i-myt lé asik htaí pyám nhâng keq;

²⁴ hau htoq agó, nungmoq gi, tengmán é eq sêng é òngmán hkyô eq chyoiyúng hkyô má, Garai Gasang eq dù shoq hpan to hui bê nghut é byù sik lé, yu wut to keq.

²⁵ Haù mù, nga-nhúng banshoq bang gi, gungdu ralhum é gungsho showui showang pé chyat nghut é yanmai, nungmoq yuq hkangmó gi, mhaù é hkyô lé tô pyám luí, yhumsing é chyangnâm mã é sú lé, tengmán é dang tai ra rá nghut lhê.

²⁶ "Nungmoq nhikjum yô é hkún, mara hkâkut kó." ✧ nungmoq gi, bùi wàng shoq nhikjum hkâyô nyi kó.

²⁷ Nat Tsadán lé le, jowò hkâbyi kó.

²⁸ Hkau sú gi, a dum hkau lo sháng gaq; rá nyi é bang lé, rajung jung wó gâm byi shoq, yhumsing é loq èq akyú bo é hkyô pé lé kut nyí luí, muzó zui shikut ra rá nghut lhê.

²⁹ Nungmoq é nhut mai agè agaú é dang haí le hkâhtoq nhâng kó; wó gyô é bang akyú bò shoq, yhangmoq rá tô é má cháng luí, haù bang kô lam lò rá dang za tai keq.

³⁰ Haú hkyi yù rã buinyi é matú, dizik dông nungmoq lé tap to byi é Garai Gasâng é Chyoiyúng Woi-nyí lé hkálhoq yón kó.

³¹ Haú myit tot é, nhikjum yô é, nhik-yô é, byoq lhum byoq cheq é eq lumù gansang é, agè agau é hkyô pé banshoq lé, nungmoq tô pyám keq.

³² Nungmoq gi, rayuq eq rayuq, ge é hkyô eq shogyo nhikmyin é hkyô tún shit lhum luí, Garai Gasang gi, Hkrisduq má, nungmoq lé mara hkyut byi é su, nungmoq yhangchang le mara hkyut byi lhùm nyi keq.

5

¹ Haú mù, nungmoq gi, chyitdap dik é zoshâng wuì nghut é yanmai, Garai Gasang lé alik yu é bang kut keq.

² Hkrisduq gi, Yhânggùng lé namgón jung hkungga eq shigu hkungga dông, nga-nhúng é matú Garai Gasâng chyáng Yhânggùng yhang ap byi pyám shoq, nga-nhúng lé chyitdap é su, nungmoq le chyitdap myit èq asak dui nyi keq.

³ Hau htoq agó, ashop é dông gungsho zùm yap é hkyô, a sansêng é hkyô hkangmó eq myoqnoq é hkyô pé lé, nungmoq tái lháng hkâtaí kó; hkâsu mù gà le, nungmoq gi, Garai Gasâng é chyoiyúng byu pé nghut lhê.

⁴ Haú eq rajung za, a tái ging é, ahoq ahí dang, dangsôm eq hkunchoq dông gyá é dang pé lé a tái é za, jeju hkyá-on dang za tái nyi keq.

⁵ Hkâsu mù gà le, ashop é dông gungsho zùm yap é hkyô kut shut sù, a sansêng é sù eq hparà noq é sù nghut é myoqnoq sù ó yuq nghut kôlhang, Hkrisduq eq Garai Gasâng é mingdán má muizè a wó é hkyô lé, nungmoq sè nyi keq.

⁶ Ó yuq nghut kôle, dangsôm* dông mai nungmoq lé a wó nhaú kó sháng gaq; hkâsu mù gà le, haú hkyô pé é yanmai, Garai Gasâng é nhikmo-yo hkyô gi, haú jino a gyo bâng é ahtoq má jé rã nghut lhê.

⁷ Haú mù luí, haú bâng chyáng hkâbo wang lòm kó.

⁸ Hkâsu mù gà le, nungmoq gi, hí hpyang mauchut tuq dut é bang nghut lhê; nghut kôlhang, ahkuí gi, haú Yhumsíng má maubó pé nghut bekô nghut ri.

⁹ Haú Yhumsíng ô nau é hkyô haí nghut é lé ho htoq yù mù, maubó é yhangzô pé dông asak dui keq.

¹⁰ Hkâsu mù gà le, haú maubó é ashi gi, ge é hkyô banshoq, dingmán é hkyô eq tengmán hkyô chyat nghut ri.

¹¹ Haú ashi a zui é mauchut tuq muzó má a bo wang lom é za, yhangmoq é mara lé tún shit keq.

¹² Hkâsu mù gà le, haú jino a gyo bang haq zaú kut é hkyô lé gi, tái htoq le lháng hoq hpo nghut ri.

¹³ Nghut kôlhang, junghkang jungmó lé, haú maubó èq tún shit jáng gi, wó byu-myang é chyat dut rã nghut lhê.

¹⁴ Hkâsu mù gà le, junghkang jungmó lé byu-myàng nhang é gi, maubó nghut ri. Hau é yanmai,

"Yhup ngón nyi sù è, toq aq, haú shi é mai dui toq aq hkoi; haú jáng, Hkrisduq gi, nang lé duqbó byi rã nghut lhê."[†]

ga luí tái tô é nghut lhê.

* **5:6** Dangsôm gà é gi, Garai Gasâng é nhikmo-yo hkyô a jé rã ga tái é dang nghut lhê. † **5:14** Dang ngho shí gi, hí lhê é noquq hpùng pé tái gyó lo é dang nghut lhê.

¹⁵ Haû mù luí, nungmoq hkâsu kut asak dui é hkyô má gyai sidiq nyí keq; hpaqchyí a bò bang su a nghut é za, hpaqchyí bò bang su kut nyí keq.

¹⁶ Buinyí ahkyíng shí pé gi, agè ashop é yanmai, wó é ahko ahkáng banshoq lé ge dik é dōng chung jaí keq.

¹⁷ Hau é yanmai, byù ngok pé a dut é za, haû Yhumsing ô nau é hkyô gi, haí nghut é lé, sê gyô yu nyí keq.

¹⁸ Haû achaq achyut é yubak hkyô lhoq htoq é í lé hkâshuq wut kó; Woi-nyí lé kúm byíng nhang nyí keq.

¹⁹ Nungmoq gi, hkya-on kungtôn dang dōng le, hkya-on mahkôn dang dōng le, woi-nyí eq sēng é mahkôn dōng le, rayuq eq rayuq dāng nyo lhum luí, nungmoq é i-myt unghkaú mai, haû Yhumsing lé mahkôn hkôn mù, lhoq ngón nyí keq.

²⁰ Nga-nhúng é Yhumsing Yesuq Hkrisduq é myíng lé lang luí, jung hkgangmó é matú, haû Íwa Garai Gasang lé, hkâ-nhám le jeju hkya-ôn nyí keq.

²¹ Hkrisduq lé hkungga hpautap é myit eq, rayuq eq rayuq hpautap lhúm nyí keq.

Myi Eq Làng

²² Ikun myhí pé ê, haû Yhumsing uphkang é dōng chāng é su, nungmoq é ikun hpò pé uphkang é dōng chāng nyí keq.

²³ Hkâsu mù gâ le, Hkrisduq gi, haû noqkuq hpúng é ulhum nghut é su, haû ikun hpó gi, ikun myhí é ulhum nghut nyí ri; Hkrisduq gi, haû Yhāng gungdu nghut é noqkuq hpúng lé hkyi yù Sù nghut ri.

²⁴ Haû noqkuq hpúng gi, Hkrisduq uphkang é dōng chāng é su, ikun myhí pé le, hkyô hkat hkgangmó má, yhangmoq é ikun hpò pé uphkang é dōng chāng nyí rá lhê.

²⁵ Ikun hpò pé ê, Hkrisduq gi, haû noqkuq hpúng lé chyitdap luí, hau é matú Yhānggùng lé Yhang ap pyām é su, nungmoq é ikun myhí pé lé chyitdap nyí keq.

²⁶ Yhang haû su kut é gi, haû noqkuq hpúng lé, mungdang dōng wui má chí pyām luí, lhoq sân-yúng yú rá eq,

²⁷ haû noqkuq hpúng gi, agè agaú é eq a-ká akōng é hkyô haí le a bo é za, mara hún rá hkyô a bo é eq chyoiyúng é, hpungwup shingkang bo é noqkuq hpúng dōng, Yhānggùng lé wó ap byi rá matú nghut lhê.

²⁸ Haû eq rajung za, ikun hpò pé gi, yhangmoq é ikun myhí pé lé, yhumsing gungdu lé su chyitdap rá dut lhê. Yhumsing é ikun myhí lé chyitdap é sù gi, yhumsing gùng lé le, chyitdap é sù nghut bē.

²⁹ Ó yuq le, yhumsing gùng lé a chyitdap a kut é za, Hkrisduq gi, haû noqkuq hpúng lé kut byi nyí é su, yhumsing gùng lé byi tso byi huq luí, rago wú zúng nyí é nghut lhê.

³⁰ Hkâsu mù gâ le, nga-nhúng gi, Yhāng é gungdú é gungsho showui showang pé chyat nghut lhê.

³¹ Haû mù, "Hau é yanmai, yuqgè gi, ínu íwa eq gang luí, yhangmyi eq zùm-yap mù, yhangnhik í yuq gi, gungsho ralhūm za dut kó rá nghut lhê." ✧ gâ tō ri.

³² Haû hkyô gi, gyai yhang zaú tō é hkyô nghut ri. Nghut kōlhāng, ngò gi, haû Hkrisduq é hkyô eq noqkuq hpúng é hkyô lé taí nyí é nghut lhê.

³³ Haù mù, nungmoq yuq hkanmó gi, yhumsing gùng lé chytidap é su, yhumsing é ikun myhí lé le chytidap rá dut lhê; haù ikun myhí le, yhâng é ikun hpó lé hkungga rá dut lhê.

6

Zo Wuí Eq Mó Wuí É Hkyô

¹ Zoshâng wuí ê, haù Yhumsing má, nungmoq é mó wuí é jìno gyo keq; hkâsu mù gà le, haù gi, kut gíng é hkyô nghut ri.

² "Náng é ìnu ìwa lé hkungga aq.

³ Haù jáng, nàng, nyì ngón yuqyò mù, myidàm htoq má náng é asak chyungxe hing nyì rá nghut lhê. [✧] gá é dang gi, danggidiq lom é sâng-hí lhum hkunmó nghut ri.

⁴ Ìwa pé ê, nungmoq é zo wuí lé nhikjum a lhoq yô é za, haù Yhumsing é mhoq kyo hkyô eq mhoqshit lhoq pun hkyô òng yhangmoq lé baù kô nyi keq.

Jùn Pé Eq Junsing Pé É Hkyô

⁵ Jùn pé ê, nungmoq gi, Hkrisduq é jìno gyô é su, gyuq hkunggâ é eq lhumzúi é myit mai, nungmoq é myidàm htoq má é junsing pé é jìno gyo keq.

⁶ Nungmoq gi, yhangmoq é hí má za, myoqdong ho é òng kut é a nghut é za, Hkrisduq é jùn pé su, Garai Gasang ô nau é hkyô lé, nungmoq é i-myt unghkaù mai châng kut nyi keq.

⁷ Byù lé za dojaù é òng a nghut é za, haù Yhumsing lé dojaù nyi é òng le, shirông myit eq dojaù nyi keq.

⁸ Hkâsu mù gà le, jùn nghut nghut, luthkyô wó sù nghut nghut, ge é hkyô kut nyi é nghut jáng, haù Yhumsing gi, yuq hkanmó lé shigyaù rá nghut é lé, nungmoq sê nyi lhê.

⁹ Junsing pé ê, nungmoq le, nungmoq é jùn pé lé haù eq rajung za kut byì nyi keq. Yhangmoq lé hkâkyuq zo kó; nungmoq sê é eq rajung za, yhangmoq eq nungmoq é Yhumsing hpó gi, mauhkúng htoq má nyi é nghut luí, Yhang gi, myoqdong hkyin é hkyô a bo é sù nghut lhê.

Garai Gasâng É Gyè Hking

¹⁰ Ló htâng má, taí nau é hkyô gi, haù Yhumsing eq Yhâng é hpungwup a-tsam mó má wum-o bo nyi keq.

¹¹ Haù nat Tsadán wá òng é hpaqchyí pé lé, nungmoq wó he-ngik pyám kó sháng gaq, haù Garai Gasâng é gyè hking banshoq lé wut to keq.

¹² Hkâsu mù gà le, nga-nhúng gi, gungsho eq sui lé htuq htíng é bang a nghut é za, haù uphâng bang, ahkáng ayá wó bang, mauchut tuq dut é mingkan shi é a-tsam pé eq mauhkúng htoq tsáng myhâng má é agè ashop é byò eq sêng é wum-o pé lé, htuq htíng é bang ru nghut lhê.

¹³ Haù mù luí, Garai Gasâng é gyè hking banshoq lé wut to keq; haù hkùn sheq, nungmoq gi, agè ashop hkyô jé é buinyi má, yhumsing jowò má wó yap gíng to mù, hkyô hkat hkanmó lé ban kut jáng, wó yap gíng tít nyi kó rá nghut lhê.

¹⁴ Haù mù, nungmoq é hpyidum má tengmán hkyô hpyihit hit mù, òngmán hkyô wànggò-long lé gò luí,

¹⁵ nungmoq é hkyî má gi, haû simsaq hkyô byî é gabú danglù hkô râ rì rì kut to mù, ging ging yap nyi keq.

¹⁶ Hau htoq agó, haû agè ashop su é myidug é myoshi lunglhang lé wó sat ung pyám râ matú, lumjing hkyô nghu é golong lé chung to keq.

¹⁷ Hkyi yù hkyô shamtoq muq lé tsûng to luí, Garai Gasâng é mungdang nghut é, haû Woi-nyí é sâm lé wun chûng keq.

¹⁸ Ahkying hkangmó má, kyûdung dang eq dúng tôngbán é dang ajung jûng èq, haû Woi-nyí má kyûdung nyi luí, machya nyi uchyang, sân-yúng bang banshoq é matú, hkâ-nhám le, xoq xoq kyûdung byí nyi keq.

¹⁹ Haû gabú danglu é yanmai, shamtoq-tui hut hui é lagyo rayuq ngò nghut nyi kôlhang, haû gabú danglù nghut é zaú tô é hkyô lé, a gyuq a wàm wó taí kyo luí,

²⁰ ngò taí râ dut é lé, a gyuq a wàm wó taí sân kyo shoq, ngá nhut hpóng hkangmó, ngò taí râ mungdang pé lé byi sháng gaq, ngá é matú le, kyú bo dung byí nyi keq.

Shi-kyám Dang

²¹ Haû Yhumsing má, chyitdap é gumang eq lhumzuí é dui-nhâng zoshâng nghut sù, Tuhkiku gi, nungmoq lé jung hkangmó taí kyo râ nghut luí, ngò hkâsu nghut nyi é hkyô eq haí kut nyi é hkyô lé, nungmoq wó sé kó râ nghut lhê.

²² Ngamoq hkâsu nghut nyi é hkyô lé, nungmoq wó sé râ eq, yhang, nungmoq lé myit wum wó byi râ matú za myit myoqbyù luí, yhang lé, ngò, nungmoq chyáng nhang kat é nghut lhê.

²³ Íwa Garai Gasang eq Yhumsing Yesuq Hkrisduq chyáng má é lumjing hkyô má bo é chyitdap myit eq nguingón hkyô gi, haû gumang wui chyáng ru joq nyí sháng gaq ô!

²⁴ A dat htùm é chyitdap myit mai, nga-nhûng é Yhumsing Yesuq Hkrisduq lé chyitdap é lunglhang bang chyáng, Garai jeju gi, ru joq nyí sháng gaq ô!

HPILIPÍ Pê Chyáng Hun Kat é Laiká (Philippians)

¹ Hkrisduq Yesuq é jùn nhik, Poluq eq Timohti gi, Hpilipi wà mó má nyi é, Yesuq Hkrisduq má sân-yúng bang lhunglhang eq, hpúng-up, hpungte pé lé, dang kyô kat lhê.

² Nga-nhúng é Íwa Garai Gasang eq Yhumsing Yesuq Hkrisduq chyáng má é jeju eq nguóngon hkyô gi, nungmoq chyáng ru joq nyí sháng gaq ô.

Jeju Hkya-ôn É Hkyô

³ Ngò gi, nungmoq lé myit bún kat hkangmó, ngá é Garai Gasang lé jeju hkya-ôn nyi lhê.

⁴ Ngò gi, kyúdung hkangmó, hkâ-nhám le nungmoq banshoq bâng é matú gabú myit eq dung byí nyi lhê.

⁵ Hkâsu mù gâ le, nungmoq gi, sâng-hí nyí mai ahkuí jé shoq, gabú danglù má ngò eq chôm zùm yap nyi é yanmai nghut lhê.

⁶ Haú nungmoq má ge é muzó kut hi é sù Garai Gasang gi, Yesuq Hkrisduq é buinyi jé shoq muzó haú lé lhoq pán rá nghut lhê nghú, ngò hkyak myit lum tô lhê.

⁷ Nungmoq banshoq bang gi, ngá é i-myt má bo to bê bang nghut é yanmai, nungmoq banshoq bang eq séng luí, ngò shí dông myit nyi é gi, gíng lhê; hkâsu mù gâ le, ngò kyum hut huí tô é u lé le, haú gabú danglù hkyô lé tai húng luí, lhoq gíng é u lé le, nungmoq gi, ngò eq rahá Garai Gasang jeju chôm hkâm yu é bang nghut lhê.

⁸ Hkrisduq Yesuq é chyitdap myit dông, nungmoq banshoq bang lé, ngò hkâ-í myit chyit nyi é hkyô lé, Garai Gasang gi, ngá é saksé nghut lhê.

⁹ Hau htoq agó, nungmoq gi, je ge é hkyô lé dat gam hkoq mù, Hkrisduq é buinyi má sanséng luí mara a bo é za,

¹⁰ Garai Gasang é hpungwup shingkang eq hkya-on kungtôn hkyo é matú, Yesuq Hkrisduq é yanmai lo é dingmán hkyo é ashi wó byíng nyí sháng gaq nghú le;

¹¹ nungmoq é chyitdap myit gi, tengmán é hpaqchyí eq wó sê é nyan banshoq má je riyhang kô jat lò sháng gaq nghú le, ngò kyúdung nyi lhê.

Dui Nyi Le Gi, Hkrisduq É Matú

¹² Gumang wui é, ahkuí ngò nungmoq lé sé nhâng nau é hkyô gi, ngò má hái dut lai lò bê hkyô pé gi, gè gè yhang gabú danglù ríng jat lò rá matú dut lò bê nghut ri.

¹³ Hau é yanmai, haú khokhâm-wâng zúng é lhunglhang bang eq gotú banshoq bâng é hí má, Hkrisduq é yanmai ngò kyum hut huí é hkyô, de de dut htoq bê nghut ri.

¹⁴ Hau htoq agó, ngò htóng lúng é yanmai, haú Yhumsing Yesuq má gumang wui nghut é myo mi-myó gi, myit wum wó yú kômù, Garai Gasang é mungdang lé, je riyhang a gyuq a kyum wám hko kyo bekò nghut ri.

¹⁵ Gè gè yhang byù ra-am gi, Hkrisduq é hkyô lé manon é myit eq lú lhum bat zik é myit mai hko kyô nyi bum akô. Nghut kôlhang, byù ra-am gi, ge é myit mai hko kyô bum akô nghut ri.

16 Ge é myit mai hko é bang gi, gabú danglù lé hùng rã matú ngo lé hkyin é hkyô lé, yhangmoq sé kômù, chyitdap myit èq hko kyô é bang nghut akô.

17 Haù gòbang chyaù gi, sansêng é i-myt eq a nghut é za, ngò kyum wut é hkyô má wuìhke jamjau jat byi rã matú, myit nyi bùm kô é nghut mù luí, Hkrisduq é hkyô lé yhumsing é wuizat é dông za, hko taí nyi bum akô nghut ri.

18 Nghut kôlhang, haù gi, haí rã ri lhú? Yhumsing wuizat é dông hko é nghut nghut, tengmán é dông hko é nghut nghut, hkyô hkat hkangmó má Hkrisduq é hkyô lé hko pyo kat é nghut mù luí, ngò gi, hau é yanmai, gabú nyi lhê.

Gè gè yhang, ru gabú nyi shirà nghut lhê.

19 Hkâsu mù gã le, nungmoq kyúdung byí é eq Yesuq Hkrisduq é Woi-nyí garúm é yanmai, ngò má dut lai lò bê hkyô gi, ngò wó luthkyô dut rã nghut é lé ngò sé lhê.

20 Ngò myit láng tô é eq myit myoqbyù tô é má, ngò gi, hoq nó haí a rá é za, hí hkun lhê su, ahkuí le, dui nyi kôlhang, shi byuq kôlhang, gyuq kyum myit a bo é hkyô lé wó yù mù luí, Hkrisduq gi, ngá gùng má hkya-on waq toq é hui rã nghut lhê.

21 Hkâsu mù gã le, ngò, asak dui nyi le gi, Hkrisduq é matú, shí jáng gi, ngá e amyat nghut ri.

22 Nghut kôlhang, ngò gi, gungsho má rú dui nyi mù, ngò kut é muzó má ashí zuí lo é nghut le gi, hká lhum lé sheq hkyin yu le gè rã lhú?

23 Ngò gi, hkyô í hkat gyoro má hká hpyang le a hkup dut tô ri; shi ló luí Hkrisduq eq rahá nyi rã lé gi, ngò ô nau ri, hkâsu mù gã le, haù gi, je ge é hkyô nghut ri.

24 Nghut kôlhang, ngò gungsho má dui nyi le gi, nungmoq é matú akyú je bò rã nghut lhê.

25 Haù mù, ngò gi, shí hkyô lé hkyak myit lum to luí, lumjing hkyô má nungmoq kô jat lo é eq gabú nyi rã matú, nyi gyó luí, nungmoq lhunglhang bang eq nyi nyi rã hkyô lé, ngò sé lhê.

26 Haù mù luí, ngò nungmoq chyáng dum jé lé é hkún, ngá é yanmai, Hkrisduq Yesuq má nungmoq é gabú hkyô gi, je riyhang jat lò rã nghut lhê.

27 Haí wà dut kôlhang, nungmoq gi, Hkrisduq é gabú danglù eq gingdán é dông nyiyap keq. Haù jáng, ngò, nungmoq chyáng jé mù huí lhùm é hkún nghut nghut, we gang lhum tô é hkún nghut nghut, nungmoq gi, woi-nyí ralhum má za yap ging to mù, haù gabú danglù lé lumjing hkyô má, i-myt rahkat zã èq shikut nyi kô é hkyô lé le;

28 nungmoq gi, hká hkyô má nghut kôlhang, gyè pè èq kyuy zô é lé a gyuy lò kô é hkyô lé le, ngò sé rã nghut lhê. Haù gi, yhangmoq é matú htên byoq hui rã kumlhá dut lò bê nghut lhê; nghut kôlhang, nungmoq gi, hkyi yù hui rã nghut lhê. Haù gi, Garai Gasang kut é nghut lhê.

29 Hkâsu mù gã le, Hkrisduq má wó lumjing rã é jeju za a nghut, Yhang é matú wuìhke jamjau hui rã jeju le, nungmoq hkam yù bekô nghut ri.

30 Haù gi, hí hpyang nungmoq ngò má myang wú é eq, ahkuí nungmoq ngá é hkyô lé wó gyô wú é, ngò hui zô é jamjau hkyô eq rajung za nghut nyi ri.

2

1 Hkrisduq eq rading ralhüm za nghut nyi é yanmai, myit wum byî é hkyô, Yhâng é chyitdap myit mai nhik tîng é hkyô, Woi-nyî eq züm yap é hkyô, nú-nhâm é myit eq shogyo nhikmyîn é hkyô rajung jung lé, nungmoq wó yu é nghut le gi,

2 nungmoq gi, haü i-myt huî é hkyô rahkat za, chyitdap myit rajung za, myit nhikhüm eq myit é hkyô má ralhüm za kut nyi é dông, ngá é gabú hkyô lé, byîng jup nhâng keq.

3 Yhumsing é wuízat é dông le, akôm gyáng pyâm é dông le, haî le a kut é za, myit lhoq nyhum nyî mù, góbang gi, nungmoq htoq má je gyaü lhê nghû myit yu nyî keq.

4 Nungmoq yuq hkangmó gi, yhumsing eq sêng é lé za a nghut, góbang eq sêng é lé le, myit byi râ lhê.

5 Hkrisduq Yesuq má bo é myit yhang, nungmoq chyáng bò râ dut lhê.

6 Yhang gi, Garai Gasang su roq za nghut nyî kôlhang, Garai Gasang eq rawui za nghut é hkyô lé lú zing nyî râ matú a myit é za,

7 Yhânggùng lé lhoq gôm pyâm luî, dui-nhâng zôshang é gunghkyâng lé yu chûng mù, xângzo byü gùng roq lé dut bê nghut ri.

8 Xângzo byü rayuq dông nghut nyi é hkûn, Yhânggùng lé Yhang lhoq nyhum pyâm luî,

haü tapzîng htoq má lháng tap sat pyâm é hui shoq jîno gyô ri.

9 Haü mù luî, Garai Gasang gi, Yesuq é myîng lé mauhkûng htoq mâ é hkyihput,

myidàm htoq mâ é hkyihput eq moming mâ é hkyihput hkangmó htuq pái luî,

10 haü Íwa Garai Gasâng é hpungwup shingkâng é matú, Yesuq Hkrisduq gi, Yhumsing nghut lhê nghû,

nhut shô hkangmó yín yû sháng gaq ga,

11 myhang htâng é jowô má Yhang lé lhoq toq tô é eq, myîng lhunglhâng é htoq má gyaü é myîng haü,

Yhang lé byî to bê nghut ri.

Kyî Pé Su Duqbó Nyî Râ Hkyô

12 Haü mù luî, ngò chyitdap é luzúm wuí ê, nungmoq gi, hkâ-nhám le jîno gyô nyi é eq rajung za, ngò, nungmoq eq rahá nyi é u lé su za a nghut, ngò eq wê gâng tô é hkûn le, nungmoq hkyi yù hui bê hkyô lé, gyai gyuq hkunggâ é myit eq je riyhang lhoq htoq nyî keq.

13 Hkâsu mù gâ le, Garai Gasang gi, Yhang ô nau é hkyô lé, kut nau râ myit eq wó kut râ hkyô lé nungmoq má lhoq htoq byî nyi é sù nghut lhê.

14 Haî kut kôlhang, taî put lhûm é dông, haü a nghut jáng, dang jet jet lhûm é dông hkâkut kó.

15 Haü jáng sheq, myit goí é, agè ashop é pyat hkaü má, nungmoq gi, mara a bo é, sân-yúng é, shut hkyô a bo é, Garai Gasâng é yhangzô pé dut kó râ nghut lhê.

16 Hau htoq agó, nungmoq gi, asak mungdang lé chung htoq uchyang, mauhkûng mâ é kyî pé su, yhangmoq chyáng wó duqbó nyî kó râ nghut lhê. Haü hkûn, ngò gi, ajè a din pyâm é, a nghut jáng, muzó lé akôm a zui pyâm é yanmai, Hkrisduq é buinyî má gumrông jowô wó berâ nghut lhê.

17 Nghut kôlhang, ngò gi, shuq jung hkungga* ralhum su, nungmoq é lumjing myit mai nhongjaú byí é shigu hkungga ahtoq má hut gyún pyâm é hui le lhang, gabú luí, nungmoq banshoq bang eq rahá chôm gabú nyi lhê.

18 Haú eq rajung za, nungmoq le gabú luí, ngò eq rahá chôm gabú nyi rá dut lhê.

Timohti Eq Epahprodi Nhik Lé Nhang Kat Râ Gà É Hkyô

19 Ngò gi, nungmoq chyáng Timohti lé hân za wó nhang kat râ lé, haú Yhumsing Yesuq má myit myoqbyu nyi lhê; haú hkûn sheq, nungmoq eq sêng é ludang lé ngò wó sé jáng, ngò myit ngón râ nghut lhê.

20 Nungmoq é hkyô lé, yhang su hkyak za ge myit chiq byí é byù gotú rayuq le ngò a wó.

21 Hkâsu mù gà le, yuq du jup gi, Yesuq Hkrisduq eq sêng é hkyô lé a nghut é za, ó le ó eq sêng é hkyô lé za ho nyi bum akô nghut ri.

22 Yhang kúm gi, zo rayuq mai íwa lé htuqbâng é su, haú gabú danglù hkyô má ngò eq rahá dojaú é yanmai, yhâng lumluq é hkyô tún shit é lé, nungmoq sé nyi lhê.

23 Haú mù luí, ngò gi, ngò má hkâsu dut râ lé sê é hkûn yhang, yhang lé nhang kat râ matú ngò myit myoqbyu nyi lhê.

24 Hau htoq agó, hkâ-myháng a myáng má, ngò yhang le nungmoq chyáng wó jé nhâng râ nghut lhê nghû, haú Yhumsing má hkyak lum nyi lhê.

25 Nghut kôlhang, ngò gi, ngá é gumang hpó le nghut mù, mù zui luzúm eq sarhé luzúm nghut é, ngò râ é hkyô má wú gon byi rá matú nungmoq nhang kat é, nungmoq é gunglik le nghut é sù, Epahprodi lé nungmoq chyáng dum nhang taú kat byi rá lhê nghû, ngò myit hpyit to bê nghut lhê.

26 Hkâsu mù gà le, yhang gi, nungmoq lhunglhâng bang lé myàng nau nyi é za a nghut, yhang no é hkyô lé nungmoq wó gyo bekô nghut é yanmai, gyai yhang myit myo myit chiq nyi ri.

27 Gè gè yhang, yhang gi, aluq shoí shí shoq no pyâm é nghut lhê. Nghut kôlhang, Garai Gasang gi, yhang lé shogyo nhikmyín yu ri; yhang lé baú a nghut, ngò yón htoq yón a dut nyi rá matú, ngo lé le shogyo nhikmyín yu ri.

28 Haú mù luí, yhang lé nungmoq lhom dum myàng jáng, nungmoq myang gabú rá matú le, ngò yón é hkyô yom ló byuq rá matú le, yhang lé ngò hân hân nhang kat byí nau ri.

29 Nungmoq gi, gyai yhang gabú é myit èq, haú Yhumsing má yhang lé lhom hkúlum yù mù, yhang su dut é bang lé hkungga keq.

30 Hkâsu mù gà le, yhang gi, ngo lé nungmoq a wó garúm é hkyô lé garúm rá matú, yhâng é asak lé lhang a ha loshoq kut mù, haú Hkrisduq é muzó é yanmai, aluq shoí shoí shi é hui zô ri.

3

Gungsho Má Lumhkaú Râ Hkyô A Joq

1 Hau htoq agó, ngá é gumang wui ê, haú Yhumsing má gabú nyi keq! Rajung zâ é hkyô lé, nungmoq é matú dum puq ká byi rá gi, ngò má wui é hkyô haí a joq, nungmoq é matú akyú dut rá matú sheq ru nghut lhê.

* 2:17 *Shuq jung hkungga* gà é gi, tsibiyiq wing ragóm lé myl htoq má hut pyâm é dông Garai lé gyuq hkunggá é hkyô lé tún shit é nghut lhê. Bun zo shí má shí hkâm é hkyô lé taí nau é nghut lhê.

² Haû, hkuí pé lé le; agè ashop é muzó jizó kut é bang lé le; gungsho yâm é bang lé le; sidiq nyi keq.*

³ Hkâsu mù gà le, Garai Gasâng é Woi-nyí eq noqkuq é bang, Hkrisduq Yesuq má gabú gumrong nyi é bang, gungsho má a lumhkau é bang, nga-nhúng gi, ahpyo-kuq hpyit hkam yu é bang akying† nghut lhê.

⁴ Ngò kúm gi, gungsho má lumhkaû râ hkyô wó ang sù nghut lhê.

Góbang rayuq yuq, haû gungsho má lumhkaû râ hkyô wó âng lhê ga myit é nghut le gi, ngò gi, je riyhang wó sù nghut lhê.

⁵ Ngò gi, hkuí lé é htâng shit nyí nghû râ nyí má ahpyo-kuq hpyit bê sù; Israelaq amyû mâ é, Ben-yamyin é awut ashín nghut sù, Hebre byù mâ é Hebre rayuq nghut lhê; jep é tarâ dông ga jang, ngò gi, Hparishe rayuq nghut lhê;

⁶ shirong é hkyô eq séng luí ga jang, ngò gi, haû noqkuq hpúng lé zing-rí wú bê nghut lhê; jep é tarâ mâ é dingmán hkyô eq séng luí ga jang, ngò gi, shut é hkyô a bo wú sù nghut lhê.

⁷ Nghut kôlhang, ngá é amyat nghu é pé lhunglhang gi, ahkuí, Hkrisduq é yanmai sùm byuq é chyat nghut bê nghû myit yù bê nghut lhê.

⁸ Hau htoq agó, ngò gi, ngá é Yhumsing Hkrisduq Yesuq lé wó sê é ko dik é jeju lé sôn kat jáng, jung hkangmó lé buzaq dông myit yù bê. Hkâsu mù gà le, lhunglhang lé ngò tô pyám é gi, Yhang é yanmai nghut lhê.

⁹ Ngò gi, Hkrisduq lé wó yù râ eq, Yhang eq rahá wó nghut nyí râ matú, haû jung hkangmó lé buzaq nghû myit yu pyám bê. Garai Gasâng chyáng mai lo é dingmán hkyô lé ngò jep é tarâ dông wó ho yu é a nghut, Hkrisduq lé lumjing é yanmai za wó yu é ru nghut lhê; haû gi, lumjing myit mai wó é nghut lhê.

¹⁰ Ngò gi, Hkrisduq lé le, Yhang dui toq hkyo é hpungwup a-tsam lé le, Yhang hpuzó é hkyô má wó zùm yap râ lé le, Yhang shi hkâm é hkyô lé wó châng râ lé le, sé nau ri.

¹¹ Haû jáng gi, ngò le, shi byuq bê mai dum dui toq é hkyô lé wó myoqbyu râ nghut lhê.

Myit Myoqbyu Tô É Jowò Shut Din Nyi Râ Hkyô

¹² Ngò gi, haû pé banshoq lé wó gù bê le a nghû nàu, ngò gumjup gù bê le a nghû nàu. Nghut kôlhang, Hkrisduq Yesuq gi, ngo lé lhom yù bê eq rajung za, ngò gi, haû lé wó lhom yù sháng gaq nghû, châng hkat nyi lhê.

¹³ Gumang wui ê, ngò yhang ngò gi, haû lé wó hap yù bê nghû a myit; nghut kôlhang, ngò kut é muzó ralhumm gi, nunghtáng mâ é lé tô-myhí pyám mù, myoq hí mâ é lé wó yù shoq nghû shikut luí,

¹⁴ Hkrisduq Yesuq má Garai Gasâng eq ngò lé ahtoq shut ji yu é chyunghuq lé wó yù râ matú, myoqbyu tô é jowò shut châng hkat din nyi lhê.

¹⁵ Gumjup bê bang nga-nhúng lhunglhang gi, haû sù é myit bò râ lhê. Rajung jung má nungmoq myit é hkyô shai nyi kô é nghut le gi, haû lé le, Garai Gasang gi, nungmoq lé san za tân shit râ nghut lhê.

¹⁶ Hká dông nghut kôlhang, nga-nhúng gi, ahkuí jé shoq châng nyi bê hkyô eq rajung za châng kut nyi sháng.

¹⁷ Gumang wui ê, nungmoq gi, ngò kut é dông chôm kut nyi keq, ngamoq mai nungmoq lé kut shit é alik eq rajung za châng é bang lé wú yù keq.

* **3:2** Bun zo shi lhum gi, ahpyo-kuq hpyit hkyô má noqzuq nyi é bang lé taí nau é nghut lhê. † **3:3** Ahpyo-kuq hpyit hkam yu é bang akying gà é gi, Garai Gasâng é yhangzo hkyak nghut bê bang lé gà lhê.

¹⁸ Hkâsu mù gâ le, hí hkûn ngò, nungmoq lé anum num taí kyô wú luí, ahkuí lhang, ngaù byí eq dum taí kyô é eq rajung za, Hkrisduq é tapzîng lé gyè kut é bang myo myo nyi bum akò nghut ri.

¹⁹ Yhangmoq é jîhtúm gi, htên byoq hkyô nghut ri; yhangmoq é garai gi, yhangmoq é wamdau nghut ri; yhangmoq é aróng gi, yhangmoq hoq hpu hkyô nghut ri. Yhangmoq é i-myt gi, mingkan zé htoq má za nghut ri.

²⁰ Nghut kôlhang, nga-nhùng é yhummau gi, mauhkúng mingdán má nghut lhê. Nga-nhúng gi, haú mã é Yhumsîng Yesuq Hkrisduq gâ é hkyi yù Sù lé, myoqbyu láng nyi é bang nghut lhê.

²¹ Yhang gi, jung hkangmó lé, Yhang uphkang é a-ô má wó kut tô é Yhâng é a-tsâm eq nga-nhùng é htên byoq sê é gungdu lé htaí lhik pyám byi luí, Yhâng é hpungwup bo é gungdu su dut nhâng râ nghut lhê.

4

¹ Haú mù luí, chyitdap é luzúm wuí le nghut mù, ngò chyitdap bún nghâm nyi é, ngá é gabú jowò eq janmaú nghut nyi é, ngá é gumang wuí ê, haú gi, Yhumsîng má nungmoq hkâsu kut yap gîng nyi râ hkyô nghut lhê.

Lhoq Pun Lhoq Kyîng É Hkyô

² Ngò gi, Uodia eq Suntuki nhik lé, haú Yhumsîng má rayuq eq rayuq myit hui lhùm nyi râ matú, gyai yhang pying kat lhê.

³ Ngá é mù wùn luzúm kyîng ê, ngò gi, myiwe shí nhik lé garúm yù laq nghú, nang lé le dúng tóngbán kat lhê; yhangnhik gi, Klemen eq le, asak jihpán laiká buk má myîng bo é, ngá é mù wùn luzúm wuí góbang eq le, haú gabú danglù hkyô má ngò eq rahá gyai shikut wú bê sù nhik nghut lhê.

⁴ Haú Yhumsîng má hkâ-nhám le gabú nyi keq! Ngò dum taí lhê, gabú nyi keq!

⁵ Nungmoq nú-nhâm é hkyô, byù banshoq bang lé sé nhâng keq. Haú Yhumsîng gi, chyáng bê nghut ri.

⁶ Haí eq séng luí le, myit hkâ-myo hkâchiq kó; hkyô hkangmó má jeju hkya-on uchang, kyûdùng é eq dúng tóngbán é dông, nungmoq dúng é hkyô pé lé, Garai Gasâng chyáng shít kyô nyi keq.

⁷ Haú hkûn, sé gyô é nyan banshoq htoq má gyaú é, Garai Gasâng é nguingón hkyô gi, nungmoq é myit nhiklum eq nungmoq myit é hkyô lé, Hkrisduq Yesuq má upzúng byi nyi râ nghut lhê.

⁸ Jîhtúm má, gumang wuí ê, tengmán é, hpautap gîng é, dingmán é, sansêng é, wó chyitdap é, hkungga gîng é, haí má nghut kôlhang, aróng wó dik é hkyô rajung jung, a nghut jáng, hkya-on gîng é hkyô rajung jung bo é nghut le gi, haú sù é hkyô pé lé myit nyi keq.

⁹ Nungmoq gi, ngá chyáng mai wó mhoq hkam yù bê hkyô pé, wó gyo wó myang yù bê hkyô pé, haí lé le châng kut nyi keq. Haú hkûn, nguingón hkyô byí é Garai Gasang gi, nungmoq eq rahá nyi nyi râ nghut lhê.

Jeju Bún É Hkyô

¹⁰ Ahkuí kúm gi, ngá é hkyô lé nungmoq dum myit chiq byi kô é yanmai, ngò gi, haú Yhumsîng má gyai yhang gabú nyi lhê; gè gè yhang, nungmoq myit chiq byi nyi kôlhang, haú lé tún shít râ ahkáng a wó kó nghut ri.

¹¹ Ngò ísu nghú taí nyi é gi, ngò má rá é hkyô bo tô é yanmai taí é a nghut, hkâsu mù gâ le, ngò gi, ngò hui mihui má, nhik dik nyi râ matú mhoq yù bê nghut lhê.

¹² Ra châ tô u lé, hkâsu kut râ ngò sê lhê; agùn agó wó u lé, hkâsu kut râ ngò sê lhê; hkyô hkangmó eq dut tô é ahkyo lhum jup má, wam gyi kôlhang, zômut kôlhang, agùn agó wó tô nyi kôlhang, ra châ to kôlhang, myit dik nyi râ hpaqchyî lé ngò wó mhoq yû bê nghut lhê.

¹³ Ngò gi, ngò lé wum-o a-tsam byi sù Hkrisduq é yanmai, hkyô hkat hkangmó wó kut lhê.

¹⁴ Nghut kôlhang, ngò wuîhke jamjau huî nyi é hkûn, nungmoq garúm yû kô é gi, ge é hkyô kut bekô nghut ri.

¹⁵ Hau htoq agó, Hpilipi byu pé nungmoq sê é eq rajung za, haû gabú danglú lé, ngò hkô mù nungmoq wó gyô yu hi é buinyi pé má, ngò Makedoni mau mai htoq ló râ hkûn, haû byî é hkyô eq lhom yu é hkyô má, nungmoq mai lai luî, noqkuq hpúng gotú ralhúmh lhang, ngò lé garúm kat é hkyô a bo é nghut lhê.

¹⁶ Ngò Htesaloni wà mó má nyi tô é hkûn lé lhang, nungmoq gi, ngò ra châ é hkyô lé adàm dàm hûn byi bekô nghut ri.

¹⁷ Ngò gi, chyunghuq chyunghtang lé ho nyi é a nghut, nungmoq mai ashi je myo zuî jat râ matú lé za sheq ho nyi é nghut lhê.

¹⁸ Ngò gi, haî le gúm shoq myang yu é htoq agó, chyân shoq lhang nghut bê. Ahkuî, haû nungmoq hun kat é chyunghuq lé, Epahprodi chyáng mai ngò lhom myang yû luî, ngò má agùn agó nghut nyi bê. Haû pé gi, namngón jung hkungga su, Garai Gasang lé gabú nhang é, hap yù gíng é hkungga ralhúmh nghut ri.

¹⁹ Ngá é Garai Gasang gi, Yhang agùn agó wó sùt nyi é eq rajung za, nungmoq râ é hkyô banshoq lé, Hkrisduq Yesuq má lhoq gúm lhoq jup byi râ nghut lhê.

²⁰ Hpungwup shingakang gi, nga-nhûng é Íwa Garai Gasang chyáng pyat dedu ahtum abyuq ru joq nyî sháng gaq ô! Amen.

Shi-kyâm Dang

²¹ Hkrisduq Yesuq má sân-yúng bê bang banshoq lé bo shi-kyâm byi keq. Ngò eq rahá nyi é gumang wuî gi, nungmoq lé shi-kyâm kat akô nghut ri.

²² Sân-yúng bang banshoq gi, nungmoq lé shi-kyâm kat akô; Kehtaq é yhûm mâ é sân-yúng bang gi, je riyhang shi-kyâm kat akô nghut ri.

²³ Yhumsîng Yesuq Hkrisduq é jeju gi, nungmoq banshoq bang eq rahá ru joq nyî sháng gaq ô!

KOLOSE Pê Chyáng Hun Kat é Laiká (Colossians)

¹ Garai Gasâng eq hkyin yù mù, Hkrisduq Yesuq é lagyo dut sù, ngò Poluq eq nga-nhùng é gumang Timohti gi,

² Kolose wà mó má nyi bang nghut é, Hkrisduq má chyoiyúng bang nghut é, lhumzuí é gumang wui chyáng dang kyô kat lhê. Nga-nhùng é Íwa Garai Gasâng chyáng mà é jeju eq nguóngón hkyô gi, nungmoq chyáng ru joq nyi sháng gaq.

Jeju Hkya-ôn É Eq Kyûdung É Dang

³ Ngamoq gi, nungmoq é matú kyûdung byí é hkùn, nga-nhùng é Yhumsing Yesuq Hkrisduq é Íwa nghut é Garai Gasang lé ayang jeju hkya-ôn lhê.

⁴ Háí mù gà lê, Hkrisduq Yesuq má nungmoq lumjing hkyô eq Yhâng é sân-yúng bang banhoq lé nungmoq chyitdap é hkyô lé, ngamoq wó gyô é yanmai nghut lhê.

⁵ Lumjing myit eq chyitdap myit haú gi, nungmoq é matú mauhkúng htoq má hkong to byí é myit myoqbyù hkyô* mai lo é nghut lhê. Myit myoqbyù hkyô haú lé gi, nungmoq chyáng jé to bê gabú danglù nghut é tengmán mungdang mai, nungmoq wó gyô to gù nghut lhê.

⁶ Nungmoq gi, gabú danglù haú lé wó gyo lui, Garai Gasâng jeju eq sêng é tengmán hkyô lé sê hkyang é buinyi mai, nungmoq chyáng ashi zuí é eq kô myhang nyi bê nghut é eq rajung za, gabú danglù haú gi, mingkan gón má ge é ashi zuí nyi é eq kô myhang nyi bê nghut ri.

⁷ Nungmoq gi, haú hkyô lé, ngamoq é chyitdap byinzùm Epahpra chyáng mai mhoq yu é nghut lhê. Yhang gi, ngamoq é gunglik đông, Hkrisduq é lhumzuí é hpúng mù wùn sù nghut lhê.

⁸ Yhang gi, haú Woi-nyí eq nungmoq lé byí tô é chyitdap hkyô lé, ngamoq lé tai kyo sù le nghut ri.

⁹ Haú nghut é yanmai, ngamoq gi, nungmoq eq sêng é hkyô lé wó gyô é nyi mai, nungmoq é matú ayang kyûdung byí nyi lhê. Garai Gasang ô nau é hkyô lé sé rá hpaqchyí lé, woi-nyí eq sêng é hpaqchyí byéng-yá eq sê gyô é nyan banhoq đông mai nungmoq chyáng lhoq pying byi sháng gaq nghù, Yhâng chyáng kyûdung byí nyi lhê.

¹⁰ Haú su kut kyûdung byí é gi, haú Yhumsing ô nau é hkyô eq gingdán é đông nungmoq asak wó duí lui, hkyô hkangmó má Yhang lé wó gabú nhâng rá matú nghut lhê. Hau đông mai, nungmoq gi, ge é muzó hkangmó má ashi zuí nyi lui, Garai Gasang lé sê é hpaqchyí má kô myhang nyi kó rá nghut lhê.

¹¹ Hau htoq agó, nungmoq gi, Yhâng é hpungwup a-tsam đông mai a-tsam banhoq eq wum-o lhoq kóng byí é huí nyi kó rá nghut lhê. Haú mù, nungmoq gi, gyaí hkam jân é hkyô eq myit hing é hkyô lé, gabú myit mai wó yù kó rá nghut lhê.

* 1:5 Bun zo shí má bo é myit myoqbyù hkyô gi, Yesuq lé tai é nghut lhê.

¹² Maubó é mingdán má, sân-yúng bang eq sêng é muizè lé wó bo hkam yù râ matú, nungmoq lé gingdán nhang é sù haù Íwa lé le, jeju wó hkya-on kó râ nghut lhê.

¹³ Hkâsu mù gà le, Íwa haù gi, nga-nhúng lé, mauchut eq up é hkaù mai hkyi htoq yù luí, Yhang chyyitdap é Yhang Zô é mingdán má shuí hâng é Sù nghut lhê.

¹⁴ Nga-nhúng gi, haù Yhang Zo đông mai, hkyi xe yu é hui mù, yubak mara hkyu pyám byí é hui bê nghut lhê.

Jung Hkangmó É Ushuq, Hkrisduq

¹⁵ Hkrisduq gi, myoq eq a byu-myàng é Garai Gasâng é gungghyâng isâm nghut luí, zomún đông hpan tô é lhunglhang htoq má gyaù é sù nghut ri.

¹⁶ Hkâsu mù gà le, mauhkúng eq myigùng htoq má joq é azíng zê pé, myoq eq byu-myàng é eq a byu-myàng é pé nghut kôle, hkohkâm ayá pé, a-tsam pé, uphâng bang, ahkáng ayá wó bang nghut kôle, lhunglhang gi, Yhâng eq hpan to huí é chyat nghut lhê. Lhunglhang gi, Yhâng é matú, Yhâng eq hpan to huí é chyat nghut ri.

¹⁷ Yhang gi, lhunglhang é hí má é nghut mù, lhunglhang gi, Yhâng é yanmai joq gíng bum é chyat nghut lhê.

¹⁸ Yhang gi, noqkuq hpúng nghu é gungdù é ulhum nghut ri; Yhang gi, jung hkangmó má gyaù dik é ushuq dut sháng gaq ga, sân-hi awang nghut sù eq shi é bang má é hí dui toq é zomún dut sù nghut ri.

¹⁹ Hkâsu mù gà le, Garai Gasang gi, Yhâng é byíng jup hkyô banshoq, Yhang Zo má joq nyi râ lé myit nguì ô nau é nghut mù,

²⁰ haù tapzíng má htoq byí é Yhang Zô é sui đông mai nguingón hkyô kut byí é eq, myigùng htoq má é azíng zê nghut nghut, mauhkúng má é azíng zê nghut nghut, lhunglhang lé, Yhang Zo đông mai, Yhang eq nguingón simsaq hkyô xoq yù bê nghut ri.

²¹ Nungmoq gi, Garai Gasang eq wê gâng é bang dut wú kôluí, nungmoq é agè ashop nyi yap sâmlái é yanmai, nungmoq i-myt má, Yhâng é gyè dut wú bekô nghut lhê.

²² Nghut kôlhang, ahkuí, Garai Gasang gi, nungmoq lé, râ é hkyô a bo é eq mara hùn râ hkyô a bo é za, chyoiyúng é đông Yhâng é hí má shit râ matú, Hkrisduq é gungsho gungdu shí hkâm é đông, nungmoq eq nguingón simsaq hkyô xoq yù bê nghut ri.

²³ Haù gi, gabú danglù mai wó yu tô é myoqbyù hkyô mai a htot byuq é za, kô myhang nyi é eq gingtíng nyi mù, nungmoq é lumjíng hkyô má xoq nyi nyi é nghut jáng sheq dut râ nghut lhê. Gabú danglù shí gi, nungmoq wó gyô wú bê nghut é htoq agó, mauhkúng ô má hpan tô é jung hkangmó lé hko kyô nyi bê nghut lhê. Ngò, Poluq le, gabú danglù hau é dui-nhâng zoshâng dut é nghut lhê.

Noqkuq Hpúng É Matú Poluq Wùn Waq É Hkyô

²⁴ Ahkuí, ngò gi, nungmoq é matú jamjau huí é má gabú lhê; hau htoq agó, Hkrisduq é gungdu nghut é, noqkuq hpúng é matú, râ tô ashí nghut é, Yhang hpuzô é hkyô lé, ngá é gùng má ngò lhoq gumjup yu nyi lhê.

²⁵ Ngò gi, Garai Gasâng é mungdang lé, nungmoq chyáng gumjup shoq hko kyo râ matú, Garai Gasang, ngo lé hun tô é wò mai, noqkuq hpúng hau é mù wùn sù dut é nghut lhê.

²⁶ Mungdang haû gi, gohkûn mai apyat pyat haq tô gyô lo é zaû tô é hkyô nghut kôlhang, ahkuí gi, haû sân-yúng bang lé hpông shit bê nghut ri.

²⁷ Garai Gasang, haû su kut é gi, zaû tô é hkyô hau é agùn agó hpungwup shingkang, tûngbaù pê chyáng hkâsu nghut é hkyô, yhangmoq lé sé nhâng rà matú nghut lhê. Zaû tô é hkyô haû gi, hpungwup shingkang lé myoqbyù é hkyô nghut é, nungmoq má Hkrisduq dui nyi bê hkyô lé gâ é nghut lhê.

²⁸ Hkrisduq má gumjup é dông, byu yuq hkangmó lé wó shuí jé sháng gaq nghû, ngamoq gi, Hkrisduq é hkyô lé taí pyô luí, yuq hkangmó lé, hpaqchyí byéng-yá banshoq èq taí pun taí kyíng é eq mhoqshit nyi é nghut lhê.

²⁹ Ngò, haû-í yhang wó wùn waq shikut é gi, ngò má wum-o a-tsam byíng byíng mù zuí nyi Su é wum-o banshoq èq wùn waq shikut nyi é ru nghut lhê.

2

¹ Ngò gi, nungmoq é matú le, Ladoki wà mó bâng é matú le, ngò eq myoqdong hkyûm a huí wú shí é bang banshoq é matú le, hkâ-í yhang awui ahke shikut nyi é hkyô lé, nungmoq lé sé nhâng nau ri.

² Haû su awui ahke shikut é hkyô gi, yhangmoq, myit má wum-o byí é hui rá eq chyitdap myit má rading ralhùm za wó dut rá matú nghut lhê. Haû hkûn, yhangmoq gi, Garai Gasang é zaû tô é hkyô nghut é, Hkrisduq lé wó sé rá matú, sê gyô é nyan lhunglhang é isut byíng shoq lé wó yú kó rá nghut lhê.

³ Haû Hkrisduq má kúm gi, hpaqchyí byéng-yá eq sumpsé hpaqchyí gâ é sutzé lhunglhang lé tsíng tò ri.

⁴ Nungmoq lé ngò haû hkyô taí kyô é gi, ó yuq le, dang ngón dang ngui èq mhoq hpyoq é dông, nungmoq lé a wó mhaú zo rá matú nghut lhê.

⁵ Hkâsu mù gâ le, ngá gungdu nungmoq eq rahá a nyi kôlhang, ngá é myit gi, nungmoq eq rahá nghut nyi luí, nungmoq shuq shuq tap tap za nghut nyi kô é eq Hkrisduq lé lumjíng é má hkâ-í gíngtíng nyi kô é lé myàng mù, ngò gabú nyi lhê.

Hkrisduq Đông Mai Wó É Gumjup É Asak Dui Hkyô

⁶ Haû mù luí, nungmoq gi, Hkrisduq Yesuq lé Yhumsíng nghû hap yù bekô nghut é eq rajung za, Yhang má asak xoq dui nyi keq.

⁷ Yhang má apùn amyit chún gíng nyi mù, kô myhang lò luí, nungmoq mhoq yù bê eq rajung za, lumjíng hkyô má wum-o lhoq kíng mù, jeju hkya-ôn é hkyô byíng zan nyi keq.

⁸ Hkrisduq chyáng mâ é a nghut é za, mینگkan shí mâ é uphkang tará pé eq xângzo wui é htungli cháng luí, mhaú zô é myit són hpaqchyí eq akyù a bo é dang dông, ó yuq èq le, nungmoq lé a wó shuí ngoq yú kó sháng gaq, sidiq nyi keq.

⁹ Hkâsu mù gâ le, Garai Gasang é gumjup hkyô banshoq gi, Hkrisduq é gungdu hkyangmân má lúng nyi mù,

¹⁰ nungmoq gi, a-tsam bo é banshoq eq ahkáng ayá wó é banshoq é ushuq nghut é Hkrisduq eq séng é bang nghut kômù, gumjup é bang dut bekô nghut ri.

¹¹ Yhang má, nungmoq gi, byu loq èq kut é ahyo-kuq hpyit hkyô dông a nghut é za, ahyo-kuq hpyit é su, Hkrisduq èq yubak gungsho mara lé hkyut séng pyâm é hkyô lé hkam yù bekô nghut ri.

¹² Nungmoq gi, wui-myhup hkâm é hkûn Hkrisduq eq rahá myhup yhùm é hui bekô nghut mù, Yhang lé shi é mai lhoq dui toq yu é, Garai Gasang é

a-tsam lé nungmoq lumjıng kô é yanmai, Yhang eq rahá lhoq dui toq yú é hui bekô nghut ri.

13 Nungmoq é yubak mara pé é yanmai le, nungmoq é yubak gungsho mara lé huı sêng pyâm é a hkam yu é yanmai le, nungmoq shı tó é hkún, Garai Gasang gi, nungmoq lé, Hkrisduq eq rahá asak dui nhâng bê nghut ri. Yhang gi, nga-nhúng é yubak mara lhunglháng lé hkyut pyâm byi luı,

14 nga-nhúng eq shai lhum mù, nga-nhúng lé htuq htıng é, tarâ pé bo é jéyáng râ jihpán lé huı sêng pyâm byi bê nghut ri. Yhang gi, haú lé tapzıng htoq má dok tap pyâm é dıng yu pyâm byi bê nghut lhê.*

15 Haú dıng mai, a-tsam bò bang eq ahkáng ayá wó bång a-tsam lé lang hkyut hkyô pyâm mù, Yhang gi, tapzıng eq yhangmoq lé ung pyâm é dıng, byú pé é hí má yhangmoq lé de de kut to bê nghut ri.

16 Haú mù luı, nàng haı zo haı shuq é yanmai le, noqkuq htıng eq sêng é poi buinyi, Lhoxan Lhosik poi, Bánno buinyi eq séng luı le, nungmoq lé, ó yuq eq le a wó jéyáng kó sháng gaq.

17 Haú pé gi, dut lò râ hkyô pé é wupzo chyat nghut lhê; haú gıng gyıng gi, Hkrisduq yhang nghut nyi ri.

18 Myit lhoq nyhum mhaú é eq maumang lagyô pé lé noqkuq é lé myit ngui é sù ó yuq eq le, nungmoq lé, chyunghuq eq a gıngdán râ dıng hkâkut nhâng kó. Haú su é yuq gi, yhumsıng byu-myang é lé† za tai shikut mù, yhumsıng é gungsho myit mai, akôm yhang nghut é lé gyáng dang tai é sù nghut ri.

19 Yhang gi, Garai Gasang kô myhâng nhang é su, gungđu gón é gungsho showui showang pé eq shogyi pé lé htuqbang byi mù rahá lıng tsıng tó é haú ulhum nghut é Hkrisduq eq xoq é hkyô lé byoq ló nhâng bê nghut ri.

20-21 Nungmoq gi, Hkrisduq eq rahá, mingkan shı mã é tarâ pé eq shı gang bekô nghut le nhıng, haı mù, haú eq sêng lhum nyi ashı kó lhú? "Hkâzui, hkâchyâm, hkâzáng." gâ é tarâ ô má nyi nyi ashı kó lhú?

22 Haú pé gi, waxâng zô wui é hkunmó pé eq mhoqshıt hkyô pé nghut é yanmai, jai chung é hkún, htên byuq râ chyat nghut lhê.

23 Haú sù é tarâ pé gi, yhumsıng yhang noqkuq shikut é, myit lhoq nyhum mhaú é eq gungđu lé gunjáng é pé nghut luı, hpaqchyı byéng-yá bo é su dut kôhang, gungshô é agé ashop yut yut ô nau hkyô lé wó hkúm zıng pyâm rá má, haı akyú a bò nghut ri.

3

Chyoiyúng É Dıng Asak Dui Râ Hkyô

1 Haú mù luı, nungmoq gi, Hkrisduq eq rahá lhoq dui toq é hui bekô nghut jáng, Garai Gasang é loqyo hkyam* má zung tó é Hkrisduq é jowò má joq é, ahtoq mã é azıng zê pé lé myit ô nau nyi keq.

2 Nungmoq gi, myıdám htoq mã é azıng zê lé myit tuı é a nghut é za, ahtoq mã é azıng zê lé myit tuı nyi keq.

3 Hkâsu mù gâ le, nungmoq gi, shı bekô nghut luı, ahkuı, nungmoq é asak gi, Hkrisduq eq rahá, Garai Gasang má haq tó é hui bekô nghut ri.

* 2:14 Yhang gi, haú lé tapzıng htoq má dok tap pyâm é dıng yu pyâm byi bê nghut lhê gâ é gi, Hkrisduq tapzıng má shı hkám byi é hkún, nga-nhúng é yubak mara banshoq lé, Garai Gasang eq hkyut pyâm byi é lé tai nau é nghut lhê. † 2:18 Byu-myang é lé gâ é gi, yhang myit htoq é shıng-rán lé gâ lhê. * 3:1 Loqyo hkyam nghú é gi, ahko ahkáng wó é jowò lé gâ é nghut lhê.

⁴ Nungmoq é asak nghut sù, Hkrisduq htoq shit é hkûn, nungmoq le, Yhang eq rahá, hpungwup shingkang hkaû má htoq shit kó râ nghut lhê.

⁵ Haû mù luí, nungmoq é mingkan hkyô eq sêng é, ashop é dông gungsho zùm yap é hkyô, agot a-û nyi zô lhùm é hkyô, ye lhai nau é hkyô, agè ashop yut yut ô nau é hkyô eq, hparà noq hkyô nghut é myoqnoq hkyô pé hai lé le sat pyám keq.

⁶ Haû hkyô pé é yanmai, Garai Gasâng é nhikmo-yo hkyô gi, jìno a gyo bâng é ahtoq má† jé râ za nghut lhê.

⁷ Lai lò bê hkûn, nungmoq le, haû hkyô pé dông sô wú kô é nghut lhê.

⁸ Nghut kôlhang, ahkuí, nungmoq gi, nhikjum yô é, nhikmo-yô é, agè ashop é dông nò shoq kut é, lumù gansang é eq, nungmoq é nhutwuí mai hkunchoq tái é hkyô shí pé banshoq lé, yhumsing gùng yhumsing tô pyám râ dut lhê.

⁹ Rayuq eq rayuq hkâ-mhaû lhum kó; hkâsu mù gà le, nungmoq gi, nungmoq é byù xau eq byù xau é nyi yap hkyô lé hkyut pyám mù,

¹⁰ byù sik lé tù wut yù kô é nghut lhê; byù sik haû gi, sumsé hpaqchyí dông mai, yhang lé hpân Su é gungdu isâm má asik jat lò nhang é huí nyi ri.

¹¹ Byù sik má gi, Grik eq Yudaq byù nghu é, ahpyo-kuq hpyit hkâm bang eq a hkâm bang nghu é, byù bíng eq byù jum nghu é, jùn eq jùn a nghut sù nghu é a nyi lô é za, Hkrisduq gi, banshoq nghut mù, banshoq má nyi nyi ri.

¹² Haû mù luí, Garai Gasâng eq hkyin yù huí é bang, Yhâng eq gyai yhang chyitdap é huí é chyoiyúng bang dông, shogyo myit, gè hkyô shit é myit, lhoq nyhum é myit, nú nhâm é myit eq myit hing é hkyô pé lé, yhumsing gùng yhumsing mebu su wut to keq.

¹³ Nungmoq yhangchang mara kut shut é hkyô joq é nghut jáng, hkam jan byí lhum luí, rayuq eq rayuq mara hkyut byí lhum keq. Haû Yhumsing gi, nungmoq é mara hkyut pyám byí é su, nungmoq le mara hkyut byi keq.

¹⁴ Haû ge é sâmlai banshoq wó é htoq agó, gumjup é rading ralhum za dut é hkyô má, banshoq lé rahá wó tuí zing tô é chyitdap myit lé puq wut to keq.

¹⁵ Nungmoq gi, nguingón hkyô wó râ matú ji yu é hui bekô nghut mù, gungdu ralhum má é bang chyat nghut bekô yanmai, Hkrisduq é nguingón hkyô lé, nungmoq é myit má up nhang nyi keq. Haû mù, jeju hkya-ôn nyi keq.

¹⁶ Nungmoq, rayuq eq rayuq, hpaqchyí byéng-yá banshoq eq mhoqshit é eq lhoq pun lhoq kyíng lhùm é hkûn le, Garai Gasang lé nungmoq jeju bún é myit mai, jihkyang dang, hkya-on mahkôn, woi-nyí eq sêng é mahkôn pé hkon é hkûn le, haû Hkrisduq é mungdang lé, nungmoq é myit nhikhum má agùn agó bò nhang nyi keq.

¹⁷ Nungmoq hai wá kut kut, dang dông nghut nghut, zui sai é dông nghut nghut, banshoq lé Yhumsing Yesuq é myíng mai kut é hkûn, haû Iwa nghut é Garai Gasang lé Yhang dông mai jeju hkya-on keq.

Hkristan Ikun Byu Pé Nyi Yap Râ Hkyô

¹⁸ Ikun myhí pé ê, ikun hpô pé uphkan é ahkaû má nyi keq. Haû gi, Yhumsing é hí má kut gíng é hkyô nghut lhê.

¹⁹ Ikun hpô pé ê, ikun myhí pé lé chyitdap nyi keq. Yhangmoq lé dang htân hkâ-nyô kó.

²⁰ Zo wuí ê, jung hkangmó má nungmoq é mó wui é jìno gyo keq; hkâsu mù gà le, haû gi, Yhumsing ô nau é hkyô nghut lhê.

† 3:6 *Jìno a gyo bâng é ahtoq má, gà é dang, chyúmding ra-am má a bò nghut lhê.*

²¹ Íwâ pé ê, nungmoq é zo wuî lé myit hkâ-nô nhâng kó, nò nhâng jáng gi, yhangmoq, myit wum gyuî byuq kó rá nghut lhê.

²² Jùn pé ê, hkyô hkangmó má nungmoq é myidàm htoq má é jùn sîng bang uphkang é ahkaû má nyi nyi keq; yhangmoq é myoq hí má za zui sai luî, myoqdong ho é dông a nghut é za, haû Yhumsîng lé gyuq hkunggâ é eq lhumzui é myit mai zui sai nyi keq.

²³ Nungmoq haî wá kut kôle, byu é matú kut é a nghut, haû Yhumsîng é matú kut nyi é dông, nungmoq é myit nhiklhum banshoq eq zui sai nyi keq.

²⁴ Haî mù gâ le, nungmoq gi, haû Yhumsîng chyáng mai, muizé lé chyunghuq dông wó yû kó rá nghut é lé, sé kô é yanmai nghut lhê. Nungmoq dojaú nyi é sù gi, Yhumsîng Hkrisduq ru nghut lhê.

²⁵ Kut shut sù gi, yhang kut shut é marâ matú dam byî é hui zo rá nghut lhê, haî mù gâ le, Garai Gasang gi, myoqdong hkyin é hkyô a joq.

4

¹ Jùn sîng bang ê, nungmoq é jùn pé lé, tengmán é eq gîng âng é dông lajang byî nyi keq; haî mù gâ le, nungmoq le, mauhkûng htoq má Yhumsîng rayuq wó é lé sé kô é yanmai nghut lhê.

Xoq Lui Pying Kat É Hkyô

² Nungmoq gi, kyûdûng é má myit zîng zuq nyi mù, machyâ luî, jeju hkya-ôn nyi keq.

³ Ngò, shamtoq-tui hut huî nyi shoq dut é, Hkrisduq é zaú tô é hkyô lé ngamoq wó taî pyô sháng gaq, Garai Gasang gi, mungdang lé ngamoq taî rá hkyô hkum hpóng byi rá matú kyû bo dung byi kó laq.

⁴ Haû Hkrisduq é zaú tô é hkyô lé, ngò taî âng é dông san za wó taî pyô sháng gaq, kyû bo dung byi kó laq.

⁵ Nungmoq gi, a lumjîng bang eq zùm yap é hkûn hpaqchyî bo nyi keq; wó yu é ahkyîng hkangmó lé rago yhang chung jai keq.

⁶ Nungmoq gi, yuq hkangmó lé hkâsû tú taî rá hkyô wó sé kó shoq, dâng nyo é má, xô êq nghâm nhang é su, hkâ-nhâm le jeju byîng é dang bo nyi sháng gaq.

Ló Htâng É Shi-kyâm Dang

⁷ Tuhkiku gi, ngá hkyô eq sêng é danglù banshoq, nungmoq lé taî kyo rá nghut lhê. Yhang gi, ngá é chyitdap gumang, haû Yhumsîng má, lhumzui é hpûng mù wùn sù eq byinzùm nghut lhê.

⁸ Ngò, yhang lé nungmoq chyáng nhang kat é hkyô gi, ngamoq chyáng dut nyi é hkyô lé nungmoq wó sé rá eq, nungmoq lé myit wum wó byi rá matú nghut lhê.

⁹ Yhang gi, nungmoq chyáng má é nghut é, ngamoq é lhumzui chyitdap é gumang Onesimu eq rahá lé lo é nghut lhê. Yhangnhik gi, shî má dut nyi é hkyô jung hkangmó lé taî kyo kó rá nghut lhê.

¹⁰ Ngò eq rahá htóng lúng sù Aristakuq gi, nungmoq lé shi-kyâm kat ri. Barnaba é yhâng za-aû Markuq le, nungmoq lé shi-kyâm kat ri. (Markuq eq séng luî pying kat é hkyô lé nungmoq wó yû to bê nghut mù, nungmoq chyáng, yhang jé lé é nghut jáng, lhom hkûlum yû keq.)

¹¹ Yustu le gâ é Yesuq le, nungmoq lé shi-kyâm kat ri. Garai Gasâng é mingdán matú ngá é byinzùm mù zui bang má, haû bang za Yudaq byu pé nghut kômù, yhangmoq gi, ngo lé nhik tîng byî é bang nghut akò.

¹² Nungmoq chyáng mâ é byù nghut sù eq Hkrisduq Yesuq é mô wùn sù, Epahpra gi, nungmoq lé shi-kyâm kat ri. Nungmoq gi, Garai Gasang ô nau é hkyô lhunglhang má hkyak lùm to mù, gumjup luí wó gingtíng nyí sháng gaq ga, Yhang gi, ayang nungmoq é matú kyúdung shikut byí nyi ri.

¹³ Nungmoq é matú le, Ladoki wà mó eq Herapoli wà mó bâng é matú le, yhang gi, gyai yhang mù zui shikut byí é hkyô lé, yhang é matú ngò saksé hkâm lhê.

¹⁴ Ngamoq é chytđap chi sará Lukaq eq Demaq gi, nungmoq lé shi-kyâm kat akô nghut ri.

¹⁵ Ladoki wà mó mâ é gumang wui lé le, Numhpa eq yhang yhâm mâ é noqkuq hpúng lé le, bo shi-kyám byi keq.

¹⁶ Laiká shí lé, nungmoq lé nghap kyô é htâng má, Ladoki byu pè é noqkuq hpúng má le nghap nhâng mù, Ladoki wà bâng chyáng hùn kat é laiká lé le, nungmoq nghap wú keq.

¹⁷ "Haù Yhumsing chyáng mai nàng hap yù to bê é muzó lé rago za lhoq pán pyám aq." nghú, Arhkipò lé tai kyo keq.

¹⁸ Ngò, Poluq gi, ngá é loq èq yhang shi-kyám dang shí lé kê kat é nghut lhê. Ngò, shamtoq-tui wut tô é lé bún nyi keq. Jeju gi, nungmoq chyáng ru joq nyi sháng gaq ô.

HTESALONI Pê Chyáng Hî Dàm Hun Kat é Laiká (1 Thessalonians)

¹ Ngò Poluq, Sila* eq Timohti pé gi, Íwa Garai Gasang eq Yhumsing Yesuq Hkrisduq má nghut nyí bê bang, haû Htesaloni wà mó byu pê é noqkuq hpúng lé dang kyô kat lhê. Garaî jeju eq nguingón hkyô gi, nungmoq chyáng ru joq nyí sháng gaq.

Jeju Hkya-ôn É Hkyô

² Ngamoq gi, hkâ-nhám le, nungmoq banshoq bâng é matú, Garaî Gasang lé jeju hkya-on luí, ngamoq é kyûdung dang má nungmoq lé bo dúng lhôm nyí lhê.

³ Nungmoq é lumjín myit mai zui saí é nungmoq é muzó lé le; chyitdap myit é yanmai, nungmoq shikut é hkyô lé le; nga-nhûng é Yhumsing Yesuq Hkrisduq má myit myoqbyu tò é yanmai, nungmoq hkam jân é hkyô lé le, nga-nhûng é Íwa Garaî Gasang é hí má, ngamoq ru bûn nyí lhê.

⁴ Garaî Gasang chyitdap é gumang wui ê, Yhang nungmoq lé hkyin yù bê lé, ngamoq sê lhê.

⁵ Hkâsu mù gâ le, ngamoq é gabú danglù gi, nhutdang dông za nungmoq chyáng jé é a nghut, wum-o a-tsam dông le, Chyoiyúng Woi-nyí dông le, tengmán hkyô byíng jup é dông le, jé bê nghut é yanmai nghut lhê. Ngamoq, nungmoq eq rahá nyí é hkûn, nungmoq é matú hkâsu kut lai lo é hkyô lé, nungmoq sê gù nghut lhê.

⁶ Nungmoq gi, wuihke jamjau myo myo hui zo kôlháng, Chyoiyúng Woi-nyí byí é gabú myit mai, danglù haû lé lhom yù kôluí, ngamoq lé le, haû Yhumsing lé le, alik kut yu é bang dut bekô nghut ri.

⁷ Haû mù, Makedoni mau eq Ahkaia mau mâ é lumjín bang banshoq é alik, nungmoq dut bekô nghut ri.

⁸ Nungmoq chyáng mai, Makedoni mau eq Ahkaia mau má, haû Yhumsing é mungdang hù htoqló e za a nghut, Garaî Gasang má nungmoq lumjín hkyô gi, jowò hkangmó jam ló bê nghut luí, ngamoq gi, haí le taí nó a ra lo nghut ri.

⁹ Hkâsu mù gâ le, ngamoq lé nungmoq hká dông lhom hkulum yu é hkyô lé, yhangmoq yhang, ngamoq lé shit kyo akô. Nungmoq gi, hparà lhô pé lé tô pyám luí, Garaî Gasang shut hkâsu kut lhing lò mù, rû dui nyí é eq tengmán é Garaî Gasang lé dojaú nyí é hkyô lé le;

¹⁰ mauhkung má é haû Yhang Zo lé láng nyí é hkyô lé le, yhangmoq taí kyô akô. Yhangzo haû gi, Yhang eq shi é mai lhoq dui toq yu é hui luí, jé lô ra nhikmó yo hkyô mai nga-nhúng lé hkyi yù sù, Yesuq nghut ri.

2

Poluq, Htesaloni Wà Mó Má Garaî Mú Wùn Waq É Hkyô

¹ Gumang wui ê, nungmoq chyáng ngamoq lé kûm é hkyô gi, akôm a nghut é lé, nungmoq yhang sê lhê.

* 1:1 Sila lé gi, Salwanu le gâ lhê.

² Nungmoq sê é eq rajung za, ngamoq gi, hí hkûn, Hpilipi wà mó má wuîhke jamjau eq rhoi é huí wú bê nghut lhê; nghut kôlhang, nga-nhông é Garai Gasang garúm é yanmai, gyai lhom htuq htîng é hui kôle, Garai Gasâng é gabú danglù lé, a gyuq a kyum nungmoq lé wám tai kyô é nghut lhê.

³ Hkâsu mù gâ le, ngamoq lhoq pun lhoq kyîng é hkyô gi, shut é, a nghut jáng, a sansêng é i-myt dông eq nungmoq lé mhaú zô é dông a nghut e za,

⁴ haú gabú danglù lé chùng gîng é bang ga, Garai Gasâng chyáng mai ahkáng wó é dông za, ngamoq tai é nghut lhê. Ngamoq gi, byu pé lé gabú nhâng rã matú a nghut, ngamoq é myit lé chyam wú nyi é Garai Gasang lé, gabú nhâng rã matú shikut é ru nghut lhê.

⁵ Hkâsu mù gâ le, nungmoq sê é eq rajung za, ngamoq gi, lhoq ngón mhaú é dang le hkâ-nhám a chùng wú, nghop tô é myoqnoq myit le hkâ-nhám a bò, Garai Gasang gi, ngamoq é saksé nghut lhê.

⁶ Ngamoq gi, byu pé mai le, gotù ó yuq mai le hkya-on rã lé ho nyi é a nghut, Hkrisduq é lagyô pé nghut é eq rajung za, nungmoq lé wôlai hún naù jáng wó hun lhê; nghut kôlhang,

⁷ ìnu rayuq, yhang é zoshâng zô pé lé hku baú é su, nungmoq chyáng nú-nhâm é dông nyi lai lò bê nghut lhê.

⁸ Ngamoq gi, nungmoq lé gyai yhang chyitdap luî, Garai Gasâng é gabú danglù za a nghut, ngamoq é asak pé nungmoq lé byi pyâm le lhang nhik dik lhê; hkâsu mù gâ le, nungmoq gi, ngamoq chyitdap dik é bang dut bekô nghut é yanmai nghut lhê.

⁹ Gumang wuî ê, nungmoq gi, ngamoq gyai yhang mù zui shikut é hkyô lé, gè gè bun kô rã nghut lhê; Garai Gasâng é gabú danglù lé, nungmoq chyáng ngamoq hko kyô é u lé, ó yuq lé le, ngamoq mai wôlai a byi sháng gaq nghú, ngamoq gi, nyi lé, myín lé, mũ zuí é nghut lhê.

¹⁰ Ngamoq gi, lumjîng bê bang nungmoq é hí má, hkâsu chyoiyúng é eq dingmán é, mara hún rã a bo é bang dut lai lo é hkyô lé, nungmoq le, Garai Gasang le, saksé nghut lhê.

¹¹ Hkâsu mù gâ le, ngamoq gi, ìwa rayuq mai yhumsing yhangzô pé lé kut byi é su, nungmoq yuq hkangmó lé, myit wum byi nyi é hkyô lé le, nhik tai tîng nyi é hkyô lé le,

¹² Yhang é mingdán eq hpungwup shingkang má, nungmoq lé wut yu é Garai Gasang eq gîngdán é dông, nungmoq asak wó dui nyi sháng gaq nghú, nungmoq lé wum byi nyi é hkyô lé le, nungmoq yhang sê nyi lhê.

¹³ Ngamoq gi, ngamoq chyáng mai nungmoq wó gyô yu é Garai Gasâng é mungdang lé, nungmoq lhom yu é hkûn, byu é dang lé lhom yu é dông a nghut e za, lumjîng é bang nungmoq má mũ zuí nyi é, haú Garai Gasâng é mungdang lé yhang, lhom yù kô é yanmai, Garai Gasang lé xoq xoq jeju hkya-ôn nyi lhê.

¹⁴ Gumang wuî ê, nungmoq gi, Hkrisduq Yesuq má nghut nyi é, Yuda mau má joq é Garai Gasâng é noqkuq hpûng pé lé, alik kut yu é bang dut bekô nghut ri. Noqkuq hpûng haú pé gi, Yudaq byu pé zing-rî é lé hui zô é su, nungmoq le, yhumsing mau mã é byu pé zing-rî é lé hui zô akô nghut ri.

¹⁵ Yudaq byu pé gi, haú Yhumsing Yesuq eq myiqtôí pé lé sat pyâm kôluî, ngamoq lé le hkat htoq akô. Yhangmoq gi, Garai Gasang a ô nau é hkyô kut é bang, byù lhunglhang eq gyê dut é bang nghut akô.

¹⁶ Tungbaù pé hkyi yù hui rã matú, ngamoq hko kyô é hkyô lé, yhangmoq hkûm akô; yhangmoq gi, hkâ-nhám le, yhumsing é mara lé dik shoq haú dông

lhoq jat myô yù akò nghut ri. Haù mù, Garai Gasâng é nhikmo-yô é hkyô gi, yhangmoq ahtoq má jé bê nghut ri.

Htesaloni Byu Pé Lé Poluq Huí Nau Nyi É Hkyô

¹⁷ Gumang wui ê, ngamoq gi, rayoq zo nungmoq eq myoqdong byam gâng to kôle, myit gi, a gâng é nghut lhê; nungmoq lé gyai bun-nghâm nyi lui, wô myang hui shoq nghû, ngamoq gyai yhang shikut nyi lhê.

¹⁸ Nungmoq chyáng ngamoq jé lé nau mù lui, ngò Poluq yhang, adàm dàm shikut wù bê; nghut kôhang, Tsadán gi, ngamoq lé hkùm tang pyâm ri.

¹⁹ Hkâsu mù gà le, nga-nhùng é Yhumsing Yesuq Hkrisduq é hí má, Yhang jé lé é hkân, ngamoq é myit myoqbyù hkyô, gabú hkyô eq gumrông rá janmaú gi, hái jung wá nghut lhê gà le, nungmoq yhang nghut nyi lhê a nghut kó lúhú?

²⁰ Gè gè yhang, nungmoq gi, ngamoq é gumrông jowô eq gabú hkyô nghut nyi ri.

3

¹ Haù mù lui, ngamoq gi, haù lé a wó jân nyi lo jáng, Ahten myuq má ngamoq baú nyi gyó le je gè rá nghut lhê nghû, myit hpyit yù mù,

² wuihke jamjau shí pé é yanmai, ó yuq le, myit a hten kó sháng gaq nghû, nungmoq é lumjing hkyô má, nungmoq lé wum-o byi rá eq myit wum byi rá matú,

³ Hkrisduq é gabú danglù lé hko kyô é hkyô má, ngamoq é gumang eq Garai Gasâng é mù wùn luzúm nghut é Timohti lé, nhang kat é nghut lhê. Nga-nhùng gi, wuihke jamjau pé hui zo rá matú, hkyin to huí é bang nghut é lé, nungmoq yhang rago sê nyi lhê.

⁴ Nga-nhùng gi, zing-ri hui zo rá nghut lhê nghû, ngamoq, nungmoq eq rahá nghut nyi é hkân, noq mai nungmoq lé ngamoq tai kyô nyi gù nghut bê. Nungmoq rago sê é eq rajung za, haù đồng dut bê nghut ri.

⁵ Hau é yanmai, ngò a wó jân nyi lo jáng, haù gunglau sù mai nungmoq lé gunglau yù lui, ngamoq wùn waq bê muzô gi, akôm dut byuq rá le, myit chiq mù, nungmoq é lumjing hkyô lé wó sé rá matú, yhang lé ngò nhang kat é nghut lhê. Gunglau sù gi, nat Tsadán nghut lhê.

Timohti Lo Shit Kyô É Wum Byi Dang

⁶ Ahkuí kúm, Timohti gi, nungmoq é lumjing hkyô eq chyitdap myit eq sêng é gabú danglù pé lé, nungmoq chyáng mai ngamoq chyáng wun jé lô byi bê nghut ri. Nungmoq, hkâ-nhám le, ngamoq lé rago bún nyi é hkyô lé le; ngamoq, nungmoq lé myàng nau nyi é eq rajung za, nungmoq, ngamoq lé myàng nau nyi é hkyô lé le, yhang lo tai kyo bê nghut ri.

⁷ Haù mù lui, gumang wui ê, ngamoq myit myo uhkyí é hkyô eq zing-ri huí é hkyô pé banshoq má, nungmoq é lumjing hkyo é yanmai, nungmoq eq séng lui myit wum byi é hkyô lé ngamoq wó yù bê nghut lhê.

⁸ Ahkuí, ngamoq gi, haù Yhumsing má nungmoq yap ging nyi kô é yanmai, gè gè nyi ngón bê nghut lhê.

⁹ Nga-nhùng é Garai Gasâng hí má, nungmoq é yanmai, ngamoq myang hkam yu é gabú hkyô banshoq lé myit kat wú jáng, ngamoq gi, nungmoq é matú Garai Gasang lé hkâsu kut jeju ùng hkya-on rá lúhú?

¹⁰ Ngamoq gi, nungmoq lé dum myàng rá matú eq, nungmoq é lumjing myit má langhpyut é hkyô lé wó lhoq hkùm byi rá matú, nyi, myín, gyai yhang lhumzui lui kyúdung nyi lhê.

¹¹ Nungmoq chyáng ngamoq lé rã matú, nga-nhùng é Yhumsing Yesuq eq nga-nhùng é Íwa Garai Gasang yhang ngamoq lé hkyô hpóng byi sháng gaq.

¹² Nungmoq lé ngamoq chyitdap nyi é su, haù Yhumsing gi, nungmoq é chyitdap myit lé, rayuq eq rayuq é ahtoq má le, yuq hkgangmó é ahtoq má le, lhoq kô jat, lhoq pying byi sháng gaq.

¹³ Nga-nhùng é Yhumsing Yesuq gi, Yhâng é chyoiyúng bang banshoq eq rahá lé é hkún, nga-nhùng é Íwa Garai Gasang é hí má, nungmoq gi, mara hùn jowò a joq é eq chyoiyúng é bang dut rã matú, nungmoq é myit nhikhum má, haù Yhumsing mai wum-o lhoq kóng byi nyi sháng gaq. Yhâng é chyoiyúng bang gâ é gi, byù lé, a nghut jáng, maumang lagyô pé lé, taí záng lhê.

4

Garai Gasang Ô Nau É Đông Asak Dui Rã Hkyô

¹ Xoq luí taí nau é gi, gumang wui ê, ngamoq gi, ahkuí nungmoq cháng nyi é eq rajung za, nungmoq hká đông nyi yap luí, Garai Gasang lé gabú nhâng rã hkyô nungmoq lé mhoqshit byi bê nghut lhê. Ahkuí le, ngamoq gi, shí hkyô lé nungmoq hau htoq je wó châng jat rã matú, Yhumsing Yesuq má nungmoq lé dùng tôngbán luí, myit wum byi kat lhê.

² Hkâsu mù gâ le, nungmoq gi, haù Yhumsing Yesuq é ahko ahkáng đông, ngamoq mai, nungmoq lé mhoqshit to byi é hkyô pé lé, sê akô nghut ri.

³ Garai Gasang ô nau é hkyô gi, haù nungmoq sân-yúng é hui rã matú le, ashop é đông gungsho zùm yap é hkyô lé koi pyám rã matú le;

⁴ nungmoq yuq hkgangmó gi, haù Garai Gasang lé a sê é, a lumjáng bang kut é su, gungsho yut yut ô nau é hkyô a châng e za,

⁵ haù chyoiyúng é eq hkungga gíng é sù wó dut shoq, yhumsing gùng lé wó hkgang é hkyô mhoq yú rã matú le;

⁶ shí hkyô eq séng luí, ó yuq le, yhumsing é gumang lé, a ge shut, a ge lhungzo rã matú le nghut lhê. Ngamoq, nungmoq lé taí kyo mù, lhoq pun lhoq kying gù nghut bê eq rajung za, haù Yhumsing gi, haù hkyô shut é banshoq lé, dam byi rã nghut lhê.

⁷ Hkâsu mù gâ le, Garai Gasang gi, nga-nhùng lé a sân-yúng é bang dut rã matú wut yu é a nghut, chyoiyúng é đông asak dui nyi rã matú sheq wut yu é ru nghut lhê.

⁸ Haù mù luí, mhoqshit hkyô shí lé he-ngik pyâm é sù gi, byù lé he-ngik é a nghut, haù nungmoq lé, Yhâng é Chyoiyúng Woi-nyi byi tô é sù, Garai Gasang lé he-ngik pyâm é sheq ru nghut lhê.

⁹ Rayuq eq rayuq chyitdap lhum rã matú, nungmoq yhang, Garai Gasang eq mhoqshit é hui bekô nghut é yanmai, gumang yhangchang chyitdap lhum é hkyô eq séng luí, ngamoq gi, nungmoq chyáng kã kat byi a ra lo nghut ri.

¹⁰ Haù eq rajung za, nungmoq gi, Makedoni mau gón mã é gumang wui banshoq lé chyitdap nyi akô nghut ri. Nghut kôlhang, gumang wui ê, haù su je myo kut rã matú nungmoq lé ngamoq wum byi lhê.

¹¹⁻¹² Nungmoq é nyi wui lhê é asak dui hkyô má, gotú byu pé eq hkunggá é wó yú luí, ó yuq lé le, lumhkaù a ra wó dut sháng gaq, hí hkún nungmoq lé ngamoq taí kyô tô é eq rajung za, num num byù zè rã hkyô lé le, yhumsing eq a sêng é hkyô a kut wún rã lé le, yhumsing loq eq zui saí mù nyi rã lé le, nungmoq é myit myoqbyù jowò kut yú keq.

Haù Yhumsing Gyó Lé Rã Hkyô

¹³ Gumang wui ê, myit myoqbyù hkyô a wó é byù góbang su, nungmoq, iyon ningtsáng a dut kó sháng gaq, haù yhup ngón byuq é bang eq séng luí, nungmoq a sé rà lé, ngamoq a ô nau é nghut lhê. Yhup ngón byuq é bang gâ é gi, lumjing luí shi ló byuq é bang lé gâ é nghut lhê.

¹⁴ Hkâsu mù gâ le, Yesuq shí luí, dum dui toq bê hkyô lé nga-nhung lumjing é yanmai, Garai Gasang gi, Yesuq má yhup ngón byuq é bang lé, Yesuq eq rahá shuí lé rà nghut lhê nghù, nga-nhung lumjing é nghut lhê.

¹⁵ Haù Yhumsing taí é dang eq rajung za, nungmoq lé ngamoq taí kyo kôlé, haù Yhumsing dum lé é hkûn, asak dui nyi é eq myit gyo tô é bang nga-nhung gi, yhup ngón byuq bê bâng htoq ratsuí le wó hí rà a nghut.

¹⁶ Hkâsu mù gâ le, haù Yhumsing yhang gi, htê mó hkunmó èq le, maumang lagyo mó é hte èq le, Garai Gasang é tutmó mut hte èq le, mauhkung mai gyó lé lô luí, haù Hkrisduq má shi ló bê bang hí dui toq rà nghut lhê.

¹⁷ Hau htâng, asak dui nyi é eq myit gyo tô é bang nga-nhung gi, yhangmoq eq rahá mhut htoq má shuí toq yu é hui luí, maulat má haù Yhumsing eq hui rà nghut lhê. Haù hkûn, nga-nhung gi, haù Yhumsing eq ahtum abyuq nyi nyi berâ nghut lhê.

¹⁸ Haù mù luí, nungmoq gi, dang shí pé mai rayuq eq rayuq myit wum byí lhùm nyi keq.

5

¹ Nghut kôlhang, gumang wui ê, ahkying buinyi eq séng luí, nungmoq lé ngamoq kâ hùn byi a ra lo nghut ri.

² Hkâsu mù gâ le, haù Yhumsing é buinyi gi, myín lé hkau sù wang é su jé lé rà nghut é hkyô lé, nungmoq rago za sê akô nghut ri. Yhumsing é buinyi gi, Yesuq dum jé lé rà buinyi lé taí nau é nghut lhê.

³ Byu pé gi, 'Nguingón yuqyo ri.' ga taí nyi bùm kô é u lé, gùng lai é myiwe rayuq zohkù-nò no lo é su, htên byoq hkyô gi, byodàn tung yhangmoq chyáng jé luí, hká dông lé yhangmoq wó h pang lut kó rà a nghut.

⁴ Nghut kôlhang, gumang wui ê, nungmoq gi, mauchut hkaù má nyi é bang a nghut é yanmai, buinyi haù gi, hkau sù lé é su, nungmoq é matú byodàn tung dut rà a nghut.

⁵ Nungmoq lhunglhang bang gi, maubó é yhangzô pé eq nyí é yhangzô pé nghut lhê. Nga-nhung gi, myín eq mauchut hkaù eq séng é bang a nghut.

⁶ Haù mù luí, nga-nhung gi, byù góbang su a yhup nyi e za, machyâ luí, gyíng gyíng kut nyí sháng.

⁷ Hkâsu mù gâ le, yhup é bang gi, myín lé yhup akô; î shuq wut é bang le, myín lé shuq wut akô.

⁸ Nghut kôlhang, nga-nhung gi, nyí eq séng lhê nghut é yanmai, gyíng gyíng kut nyí luí, lumjing myit eq chyitdap myit lé gi, wànggò-long lé su gò to, hkyí yù hui rà lé myit myoqbyù tô é hkyô lé gi, shamtoq-muq lé su tsung to, kut sháng.

⁹ Hkâsu mù gâ le, Garai Gasang gi, Yhâng nhikmo-yô é hkyô lé hkâm zo rà matú, nga-nhung lé hkyin tô é a nghut e za, nga-nhung é Yhumsing Yesuq Hkrisduq mai, hkyi yù hkyô lé nga-nhung wó yù rà matú hkyin to bê nghut lhê.

¹⁰ Yesuq gi, nga-nhung yhup bûn nyi kôlhang, yhup ngón to kôlhang, Yhang eq rahá wó nyi nyi sháng gaq ga, nga-nhung é matú shí hkâm byi bê nghut ri.

11 Haû mù luî, nungmoq gi, ahkuî, nungmoq kut nyi é eq rajung za, rayuq eq rayuq myit wum byî lhum mù, htuqluq htuqbáng kut lhùm nyi keq.

Ló Htâng Lhê É Mhoqshit Hkyô

12 Gumang wuî ê, nungmoq mâ é muzó shikut luî, haû Yhumsîng má nungmoq lé up nyi é eq lhoq pun lhoq kyîng nyi é bang lé, nungmoq hkungga râ matú le;

13 yhangmoq zui sai é muzó jizó é yanmai, yhangmoq lé chyitdap myit dông gyai yhang hkungga râ matú le, nungmoq lé ngamoq sang kat lhê. Nungmoq le, rayuq eq rayuq nguîngón lhùm nyi keq.

14 Gumang wuî ê, nungmoq lé ngamoq wum byî kat nau é gi, lagôn é bang lé lhoq pun lhoq kying keq; nhiknge é bang lé myit wum byi keq; wum nyhôm é bang lé htuqluq htuqbáng kut keq; yuq hkanmó lé, i-myit hîng byî nyi keq;

15 ó yuq lé nghut kôlhang, a ge é hkyo é yanmai, a ge é dông a taú kut râ lé lhoq pun lhoq kyîng nyi keq; nungmoq rayuq eq rayuq le, góbang banshoq eq le, shikut luî, hkâ-nhám le, ge é hkyô kut byî lhum nyi keq.

16 Hkâ-nhám le, ru gabú nyî keq;

17 abyit alan kyûdûng nyi keq;

18 hkyô hkat hkanmó má jeju hkya-ôn nyi keq, hkâsu mù gâ le, haú pé gi, Hkrisduq Yesuq má, nungmoq é matú Garai Gasang ô nau é hkyô pé nghut lhê.

19 Haû Woi-nyi lé hkâlhoq jôm pyám kó;

20 myiqhtoi htoî é lé, haî su a ngàm hkâkut kó.

21 Jung hkanmó lé, chyam wú luî, ge é hkyô lé zui zing nyi mù,

22 agè ashop é hkyô hkanmó lé, koi pyám keq.

23 Nguîngón hkyo é apûn awang nghut é Garai Gasang yhang, nungmoq lé, lunggháng lhoq sân-yúng pyám byi sháng gaq; nga-nhûng é Yhumsîng Yesuq Hkrisduq dum lé é hkún, nungmoq é woi-nyi, myit nhiklhum, gungdu gi, mara hûn râ hkyô a bò sháng gaq.

24 Nungmoq lé ji yu é Sû gi, lhumzui é Sû nghut lhê mù, Yhang, shí hkyô lé kut râ nghut lhê.

25 Gumang wuî ê, ngamoq é matú kyû bo dung byi kó laq.

26 Gumang wuî banshoq bang lé, chyoiyúng é chyitpuq puq é dông bo shiyám byi kó laq.

27 Gumang wuî banshoq bang lé, hun kat é laiká shí nghap kyo râ matú, haû Yhumsîng é myîng mai, ngò, nungmoq lé pying kat lhê.

28 Nga-nhûng é Yhumsîng Yesuq Hkrisduq é jeju gi, nungmoq chyáng ru joq nyî sháng gaq ô!

HTESALONI Pê Chyáng Htang Dàm Hun Kat é Laiká (2 Thessalonians)

¹ Ngò Poluq eq Sila, Timohti pé gi, nga-nhùng é Íwa Garai Gasang eq Yhumsing Yesuq Hkrisduq má nghut nyí bê bang, haù Htesaloni wà mó byu pê é noqkuq hpúng lé dang kyô kat lhê.

² Haù Íwa Garai Gasang eq Yhumsing Yesuq Hkrisduq chyáng mà é jeju eq ngingón hkyô gi, nungmoq chyáng ru joq nyí sháng gaq ô!

Jeju Hkya-on É Eq Kyúdung É Hkyô

³ Gumang wui è, ngamoq gi, hkâ-nhám le, nungmoq é matú Garai Gasang lé jeju hkya-on râ dut ri; haù gi, gíng lhê; hkâsu mù gâ le, nungmoq é lumjng myit gi, je je kô jat lo nyí luí, nungmoq yuq hkangmó é chyitdap myit le, rayuq eq rayuq é ahtoq má je myô jat lo nyí é yanmai nghut lhê.

⁴ Haù mù luí, ngamoq gi, nungmoq zing-ri huí é hkyô pé eq wuihke jamjau huí é hkyô pé banshoq lé, nungmoq wó jân nyí kô é yanmai, nungmoq é hkam jan hkyô eq lumjng hkyô lé, Garai Gasang é noqkuq hpúng pé é hí má gumrong nyí lhê.

⁵ Shí hkyô banshoq gi, haù Garai Gasang dingmán é đông jéyáng é hkyô lé saksé tûn shit é nghut lhê; haù mù luí, nungmoq gi, Garai Gasang é mingdán é matú wuihke jamjau huí zo bekô nghut é yanmai, mingdán haù eq gingdán é bang gâ é huí kó râ nghut lhê;

⁶ Garai Gasang gi, tengmán Sú nghut lhê; haù mù, nungmoq lé jamjau byí é bang lé, Yhang mai jamjau byí râ eq,

⁷ jamjau huí nyí é bang nungmoq lé le, ngamoq lé le lhoq lhut byí râ nghut lhê. Shí hkyô gi, haù Garai Gasang lé a sê é bang eq nga-nhùng é Yhumsing Yesuq eq sêng é gabú danglù lé a gyo a châng é bang lé, jéyáng râ matú,

⁸ haù Yhumsing Yesuq, wum-o a-tsam byíng é Yhâng é maumang lagyô pé eq rahá, myishâm eq mauhkung mai htoq shit é hkûn, dut râ nghut lhê.

⁹ Yesuq jé lé lô mù, Yhâng é chyoiyung bang má hpungwup shingkang wó yu é eq lumjng bang banshoq mai mauhong é huí é buinyí má, yhangmoq gi, htên byoq hkyô lé ahtum abyuq jéyáng é huí zo kó râ nghut lhê.

¹⁰ Hau htoq agó, haù Yhumsing é hí mai le, Yhâng é a-tsam kô làm é mai le, lhoq kâng pyâm é huí kó râ nghut lhê. Ngamoq é saksé dang lé nungmoq lumjng bekô nghut é yanmai, haù lumjng bang má nungmoq le lòm bekô nghut lhê.

¹¹ Haù mù luí, nga-nhùng é Garai Gasang gi, nungmoq lé, Yhang ji yu é hkyô eq gingdán ri ga râ le, haù Yhang é wum-o a-tsam mai, nungmoq myit tô é ge é hkyô hkangmó eq nungmoq é lumjng myit eq sêng é muzó lumjup lé, lhoq dik byí sháng gaq nghû le, nungmoq é matú, hkâ-nhám le, ngamoq kyúdung byí nyí lhê.

¹² Ngamoq haù su dung byí nyí é hkyô gi, nga-nhùng é Garai Gasang eq Yhumsing Yesuq Hkrisduq é jeju yanmai, haù nga-nhùng é Yhumsing Yesuq é mying gi, nungmoq má hkya-on waq toq é wó huí mù, nungmoq gi, Yhang má hkya-on waq toq é wó huí kó râ matú nghut lhê.

2

A Tara É Sû

¹ Gumang wui ê, haû nga-nhông é Yhumsing Yesuq Hkrisduq dum lé rá hkyô, Yhang eq nga-nhông rahá zup nyi to rá hkyô eq séng luí, nungmoq lé ngamoq pying kat nau é gi,

² haû Yhumsing é buinyi gi, jé to gù nghut bê gâ é myiqhtoi dang, luhkyang, laiká pé rajung jung, ngamoq chyáng mã é nghut lhê ga nungmoq chyáng jé é nghut jáng, nungmoq é myit lui za hkâduí kó, hkâgyuq dân kó.

³ Hkâsu mù gâ le, haû htên byoq é yhangzo nghut é a tarâ Sû htoq shit lui, haû gumlau toq é hkyô hí a htoq htoq gi, buinyi haû jé rá a nghut, haû mù lui, nungmoq lé, ó yuq èq, hkâ dông mai mhaú kôlháng hkâjíng kó.

⁴ Haû yuq gi, Garai ga noqkuq huí é zè lhunglháng lé htuq htíng lui, haû pé banshoq é htoq má yhânggùng yhang lhoq gyaú yú rá nghut lhê; haû mù lui, Garai Gasáng é noqkuq yhúm má zung to lui, yhânggùng yhang Garai Gasang nghut lhê ga tai rá nghut lhê.

⁵ Ngò gi, nungmoq eq rahá nyi tô é hkûn, shí hkyô pé lé lhaq tai kyo kyo kut é hkyô lé, nungmoq a bun lo kó lú?

⁶ Haû yuq gi, ahkying yam-yoq jé jáng sheq htoq shit sháng gaq ga, ahkuí, yhang lé hai èq hkûm zing tô é hkyô lé, nungmoq sê lhê.

⁷ Haû a tara é hkyô é haq dá é a-tsam gi, mù zui nyi gù nghut bê; nghut kôlháng, haû lé hkûm zing nyi sù gi, hui htot pyám huí é hkûn jé shoq, haû lé hkûm zing nyi shirâ nghut lhê.

⁸ Haû hui htot pyám huí é hkûn, a tarâ Sû htoq shit rá nghut lhê; haû Yhumsing Yesuq kúm gi, Yhâng nhut mã é soq èq yhang lé sat pyám rá eq, Yhang gyó lo u lhê é hpungwup mó èq, yhang lé lhoq htên pyám rá nghut lhê.

⁹ Haû a tarâ Sû lé lo é gi, Tsadán a-tsam dông laklaí kumlhá pé, kumlhá pé, mauhpo muzó pé ajung jung kut mhaú é eq,

¹⁰ htên byoq huí nyi é bang lé mhaú zo rá agè ashop é hkyô jung hkangmó lé tún shit rá nghut lhê. Yhangmoq htên byoq é gi, haû tengmán hkyô lé chyitdap lui hkyi yú hui rá nghut é hkyô lé he-ngik pyám kó é yanmai nghut ri.

¹¹ Hau é yanmai, Garai Gasang gi, haû tengmán hkyô lé a lumjíng e za agè ashop hkyô má ô nau é lhunglhâng bang mara byí é hui kó sháng gaq ga,

¹² mhaú é dang lé jíng kó rá matú, a-tsam mó bo é lum shut rá hkyô lé, yhangmoq chyáng nhâng byi bê nghut ri.

Mhoqshit é hkyô má gíng nyi rá hkyô

¹³ Nghut kôlháng, haû Yhumsing chyitdap é gumang wui ê, ngamoq gi, hkâ-nhám le, nungmoq é matú Garai Gasang lé jeju hkyá-on rá dut ri. Hkâsu mù gâ le, haû Woi-nyí èq lhoq sân-yúng nyi é muzó dông le, tengmán hkyô lé lumjíng é dông le, hkyi yú hui rá matú, Garai Gasang gi, nungmoq lé, sâng-hi mai hkyin yú bê nghut ri.

¹⁴ Yhang gi, nga-nhông é Yhumsing Yesuq Hkrisduq é hpungwup shíngkang mã, nungmoq wó bo lóm shoq ga, ngamoq é gabú danglù dông nungmoq lé shí hkyô má ji yú bê nghut lhê.

¹⁵ Haû mù lui, gumang wui ê, nhutdang dông nghut nghut, laiká dông nghut nghut, nungmoq lé ngamoq hai byí é mhoqshit hkyô lé zui gíng nyi lui, gíng gíng yap nyi keq.

16 Yhâng é jeju yanmai, nga-nhúng lé, ahtum abyuq é myit wum byi hkyô eq ge é myit myoqbyù hkyô lé byí é, nga-nhúng lé chyitdap é, nga-nhúng é Íwa Garai Gasang eq nga-nhúng é Yhumsing Yesuq Hkrisduq gi,

17 nungmoq é i-myt má wum byi lui, ge é muzó eq ge é nhutdang lhumjup má, nungmoq lé wum-o lhoq kóng byi sháng gaq ô!

3

Kyû Dung Byi Râ Matú Lung Kat É Hkyô

1 Gumang wui é, je htâng má pying kat nau é hkyô gi, nungmoq chyáng dut wú bê eq rajung za, haù Yhumsing é mungdang gi, hân hân byo myín ló mù, lhoq gyaù é hui sháng gaq, ngamoq é matú kyû bo dung byi kó laq.

2 Yuq hkangmó gi, lumjing myit bo é a nghut é yanmai, haù achaq achyut agè ashop é byu pè chyáng mai ngamoq wó lut râ matú le, kyû bo dung byi kó laq.

3 Nghut kôhang, haù Yhumsing gi, lhumzúi é sù nghut é yanmai, Yhang nungmoq lé wum-o lhoq kóng byi mù, haù agè ashop su chyáng mai nungmoq lé hung yù râ nghut lhê.

4 Nungmoq gi, ngamoq pying tô é dang pé lé kut nyí mù, xoq lui le kut nyí râ nghut lhê nghû, haù Yhumsing má ngamoq hkyak myit lum tô lhê.

5 Haù Yhumsing gi, nungmoq lé Garai Gasâng é chyitdap hkyô eq Hkrisduq é hkam jân é hkyô má, shuí wàng sháng gaq ô!

Mû Zui Shikut Râ É Hkyô

6 Gumang wui é, ngamoq gi, ngamoq chyáng mai nungmoq hap yù bê ngamoq mhoqshit é hkyô dông a nyi yap é eq lagôn é gumang ó yuq eq le, we we nyi keq nghû, haù Yhumsing Yesuq Hkrisduq é mying mai nungmoq lé hkunmó hkyô kat lhê.

7 Hkâsu mù gâ le, ngamoq kut é alik lé hkâ dông cháng râ dut é gi, nungmoq yhang sê lhê. Ngamoq gi, nungmoq eq rahá nyi tô é hkûn, lagôn é hkyô a bo wú é htoq agó,

8 Ó yuq é zoshuq lé le, ngùn a byí é a zo wú é nghut lhê. Nungmoq má ó yuq lé le wòlai a byi sháng gaq nghû, ngamoq gi, muzó shikut hkyô eq wuihke hkyô má, nyí lé, myín lé, zui sai é nghut lhê.

9 Ngamoq gi, nungmoq lé garúm nhâng râ ahkáng a wó é a nghut, yhumsing gùng lé nungmoq cháng râ matú alik dut sháng gaq nghû sheq, haù su kut é ru nghut lhê.

10 Hkâsu mù gâ le, ngamoq, nungmoq eq rahá nyi é hkûn, "Mû a kâm zui sù gi, a zo sháng gaq." nghû, nungmoq lé ngamoq mai sang to bê nghut lhê.

11 Hkâsu mù gâ le, nungmoq chyáng mâ é byù ra-am lagon lui, hai mù le a zui e za, mù châng lhoq gyô byí wún akô gâ é hkyô lé, ngamoq wó gyô é yanmai nghut lhê.

12 Ngamoq gi, haù su kut é bang lé, zim za nyi mù zui sai lui, yhumsing é zoshuq ho nyi kó sháng gaq nghû, haù Yhumsing Yesuq Hkrisduq é mying lé lang lui, hkunmó hkyô kat mù, wum byí kat lhê.

13 Gumang wui é, nungmoq kúm gi, ge é muzó kut é hkyô má, hkâ-nhám le, hkâ-ngú byuq bùm kó.

14 Byù rayuq yuq gi, laiká shí má ngamoq mhoqshit é hkyô lé, a châng é nghut jáng, haù yuq lé rago chôm matsing yù mù, yhang hoq bun sháng gaq, yhang eq hkâzùm yap kó.

¹⁵ Nghut kôlhang, yhang lé gyè rayuq dông a sôn e za, gumang rayuq dông lhoq pun lhoq kyíng nyi keq.

Ló Htâng Lhê É Shi-kyám Dang

¹⁶ Haû nguingón hkyo é Yhumsîng yhang gi, ahkyíng hkanmó eq hkyô hkat hkanmó má, nungmoq lé nguingón hkyô byí nyi sháng gaq. Haû Yhumsîng gi, nungmoq banshoq bang eq ru nyi nyi sháng gaq.

¹⁷ Ngò, Poluq gi, ngá é loq mai yhang shi-kyám dang shi lé kê kat lhê; shi gi, ngò kê é laiká banshoq má kumlhá nghut lhê. Ngò kê é gi, shi dông chyat nghut lhê.

¹⁸ Nga-nhûng é Yhumsîng Yesuq Hkrisduq é jeju gi, nungmoq banshoq bâng chyáng ru joq nyi sháng gaq ô!

TIMOHTI Chyáng Hî Dàm Hun Kat é Laiká (1 Timothy)

¹ Nga-nhùng é hkyi yù Sû Garai Gasang eq nga-nhùng é myit myoqbyù jang nghut é Hkrisduq Yesuq é hkunmó eq rajung za, Hkrisduq Yesuq é lagyo nghut sù, ngò Poluq gi,

² haù lumjúng hkyô má ngá zo sîng nghut sù, Timohti lé dang kyô kat lhê; haù Iwa Garai Gasang eq nga-nhùng é Yhumsîng Hkrisduq Yesuq chyáng mâ é, jeju eq shogyo nhikmyin hkyô, nguínón hkyô gi, náng chyáng ru joq nyí sháng gaq ô.

Sará Pyoq Pé Lé Sidiq Râ Hkyô

³ Ngò, Makedoni mau má jé wang ló é hkûn, pying to hkô é eq rajung za, Ehpesu myuq má nyi to shi aq; haù hkûn sheq, nàng gi, shut shai é mhoqshit hkyô lé mhoqshit é bang a mhoq xoq lo râ matú le,

⁴ myit htoq mhô-myi dang eq a dat htûm é byù xik labaù má yhangmoq a ap nóng râ matú le, haù bang lé hkunmó wó hkyô râ nghut lhê. Haù hkyô pé gi, lumjúng myit mai kut htoq é Garai Gasâng é muzó lé hloq htoq râ malaì, mabyoq jishûm za sheq hloq htoq nyi é nghut lhê.

⁵ Haù hkunmó hkyô luí myit myoqbyu tô é hkyô gi, chyitdap myit yhang nghut ri; chyitdap myit haù gi, sansêng é i-myt, mara a bò bûn é myit eq lumjúng myit akying mai lo é nghut lhê.

⁶ Byù ra-am gi, haù hkyô pé mai htoq ló kôluí, dangsóm taí é hkyô shut lhing ló byuq bekô nghut ri.

⁷ Haù bang gi, jep é tará sará pé dut naù kôlhang, yhangmoq haì taí nyi é hkyô lé le, hkyak, haì lé mhoqshit é hkyô lé le, a sé kó nghut ri.

⁸ Rayuq yuq, jep é tará lé rago chung é nghut jáng, jep é tará gi, ge é hkyô nghut é lé, nga-nhúng sê lhê.

⁹ Haù jep é tará gi, dingmán bâng é matú tô tô é a nghut e za, tará lu laí é bang eq gumlau toq bâng é matú, tará a hkunggá é bang eq mara kut bâng é matú, a chyoiyúng é bang eq lumjúng hkyô a cháng bâng é matú, yhangmoq é yhângwa lé nghut nghut, yhângnu lé nghut nghut, sat pyám bâng é matú, byù sat bâng é matú,

¹⁰ ashop é dông gungsho zùm yap é bang eq yuqgè yhangchang nyi zo lhum bâng é matú, jùn dông byù ung zo bang, mhaù é bang eq dakam mhaù bâng é matú, tengmán mhoqshit hkyô eq shai lhum é lhunglhang bâng é matú sheq, jep é tará tô tô é nghut é lé, nga-nhúng sê lhê.

¹¹ Tengmán mhoqshit hkyô haù gi, hkungsô wó é Garai Gasâng eq ngo lé ap byi bê nghut é, Yhâng é hpungwup bo é gabú danglù eq rajung za nghut ri.

Poluq Chyáng Yhumsîng É Jeju Joq Nyi É Hkyô

¹² Ngò gi, ngo lé wum-o byí é, nga-nhúng é Yhumsîng Hkrisduq Yesuq lé jeju hkya-ôn lhê; hkâsu mù gâ le, Yhang gi, ngo lé lhumzui sù rayuq dông sôn yù luí, Yhâng é muzó jizó má hkyin kat yu é yanmai nghut lhê.

¹³ Hí hkûn, ngò gi, Garai Gasang lé taí hpoi sù, zing-ri sù eq byù rhoí sù nghut wú kôlhang, a sé shi mù lumjúng myit a bo e za kut é yanmai, shogyo nhikmyin yu é hkyô lé ngò wó yu é nghut lhê.

¹⁴ Nga-nhùng é Yhumsing é jeju lé le, Hkrisduq Yesuq eq sêng é lumjing myit eq chyt dap myit lé le, ngá chyang agùn agó hut hkyô kat byi bê nghut ri.

¹⁵ Yubak dap bang lé hkyi yù rá matú, Hkrisduq Yesuq gi, mingkan má je lé bê gâ é dang gi, lumjing é mung dang nghut lui, gè gè yhang lhom yù gíng é dang nghut lhê. Haù yubak dap bang má, ngò gi, yubak je ko sù nghut é nghut lhê.

¹⁶ Nghut kôhang, Hkrisduq Yesuq gi, Yhang lé lumjing lui ahtum abyuq é asak lé wó yù rá bâng é alik dut rá matú, yubak dap bang má yubak je ko sù nghut é, ngá é ahtoq má, Yhâng é hkam jan hkyô lhunglhang wó tún shit sháng gaq ga, Garai Gasang gi, ngo lé shogyo nhikmyin yu ri.

¹⁷ Haù mù, haù aróng eq hpungwup shing kang gi, ahtum abyuq é, a dat htên byoq é, myoq èq a byu-myang é Hkohlkâm nghut sù, rayuq zâ é Garai Gasang chyang pyat dedu ahtum abyuq ru joq nyi sháng gaq ô! Amen.

¹⁸ Ngá zo Timohti é, nàng eq séng lui myiqhtoi dang joq wú é eq rajung za, ngò gi, nang lé haù đông mhoqshit kat lhê; haù mù, nàng gi, haù pé lé chung nyi lui, ge é majan zan mù,

¹⁹ lumjing myit eq mara a bò bún é myit bo nyi sháng gaq. Byù ra-am gi, haù hkyô pé lé he-ngik pyám kô é nghut lui, yhangmoq é lumjing myit gi, wui-sanghpo htên byoq lô é su htên byoq byuq bekô nghut ri.

²⁰ Haù bang má, Humenu eq Alesander le bò kômù, Garai Gasang lé taí hpoi é dang a taí rá matú mhoq yù kô sháng gaq nghù, ngò, yhangnhik lé Tsadán é loq má ap pyám bê nghut lhê.

2

Noqkuq Hkyô Eq Séng Lui Mhoqshit Byi É Hkyô

¹ Haù mù lui, ngò, hí pying kat nau é gi, tarâ hkunggâ é eq hkungga gíng é hkyô banshoq má, nga-nhùng wó nguingón yuqyo nyi sháng gaq, hkoohlkâm pé eq ahkáng ayá wó bang banshoq é matú le,

² yuq hkangmó é matú le, dùng tóngbán byi, kyûdung byi, dùng xoq byi, jeju hkya-on byi, kut aq nghù nau ri.

³ Haù gi, ge é hkyô nghut mù, nga-nhùng é hkyi yù Sù Garai Gasang ô nau é hkyô nghut ri.

⁴ Yhang gi, byù lhunglhang bang hkyi yu é hui mù, tengmán é mung dang lé sè gyo rá lé, ô nau nyi ri.

⁵ Hkâsu mù gâ le, Garai Gasang gi, rayuq za nghut lui, Garai Gasang eq byu é gyoro má sô xoq byi sù le rayuq za nghut lhê; haù yuq gi, xângzo byù nghut é Hkrisduq Yesuq nghut ri.

⁶ Yhang gi, byù lhunglhang bâng é matú shihtaí gunglik hkungga đông Yhânggùng lé byi pyám bê nghut ri; haù gi, ahkying yam-yoq je é hkùn, saksé htoq shit bê nghut lhê.

⁷ Ngò gi, tưngbaù pé lé, tengmán é lumjing hkyô mhoqshit rá matú, hkô kyo sù rayuq eq lagyo rayuq đông hkyin tô é hui sù nghut lhê. Ngò, haù su taí é gi, mhaù taí é a nghut, têng é hkyô lé za taí nyi é ru nghut lhê.

⁸ Yuqgè wui gi, nhikjum yô é hkyô eq dang htíng htíng lhum é hkyô a bo e za, jowò hkangmó má choyiýung é loq tú mù kyûdung rá lé, ngò ô nau ri.

⁹ Myiwe wui gi, xâm nik nik é, hîng zè, palhé, hpaù jung mebù èq a môn chung e za, siri bo é mebu wut chùng mù, tap tap za, shuq shuq za kut lui,

¹⁰ Garai Gasang lé noqkuq é myiwe wuì eq gíng shoq, ge é muzó èq yhumsing gùng lé mhôn nyi rá lé le, ngò ô nau ri.

¹¹ Myiwe gi, uphkanq tô é đông châng nyi mù, zim za mhoq yû kó sháng gaq.

¹² Myiwe gi, yuggè lé mhoqshit rá hkyô lé le, yuggè lé uphông rá hkyô lé le, ngò ahkáng a byi; myiwe gi, zim za kut nyi ra rá nghut lhê.

¹³ Hkâsu mù gâ le, Adam lé hí hpan to mù, Ewaq lé hpan é ru nghut lhê.

¹⁴ Hau htoq agó, Adam gi, mhaú é hui zo sù a nghut; haú myiwe sheq mhaú é hui zo luí, mara kut shut é ru nghut lhê.

¹⁵ Nghut kôlhang, myiwe wuì gi, lumjínq myit, chyitdap myit eq chyoiyúng hkyô má, shuq shuq za kut mù, yhangmoq xoq châng nyi kô é nghut jáng, zoshâng hku é đông mai hkyi yu é hui kó rá nghut lhê.*

3

Hpúng-up Eq Hpungtê Kut Râ Bâng É Hkyô

¹ Rayuq yuq, hpúng-up ayá lé ô nau nyi é nghut jáng, haú yuq gi, aróng wó é muzó lé ô nau nyi rá gâ é dang gi, lumgínq é dang nghut nyi ri.

² Haú mù luí, hpúng-up rayuq gi, mara hún rá hkyô a bo é sù, myiwe rayuq za wó é sù, dat sidiq é sù, yhumsing gùng lé wó hkanq é sù, hkungga gíng é sù, byù bíng lé dat hkulum é sù, dat mhoqshit é sù,

³ Íhpê é jùn a dut é sù, byoq lhum byoq cheq a kut e za nùm é sù, mabyoq jishúm a lhoq htoq é sù, ngunzê lé a chyitdap é sù, nghut rá lhê.

⁴ Yhang gi, yhâng é ikun lé rago dat uphông luí, yhang zô pé mai hkungga myit bo é èq yhâng dang lé gyo byi é sù le, nghut rá lhê.

⁵ Rayuq yuq, yhumsing é ikun lé lhang a dat uphkanq é nghut le gi, Garai Gasâng é noqkuq hpúng lé gi, hkâsu kut wó wú gon rá lúh?

⁶ Chángzo dut é a myáng shi é sù gi, hpúng-up wó kut rá a nghut, kut é nghut jáng, yhang gi, nghutbùn lò luí, jéyáng é hkyô lé nat Tsadán hui zô é su hui zo abe.

⁷ Hpúng-up rayuq gi, tûngbaù pé hí má ge é myìng wó é sù le dut rá lhê; haú jáng, yhang gi, tai hpoí pyâm é lé le a hui, nat Tsadán é tuihkyó má le a myí, dut rá nghut lhê.

⁸ Haú eq rajung za, hpungtê pé gi, hkungga gíng é bang, shô-kó a xân é bang, íhpê é jùn a dut é bang, a tengmán é amyat lé a ho é bang, nghut rá lhê.

⁹ Yhangmoq gi, lumjínq hkyô má é nik é mauhpo tengmán hkyô pé lé, sansêng é i-myt èq châng nyi ra rá nghut lhê.

¹⁰ Yhangmoq gi, chyam é lé hí huí wú kó sháng gaq, hau htâng, yhangmoq lé mara hún rá hkyô hai a bò lo jáng, hpungtê mù lé wùn kó sháng gaq.

¹¹ Haú eq rajung za, yhangmoq é yhumsing myhí pé le, myit no nhang é dang a tai e za, dat sidiq é eq hkyô hkanqmó má lumgínq luí, hkungga gíng é myiwe wuì, nghut ra rá dut lhê.

¹² Hpungtê rayuq gi, myiwe rayuq za wó é sù, yhangzô pé eq yhâng ikun lé rago za dat wùn waq é sù, dut ra rá nghut lhê.

¹³ Hpungtê mù lé rago za wùn waq bê bang gi, yhumsing é matú aróng lé le, Hkrisduq Yesuq lé yhangmoq lumjínq hkyô má, gyuq kyum é hkyô a bo é myit mó lé le, hkyak wó yu akô nghut ri.

¹⁴ Ngò gi, hkâ-myháng a myáng má náng chyáng lé jé rá matú, myit myoqbyu to kôlhang, ahkyíng du myáng pyâm le,

* 2:15 Apûn 3:16

¹⁵ Garai Gasâng é ikun hkaû má, byu pé hká dông nyi yap rá é hkyô lé, nàng sé sháng gaq nghú, pying kat é dang shi pé lé ká byi kat lhê; ikun haû gi, rú dui nyi é Garai Gasâng é noqkuq hpúng nghut luí, tengmán hkyo é hkungmó-zíng eq apún awang nghut ri.

¹⁶ Tarâ hkungga hkyo é zaú tô é hkyô gi, ko dik é nghut é lé, ó yuq le wó he-ngik pyám é a nghut; haû gi, Yhang, byù gungsho má htoq shit mù, haû Woi-nyí mai Yhang lé saksé hkám byi luí, maumang lagyô pé gi, Yhang lé myàng bê nghut ri; byuhú ahú hú má Yhâng é hkyô lé hko kyo mù, Yhang lé mingkan byu pé lumjínng luí, hpungwup shingkan eq Yhang lé mauhkúng shut shuí toq yú bê nghut ri.

4

Timothi Lé Mhoqshit É Hkyô

¹ Jihtúm buinyi pé má, byù ra-am gi, lumjínng hkyô mai htak htoq ló luí, mhaú zô é woi-nyí pé htâng cháng kó rá eq nat gang mai lo é mhoqshit hkyô pé lé gyo byi kó rá nghut lhê ga, haû Woi-nyí gi, san za tai ri.

² Haû sú é mhoqshit hkyô pé gi, gegùn labyoq kut é byù-mhaú pê chyáng mai lo é nghut lhê; haû bâng é myit nhiklhum gi, nyhê nhe tô é shamtoq eq nyhê man tô é su dut byuq bê nghut ri.

³ Haû bang gi, hâng lhúm é hkyô lé hkúm tang é hkyô lé le, haû lumjínng luí tengmán hkyô lé sê é bang mai jeju hkya-on mù hap yù ge é, Garai Gasang hpan to byi é zoshuq lé koi pyám nhang é le, kut akó nghut ri.

⁴ Garai Gasang hpan tô é lhunglhang gi, ge é chyat nghut ri; Garai Gasâng é mungdang eq kyúđđung é dang dông haû pé lé lhoq sân-yúng nyi é nghut é yanmai,

⁵ jeju hkya-on luí hap yu é nghut le gi, haí jung lé lhang he-ngik pyám rá hkyô a bò nghut ri.

⁶ Haû gumang wui lé, nàng haû hkyô pé lhoq pun lhoq kyíng é nghut le gi, nàng gi, haû nàng cháng bê ge é mhoqshit hkyô eq lumjínng hkyô má é tengmán hkyô má, kô myhâng sú nàng nghut rá htoq agó, Hkrisduq Yesuq é ge é hpungmú wùn sú le dut rá nghut lhê.

⁷ Garai a bo é myit htoq mhô-myi dang eq hpô-myhí mâng pê é mhô-myi dangsóm lé koi pyám luí, tarâ hkunggâ é hkyô má yhumsing gúng lé lhoq kúng yù aq.

⁸ Hkâsu mù gâ le, gungsho lé lhoq kúng é hkyô gi, akyù shau za htoq é nghut lhê; nghut kólhang, tarâ hkunggâ é hkyô kúm gi, jung hkanngmó é matú akyù bo lhê nghut mù luí, shí ipyat má le, htang pyat má le, akyù bo nyi ri.

⁹ Haû gi, banshoq hap yù gíng é, lumjínng é mungdang nghut lhê.

¹⁰ Haû mù luí, xângzo byù banshoq bâng é hkyi yù Sú nghut é, je riyhang, lumjínng bâng é hkyi yù Sú nghut é, rú dui nyi é Garai Gasang má, nga-nhúng, myit myoqbyu to bê nghut é yanmai, nga-nhúng gi, gyai yhang shikut nyi lhê.

¹¹ Haû pé lé, hkunmó hkyô luí mhoqshit byi nyi aq.

¹² Náng é zorâm pyat lé, ó yuq eq le a wú tiq pyám sháng gaq, dang tai é má le, nyi yap é hkyô má le, chyitdap é hkyô má le, lumjínng hkyô má le, sansêng é hkyô má le, lumjínng bâng é matú alik kut shit nyi aq.

¹³ Náng chyáng ngò jé lé é buinyi jé shoq, nàng gi, Chyúmdang nghap kyô é má le, hko kyô é má le, mhoqshit é má le, ap nong nyi aq.

¹⁴ Nàng gi, hpúng suwún wui náng é ahtoq má loq ke byí é hkûn, myiqhtoi dang đông nang lé Garai Gasang byí to bê nghut é, woi-nyí hkyô eq sêng é chyunghuq lé, haí su a ngàm hkâkut pyám.

¹⁵ Haú hkyô pé lé, myit zìng zuq luí zui saí nyi aq; nàng kô myhang lo é hkyô lé, yuq hkangmó byu-myàng kó sháng gaq, náng gũng banshoq haú pé má ap nóng nyí aq.

¹⁶ Náng é asak duì hkyô má le, nàng mhoqshit é hkyô má le, rago sidiq nyi aq. Haú pé má ru gĩng nyi aq, hkâsu mù gà le, nàng haú su kut é nghut jáng, náng é asak lé le, náng chyáng mai gyô yu é bang lé le, nàng wó hkyi yù rá nghut lhê.

5

Suwún Wui, Chuimó Pé, Jùn Pé Eq Séng Luí Hpaqchyí Byí É Hkyô

¹ Asak kô sú lé dang htân a tân e za, yhumsing é iwa lé su, yhang lé lhoq pun lhoq kying aq. Zorâm wui lé gi, gumang wui lé su,

² asak kô é myiwe wui lé gi, ìnû pé lé su zùm yap luí, zomyi wui lé gi, hammó wui lé su sansêng é i-myt banshoq èq zùm yap nyi aq.

³ Gè gè yhang garúm rà dut é chuimó myhí pé lé, hkunggâ nyi keq.

⁴ Nghut kôlhang, chuimó myhí rayuq yuq gi, zoshâng nghut nghut, gashu nghut nghut, wó é nghut jáng, haú bang gi, yhumsing é ikun lé wú gon luí, ìnû iwa eq íchyí iwhoí pé lé jeju taú é đông, yhangmoq é lumjĩng hkyô lé, zui saí é má lhoq mhán nhâng rá lé hí mhoq yù ra rá nghut lhê; hkâsu mù gà le, haú gi, Garai Gasang ô nau é hkyô nghut ri.

⁵ Haú lùm rà ó yuq le a wó mù, gè gè yhang rá tô é chuimó myhí gi, Garai Gasâng chyáng myit myoqbyu nyi luí, nyí, myín xoq xoq kyúdung mù, Garai Gasang garúm rà hkyô lé dũng nyi ri.

⁶ Nghut kôlhang, ngón hkyô za cháng luí asak duì é chuimó myhí gi, asak duì nyi kôlhang, shí gù nghut bê nghut ri.

⁷ Yhangmoq lé, ó yuq èq le mara a hũn kó sháng gaq, haú hkyô pé lé le mhoqshit byí nyi aq.

⁸ Rayuq yuq, yhâng é buinùm ji-myi wui lé a baú é htoq agó, je luí yhumsing é ikun byù lé a baú é nghut le gi, haú lumjĩng hkyô lé he-ngik pyám bê nghut luí, a lumjĩng su htoq má je ashop é sú dut bê nghut ri.

⁹ Hkyuq xê zàn byĩng bê é chuimó myhí za a nghut jáng, chuimó jihpán má wó kat rá a nghut; hau htoq agó, yhang gi, yuqgè rayuq za wó wú é sú;

¹⁰ zoshâng wui lé hku baú é sú, bíng lé rago dat hkulum é sú, sân-yúng bê bang é hkyí lé chi byí é sú, wuĩhke huí tô é bang lé garúm luí, ge é muzó jungkhang jungmó má yhumsing gũng yhang ap nóng nyi ri ga, yhang kut é ge é muzó má myĩng hũ é sú le, nghut rá lhê.

¹¹ Asak tiq é chuimó myhí pé lé, jihpán haú má hkâkat. Hkâsu mù gà le, gungsho ô nau é hkyo èq Hkrisduq chyáng yhangmoq ap nóng tô é hkyô lé ung pyám é hkûn, yhangmoq gi, myi ló nau kó rá nghut lhê.

¹² Haú mù, yhangmoq gi, sâng-hi lé yhangmoq tô tô é danggidiq lé lhoq hpyoq pyám kô é yanmai, tarâ darâ é hui zo kó rá nghut lhê.

¹³ Hau htoq agó, yhangmoq gi, rayhũm htáng rayhũm châng wang wún kômù, lagôn mán byuq kó rá nghut lhê. Lagôn é bang za dut kó rá a nghut, lumù gansang é bang eq yhangmoq taí a ge é pé lé taí kômù, yhumsing eq a sêng é mù má châng wang nyo wún é bang le, dut kó rá nghut lhê.

¹⁴ Haú mù luí, gyè pé mai lumù gansâng dang a wó taí pyám kó sháng gaq, asak tiq é chuimó myhí pé gi, myi ló mù, zoshâng hkú luí, yhangmoq é ikun lé gôn lajang rá matú, ngò, yhangmoq lé hpaqchyí byí kat lhê.

¹⁵ Hkâsu mù gâ le, ra-am gi, lhing taú ló kôluí, Tsadán é htâng châng nyí lugù nghut bekô nghut ri.

¹⁶ Lumjǐng é myiwe rayuq yuq gi, yhâng é ikun má chuimó myhí wó é nghut le, haú yuq é matú noqkuq hpúng lé wòlai a hun e za, yhang mai garúm yú ra rá nghut lhê; haú hkún sheq, noqkuq hpúng gi, gè gè yhang rá tô é chuimó myhí pé lé wó garúm rá nghut lhê.

¹⁷ Haú noqkuq hpúng lé rago za shuí ù é hpúng suwún wuí gi, akyú í tú hkam yù gǐng lhê; haú mungdang hko é hkyô eq mhoqshit é hkyô má shikut é suwún wuí gi, je riyhang hkam yù gǐng lhê.

¹⁸ Hkâsu mù gâ le, "Guq nǎng nyí é no lé, nhuttsung hkâ-tsúng to byi."* ga le, "Mú zui sù gi, yhâng é zuihpau wó yú gǐng lhê."* ga le, Chyúmdang má taí tô ri.

¹⁹ Hpúng suwún rayuq lé mara hun é hkyô lé, í yuq sum yuq mai saksé hkâm e za a nghut le gi, hkâlhóm yú.

²⁰ Nghut kôlhǎng, lhoq pun lhoq kyǐng é hkyô lé góbang wó yú kó sháng gaq, mara kut shut é bang lé, shiwa byu pé hí má tân mhoqshit aq.

²¹ Pyǐng kat é dang shi pé lé, gamhkuí myít a bo e za châng nyí rá eq, myoqdong hkyín luí haí le a kut rá matú, Garai Gasang eq Hkrisduq Yesuq é hí má le, hkyin yú huí é maumang lagyô pé é hí má le, ngò, nang lé pyǐng kat lhê.

²² Ó yuq é ahtoq má le loq ke* byi rá lé hkâhân; góbang é mara hkaú má le hkâbo lóm. Yhumsǐng yhang yhumsǐng sǎn-yúng shoq kut nyí aq.

²³ Nǎng é wamdau ra luí, anum num no lò lò dut é yanmai, nǎng gi, wuí za shuq é hkyô lé nô pyám luí, tsibiyiq wing le ratsuí tsuí shuq byi aq.

²⁴ Byù ra-âm é mara pé gi, de de dut é nghut mù luí, tará jéyǎng é jang má hí ló jé ri; ra-âm é mara kúm gi, hau é htâng má châng byông htoq lo ri.

²⁵ Haú eq rajung za, ge é muzô pé gi, de de nghut nyí luí, haú su de de a nghut é pé lé le, wó zaú to rá a nghut.

6

¹ Jùn dut é wòlai hkaú má nyí é lhunglhǎng bang gi, yhangmoq é yhumsǐng wuí lé gyai yhang hkungga gǐng lhê nghú, myít yú rá dut lhê; haú hkún sheq, Garai Gasâng é myǐng eq nga-nhǔng é mhoqshit hkyô gi, lumù gansang é a hui rá nghut lhê.

² Lumjǐng é yhumsǐng wuí é jùn gi, gumang wuí nghut é yanmai, yhangmoq lé a wú myuq é za, yhangmoq dojaú luí akyú myang hkâm zô é bang gi, lumjǐng bang eq chyitdap gǐng é bang nghut é yanmai, yhangmoq lé je ge é dǒng dojaú rá lhê. Shí hkyô pé lé, nǎng gi, yhangmoq lé mhoq byí nyí é eq lhoq pun lhoq kyǐng byí nyí aq.

Ngùn Lé Chyitdap É Hkyô

³ Rayuq yuq gi, shut é lumjǐng hkyô lé mhoqshit luí, nga-nhǔng é Yhumsǐng Yesuq Hkrisduq é tengmán mhoqshit hkyô eq tará hkunggá é mhoqshit hkyô lé a myít huí é nghut jǎng,

* 5:18 Tará Pun 25:4 * 5:18 Luk 10:7 * 5:22 Haú hkun lhê bang gi, hpúng suwún kut rá matú hkyin to bê bang lé, loq ke kyúdung byí é nghut lhê.

⁴ haú yuq gi, nghutbûn é sù eq hái lé le a sê gyô é sù nghut ri. Yhang gi, htug htíng lhum é hkyô pé lé ô nau é, a ge é myit bò luí, dang eq séng mù mabyoq lhoq htoq ri; haú mai, manon é hkyô, byoq lhum byoq cheq é hkyô, lumù gansang é hkyô, agè ashop é dông myit ngam pyâm é hkyô eq.

⁵ haú tengmán hkyô lé lhoq hpyuq pyâm mù, tarâ hkungga hkyô gi, ngùn zè wó hkyô za nghut ri ga myit yu é, i-myit lhoq htên pyâm bê bâng é gyoro má, byìn a huí é hkyô pé lé, lhoq htoq kat ri.

⁶ Nghut kôlhang, tarâ hkunggâ hkyô má nhik dik é hkyô bo é nghut le gi, amyat mó nghut nyi ri.

⁷ Hkâsu mù gâ le, nga-nhúng gi, mingkan htoq má hái jung le a yu wang lé, haú mai le hái wó yu htoq ló rà a nghut.

⁸ Haú mù luí, nga-nhúng gi, wutbu wutmè eq zoshuq wó é nghut jáng, hau èq nhik dik nyi sháng.

⁹ Wó nau sùt nau é byu pé gi, gunglaú hkyô eq tuihkyó má le, haú byoq yeq hkyô eq htên byoq hkyô má, byu pé lé myup shí nhang é, ngha é hkyô myo myo eq myit nò nhâng nau é hkyô má le, byit gyó wâng kó rà nghut lhê.

¹⁰ Hkâsu mù gâ le, ngùn lé chyitdap é hkyô gi, agè ashop hkyô ajung júng é apûn awang nghut nyi ri. Byù ra-am gi, ngùn lé ô nau luí, haú lumjúng hkyô mai sô nghoq ló mù, yhumsing gùng lé yhumsing, haú yón kuq hkyo èq htaù rot pyâm bekô nghut ri.

Timothei Lé Pying Kat É Dang

¹¹ Nghut kôlhang, Garai Gasâng é byù nang gi, haú pé banshoq lé koi pyâm luí, dingmán hkyô, tarâ hkungga hkyô, lumjúng hkyô, chyitdap hkyô, hkam jan hkyô eq nú-nhâm é hkyô pé lé châng hkat nyi aq.

¹² Lumjúng hkyô eq séng é ge é majan le zân nyi aq. Hap yù lumjúng bê ga, saksé myo myô pé é hí má, ge é dông nang yín yu é hkùn, wut yu é huí luí wó é ahtum abyuq é asak lé, zui zing nyi aq.

¹³ Haú lhunglhang lé asak byi é Garai Gasâng é hí má le, Pontu Pilat chyáng saksé hkâm nyi é hkùn, ge é dông yín yu é Hkrisduq Yesuq é hí má le, ngò, nang lé pying kat lhê:

¹⁴ Yhâng é ahkying yam-yoq jé jáng, Garai Gasang htoq shit nhâng rà nghut é sù, nga-nhúng é Yhumsing Yesuq Hkrisduq htoq shit é buinyi jé shoq.

¹⁵ nang gi, agot a-u é hkyô eq mara hùn rà hkyô a bo e za, hkunmó shí lé châng nyi aq. Garai Gasang gi, hkungsô wó sù, Yhang za up sù, hkohkam pé é Hkohkâm, yhumsing pé é Yhumsing,

¹⁶ Yhang za ahtum abyuq dui nyi sù, a ge chyâng htep e é maubó má dui nyi sù, ó yuq èq le a myang wú é, a wó myang é sù nghut nyi ri. Aróng eq hpungwup a-tsam gi, Yhâng chyáng ahtum abyuq ru joq nyi sháng gaq ô! Amen.

¹⁷ Shí ipyat má wó sùt é bang gi, a gumrông rà eq a gíng é sutzè má yhangmoq é myit myoqbyu hkyô a tô e za, nga-nhúng nguingón yuqyo nyi rà matú jungkháng jungmó lé agùn agó byi é sù, Garai Gasâng chyáng za, yhangmoq myit myoqbyu nyi rà matú, hkunmó hkyô aq.

¹⁸ Ge é hkyô kut luí, ge é muzó má wó sùt nyi mù, a chum e za, gam chúng nau é myit bò rà matú, yhangmoq lé hkunmó hkyô aq.

¹⁹ Haú dông mai, yhangmoq gi, jé lò rà ipyat é matú gíng é apûn awang dông, yhangmoq é matú sutzè wó tsing to kó rà nghut lhê; haú hkùn sheq, yhangmoq gi, asak kyíng nghut é asak haú le wó zui zing to kó rà nghut lhê.

²⁰Timohti ê, nang lé ap to bê hkyô lé, zúng nyî aq. Tarâ a hkunggâ é po-ming ming bâng èq hpaqchyî nghut lhê ga myhîng shut é htuq htîng lhum lhum kut é hkyô lé, koi pyám aq.

²¹Byù ra-am gi, haû lé hpaqchyî nghut lhê ga yín yû kôluî, haû lumjîng hkyô mai so nghoq htoq ló byuq bekô nghut ri.
Jeju gi, nungmoq chyáng ru joq nyî sháng gaq ô.

TIMOHTI Chyáng Htang Dàm Hun Kat é Laiká (2 Timothy)

¹ Hkrisduq Yesuq chyáng mâ é asak byi râ gâ é danggidiq eq rajung za, Garai Gasang ô nau é đông, Hkrisduq Yesuq é lagyo nghut sù, ngò, Poluq gi, ngò chyitdap é ngá zo Timohti lé, dang kyô kat lhê.

² Haù Íwa Garai Gasang eq nga-nhùng é Yhumsing Hkrisduq Yesuq chyáng mâ é jeju eq shogyo nhikmyin hkyô, nguóngón hkyô gi, ru joq nyí sháng gaq ô!

Lumluj Râ Matú Myit Wum Byí É Hkyô

³ Ngò gi, ngá é kyûdung dang má, nyí, myín, abyit alan nang lé bûn nyi uchyang, sân-yúng é i-myyit mai, ngá é íchyi íwá pé dojaú é su, ngò dojaú nyí é Garai Gasang lé, jeju hkyá-ôn nyi lhê.

⁴ Ngò gi, ngò má gabú hkyô byíng jup sháng gaq nghû, náng é ngaubyi lé myit bûn nyi mù, nang lé gyai yhang myàng nau nyi ri.

⁵ Ngò gi, nang é gyíng é lumjíng myit lé lhoq pún yù mù, náng whoí Lu-i eq náng nu U-ni nhik chyáng má hí bo é lumjíng myit, ahkuí, náng chyáng le bo ri nghû, hkyak myit lum nyi lhê.

⁶ Hau é yanmai, ngò loq ke byí é đông, nàng má bo tô é Garai Gasang é chyunghuq lé, gyúng nhang nyi râ matú, nang lé ngò lhoq pún kat lhê.

⁷ Hkásu mù gà le, Garai Gasang gi, gyuq sê é myit nga-nhùng lé a kat byí e za, a-tsam bo é myit, chyitdap sê é myit, yhumsing gùng lé dat hkang é myit sheq kat byí tô é ru nghut lhê.

⁸ Haù mù luí, nàng gi, nga-nhùng é Yhumsing eq séng luí saksé hkâm é hkyô má le, Yhâng é yanmai htóng byû dut to sù ngá é hkyô má le, hoq myit a bo é za, Garai Gasang é wum-o mai, haù gabú danglu é matú, ngò eq rahá wuìhke jamjau chòm hui goq.

⁹ Garai Gasang gi, nga-nhùng zui sai é muzó đông a nghut e za, Yhânggùng yhang myit sôn tô é hkyô eq Yhâng é jeju yanmai za, nga-nhùng lé, hkyi yù luí chyoiyúng é asak duì hkyô má ji yù bê nghut ri. Ahkyíng nghu é lháng a joq shí mai yhang, jeju haù gi, Hkrisduq Yesuq má nga-nhùng lé byi to gù nghut bê.

¹⁰ Nghut kôlhang, nga-nhùng é hkyi yù Sù, Hkrisduq Yesuq pô htoq é đông, ahkuí, haù lé lhoq htoq shit bê nghut ri. Yhang gi, shí-nò hkyô lé lhoq htên pyám luí, haù gabú danglù đông mai, asak lé le, a dat htên byoq é hkyô lé le, lhoq htoq shit bê nghut ri.

¹¹ Ngò gi, gabú danglu é matú hko kyo sù, lagyo eq mhoqshit sù đông, hkyin tò é hui sù nghut lhê.

¹² Hau é yanmai, ngò gi, wuìhke jamjau shí lé hui nyi é nghut lhê. Nghut kôlhang, ngò gi, ó yuq lé lumjíng bê nghut é hkyô lé, sê é htoq agó, Yhang lé ngò ap tô é pé lé, haù buinyi jé shoq, Yhang wó zúng rà nghut lhê nghû hkyak myit lum tô é yanmai, ngò a hoq.

¹³ Nàng gi, ngá chyáng mai wó gyô yu é tengmán dang pé lé, Hkrisduq Yesuq má, lumjíng myit eq chyitdap myit mai alik kut yu nyi aq.

¹⁴ Nang lé ap byi to bê, haû ge é mungdang lé, nga-nhúng chyáng bo tô é Chyoiyúng Woi-nyí é wum-o mai zúng nyí aq.

¹⁵ Asia mau mã é bang yuq hkangmó gi, ngo lé pyâm to kô é hkyô lé, nang sê lhê; haû bang má, Hpugelu eq Heramoge nhik le bo akô nghut ri.

¹⁶ Haû Yhumsing gi, Onesihpurû é yhumbyù lé shogyo nhikmyin é hkyô tân shít sháng gaq; hkâsu mù gâ le, yang gi, ngo lé anum num myit lhoq ngón é htoq agó, ngò wut é shamtoq-tuî é yanmai, a hoq e za,

¹⁷ yang, Romaq myuq má jé nyi é hkûn, ngo lé myang hui shoq, ho shikut é sù nghut ri.

¹⁸ Haû Yhumsing gi, haû buinyi má, yang lé haû Yhumsing é shogyo nhikmyin hkyô byi sháng gaq! Ehpesu myuq má, yang ngo lé hkâ-myhó garúm bê nghut é gi, nang rago yang sê lhê.

2

¹ Haû mù, ngá zo ê, nang gi, Hkrisduq Yesuq mã é jeju hkaû má, wúm bo nyi aq.

² Nang gi, saksé myo myô é hí má ngá chyáng mai wó gyô yù bê hkyô pé lé, góbang lé dat mhoqshit é, wó lum é bang lé ap byi aq.

³ Hkrisduq Yesuq é ge é gyezo rayuq su, wuîhke hkyô lé chôm jan nyi sháng.

⁴ Gyezo rayuq đông gyê mù wùn waq nyi é sù, ó yuq nghut kôle, gotú muzó má a bo lom é za, yang lé hkunmó hkyô nyi é gyezau lé, gabú nhâng nau é chyat nghut lhê.

⁵ Haû eq rajung za, shingjóng é sù rayuq le, shingjóng lhum poî wang é hkûn, tô tô é tará đông a châng e nghut le gi, ung é aróng chyunghuq lé wó yù rá a nghut.

⁶ Yo-mû zuî shikut é sù gi, kyôshi lé sâng-hi myang hkam yù rá sù nghut lhê.

⁷ Haû Yhumsing gi, shí pé banshoq lé wó sê é nyan nang lé byi rá nghut é yanmai, ngò tai é hkyô pé lé myit wú aq;

⁸ Haû Dawiq é awut ashín nghut sù, Yesuq Hkrisduq gi, shi é mai dum dui toq bê hkyô lé myit bun aq; haû gi, ngá é gabú danglù nghut lhê.

⁹ Gabú danglù hau é yanmai, mara bò sù rayuq lé su, ngò gi, kyum hut é hui luî, hpuzô nyi é nghut lhê. Nghut kôlháng, Garai Gasâng é mungdang gi, kyum hut huí é a nghut.

¹⁰ Haû mù luî, ngò gi, Hkrisduq Yesuq chyáng mã é hkyi yù hkyô eq ahtum abyuq é hpungwup shingkang lé wó yù kó sháng gaq nghû, haû hkyin yù hui bâng é matú, jung hkangmó lé hkam jân nyi lhê.

¹¹ A-ô mã é dang gi, lungíng é dang nghut lhê:
Nga-nhúng gi, Yang eq rahá shí bê nghut jáng, Yang eq rahá duì rá nghut lhê.

¹² Nga-nhúng gi, hkam jân é nghut jáng, Yang eq rahá up rá nghut lhê.

Nga-nhúng gi, Yang lé he-ngik pyâm é nghut jáng, Yang le, nga-nhúng lé he-ngik pyám rá nghut lhê.

¹³ Nga-nhúng gi, lhumzui myit a bò kôlháng, Yang gi, lhumzui nyi rá nghut lhê. Hkâsu mù gâ le, Yang gi, yhânggùng yang wó he-ngik pyâm é a nghut.

Garai Gasâng Hí Má Myoqdong Wó É Mû Zui Sù

¹⁴ Nang gi, yangmoq lé, shí hkyô pé xoq luî lhoq pùn nyi aq. Dang pé eq séng luî, a byoq lhum nyi kó sháng gaq, Garai Gasâng hí má yangmoq lé sidiq

byi aq. Haù gi, akyù a bo é htoq agó, wó gyô é bang lé htên byoq nhang é hkyô za nghut lhê.

¹⁵ Nang gi, haù tengmán é mungdang lé jo shoq chung jai é eq, hoq nó a râ é mù zui sù rayuq dông Garai Gasâng hí má myoqdong wó shoq, wó dut é myhó shikut aq.

¹⁶ Tará a hkunggá é pò-ming ming bang lé koi pyám aq. Hkâsu mù gâ le, haù su kut é bang gi, tará a hkunggá é hkyô má je riyhang wang nân lô byuq é bang dut kó râ nghut lhê.

¹⁷ Yhangmoq é mhoqshit hkyô gi, mong ana su byo myín lô râ nghut lhê; haù bang má Humenu eq Hpilitu nhik le bò kôluí,

¹⁸ haù tengmán hkyô mai sô nghoq lô byuq akô. Yhangnhik gi, haù dum dui toq hkyô dut lai bê ga taí kômù, ra-âm é lumjínq hkyô lé lhoq htên pyám byí akô nghut ri.

¹⁹ Nghut kôlhag, "Haù Yhumsing gi, Yhang eq sêng é bang lé sê lhê."* ga lui le, "Haù Yhumsing é mying lé yín yu é bang yuq hkangmó gi, agè ashop hkyô mai lhing tau ra kó râ nghut lhê." ga lui le, dizik haù htung tap tô é, Garai Gasâng é ging ting é apùn awang gi, gíng nyi ri.

²⁰ Yhùm mó ralhum má gi, hìng auhkoq zè, ngùn auhkoq zè baù za joq é a nghut, sik auhkoq zè, tse auhkoq zè le joq lhê; ra-am gi, aróng hkyo é matú, ra-am gi, aróng hkyo é matú a nghut.

²¹ Haù mù lui, haù pé mai yhumsing gùng lé lhoq sansêng pyám é sù gi, chyoiyúng lui, haù Yhumsing chung jai gíng é sù, ge é muzó hkangmó kut rà hen tô é sù nghut é yanmai, aróng hkyo é matú chungzè dut rà nghut lhê.

²² Zoram é agè ashop é ô nau hkyô lé koi pyám mù, haù sán-yúng é myit mai, Yhumsing lé wut dúng é bang eq rahá, dǐngmán hkyô, lhumzui hkyô, chyitdap hkyô, nguingón hkyô pé lé, châng hkat nyí aq.

²³ Go é eq ngok é dông dang jet jet lhum é hkyô gi, mabyoq lhoq htoq é hkyô nghut é lé, nang sê lhê nghut é yanmai, haù hkyô lé koi pyám aq.

²⁴ Haù Yhumsing é dui-nhâng zoshâng gi, mabyoq a lhoq htoq é za, yuq hkangmó lé dat myit tê byí é, wó mhoqshit é, a dat nhik-yô é su dut ra rà nghut lhê.

²⁵ Yhang gi, yhang lé htug htíng é bang lé, nú-nhâm é dông mhoqshit byi ra rà nghut lhê; haù hkùn, Garai Gasang gi, yhangmoq lé myit lhing hkyô byi mù, tengmán hkyô lé sê gyo nhâng lui,

²⁶ yhangmoq gi, bûn gyíng lò mù, nat Tsadán ô nau é hkyô lé kut byi rà matú, chyup yú huí é, nat Tsadán é tuihkyô mai wó hpang lut lô kó abe nghù, myit lum kat lhê.

3

Jihtùm Buinyì Pé Má Dut Lò Râ Hkyô

¹ Jihtùm buinyì pé má, wuìhkê é ahkyíng pé joq lò rà nghut é lé, nang matsing to aq.

² Hkâsu mù gâ le, haù u lé, byu pé gi, yhumsing gùng lé za chyitdap é bang, ngùn lé myoqnoq é bang, gumrong é bang, nghutbûn é bang, góbang lé tai hpoí é bang, ínu íwa nyo é lé a gyô é bang, jeju a dat bûn é bang, a chyoiyúng é bang,

³ chyitdap myit a bo é bang, mara hkyut byi a sê é bang, lumù gansang é bang, yhumsing gùng lé hkâng a sê é bang, byuwui pé, ge é hkyô lé a ngui é bang,

⁴ haq gumlaù é bang, a bun a so dut wún é bang, yhumsing gùng lé za hkik bûn é bang, Garai Gasang lé chyitdap é bang dut rà malaì ngón kún hkyô lé za chyitdap é bang, dut bùm kó rà nghut lhê.

⁵ Yhangmoq gi, tarâ hkunggâ é bang su dut kôlhang, haù pé é a-tsam lé he-gnik pyâm akô nghut ri; haù sù é bang lé, nàng koi pyâm nyi aq.

⁶ Yhangmoq gi, hpaqchyì da mù yhùm pé má wàng kôluì, mara wòlai lé wun é, agè ashop é ô nàu hkyô ajung jung má sô nghoq lô byuq é,

⁷ hkâ-nhám le mhoq yu nyi kôlhang, haù tengmán hkyô lé a sê gyô é, myit nyhôm é myiwe wui lé wó lãng nghoq yu é bang nghut akô.

⁸ Yanne eq Yambre nhik gi, Mosheq lé htuq htíng é su, haù bang le, haù tengmán hkyô lé htuq htíng akô nghut ri; yhangmoq gi, myit é hkyô htên byuq kôluì, haù lumjìng hkyô má lhum a zuì é bang nghut akô.

⁹ Nghut kôlhang, haù nhik é hkyô byông htoq lo é su, yuq hkangmó é hí má, yhangmoq ngok é hkyô byông htoq lô rà nghut mù, haù mai lai luì yhangmoq wó kut jat kó rà a nghut.

Timohti Lé Pying Kat É Dang

¹⁰ Nàng kúm gi, ngá é mhoqshit hkyô, ngá é nyiyap hkyô, ngò myit myoqbyu tô é hkyô, ngá é lumjìng hkyô, myit hìng hkyô, chyitdap hkyô, hkam jan hkyô,

¹¹ zing-ri huì é hkyô eq wuìhke jamjau hkyô pé lé le, Antioku wà mó, Ikoni wà mó eq Lustra wà mó pé má ngò hui zô é, zing-ri hkyô pé lé, ngò hkam jan bê hkyô lé le, nàng rago sê lhê. Nghut kôle, haù Yhumsing gi, haù pé banshoq mai ngo lé xe yù bê nghut ri.

¹² Gè gè yang, agè ashop é byu pé eq mhaù kut é bang gi, mhaù zô nyi bum é eq mhaù zô é huì nyi bùm kôluì, a ge é hkyô shut je riyhang myô jat lò kô é hkún,

¹³ Hkrisduq Yesuq má tarâ hkunggâ é asak dông nyiyap nau é bang yuq hkangmó gi, zing-ri é hui kó rà nghut lhê.

¹⁴ Nghut kôlhang, nàng gi, ô pê chyáng mai nàng mhoq yù bê hkyô lé le, Hkrisduq Yesuq lé lumjìng jàng hkyi yu é hui shoq,

¹⁵ nang lé hpaqchyì byéng-yá wó byì é chyoiyúng Chyúmdang pé lé, zoshàng hkún mai nàng sê to bê hkyô lé le, nàng sê é yanmai, nàng mhoq yu to bê hkyô eq hkyak lumjìng to bê hkyô má, xoq kut nyi aq.

¹⁶ Chyúmdang hkangmó gi, Garai Gasàng é soq hâng tô é pé chyat nghut é yanmai, mhoqshit é hkyô, tân mhoq é hkyô, lhoq jo byì é hkyô eq dingmán hkyô lé tún shit byì é hkyô pé é matú, akyú bo ri;

¹⁷ haù mù luì, haù Garai Gasàng é byù gi, ge é muzó jizó hkangmó lé kut rà matú, wó gumjup rà nghut lhê.

4

¹ Garai Gasàng é hí má le, dui nyi bang eq shi byuq bang lé tarâ dara rà sù Hkrisduq Yesuq é hí má le, Yhang htoq shit rà hkyô eq Yhàng mingdán é yanmai, ngò, nang lé pying kat é gi,

² haù mungdang lé hko kyo aq; ahkyíng yam-yoq ang kôlhang, a ang kôlhang, rì rì hen to aq; myit gyaì hìng é eq rago za mhoqshit é dông, lhoq jo byi, tân mhoqshit é eq myit wum byi kut nyi aq.

³ Hkâsu mù gâ le, byu pé gi, tengmán mhoqshit hkyô lé a kâm gyô é ahkýing jé mù, yhangmoq ô nau yut yut é hkyô cháng luí, yhangmoq é no yo bui nau é nohkyap gyô nau é hkyô tai nhâng râ matú, sará pé rajùm rayò lé lhinghkyuq má lhoq tsing to kó râ nghut lhê.

⁴ Yhangmoq gi, haú tengmán hkyô mai yhangmoq é nohkyap lé lhing pyám mù, myit htoq mhô-myi dang shut lhing ló kó râ nghut lhê.

⁵ Nghut kôlhang, nàng gi, dut tô é hkyô banshoq má rago sidiq nyi aq; wúihke jamjau hkyô lé hkam jân nyi aq; gabú danglù hko kyô é muzó kut nyi aq; nàng é hpungmù banshoq lé wùn waq nyi aq.

⁶ Hkâsu mù gâ le, ngò gi, shuq jung hkungga ralhum đông hut pyâm é huí nyi gù nghut mù luí, mingkan mai ngò htoq ló râ ahkýing jé bê nghut ri.

⁷ Ngò gi, haú ge é majan le zan bê; din shingjóng lhùm é hkyô le bàn bê; haú lumjing hkyô le chang bê nghut lhê.

⁸ Ahkuí, haú tengmán é tará Agyi nghut sù, Yhumsing gi, haú buinyi má ngo lé ap byi râ nghut é, haú dingmán hkyô é janmaú lé, ngá matú tô to byi bê nghut lhê. Haú gi, ngá é matú za a nghut, Yhang htoq shit râ hkyô lé myit láng nyi é bang banshoq é matú le nghut lhê.

Timohti Lé Ji Kat É Hkyô

⁹ Nàng gi, ngá chyáng wó dut é í hân hân lé lô aq.

¹⁰ Hkâsu mù gâ le, Demaq gi, mingkan shí lé chyitdap é yanmai, ngo lé pyám to luí, Htesaloni wà mó shut; Krezen gi, Galatiq mau shut; Tituq gi, Dalamati mau shut, e ló byuq bekô nghut é yanmai nghut lhê.

¹¹ Lukaq za ngò eq rahá nghut nyi lhê. Markuq lé, nàng eq rahá shuí lé lò aq; yhang gi, ngá é hpungmù má wó htuqbáng râ sù nghut lhê.

¹² Ngò gi, Tuhkiku lé Ehpesu myuq shut nhang kat bê nghut lhê.

¹³ Nàng gi, lé lo é hkùn, Troa myuq má, Karpú chyáng ngò tô é buhing haú lé le, ngá é chyúmding lé le, je luí eq haú shokuq chyúmding pé lé le, yù lé lô byi aq.

¹⁴ Haú ningdup hpó Alesander gi, ngo lé a ge é myo myo kut bê nghut ri; haú Yhumsing gi, yhang kut é eq rajung za, yhang lé dam byi râ nghut lhê.

¹⁵ Yhang gi, ngamoq é danglù lé wum kat htuq htíng bê sù nghut é yanmai, nàng le, yhang lé sidiq ra râ nghut lhê.

¹⁶ Sâng-hí dàm, ngá gúng lé ngò tai hung é hkùn, yuq hkingmó gi, ngá é hkyam shut a bo lom e za, ngo lé pyâm tô akò. Nghut kôlhang, haú gi, yhangmoq ahtoq má mara a dut sháng gaq.

¹⁷ Nghut kôlhang, ngò đông mai danglù haú lé rago wó hko pyo kat luí, títngbau pé banshoq bang wó gyo kó sháng gaq ga, haú Yhumsing gi, ngá hkyam shut yap to mù, ngo lé wum-o byí é nghut lhê. Hau htoq agò, ngò gi, hkanghkyí é nhut mai le hkyi yù hui bê nghut lhê.*

¹⁸ Haú Yhumsing gi, ngo lé agè ashop é hkyô hkingmó mai hkyi yù luí, Yhang é mauhkung mingdán má ngón za shu jé râ nghut lhê. Hpungwup shingkan gi, Yhâng chyáng ahtum abyuq ru joq nyí sháng gaq ô. Amen.

Shi-kyám Dang

¹⁹ Priskila eq Akula nhik lé le, Onesihpuru yhumbyù wui lé le, bo shi-kyám byi laq.

* 4:17 Haú hkùn lé, Romaq byu pé, byù sat lé gi, hkanghkyi lé tsó pyám lhê.

²⁰ Erastu gi, Korinhtuq myuq má nyi gyó to bê; Trohpimu lé gi, nò luí, Melitu wà mó má ngò nyhi pyâm to bê nghut lhê.

²¹ Nàng gi, wó dut é í, gyoqmyò a wàng shi lé, shí má jé lé lò aq. Ubulu gi, nàng lé shi-kyâm kat ri; haú eq rajung za, Pudén, Linu, Klodia eq gumang wui banshoq bang gi, nàng lé shi-kyâm kat akô nghut ri.

²² Haú Yhumsíng gi, náng é woi-nyí eq rahá nghut nyí sháng gaq. Jeju gi, nungmoq chyáng ru joq nyi sháng gaq ô.

TITUQ Chyáng Hun Kat é Laiká (Titus)

1 Garai Gasâng é dui-nhâng zoshâng eq Yesuq Hkrisduq é lagyo nghut é sù, ngò Poluq gi, haù ahtum abyuq é asak lé chòm myit myoqbyu é yanmai, Garai Gasang hkyin yu to bâng é lumjîng hkyô jat râ eq, tengmán hkyô lé wó sé mù, tarâ hkungga sé nhâng râ matú, hkyin yù huí é sù nghut lhê.

2 Haù ahtum abyuq é asak hkyô lé, mhaù a sê é Garai Gasang gi, ahkyíng nghu é lháng a joq shi mai danggidiq byi to mù, Yhang masat tô é ahkyíng yam-yoq má sheq mungdang hko kyô é đông lhoq htoq shit luí,

3 nga-nhûng é hkyi yù Sù, Garai Gasang hkunmó hkyô tô é eq rajung za, haù mungdang hko é hkyô lé ngá é loq má ap byi bê nghut ri.

4 Nga-nhûng chòm lumjîng é hkyô đông mai, ngá zo sîng nghut é Tituq lé laiká kâ kat lhê. Íwa Garai Gasang eq nga-nhûng é hkyi yù Sù Hkrisduq Yesuq chyáng má é jeju eq nguingón hkyô gi, náng chyáng ru joq nyî sháng gaq ô.

Kreti Zinlóng Má, Tituq Wùn Waq Râ Muzô

5 Ngò, nang lé Kreti zinlóng má nyhi hkyô tô é gi, ngò, nang lé pying tô é eq rajung za, ngò a ban zui sai é loqzó pé lé lhoq pán râ matú eq, wà hkangmó má hpúng suwún ayá dâng to byi râ matú nghut lhê.

6 Haù hpúng suwún kut râ sù gi, mara hùn râ hkyô a bo é sù; yhangmyi rayuq za wó é sù; yhang zô pé le, agè ashop é eq jîno a gyô é ga, mara hùn râ rayu a joq é lumjîng bang nghut é sù, nghut râ lhê.

7 Hkâsu mù gâ le, hpúng-up rayuq gi, Garai Gasâng é sùt zum sù rayuq đông nghut lhê mù, mara hùn râ hkyô a bo é sù nghut râ lhê; yhang gi, yhumsing myit a cháng; i-myt a lûm tot; ìhpê é jùn a dut; mabyoq jishûm a kut; a sansêng é ngùn hîng lé a myit ô nau é sù nghut râ lhê.

8 Yhang gi, byù bíng lé dat hkulúm sù; ge é hkyô lé chyitdap sù; nûm é sù, dingmán sù; chyoiyúng sù; yhumsing gùng lé wó hkang é sù;

9 mhoq yu to bê hkyô eq rajung za, lumjîng é mungdang lé ging ging zuí zing nyi é sù nghut râ lhê. Haù hkùn sheq, yhang gi, góbang lé tengmán é mhoqshit hkyô đông myit wum wó byi é eq, haù eq shai lhum é bang lé, shut é hkyô wó tûn shit râ nghut lhê.

10 Hkâsu mù gâ le, gumlau kut é bang, dangsôm taí é bang eq mhaù zô é bang myo myo nyi ri. Ahpyo-kuq hpyit é hpúng bang je riyhang myo akó.

11 Haù bâng é nhut shô lé gi, xaù pyám byi râ lhê. Hkâsu mù gâ le, yhangmoq gi, a tengmán é đông sutzè lé wó yù shoq ga luí, mhoqshit a gíng é hkyô pé lé mhoqshit mù, rayhum bang bang lé lhoq hpyoq lhoq htên nyi akó nghut ri.

12 Kreti byù má é myiqhtoi rayuq lháng gi, "Kreti byu pé gi, ayang mhaù é bang, tân jung yosô dusak pé, lagôn é zo myoqnoq bang nghut akó." ga taí wú ri.

13 Saksé shí gi, têng ri. Haù mù luí, yhangmoq gi, Yudaq byu pé é myit htoq mhô-myi dang lé le; tengmán hkyô lé he-ngik pyâm é bang pying tô é dang pé lé le, a gyo kô é za,

14 haù lumjîng hkyô má ging tîng nyi kó sháng gaq, yhangmoq lé htân htân tân mhoqshit byi nyi aq.

¹⁵ Sâ-n-yúng bâng é matú gi, azíng zê lhunglhang sâ-n-yúng ri; a sâ-n-yúng bang eq a lumjínng bâng é matú kúm gi, hai le a sâ-n-yúng é chyat nghut nyi ri; hkâsu mù gà le, yhangmoq é myit nhiklhum eq myit sôn sê é hkyô pé gi, gè gè yhang, a sâ-n-yúng dut byuq bekô nghut ri.

¹⁶ Yhangmoq gi, Garai Gasang lé sê lhê ga kôlhâng, yhumsing zui sai é loq zó dòng, Yhang lé he-ngik pyâm é bang nghut akô. Yhangmoq gi, achauq achyut é bang, jìno a gyô é bang eq, ge é mù joq mijoq eq a htuk é bang nghut akô nghut ri.

2

Hká Đông Nyi Yap Râ Hkyô

¹ Nang kúm gi, tengmán é mhoqshit hkyô eq wui é dòng mhoqshit nyi râ dut lhê.

² Hpô-mâng pé lé gi, i-myit shirâm sé râ hkyô; hkungga gíng é byù dut râ hkyô; yhumsing gùng lé wó hkâng râ hkyô eq, lumjínng myit gíng râ, chyitdap myit gíng râ, hkam jan hkyô gíng nyi râ hkyô pé lé, mhoqshit byi nyi aq.

³ Haù eq rajung za, hpô-myhí mâng pé lé gi, hkungga gíng é a-kyang bo nyi râ hkyô; lumù gansâng dang a tai râ hkyô; ihpé é jùn a dut râ hkyô eq gé é hkyô lé za dat mhoqshit é bang wó dut râ matú mhoqshit byi aq.

⁴ Haù hkùn, Garai Gasang é mungdang gi, lumu pyâm é a hui sháng gaq, yhangmoq gi, hpô-myhí zó pé lé, yhumsing yhanglâng eq, yhangzô pé lé chyitdap é,

⁵ yhumsing gùng lé wó hkang é, siri bo é, ikun lé dat wùn waq é, ge é myit wó tún shit é, yhumsing é yhanglâng uphkang é dòng dat châng é bang dut râ matú, ge mhoqshit é hpô-myhí mâng pé dut râ nghut lhê.

⁶ Haù eq rajung za, zorâm wui lé le, yhumsing gùng lé wó hkang nyi kó sháng gaq, lhoq pun lhoq kyíng nyi aq.

⁷ Hkyô hkat hkangmó má, yhangmoq lé nang yhang ge é muzó alik tún shit nyi aq.

⁸ Nang lé lhóm htúg htíng é bang gi, nga-nhúng é hkyô má mara a wó hún kômù hoq hpù nyi kó sháng gaq, nang mhoqshit é hkyô má, tai pyám râ hkyô a bò shoq, têng é, siri bo é, eq sansêng é dang tai nyi aq.

⁹⁻¹⁰ Nga-nhúng é hkyi yù Sù Garai Gasang eq sêng é mhoqshit é hkyô pé hkat hkangmó yúng nyi sháng gaq, hkyô hkat hkangmó má, jun pé lé, yhangmoq é yhumsing wui pé é a-ô má nyi mù, yhumsing wui é i-myit ngón shoq dang a tu râ; a hkau râ; wó lum tô é bang dut râ hkyô pé lé, mhoqshit byi aq.

¹¹ Hkâsu mù gà le, hkungsô wó é myit myoqbyù hkyô ga é, nga-nhúng é kô myhang é Garai Gasang eq hkyi yù Sù, Yesuq Hkrisduq gi, hpungwup shíngkang eq htoq shit râ hkyô lé láng nyi é hkùn,

¹² tarâ a hkunggâ é myit eq mingkan myit ô nau é hkyô koi pyám luí, shí ipyat má yhumsing gùng lé wó hkâng râ, dingmán râ eq, tarâ hkunggâ é hkyô wó cháng shoq,

¹³ nga-nhúng lé mhoqshit byi râ matú, Garai Gasang jeju chyunghuq gi, htoq shit bê nghut mù luí, byù lhunglhang bang lé hkyi yù hkyô hpóng byi bê nghut ri.

¹⁴ Haù Yesuq Hkrisduq gi, agè ashop é hkyô banshoq mai nga-nhúng lé hkyi yù mù, ge é muzó hkangmó lé châng kut nau é, Yhânggùng yhang sing é byuhú rahú dut râ matú wó lhoq sâ-n-yúng yù shoq ga, nga-nhúng é matú Yhânggùng lé ap byi pyám bê nghut ri.

¹⁵ Nang lé ó yuq èq le, a wú shôm pyám kó sháng gaq; nàng gi, ahko ahkáng banshoq eq, yhangmoq lé shí hkyô pé mhoqshit nyí aq; myit wum byí é eq, tân mhoqshit é hkyô lé le kut nyí aq.

3

Ge É Muzo Zui Sai Râ Hkyô

¹ Nàng gi, lumjínng bang lé, zau wuí eq ahko ahkáng wó bâng é a-ô má nyí mù, jìno gyô nyí rà eq, hkâ-nhám le ge é muzó hkangmó zui sai rà lé hen nyí uchyang,

² ó yuq lé le lù a mù rà; nguínngón hkyô hô rà; myit tê byí é hkyô tân shit rà eq; byù banshoq lé nùm é i-myit tân shit nyí kó sháng gaq, lhoq pun lhoq kyíng nyí aq.

³ Hkâsu mù gâ le, nga-nhúng le, hí hpyang gi, byù ngok pé, jìno a gyô é bang, mhaú zo huí é bang eq, gungsho ô nau é hkyô eq míngkan ngón hkyô ajung júng èq jùn kut é huí bang, dut mù luí, agè ashop é eq manon lhum é hkyô kut nyí mù, rayuq eq rayuq a jú lhum é đông nyi lai lò bê nghut lhê.

⁴ Nghut kólhang, nga-nhúng é hkyi yù Sù Garai Gasang jeju eq chyitdap myit htoq shit é hkún,

⁵ nga-nhúng yhang kut é dingmán é muzó èq a nghut é za, Yhâng é shogyo nhiknyín é jeju yanmai sheq, Garai Gasang gi, nga-nhúng lé hkyi yù bê nghut ri.

⁶ Yhang gi, nga-nhúng é hkyi yù Sù Yesuq Hkrisduq é yanmai, nga-nhúng é ahtoq má agùn agó hut hkyô byí é Chyoiyúng Woi-nyí èq nga-nhúng lé chí san chí sèng pyám byi mù, woi-nyí má dum hku é huí nhâng luí, myit sik htaí byí é hkyô đông nga-nhúng lé hkyi yù bê nghut ri.

⁷ Haú mù luí, Yhâng é jeju mai mara hkyut san byí é huí bê nghut é yanmai, ahtum abyuq é asak lé myit myoqbyu nyi é eq rajung za, nga-nhúng gi, silí wunlí wó hkam yu é bang dut lò rà nghut lhê.

⁸ Dang shí pé gi, lumjínng é dang nghut lhê mù luí, Garai Gasang lé lumjínng é bang gi, ge é muzó lé myit lòm luí rago zui sai nyi kó sháng gaq, haú hkyô pé lé nàng wum zuq tung mhoqshit byi rà lé, ngò ô nau nyi lhê. Shí pé gi, byù lhunglhang bâng é matú ge é eq, akyù bo é hkyô nghut lhê.

⁹ Nghut kólhang, ana apâ ga luí taí htíng lhum é hkyô lé le; byùxik labaú gôn é hkyô lé le; nyo byoq lhum é hkyô lé le; jep é tarâ eq séng mù byoq lhum é hkyô pé lé le koi pyám nyi aq, hkâsu mù gâ le, haú pé gi, akyù a bo é hkyô eq chung a ge é hkyô pé nghut ri.

¹⁰ Gam hkuí é myit bò sù lé gi, í dâm mhoqshit wú mù, a wó jáng, yhang lé baú tô pyám aq.

¹¹ Haú su kut sù gi, yhang kut é muzó má mara wó to bê nghut mù, yhumsing gùng lé yhumsíng mara hun é sù nghut é lé, nàng sê to lo aq.

Je Htâng Má Pyíng É Dang

¹² Ngò gi, Nikopoli wà má gyoqmyò lhoq lai rà đông myit hpyit tô é yanmai, Artima lé, a nghut jáng Tuhkiku lé, náng chyáng nhang kat byi rà, jé eq yhang, nàng gi, shikut luí, haú wà shut ngá chyáng lé lô aq.

¹³ Nàng gi, tarâ sê é sù Zena eq Apolo nhik lé, yhangnhik é hkyowuí má rà é hkyô banshoq, shikut luí garúm kat aq.

¹⁴ Nga-nhông é byu pé gi, nyí wuî râ é hkyô lé wó htuq é eq ashi zuî é bang dut kó sháng gaq, ge é muzó lé myit lòm mù zui saí nyì râ hkyô lé mhoq yû râ lhê.

¹⁵ Ngò eq rahá nyi é bang yuq hkangmó gi, nang lé shi-kyâm kat akô. Lumjínq hkyô má ngamoq lé chyitdap é bang lé, bo shi-kyám byi aq.

Garaí é jeju gi, nungmoq eq rahá joq nyì sháng gaq ô!

HPILEMON Chyáng Hun Kat é Laiká (Philemon)

¹ Hpilemon ê, Hkrisduq Yesuq é yanmai htóng lúng nyi sù, ngò Poluq eq nga-nhùng é gumang Timohti nhik gi, ngá-nhik chyitdap é mú wùn luzúm nghut é sù nang lé le,

² ngá-nhik é gu-nhá Ahpiaq lé le, ngá-nhik é sarhé luzúm Arhkipò lé le, náng é yhum má huí lhum lhum kut é noqkuq hpúng lé le, dang kyô kat lhê.

³ Nga-nhùng é Íwa Garai Gasang eq Yhumsing Yesuq Hkrisduq chyáng má é, jeju eq nguóngón hkyô gi, nungmoq chyáng ru joq nyi sháng gaq ô!

Jeju Hkya-ôn É Hkyô Eq Kyúdung Dang

⁴⁻⁵ Ngò gi, Yhumsing Yesuq lé nang lumjing é hkyô lé le, sân-yúng bang banshoq lé nang chyitdap é hkyô lé le, wó gyô é yanmai, ngò kyúdung é hkùn, nang lé myit bún nyi luí, hkâ-nhám le ngá é Garai Gasang lé jeju hkya-ôn nyi lhê.

⁶ Ngò gi, Hkrisduq é matú nga-nhùng chyáng bo tô é ge é mú lhumjup lé sé gyô é hkyô lé, nang wó yù sháng gaq nghù, náng é lumjing hkyô lé, nang saksé hkâm é má akyú htoq râ matú, kyúdung byí nyi lhê.

⁷ Náng é chyitdap myit gi, ngo lé gyaí gabú nhang é eq wum-o wó yù nhang ri; hkâsu mù gâ le, gumang hpó ê, náng é yanmai, sân-yúng bâng é i-myyit má nguóngón yuqyo é hkyô wó yù bekô nghut ri.

Onesimu É Matú Tôngbán Byí É Hkyô

⁸ Haú su mù, nang kut gíng é muzó hkyô, ngò, nang lé pying kat lhê. Hkrisduq má, ngò gi, a gyuq a kyum é za nang lé haú wó kut nhang lhê nghut kôlhang, chyitdap myit đông za nang lé pying kat lhê.

⁹ Ngò, Poluq gi, mang bê htoq agó, ahkuí Hkrisduq Yesuq é yanmai htóng lúng sù le nghut luí,

¹⁰ ngò kyum hut huí nyi é u lé ngá zo dut lo é Onesimu é matú nang lé ngò dung tôngbán kat lhê.

¹¹ Yhang gi, hí hpyang náng é matú akyú a bo é nghut kôlhang, ahkuí gi, náng é matú le, ngá é matú le, akyú bò bê nghut ri.

¹² Ngò nhik htùng é Onesimu lé náng chyáng dum taú nhang kat lhê.

¹³ Haú gabú danglu é yanmai, ngò htóng lúng nyi é má náng é malai ngo lé garúm râ matú, yhang lé ngò shuí nyi to naú kôlhang,

¹⁴ ngò gi, nang myit a huí le hái le a kâm kut. Hau é yanmai, ngò, nang lé kut nhang é đông a nghut e za, nang ô nau é đông kut é san za nghut sháng gaq.

¹⁵ Hkâsu mù gâ le, náng chyáng mai yhang rayuq rabun zo gâng nyi é gi, yhang dum taú lò mù hkâ-nhám le nang eq rahá dum wó nyi nyi râ matú nghut lhê abe.

¹⁶ Yhang gi, htàng hpyang, jùn rayuq đông a nghut e za, jùn htoq má je ge é chyitdap gumang hpó dut râ nghut bê; ngá matú, yhang gi, ngò chyitdap dik é sù nghut lhê; náng matú kúm gi, byù rayuq đông le, Yhumsing Yesuq má gumang hpó rayuq đông le, je riyhang chyitdap râ sù dut bê nghut ri.

¹⁷ Haú mù luí, nang, ngo lé luzúm rayuq sù ngam é nghut le gi, ngo lé hap yu é su, Onesimu lé le lom hap yù aq.

¹⁸ Yhang, nang lé rajung jung shut pyâm é nghut le le, chyîn dap tô é nghut le le, haũ gi, ngá chyáng dap é chyîn nghũ sôn yù aq.

¹⁹ Ngò, Poluq gi, chyîn haũ xap rã nghũ luĩ, ngá loq eq yhang kã kat kôlhang, nàng yhang lhang, ngo lé asak chyîn xap rã sũ nghut é lé bũn nham aq.

²⁰ Nghut bê, gumang hpó ê, nang é yanmai, haũ Yhumsing má ngò gabú é hkyô wó yu nyi sháng gaq, Hkrisduq má ngá é i-myit lé lhoq ngui lhoq gón byĩ é đông, shũ, ngò pying kat é dang lé gyo byi laq.

²¹ Nàng gi, ngò tai kat é htoq má je lhom kut rã nghut é lé, hkyak za sé luĩ, ngò kã kat é nghut lhê.

²² Hau htoq agó, ngá é matú nyi rã gok lajang lãng aq. Hkãsu mù gã le, nungmoq kyũdung byĩ é yanmai, ngò gi, nungmoq chyáng dum wó jé rã lé myit myoqbyu nyi lhê.

²³ Hkrisduq Yesuq é yanmai, ngá é htóng lúng luzúm nghut é sũ Epahpra gi, nang lé shi-kyâm kat ri.

²⁴ Ngá é htuq luq htuq bang nghut é Markuq, Aristakuq, Demaq, Lukaq pé le, nàng lé shi-kyâm kat akô.

²⁵ Yhumsing Yesuq Hkrisduq é jeju gi, nungmoq é woi-nyĩ eq rahá za ru joq nyi sháng gaq ô!

HEBRE Pê Chyang Hun Kat é Laiká (Hebrews)

Garai Yhangzo Gi, Maumang Lagyô Pê Htoq Je Gyaú É Hkyô

¹ Lai ló bè ipyat pé má, Garai Gasang gi, nga-nhúng é ichyí íwá pé lé myiqhtoi pé dông alhíng lhíng eq adông dông mai dáng nyo wú bê nghut lhê.

² Nghut kôlhang, ló htâng é buinyì shí pé má, Yhang gi, Yhâng Zo dông mai nga-nhúng lé dang nyô bê nghut ri; Yhang gi, lhunglhang lé sítg sù dut rá matú haú Zo lé masat to mù, Zo dông mai, nyi mi-nyì, joq mijoq lé hpan to bê nghut ri.

³ Haú Zo gi, Garai Gasang é hpungwup shingkang duqbó é hkyô eq Yhâng é gungghyang isâm roq nghut nyi mù, lhunglhang lé Yhâng é a-tsam byíng é dang eq zú zítg tô ri. Yhang gi, yubak mara lé lhoq sân-yúng é hkyô lé ban kut é htâng, mauhkúng htoq má Hkikhkam dik Sù Garai Gasang é loqyo hkyam má zung to bê nghut ri.

⁴ Haú mù luí, Yhang gi, maumang lagyô pé é myíng htoq gyaú é myíng lé wó sítg yù bê nghut é eq rajung za, yhangmoq htoq je riyhang gyaú sù dut bê nghut ri.

⁵ Hkâsu mù gâ le, Garai Gasang gi,
"Náng gi, Ngá Zo nghut ri. Hkû-nyí, Ngò gi, Náng Wa dut bê nghut lhê."*

ga le, dum,
"Ngò gi, Yhâng Wa dut rá nghut mù, Yhang gi, Ngá Zo dut rá nghut lhê."*

ga le, maumang lagyô hká yuq lé hkâ-nhám wá taí wú é nghut lhê lúh?

⁶ Dum, Garai Gasang gi, Yhâng é zomún lé mingkan shut nhang hâng kat é hkûn,
"Ngá é maumang lagyô pé banshoq gi, Yhang lé noqkuq kó sháng gaq."*

ga taí ri.
⁷ Maumang pé eq séng luí Garai Gasang taí é má,
"Yhang gi, Yhâng é maumang lagyô pé lé lai su dut nhâng mù, Yhâng é dui-nhâng zoshâng wui lé, myishâm pé su dut nhang é nghut ri."*

gâ ri.
⁸ Nghut kôlhang, haú Zo eq séng luí, Yhang gi,
"Garai Gasang é, Náng é hkohkâm-tanghkuq gi, pyat dedu ahtum abyuq gítg nyi mù,
Náng é dingmán hkyô gi, Náng é mingdán lé uphkan é hkyô dut rá nghut lhê.

⁹ Náng gi, dingmán hkyô lé chyitdap bê nghut mù, agè ashop é hkyô lé a ngui byuq lô é nghut lhê.

Haú mù luí, Garai Gasang, náng é Garai Gasang gi, Nang lé, gabú nhang é xú but byí é dông, Náng é luzúm wui htoq je lhoq gyaú to bê nghut ri."*

ga taí ri.
¹⁰ Hau htoq agó, Yhang gi,
"Yhumsítg é, Náng gi, a-nham sân-hi má myidàm é apún awang lé hi tô é nghut mù,

mauhkûng pé gi, Náng é loqmú chyat nghut ri.

11 Haú pé gi, htên byoq byuq râ nghut lhê; nghut kôlhang, nàng gi, ru gîng nyi râ nghut lhê; haú pé banshoq gi, mebu su xau byuq râ nghut lhê.

12 Nàng gi, haú pé lé, bumó lé su đing yup râ nghut lhê; Nàng gi, haú pé lé, mebu su htaí pyám râ nghut lhê.

Nghut kôlhang, Nàng gi, rajung za ru gîng nyi râ nghut mù, Náng é zanwut pé gi, hkâ-nhâm le htùm râ a nghut."[✧]

ga le tai ri.

13 Garai Gasang gi,

"Ngò, náng é gye pé lé, náng é hkyi nang tanghkuq kut pyám byi é hkying jé shoq,

Ngá é loqyo hkyam shut zung nyi shi aq."[✧]

ga maumang lagyo hká yuq lé hkâ-nhâm wá tai wú é lúh?

14 Maumâng pé banshoq gi, hkyi yù hkyô lé hkam yù râ nghut é bang lé dojaú râ matú, nhang kat huí é mù wùn woi-nyi pé chyat za nghut akò, a nghut kó lúh?

2

Sadiq Byi É Hkyô

1 Haú mù lui, nga-nhúng gi, châng ngoq ló byuq é a hui zo sháng gaq, haú nga-nhúng wó gyô yu to bê hkyô lé je riyhang rago châng nyi râ dut lhê.

2 Hkâsu mù gâ le, maumang lagyo pé èq tai bê mungdang gi, gîng nyi mù, shut shaí lu lai é hkyô eq jino a gyô é hkyô hkangmó kut é sú gi, yhumsing eq gîng é mara dam byi é hui zo kô é nghut le gi,

3 nga-nhúng gi, haú-í yhang gyaú é hkyi yù hkyô lé haí su a ngàm kut é nghut jáng, nga-nhúng hkâsu wó hpang lut râ lúh? Hkyi yù hkyô haú gi, haú Yhumsing èq hí tai pyo htoq é nghut mù, Yhâng chyáng mai wó gyô yu é bang gi, haú hkyô têng é lé, ngamoq chyáng saksé shit bekò nghut ri.

4 Garai Gasang le, kumlhá pé, mauhpo muzó pé, laklai kumlhá myo myo eq, Yhang ô nau é eq rajung za Chyoiyúng Woi-nyi chyunghuq pé lé gàm byi é đông mai, haú hkyô lé saksé shit bê nghut ri.

Hkyi Yù Hkyô Hpông Byi Sú

5 Garai Gasang gi, maumang lagyo pé lé, ngamoq tai nyi é jé lô râ mingkan lé, uphkâng nhâng râ a nghut.

6 Rayuq yuq mai, rawò má saksé hkâm tô é gi,

"Byù gi, haí wá nghut mù, Nàng, yhang lé bûn nyi lhê lúh?

Byu Yhangzo gi, haí wá nghut mù, Nàng, yhang lé wú gôn nyi lhê lúh?

7 Nàng gi, yhang lé, maumang lagyo pé htoq ratsuí lhoq nyhum to bê nghut ri.

Nàng gi, yhang lé, hpungwup shingkang eq aróng bò nhâng mù,

8 jung hkangmó lé, yhâng é hkyiwa ô má tô to bê nghut ri."[✧]

gâ ri. Jung hkangmó lé yhâng é a-ô má tô to bê gâ é gi, Garai Gasang, haí lhang a myhit to loshoq yhang uphkâng é a-ô má tô to bê nghut é lé gâ lhê. Nghut kôlhang, yhang é a-ô má tô tô é jung hkangmó lé, ahkuí, nga-nhúng a myàng shí é za nghut lhê.

9 Nghut kôlhang, nga-nhúng gi, maumang lagyo pé htoq ratsuí zo lhoq nyhúm huí é sú Yesuq lé myang é nghut lhê. Yhang gi, Garai Gasang jeju mai, yuq

hkanmó é matú shí hkám byí é hui zo sháng gaq ga, shí-nò jamjau hkyô lé hkám zo bê nghut é yanmai, ahkuí, Yhang lé hpungwup shingkanq eq aróng bò nhâng bê nghut ri.

¹⁰ Zo wuí myo myo lé hpungwup shingkanq wó hkam yù nhâng sháng gaq ga, jung hkanmó lé Yhang é matú chyat eq Yhang đông mai chyat joq nyi nhang é Garai Gasang gi, wuíhke jamjau hui nhang é đông, yhangmoq é hkyi yù Sù lé lhoq gumjup byi rá matú htuk âng nyi ri.

¹¹ Haú byu pé lé chyoiyúng nhang é Sù eq lhoq chyoiyúng huí é bang gi, ikun ralhum za má é bang chyat nghut lhê. Haú mù, Yesuq gi, yhangmoq lé, gumang wui nghù rá lé a hoq é nghut lhê.

¹² "Ngò gi, Náng myíng lé, Ngá gumang wui chyáng taí pyô rá nghut lhê; Ngò gi, shíwa hpông é myoq hí má, Nang lé hkya-on mahkôn hkôn rá nghut lhê."^{*}
ga, Yhang taí ri.

¹³ Yhang gi,
"Ngò gi, Yhang lé lumhkau nyi rá nghut lhê."^{*}
ga le dum taí ri. Hau htoq agó,
"Ngò gi, Garai Gasang ngo lé byí é zoshâng wui eq shí má nyi nyi lhê."^{*}
ga, Yhang dum taí ri.

¹⁴ Haú zoshâng wui gi, sui sho eq nghut é yanmai, Yhang le, yhangmoq é xângzo gùng bo hkam yù bê nghut ri. Hau é yanmai, Yhang gi, Yhâng é shí-nò hkyô đông mai, shí-nò hkyô é a-tsam lé zuí zìng é sù nghut é nat Tsadán lé wó lhoq htên pyám rá eq,

¹⁵ yhangmoq é shí-nò hkyô lé gyuq é èq, yhangmoq é asak gón lé jùn đông zuí zìng to huí é bang lé, wó lhoq lhut rá nghut lhê.

¹⁶ Gè gè yhang, Yhang gi, maumang lagyô pé lé garúm é a nghut é za, Abraham é awut ashín pé lé garúm é sheq ru nghut lhê.

¹⁷ Haú nghut é yanmai, Yhang gi, Garai Gasang lé dojaú é má shogyo nhikmyín é eq lhumzui é hkyangjong mó wó dut rá eq, byu pé é yubak marâ é matú shíhtaí gunglik hkungga wó kut rá matú, hkyô hkanmó má Yhâng é gumang wui eq dù shoq kut é hui rá dut é nghut lhê.

¹⁸ Yhang gi, gunglaú huí é hkún, Yhânggùng yhang jamjau hui zo bê nghut é yanmai, gunglaú huí nyi é bang lé wó garúm yu é nghut lhê.

3

Yesuq Gi, Mosheq Htoq Gyaú É Hkyô

¹ Haú mù luí, mauhkúng mai wut yù huí é, chyoiyúng é gumang wui é, lagyo eq hkyangjong mó nghù nga-nhúng yín yu é Yesuq é hkyô lé rago myit wú keq.

² Mosheq, Garai Gasâng é yhùm gón má lhumzui é su, Yesuq le, Yhang lé masat yù sù Garai Gasâng chyáng lhumzui sù dut bê nghut ri.*

³ Yhùm kut sù gi, yhùm htoq je gyaú é aróng lé wó é su, Mosheq htoq, Yesuq gi, je gyaú é aróng lé wó gíng é lé myàng ri.

⁴ Hkâsu mù gâ le, yhùm hkanmó gi, rayuq yuq èq sai é chyat nghut ri. Nghut kôhang, Garai Gasang gi, jung hkanmó lé sai é sù nghut lhê.

⁵ Mosheq gi, Garai Gasâng é yhùm gón má dui-nhâng zoshâng rayuq đông lhumzui mù, Garai Gasang taí rá nghut é lé saksé hkám bê nghut ri.

^{*} 2:12 Hkya-on 22:22 ^{*} 2:13 Esai 8:17 ^{*} 2:13 Esai 8:18 ^{*} 3:2 Bun zo shí eq bun zo 5, 6 lhum má é Garai Gasâng é yhùm gâ é gi, Garai Gasâng é byu pé lé gâ é nghut lhê.

⁶ Nghut kôlhang, Hkrisduq gi, lhumzuí é zo rayuq dông Garai Gasâng é yhúm lé up ri. Nga-nhúng kúm gi, nga-nhúng lé wám é myit bò nhang é hkyô eq nga-nhúng gumrong nyi é myoqbyù hkyô lé myhik zing nyi é nghut jáng, Yhâng é yhúm nghut nyi bê.

A Lumjıng Bang Lé Sidiq Byı É Hkyô

⁷ Haù mù luı, haù Chyoıyúng Woi-nyı taı é eq rajung za, "Hkù-nyı, nungmoq gi, Yhâng é danghtë lé wó gyo kô é nghut jáng,
⁸ yoso má Yhang lé chyâm kô é u lé, gumlau toq é hkùn nungmoq é ıchyı iwâ pé kut kô é su, nungmoq é i-myt lé hkâlhoq htan to kô.
⁹ Nungmoq é ıchyı iwâ pé gi, myi xê zàn yhang Ngò kut é muzó lé myàng kôle, yoso haù má Ngò lé chyam lik bekò nghut ri.
¹⁰ Haù nghut é yanmai, Ngò gi, ipyat haù lé nhikjum yo mù, 'Yhangmoq é myit nhiklum gi, hkâ-nhám le hkyô nghoq byuq akò; yhangmoq gi, ngá é hkyô pé lé a sé kômù nghut ri.' nghũ taı é nghut lhê.
¹¹ Haù mù, 'Ngá é bánno jowò má yhangmoq hkâ-nhám le wó wâng kó râ a nghut.' nghũ, Ngò, nhikjum yô é eq dakâm dang taı bê nghut lhê."[☆]

gâ ri.

¹² Gumang wuı ê, nungmoq mâ é ó yuq le, haù rû dui nyi é Garai Gasâng chyáng mai, lhing taù ló byuq sê é, yubak mara byıng é, a lumjıng é i-myt a bò sháng gaq, sidiq nyi keq.

¹³ Nungmoq gi, ó yuq le, yubak marâ é mhaù zô é hkyô eq i-myt lhoq htan pyâm é a hui kó sháng gaq, "hkù-nyı" nghũ ru wó taı nyi nyi gi, nyı wuı, rayuq eq rayuq myit wum byı lhum nyi keq.

¹⁴ Nga-nhúng gi, sâng-hi mai wó to bê myit lùm hkyô lé, ló htáng shoq zuı gıng nyi é nghut jáng, Hkrisduq eq chòm zùm yap nyi é bang dut bê nghut ri.

¹⁵ Haù gi,

"Hkù-nyı, nungmoq, Yhâng é danghtë lé wó gyô é nghut jáng, gumlau toq é hkùn, nungmoq é ıchyı iwâ pé kut kô é su, nungmoq é i-myt lé hkâlhoq htan to kô."[☆]

ga taı é eq rajung za nghut ri.

¹⁶ Wó gyô yù mù, gumlau toq é bang gi, ô pé nghut akò lú? Haù bang banshoq gi, Egutuq ming mai Mosheq eq shuı htoq lo é bang nghut bum lhê, a nghut kó lú?

¹⁷ Myi xê zàn yhang Garai Gasang lé nhikjum yó nhang é bang gi, ô pé nghut akò lú? Haù bang gi, mara kut shut mù, yoso má shi leq byuq é bang nghut bum lhê, a nghut kó lú?

¹⁸ Jıno a gyô bùm kô é nghut jáng, Yhâng é bánno jowò má yhangmoq hkâ-nhám le wó wâng kó râ a nghut ga, Garai Gasâng eq dakam é bang gi, ô pé nghut akò lú?

¹⁹ Haù mù, yhangmoq a lumjıng kô é yanmai, a wó wâng kô é lé, nga-nhúng myang é nghut lhê.

4

Garai Gasâng É Byu Pé É Matú Bánno Buınyı Dông Nghut É Bánno Jowò

¹ Haù nghut mù luí, Garai Gasâng é bánno jowò má wàng rã danggidiq ru gíng nyi ashí nghut é yanmai, nungmoq mã é ó yuq le, haù má a hkyit hkap é a dut rã matú, nga-nhúng sidiq nyi sháng.

² Hkâsu mù gâ le, yhangmoq lé gabú danglù haù hko kyo bê su, ngamoq lé le hko kyo bê nghut lhê; nghut kôlhang, yhangmoq wó gyô é mungdang gi, yhangmoq é matú akýû a bò, haù mù gâ le, haù wó gyô é bang gi, lumjíng myit mai a lhom hap yù kô é yanmai nghut ri.

³ Nga-nhúng lumjíng bê bang za, bánno jowò haù má wó wang é nghut lhê. Haù hkyô gi,

"Haù mù, 'Ngá é bánno jowò má yhangmoq hkâ-nhám le wó wâng ko rã a nghut.' nghû, Ngò, nhikjum yô é eq dakâm dang taí bê nghut lhê."*
ga Garai Gasang taí bê eq rajung za dut é nghut ri. Nghut kôlhang, Yhâng é muzó gi, mau htoq xâng hkun mai ban kut to bê nghut lhê.

⁴ Hkâsu mù gâ le, "Garai Gasang gi, nyhit nyí nghû rã buinyi má Yhâng é muzó banshoq mai bánno bê nghut ri."* gâ é dang pé má, haù nyhit nyí nghû rã buinyi eq séng é hkyô lé rawò má Yhang taí tô ri.

⁵ Bánno jowò joq é eq séng luí, Yhang dum taí tô é gi, "Ngá é bánno jowò má yhangmoq hkâ-nhám le wó wâng kó rã a nghut."* gâ ri.

⁶ Bánno jowò haù má wàng rã bang ra-am nyi é danggidiq joq tô ashí nghut ri; hí hkún, gabú danglù haù wó gyô wú bê bang kúm gi, yhangmoq jìno a gyo kô é yanmai, a wàng kô é nghut lhê.

⁷ Haù mù luí,

"Hkû-nyí, nungmoq, Yhâng é dangtê lé wó gyo kô é nghut jáng, nungmoq é i-myit lé hkâlhoq htân kó."*

gâ é lé, ngò hí lé taí bê eq rajung za, Garai Gasang gi, gyai myáng é htâng má Dawiq dông mai taí é hkún, "Hkû-nyí" gâ é buinyi ra-nyí dum masat to bê nghut ri.

⁸ Hkâsu mù gâ le, yhangmoq lé, Yohuq eq bánno jowò byi bê ru nghut le gi, Garai Gasang gi, htâng má, gotú buinyi eq séng luí taí rã a nghut lo.

⁹ Haù mù luí, Garai Gasâng é byu pé é matú gi, Bánno buinyi dông nghut é bánno jowò ru joq tô ashí nghut lhê.

¹⁰ Hkâsu mù gâ le, Garai Gasang gi, Yhâng é muzó mai bannô é su, Garai Gasâng é bánno jowò má wàng é sù gi, yhumsing é muzó mai bánno rã nghut lhê.

¹¹ Haù nghut mù, yhangmoq é jìno a gyo hkýo é alik lé cháng mù leqbat é, ó yuq le a bò sháng gaq, nga-nhúng gi, bánno jowò haù má wó wâng shoq, a-tsam bo é í shikut sháng.

¹² Hkâsu mù gâ le, Garai Gasâng é mungdang gi, rû dui nyi é eq a-tsam bo é nghut lhê. Haù gi, shamsó íshut dap é sham htoq má je htoq é nghut mù, myit nhikhlum eq woi-nyí lé le, wuimyoq pé eq wui-nyún lé le, wó gam hkoq hkyang rot é nghut lhê; haù gi, nga-nhúng myit é hkyô pé eq myit sôn é hkyô pé lé wó jéyáng é nghut lhê.

¹³ Hpan tô é lhungláng gi, Garai Gasâng é hí mai wó haq pyâm é haí le a joq é nghut lhê. Jung hkangmó gi, nga-nhúng, jihpán shit ra rã Su é myoq hí má a wó nghot tô é hkyô, de de dut é nghut lhê.

Je Gyaú É Hkyangjong Mó Yesuq

¹⁴ Haù mù luí, nga-nhúng gi, Garai Gasâng é Yhangzo Yesuq nghut sù, mauhkúng pê shut hkyang doq ló bê nghut é gyaú é hkyangjong mó lé wó é nghut é yanmai, nga-nhúng yín yu to bê lumjing hkyô lé ging ging myhik zing nyí sháng.

¹⁵ Hkâsu mù gâ le, nga-nhúng gi, nga-nhúng wum nyhôm é hkyô pé lé a sê gyo byí é hkyangjong mó wó é a nghut é za, nga-nhúng su hkyô hkgangmó má gunglaú é huí wú kôlhang mara a bo é sù hkyangjong mó lé sheq wó é ru nghut lhê.

¹⁶ Haù mù luí, nga-nhúng gi, shogyo nhikmyín é hkyô wó yú râ eq, nga-nhúng ra chà é u má nga-nhúng le wó garúm râ jeju lé myang hô sháng gaq, hkyak lum é myit mai Garai jeju tanghkuq shut chyâng htep é sháng.

5

¹ Hkyangjong mó yuq hkgangmó gi, byu pê chyáng mai hkyin htoq yú huí é nghut mù, mara pê é matú, chyunghuq pé eq hkgungga pé nhông byi hkyô nghut é, Garai Gasang eq sêng é muzó pé má, yhangmoq é gunglik đông, hkyin masat to huí é bang nghut akô.

² Yhânggùng yhang gi, wum nyhóm hkyo é a-ô má nghut nyi é yanmai, yhang gi, bun a bóng é eq hkyô nghoq ló é bang lé nú-nhâm é đông wó shuí-ù é nghut lhê.

³ Wum nyhôm é yanmai, yhang gi, byu pê é marâ é matú le, yhânggùng yhang é marâ é matú le, hkgungga nhông byi râ dut é nghut lhê.

⁴ Ó yuq le, yhumsing gùng yhumsing aróng haù lé wó yu é a nghut; Arun lé su, Garai Gasâng eq wut yu é huí jáng sheq wó é nghut lhê.

⁵ Haù eq rajung za, Hkrisduq le, hkyangjong mó dut lo é hpungwup shing kang lé, Yhânggùng yhang kut yu é a nghut. Garai Gasang sheq, Yhang lé,

"Nàng gi, Ngá Zo nghut ri; Ngò, hkû-nyí Náng Wa dut bê nghut lhê."*

ga tai é nghut lhê.

⁶ Hau htoq agó,

"Nàng gi, Melahkizedek wó é hkyangjong ayá hkyô đông mai ahtum abyuq hkyangjong rayuq nghut nyi ri."*

ga, gó wô má le, Yhang tai to ashí nghut ri.

⁷ Yesuq gi, myidàm htoq má asak dui nyi é buinyi pé má, Yhang lé, shi é mai wó hkyi yú Su chyáng, ngaubyi ngau-nhap eq wut garû é eq, kyûdung é eq dung tóngbân bê nghut mù, Yhâng é hkgungga ging é ap nóng hkyo é yanmai, gyo byí é huí bê nghut ri.

⁸ Yhang gi, Zo rayuq nghut to kôle, Yhang hui zô é wuîhke jamjau hkyô mai jino gyo hkyô wó mhoq yú bê nghut ri.

⁹ Yhang gi, lhoq gumjup huí é hkún, Yhang é jino gyo bang banshoq é matú, ahtum abyuq é hkyi yú hkyo é awang dut byuq bê nghut é eq,

¹⁰ Melahkizedek wó é hkyangjong ayá hkyô đông mai hkyangjong mó dut râ matú, Garai Gasâng eq hkyin masat é huí bê sù nghut ri.

Woi-nyí Má Wáng Ra Bê Hkyô

¹¹ Ngamoq gi, shí hkyô eq séng luí tai râ gyai joq lhê; nghut kôlhang, nungmoq gi, ra lui za a sê gyô é bang nghut kô é yanmai, tai sân kyo wuî ri.

¹² Gè gè ga jáng, ahkui lhê ahkýing má, nungmoq gi, sará dut gíng bê bang nghut lhê; nghut kôlhang, Garai Gasâng é mungdang mâ é tengmán hkyo é awang lé, rayuq yuq èq nungmoq lé dum taú mhoq byi râ ru dut nyi akô nghut ri. Nungmoq gi, htan é zoshuq râ é bang a nghut, naú wing râ é bang ru nghut nyi ashî kô myhi-nhung!

¹³ Naú wing shuq râ é sù ó yuq le, zonú nghut nyi ashî mù, dingmán é hkyô lé mhoqshit é má a mán shi nghut ri.

¹⁴ Nghut kôlhang, htan é zoshuq gi, ge é hkyô eq agè ashop é hkyô lé wó sê gam hkoq yú shoq, hkâ-nhám le yhumsing gúng yhumsing lhoq mhân yu nyi é, kô ding bê bâng é matú ru nghut lhê.

6

¹ Haú mù luí, nga-nhúng gi, Hkrisduq eq sêng é mhoqshit hkyô awang lé tô to mù, myit kô ding é hkyô shut xoq sô é sháng. Nga-nhúng gi, shî-nò hkyô shut shuí jé é muzó mai myit lhíng hkyo é, Garai Gasang lé lumjíng hkyo é,

² baptsima pé, loq ke byi hkyô, shi é mai dum dui toq hkyô eq ahtum abyuq jéyáng hkyô eq sêng é mhoqshit hkyo é, apûn awang dum hí nó a ra lô é nghut lhê.

³ Garai Gasang gyô é nghut jáng, nga-nhúng gi, myit kô ding hkyô shut xoq so râ nghut lhê.

⁴ Myoq lhoq bóng é radàm hui bê bang, mauhkûng chyunghuq lé myang hap yú bê bang, haú Chyoiyúng Woi-nyí lé chôm hkam yú bê bang,

⁵ Garai Gasâng é mungdâng é gè hkyô eq jé lo nyi é ipyat é a-tsam pé lé myang chyam wú bê bang,

⁶ yhangmoq hpuq lhik lô byuq é nghut le gi, hká dông lé myit lhíng dum ge wó râ a nghut lo, haí mù gà le, yhangmoq gi, Garai Gasâng é Yhangzo lé dum jén sat pyâm é dut mù, Yhang lé de de rhoi pyám kô é nghut lhê.

⁷ Yhâng ahtoq má wo gyún é mau wuí lé shuq yú mù, yò mù saí bâng é matú akyú bo é hôwa nuqhpýi lhoq htoq byí é maumýi gi, Garai Gasâng é shimân jeju myang hap yu é nghut ri.

⁸ Nghut kôlhang, zu gâm eq myoq gâm yuq htoq nhang é maumýi gi, akyú a bò mù, nhíng pyâm é hui zo râ lé chiq râ ri. Haú gi, ló htáng má nyhê hkyô pyâm é hui râ nghut lhê.

⁹ Nghut kôlhang, chyitdap é gumang wuí ê, ngamoq gi, haú su nghú taí é nghut kôlhang, nungmoq é hkyi yú hkyô eq sêng é je ge é jung pé, nungmoq wó bekô râ nghú hkyak myit lum tô lhê.

¹⁰ Garai Gasang gi, a tara é sù a nghut. Yhang gi, nungmoq é muzó lé le, Yhâng é byu pé lé nungmoq garúm bê eq xoq luí garúm nyi é dông, Yhang lé nungmoq chyitdap é myit shit kô é hkyô lé le, a tô-myhí râ nghut lhê.

¹¹ Ngamoq gi, nungmoq é i-mýit myoqbyú hkyô wó byíng jup râ matú, nungmoq yuq hkangmó ipyat htum shoq xoq shikut nyi kó râ lé gyai ô nau ri.

¹² Ngamoq gi, nungmoq lagon bang dut byuq râ lé a ô nau é za, Garai danggidiq byí to bê é lé, lumjíng myit eq myit híng hkyô dông mai hkam yu é bang su châng kut kó râ lé ô nau é ru nghut lhê.

Garai Gasâng É Danggidiq Gíng Nyi É Hkyô

¹³ Garai Gasang gi, Abraham lé danggidiq tô é hkûn, Yhâng htoq gyaú é dakâm myíng lang râ rayuq lháng a nyi é nghut mù, Yhânggúng lé Yhang lang luí dakam é gi,

14 "Ngò gi, nang lé teng yhang shimân byi mù, nang lé awut ashîn myo myo byi rà nghut lhê."✠ gâ ri.

15 Haû mù, Abraham gi, myit hîng hîng láng yu é htâng má, byî tô é danggidiq lé wó yû bê nghut ri.

16 Byu pé gi, yhangmoq htoq gyaú su é myîng lé lang luî, dakâm kô é eq, yhangmoq dakam é dang lé saksé kut mù, dang-rháng é hkyô pé banshoq lé lhoq pân pyâm akò nghut ri.

17 Garai Gasang gi, Yhang myit hpyit tô é hkâ-nhám le a htaî lhik é hkyô lé, danggidiq byî tô é lé hkam yù rà bâng chyáng san za shit nau ri; haû mù luî, dakâm dang eq lhoq gîng to bê nghut ri.

18 Garai Gasang gi, mhaû a ge é yanmai, hkâ-nhám le a htaî lhik é hkyô í hkat nghut é danggidiq eq dakâm dang joq é nghut mù, Yhang haû su kut é gi, nga-nhúng hí má tô to byî é myit myoqbyù hkyô lé myhik zîng rà matú gaû é jowò shut hpang wàng bê bang nga-nhúng lé wum mó byî é dut rà matú nghut lhê.

19 Nga-nhúng gi, myit nhikhâm é shamtoq goknghe dông myit myoqbyù hkyô haû lé wó é nghut mù, haû gi, gîngtîng é eq gaû é hkyô nghut ri. Myit myoqbyù hkyô haû gi, mauhkûng noqkuq yhûm mà é pân-gyang ahkaû mà é sân-yûng gok má jé wang é nghut ri.

20 Jowò haû gi, nga-nhúng é akyu é matú, nga-nhúng é hí má wàng byî é sù Yesuq wang jé é jowò nghut ri. Yhang gi, Melahkizedek wó é hkyangjong ayá hkyô dông mai, ahtum abyuq é hkyangjong mó dut bê nghut ri.

7

Hkyangjong Melahkizedek É Hkyô

1 Melahkizedek gi, Salem myuq é hkohkâm eq Myhang Htâng é Garai Gasâng é hkyangjong nghut ri. Yhang gi, hkohkâm pé lé sat ûng pyâm luî dum taù lo é Abraham lé hui mù, shimân byi bê nghut ri.

2 Haû mù, Abraham gi, wó lo é jung hkangmó mà é, xê gambùm mà é ragambùm, yhang lé byi bê nghut ri. Sâng-hi lhê é Melahkizedek é myîng lichyúm gi, "dingmán hkyo é hkohkâm" gâ é nghut mù, htâng lhê é "Salem é hkohkâm" gâ é gi, "nguîngón hkyo é hkohkâm" gâ é nghut lhê.

3 Yhâng é înu îwa é hkyô eq byùxik labaù le, hi é buinyi eq asak htúm é hkyô le a kê to nghut ri. Yhang gi, Garai Gasâng é Yhangzo su, ahtum abyuq hkyangjong ru nghut nyi ri.

4 Yhang hkâ-í hkik lhê nghù é lé, myit wú keq. Haû îchyí îwa Abraham lháng gi, wó lo é mà é xê gambùm mà é ragambùm, yhang lé byi ri-nhung!

5 Hkyangjong dut bang Lewiq é awut ashîn pé gi, yhangmoq é gumang wui, Abraham mai nyi gyó lo é bang nghut kôle, tarâ má bo é eq rajung za, haû bâng chyáng mai xê gambùm mà é ragambùm lé hkyui yù rà dut é bang nghut akò.

6 Nghut kôlháng, Melahkizedek gi, Lewiq mai gyó lo é amyù a nghut kôle, danggidiq pé wó to sù nghut é Abraham chyáng mai xê gambùm mà é ragambùm hap yù mù, shimân byî ri.

7 Shimân byi sù gi, shimân byî é lé hkam yù sù htoq je gyaú sù nghut é lé, ó yuq le ûng-áng rà hkyô a joq é nghut lhê.

⁸ Hkyangjông pé eq séng lui ga jang, shi byuq sê é byu eq, xê gambùm mâ é ragambùm lé hkyui yu é nghut lhê; nghut kôlhang, Melahkizedek eq séng lui nghut jang, asak dui nyi é ga tai pyô byi é hui su eq hkyui yu é nghut lhê.

⁹ Xê gambùm mâ é ragambùm hkyui yu sù, Lewiq lhang gi, Abraham dông mai xê gambùm mâ é ragambùm byi bê nghu wô tai ri.

¹⁰ Hai mù gà le, Melahkizedek gi, Abraham lé hui é hkùn, Lewiq gi, yhang é ichyí iké é gungdu hkaù má ru bo tô ashí nghut ri.

Melahkizedek Eq Dù É Yesuq

¹¹ Haù Lewiq hkyangjong amyù pé é ipyat má, byu pé gi, jep é tarâ lé wô yu bùm kô é nghut mù, hkyangjong ayá haù mai gumjup hkyô wô yu kô é nghut le gi, hai mù lui, Arun wô é hkyangjong ayá hkyo dông a nghut é za, Melahkizedek wô é hkyangjong ayá hkyo dông lo é sù gotù hkyangjong rayuq ra shirâ lhu?

¹² Hkâsu mù gà le, hkyangjong amyù htaí é hkùn gi, tarâ le htaí yhang htaí ra dut é nghut lhê.

¹³ Haù su nghu tai é hkyô pé eq séng é Sù gi, gotù byuhú mâ é sù nghut mù, byuhú haù mai gi, ó yuq le hkungga gyap má dojaù wú é a nghut.

¹⁴ Hkâsu mù gà le, nga-nhung é Yhumsing gi, Yudaq byuhú mai gyô lo é awut ashín nghut é hkyô, san za nghut nyi ri. Mosheq kúm gi, byuhú haù eq séng é hkyô má, hkyangjong pé eq séng lui hai lé a tai é nghut lhê.

¹⁵ Melahkizedek eq dù é gotù hkyangjong rayuq pô htoq bê nghu, ngamoq tai bê hkyô gi, je riyhang san za dut bê nghut ri.

¹⁶ Yhang gi, iwa rayuq é awut ashín pé nghut râ lhê gà é tarâ dông hkyangjong rayuq lé dut é a nghut é za, a wô lhoq htên é asak é a-tsam eq rajung za lé dut é ru nghut lhê.

¹⁷ Hkâsu mù gà le,

"Nang gi, Melahkizedek wô é hkyangjong ayá hkyô dông mai, ahtum abyuq hkyangjong rayuq nghut nyi ri."^{*}
ga Yhang eq séng lui tai pyo tô é nghut lhê.

¹⁸ Haù hí lhê é chang râ tarâ gi, wum nyhôm é eq akyù a bo é yanmai, tô pyám bê nghut lhê.

¹⁹ Hkâsu mù gà le, haù jep é tarâ gi, gumjup hkyô hai a wô kut byi é nghut lhê. Haù mù, je ge é myit myoqbyù hkyô lajang byi é nghut lui, nga-nhung gi, myit myoqbyù hkyô haù mai Garai Gasang chyáng wô chyáng htep é é nghut lhê.

²⁰ Myit myoqbyù hkyô haù gi, dakâm hkyô a bo é a nghut myhi-nhung! Gông gi, dakâm hkyô a bo é za hkyangjông pé wô dut bekô nghut ri.

²¹ Nghut kôlhang, Yesuq kúm gi,

""Nang gi, ahtum abyuq hkyangjong rayuq nghut lhê!'

ga haù Yhumsing dakâm bê nghut mù, Yhang myit é hkyô htaí râ a nghut."^{*}
ga, Yhang eq séng lui Garai Gasang tai é hkùn, dakâm dang haù mai hkyangjong rayuq dut bê nghut ri.

²² Dakâm dang hau é yanmai, Yesuq gi, je ge é dangshikaq é pahkám wô yu sù dut bê nghut ri.

²³ Hkyangjông pé myo myo nyi râ dut é gi, yhangmoq é muzó a wô xoq zui shoq shi byuq hkyô eq hkùm zing pyám kô é yanmai nghut ri.

²⁴ Nghut kôlhang, Yesuq gi, ahtum abyuq dui nyi sù nghut é yanmai, Yhang gi, hkyangjong mù ayang ru zuí nyi rá nghut lhê.

²⁵ Haù mù luí, Yhang gi, Yhang đông mai Garai Gasâng chyáng lé jé é bang lé, hkâ-nhám le wó hkyi yu é nghut lhê; haì mù gà le, Yhang gi, yhangmoq é matú dúng tóngbán byi nyi rá matú, rû dui nyi é sù nghut lhê.

²⁶ Yesuq gi, chyoyúng é sù, mara hùn rá hkyô a bo é sù, sân-yúng é sù, yubak dap bang eq rahá a nghut shoq gotú san kut huí é sù, mauhkúng pè ahtoq má lhoq toq lhoq gyaú yu huí é sù nghut ri. Haù sù é hkyangjong mó gi, nga-nhúng rá é lé lajang byi rá htuk ang ri.

²⁷ Nyí nyí bui bui, yhumsing é marâ é matú hí hkungga nhông byi mù, byu pè é mara matú le hkungga nhông byí é gotú hkyangjong mó pé su, Yhang gi, a kut rá é sù nghut lhê. Yhang gi, Yhânggùng lé Yhang nhông byí é hkún, yhangmoq é yubak marâ é matú banshoq radàm za hkungga nhông byi pyám bê nghut ri.

²⁸ Hkâsu mù gà le, haù jep é tarâ gi, wum nyhôm é byu pé lé hkyangjong mó pé đông masat é nghut ri. Nghut kôlhang, Garai Gasang gi, haù jep é tarâ é htâng má lé jé é dakâm dâng eq, Yhâng é Yuqzo lé masat to bê nghut mù, Yhang gi, ahtum abyuq lhoq gumjup hui bê nghut ri.

8

Dangshikaq Asik É Hkyangjong Mó Yesuq

¹ Ngamoq taí nyi é dangkâng gi, shí đông nghut lhê: Nga-nhúng gi, haù sù é hkyangjong mó lé wó é bang nghut lhê. Yhang gi, mauhkúng htoq má, Hkikhkam dik Sù Garai é hkohkâm-tanghkuq é loqyô hkyam shut zùng to mù,

² byu eq saí é a nghut é za, haù Yhumsing eq saí é saksé zúm akying hkaú mã é, sân-yúng dik gok má dojaú é sù nghut ri.

³ Hkyangjong mó hkangmó gi, chyunghuq pé eq hkungga pé lé nhông byi rá matú wò hun to huí é chyat nghut lhê. Haù mù luí, hkyangjong mó shí yuq le, rajung jung nhông byi ra rá nghut lhê.

⁴ Yhang gi, mingkan htoq má nyi tô é ru nghut le gi, hkyangjong dut rá a nghut; hkâsu mù gà le, jep é tarâ đông ga jang, chyunghuq nhông jaú é byu pé nyi to gù bê nghut lhê.

⁵ Yhangmoq, sân-yúng dik gok má dojaú é hkyô gi, mauhkúng htoq má joq é azòng eq wupzo đông nghut ri. Haù nghut é yanmai, Mosheq gi, saksé zúm saí rá nghut é hkún, "Nang lé, bùm má tûn shit é azòng eq rajung za jung hkangmó wó saí shoq kut aq."* ga sidiq byi huí é nghut lhê.

⁶ Nghut kôlhang, Yesuq, gyoro sô xoq byí é dangshikaq gi, axaù lhùm htoq má je gyaú é eq rajung za Yhang hap yu tô é dojaú hkyô gi, yhangmoq é dojaú hkyo htoq má je gyaú é nghut lhê. Haù mù, dangshikaq haù gi, je ge é danggidiq pè htoq má awang hi tô é nghut lhê.

⁷ Hkâsu mù gà le, sâng-hi lhê é dangshikaq má rá é hkyô haì a bo é ru nghut le gi, gotú ra rá a nghut lo.

⁸ Nghut kôlhang, Garai Gasang gi, byu pè chyáng mara bo é myàng mù, taí é gi,

"Haù Israelaq é yhumbyù wui eq le, Yudaq é yhumbyù wui eq le, Ngò, dangshikaq asik to rá ahkying jé lo nyi ri ga haù Yhumsing taí pyo ri.

* 8:5 Htoq Ló 25:40

- 9 Haû gi, Ngò, yhangmoq é ìchýí íwâ pé lé loq èq zui mù, Egotuq ming mai shuí htoq lo é hkùn, yhangmoq eq tô tô é dangshikaq su dut rà a nghut. Haí mù gà le, yhangmoq gi, Ngá é dangshikaq lé a xoq cháng kô é nghut mù, Ngò gi, yhangmoq chyáng mai lhing ló byuq é nghut lhê ga haû Yhumsing taí pyo ri.
- 10 Shí gi, ahkyíng haû lai é htâng má, Israelaq é yhumbyù wuì eq Ngò to rà nghut é dangshikaq nghut lhê ga haû Yhumsing taí pyo ri. Ngò gi, Ngá é tará pé lé, yhangmoq é i-myt má kat byi mù, yhangmoq é myit nhiklhum má ka to byi rà nghut lhê. Ngò gi, yhangmoq é Garai Gasang nghut mù, yhangmoq gi, Ngá é byu pé dut kó rà nghut lhê.
- 11 'Haû Yhumsing lé sé keq.' ga, yhâng é gumang hpó lé nghut nghut, yhâng é chyangnâm mã é sù lé nghut nghut, mhoqshit é byù nyì rà a nghut lo, haí mù gà lé, yhangmoq lhunglhâng bang gi, tiq htâng sù mai kô htáng sù jé shoq Ngo lé sé kó rà nghut lhê.
- 12 Hkâsu mù gà le, Ngò gi, yhangmoq é agè ashop hkyô lé mara hkyut pyám byi mù, yhangmoq é mara pé lé dum a bun byi lo rà nghut lhê.[✧]
- gâ ri.
- 13 Dangshikaq haû lé, Yhang "asik" gà é gi, sâng-hi lhum lé, axau kut pyâm é nghut ri; xau ló byuq é haí le, hkâ-myháng a myáng mã byuq ló byuq rà nghut lhê.

9

Myidàm Saksé Zúm Má Noqkuq É Hkyô

- 1 Sâng-hi lhê é dangshikaq gi, noqkuq rà htúngtará pé eq noqkuq rà myidàm sân-yúng dik gok bo é nghut ri.
- 2 Sai tô é saksé zúm é sâng-hi gok má gi, haû myibung tsúng jang, siboí eq haû nhông byí é muk joq mù, haû gok lé gi, Chyoiyúng Jowò ga myhíng ri.
- 3 Í dang nghù rà gok pán-gyang é ahkaû mã é gok lé gi, Chyoiyúng Htâng é Jowò gà é nghut lhê.
- 4 Gok haû mã gi, namngón jung nyhê é hìng hkungga gyap eq hìng shup dangshikaq sidek joq ri. Dangshikaq sidek haû mã gi, mannaq muk bo é hìng yam, ahaq nyún tô é, Arun é dumbáng eq, dangshikaq luqlong pé bo tô ri.
- 5 Dangshikaq sidek é ahtoq mã gi, shíhtaí gunglik hkungga byi jang htoq mã wup tô é, Hpungwup shingkanng bò Sù é hkerubim* pé joq tô ri. Nghut kôlhang, ngamoq gi, ahkuí haû pé lé jihkúm nuqguq a wó taí san kyo é nghut lhê.
- 6 Haû dông jung hkanng mó ban lajang tô é hkùn, hkyangjông pé gi, yang sâng-hi gok mã wàng mù, yhangmoq é dojaú muzó lé wùn waq bekò nghut ri.
- 7 Nghut kôlhang, ahkaû gok má gi, hkyangjong mó za, yhânggùng é matú le, a sê é za byu pé kut shut é mará é matú le, nhông byi rà sui chùng mù, razàn mã radàm za wàng é nghut lhê.
- 8 Haû Chyoiyúng Woi-nyí gi, haû pé dông mai, sâng-hi é saksé zúm ru joq nyì nyì, haû Chyoiyúng Htâng é Jowò wàng hkyô a hpông shit shi é lé, tún shit nyì ri.

✧ 8:12 Yer 31:31-34 * 9:5 Hkerubim gà é gi, byù su su, dusak su su dut é, dùng dap é maumang lagyo rahú nghut lhê.

⁹ Haù gi, ipyat shi é matú tùn shit é azòng nghut mù, nhông byí é chyunghuq pé eq shigu hkungga pé gi, dojaú sù é i-myt lé a wó lhoq sân-yúng byí é hkyô lé taí nau é nghut lhê.

¹⁰ Haú pé gi, zojung, shugjung eq chí san chí séng hking ahú hú eq za séng é nghut mù, htúngli asik, lé joq é ahkýng jé shoq za tô tô é gungsho eq séng é tarâ pé nghut ri.

Hkrisduq É Sui

¹¹ Hkrisduq gi, shí má joq to gù nghut é gè hkyô pê é hkyangjong mó đông lé jé é hkùn, hpan tô é má a lom nghù nau é, byu èq saí é a nghut é, je kô é eq je gumjup é saksé zúm mai wang lai bê nghut lhê.

¹² Yhang gi, Chyoiyúng Htàng é Jowó má wang é hkùn, bainám eq nojúng zo pê é sui lé chúng mù wang é a nghut é za, Yhàng é suí èq yhang banshoq é matú radàm za ahtum abyuq é hkyi yù hkyô wó yù bê nghut ri.

¹³ Htúngli đông agot a-ù dut é bang lé lhoq sân-yúng râ matú, bainám eq nohtó zo pê é sui eq no-pyâ é myi-mhop lé, yhangmoq é ahtoq má hpyun gyun é hkùn, yhangmoq gi, ahtoq gungsho pyâm wó lhoq sansêng é hui kô é nghut lhê.

¹⁴ Haù nghut jáng, Garai Gasâng é hí má ra a bo é Yhànggùng lé, ahtum abyuq é Woi-nyí đông mai nhông byí é Hkrisduq é sui gi, rú dui nyi é Garai Gasang lé nga-nhúng wó dojaú sháng gaq ga, shi é hkyô shut shui jé é nyi yap sâmlai mai nga-nhúng é myit sôn sê é hkyô lé, je riyhang wó lhoq sanséng yu ri-nhung mhai!

¹⁵ Haù nghut é yanmai, Hkrisduq gi, danggidiq byi tô é ahtum abyuq é muizè lé, ji yù hui é bang wó hap yù kó sháng gaq ga, dangshikaq asik é gyoro sô xoq byi sù nghut nyi ri. Haù su wó kut é gi, sân-hi lhê é dangshikaq ahkaù má mara kut shut é bang lé lhoq lhut yù râ matú, yubak chyín xap zê ralhùm đông, Yhang shí hkám byi yanmai nghut ri.

¹⁶ Madat dang eq séng luí ga jang, madat dang taí sù haù shí bê hkyô saksé shit râ lhê.

¹⁷ Haí mù gà le, madat dang gi, rayuq yuq shí jáng za sheq lichyúm htoq é nghut lhê. Madat dang taí sù rú dui nyi nyi, haù gi, hkâ-nhám le lichyúm htoq râ a nghut.

¹⁸ Haù nghut é yanmai, sân-hi lhê é dangshikaq lhang gi, sui a bo lòm jáng lichyúm a htoq é nghut lhê.

¹⁹ Mosheq gi, haù jep é tarâ má bo é hkunmó hkangmó lé, shiwa byù banshoq bang lé ban taí pyo é hkùn, zam zam ne é saumaú eq jàm kyáng lé yù mù, nojúng zô é sui eq bainám sui eq wui nyhò tô é lé, chyúmding má le, shiwa byù banshoq bang lé le, hpyun gyùn é nghut ri.

²⁰ Yhang gi, "Sui shí gi, nungmoq cháng râ matú, Garai Gasang, hkunmó hkyô tô bê nghut é, dangshikaq tô tô é sui nghut lhê."* ga taí ri.

²¹ Yhang gi, saksé zúm eq dojaú é má chung é zè pé má le, haù eq rajung za sui haù hpyùn gyùn ri.

²² Gè gè gi, haù jep é tarâ má bo é đông ga jang, azíng zê aluq banshoq gi, suí èq lhoq sân-yúng é hui râ dut é nghut mù, sui htoq hkyô a joq jáng, mara hkyut byi hkyô le joq é a nghut.

²³ Haù mù, mauhkûng zè pè é azòng pé gi, hkungga haù pè èq lhoq sân-yúng é hui rá é nghut lhê. Nghut kôlhang, mauhkûng zè pé yhang gi, haù pè htoq je ge é hkungga pè èq lhoq sân-yúng é hui rá dut é nghut lhê.

²⁴ Hkâsu mù gà le, akying lhùm é azòng za nghut é, byu èq saí é chyoiyúng dik é jowò má Hkrisduq wang é a nghut é za, Yhang gi, mauhkûng má yhang wang é nghut mù, ahkuí gi, nga-nhúng é matú Garai Gasáng é hí má bo yap byí nyi é nghut lhê.

²⁵ Yhang gi, haù hkyangjong mó mai yhumsing é sui a nghut é sui lé chùng mù, Chyoiyúng Htâng é Jowò má zàn wui wàng luí kut é su, yhanggùng lé dum nhông byi byi kut rá matú mauhkûng má wang é le a nghut.

²⁶ Haù đông ru nghut le gi, Hkrisduq gi, mau htoq xâng hkûn mai shí hkâm é adàm myo myo nghut berà nghut lhê. Nghut kôlhang, ahkuí, Yhang gi, yubak mara huí sêng pyám byi rá matú, yhanggùng lé hkungga nhông byi rá ga ipyat pé ló htâng ló nyi é má, banshoq é matú radàm za htoq shit bê nghut ri.

²⁷ Byù gi, radá za shí rá nghut mù, hau htâng má tará jéyáng é hui rá nghut é eq rajung za,

²⁸ Hkrisduq gi, byù myo myô é yubak mara lé yu pyám byi rá matú, radá za hkungga nhông é hui bê nghut ri. Haù mù, Yhang gi, yubak mara wun pyám byi rá a nghut lo é za, Yhang lé láng nyi é bang lé hkyi yù hkyô yu lé byi rá matú, htâng má í dàm nghu rá dàm htoq shit rá nghut lhê.

10

Hkrisduq É Gùng Lé, Banshoq É Matú Radàm Za Nhông Byí É Hkyô

¹ Haù jep é tará gi, jé lô rá nghut é gè hkyô pè é akying a nghut é za, wupzo za nghut ri. Haù nghut é yanmai, jep é tará gi, zàn wui ru nhông byi byi kut nyi é eq rajung zâ é shigu hkungga pé đông mai, noqkuq rá matú chyâng lé é bang lé hkâ-nhám lé wó lhoq gumjup é a nghut.

² Tará haù wó lhoq gumjup byí é ru nghut le gi, yhangmoq nhông byí é hkyô nô pyám kó rá a nghut lí? Hkâsu mù gà le, haù noqkuq é bang gi, banshoq é matú radàm za lhoq sanséng huí é nghut jáng, yhangmoq é yubak mará é matú, hkâ-nhám le mara a bò bun lo kó rá nghut lhê.

³ Nghut kôlhang, shigu hkungga haù pé gi, zàn wui yubak mara pé lé lhoq pun byí é zè nghut ri.

⁴ Haù mù gà le, nohtò pé eq bainám pè é sui gi, yubak mara lé huí sêng pyâm é hkyô wó dut é a nghut.

⁵ Haù mù luí, Hkrisduq, mingkan má lé jé é hkûn, Yhang taí é gi, "Shigu hkungga eq hkungga lé Nàng a o é nghut mù, Nàng kúm gi, Ngá é matú gungdu hen to byi bê nghut ri.

⁶ Myi nyhé hkungga pé eq mara hkyut hkungga pé gi, Nàng lé gabú nhang é a nghut.

⁷ Hau htâng, Ngò gi, 'Garai Gasang é, Ngò eq séng luí chyúmding má kê tô é eq rajung za,

Nàng ô nau é hkyô kut rá matú, Ngò, shí má nyi lhê.' nghu taí é."*

⁸ Sâng-hi má, Yhang gi, "Shigu hkungga eq hkungga pé, myi nyhé hkungga eq mara hkyut hkungga pé lé, Nàng a o é htoq agó, haù pé lé Nàng a gabú é nghut lhê." ga taí ri. Haù jep é tará đông haù pé lé kut rá dut kôlhang taí é nghut ri.

* 10:7 Hkya-on 40:6-8

⁹ Hau htâng má, Yhang gi, "Nàng ô nau é hkyô kut râ matú, Ngò, shí má nyi lhê." ga tai ri. Haù gi, Yhang, htang lhum dangshikaq lé htaí masat to râ matú, sâng-hí lhum lé tô pyám é nghut ri.

¹⁰ Myit ô nau hkyô hau é yanmai, Yesuq Hkrisduq, Yhâng é gungdu lé hkungga đông banshoq é matú radàm za nhông byí é đông mai, nga-nhúng gi, lhoq chyoiyúng é huí bê nghut ri.

¹¹ Hkyangjong hkangmó gi, nyí nyí bui bui, yap mù, yhâng é hkyangjong muzó lé zui sai é nghut lhê. Yhang gi, yubak mara lé hkâ-nhám lháng a wó huí séng pyám byí é, rajung zâ é shigu hkungga lé, dum nhông byi byi kut é nghut lhê.

¹² Nghut kôlhang, hkyangjong mó nghut é Hkrisduq gi, yubak mara hkyut byi râ hkungga ralhum lé za, ahkyíng banshoq é matú ban nhông byí é hkún jáng, Garai Gasâng é loqyo hkyam shut zung to bê nghut ri.

¹³ Haù hkún mai, Yhang gi, Yhâng é gyê pé lé, Yhâng é hkyí nang jang kut byi râ lé lánng nyi é nghut ri.

¹⁴ Haí mù gâ le, Yhang gi, lhoq chyoiyúng é huí nyi bang lé, hkungga ralhum eq za, pyat dedú é matú lhoq gumjup byi bê nghut ri.

¹⁵ Haù Chyoiyúng Woi-nyí le, haù hkyô eq séng luí nga-nhúng lé saksé hkâm kyô ri. Sâng-hi má, Yhang tai é gi,

¹⁶ "Haù Yhumsíng tai ri, shí gi, ahkyíng haù lai htâng má, Ngò, yhangmoq eq to râ dangshikaq nghut lhê.

Ngò gi, Ngá é tará pé lé, yhangmoq é myit nhiklhum hkaù má kat byi mù, yhangmoq é i-myt má kâ to byi râ nghut lhê."^{*}

gâ ri.

¹⁷ Hau htâng, Yhang tai jat é gi,

"Ngò gi, yhangmoq é yubak mara pé eq tará a chung é muzó pé lé, bûn lô râ a nghut."^{*}

gâ ri.

¹⁸ Haù mù, mara haù pé lé hkyut pyám byi bê nghut jáng, yubak mará é matú hai hkungga le a ra lo nghut ri.

Hkam Jan Râ Hkyô

¹⁹ Haù mù luí, gumang wui ê, nga-nhúng gi, Yesuq é suí èq, haù Chyoiyúng Htâng é Jowò má wàng râ matú hkyak wó lum to bê nghut lhê.

²⁰ Haù gi, Yesuq é gungdu nghut é pán-gyang đông mai, nga-nhúng é matú hpóng byi bê nghut é asik eq rú dui nyi é hkyô nghut lhê.

²¹ Haù nghut é yanmai le, Garai Gasâng é yhùm lé up é gyaú é hkyangjong lé nga-nhúng wó é yanmai le,

²² nga-nhúng gi, gíngtíng é lumjíng hkyô mai sanséng é i-myt èq, Garai Gasâng chyáng é mù, mara bò bûn é myit sôn sê é hkyô mai, nga-nhúng lé lhoq sanséng râ matú nga-nhúng é i-myt lé hpyun gyún é huí nháng luí, nga-nhúng é gungdu gi, sâ-n-yúng wui èq chi byi é huí yù sháng.

²³ Nga-nhúng gi, nga-nhúng yín yu é myit myoqbyù hkyô lé zui gíngtíng nyi sháng; hkâsu mù gâ le, danggidíq byí to bê Sù gi, lhumzui Sù nghut lhê.

²⁴ Chyitdap hkyô eq ge é muzó pé má, nga-nhúng gi, rayuq eq rayuq hkâsu kut myit nhaù toq byí lhum râ hkyô lé, dat myit nyi sháng.

²⁵ Chôm huí zup lhûm nyi é hkyô lé, ra-am lhaq tô pyâm nyi kô é su, nga-nhúng gi, a tô pyâm é za, haû Buinyi chyâng lò bê nghut é lé nungmoq sê é eq rajung za, rayuq eq rayuq je riyhang myit wum byi lhûm nyi shâng.

²⁶ Nga-nhúng gi, tengmán hkyô lé sê yu é htâng má, shi-ngé ngé mara dum kut shut shut kut é nghut jáng, mara hkyut byi rã hkungga a joq lo.

²⁷ Tarã jéyáng hkyô eq Garai Gasâng é gye pé lé nyhê hkyô pyâm rã nghut é nhikmo-yô é myi lé za, gyuq chiq myit mai láng nyi rã dut bê nghut lhê.

²⁸ Mosheq é tarã lé he-ngik é sũ ó yuq le, saksé í sum yuq é dâng é yanmai, shogyo nhikmyin a huí é za sat pyâm é hui bê nghut lhê.

²⁹ Haû jáng, Garai Gasâng é Yhangzo lé hkyiwa ô má nâng pyeq bê sũ, yhumsing lé lhoq sân-yúng byi bê nghut é dangshikaq é sui lé a chyoyúng é zè dông kut pyâm bê sũ eq, jeju byi é Woi-nyi lé rhoi é sũ gi, hkã-í yhang gyaú é mara dam byi é hui gíng rã nghut lhê ngû, nungmoq wó myit akô lú?

³⁰ Hkãsu mù gã le, "Latô hpuq rã gi, Ngò ru nghut lhê; Ngò latô hpuq rã."* ga le, "Haû Yhumsing gi, Yhâng é byu pé lé tarã jéyáng rã nghut lhê."* ga le, tai é Sũ lé, nga-nhúng sê lhê.

³¹ Haû rû dui nyi sũ Garai Gasâng é loq hkaû má byit gyó wang é gi, gyuq chiq jung yhang nghut ri.

³² Nungmoq, haû maubó lé hap yu é* htâng, wuîhke jamjau huí é má gyai yhang shikut kôluí wó jân pyâm bê nghut é, hí lhê buinyi pé lé myit bun keq.

³³ Ra-u u má, nungmoq gi, byu pé hí má de rhoi shit é eq zing-rí é hui zo bekô nghut ri; ra-u u má, nungmoq gi, haû su hui zo bang eq rahá bo hui zo bekô nghut ri.

³⁴ Nungmoq yhang, je ge é eq ru gíng nyi é zè pé wó é lé sé kô é yanmai, nungmoq gi, htóng lúng bang lé shogyo nhikmyin bekô eq, nungmoq é sutzé pé lé sing yu pyâm byi é bang lé, gabú myit eq jân pyâm bekô nghut ri.

³⁵ Haû mù luí, nungmoq é hkyak myit lum tô é hkyô lé hkádú pyâm kó; agùn agó chyunghuq shigyaú é hui kó rã nghut lhê.

³⁶ Nungmoq gi, Garai Gasâng é ô nàu hkyô lé kut é hkûn, Yhâng danggidiq byi tô é lé wó hap yù rã matú, nungmoq hkam jan rã dut é nghut lhê.

³⁷ Hkãsu mù gã le, razup zo nghut jáng, "Haû lé lô rã Sũ gi, jé lé rã nghut mù, ahkyíng lhoq myáng rã a nghut.

³⁸ Nghut kôlhâng, Ngá é dingmán sũ gi, lumjíng myit mai asak dui rã nghut lhê.

Yhang nungzut zut é nghut le gi, Ngò, Yhang lé myit nguì rã a nghut."* ga tô ri.

³⁹ Nghut kôlhâng, nga-nhúng gi, nungzut zut mù htên byoq huí é bang a nghut é za, lumjíng mù hkyi yù huí é bang ru nghut lhê.

11

Lumjíng Myit Mai

¹ Lumjíng myit ngu é gi, nga-nhúng myit myoqbyu tô é lé hkyak wó rá ngu é eq nga-nhúng a myàng shí é lé joq lhê ngû hkyak sê é hkyô nghut lhê.

² A-nham lhê bang gi, lumjíng myit haû mai Garai eq owaq é hui kó é nghut lhê.

* 10:30 Tarã Pun 32:35 * 10:30 Tarã Pun 32:36 * 10:32 Haû maubó lé hap yu é gã é gi, gabú danglù lé sâng-hi wó hap yu é lé gã lhê. * 10:38 Hbk 2:3-4

³ Lumjǐng myit mai, nga-nhúng gi, nyi mi-nyì, joq mijojq lhunglhang lé Garai Gasang é hkunmó eq hpan tó é hkyó sê gyô é nghut lhê. Haù mù, myoq eq wó myang é pé gi, byu-myang é pé mai saí htoq tó é a nghut.

⁴ Lumjǐng myit mai, Abelaq gi, Ka-in kut é htoq je ge é hkungga, Garai Gasang lé nhông byi é nghut ri. Lumjǐng myit mai, yang gi, yhang é hkungga eq séng luí Garai Gasang hkya-ón é hkún, dingmán sù rayuq đông owaq é hui bê nghut ri. Haù mù, lumjǐng myit mai, yang gi, shi byuq bê nghut kôlhang, dang rú nyo nyi ashí nghut lhê.

⁵ Lumjǐng myit mai, Enuq gi, shi é a hui zo shoq, asak shí mai mauhkung shut shuí yu é hui bê. Yang lé, Garai Gasang shuí ló byuq bê nghut é yanmai, yang lé a wó myang lo nghut ri. Hkâsu mù gâ le, yang gi, shuí yu é a hui shí é hí má, Garai Gasang lé nguì nhâng sù rayuq đông owaq é hui sù nghut ri.

⁶ Lumjǐng myit a bo é nghut le gi, Garai Gasang lé a wó nguì nhang é nghut lhê. Haí mù gâ le, Yhang chyáng shikut luí lé jé é sù gi, Yang nyi é hkyô lé le, lhumzui myit mai Yang lé hô bang lé, Yhang eq shigyaú é lé le, lumjǐng rã dut é nghut lhê.

⁷ Lumjǐng myit mai, Noaq gi, a myang wú shí é hkyô pé eq séng luí sidiq byi huí é hkún, yhang é yhumbyù wui lé hkyi rã matú, gyuq hkunggâ é đông mai wui-sanghpo saí bê nghut ri. Yhang é lumjǐng myit mai, mingkan lé mara byi é nghut mù, lumjǐng myit mai lo é dingmán hkyo é jeju lé hkam yù sù dut bê nghut ri.

⁸ Lumjǐng myit mai, Abraham gi, yhang é muizè đông, htang má yang hap yù rã nghut é, Garai Gasang byi é jowò shut e ló rã matú ji yu é huí é hkún, jino gyo mù, yang hká shut e ló é a sé kôlhang, ê bê nghut ri.

⁹ Lumjǐng myit mai, yang gi, gó ming má nyi é byù bíng rayuq su, danggidiq byi tó é mau má nyi bê nghut ri. Yang gi, zúm pé má lúng é nghut mù, rajung zâ é danggidiq é muizè lé hkam yu é Isak eq Yakup le, zúm pé má lúng bekô nghut ri.

¹⁰ Hkâsu mù gâ le, Abraham gi, Garai Gasang eq azông hên mù saí tó é, gíng é apún awang pé eq mu é myuq lé myit myoqbyu nyi é nghut ri.

¹¹ Lumjǐng myit mai, Abraham gi, yhang é asak ipyat lai ló byuq é eq, Sarah le baùdung nghut to kôlhang, haù danggidiq byi Sù, lhumzui sù nghut lhê ga myit sôn yu é yanmai, iwa rayuq wó dut é hui bê nghut ri.

¹² Haù mù luí, yang gi, shí gùng đông nghut kôle, yang rayuq mai lo é awut ashín pé gi, mauhkung mã é kyi pé eq wuimau yàm mã é a ung nghap é semuì myhó myô lò bê nghut ri.

¹³ Byù haù bang banshoq gi, yangmoq shi é hkún jé shoq lumjǐng myit mai asak dui nyi kô é nghut lhê. Yangmoq gi, danggidiq byi tó é pé lé a hap yù kó nghut ri; nghut kôlhang, haù pé lé myang za myang kômù, we mai te yu akô. Yangmoq gi, myidàm htoq má gó ming byu pé eq byù bíng pé nghut é lé yín yù bekô nghut ri.

¹⁴ Haù su yín yu é byu pé gi, yangmoq yhumsing é ming lé ho nyi é bang nghut é lé tûn shít é nghut akô.

¹⁵ Yangmoq htoq lo é ming lé, yangmoq myit tui nyi kô é ru nghut le gi, dum tau ló rã ahkáng wó kô rã nghut lhê.

¹⁶ Ahkuí kúm, yangmoq gi, je ge é ming nghut é, mauhkung mingdán lé myit tuí nyi akô nghut ri. Haù mù luí, Garai Gasang gi, yangmoq é Garai Gasang nghu é hui rã lé a hoq é nghut lhê. Hkâsu mù gâ le, Yang gi, yangmoq é matú myuq ralhú lãjàng to byi bê yanmai nghut ri.

17 Lumjǎng myit mai, Abraham gi, Garai Gasâng êq yhang lé chyam é hkûn, Isak lé hkungga ralhũm dông nhông byi bê nghut ri. Haũ gi, danggidiq pé lé hap yu to bê sũ gi, yhâng é yuqzo zote lé nhông byi râ dâ é nghut lhê.

18 Garai Gasang gi, "Isak dông mai lo é lé, náng é awut ashín nghũ sôn byi râ nghut lhê."* ga yhang lé danggidiq byi to bê nghut kôle, yhang haũ su kut é nghut ri.

19 Abraham gi, shi é mai Garai Gasang wó lhoq dui toq lhê ga myit yu ri. Taí sháng ga jáng, Isak lé, shi byuq bê mai, yhang dum wó hap yu é nghut ri.

20 Lumjǎng myit mai, Isak gi, Yakup eq Eso nhik é htângnũng lhê é matú, shimân byi bê nghut ri.

21 Lumjǎng myit mai, Yakup gi, yhang shi ló râ u má, Yosep é yhangzô nhik lé shimân byi mù, yhâng é dumbáng-u má nè luí, noqkuq bê nghut ri.

22 Lumjǎng myit mai, Yosep gi, yhâng asak htũm ló râ u lé, Israelaq byu pé Egutuq ming mai htoq lò râ eq séng luí taí mù, yhâng é showui pé eq séng luí hkâsu kut râ hkyô lé pying to bê nghut ri.

23 Lumjǎng myit mai, Mosheq é yhângnu eq yhângwâ nhik gi, yhang hku lé é htâng má, yhang lé lhamó sum hkyap haq to bekô nghut ri. Haĩ mù gà le, yhangnhik gi, zoshâng haũ yúng é myâng kômù, hkohkam é mungdang lé a gyuq kó nghut ri.*

24 Lumjǎng myit mai, Mosheq gi, yhang kô lo é hkûn, Hpara-uq é byizô é yhangzo ga râ lé he-ngik pyâm ri.

25 Yhang gi, yubak marâ é ngón hkyô má rayoq zo ngón kún râ malaĩ Garai Gasâng é byu pé eq rahá hpuzô é hui râ lé sheq hkyin yù bê nghut ri.

26 Yhang gi, haũ Hkrisduq é matú rhoĩ huĩ é lé, Egutuq ming má é sutzê htoq má je riyhang hpaudap lhê ga myit sôn yu ri. Haĩ mù gà le, yhang gi, yhâng é shigyaũ chyunghuq lé myit myoqbyu nyi sũ nghut ri.

27 Lumjǎng myit mai, yhang gi, hkohkâm hpó nhikjum yô é lé a gyuq é za, Egutuq ming mai htoq lò byuq bê nghut ri. Yhang gi, myoq êq a wó myang é sũ Garai lé wó myang é sũ dông, hkam jân é nghut ri.

28 Lumjǎng myit mai, yhang gi, haũ zomún lé sat é maumang lagyô êq Israelaq byu pé é zomún lé a wó záng sháng gaq ga, Lhoqlhai Poĩ eq sui hpyún é hkyô le kut hĩ bê nghut ri.

29 Lumjǎng myit mai, haũ shiwa byu pé gi, Nhông Nè lé kyuq huĩ é myigũng htoq mai su laĩ byit bekô nghut ri; nghut kôlhãng, Egutuq byu pé le, haũ dông laĩ shikut wú kô é hkûn, yhangmoq gi, myup shi byuq bekô nghut ri.

30 Lumjǎng myit mai, shiwa byu pé, Yeriho myuq xêwâm lé nyhit nyĩ sô lhing é htâng má, xêwâm haũ leq gyop byuq bê nghut ri.

31 Lumjǎng myit mai, shiwa myhĩ Rahap gi, haũ Israelaq jó wú bang lé nguingón é eq lhom hkulum yu é yanmai, jĩno a gyo bang eq rahá sat pyâm é a huĩ é nghut lhê.

32 Haũ htoq lai luí, ngò haĩ tai jat ra shirâ lhú? Gidon, Barak, Samson, Yephata, Dawiq, Samuelaq pé eq myiqhtoĩ pé é hkyô lé taĩ râ ahkyíng ngò a wó.

33 Haũ bang gi, lumjǎng myit mai mingdán pé lé wó zân ung yù bekô, tengmán hkyô lé chung jai bekô, danggidiq byi to bê lé wó hap yù bekô, hkanghkyi pé é nhut lé wó myhĩ pyâm bekô,

* 11:18 Apũn 21:12 * 11:23 Haũ-u lé, hkohkâm hpó gi, Israelaq pé é yuqzo zonú wuĩ lé sat pyâm rá hkunmó hkyô tó é nghut lhê.

³⁴ myiduq myishâm lé wó sat pyám bekô, shamsó mai le wó h pang lut bekô nghut ri. Yhangmoq é wum nyhóm hkyô gi, wum taú bo byuq é dut bekô nghut ri. Yhangmoq gi, majan má a-tsam mó bò bang dut mù, maigan gyê pé lé wó ung pyám kô é nghut lhê.

³⁵ Myiwe wui gi, yhangmoq eq sêng é shi byuq bê bang asak dum lhoq tuí huí é lé, wó yù bekô nghut ri. Góbang gi, je ge é dui toq hkyô wó yù kó sháng gaq ga, lhoq lhut é huí râ lé he-ngik pyám kômù, zing-rí é gyai yhang hui zo bekô nghut ri.

³⁶ Ra-am gi, wuizui kut pyám byí é eq nhuq bat é hui bekô, góbang gi, shamtoq kyum hut huí é eq htóng lhúng é hui bekô nghut ri.

³⁷ Yhangmoq gi, luqgok eq dú sat é, í túm dut shoq yik hpyit é, sham èq sat pyám é hui bekô nghut ri. Yhangmoq gi, sau-kuq eq bainám-kuq wut mù, htot lhung wún lui, myung kyuaq é, zing-rí é eq rhoi pyám é hui bekô nghut ri.

³⁸ Yhangmoq lhumzui nyi kô é yanmai, mingkan gi, yhangmoq eq a gingdán nghut ri. Yhangmoq gi, yoso pé má, bùm pé má, luqhkyung pé eq myidong pé má nyi lhung wún bekô nghut ri.

³⁹ Haú bang banshoq gi, yhangmoq é lumjúng myit é yanmai, owaq é hui bê nghut kôle, yhangmoq ó yuq le, danggidid byí tô é lé a myang hkam yù kó nghut ri.

⁴⁰ Haí mù gâ le, nga-nhúng eq rahá za nghut jáng sheq, yhangmoq lhoq gumjup é wó hui kó sháng gaq ga, Garai Gasang gi, nga-nhúng é matú je ge é hkyô lajâng to byi bê nghut ri.

12

Garai Gasang, Zo Wuí Lé Mhoqshit É Hkyô

¹ Haú mù lui, nga-nhúng gi, haú myhó é saksé pé mhutdúm su nga-nhúng é lhungkyuaq má joq to bê nghut é yanmai, nga-nhúng lé hkúm tang é hkyô pé jung hkangmó eq, lui za lhoq nhúng byí é yubak mara lé dú pyám mù, nga-nhúng din râ matú tô tô é hkyô lé, hkam jan lui din e ló sháng.

² Nga-nhúng gi, nga-nhúng é lumjúng hkyo é apùn awang lé hí su eq lhoq gumjup byi sú nghut é Yesuq lé wú tsuq nyi sháng. Yhang gi, Yhâng é hí má joq tô é gabú hkyo é yanmai, hoq hpû é hkyô lé haí su a ngam é za, tapzîng má shí hkâm é hkyô lé jân pyám lui, Garai Gasang é hkokhâm-tanghkuq é loqyo hkyam shut zung to bê nghut ri.

³ Nungmoq gi, a ngu byuq râ eq myit wum a gyuí byuq kó sháng gaq, yubak dap bâng chyáng mai haú su htuaq htíng é hkyô lé jân pyám é Yesuq chyáng mai myit wum yù keq.

⁴ Nungmoq gi, yubak mara lé htuaq htíng shikut é hkyô má, nungmoq é sui shun pyám shoq yhang a kut shi kó nghut ri.

⁵ Hau htoq agó, nungmoq gi, zo wuí lé dông Garai Gasang nungmoq lé wum byí é dang lé tô-myhí pyám bekô lúh? Wum byi dang haú gi, "Ngá zo ê, haú Yhumsíng mhoqshit é hkyô lé agya alhá hkâkut pyám,

Yhang, nang lé tân é hkûn, myit wum hkâgyui,

⁶ haí mù gâ le, haú Yhumsíng gi, Yhang chyitdap é bang lé mhoqshit mù, zo rayuq lé dông,

Yhang hap yu é bang yuq hkangmó lé dam byí é nghut lhê."*

* 12:6 Sângkyang 3:11-12

⁷ Mhoqshit huí é hkyô má, wuîhkê é lé hkam jan keq. Garai Gasang gi, nungmoq lé, zo wuî lé dông kut é ru nghut lhê. Hkâsu mù gâ le, yhumsing é yhângwâ êq a mhoq é zo gi, ó wá nyi lhê lhú?

⁸ Nungmoq gi, yuq hkgangmó huí lai é mhoqshit hkyô lé, a hui kô é nghut jáng, dezô pé dông nghut byuq mù, zo sîng wuî a nghut lo kó.

⁹ Nga-nhúng banshoq bang gi, nga-nhúng lé mhoqshit é xângzo îwâ pé wó é bang chyat nghut mù, yhangmoq lé hkunggâ é nghut lhê. Haù nghut jáng, je riyhang, nga-nhúng é woi-nyí eq sêng é Îwâ é a-ô má nyi mù, asak duì râ dut ri myhi-nhung!

¹⁰ Nga-nhúng é xângzo îwâ pé gi, yhangmoq je ge dik bûn é lé, nga-nhúng lé rayoq zo mhoqshit é nghut ri. Nghut kôlháng, Garai Gasang gi, Yhâng é chyoiyúng hkyô má nga-nhúng wó bo lòm shoq, nga-nhúng é gè hkyô é matú, nga-nhúng lé mhoqshit ri.

¹¹ Mhoqshit é hkyô hkgangmó gi, mhoqshit u lé ngón hkyô a nghut é za, nò hkâm hkyô nghut nyi ri. Nghut kôle, mhoqshit hkyô haù lé hkam yù bê bâng é matú gi, htâng má, nguingón hkyô eq dingmán hkyo é ashí lhoq htoq byí ri.

¹² Haù mù luí, myúng byuq é nungmoq é loq pé eq wum nyhôm byuq é nungmoq é hkyihput pé lé wum-o lhoq kíng keq.

¹³ Hkyí hten bang a wó sô é a dut shoq, lhoq gê byí é wó hui kó sháng gaq, nungmoq so râ matú, hkyô lhoq nyhang nyí keq.

Garai Lé He-ngik Bang Dàm Byi Hui Râ Hkyô

¹⁴ Byù banshoq bang eq nguingón shoq nyí râ eq chyoiyúng râ matú wó dut é í shikut keq. Hkâsu mù gâ le, ó yuq le, chyoiyúng hkyô a bo é gi, haù Yhumsing lé myàng râ a nghut.

¹⁵ Ó yuq le, Garai Gasâng jeju lé a tô pyâm râ matú, sidiq keq. Haù, yuq htoq lô mù, wuîhke hkyô lhoq htoq é eq byù myo myo lé agot a-û dut nhang é nuí hko su, ó yuq lé le hkâdut nhâng kó.

¹⁶ Ó yuq le, ashop é dông gungsho zùm yap é hkyô nghut nghut, zang radún é matú, yhang wó tô é yuqzo zomún muizé ahko ahkáng lé ung zô pyâm é, Garai a lom é Eso su nghut nghut, a kut râ matú sidiq keq.

¹⁷ Nungmoq sê é eq rajung za, Eso gi, htâng má, shimân jeju haù lé hkam yù nau é hkûn, he-ngik pyâm é hui bê. Yhang gi, shimân jeju haù lé ngaubyi ngau-nhap êq hô kôlháng, yhang kut é hkyô lé a wó htai byí lo nghut ri.

¹⁸ Nungmoq gi, wó záng é eq myi duq nyi é Sinaq Bùm má le, mauchut tuq é, noq-singkyí dut é eq laidun lo é má le,

¹⁹ tut htê mying é eq, dang tai htê mying é má le, a jê é kó nghut ri. Dang htê haù lé wó gyô é bang gi, yhangmoq lé, dang a tai jat lo râ matú dung tóngbán akò nghut ri.

²⁰ Haù mù gâ le, yhangmoq gi, "Bùm haù má dusak pé záng jáng lháng, luggok èq dú sat râ dut lhê."[✠] ga Garai Gasang hkyô tô é hkunmó lé a wó hkâm kô é yanmai nghut ri.

²¹ Haù byu-myàng hkyô gi, lûm wú gyuq hpo dut é yanmai, Mosheq lháng gi, "Ngò, gyuq nân ri."[✠] ga tai é nghut ri.

²² Nghut kôlháng, nungmoq gi, Zi-un Bùm eq rû dui nyi é Garai Gasâng é myuq nghut é mauhkúng Yerusalem má, maumang lagyô pé ajùm ayò gabú ratung zup zîng é jang eq,

²³ mauhkúng htoq má myìng kâ to huí é, zomún pê é noqkuq hpúng joq jang má, jé lé bekô nghut ri. Haù mù, nungmoq gi, byù banshoq é tarâ agyì nghut sù Garai Gasàng chyáng le, lhoq gumjup huí é dingmán bâng é woi-nyì pê chyáng le,

²⁴ dangshikaq asik é gyoro so sù Yesuq chyáng le, Abelaq é sui htoq má je ge é danglù taí é, hpyùn gyùn é sui má le, jé lé é nghut bekô.*

²⁵ Nungmoq gi, dang nyô Sù lé a gyo a kut râ matú, sidiq keq. Myidàm htoq má sidiq byí é sù lé he-ngik pyám é bang, a lut kô é nghut lhê. Haù mù, mauhkúng mai nga-nhúng lé sidiq byí é Su chyáng mai, nga-nhúng lhing ló byuq é ru nghut le gi, je riyhang nga-nhúng a wó lut râ a nghut kó lí?

²⁶ Haù Garaí dang taí é u má, Yhâng é htê gi, mingkan lé lhoq nhùn kat ri, ahkuí kúm gi, "Ngò, mingkan lé za a nghut, mauhkúng pé lé le radàm dum lhoq nhùn râ nghut lhê."[✧] ga Yhang danggidiq byí to bê nghut ri.

²⁷ "Radàm dum" gâ é dang gi, haù a wó lhoq nhùn é pé wó myit to sháng gaq ga, hpan to huí é zè pé nghut é, wó lhoq nhùn é pé lé huí sêng pyám râ lé gâ é nghut lhê.

²⁸ Haù mù luí, nga-nhúng gi, a wó lhoq nhùn é mingdán lé hap yu to bê nghut mù, jeju bun luí, hpautap é eq gyuq hkunggâ é myit mai Garai Gasang hap yù gíng é dōng noqkuq sháng.

²⁹ Hkâsu mù gâ le, nga-nhúng é "Garai Gasang gi, nyhê jôm é myi nghut ri".[✧]

13

Ló Htáng Má Lhoq Pun Kyíng É Hkyô

¹ Rayuq eq rayuq, gumang yhangchang dōng chyitdap lhùm nyì keq.

² Byù bíng pé lé hkulùm râ hkátô-myí kó, hkâsu mù gâ le, ra-am gi, haù su kut nyí kô é yanmai, a sê é za maumang lagyô pé lé hkulum záng bekô nghut ri.

³ Nungmoq gi, htóng lúng bang eq rahá htóng lúng luzúm wuí dōng, htóng lúng bang lé le, nungmoq yhang jamjau hui zô nyì é dōng, hpuzô é bang lé le, myit bun keq.

⁴ Myiháng hkyô gi, lhunglhang bâng eq hpautap é hui râ dut é nghut mù, myiháng yhuphpú gi, sân-yúng râ dut lhê. Hkâsu mù gâ le, Garai Gasang gi, su-myi sulàng lú é bang eq ashop é dōng gungsho zùm yap é bang banshoq lé jéyáng râ nghut lhê.

⁵ Nungmoq é asak duì hkyô má, ngùn lé chyitdap é myit tô pyám mù, nungmoq wó é lé nhik dik nyì keq, haù mù gâ le, Garai Gasang gi,

"Hkâ-nhám le, Ngò, nàng eq a gang râ; hkâ-nhám le, Ngò, nang lé a tô pyám râ."[✧]

ga taí é nghut lhê.

⁶ Haù mù, nga-nhúng gi, hkyak lum é myit mai,

"Haù Yhumsing gi, ngo lé garúm sù nghut lhê yanmai, ngò, gyuq râ a nghut.

Ó yuq wá, ngo lé haù wó kut râ lú?"[✧]

ngù taí é nghut lhê.

* **12:24** Abelaq lé gi, yhangmang Ka-in eq sat é nghut luí, yhâng é sui gi, latô-hpuq râ matú nghut ri; nghut kólháng, Hkrisduq é sui kúm gi, hkyi yù hkyô lajang byí ri. ✧ **12:26** Hagi 2:6 ✧ **12:29** Tarâ Pun 4:24 ✧ **13:5** Tarâ Pun 31:6 ✧ **13:6** Hkya-on 118:6-7

⁷ Nungmoq lé Garai Gasâng é mungdang tai kyô é, nungmoq é hkyô-u shê bang lé, myit bun keq. Yhangmoq asak htum shoq nyi lai lo é sâmlai lé myit wú mù, yhangmoq é lumjing myit lé alik kut yù keq.

⁸ Yesuq Hkrisduq gi, a-nyi nap, hkû-nyi, htângnung pyat dedu rajung za nghut nyi ri.

⁹ Maù nhô zâ é mhoqshit hkyô ajung jung nai èq shuí ngoq huí é bang hkâdut kó. Zo bang lé hai akyû a byí é, htungli zoshuq èq a nghut é za, Garai jejù èq nga-nhung é myit nhiklum lé wum-o lhoq kîng yu é gi, gè hkyô nghut lhê.

¹⁰ Nga-nhung gi, saksé zúm má dojaú é hkyangjong pé zo râ ahkáng a wó é hkungga gyap ralhum wó é nghut lhê.

¹¹ Haù hkyangjong mó gi, dusak pé é sui lé, yubak mara hkungga dông Chyoiyung Htâng é Jowò má yu wang ri; nghut kôlhang, gungsho pé lé gi, byù nyi jowò shinggan má nyhê hkyô pyâm ri.

¹² Haù eq rajung za, Yesuq le, Yhâng é sui dông mai byu pé lé wó lhoq chyoiyung râ matú, myuq hkum shinggan má jamjau hpuzo mù shí hkám bê nghut ri.

¹³ Haù mù luí, nga-nhung gi, byù nyi jowò shinggan má Yhâng chyáng é mù, Yhang hui zô é rhoi hkyô lé é bo hui zo sháng.

¹⁴ Hkâsu mù gà le, nga-nhung gi, mingkan shí má ru ging nyi é myuq wó bang a nghut é za, jé lé lô râ myuq lé ho nyi é bang ru nghut lhê.

¹⁵ Haù mù luí, nga-nhung gi, Garai Gasâng é mying lé yín yu é nhutwui é ashi nghut é, hkyá-on hkungga lé, Yesuq dông mai, Garai Gasâng chyáng xoq xoq nhông byí nyi sháng.

¹⁶ Ge é hkyô kut râ eq góbang lé shuí gam chùng râ hkyô lé, hkâtô-myhí kó; hkâsu mù gà le, Garai Gasang gi, haù sú é hkungga pé lé ô ngui nyi ri.

¹⁷ Nungmoq é hkyô-u shê bâng é jìno gyo mù, yhangmoq é ahko ahkáng ô má nyi keq. Yhangmoq gi, jihpán shit râ dut é bang dông mai nungmoq lé upzúng nyi é nghut lhê. Yhangmoq é muzó pé gi, nungmoq é matú akyû a bo é wôlai a dut é za, gabú hkyô ralhum wó dut sháng gaq, yhangmoq é jìno gyô nyi keq.

¹⁸ Ngamoq é matú kyûdung byi kó laq. Ngamoq gi, sân-yung é myit sôn sé é hkyô wó mù, hkyô hkangmó má ge é dông asak dui râ lé ô nau lhê nghú, hkyak wó myit ri.

¹⁹ Ngò gi, nungmoq chyáng hân za wó dum jé sháng gaq, hau é matú je riyhang kyûdung byi keq nghú wum tai tsuq kat lhê.

²⁰ Sau hpung pé é sau zúng Sù mó nghut é, nga-nhung é Yhumsing Yesuq lé, haù ahtum abyuq é dangshikaq é sui dông, shí bê mai dum lhoq dui toq é sù, nguóngón hkyo é Garai Gasang gi,

²¹ Yhang ô nau é hkyô kut râ matú ge é hkyô jung hkangmó nungmoq lé lhoq gumjup byi mù, Yesuq Hkrisduq dông mai Yhang lé gabú nhang é hkyô lé, nga-nhung chyáng kut nyi sháng gaq. Hpungwup shingkang gi, Yesuq Hkrisduq chyáng pyat dedu ahtum abyuq ru joq nyi sháng gaq. Amen.

²² Gumang wui ê, ngò lhoq pûn kyíng é dang lé nungmoq wó hkam jan kó sháng gaq nghú, wum tai tsuq kat lhê; hkâsu mù gà le, ngò gi, nungmoq lé, laiká ratot za kâ kat é nghut lhê.

²³ Ngò gi, nga-nhung é gumang Timohti lhoq lhut kat é hui bê hkyô lé, nungmoq lé sé nhâng nau ri. Yhang shí má myap jé lé é nghut le gi, ngò, yhang eq rahá nungmoq lé, lé hui râ nghut lhê.

²⁴ Nungmoq lé shuî-u bang banshoq eq Garai Gasâng é byu pé banshoq lé bo shi-kyâm byi keq. Itali ming mâ é gumang wui gi, nungmoq lé shi-kyâm kat akô nghut ri.

²⁵ Jeju gi, nungmoq banshoq bâng chyáng ru joq nyî sháng gaq ô.

YAKUQ Hun Kat é Laiká (James)

1 Garai Gasang eq Yhumsing Yesuq Hkrisduq é jùn, ngò Yakuq gi, byo myín tô é Israelaq raxe í myû lé, nguingón dang shit kyô kat lhê.

Lumjîng Myit Lé Chyam É Hkyô Eq Hpaqchyî Byéng-yá

2 Ngá gumang wui ê, nungmoq é lumjîng myit lé chyam wú é hui jáng, shikut shirâng sê é myit jat nyi é lé, nungmoq sê nyi lhê nghut mù,

3 wuîhke jamjau ajung jung lé htúng huí é hkûn, gaú jowò mó nghut nyi lhê nghû luí myit yû keq.

4 Hau htoq agó, nungmoq banshoq gúm gumjup jup dut mù luí, haí le a langhpyut shoq, shikut shirang é myit gi, yhumsing kut nyi é muzó lé wó lhoq gumjup nyi sháng gaq.

5 Nungmoq má rayuq yuq hpaqchyî byéng-yá langhpyut tô é nghut le gi, haú banshoq bang lé, mara a hun é za, agùn agó byí nyi é Garai Gasang chyáng dúng nyi sháng gaq, haú jáng, Garai gi, yhang lé byi rá nghut lhê.

6 Nghut kôlháng, lum shut é myit a bo é za, lumjîng é myit éq dúng nyi sháng gaq, hkâsu mù gâ le, lum shut é sù gi, laidûn èq hik luí toq lo é nhông má é wuîhêng eq wui nyi ri.

7 Haú yuq gi, Yhumsing Garai chyáng má é haí le wó yû rá su a ngam nyi sháng gaq.

8 Yhang gi, myit-kó xan sù nghut luí, yhâng é hkyô hkat hkangmó má, mù htâng a nyang é sù nghut nyi ri.

Myûng Sû Eq Wó Sû

9 Myung é gumang hpó gi, waq toq huí é má, wó sù gi, lhoq nyhûm huí é má, gabú gumrong nyi sháng gaq.

10 Hkâsu mù gâ le, wó sù gi, wâhu banbó su woi byuq ló rá nghut lhê.

11 Bui gi, nyé é lai èq toq lô jáng, haú wâhu nyhuí byuq ló mù, abó le yoq gyó byuq é eq, hau é yúng sâm pé gi, htên byuq é su; wó sù le haú eq rajung za, yhang kut nyi é muzó má woi byuq ló rá nghut lhê.

Gunglaú É Hkyô

12 Wuîhke jamjau huí le, wó shikut shirang nyi sù gi, hkungsó wó nyí ri; hkâsu mù gâ le, chyam wú é ban hui jáng, yhang gi, Garai Gasang lé chyitdap é bang lé, byí tô é danggidiq asak janmaú lé, wó yû rá nghut lhê.

13 Gunglaú huí é sù ó yuq nghut kôlháng, gunglaú huí é hkûn lé, "Garai Gasang, ngo lé gunglaú nyi ri." nghû luí, a taí sháng gaq, hkâsu mù gâ le, agé ashop é hkyô gi, Garai Gasang lé wó gunglaú é a nghut, ó yuq lé le Garai Gasang gunglaú rá a nghut.

14 Nghut kôlháng, ó yuq nghut le le, yhumsing é gungsho ô nau é đông, shuí láng nghoq ló é nghut le gi, agúng alaú hui bê.

15 Gungsho ô nau é hkyô kúm gi, zogûng dut jáng, mara lé hku htoq lo ri. Mara kô ding jáng, shi é má jé rá nghut lhê.

16 Ngò chyttdap é gumang wui ê, i-myyit hkyô nghoq hkâ-nghoq nyí kó.

17 Gè réng é eq býing jup é chyunghuq lhunglhang gi, ahtoq shut mâ é nghut mù luí, maubó gung pé* é Yhângwa Garaí chyáng mai gyó lo é nghut ri. Yhang gi, ahpuc alik atau ahû dut é buishûm su dut râ a nghut.

18 Yhang hpan tô é amyû pé má, nga-nhúng gi, sáng-hi myhîng é ashi pé dut lo sháng gaq ga, Yhang gi, Yhang ô nau é hkyô cháng luí, haû tengmán é mungdang mai, nga-nhúng lé hkû to bê nghut ri.

Gyo Yu É Eq Cháng Kut É Hkyô

19 Ngò chytidap é gumang wui ê, shí hkyô lé nungmoq sê nyi akô. Byù ó yuq nghut kôlhang, gyô yù rá lé han nyi sháng; dang tái rá lé a hân sháng gaq; nhik-yo rá lé le hkâhân kó.

20 Hkâsu mù gâ le, byù nhik-yô é hkyô gi, Garaí Gasang ô nau é dingmán é dông asak dui hkyô wó lhoq htoq rá a nghut.

21 Haû mù luí, achaq achyut é banshoq eq ladu lai agè ashop é pé lé lhoq san lhoq sêng pyám luí, nungmoq é i-myt lé wó hkyi yù rá matú, i-myt unghkaû má Garaí Gasang hô tô é mungdang lé, nú-nhâm é myit eq hkam yu nyi keq.

22 Nungmoq gi, yhumsing gùng lé a mhaû pyám sháng gaq, haû mungdang lé wó gyô yu é bang za a nghut, haû dông cháng kut é bang le nghut nyí sháng gaq.

23 Mungdang haû lé wó gyô yù mù, a châng kut é sù ó yuq le, yhumsing é gungdu lé myoqjâm má wú sù eq wui ri.

24 Yhang gi, yhâng é gungdu lé wú yù mù, myoqdong lhik é eq, yhumsing gungdu hkâsu dut é lé tô-myhî pyâm ri.

25 Nga-nhúng lé wó lhoq lhut yu é gumjup é tarâ má, rago za wú tsuq nyí sù kúm gi, wó gyô yù mù tô-myhî pyám é sù a nghut, muzó eq tún shit é sù nghut é yanmai, haû yuq gi, yhang cháng kut é muzó má shimân jeju wó rá nghut lhê.

26 Byù rayuq yuq, "Ngò gi, noqkuq htùng lé lhoq dik sù nghut lhê." ga luí, myit tô kôlhang, yhumsing nhut shô lé a wó hkâng mù, yhumsing myit lé mhaû pyám é nghut le gi, haû yuq é noqkuq htùng gi, akôm za nghut nyi ri.

27 Iwa Garaí Gasâng é hí má sansêng é eq, rá é hkyô a bo é noqkuq htùng gi, wuihke jamjau hui é chuimó chuizô pé lé, châng wú garúm é hkyô eq, mingkan htoq mâ é achaq achyut é hkyô lé koi pyâm é hkyô nghut ri.

2

Myoqdong A Wó Hkyin Lhum

1 Ngá é gumang wui ê, hpungwup shingkang bo é nga-nhúng é Yhumsing Yesuq Hkrisduq lé lumjing hkyô má, byu é myoqdong lé hkâhkyin lhum kó.

2 Dangké, hîng loqchyop chyop luí, réng é mebu wut é sù rayuq eq ajeq amyha é mebu wut é asho awuí é sù rayuq gi, nungmoq é tarajong má wang lò kô é nghut le,

3 haû réng é mebu wut é sù lé, nungmoq lhom wú mù je hkunggâ é èq, "Shí aróng wó é jowò má zùng aq." dum, haû asho awuí é sù lé nghut jáng gi, "Mhó má yap to aq." haû su a nghut jáng, "Ngá é hkyî htàng má zùng aq." ga tái kô é nghut le gi,

4 nungmoq rayuq eq rayuq gamhkuí lhum luí, a ge é i-myt eq doqdân é bang dut lò bekô a nghut kó lhu?

* 1:17 Maubó gung pé gâ é gi, bui, kyi, lhamó lé gâ lhê.

⁵ Ngò chyitdap é gumang wui ê, gyô yù keq, lumjǐng hkyô má wó sùt nyi luí, gidíq tō tō é mingdán é silí wunlí lé, Yhang lé chyitdap bang wó hkam yù sháng gaq ga, Garai Gasang gi, myigùng htoq má é asho awuí é bang lé hkyin yù bê a nghut kó lúh?

⁶ Nungmoq kúm gi, asho awuí é sù lé a hpau a yùm kut pyám bekô nhung; wó bang sùt bang kúm gi, nungmoq lé zik zo mù luí, yhumsing é loq èq yhang, tarâ tingnyâng shut she hkyut ló bekô, a nghut kó lúh?

⁷ Nungmoq eq sêng é kô dik é myǐng lé lhang, yhangmoq yhang rhoi dang tai bum akô, a nghut kó lúh?

⁸ Haú mù luí, Chyúmdang má, "Náng gùng lé nàng chyitdap é su, náng é chyangnâm má é bang lé le chyitdap aq."* ga luí, tai tō é hkohkam tarâ lé, nungmoq tsuq za châng é nghut le gi, nungmoq ge é hkyô lé kut nyi bê.

⁹ Nghut kôhlang, byu é myoqdong lé nungmoq hkyin nyi kô é nghut le gi, nungmoq mara kut nyi gú nghut bê yanmai, haú tarâ lé shut é bang lé su tarâ jéyáng é hui nyi bekô rà nghut lhé.

¹⁰ Byù ó yuq nghut le le tarâ banshoq lé cháng kôhlang, haú má é ralhumm lum lé shut pyám jáng gi, tarâ banshoq lé shut pyám sù dut byuq rà nghut lhé.

¹¹ Hkâsu mù gâ le, "Su-myi sulàng hkâlú."* ga luí, hkgang tō é sù gi, "Byù lé hkâsat."* ga luí le, tai tō ashí. Nàng su-myi sulàng a lú kôhlang, byù sat é sù nghut le gi, tarâ lé shut é sù nghut bê.

¹² Haú su mù luí, nungmoq lé lhoq lhut kat é tarâ đông jéyáng doqdân é hui rà bang su, ru tai nyi keq; ru châng kut nyi keq.

¹³ Hkâsu mù gâ le, shogyo myit a bò sù gi, a shogyô é đông jéyáng doqdân é hui rà nghut lhé. Shogyo nhikmyin é hkyô kúm gi, jéyáng doqdân é hkyô lé wó ông lut rà nghut lhé.

Lumjǐng Myit Eq Zui Sai É Hkyô

¹⁴ Ngá gumang wui ê, byù rayuq yuq, "Ngò gi, lumjǐng myit bo lhé." ga tai nyi kôhlang, muzó a bo lom é nghut le gi, hai akyú bò rà lúh? Lumjǐng myit haú gi, yhang lé wó hkyi yù rà lúh?

¹⁵ Gumang, gu-nhá rayuq yuq a chin dut nyi é eq, nyi wui é zoshuq langhpyut tō é nghut le,

¹⁶ nungmoq chyáng má é rayuq yuq gi, yhangmoq é gungsho má rà é hkyô hai le a byi é za, yhangmoq lé, "Nungmoq wut é gùng lúm sháng gaq, zô é úng gyi sháng gaq, ngui ngui ngón ngón ló keq." ga tai é nghut le gi, hai akyú bò kó rà lúh?

¹⁷ Haú eq rajung za, lumjǐng myit má muzó a bo é nghut le gi, shi é eq rajung za nghut nyi ri.

¹⁸ Dum rahkyô gi, "Nàng gi, lumjǐng myit bo ri, ngò gi, muzo bo lhé. Muzó a bo é náng é lumjǐng myit ngo lé tũn shit wú aq, haú hkũn, ngá muzó èq ngá lumjǐng myit lé, nang lé ngò tũn shit rà nghut lhé." ga luí, rayuq yuq tai rà nghut lhé.

¹⁹ Garai Gasang rayuq za nghut é lé nàng lumjǐng ri-nhung! Nghut bê, haú gi, jô é hkyô nghut nyi ri, nat gâng pé le haú su yhang lumjǐng mù gyuq nán nyi akô nghut ri.

²⁰ Kyoq a bo é byù bam ê, lumjǐng myit má muzó a bo le akôm za nghut é hkyô lé, nàng sé nau lhé a nghut lúh?

21 Nga-nhùng é Iwa Abraham gi, hkungga gyap htoq má yhangzo Isak lé shigu hkungga kut é hkûn lé, zui sai é muzó mai dingmán é sú gâ é lé wó yû bê a nghut lúh?

22 Haû mù luí, yhâng é lumjúng myit gi, yhâng é muzó eq rahá za e ló é yanmai, lumjúng myit gi, jup byíng lo é lé, nàng wó myâng bê nghut ri.

23 Haû su mù, "Abraham gi, Garai Gasang lé lumjúng é nghut mù luí, yhang lé dingmán sú ga són byi bê."[☆] ga luí, kâ tô é Chyúmdang gi, dik to bê. Dum, yhang lé Garai Gasang é buinùm hpó ga luí le myhíng byi bê.

24 Haû mù luí, byù gi, lumjúng é myit eq baú za a nghut, zui sai é muzó eq mara hkyut san byi huí é lé, nungmoq bún sê nyi akô.

25 Haû eq rajung za, Rahap gâ é shiwa myhí gi, jowú su nhik lé lhom te yù mù luí, hkyô gó hkat đông nhang kat pyâm é hkûn lé, yhang zui sai é muzó mai dingmán é sú gâ é wó yû bê a nghut lúh?

26 Haû su mù, gungdu má woi-nyí a bo le gi, shi é eq rajung za, haû lumjúng myit má muzó jizó a bo le gi, shí gû nghut bê nghut ri.

3

Mhé Wuí É Shô

1 Ngá é gumang wuí ê, byù myo myo sará hkâkut naú kó. Hkâsu mù gâ le, ngamoq sê é eq rajung za, sará pé gi, je riyhang htan é đông jéyáng doqđân é hui zo rà nghut lhê.

2 Nga-nhùng banshoq bang gi, hkyô myo myo má myit lingbat é bang chyat nghut ri. Byù rayuq yuq dâng eq a lingbat é nghut le gi, yhang gi, jup byíng sú eq yhumsing é gùng lé wó hkang é sú nghut ri.

3 Nga-nhùng myang lé nhutkyáng kyáng byi jáng, myang hau é gungdu gón lé, nga-nhùng ô nau é đông wó cháng nhang lhê.

4 Haû mai gotú, wui-sanghpo pé lé wú wú keq, haû-í kô é sanghpo lé htan é laidûn eq mut é hui kôlhâng, sanghpo hkâng sú gi, gyai tiq é sanghpo shap eq za, yhâng ô nau é đông, haû pé lé wó hkang yu ri.

5 Haû eq rajung za, shô gi, tiq é gungsho za nghut kôlhâng, gyai gumrông nghutbûn nyi ri; wú keq, tiq dik é myizik zo gi, yoso mhanpúng mó lé wó nyé gyo nhang ri-nhung.

6 Shô haû gi, myi eq wuí nyi ri. Nga-nhùng é gungsho má, shô haû gi, agè ashop é mingkan dut lò mù, nga-nhùng é gungsho asak lé achayut dut nhâng luí, gungsho asak lé nyhê tuq kat ri. Haû gi, ngaraí myí eq nyhê tuq kat é nghut bê.

7 Dusak ajung jung, nghoq ahú hú, myi má yê é jung eq wuí hkaú má nyi jung banshoq gi, wó mhê yu é jung chyat nghut mù, byu pé gi, haû pé lé mhê yu nyi akô.

8 Nghut kôlhâng, shô lé kúm gi, byù ó le a wó mhê yù kó nghut ri. Haû gi, apyí abat, agè ashop, uphkâng a wó é eq, shi é jung duq eq byíng tô é jung nghut nyi ri.

9 Nga-nhùng gi, shô hau eq nga-nhùng é Yhumsing eq Iwa Garai lé hkya-on nyi lhê; hau eq za, Garai Gasang é gunglhô đông hpan tô é waxâng zo wuí lé le nhing pyâm nyi ri.

10 Nhut ralhum za mai, hkya-ôn é dang eq nhing é dang htoq lo ri. Ngá é gumang wuí ê, haû su kut é gi, a gè.

☆ 2:23 Apûn 15:6

11 Wuibúm radong za mai, chuí nghâm é wuì eq hkô é wuì wó htoq râ lúh?

12 Ngá gumang wuì ê, maihpáng gâm mai tsanlun shi, tsibiyiq nuí mai maihpáng shi, wó zui râ lúh? Haú eq rajung za, xô ngam é wuì gi, chuí nghâm é wuì lé wó lhoq htoq byi râ a nghut.

Ahtoq Mai Lo É Hpaqchyí

13 Nungmoq má, hpaqchyí byéng-yá bo é sù eq sê é dat é sù, ó nghut lhê lúh? Haú yuq gi, yhang hpaqchyí bo é hkyô lé, hpaqchyí mai wó yu é, myit lhoq nyhum é hkyo eq, yhumsing zui saí é ge é muzó đông tún shit nyí sháng gaq.

14 Nghut kôlhang, nungmoq é myit má ladu lai é manon é i-myt eq, lú lhum bat zik é i-myt bo é nghut le gi, hkâ-nghutbun kó, haú tengmán hkyô lé le hkâ-mhaú pyám kó.

15 Haú sù é hpaqchyí byéng-yá kúm gi, mauhkúng htoq mai gyó lo é hpaqchyí byéng-yá a nghut, haú gi, myigùng htoq mâ é, gungsho ô nau é eq, nat é hpaqchyí byéng-yá chyat nghut nyi ri.

16 Hkâsu mù gá le, manon é eq lú lhum bat zik é dut nyi le gi, ruk ruk rak rak é hkyô eq agê ashop é mù ajung jung jup hkúm nyi ri.

17 Mauhkúng htoq mâ é hpaqchyí byéng-yá kúm gi, sâng-hi awang má sansêng nyi ri; hau htâng má gi, nguóngón hkyô lé ô nau é, myit nùm é, jìno gyô é, shogyo nhikmyin sê é eq ge é ashí zui nyi mù luí, gamhkuí a bò, ahpuq alik a dut é eq, kut mhaú a sê é hpaqchyí byéng-yá nghut nyi ri.

18 Hau htoq agó, nguóngón é hkyô dat sô xoq é bang gi, nguóngón é shijí lé sân kat é bang nghut mù, ge é ashí wó yú kó râ nghut lhê.

4

Yhumsing Gùng Lé, Garai Gasâng Chyáng Ap To Râ Hkyô

1 Nungmoq má gyè dut lhùm é eq mabyoq jishùm gi, hkâmai htoq lo é lúh? Nungmoq ahkaú má gungsho ô nau é hkyô pé ngón hkyô hô mù, majan zân lhùm é yanmai, dut htoq lo é a nghut kó lúh?

2 Nungmoq yut yut myit ô nau nyi kôlhang, hai le a wó yú kó. Nungmoq byoq lhùm nyi é eq majan htoq lhùm nyi kôlhang, hai le a wó yú kó; hkâsu mù gá le, nungmoq, Garai Gasang lé a dung kô é yanmai nghut ri.

3 Nungmoq dung kôlhang, a myang yù kó nghut ri; hkâsu mù gá le, nungmoq é ngón kún hkyô má jai chùng langsâ pyám râ matú, shut é đông dúng nyi kô é yanmai nghut ri.

4 Su-myi sulàng lú é bang su giduq a gíng é bang ê, mingkan ô nau é hkyô lé buinùm du é myit gi, Garai lé a ngui é myit nghut é hkyô lé, nungmoq a sé kó lúh? Haú mù luí, mingkan ô nau é hkyô eq buinùm dù naú sù ó nghut kôlhang, Garai Gasâng é gyè nghut nyi ri.

5 Dum ralhum, nga-nhúng má Garai Gasang kat lhùng tô é woi-nyí gi, manon é myit lúng nyi ri ga luí, Chyúmdang má tai é gi, akôm nghut ri nghú, nungmoq myit ngam nyi akó lúh?

6 Nghut kôlhang, Yhang gi, je kô é jeju ru byí nyi lhê. Haú eq rajung za, Chyúmdang má,

"Garai Gasang gi, nghutbun é bang lé hkúm zing pyám kôlhang, myit lhoq nyhum é bang lé jeju byí ri."*

ga tai tô ri.

⁷ Haù mù, Garai uphkanğ é a-ô má ru nyi nyi keq; Nat Tsadán lé hkûm tang pyám keq; haù hkûn, yang nungmoq chyáng mai hpanğ byuq râ nghut lhê.

⁸ Garaí Gasâng chyáng huí é keq, haù hkûn, Yang, nungmoq chyáng huí lé lô râ nghut lhê. Yubak kut é bang ê, nungmoq é loq pé lé chí san chí sêng pyám keq. Myit koq xân é bang ê, nungmoq é myit nhikhâm lé lhoq chyoi lhoq yung to keq. Yudaq htung đông loq lé chí san chí sêng pyám keq gâ é lichyúm gi, i-myit, gungdu lé lhoq san lhoq sêng pyám é lé gâ lhê.

⁹ Nungmoq gi, myit yón é, iyon yôn é eq ngaubyi ngau-nhap é kut nyi keq. Nungmoq é wuihâ é hkyô lé gi, iyon đông, nungmoq é gabú é hkyô lé gi, yón kuq é đông htaí pyám keq.

¹⁰ Haù Yhumsing Garaí é hí má i-myit lhoq nyhum nyi keq, haù hkûn, Yang gi, nungmoq lé lhoq toq râ nghut lhê.

¹¹ Gumang wui ê, nungmoq yhangchang a ge é đông hkâtaí hpoí lhum kó. Yhumsing é yhanggu yhangmang lé a ge é đông taí hpoí nyi é sù, haù a nghut jáng, jéyáng é sù gi, haù tarâ lé a ge é đông taí hpoí nyi mù luí, jéyáng é sù nghut nyi ri. Haù tarâ lé nàng jéyáng nyi é nghut le gi, tarâ lé châng é sù a nghut é za, tarâ jéyáng sù nàng dut nyi ri.

¹² Garaí Gasang za tarâ byí tô é eq tarâ dara sù, wó hkyi yu é sù eq, wó lhoq htên é sù nghut nyi lhê. Hau é yanmai, náng é yhumkyo hpó lé jéyáng é sù nàng gi, ó yuq wa nghut lhê lhú?

Gyáng Dang A Taí Râ Hkyô

¹³ "Ngamoq, hkû-nyí napmá ra-nyí nyí, wà rawà wà shut ê mù, haù má razàn kô é nyí luí, hpugá wuiloq gá mù amyat wó myang yù râ." ga taí nyi é bang ê, gyo wú keq.

¹⁴ Napmá haí dut lô râ lé lháng, nungmoq gi, a sé ko. Nungmoq é asak gi, haí nghut nyi lhê lhú? Haù gi, razup rahtâng za htoq shit luí dum byuq byuq lô mù é, nghansoq eq rajung za nghut nyi ri.

¹⁵ Haù mù luí, nungmoq haù su ga taí nyi râ malaí gi, "Yhumsing Garaí đông é nghut le gi, ngamoq le ru wó dui nyi mù, shí le, mhô le, wó kut râ nghut lhê." ngù luí, wó taí râ nghut lhê.

¹⁶ Ahkuí kúm gi, nungmoq é gyáng é dang đông gumrong nyi akô; haù su gumrong é hkyô banshoq gi, agê ashop é jung chyat nghut nyi ri.

¹⁷ Haù mù luí, ge é mù sê kut to luí, a kut é sù gi, mara kut sù dut bê nghut ri.

5

Sùt Wó Bang Lé Sidiq Byí É Dang

¹ Sùt wó é bang ê, gyo keq, nungmoq chyáng jé lé lô râ é wuihke jamjau hkyo é yanmai, ngau garú nyi keq.

² Nungmoq é sutzê gi, htên bup byuq bê nghut ri; nungmoq é wutbu wutmê le manot eq zô pyám bê nghut ri.

³ Nungmoq é hing eq ngùn má lháng, jogyik zui byuq mù luí, haù jogyik gi, nungmoq é mara hkyam shut saksé dut byí é eq, nungmoq é gungsho lé myi su zô pyám râ nghut lhê. Nungmoq gi, jithùm buinyi shí pé má, sutzê lé za hkong to bekô nhung!

⁴ Wú keq, nungmoq é yohtung dùng yò yam nhâng mù luí, ahpau a byí é za, nungmoq mhaù zô tô é ahpau pé garú nyi é htê pé eq, mù zui bang garú é htê pé lé gi, haù a-tsam dik shoq bo é Garaí wó gyo byi bê nghut ri.

⁵ Nungmoq gi, myigùng htoq má hkik hkik hkâm hkâm wó nyi é eq, i-myyit ô nau é đông ngón hkyô chyat châng nyi bum akô. Nungmoq gi, sat rá buinyi matú yhumsing é gùng lé tsô myum to bekô nghut ri.

⁶ Haù dینگmán é sú* lé, nungmoq mara hún mù, sat pyám bekô. Yhang kúm gi, nungmoq lé a lhom hkùm zing nghut ri.

Myit Hing Hing Hkam Jan Ra Râ Hkyô

⁷ Haù mù luí, gumang wuì ê, haù Yhumsing dum jé lé é buinyi jé shoq myit hing é eq láng nyi keq ô! Hkyâm sai sú lé wú wú keq, yhang gi, myihpún mai ahpau dán é ashi lé wó yú shoq ga mau mún eq wò htáng htâng é mau wo gýùn é jé shoq myit hing hing láng nyi ri.

⁸ Haù eq rajung za, nungmoq le, Yhumsing Yesuq dum jé lé rá gi, chyâng lo nyi bê nghut é yanmai, myit hing é eq, i-myyit lé lhoq ging lhoq tít to keq.

⁹ Gumang wuì ê, nungmoq jéyáng a hui sháng gaq, nungmoq yhangchang hkâ-nyung nyâng lhúm nyi ko. Wú keq, Tará agyi gi, hkúmdong má jé nyi to bê nghut ri.

¹⁰ Gumang wuì ê, haù Yhumsing Garai é mying eq hko kyô é myiqhtoí pé wuìhke jamjau huí é hkùn, jân pyám é myit lé, nungmoq gi, ge é alik agân kut yú keq.

¹¹ Wú keq, shikut shirang é bang lé, nga-nhúng gi, hkungsô wó é bang nghu é nghut lhê. Yobaq hkâm jân é yanmai, Yhumsing Garai gi, yhang lé htáng má myo myo dum shimân byí é hkyô lé, nungmoq wó gyô wú bê nghut lhê. Haí mù gâ le, haù Yhumsing Garai gi, gyai shogyo nhikmyin é sú nghut nyi ri.

¹² Ngá é gumang wuì ê, banshoq má ahkyak dik é gi, haí le le hkâdakâm kó. Mauhkúng lé a nghut jáng, myigùng lé lang luí le hkâdakâm kó. Dakam é dang gotú lé le hkâtaí nyi kó. Nungmoq doqđán é a hui sháng gaq, nungmoq gi, nghut é le gi, "nghut lhê", a nghut é le gi, "a nghut", nghú za, taí keq.

Lumjng Myit Eq Kyûdung Râ Hkyô

¹³ Nungmoq má rayuq yuq wuìhke jamjau huí é nghut le gi, kyûdung nyi sháng gaq; rayuq yuq myit ngón nyi é nghut le gi, hkya-on mahkôn hkon nyi sháng gaq.

¹⁴ Nungmoq má rayuq yuq nõhpyo huí é nghut le gi, noqkuq hpúng mâ é nhik bô suwún wuì lé jì yù mù, haù bang gi, Yhumsing Yesuq é mying mai yhang lé xú but byi luí, kyûdung byi kó sháng gaq.

¹⁵ Haù su mù, lumjng myit eq kyûdung é dang gi, haù nõ sú lé lhoq gê luí, Yhumsing Garai gi, haù yuq lé lhoq toq yú rá nghut lhê. Yhang gi, yubak mara kut shut é nghut kôhang, hkyut pyám byí é hui rá nghut lhê.

¹⁶ Haù mù luí, nungmoq lhoq ge é hui kó sháng gaq, nungmoq é yubak mara lé rayuq eq rayuq yin lhum mù, kyûdung byi lhúm nyi keq. Dینگmán su é kyûdung dang gi, wó dut nhâng rá a-tsam wum-o myo myo bo nyi ri.

¹⁷ Eliyaq gi, nga-nhúng su i-myyit unghkaú bo é xângzo byù za nghut lhê. Nghut kôhang, yhang gi, mau a wò sháng gaq ga, wum kat o kat kyûdung jáng, súm zan eq lhamó hkyuq hkyap tup myigùng htoq má mau a wò shoq dut byuq é nghut lhê.

¹⁸ Kyû dum dúng kat jáng, mauhkúng gi, máu wo hkyô kat byi mù, myigùng gi, yhâng é kyô shi mui shi lé lhoq htoq byí wú bê nghut lhê.

* 5:6 Dینگmán é sú gâ é danghkun lé, Chyúmlaiká ra-am má gi, dینگmán é bang gâ ri.

¹⁹ Ngá é gumang wui ê, nungmoq chyáng mâ é rayuq yuq, haû tengmán hkyô mai nghoq ló byuq é hkûn, rayuq yuq gi, yhang lé tengmán hkyô shut dum wó shuí taû lo é nghut le kúm gi,

²⁰ haû shuí taû yù sù gi, yubak mara kut é sù lé, shut shai é hkyô mai tengmán hkyô shut shuí taû yù mù, myit woi-nyí lé shi é mai hkyi yù bé nghut é yanmai, yubak mara myo myo lé shuí nghop pyám byí é sù dut berâ lé, bûn nyí keq ô!

PETRUQ

Hî Dàm Hun Kat é Laiká (1 Peter)

¹ Yesuq Hkrisduq é lagyo nghut sù, ngò Petruq gi, Pontuq, Galatiq, Kapadokia, Asia eq Bihtuni mau pé má byo myín tô bum é, Yesuq Hkrisduq é jìno gyo râ matú le, Yhâng é suí eq hpyûn gyûn é hui* râ matú le, haù Woi-nyí é lhoq sân-yúng nyí é muzó dông mai, Íwa Garai Gasâng é hî te sê tô é hpaqchyí má cháng luí, hkyin yù hui é bang nghut é,

² Garai Gasâng eq hkyin htoq yù luí, mingkân é byùbúng dut bâng chyáng dang kyô kat lhê. Jeju eq nguingón hkyô gi, nungmoq chyáng agùn agó joq nyí sháng gaq.

Dui Nyí É Myit Myoqbyù Hkyô

³ Hkya-on kungtôn hkyô gi, nga-nhúng é Yhumsing Yesuq Hkrisduq é Yhângwa nghut sù Garai Gasang chyáng nghut nyí sháng gaq! Yhang gi, Yesuq Hkrisduq, shi é mai dum dui toq é hkyô dông, Yhâng é gyai shogyo nhikmyín é yanmai, nga-nhúng lé, asik hku é dum hui nhâng mù, rù dui nyí é myit myoqbyù hkyô lé wó nhang é htoq agó,

⁴ nungmoq é matú mauhkúng htoq má tô to byi bè nghut é, hkâ-nhám le, a hten a byoq é, agot a-ù a dut é, a hpoi byuq é muí lé le wó nhang é nghut lhê.

⁵ Nungmoq gi, lumjing kô é yanmai, ló htâng é ahkying má lhoq htoq shit râ rì rì nghut é hkyi yù hkyô jé shoq, Garaí é hpungwup a-tsâm eq upzúng é hui bang nghut akò.

⁶ Haù mù, nungmoq gi, ahkuí razup zo, wuìhke hkyô junghkang jungmó má yón hpuzô é hui kó râ nghut kôlháng, gyai yhang gabú nyí keq.

⁷ Wuìhke hkyô haù pé mai, nungmoq é lumjing myit gi, jet é hkyô lé wó chyam htoq mù, myi mai jên yù kôlháng htên byoq sê é hing htoq je gyaú luí, Yesuq Hkrisduq htoq shit é hkûn, hkya-on kungtôn hkyô, hpungwup shing kang eq aróng sitang lé, nungmoq wó kó râ nghut lhê.

⁸ Nungmoq gi, Yesuq lé a myang wú kôlháng, Yhang lé chyitdap bum akò; Ahkuí, nungmoq, Yhang lé a myàng kôlháng, Yhang lé lumjing kô é nghut mù, a ung htoq taí é eq hpungwup bo é gabú hkyô gi, nungmoq chyáng bying jup nyi ri.

⁹ Hkâsu mù gâ le, nungmoq gi, nungmoq é asak woi-nyí lé hkyi yù hkyô nghu é, nungmoq é lumjing myit é akyù lé wó yu nyi kô é nghut ri.

¹⁰ Hkyi yù hkyô haù eq séng luí, nungmoq chyáng jé bè nghut é jeju hkyô lé taí é myiqhtoí pé gi, gyai yhang sidiq myit eq jí jí chyun chyun ho gon wú bekò nghut ri.

¹¹ Yhangmoq gi, Hkrisduq wuìhke jamjau hui luí, hpungwup shing kang wó râ nghut é hkyô lé, yhangmoq má lúng nyi é, Hkrisduq é Woi-nyí mai te taí é hkûn, hkâ-nhám nghut râ eq hkâsú é u má nghut râ hkyô lé ho gôn wú bekò nghut ri.

¹² Mauhkúng mai nhang kat é Chyoiyúng Woi-nyí eq, nungmoq lé gabú danglù hko kyo bè bang mai, ahkuí nungmoq lé taí kyo bè nghut é hkyô

* **1:1** *Yhâng é suí eq hpyûn gyûn é hui gâ é gi, Yhâng é suí eq mara chí sân pyám byí é lé gâ lhê.*

pé lé, yhangmoq tái kô é gi, yhumsing matú dojaú é a nghut é za, nungmoq matú nghut é hkyô lé, yhangmoq gi, htoq shit sé nhang é hui bekô nghut ri. Maumang lagyô pé lhang gi, haú hkyô pé lé gyai wú nau bum akô nghut ri.

Chyoiyúng Nyi Râ Hkyô

¹³ Haú mù luí, zui saí râ matú nungmoq é i-myt lé hen to keq; yhumsing gùng yhumsing hkgang nyi keq; Yesuq Hkrisduq htoq shit é hkùn, nungmoq lé byi râ nghut é jeju lé, hkyak za myit myoqbyu nyi keq.

¹⁴ Jìno gyô é zoshâng wui su, myoq a bóng shí é pyat má nungmoq nyi tô é hkùn, nungmoq é agè ashop ô nau hkyô lé a châng kut é za,

¹⁵ haú nungmoq lé ji yu é Sù gi, chyoiyúng é su, nungmoq zui saí é hkyô banshoq má chyoiyúng nyi keq.

¹⁶ Hkâsu mù gâ le, "Ngò gi, chyoiyúng Sù nghut é yanmai, nungmoq le chyoiyúng nyi keq."* ga kâ tô ri.

¹⁷ Byù yuq hkgangmó é muzó lé, myoqdong a hkyin é za tarâ jéyáng é sù Íwa lé, nungmoq wut dung kô é yanmai, byùbing đông shí má nyi é u lé, Garai lé gyuq hkunggâ é myit mai asak ùi keq.

¹⁸ Hkâsu mù gâ le, nungmoq gi, nungmoq é íchýí íwâ pê chyáng mai bo gyó lo é hpau a dap é asak ùi hkyô mai, htên byoq sé é ngùn, hing èq hkyi yù huí é a nghut é za,

¹⁹ gumjup é eq mara a bo é sauzo nghut sù, Hkrisduq é hpaú dik é suí èq sheq hkyi yù huí é ru nghut é lé, nungmoq sê lhê.

²⁰ Yhang gi, mau htoq xâng hkun mai hkyin yu é hui bê nghut kôlhang, jìhtùm ahkyíng shí pé má sheq, nungmoq é matú htoq shit nhang é hui bê nghut ri.

²¹ Yhang lé, shi é mai lhoq ùi toq yù mù, hpungwup shinggang bò nhang é Garai Gasang lé, nungmoq gi, Hkrisduq đông mai lumjíng kô é nghut luí, nungmoq é lumjíng myit eq myit myoqbyu hkyô gi, Garai Gasang chyáng nghut nyi bekô nghut ri.

²² Ahkuí kúm, nungmoq gi, haú tengmán hkyô lé châng é đông mai, yhumsing gùng yhumsing lhoq sân-yúng yù bekô nghut mù, nungmoq é gumang wui lé, lhumzui é đông chyitdap bekô nghut luí, myit nhiklhum mai, rayuq eq rayuq gyai yhang chyitdap lhum keq.

²³ Hkâsu mù gâ le, nungmoq gi, htên byoq sê é amyui mai dum hkù huí é a nghut é za, Garai Gasang é, rù ùi nyi é eq ru gíng nyi é mungdang đông, htên byoq a sê é amyui mai dum hku é hui bang ru nghut lhê.

²⁴ Hkâsu mù gâ le,
"Byù lhunglhang bang gi, wàhu mhan eq pung ri, yhangmoq banshoq bâng é hpungwup shinggang gi, yò má é banbó pé eq pung ri;

wàhu mhan gi, nyhuí kyuuq byuq luí, banbó pé gi, yoq gyó byuq lhê;

²⁵ nghut kôlhang, haú Yhumsing é mungdang gi, ahtum abyuuq gíng nyi lhê."*
gâ tô ri. Haú gi, nungmoq lé hko kyo bê mungdang nghut lhê.

2

¹ Haú mù luí, i-myt dù é hkyô banshoq eq mhaú zô é hkyô banshoq, gegùn labyoq kut é hkyô, manon é hkyô eq lumù gansang é hkyô jung hkgangmó pé lé tô pyám keq.

² Asik hku é zonú pé nau lé ô nau gadaú é su, woi-nyí eq sêng é jet é nau* lé ô nau gadaú nyí keq, haú jáng, nungmoq gi, hau é yanmai, nungmoq é hkyi yù hkyô má wó kô myhâng kó rà nghut lhê.

³ Hkâsu mù gâ le, haú Yhumsing gi, gè sù nghut é lé, nungmoq chyam wú bekô nghut ri.

Rú Dui Nyi É Luqgok Eq Hkyin Yù Huí É Byù Myù

⁴ Byu pé mai hkyin htoq pyám kôlhang, Garai Gasâng é matú hpaudap luí, Yhâng èq hkyin yù huí é, rú dui nyi é Luqgok nghut sù, haú Yhumsing chyáng nungmoq jé lé é hkûn,

⁵ nungmoq le, rú dui nyi é luqgok pé su, woi-nyí eq sêng é yhûm† saí nyi é hui luí, Yesuq Hkrisduq đông mai, Garai èq hap yù ging é, woi-nyí eq sêng é hkungga nhông byi rà matú, chyoiyúng é hkyangjong amyú dut bekô nghut ri.

⁶ Hkâsu mù gâ le, Chyúmdang má, "Wú keq, hkyin yù huí é eq hpaudap é htungchyûn luqgok racham lé, Zi-un bùm má ngò lheq tô é nghut lhê;

Yhang lé lumhkau é sù gi, hkâ-nhâm le hoq hpú é hui rà a nghut."*
ga tai tô ri.

⁷ Haú mù, lumjíng bang nungmoq é matú gi, luqgok haú hpaudap é nghut lhê. Nghut kôlhang, a lumjíng bâng é matú gi,

"Haú yhûm saí bang hkyin htoq pyám é luqgok gi, htungchyûn mâ é ahkyak dik é luqgok‡ dut bê nghut ri."*
ga le,

⁸ "Byu pé lé, htûng leng rà luqgok eq myit leqbat nhâng rà luq mó cham dut bê nghut ri."*
ga le, tai tô ri. Yhangmoq gi, mungdang lé a cháng kô é yanmai, myit leqbat kô é nghut lhê. Haú dut rà lé, yhangmoq é matú masat to gù nghut bê nghut ri.

⁹ Nghut kôlhang, nungmoq gi, mauchut hkaú mai Yhâng é mauhpo maubó shut nungmoq lé wut htoq yù Su é mauhpo muzó lé wó tai pyô kó sháng gaq ga, hkyin yù huí é byuhú, hkohkâm hkyangjong amyú, chyoiyúng é byù myù, Garai Gasang eq sêng é byu pé nghut akô nghut ri.

¹⁰ Nungmoq gi, hí lé byù ra-myù a nghut wú kôlhang, ahkuí gi, Garai Gasâng é byù myù nghut bekô nghut ri; nungmoq gi, hí lé shogyo nhikmyin hkyô lé a wó yu wú kôlhang, ahkuí gi, shogyo nhikmyin hkyô lé wó yù bekô nghut ri.

¹¹ Chyitdap é luzúm wui é, nungmoq é asak woi-nyí lé majan zân nyi é, yubak mara byíng jup é ô nau gadaú hkyô lé koi pyám keq nghú, gó ming byu pé eq byùbing pé đông mingkan htoq má nyi é bang nungmoq lé, ngò, wum tai tsuq kat lhê.

¹² Haú a lumjíng shí é byu pé gi, nungmoq shut nyi ri ga, nungmoq lé mara hun bùm kôle, nungmoq é ge é muzó lé myàng kômù, nga-nhúng lé Garai Gasâng èq lé kûm é buinyi má Garai lé shigyaú kó sháng gaq, a lumjíng shí é byu pé é ahkaú má haú su ge é asak duì hkyô đông nyi yap keq.

Uphkâng Bang Eq Yhumsing Wui É A-ô Má Nyi Râ Hkyô

* 2:2 Woi-nyí eq sêng é jet é nau gâ é gi, Garai Gasâng é mungdang lé tai é nghut lhê. † 2:5 Woi-nyí eq sêng é yhûm gâ é gi, noqkuq hpúng lé tai nau é nghut lhê. * 2:6 Esai 28:16 ‡ 2:7 Ahkyak é luqgok gâ é gi, Hkrisduq lé tai é nghut lhê. * 2:7 Hkya-on 118:22 * 2:8 Esai 8:14

13 Haù Yhumsing é yanmai, byu pé mâ é ahko ahkáng wó bang banshoq é a-ô má nyi keq; kô dik é ahkáng ayá wó é hkosêng é a-ô má nghut kôle,

14 shut é hkyô kut bang lé dam byi râ matú eq jô é hkyô kut bang lé shigyau râ matú, hkosêng eq nhang tô é mauzaù pê é a-ô má nghut kôle, nyi nyi keq.

15 Hkâsu mù gà le, ge é hkyô kut é dông, byù nâ pê é a sé a dat é dang lé nungmoq lhoq zím pyâm é gi, Garai Gasang ô nau é hkyô nghut lhê.

16 Lut bê bang dông nyi keq, nghut kôlhang, agè ashop é hkyô lé nghop pyâm râ matú nungmoq é luthkyô lé hkâchûng kô; Garai Gasâng é dui-nhâng zoshâng wui dông nyi keq.

17 Yuq hkangmó lé rago za hkunggâ é hkyô shit keq; lumjîng é gumang wui lé chytidap keq; Garai Gasang lé gyuq hkunggâ nyi keq; hkosêng lé hkungga keq.

18 Dui-nhâng zoshâng wui ê, hkungga myit banshoq eq, nungmoq é yhumsing wui é a-ô má nyi keq; ge é eq nú-nhám bâng é a-ô má za a nghut, byuwui pê é a-ô má le nyi keq.

19 Hkâsu mù gà le, byù rayuq gi, Garai Gasang lé bûn nyi sù nghut é yanmai, mara dông a nghut kôlhang, wuîhke jamjau huí é hkyô lé hpuzô é lé, jân pyâm é nghut le gi, hkya-on gîng é sù nghut lhê.

20 Nghut kôlhang, nungmoq gi, mara kut shut é yanmai, nhuq bat é hkâm zo luí, haù lé jân nyi é nghut le gi, hai aróng wó kó râ lúh? Nghut kôlhang, nungmoq gi, ge é hkyô kut luí, wuîhke hui zô é lé jân pyâm é nghut jáng, haù gi, Garai Gasâng hí má hkya-on gîng é hkyô nghut lhê.

21 Nungmoq gi, haù hkyo é matú ji yù huí é nghut lhê; haí mù gà le, Hkrisduq gi, nungmoq é matú wuîhke hkyô huí é má, nungmoq lé alik dông tô to byi bê nghut mù, nungmoq gi, Yhâng é hkyî-kâm pé lé cháng râ dut lhê.

22 "Yhang gi, hai mara le a kut shut, Yhâng é nhut mai mhaù é lé a myàng."*

23 Yhang gi, rhoi é huí é hkûn, yhangmoq lé a dum taù rhoi; wuîhke hkyô huí é hkûn, kyuq é dang a taí. Haù kut râ malaí, tengmán é dông jéyáng é Su chyáng, Yhânggùng lé ap pyâm ri.

24 Nga-nhúng gi, yubak mara eq wó shi gang mù, dingmán hkyo é matú asak wó duí kó sháng gaq ga, Yhang gi, sik zîng má, Yhânggùng eq yhang, nga-nhúng é yubak mara lé Yhânggùng má wun pyâm byi bê nghut ri; Yhâng é dàm pê é yanmai, nungmoq gi, lhoq gê byi é hui bekô nghut ri.

25 Hkâsu mù gà le, nungmoq gi, hkyô nghoq byuq é sau pé su dut wú kôlhang, ahkuí, nungmoq gi, haù sau zúng Sù eq nungmoq é asak woi-nyí lé upzúng Su chyáng lhing taù lò bekô nghut ri.

3

Ikun Myhî Pé Eq Ikun Hpô Pé

1 Ikun myhî pé ê, haù eq rajung za, yhumsing é ikun hpó uphkan é a-ô má nyi keq; haù hkûn, yhangmoq má é rayuq yuq, haù mungdang lé a lumjîng kôlhang,

2 yhumsing é asak duí hkyô mâ é sansêng é hkyô eq hkunggâ é hkyô lé myàng kôjáng, dang dông a nghut é za, yhâng é yhumsing myhî é nyi yap é sâmlai dông mai yhang lé wó lhoq lhiq yú râ nghut lhê.

3 Nungmoq yúng é hkyô gi, ahtoq pyâm za nghut é, xâmban nik é dông, hîng zè nhôn chung é eq réng é mebu wut é dông mai lo é a ge nghut.

* 2:22 Esai 53:9

⁴ Hau é malaî, haû gi, Garai Gasâng é hí má gù bo é, nú-nhâm é eq zim za dut é woi-nyí é, a dat hpoi é yúng hkyô nghut é nungmoq é i-myt unghkaû mã é su é yúng hkyô sheq dut râ lhê.

⁵ Hkâsu mù gà le, gó hkún, Garai Gasâng chyáng myit myoqbyù bang nghut é, chyoiyúng é myiwe wui gi, yhangmoq gùng lé haû dông mhôn yù yù kut kô é nghut lhê.

⁶ Sarah gi, Abraham é jìno gyo luí, yhang lé yhâng é yhumsing ga wut é su, yhangmoq gi, ó le ô é yhumsing é ikun hpó uphkanq é a-ô má nyi akô nghut ri. Nungmoq gi, jô é hkyô lé kut mù, gyuq é hkyô a bo é nghut jáng, Sarah é byizô pé nghut bê.

⁷ Ikun hpó pé ê, haû eq rajung za, yhumsing é ikun myhí eq rahá nyi yap e ló é hkún, sê gyo byi mù, nungmoq htoq wum nyhôm é bang eq, nungmoq eq rahá asak jeju chyunghuq wunlí wó é bang dông, yhangmoq lé hkungga keq. Haû hkún, nungmoq é kyûdung dang lé a he-ngik pyám byi râ nghut lhê.

Ge É Kut Luí, Jamjau Hkam É Hkyô

⁸ Dang htâng sat é má, nungmoq banshoq bang gi, rayuq eq rayuq myit huí lhúm nyi keq; myit wú nô mù, gumang nhiktâng wui su chyitdap lhúm nyi keq; shogyo nhikmyin myit bò luí, i-myt nyhum nyi keq.

⁹ Agè ashop é lé, agè ashop é dông lató a hpuq é eq rhoi é lé rhoi é dông lató a hpuq é za, shimân byi keq; haí mù gà le, nungmoq gi, haû pé é matú, shimân jeju muí wó hkam yù kó sháng gaq ga, ji yu é hui kô é ru nghut lhê.

¹⁰ Hkâsu mù gà le,

"Asak ùi râ lé chyitdap é eq ge é buinyi pé lé myàng nau é sù ó yuq le, yhâng é shô lé, agè ashop é mai, yhâng é nhutwuí lé, mhaú dang taí é mai, lhoq kâng pyám ra râ nghut lhê.

¹¹ Yhang gi, agè ashop hkyô mai lhing tau mù, ge é kut ra râ nghut lhê; yhang gi, nguínón simsaq hkyô lé hô mù, châng hkat nyi ra râ nghut lhê.

¹² Hkâsu mù gà le, haû Yhumsing é myoqjí gi, dingmán bang lé wú nyi é nghut luí, yhangmoq é kyûdung dang lé, Yhâng é nohkyap eq gyo byi ri; nghut kôlháng, haû Yhumsing é myoqdong gi, agè ashop hkyô kut bang lé gye dông myang pyâm ri."✠

gâ tô ri.

¹³ Ge é hkyô lé, nungmoq gyai yhang kut nau nyi é nghut le gi, ó yuq wá nungmoq lé wó gunjang râ lhú?

¹⁴ Nghut kôlháng, dingmán hkyo é matú, nungmoq wuîhke jamjau huí le lháng, nungmoq gi, hkungsô wó nyi ri. "Yhangmoq gyuq é hkyô lé hkâgyuq kó; hkâgyuq dàn kó."✠

¹⁵ Nungmoq kúm gi, myit nhiklum má, Hkrisduq lé, Yhumsing dông jowò byi keq. Nang wó é myit myoqbyù hkyô lé myí é sù yuq hkangmó lé, haí mù wó é hkyô tù taí kyo râ matú, ayang hen to aq. Nghut kôlháng, nú-nhâm é eq hkunggá é dông haû lé kut nyi aq;

¹⁶ nungmoq é unghkaû myit san za dut nyi keq, haû hkún, Hkrisduq dông mai nungmoq wó é ge é a-kyang lé rhoi dang taí é bang gi, yhangmoq lumú gansang é yanmai hoq hpú é hui kó râ nghut lhê.

¹⁷ Garai Gasang ô nau é nghut le gi, agè ashop kut luí jamjau hkâm râ htoq má, ge é kut luí jamjau hkam le gi, je ge é nghut lhê.

¹⁸ Hkâsu mù gâ le, nungmoq lé Garai Gasâng chyáng shuí jé shoq, Hkrisduq gi, byu pé é yubak marâ é yanmai, radàm za shí hkâm pyâm bê nghut ri; haú gi, dǐngmán Sû, a dǐngmán bâng é matú shí hkâm byí é nghut lhê. Yhang gi, gungdu shí bê nghut kôhlang, haú Woi-nyí má lhoq dui é hui bê nghut ri.

¹⁹ Yhang gi, Woi-nyí dǒng, htóng lúng tô é woi-nyí pé lé é hko kyô ri.

²⁰ Woi-nyí haú pé gi, a-nham lé, Noaq é ipyat má wui-sanghpo lé Noaq tsuq nyi é hkùn Garai Gasang myit hǐng lǎng nyi é u lé, jìno a gyô é bang nghut akô. Wui-sanghpo má wàng mù, wui mai hkyi yù huí é byù shau luí, shit yuq za nghut akô.

²¹ Wui haú gi, ahkuí nungmoq lé le hkyi yu é nghut é baptisma é azòng nghut ri; haú gi, gungdu mã é agot a-û lé huí sêng pyám byí é a nghut é za, sansêng é unghkaú myit mai Garai Gasâng é hí má gidiq tô é ru nghut lhê. Yesuq Hkrisduq é dum dui toq hkyô dǒng, nungmoq gi, baptisma hkâm yù luí, hkyi yu é hui kô é nghut lhê.

²² Yesuq Hkrisduq gi, mauhkúng má doq ló luí, Garai Gasâng é loqyò hkyam má nyi tô é nghut mù, maumang lagyô pé, ahkáng ayá pé eq a-tsam pé gi, Yhâng uphkanq é a-ô má nghut nyi bum akô.

4

Garai Gasâng É Matú Asak Dui Râ Hkyô

¹ Haú mù luí, Hkrisduq gi, Yhâng é gungdu má hpuzo bê nghut é yanmai, nungmoq le, Yhang i-myt sâmlai hau èq yhumsing gùng má gyehking dǒng wut to keq, haí mù gâ le, yhâng é gungdu má hpuzo bê sù gi, mara eq gang bê nghut ri.

² Haú nghut é yanmai, yhang gi, yhang nyi tùm tô é mingkan asak dui hkyô má, agè ashop é xângzo byù ô nau é dǒng a nghut é za, Garai Gasang ô nau é dǒng asak dui é ru nghut lhê.

³ Hkâsu mù gâ le, nungmoq gi, laí lò bê ahkyíng má, a lumjǐng shí é byu pé hkyin kut nau é hkyô nghut é, shut é dǒng nyi zô lhum nau é i-myt, agè ashop é yut yut ô nau é hkyô, î shuq wut é hkyô, zo yê shuq yê mù achaq achyut kut é hkyô, ye lhai râ wut jung zoshuq lé yut yut ô nau é hkyô, achaq achyut é hparà noq hkyô pé má, ahkyíng luq shoq nyi laí lò bê bang nghut akô.

⁴ Nungmoq gi, ladu lai shoq achaq achyut kut é hkyô má, yhangmoq eq rahá a bo chǎng kut wún lo kô é nghut mù, yhangmoq gi, maú byuq luí, nungmoq lé lumù gansang pyâm akô nghut ri.

⁵ Nghut kôhlang, yhangmoq gi, dui nyi é bang eq shí bê bang lé tarâ jéyáng rà ri ri nghut to Sù lé jǐhpán shit kyo ra kó rà nghut lhê.

⁶ Hau é yanmai, ahkuí shi byuq bê bang lé lhang gabú danglù hko kyô é hui bekô nghut lhê; haú gi, gungdu eq séng luí ga jang, yhangmoq gi, byù dǒng mai tarâ jéyáng é hui râ eq, woi-nyí eq séng luí ga jang, Garai Gasang dǒng mai asak wó duí rà matú nghut lhê.

⁷ Lhunglhang htum râ ahkyíng gi, chyáng bê nghut ri. Haú mù luí, nungmoq kyú wó dung kó sháng gaq, bûn gyǐng luí, yhumsing gùng yhumsing hkang nyi keq.

⁸ Banshoq htoq má ahkyak é gi, rayuq eq rayuq gyai yhang chyitdap lhum é hkyô nghut lhê, haí mù gâ le, chyitdap myit gi, yubak mara myo myo lé wó nghop pyâm é nghut lhê.

⁹ Rayuq eq rayuq, taí nyung nyâng é hkyô a bo é za, rago hkulum lhum keq.

10 Yuq hkangmó gi, yhumsing wó hkam yù bê chyunghuq eq rajung za, góbang lé dojaú râ lhê; Garai Gasâng jeju chyunghuq ajung jung lé, lhumzui é eq rago chung jài râ lhê.

11 Rayuq yuq tai é nghut jáng, Garai Gasâng é mungdang haù eq yhang rajung za tai ra râ nghut lhê. Garai Gasang gi, lhunglhang má Yesuq Hkrisduq é yanmai hkya-ôn é hui sháng gaq, rayuq yuq dojaú é nghut jáng, Garai Gasang byi é wum-ô eq dojaú ra râ nghut lhê. Haù hpungwup shingkar eq a-tsam gi, Yesuq Hkrisduq chyáng pyat dedu ahtum abyuq joq nyi sháng gaq ô. Amen.

Hkristan Dut É Yanmai Jamjau Huí É Hkyô

12 Chyitdap é luzúm wui é, wuihke hkyô đông chyam é lé nungmoq hkâm zô nyi é hkûn, nungmoq chyáng maú nhô zâ é hkyô dut htoq bê đông, hkâgyuq dân kó.

13 Hkrisduq é jamjau hkyô pé lé bo hui zô é yanmai kúm gi, nungmoq gabú keq, haù hkûn sheq, Yhang é hpungwup shingkar eq rahá Yhang htoq shít é hkûn, nungmoq gi, gabú dik é hui kó râ nghut lhê.

14 Hkrisduq é mying yanmai, nungmoq gi, rhoi é hui zô é nghut jáng, hkungsô wó nyi ri; hkâsu mù gà le, hpungwup shingkar bo é Woi-nyí nghu é, Garai Gasâng é Woi-nyí gi, nungmoq chyáng nyi nyi ri.

15 Nungmoq mâ é rayuq yuq jamjau huí é nghut le gi, byù sat sù, hkau sù, gotú agè ashop kut sù, góbang é mù má cháng gunjang sù đông jamjau huí é a dut sháng gaq.

16 Nghut kôlhang, Hkristan rayuq đông nungmoq jamjau huí é nghut le gi, hkâhoq nyi kó, Garai Gasang lé kúm gi, mying hau é yanmai hkya-ôn nyi keq.

17 Hkâsu mù gà le, tará jéyáng râ ahkying gi, jé bê nghut luí, Garai Gasâng é ikun byu pé mai hi râ nghut lhê; haù gi, nga-nhúng mai hi é nghut jáng, Garai Gasâng é gabú danglù lé a châng é bang gi, hkâsu wá dut lò râ nghut lhê lú?

18 "Haù dingmán sù, hkyi yù hui râ wui é nghut le gi, tará a hkunggá é eq yubak dap é sù gi, hkâsu wá dut râ nghut lhê lú?"*
gâ tô ri.

19 Haù nghut mù luí, Garai Gasang ô nau é đông jamjau huí é bang gi, yhumsing gùng lé, lhumzui é Hpân Su chyáng ap byi mù, ge é lé xoq kut nyi ra râ nghut lhê.

5

Suwún Wui Éq Zorâm Wui

1 Nungmoq mâ é hpúng suwún wui lé, ngò, nungmoq é byinzùm suwún, Hkrisduq é jamjau hkyô pé é saksé nghut sù eq lhoq htoq shít râ nghut é Yhâng é hpungwup shingkar lé bo hkâm râ nghut sù đông mai sang kat kôlé:

2 Nungmoq lé ap to bê nghut é Garai Gasâng é sau hpúng* lé zúng rém bang dut mù, shuí u bang đông dojaú nyi keq; zúng rém é hkûn, a kut a ge luí kut é a nghut é za, Garai Gasang, nungmoq lé dut nhâng nau é su, yhumsing kâm é myit mai kut é nghut râ lhê; ngunzê lé a myoqnoq é za, shirông myit mai dojaú râ lhê.

3 Nungmoq é loq má ap byi to bê bang lé a ap zô é za, yhangmoq é hí má alik dut nyi keq.

* 4:18 Sânghyang 11:31 * 5:2 Sau hpúng gâ é gi, lumjing bang lé gâ lhê.

⁴ Haù jáng, Sau zúng Agyì mó† htoq shit é hkûn, nungmoq gi, hpungwup shíngkang bo é, hkâ-nhám le a shum a byuq é janmaù lé myang hap yù kó rà nghut lhê.

⁵ Zorâm wuì ê, nungmoq le, nungmoq htoq ipyat ko bâng é a-ô má nyì keq. Nungmoq lhunglhang bang gi, myit lhoq nyhum é hkyô lé mebu su wut to mù, rayuq eq rayuq dojàu nyì keq, hkâsu mù gâ le, "Garai Gasang gi, nghuthbùn é bang lé hkûm zing pyám kôlhang, myit lhoq nyhum é bang lé jeju byì ri."[✠]

ga tô ri.

⁶ Haù mù luí, ahkyíng jé jáng Garai Gasang nungmoq lé waq toq sháng gaq, nungmoq gi, Yhâng é hpungwup a-tsam mó bo é loq hkaù má, yhumsing myit lé yhumsing lhoq nyhum nyì keq.

⁷ Nungmoq é myit chiq hkyô banshoq lé, Yhâng htoq má dú kê pyám to keq, haì mù gâ le, Yhang gi, nungmoq é matú chiq byì nyì sù nghut lhê.

⁸ Yhumsing gùng lé yhumsing hkâng mù, machya nyì keq. Nungmoq é gyê nghut é nat Tsadán hpó gi, rayuq yuq lé wó zô myuì pyám shoq ga, mying wún é hkanghkyi su hkat gadaù jón wún ri.

⁹ Yhang lé htuq htíng pyám mù, lumjíng myit má gíngtíng nyì keq, haì mù gâ le, mingkan gón má é nungmoq é gumang wuì le, rajung zâ é jamjau hkyô pé hui zô nyì kó é lé, nungmoq sê lhê.

¹⁰ Haù mù, jeju banshoq é Garai Gasang gi, Hkrisduq má ahtum abyuq joq nyì é Yhâng é hpungwup shíngkang matú nungmoq lé ji yù bê nghut luí, nungmoq razup zo jamjau hui é htàng má, Yhang yhang nungmoq lé gumjup nhâng mù, wum bó nhâng luí, gíng gíng tíng tíng dut nhâng rà nghut lhê.

¹¹ Haù hpungwup a-tsam banshoq gi, Yhâng chyáng pyat dedu ahtum abyuq rú joq nyì sháng gaq. Amen.

Ló Htâng É Shi-kyám Dang

¹² Lhumzuì é gumang nghù ngò sôn yu é Sila èq garúm luí, ngò gi, nungmoq lé myit wum byi dang eq, myit wum byi dang haù pé gi, Garai Gasang é tengmán é jeju nghut é lé saksé hkâm é dang pé lé, tot za kâ kat é nghut lhê. Tengmán é jeju haù má yap gíng nyì keq.

¹³ Babelon má nyì é, nungmoq eq rahá hkyin yù huí é Hpúng gi, nungmoq lé shi-kyâm kat ri; ngá zo đông nghut sù Markuq le, nungmoq lé shi-kyâm kat ri.

¹⁴ Rayuq eq rayuq, chyitdap bopuq puq é èq shi-kyâm lhum keq.

Nguingón hkyô gi, Hkrisduq má nghut nyì é nungmoq banshoq bâng chyáng ru joq nyì sháng gaq ô.

PETRUQ Htang Dàm Hun Kat é Laiká (2 Peter)

¹ Yesuq Hkrisduq é dui-nhâng zoshâng eq lagyo nghut sù, ngò Simun Petruq gi, nga-nhùng é Garai Gasang eq hkyi yù Sù nghut é Yesuq Hkrisduq é đingmán hkyô đông, ngamoq su, hpaù dik é lumjìng hkyô lé hap yù bê báng chyáng dang kyô kat lhê.

² Garai Gasang eq nga-nhùng é Yhumsìng Yesuq lé, nungmoq sê jat nyi é hkyô má, jeju eq nguingón hkyô gi, nungmoq chyáng agùn agó ru joq nyi sháng gaq.

Ji Yu É Eq Hkyin Yu É Hkyô Lé Lhoq Ging Lhoq Tíng Râ Hkyô

³ Yhâng é hpungwup shìngkang eq ge é hkyô đông nga-nhùng lé ji yù Sù lé nga-nhùng sê é đông mai, Garai Gasang é hpungwup a-tsam gi, asak dui hkyô eq tarâ hkungga hkyô é matú nga-nhùng rà é jung hkangmó lé byi bê nghut ri.

⁴ Haù pé đông mai, Yhang gi, Yhâng é kô dik, hpaù dik é danggidiq pé nga-nhùng lé byi bê nghut ri; haù hkùn, nungmoq gi, haù danggidiq pé đông mai, Garaì é myit sâmlai lé wó bo hkam yù rà eq agê ashop hkyô lé yut yut ô nau é yanmai htoq lo é, mingkan má joq é htên byoq hkyô mai wó lut kô rà nghut lhê.

⁵ Hau é yanmai yhang, nungmoq gyai yhang shikut luí, nungmoq é lumjìng hkyô má ge é hkyô lé jat yù keq; ge é hkyô má sumsé hpaqchyí lé,

⁶ sumsé hpaqchyí má yhumsìng gùng yhumsìng hkang é hkyô lé, yhumsìng gùng yhumsìng hkang é hkyô má jân shirang é hkyô lé, jân shirang é hkyô má tarâ hkunggâ é hkyô lé,

⁷ tarâ hkunggâ é hkyô má gumang chyitkâng myit lé, gumang chyitkâng myit má chyitdap myit lé, jat yù keq.

⁸ Hkâsu mù gâ le, hau pé lé nungmoq wó sing myô jat lo é nghut jáng, hau pé gi, nga-nhùng é Yhumsìng Yesuq Hkrisduq lé nungmoq sê é hkyô má, nungmoq lé akôm a dut nhang é htoq agó, ashi a zui le dut nhâng rà a nghut.

⁹ Nghut kôlhang, rayuq yuq gi, hau pé lé a wó é nghut jáng, chyáng é lé za myang é eq myoqjit é sù nghut luí, lai lò bê yhâng é yubak mara pé mai lhoq sanséng byí é hui bê hkyô lé, tô-myhí pyám bê sù nghut ri.

¹⁰ Haù mù luí, ngá é gumang wui ê, nungmoq lé ji yu é hkyô eq hkyin yu é hkyô lé, je riyhang lhoq gingtìng nyi keq. Hkâsu mù gâ le, hau hkyô pé lé nungmoq kut nyi é nghut jáng, hkâ-nhám le nungmoq myit leqbat kô rà a nghut;

¹¹ hau htoq agó, nga-nhùng é Yhumsìng eq hkyi yù Sù nghut é Yesuq Hkrisduq é ahtum abyuq é mingdán má agùn agó lhom pang yu é lé, nungmoq myang hap yù kô rà nghut lhê.

Chyúmdang Mâ É Myiqhtoi Dang

¹² Haù mù luí, nungmoq gi, hau pé lé sé kô é htoq agó, nungmoq wó tô é tengmán hkyô má gingtìng nyi kô é nghut kôlhang, ngò, nungmoq lé hkâ-nhám le hau pé lé ru lhoq pùn nyi rà nghut lhê.

13 Shî gungdu má ngò rû dui nyi nyi gi, nungmoq lé lhoq pûn kying byí le ge ri nghû, ngò wó myit ri;

14 haí mù gà le, nga-nhùng é Yhumsîng Yesuq Hkrisduq gi, ngo lé san za sé nhâng bê eq rajung za, hkâ-myháng a myáng má, ngò gi, gungdu shi lé tô pyâm to rá nghut é lé sê lhê.

15 Ngò htoq lô byuq é htâng má, nungmoq, hkâ-nhám le haú pé lé ru wó bûn nyi rá lé myàng nau mù, ngò, wó dut é í shikut nyi rá nghut lhê.

16 Nga-nhùng é Yhumsîng Yesuq Hkrisduq é a-tsam eq lé lo é hkyô eq séng luí, nungmoq lé ngamoq taí kyô wú é hkûn, ngamoq gi, kut htoq yu é labyoq mhô-myi lé a châng é za, Yhâng é kô làm hkikhkâm hkyô lé myoq eq myang é saksé pé nghut lhê.

17 Hkâsu mù gà le, haú Kô Làm Hkikhkâm Hkyô é Hpungwup Shingkang mai, "Shí yuq gi, Ngò chyitdap é Ngá zo nghut lhê; Yhang má Ngò nhik dik nyi lhê."* ga taí é htê, Yhâng chyáng jé é hkûn, haú Íwa Garai Gasâng chyáng mã é aróng eq hpungwup shingkang lé Yhang wó hap yù bê nghut ri.

18 Ngamoq yhang, chyoiyúng bùm má Yhang eq rahá nyi tô é hkûn, htê haú mauhkûng mai htoq lo é lé wó gyô é nghut lhê.

19 Haú mù luí, myiqhtoí pé dang lé je lhoq ging bê hkyô, ngamoq wó é nghut lhê; haú mù, maubô lô luí, nungmoq é myit má bó-myhû htoq lo é hkûn jé shoq, mauchut tuq dut é jowò má duq nyi é myibung lé su, myiqhtoí dang haú lé, nungmoq gyo mù rago châng kut rá dut lhê.

20 Banshoq htoq má, Chyúmdang mã é myiqhtoí dang gi, haú myiqhtoí pé mai ó le ó lichyúm lhoq htoq yu é đông a nghut é lé, nungmoq sê to rá dut lhê.

21 Hkâsu mù gà le, myiqhtoí dang gi, byù ô nau é đông hkâ-nhám lé a htoq wú é za, haú Chyoiyúng Woi-nyí eq shui u huí é bang mai, Garai Gasâng chyáng mã é dang taí é ru nghut lhê.

2

Sará Apyoq Pé É Hkyô

1 Nghut kôlhang, myiqhtoí pyoq pé gi, Israelaq byù haú bâng é ahkaú má nyi wú bê nghut lhê, haú eq rajung za, nungmoq é ahkaú má le sará apyoq pé nyi rá za nghut lhê. Yhangmoq gi, htên byoq hkyô nghut é byoq gang rá mhoqshit hkyô pé lé, haq lhoq pyo é htoq agó, yhangmoq lé wui yu é, Yhumsîng lé lhang he-ngik pyám kó rá nghut lhê. Haú mù, yhangmoq gi, yhumsing gùng yhumsing byòdàn tung htên byoq hkyô jé nhâng bekô rá nghut lhê.

2 Byù myo myo gi, haú bâng é ahoq ahí hkyô má cháng kó rá eq, tengmán hkyô lé taí hpoi pyám nhâng kó rá nghut lhê.

3 Sará apyoq haú bang gi, yhangmoq myoqnoq é hkyô má, yhangmoq kut htoq tô é mhô-myi đông nungmoq lé mhaú zo kó rá nghut lhê. Yhangmoq lé mra dam byi hkyô gi, gohkûn mai yhangmoq ahtoq má lhang to gù bê nghut é htoq agó, yhangmoq é htên byoq hkyô gi, yhup myí tô nyi é a nghut.

4 Hkâsu mù gà le, Garai Gasang gi, mra kut shut é maumâng pé lé lhang a ha bûn é za, ngaraí ming má hkyô pyám luí, tarâ jéyáng é hui rá hkûn jé shoq, yhangmoq lé tuq tuq chut é dong hkaú má kat tô é nghut lhê.

5 Yhang gi, tarâ a hkunggá é byu pé lé dowui tîng é hkûn, gohkun lhê é mingkan lé a ha bun nghut ri, nghut kôlhang, dingmán é hkyô lé hko kyô é sù Noaq eq gotú nyhit yuq lé hung yu é nghut ri;

6 Yhang gi, Sodom eq Gomoraq myuq lé, myi-mhop dut shoq nyhê hkyô pyâm é đông mara dam byi lui, tarâ a hkungga bâng chyáng dut lò râ hkyô é azòng kut tô é nghut ri;

7 nghut kôlhang, tarâ a chùng bâng é achâq achyut asak dui hkyo é yanmai myit wui myit hke hui é, haù dingham sù Lot lé hkyi htoq yu é nghut ri;

8 (hkâsu mù gà le, dingham sù haù gi, nyi hkangmô yhangmoq ahkaù má nyi nyi é nghut lui, tarâ a chùng é muzô hkyô lé, yhang wô myâng wô gyô é yanmai, yhâng é dingham myit má gunjâng é hui sù nghut ri.)

9 Haù su nghut é nghut jâng, Yhumsing gi, tarâ hkunggâ é byu pé lé, wuihke hkyô mai hkâsu kut hkyi htoq yù râ eq, a dingham é bang lé, tarâ jéyâng é buyni jé shoq, dam byi é hkyô lé xoq kut nyi é u má hkâsu kut zuí zing to rà lé sê lhê.

10 Haù yubak gungshô é htên byoq sê é yut yut ô nau hkyô châng é eq ahko ahkáng lé wú tiq bâng chyáng, haù hkyô hkyak dut râ nghut lhê.

Byù haù bang gi, ngegâng-htu é eq nghutbùn é bang nghut kôlui, mauhkung bang lé lumù gansâng rà lé a gyuq kó nghut ri;

11 nghut kôlhang, maumang lagyô pé lhang gi, wum je bo é eq a-tsam je bo é nghut kôle, haù Yhumsing é hí má, haù mauhkung bang lé mara hun é đông lumù gansâng hkyô a wám kut kó nghut ri.

12 Nghut kôlhang, haù sará apyoq pé gi, yhumsing a sê gyô é hkyô pé lé rhoi dang tai akô. Yhangmoq gi, haù chyup yu é hui lui, lhoq htên pyâm é hui râ matú za hku lé lo é, nhik a bo é tân jung dusak đông nghut akô; dusak haù pé su, yhangmoq le, htên byoq byuq kó rà nghut lhê.

13 Yhangmoq gi, nò shoq kut bekô nghut é yanmai, nò shoq kut é hui zo kó rà nghut lhê. Yhangmoq é ngón kún nau é myit gi, nyi mó káng lé lhang gungsho yut yut ô nau hkyô lhoq dik rà matú nghut ri. Yhangmoq gi, nungmoq eq rahá zoshuq poí kut kô é hkùn, mhaù é lé yhangmoq é ngón hkyô kut kômù, agè agau é eq achâq achyut é bang nghut akô.

14 Yhangmoq é myoqjí pé má gi, su-myi sulàng lú hkyô bying zan to kômù, mara kut é hkyô lé hkâ-nhâm le a hkying kó nghut ri; yhangmoq gi, a gingting é bang lé mhoq hpyoq yu akô; yhangmoq gi, myoqnoq é hkyô má kung é bang nghut kômù, nhing pyâm é hui bang nghut akô.

15 Yhangmoq gi, haù ding é hkyô lé tô pyâm to kômù, Beora é yhangzo nghut é, agè ashop hkyo é ahpau lé chyitdap sù Balam é hkyô má châng yông wún bekô nghut ri.

16 Nghut kôlhang, Balam gi, yhang kut shut é hkyo é yanmai, logúng eq tân mhoqshít é hui ri; dang a dat nyo é logúng haù gi, byu é htê đông dang tai lò mù, myiqhtoi hpó a gying é hkyô lé hkùm tang pyâm ri.

17 Byù hau bang gi, wui a bo é wuihtung eq, laidún eq mut tâng ló é nghansoq eq púng kômù, yhangmoq é matú gi, tuq tuq chut é mauchut hkaù lé lajang to bê nghut ri.

18 Hkâsu mù gà le, yhangmoq gi, asôm gyáng dang lé tai mù, yubak gungshô é yut yut ô nau é hkyô đông mai, haù shut shai é hkyô má asak dui nyi é mai asik za hpang htoq lo é bang lé, mhoq hpyoq yu akô nghut ri.

19 Yhangmoq gi, haù bang lé luthkyô byi rà gidig byi kô é nghut kôle, yhangmoq gùng gi, htên byoq hkyô lhoq htoq é gungsho yut yut ô nau hkyo é jùn dut nyi akô; hai mù gà le, byù rayuq gi, yhumsing lé hai eq up sing le, hai é jùn nghut lhê.

²⁰ Byu pé gi, nga-nhông é Yhumsing eq hkyi yù Sû nghut é Yesuq Hkrisduq lé sê é đông mai, mingkân é agè ashop hkyô mai wó hpang lut htoq bê nghut kôle, yhangmoq lé hau èq tuí yup tô é dum hui lui, ung pyâm é hui kô é nghut jáng, yhangmoq é matú, hí lè htoq má je wui byuq kó rá nghut lè.

²¹ Haù dingham é hkyô lé yhangmoq sé lui, yhangmoq lé ap byí to bê nghut é chyoiyung hkunmó lé tô pyâm to mù lhing taù ló byuq kô é htoq má, haù hkyô lé a sé é gi, yhangmoq é matú je gè kó rá nghut lè.

²² "Hkui gi, yhang hpat tô é lé dum taù zô lè." gâ é eq, "Waq gi, chí pyám byí é htâng, yhâng é galhu htum má dum taù lù lè."* gâ é sanghkyang gi, yhangmoq chyáng dik bê nghut ri.

3

Haù Yhumsing Jé Lé Râ Buinyi

¹ Chyitdap é luzúm wui ê, shí gi, nungmoq lé ngò í dá nghú rá dà m ká byí kat é laiká nghut lè. Laiká shí í lhum má, nungmoq é sansêng é i-myt lé lhoq toq rá matú taí pùn kat é laiká nghut lè.

² Haù gi, chyoiyung myiqhtoí pé mai lai lò bê hkun taí tô é dang pé eq, nga-nhông é Yhumsing eq hkyi yù Sû mai, nungmoq é lagyô pé đông byí to bê nghut é hkunmó lé, ngò, nungmoq lé bun nhâng nau lui nghut lè.

³ Sâng-hi má, ló htâng é buinyi pé má yhumsing é agè ashop ô nau hkyô má cháng lui taí hpoi bang htoq lô rá nghut é lé, nungmoq sé gyô to ra rá nghut lè.

⁴ Haù bang gi, "'Dum jé lé rá' ga Yhang gidiq byí é gi, hkámá lú? Nga-nhông é ichyí iwá pé gi, shí byuq ló bekô nghut mù, jungkang jungmó gi, mau htoq xâng hkun mai dut é su roq dut nyi ri." ga taí kó rá nghut lè.

⁵ Nghut kôlhng, yhangmoq gi, a-nham lé, Garai Gasâng é hkunmó mai, mauhkung pé joq é eq, myigùng gi, wui mai dut htoq nhâng mù, wui đông hpan tô é hkyô lé, a sé gùn kut pyâm akô nghut ri.

⁶ Wui hau èq sheq, haù hkun lè é mingkan lé dowui túng mù, lhoq htên pyâm é nghut lè.

⁷ Ahkui lè é mauhkung pé eq myigùng lé gi, tará a hkungga bang htên byoq hui rá nghut é, tará jéyáng é buinyi jé shoq, myi má nyhê rá matú, hkunmó hau èq Yhang hkong to bê nghut ri.

⁸ Nghut kôlhng, chyitdap é luzúm wui ê, haù Yhumsing é hí má, ra-nyí gi, zanwut rahkying đông, zanwut rahkying gi, ra-nyí đông nghut é hkyô shí lé, hkâtô-myí kó.

⁹ Haù Yhumsing gi, Yhâng é danggidiq lé hân a lhoq dik ga byù ra-am myit ngam pyâm é su, nyhâm é Sù a nghut. Yhang gi, ó yuq le htên byoq byuq rá lé a ô nau é yanmai, yuq hkangmó myit lhing rá lé za ô nau mù, nungmoq lé myit hing byí nyi é nghut lè.

¹⁰ Nghut kôlhng, haù Yhumsing é buinyi gi, hkau sù su a bûn nùng má jé rá nghut lè. Haù buinyi má, mauhkung pé gi, mying hum htê eq byuq byuq rá nghut lè; duqbó-gung pé gi, myí èq lhoq htên pyâm é hui lui, myigùng eq haù má é joq mijoq gi, nyé gyó byuq rá nghut lè.

¹¹⁻¹² Joq mijoq gi, haù hkyô đông lhoq htên pyâm é hui rá nghut é yanmai, nungmoq gi, hkasú é byu pé dut ra rá lú? Nungmoq gi, haù Garai Gasâng é buinyi lé ho nyi é eq buinyi haù hân za jé rá lé ô nau nyi é hkun, chyoiyung

é eq tarâ hkunggâ é asak dui hkyô dông nyi ra râ nghut lhê. Buinyi haù gi, mauhkung pé lé, myi èq lhoq htên pyám luí, duqbó-gung pé le, lúm nyé luí, nyé yui pyám é buinyi dut râ nghut lhê.

¹³ Nghut kôlhang, nga-nhung gi, Garaí é danggidiq nghut é, dingmán hkyô é yhúm, mauhkung asik eq myigùng asik lé, myoqbyu nyi é bang nghut lhê.

¹⁴ Haù nghut mù luí, chyitdap é luzúm wuí ê, nungmoq gi, haù hkyô lé myoqbyu é bang nghut kô é yanmai, Yhang é hí má achaq achyut a dut é eq mara hún râ hkyô a bo é za, Yhang eq nguingón nyi râ hkyô lé gyai yhang shikut nyi keq.

¹⁵ Nga-nhung é chyitdap gumang Poluq gi, yhang lé, Garaí Gasang byí tô é hpaqchyí byéng-yá èq, nungmoq chyáng ká byi bê eq rajung za, nga-nhung é Yhumsing é myit hng hkyô gi, hkyi yù hkyô nghut é lé matsing to keq.

¹⁶ Poluq gi, yhang ká é laiká pé banshoq má, haù hkyô pé eq séng luí rajung za ká shit tô ri. Yhang é laiká hkaù pé má, ra-am gi, sê gyo wuí é hkyô pé bo é yanmai, a mhoq wú é bang eq a gingting é bang gi, gotû Chyúmdang pé lé lichyúm htaí lhik pyám kô é su, yhangmoq lichyúm htaí lhik pyám kômù, yhumsing htên byoq hkyô kut yu nyi akô nghut ri.

¹⁷ Haù mù luí, chyitdap é luzúm wuí ê, nungmoq gi, shí hkyô lé sê to gù nghut é yanmai, tarâ a chúng bâng é shut shai hkyo èq nungmoq lé a wó shuí nghoq yù râ eq, nungmoq é gaù é jowò mai a wó byit gyó byuq sháng gaq, yhumsing gùng yhumsing upzúng nyi keq.

¹⁸ Nga-nhung é Yhumsing eq hkyi yù Sù nghut é Yesuq Hkrisduq é jeju eq hpaqchyí hkyô má, nungmoq kô myhang lò kó sháng gaq. Hpungwup shing kang gi, Yesuq Hkrisduq chyáng, ahkuí le, ahtum abyuq le, ru joq nyi sháng gaq ô! Amen.

YOHAN Hî Dàm Hun Kat é Laiká (1 John)

Asak Mungdang

¹ Ngò gi, haù sâng-hi mai joq nyi mù, ngamoq wó gyô wú bê é, ngamoq é myoq eq myang wú bê é, ngamoq rago za wú wú bê é, ngamoq é loq eq záng wú bê é, asak mungdang eq sêng é hkyô lé, nungmoq lé tai kyô kat lhê.

² Asak haù gi, htoq shít bê nghut mù, ngamoq gi, haù lé myang wú luí, saksé hkám bê; haù Íwa eq rahá nyi wú é, ngamoq chyáng htoq shít bê nghut é ahtum abyuq é asak haù lé nungmoq lé tai kyô lhê.

³ Ngamoq eq zùm yap é hkyô lé, nungmoq le wó sháng gaq nghù, ngamoq gi, myang wú bê eq wó gyô wú bê hkyô lé, nungmoq lé tai kyô lhê. Ngamoq gi, haù Íwa eq le, Yhâng zo Yesuq Hkrisduq eq le, zùm yap nyi é bang nghut lhê.

⁴ Ngamoq é gabú hkyô byíng jup sháng gaq nghù, ngamoq gi, nungmoq lé shí hkyô ká byí kat lhê.

Maubó Hkaù Má Sô Nyi Râ Hkyô

⁵ Garai Gasang gi, maubó nghut lhê; Yhâng chyáng mauchut ratsuí lháng a bò nghut ri. Shí hkyô gi, Yhangzô chyáng mai ngamoq wó gyô yù luí, nungmoq lé tai kyô é danglù nghut lhê.

⁶ Nga-nhúng gi, Yhang eq zùm yap nyi lhê nghù tai kôlhang, mauchut hkaù má ru sô nyi bum é nghut jáng, nga-nhúng gi, mhaù é bang dut mù, haù tengmán hkyô đồng asak a dui é bang nghut ri.

⁷ Nghut kôlhang, Yhang gi, maubó má nghut nyi é eq rajung za, nga-nhúng le haù maubó má sô nyi é nghut le gi, nga-nhúng rayuq eq rayuq zùm yap nyi bê nghut luí, Yhang zo Yesuq é sui gi, nga-nhúng é mara banshoq lé lhoq sân-yúng pyám byi râ nghut lhê.

⁸ Mara a bò nghù nga-nhúng tai é nghut le gi, yhumsing gùng yhumsing mhaù pyám luí, haù tengmán hkyô gi, nga-nhúng chyáng a bò nghut ri.

⁹ Nghut kôlhang, nga-nhúng gi, yhumsing é mara lé yín yu é nghut jáng, Yhang gi, wó lum é sù eq tengmán é sù nghut é yanmai, nga-nhúng é mara lé hkyut pyám byi luí, a dítng a mán é hkyô banshoq mai le, nga-nhúng lé lhoq sân-yúng byi râ nghut lhê.

¹⁰ Nga-nhúng gi, mara a kut shut nghù tai é nghut jáng, nga-nhúng mai Yhang lé mhaù sù nghù chyo pyám é nghut luí, Yhâng é mungdang gi, nga-nhúng má a bò nghut ri.

2

Hkrisduq Gi, Nga-nhúng Lé Garúm Sù

¹ Ngò chyitdap é zo wú ê, ngò gi, nungmoq mara a kut shut kó sháng gaq nghù, nungmoq lé shí hkyô ká byí kat lhê. Nghut kôlhang, rayuq yuq mara kut shut é nghut le gi, nga-nhúng é matú haù Íwâ chyáng bo tai xoq byí é, Yesuq Hkrisduq gá é Dingmán Sù lé, nga-nhúng wó lhê.

² Yhang gi, nga-nhúng é yubak marâ é matú, shîhtaí gunglik hkungga nghut nyi ri. Nga-nhúng é yubak marâ é matú baú za a nghut, mingkan gón mâ é byu pé é yubak marâ é matú le nghut nyi ri.

³ Nga-nhúng gi, Yhang hkyô tô é hkunmó pé lé châng kut é nghut jáng, Yhang lé nga-nhúng rago sé bê nghut é hkyô lé, wó sé bê nghut ri.

⁴ Byù rayuq yuq mai, "Ngò gi, Yhang lé rago sê lhê." ga tai kôlhang, Yhang hkyô tô é hkunmó lé a châng kut é nghut jáng, haú yuq gi, byù mhaú nghut luí, tengmán hkyô gi, yhang má a bò nghut ri.

⁵ Ó yuq nghut kôlhang, Garai Gasâng é mungdang lé châng kut nyi é nghut jáng, Yhang lé chyitdap é myit gi, haú yuq má gè gè byíng jup bê nghut ri.

⁶ Yhang má asak dui nyi lhê ga tai é sú ó yuq nghut kôlhang, Yesuq kut bê eq rajung za, châng kut râ lhê. Haú hkûn sheq, nga-nhúng gi, Yhang má nghut nyi bê hkyô lé, wó sê lhê.

Hkunmó Asik

⁷ Chyitdap é luzúm wuî ê, ngò gi, nungmoq lé hkunmó asik ká byí kat é a nghut é za, haú sâng-hi mai nungmoq wó to bê hkunmó axau sheq ru nghut lhê. Hkunmó axau shí gi, nungmoq wó gyô wú bê mungdang nghut nyi ri.

⁸ Nghut kôlhang, ngò gi, nungmoq lé hkunmó asik ká byí kat lhê; hau é tengmán hkyô lé, Yhang má le, nungmoq má le, byu myàng ri; hkâsu mù gà le, haú mauchut gi, lai ló byuq luí, haú tengmán é maubó gi, duq nyi gù bê nghut ri.

⁹ Ngò gi, maubó hkaú má nghut nyi lhê ga luí, yhumsing é gumang lé a jú é sú ó yuq nghut kôlhang, haú mauchut hkaú má ru nghut nyi ashí.

¹⁰ Yhumsing é gumang lé chyitdap é sú ó yuq nghut kôlhang, haú maubó má asak dui nyi é nghut mù luí, yhang má myit leqbat nhâng râ hkyô hai le a bò nghut ri.

¹¹ Nghut kôlhang, yhumsing é gumang lé a jú é sú kúm gi, haú mauchut hkaú má nghut nyi luí, haú má sô lhing jón wún ri; haú mauchut gi, yhang lé myoq lhoq chit to byí é yanmai, yhang gi, hká shut e ló nyi é hkyô lé a sé nghut ri.

¹² Chyitdap é zo wuî ê, Yhâng mying é yanmai, nungmoq é mara pé hkyut pyám byi hui bekô nghut luí, nungmoq lé ngò kê kat é nghut lhê.

¹³ Íwa pé ê, nungmoq gi, haú sâng-hi mai nyi é Sú lé sé bekô nghut é yanmai, nungmoq lé ngò kê kat é nghut lhê.

Zorâm wuî ê, nungmoq gi, haú agè ashop sú lé ùng pyám bekô nghut é yanmai, nungmoq lé ngò kê kat é nghut lhê.

Chyitdap é zo wuî ê, nungmoq gi, haú Íwa lé sé bekô nghut é yanmai, nungmoq lé ngò kê kat é nghut lhê.

¹⁴ Íwa pé ê, nungmoq gi, haú sâng-hi mai nyi é sú lé sé bekô nghut é yanmai, nungmoq lé ngò kê kat é nghut lhê.

Zorâm wuî ê, nungmoq gi, wum-o bo é eq, haú Garai Gasâng é mungdang nungmoq chyáng dui nyi é nghut mù, haú agè ashop sú lé ùng pyám bekô nghut é yanmai, nungmoq lé ngò kê kat é nghut lhê.

Mingkan Lé A Chyitdap Râ Hkyô

¹⁵ Mingkan eq mingkan htoq mâ é hai le lé, hkáchyitdap kó. Byù rayuq yuq, mingkan lé chyitdap é nghut le gi, haú Íwa lé chyitdap é myit, yhâng chyáng a bò nghut ri.

16 Hkâsu mù gâ le, mingkan htoq má joq é lhunglhang gi, gungsho ô nau é hkyô, myoqjí yut yut ô nau é hkyô, yhumsing wó é eq kut é hkyô lé gumrong é pé chyat nghut ri. Haû gi, Íwâ chyáng mai htoq lo é a nghut, haû mingkan mai htoq lo é ru nghut lhê.

17 Mingkan eq mingkan ô nau hkyô pé gi, lai ló byuq râ nghut lhê; nghut kôlhang, haû Garai Gasang ô nau é hkyô lé kut é sù gi, ahtum abyuq ùi nỳi râ nghut lhê.

Hkrisduq É Gye Pé

18 Chyitdap é zo wuî ê, shî gi, ló htâng é ahkyíng nghut bê; haû anti-hkrisduq* gi, lé lo nỳi ri gâ é lé, nungmoq wó gyô wú bê eq rajung za, ahkuî lhang, anti-hkrisduq myo myo gi, jé lé bekô nghut ri. Hau é yanmai, nga-nhung gi, ló htâng é ahkyíng nghut bê hkyô lé wó sé bê nghut ri.

19 Yhangmoq gi, nga-nhung é hpúng mai htoq ló byuq bê bang nghut kôle, gè gè ga jang, nga-nhung eq a sêng é bang nghut akô. Hkâsu mù gâ le, nga-nhung eq sêng é nghut jáng, yhangmoq gi, nga-nhung eq nỳi to râ nghut lhê, nghut kôlhang, yhangmoq htoq ló byuq bekô nghut é yanmai, yhangmoq rayuq lhang nga-nhung eq a sêng é hkyô lé tûn shit bê nghut ri.

20 Nghut kôlhang, nungmoq gi, haû Chyoiyúng Sû mai xû but byî é hui† bekô nghut mù luî, nungmoq banshoq bang haû tengmán hkyô lé sê akô nghut ri.

21 Haû tengmán hkyô lé nungmoq a sé kôluî, nungmoq lé ngò kâ kat é a nghut; haû hkyô lé nungmoq sé gù nghut luî le, haû mhaû é hkyô gi, tengmán hkyô mai lo é a nghut é lé nungmoq sé gù nghut luî le, nungmoq lé ngò kâ kat é nghut lhê.

22 Mhaû é sù gi, ó yuq nghut lhê lhu? Haû Yesuq gi, Hkrisduq a nghut ga he pyâm é sù nghut ri. Haû Íwa eq Yhangzo lé he-ngik é sù gi, anti-hkrisduq yhang nghut nỳi ri.

23 Haû Yhangzo lé he-ngik sù ó yuq nghut kôle, haû Íwa lé sé sù a nghut. Haû Yhangzo lé hap yu é sù kúm gi, haû Íwa lé le sé bê sù nghut lhê.

24 Haû sâng-hi mai nungmoq wó gyô wú bê é hkyô pé lé, nungmoq i-myt má ru bo nỳi keq. Haû nghut jáng, nungmoq gi, haû Yhangzo eq Íwâ chyáng nỳi nỳi râ nghut lhê.

25 Haû gi, nga-nhung lé Yhang byî tô é ahtum abyuq é asak wó yû râ gâ é danggidiq nghut ri.

26 Ngò gi, nungmoq lé hkyô shuí ngoq shikut nỳi bâng é hkyô eq séng luî, nungmoq lé shí gù kâ kat é nghut lhê.

27 Nungmoq chyáng kúm gi, Yhâng chyáng mai xû but jeju lé nungmoq wó yù bekô nghut mù luî, mhoqshit râ góyuq a ra lo nghut ri. Nghut kôlhang, haû Yhâng é xû but jeju gi, hkyô hkangmó má nungmoq lé mhoqshit byi mù, haû gi, tengmán nỳi é nghut luî, mhaû é hkyô haî le a bo é za, nungmoq lé mhoqshit byî nỳi é eq rajung za, Yhâng chyáng nungmoq nỳi nỳi keq.

28 Chyitdap é zo wuî ê, nga-nhung gi, Yhang jé lé mù htoq shit é hkûn, Yhâng é hí má a gyuq a kyum é, hoq a hpu é, wó dut râ matú Yhâng chyáng ru nỳi nỳi keq.

* 2:18 Anti-hkrisduq nghù é lichyúm gi, Hkrisduq lé gyê kut é sù lé gâ lhê † 2:20 Xû but byî é hui gi é lichyúm gi, Hkrisduq chyáng mai, Chyoiyúng Woi-nỳi lé myang hap yu é lé gâ lhê.

²⁹ Yhang gi, dingmán sù nghut é lé, nungmoq sé bê yanmai, dingmán hkyô lé kut é sù ó yuq nghut kôle, Garai Gasang mai hkû kat é sù nghut é hkyô lé, nungmoq sé akô nghut ri.

3

Garai Gasâng É Yhangzô Pé

¹ Nga-nhúng gi, haù Garai Gasâng é yhangzô pé ga wut râ hui bê nghut é yanmai, haù Íwâ é chyitdap myit gi, nga-nhúng ahtog má hkâ-í yhang ko nyi ri myhi-nhung! Nga-nhúng gi, yhangzô pé yhang nghut bu-nhung! Míngkan gi, Yhang lé a sé é yanmai, nga-nhúng lé le a sé nghut ri.

² Chyitdap é luzúm wuì ê, ahkuì, nga-nhúng gi, Garai Gasâng é yhangzô pé nghut nyi to kôlhang, nga-nhúng hkâsu dut râ hkyô lé, a tún shit shi nghut ri. Nghut kôlhang, Hkrisduq htoq shit é hkûn, nga-nhúng gi, Yhang su dut râ nghut é hkyô lé, nga-nhúng sê lhê; hkâsu mù gà le, Yhang hkâsu nghut é hkyô lé roq yhang, nga-nhúng myàng râ nghut lhê.

³ Myit myoqbyù hkyô shí lé, Yhâng chyáng má wó tô é bang ó yuq nghut kôle, Yhang sân-yúng é eq rajung za, yhumsing gùng lé lhoq san lhoq yúng nyi ri.

⁴ Mara kut é sù ó yuq nghut kôle, tarâ lu lai é sù nghut ri; gè gè ga jang, mara gi, tarâ lu lai é hkyô nghut nyi ri.

⁵ Nghut kôlhang, Yhang gi, nga-nhúng é yubak mara lé hkyut pyám byi râ matú, pô htoq bê hkyô lé nungmoq sé akô; Yhâng chyáng mara a bò nghut ri.

⁶ Yhang má dui nyi é sù ó yuq nghut kôle, mara a xoq kut nyi nghut ri; mara xoq kut nyi sù ó yuq nghut kôle, Yhang lé a myàng, a sé shi nghut ri.

⁷ Chyitdap é zo wuì ê, nungmoq lé ó yuq eq le hkyô a shuí nghoq kó sháng gaq; Yhang gi, dingmán é eq rajung za, dingmán é hkyô lé kut é sù ó yuq nghut kôle, dingmán nyi ri.

⁸ Mara kut nyi é sù gi, nat Tsadán chyáng mâ é nghut nyi ri; hkâsu mù gà le, Tsadán haù gi, sâng-hi mai yhang mara kut nyi bê nghut ri. Haù Garai Gasâng é Yhangzo gi, Tsadán é muzó lé lhoq hpyoq lhoq hten râ matú pô htoq le é nghut lhê.

⁹ Garai Gasâng chyáng mai hku kat é sù ó yuq nghut kôle, Yhâng é amyui bo to é nghut é yanmai, mara a xoq kut lo nghut ri; haù yuq gi, Garai Gasang chyáng mai hku kat é hui bê nghut é yanmai, mara wó xoq kut lo râ a nghut.

¹⁰ Ó yuq nghut kôle, dingmán é hkyô a kut é eq, yhâng gumang lé a chyitdap é sù gi, Garai Gasâng yhangzo a nghut. Hau é yanmai, ó pé gi, Garai Gasâng é yhangzô pé nghut é, ó pé gi, nat Tsadán é yhangzô pé nghut é hkyô lé, san za nga-nhúng wó sê yu ri.

Rayuq Eq Rayuq Chyitdap Lhum Râ Hkyô

¹¹ Nga-nhúng rayuq eq rayuq chyitdap lhum râ lhê gà é hkyô haù gi, sâng-hi mai nungmoq wó gyô yù bê danglù nghut ri.

¹² Haù agè ashop sù eq le sêng é, yhanggu lé sat pyâm é Ka-in su a ge kut. Yhang gi, haù mù luí yhanggu lé sat pyâm lhê lú ga le, yhâng é muzó pé gi, agè ashop hkyô, yhanggu é muzó pé gi, dingmán é hkyô nghut é yanmai nghut ri. ✧

¹³ Ngá é gumang wuì ê, nungmoq lé míngkân eq a ngui a jú kut kôlhang, hkâmaù kó.

¹⁴ Nga-nhúng gi, nga-nhúng é gumang wui lé chyitdap é yanmai, shi byuq é mai wó lut lui asak dui é hkyô lé, wó sê é nghut lê. Chyitdap myit a bò sù gi, shi é hkyô má lúng tô ashí nghut ri.

¹⁵ Yhâng é gumang lé a ngui a jú é sù gi, byù sat sù dut râ nghut lê; byù sat sù ó yuq chyáng nghut kôle, ahtum abyuq é asak a bo é hkyô lé, nungmoq sê nyi akô.

¹⁶ Yesuq Hkrisduq gi, nga-nhúng é matú Yhâng é asak byî pyám bê lé wú jáng, chyitdap myit hkasú é nghut é hkyô lé, nga-nhúng wó sê ri. Nga-nhúng le, gumang wui é matú, nga-nhúng é asak lé byî pyám gíng ri.

¹⁷ Ó yuq nghut kôlhang, mینگkan sutzè wó to lui, yhâng gumang hpó asho awui dut nyi é lé myàng kôlhang, a shogyô yu é nghut jáng, haù Garai Gasâng é chyitdap myit gi, yhâng chyáng hkâsu wó bò râ lúh?

¹⁸ Chyitdap é zo wui ê, nga-nhúng gi, dang nhut shô mai za a nghut, muzó eq tengmán é đông le chyitdap nyi sháng.

¹⁹ Haù hkûn, nga-nhúng gi, tengmán hkyô eq séng bê bang nghut é lé wó sê é eq, nga-nhúng é i-myt mai nga-nhúng lé mara hun lò hkgangmó, Garai Gasâng é hí má nga-nhúng i-myt wó ngón nyi bê nghut ri.

²⁰ Hkâsu mù gâ le, Garai Gasang gi, nga-nhúng myit é htoq má je kô é sù nghut mù, jung hkgangmó lé sê nyi ri.

²¹ Chyitdap é luzúm wui ê, nga-nhúng é i-myt mai nga-nhúng lé mara a hun é nghut le gi, Garai Gasâng hí má nga-nhúng gyuq kyùm râ hkyô a joq lo nghut ri.

²² Nga-nhúng gi, Yhang hkyô tô é hkunmó pé lé châng kut é eq Yhang lé gabú nhang é hkyô hai lé le kut é yanmai, nga-nhúng dúng é hkyô lhunglhang lé, Yhâng chyáng mai wó yù râ nghut lê.

²³ Yhang hkunmó hkyô tô é eq rajung za, Yhâng zo Yesuq Hkrisduq é myìng má lumjìng é eq, rayuq eq rayuq chyitdap lhum é hkyô gi, Yhang hkyô tô é hkunmó yhang nghut bê.

²⁴ Yhang hkyô tô é hkunmó pé lé, châng kut é bang gi, Yhang má dui nyi bê nghut mù, Yhang le haù bâng chyáng dui nyi bê nghut ri. Yhang nga-nhúng chyáng dui nyi bê hkyô lé, nga-nhúng lé Yhang byî tô é Woi-nyí đông nga-nhúng wó sê yu é nghut lê.

4

Woi-nyí Pé Lé Gòn Wú Râ Hkyô

¹ Chyitdap é luzúm wui ê, woi-nyí hkgangmó lé hkâlumjìng ko, woi-nyí haù pé gi, Garai Gasâng chyáng mã é nghut é, a nghut é lé gôn wú keq; hkâsu mù gâ le, myiqhtoi pyoq pé myo myo gi, mینگkan htoq má jón wún bekô nghut ri.

² Garai Gasâng é Woi-nyí lé nungmoq wó sê yù râ hkyô gi, shí đông nghut lê: haù Yesuq Hkrisduq gi, gungsho đông jé lé bê ga, yín yu é woi-nyí hkgangmó gi, Garai Gasâng chyáng mã é nghut lê.

³ Nghut kôlhang, Yesuq Hkrisduq lé a yín yu é woi-nyí hkgangmó gi, Garai Gasâng chyáng mã é a nghut. Woi-nyí haù gi, lé lo nyi ri ga nungmoq wó gyô wú bê; ahkuí lhang mینگkan htoq má nyi to gù nghut é anti-hkrisduq é woi-nyí nghut ri.

⁴ Chyitdap é zo wui ê, nungmoq gi, Garai Gasâng chyáng mã é nghut mù lui, yhangmoq lé ung pyám bekô nghut ri. Hkâsu mù gâ le, nungmoq má lúng to Sù gi, mینگkan má nyi to su htoq je kô ri.

⁵ Yhangmoq gi, mingkan eq sêng é bang nghut lhê mù luí, mingkan hkyam đông tai bum akô; mingkan zo wuí le yhangmoq é dang lé gyo byí akô nghut ri.

⁶ Nga-nhúng gi, Garai Gasang eq sêng é bang nghut lhê; Garai Gasang lé sê é sù ó yuq nghut kôle, nga-nhúng é dang lé gyô ri; nghut kôlhang, Garai Gasang eq a sêng é sù gi, ngamoq é dang lé a gyo nghut ri. Shí hkyô lé wú jáng, tengmán hkyô é Woi-nyí eq hkyô shuí ngoq é woi-nyí lé, nga-nhúng sê gam hkoq yû bê nghut ri.

Garai Gasang Gi, Chyitdap Myit

⁷ Chyitdap é luzúm wuí ê, nga-nhúng gi, rayuq eq rayuq chyitdap lhùm nyí sháng; hkâsu mù gâ le, chyitdap myit gi, Garai Gasang chyáng mã é nghut ri. Chyitdap myit bò sù ó yuq nghut kôle, Garai Gasang chyáng mai hku kat é hui bê sù nghut luí, Garai Gasang lé sé sù nghut ri.

⁸ Chyitdap myit a bo é sù ó yuq nghut kôle, Garai Gasang lé a sé sù nghut ri; hkâsu mù gâ le, Garai Gasang gi, chyitdap myit nghut lhê.

⁹ Garai Gasang gi, Yhang Zô é yanmai nga-nhúng asak wó duí sháng gaq ga, Yhang Zo zote lé mingkan htoq mã nhang kat byi bê nghut ri. Haú gi, Garai Gasang mai nga-nhúng lé, Yhâng é chyitdap myit tún shit é hkyô nghut ri.

¹⁰ Nga-nhúng gi, Garai Gasang lé chyitdap é a nghut, Garai Gasang sheq nga-nhúng lé chyitdap luí, nga-nhúng é yubak marâ é matú, shíhtai gunglik hkungga dut sháng gaq ga, Yhang Zo lé nhang kat byí é nghut ri; haú gi, chyitdap myit yhang nghut bê.

¹¹ Chyitdap é luzúm wuí ê, Garai Gasang gi, nga-nhúng lé haú-í yhang chyitdap é nghut jáng, nga-nhúng le rayuq eq rayuq chyitdap lhùm rá dut lhê.

¹² Garai Gasang lé ó yuq eq le, hkâ-nhám lhang myang wú é a nghut; nghut kôlhang, nga-nhúng rayuq eq rayuq chyitdap lhùm nyí é nghut jáng, Garai Gasang gi, nga-nhúng má nyí nyi bê nghut luí, Yhâng é chyitdap myit gi, nga-nhúng má gumjup rá nghut lhê.

¹³ Garai Gasang gi, nga-nhúng lé, Yhâng é Woi-nyí byí to bê nghut é yanmai, Yhâng chyáng nga-nhúng dui nyi bê hkyô lé le, Yhang nga-nhúng má nyi nyi bê hkyô lé le, nga-nhúng sé bê nghut ri.

¹⁴ Haú Iwa gi, Yhang Zo lé mingkân é hkyi yù Sù dut sháng gaq ga nhang kat é hkyô lé, ngamoq myàng luí, saksé hkâm lhê.

¹⁵ Ó yuq nghut kôlhang, Yesuq gi, Garai Gasang é Yhangzo nghut ri ga yín yu é nghut le gi, yhang mã Garai Gasang nyi nyi bê nghut luí, yhang le Garai Gasang chyáng dui nyi bê nghut ri.

¹⁶ Nga-nhúng gi, Garai Gasang eq nga-nhúng lé chyitdap é hkyô lé, sé luí lumjúng nyi lhê; Garai Gasang gi, chyitdap myit nghut lhê; chyitdap myit má nyi nyi é sù ó yuq nghut kôle, Garai Gasang chyáng dui nyi bê nghut luí, Garai Gasang le haú yuq má nyi nyi bê nghut ri.

¹⁷ Haú đông mai, chyitdap myit gi, nga-nhúng chyáng gumjup bê nghut luí, nga-nhúng gi, tarâ jéyáng é buinyi mã a gyuq a kyum é myit wó yû rá nghut lhê; hkâsu mù gâ le, nga-nhúng gi, mingkan shí mã Yhang su dut nyi bê nghut ri.

¹⁸ Chyitdap myit má gyuq é hkyô a bò nghut ri; gyuq é hkyô gi, mara dam byí é hkyô eq sêng é nghut mù luí, gumjup é chyitdap myit gi, gyuq é hkyô lé

hkat htoq pyâm ri. Haù gyuq é myit bò sù gi, chyitdap myit má gumjup sù a nghut.

¹⁹ Yhang hí nga-nhúng lé chyitdap bê nghut é yanmai, nga-nhúng le chyitdap nyi lhê.

²⁰ Byù rayuq yuq gi, "Ngò, Garai Gasang lé chyitdap lhê." ga taí kôlhang, yhang é gumang lé a jú é nghut jáng, haù yuq gi, byù mhaù rayuq nghut ri; hkâsu mù gà le, yhumsing byu-myang é gumang lé lháng a chyitdap é sù gi, a byu-myang é Garai Gasang lé wó chyitdap rà a nghut.

²¹ Garai Gasang lé chyitdap é sù ó yuq le, yhumsing gumang lé le chyitdap rà lhê gà é dang haù gi, nga-nhúng é matú, Yhang mai hkyô tô é hkunmó nghut lhê.

5

Garai Gasâng É Yhangzo Lé Lumjǐng Hkyô

¹ Yesuq gi, haù Hkrisduq nghut ri ga lumjǐng é sù ó yuq nghut kôle, Garai Gasâng chyáng mai hku kat bê sù nghut ri; iwa lé chyitdap é sù ó yuq nghut kôle, yhang zo lé le chyitdap é nghut bê.

² Garai Gasang lé chyitdap nyi mù, Yhang hkyô tô é hkunmó pé lé châng kut nyi é nghut le gi, Garai Gasâng é yhangzo pé lé le, chyitdap nyi é hkyô lé, nga-nhúng wó sê yu é yanmai,

³ Garai Gasang hkyô tô é hkunmó pé lé châng kut é gi, Yhang lé chyitdap é hkyô nghut ri. Yhang hkyô tô é hkunmó pé gi, wòlai mó a nghut.

⁴ Hkâsu mù gà le, Garai Gasâng chyáng mai hku kat bê sù ó yuq nghut kôle, mingkan lé ung pyâm bê nghut ri. Nga-nhúng é lumjǐng myit gi, mingkan lé nga-nhúng ung pyâm é ongdang hkyô nghut ri.

⁵ Yesuq gi, Garai Gasâng é yhangzo nghut é lé lumjǐng é sù mai lai luí, mingkan lé wó ung pyâm é sù gi, ó yuq wá nghut lhê lhu?

⁶ Haù yuq gi, wuì eq sui* mai lé é sù, Yesuq Hkrisduq yhang nghut nyi ri. Yhang gi, wuì mai za lé é a nghut, wuì mai le, sui mai le, lé é sù nghut lhê. Woi-nyí gi, tengmán hkyô nghut é yanmai, shí hkyô lé saksé hkâm byí ri.

⁷ Hkâsu mù gà le, Woi-nyí le, wuì le, sui le, haù sùm lhum é saksé hkâm akò nghut ri;

⁸ haù sùm lhum gi, rajung za nghut akò.

⁹ Nga-nhúng gi, byu é saksé lé lhom yu lhê; nghut kôlhang, Garai Gasâng é saksé gi, haù htoq je kò nyi ri. Hkâsu mù gà le, Garai Gasang gi, Yhang Zo eq sêng é hkyô lé saksé byí é yanmai nghut ri.

¹⁰ Garai Gasâng é Yhangzo lé lumjǐng é sù gi, saksé haù lé yhang é i-myt má wó bê nghut ri; Garai Gasang lé a lumjǐng é sù kúm gi, Yhang lé byù mhaù rayuq ga chyo pyâm bê nghut ri; hkâsu mù gà le, Garai Gasang mai Yhang Zo eq sêng é hkyô saksé hkâm é lé, yhang a lumjǐng é yanmai nghut ri.

¹¹ Nga-nhúng lé, Garai Gasang byí é ahtum abyuq é asak gi, saksé haù nghut nyi ri. Asak haù gi, Yhang Zô chyáng bo ri.

¹² Garai Gasâng é Yhangzo lé wó sù gi, asak haù lé wó bê; Yhang Zo lé a wó sù gi, asak haù lé le a wó nghut ri.

Ahtum Abyuq Asak

* 5:6 Wuì eq sui nghu é gi, Yesuq baptisma hkam yu é hkyô eq shí hkâm é hkyô lé taí nau é nghut ri.

¹³ Garai Gasang é Yhangzô é mying lé lumjǐng é bang nungmoq gi, ahtum abyuq é asak wó bê hkyô lé, nungmoq sé kó sháng gaq nghú, shí hkyô pé lé ngò ká byí kat é nghut lhê.

¹⁴ Nga-nhúng hai dǔng le le, Garai Gasang ô nau é đông nghut jáng gi, Yhang gyo byi rǎ nghut lhê; haú gi, Yhâng é hí má nga-nhúng a gyuq a kyum wó wǎng rǎ matú nghut ri.

¹⁵ Haú mù, nga-nhúng hai dung kôlhang, Yhang gyo byi é lé nga-nhúng sé é nghut le gi, Yhâng chyáng nga-nhúng dǔng é hkyô lé, nga-nhúng wó yu é lé, nga-nhúng sê lhê.

¹⁶ Ó yuq nghut kôle, yhumsing é gumang hpó mai shí a gǐng é mara kut shut é lé, myang é nghut le gi, haú yuq é matú kyúdung byi rǎ lhê. Haú hkún, Garai Gasang gi, haú yuq lé asak byi rǎ nghut lhê. Haú gi, shí a gǐng é mara wó bǎng é matú tai é nghut lhê. Shí gǐng é mara le joq lhê; nghut kôlhang, hau é matú dung rǎ lhê nghú, ngò tai nyi é a nghut.

¹⁷ A dingmán é hkyô lhunglhang gi, mara nghut lhê; nghut kôlhang, shí a gǐng é mara le joq lhê.

¹⁸ Garai Gasâng chyáng mai hku kat bê sù ó yuq nghut kôle, mara a xoq kut lô é hkyô lé nga-nhúng sê lhê; hkâsu mù gâ le, haú Garai Gasâng é Yhangzo gi, haú yuq lé wú zúng nyi é nghut mù luí, haú agè ashop sù gi, haú yuq lé wó záng htung rǎ a nghut.

¹⁹ Nga-nhúng gi, Garai Gasâng é yhangzô pé nghut é lé le, mingkan gón lé haú agè ashop su èq up tô é hkyô lé le, sê lhê.

²⁰ Hau htoq agó, Garai Gasâng é Yhangzo jé lé luí, haú tengmán Sù lé sé sháng gaq ga, nga-nhúng lé sê gyô é nyan byi bê hkyô lé le, nga-nhúng sê lhê. Nga-nhúng gi, Yhang Zo Yesuq Hkrisduq má nghut nyi bê eq rajung za, haú tengmán Sù má le nyi nyi bê nghut lhê. Yhang gi, haú tengmán é Garai Gasang eq ahtum abyuq é asak nghut nyi lhê.

²¹ Chyitdap é zo wui ê, hparà l hó pé lé koi pyâm nyi keq.

YOHAN Htang Dàm Hun Kat é Laiká (2 John)

¹ Ngò suwún hpó gi, tengmán hkyô má ngò chyitdap é, hkyin yù huí é nàng hpô-myhí eq nung zô pé lé, dang kyô kat lhê; ngò baú za a nghut, haú nga-nhúng chyáng lúng to luí,

² nga-nhúng eq ahtum abyuq ru joq nyî râ nghut é tengmán hkyô é yanmai, haú tengmán hkyô lé sê é lunglhang bang le, nungmoq lé chyitdap nyi lhê.

³ Haú Íwa Garai Gasang eq Íwâ é Yhangzo Yesuq Hkrisduq chyáng mâ é jeju, shogyo nhikmyin hkyô eq nguingón hkyô gi, haú tengmán hkyô eq chyitdap hkyô má, nga-nhúng eq rahá joq nyî sháng gaq.

⁴ Haú Íwa mai nga-nhúng lé hkunmó hkyô tô é eq rajung za, nung zô pé ram gi, haú tengmán hkyô má châng nyi é hkyô lé, ngò wó sê é yanmai, gyai yhang gabú nyi lhê.

⁵ Chyitdap é hpô-myhí é, nga-nhúng rayuq eq rayuq chyitdap lhum sháng nghû, ahkuí, ngò, nang lé dúng kat lhê; shí gi, sâng-hi mai nga-nhúng wó gyô yù bê hkunmó lé sheq, nang lé ngò ká byî kat é nghut lhê; hkunmó sik ralhumm a nghut.

⁶ Yhang hkyô tô é hkunmó eq rajung za, nga-nhúng cháng kut é nghut jáng gi, chyitdap é hkyô nghut bê. Sâng-hi mai nungmoq wó gyô yù bê eq rajung za, Yhang hkyô tô é hkunmó gi, nungmoq chyitdap myit bo nyi râ matú nghut lhê.

⁷ Hkâsu mù gâ le, Yesuq Hkrisduq gi, gungsho dông jé lé é hkyô lé a yín yu é, mhaú zô é byù myo myo gi, mingkan htoq má jón wún bekô nghut ri; haú sù é byù gi, haú mhaú zo sù eq anti-hkrisduq dut râ nghut lhê.

⁸ Nungmoq zui sai bê muzó é akyù lé a lhoq hpyuq é za, gumjup é shigyáú chyunghuq lé, nungmoq wó hkam yù kó sháng gaq, yhumsing gùng sidiq nyi keq.

⁹ Hkrisduq mhoqshit é dang lé a châng é za, laí chyan é sù ó yuq nghut kôle, Garai Gasang lé a wó é sù nghut ri; haú mhoqshit é dang lé ru châng nyi é sù kúm gi, haú Íwa lé le, Yhangzo lé le, wó bê sù nghut ri.

¹⁰ Mhoqshit é dang haú lé a wun é byù rayuq yuq, nungmoq chyáng jé lé é nghut le gi, haú yuq lé nungmoq é yhúmhaú má hkâwâng nhâng kó; yhang lé hkâlhom xoq yù kó.

¹¹ Hkâsu mù gâ le, haú yuq lé lhom xoq yu é sù gi, yhâng é agê ashop é muzó má lóm bê sù nghut ri.

¹² Ngò gi, nungmoq lé ká byî kat râ hkyô myo myo joq kôlhang, laiká hkyap eq kajung-chi lé a kâm chùng naù. Nga-nhúng é gabú hkyô wó gumjup sháng gaq, ngò, nungmoq chyáng tsuq za lé jé mù, nungmoq eq myoqdong hkyúm kut nyo lhum râ lé myit myoqbyu nyi lhê.

¹³ Hkyin yù huí é náng nhâ é yhangzô pé gi, nang lé shi-kyâm kat akô nghut ri.

YOHAN Súm Dam Dàm Hun Kat é Laiká (3 John)

¹ Ngò suwún hpó gi, haù tengmán hkyô má ngò chyitdap é, ngá é chyitdap luzúm Ge-u lé dang kyô kat lhê.

² Chyitdap é luzúm hpó ê, ngò gi, haù náng é asak woi-nyí nyí-ngón yuqyo nyí é eq rajung za, nàng nguingón wángzán râ eq hkyô hkat hkangmó má, nyí-ngón yuqyo nyí sháng gaq nghú, kyúdung byí kat lhê.

³ Hkâsu mù gâ le, ngò gi, gumang wui ra-am, ngá chyáng lé jé mù, haù tengmán hkyô má nàng lhumzui é hkyô lé le, haù tengmán hkyô má nàng hkâsu kut xoq châng nyí é hkyô lé le, lé tai kyo kô é hkún, gyai yhang gabú é yanmai nghut lhê.

⁴ Haù tengmán hkyô má, ngá zô pé châng nyí é hkyô lé, ngò wó gyô é hkún gabú é í, gotú gabú hkyô a wó lo nghut ri.

⁵ Chyitdap é luzúm hpó ê, haù gumang wui gi, mau we bíng pé nghut to kôlhang, nàng yhangmoq lé lhom garúm yu é hkyô má, nàng gi, lhumzui nyí ri.

⁶ Yhangmoq gi, haù noqkuq hpúng mã é bang lé, náng é chyitdap myit eq séng luí tai kyo bekô nghut ri. Nàng gi, Garai Gasâng hí má gingdán é dông, yhangmoq é hkyowui matú garúm luí, dé kat é nghut jáng, ge é muzó jizó kut é nghut bê.

⁷ Hkâsu mù gâ le, yhangmoq gi, Hkrisduq é mying hau é matú htoq ló kôluí, a lumjing bâng chyáng mai haí lhang a hap yù kó nghut ri.

⁸ Haù mù luí, nga-nhúng gi, haù tengmán hkyô é matú rahá za wó chôm zui sai sháng gaq, haù sù é byu pé lé lhom hkúlum yù râ lhê.

⁹ Ngò gi, haù noqkuq hpúng lé laiká ká byí kat bê nghut lhê; nghut kôlhang, haù ushuq kut nau é sù Diotrehpi gi, ngamoq lé a lhom hap yù nghut ri.

¹⁰ Haù mù luí, ngò lé jé jáng gi, ngamoq lé a jo a âng é dang tai é eq lumù gansang é, yhang kut é muzó lé, tai hpyí kyo râ nghut lhê; yhang gi, haù hkyô lé myit a dik shí é nghut mù luí, yhang yhang le gumang wui lé a lhom hkúlum yù, lhom hkúlum yù nàu bang lé le, yhang mai hkúm zing pyám luí, yhangmoq lé haù noqkuq hpúng mai hkat htoq pyám ri.

¹¹ Chyitdap é luzúm hpó ê, agè ashop hkyô lé alik a yu é za, ge é hkyô lé yù aq; ge é hkyô kut é sù gi, Garai Gasâng chyáng mã é nghut bê; agè ashop é hkyô kut é sù gi, Garai Gasang lé a myàng shí é sù nghut ri.

¹² Demetri ge é hkyô lé, yuq hkangmó mai le, haù tengmán hkyô éq le, saksé hkám byí akô nghut ri; ngamoq le, yhang ge é hkyô lé saksé hkám byí lhê; haù ngamoq hkám é saksé gi, têng é hkyô nghut é lé, nàng sê lhê.

¹³ Ngò gi, nang lé ká kat ra hkyô myo myo joq kôlhang, kâjung eq kâjung-chi dông a ká kat nàu lo.

¹⁴ Ngò gi, a myáng má, nàng eq myang huí lhum râ lé myit myoqbyu tô lhê. Haù hkún sheq, ngá-nhik myoqdong hkyúm myang nyo lhum râ nghut lhê.

¹⁵ Nàng nguingón yuqyo nyí sháng gaq; shí mã é luzúm wui gi, nang lé shi-kyám kat akô nghut ri. Nàng le, haù mã é luzúm wui lé, mying du htau luí bo shi-kyám byi laq.

YUDE Hun Kat é Laiká (Jude)

¹ Yesuq Hkrisduq é dui-nhâng zoshâng nghut sù eq Yakuq é yhanggu, ngò Yude gi, haù Íwa Garai Gasâng èq ji yù mù, chyitdap é hui luí, Yesuq Hkrisduq èq upzúng é hui bâng chyáng dang kyô kat lê.

² Shogyo nhikmyin hkyô, nguóngón hkyô eq chyitdap hkyô gi, nungmoq chyáng agùn agó joq nyì sháng gaq ô!

Garai A Wó Bâng É Yubak Mara

³ Chyitdap é luzúm wuê, ngò gi, nga-nhúng chôm wó é hkyi yù hkyô haù eq séng luí, nungmoq lé gyai yhang kê kat byí nau é nghut lhê wá, haù sân-yúng bang lé, radá dâm jâng ap byí to bê nghut é lumjúng hkyo é matú nungmoq htuq htúng rã dut é lé, myit wum byi rã hkyô ká rã dut é lé, ngò byu-myang ri.

⁴ Hkâsu mù gâ le, haù mara dam byí é hui zo rã hkyô lé, a-nham pyat mai kê matsing tô é hui bê bang ra-am gi, nungmoq chyáng hkaù wang lò bekô nghut ri. Yhangmoq gi, Garai a wó é bang nghut luí, haù nga-nhúng é Garai Gasâng jeju lé, mingkan ngón hkyo èq htaí lhik pyám kô é htoq agó, Yhang za nga-nhúng é Yhumsing nghut sù eq Ahko ahkáng lhunglhang wó sù, Yesuq Hkrisduq lé he-ngik pyám akô nghut ri.

⁵ Nungmoq kúm gi, shí pé banshoq lé sê to gù nghut kôlhang, ngò mai nungmoq lé tai pún nau é hkyô gi, a-ô mã é pé nghut lhê: Haù gi, Yhumsing Garai mai, Yhâng é byu pé lé, Egotuq ming mai hkyi htoq yù kôlhang, a lumjúng é bang lé gi, htâng má dum lhoq htên pyám é nghut lhê.

⁶ Hau htoq agó, haù yhumsing é ayá lé tô pyám luí, yhumsing é nyì jowò lé pyám tô é maumâng pé lé, Yhang gi, haù tarâ jéyáng é hui rã Buinyi mó jé shoq, ahtum abyuq é toqjâng tuí èq tui luí, mauchut hkaù má lhúng tô é nghut lhê.

⁷ Haù eq rajung za, Sodom eq Gomoraq myuq eq hau é awui ayám mã é wá pé mã é bang gi, ashop é dông gungsho zùm yap é hkyô shut é eq myiwe yhangchang yuqgè yhangchang nyì zô lhùm é hkyô kut kô é nghut mù, yhangmoq gi, ahtum abyuq é myi má dam byí é hpuzo bâng é alik dut bekô nghut ri.

⁸ Haù eq rajung za yhang, yhupmoq moq é byù shí bang gi, yhumsing é gungsho lé agot a-û kut kômù, ahkáng ayá wó sù lé he-ngik pyám kôluí, mauhkúng bang lé lumù gansang akô nghut ri.

⁹ Nghut kôlhang, haù maumang lagyo agyì Mihkaelaq lhang gi, Mosheq é gùng eq séng luí, haù nat zau eq dang rhâng lhùm é hkùn, yhang lé rhoi é dông mara hùn dang a wám tai é za, "Nang lé, haù Yhumsing nhik-yo sháng gaq!" ga za tai ri.

¹⁰ Nghut kôlhang, byù haù bang gi, yhangmoq a sê gyô é hkyô pé lé rhoi dang tai pyám akô nghut ri; yhangmoq gi, haù myit woi-nyí a bo é dusak pé su, yhumsing myit mai sê gyô é hkyô pé má lhang, yhumsing gùng lé lhoq htên yu akô nghut ri.

11 Yhangmoq gi, dingnyé wó râ! Hkâsu mù gâ le, yhangmoq gi, Ka-in* kut é agè ashop é hkyô đông châng kô é yanmai le, akyû wó râ matú, Balam† shut é đông bo shut kô é yanmai le, Kora‡ é gumlau toq hkyô kut kômù, yhang su htên byoq byuq é hui kô é yanmai le nghut ri.

12 Yhangmoq gi, nungmoq é chyitdap zoshuq poì má nungmoq lé agot a-û wó dut nhang é bang nghut mù, gyuq hoq a bo é za, nungmoq eq rahá chôm zoshuq kô é hkùn, yhumsing gùng lé za yhumsing lhoq gyi yu é sau zúng bang nghut akô; yhangmoq gi, lai êq mut tâng wún é, mau a bo é mhut pé su nghut é htoq agó, ashi a zui mù, amyit eq roq hpùn pyám luí, í dâm shi é, xung nám lhê é sikkâm pé su nghut akô.

13 Yhangmoq gi, yhumsing é hoq jung lé, tsû-myup su htoq nhang é, haù wuimau mâ é kô é wuilhêng pé eq, tuq tuq chut é mauchut hkaù má tarâ jéyáng hui râ matú, ahtum abyuq tô to hui é, yông wún é kyí pé su nghut akô.

14 Byù haù bang eq séng luí, Adam mai byùxik nyhit xik má nyi é Enuq, myiqhtoi htoi tô é gi, "Wú keq, haù Yhumsing gi, Yhâng é chyoiyúng bang mun mun sen sen eq rahá gyó lé lo nyi bê nghut ri.

15 Yhang gyó lé lo é gi, yuq hkangmó lé tarâ jéyáng râ matú eq, haù tarâ a hkunggâ é lhunglhâng bang, tarâ a hkunggâ é đông kut é muzó pé banshoq lé le, tarâ a hkunggâ é yubak byu pé, Yhang lé tai shut é dang htân pé banshoq lé le, mara byi râ matú nghut lhê." gâ ri.

16 Byù haù bang gi, put dang tai é bang eq mara hùn dang tai é bang nghut akô; yhangmoq gi, yhumsing ô nau é agè ashop hkyô châng kô é htoq agó, yhumsing gùng yhumsing nghutbùn é dang tai é eq yhumsing maiwáng zat é đông, góbang lé owaq é bang nghut akô.

Hkam Jân Râ Hkyô

17 Nghut kôlhang, ngò chyitdap é luzúm wuí ê, nungmoq gi, haù nga-nhùng é Yhumsing Yesuq Hkrisduq é lagyô pé mai te tai tô é dang lé, bùn nyi keq.

18 Hkâsu mù gâ le, yhangmoq gi, "Haù ló htâng é ahkying pé má, tarâ a hkunggâ é yhumsing ô nau é hkyô đông châng é, rhoijap-dap dang tai é byu pé nyi to râ nghut lhê." ga, nungmoq lé tai wú kô é nghut lhê.

19 Byù haù bang gi, nungmoq lé gam hkoq é bang, mingkan hkyô lé baù za châng é bang, haù Woi-nyí a bo é bang nghut akô.

20 Nghut kôlhang, ngò chyitdap é luzúm wuí ê, nungmoq gi, haù Chyoiyúng Woi-nyí má kyûdùng é đông, nungmoq é chyoiyúng é lumjǐng hkyô má, yhumsing gùng yhumsing lhoq kô yu nyi keq.

21 Ahtum abyuq é asak lé wó yú râ matú, haù nga-nhùng é Yhumsing Yesuq Hkrisduq é shogyo nhikmyin hkyô lé láng uchyang, nungmoq gi, Garai Gasâng é chyitdap myit má, yhumsing gùng yhumsing nyi nyi keq.

22 Lumjǐng hkyô má úng-âng é bang lé, shogyo nhikmyin nyi keq;

23 góbang lé gi, myi mai she htoq yú mù, hkyi yú keq; dum, góbang lé gi, sidiq myit êq shogyo nhikmyin hkyô tũn shit mù, haù gungshô é achag achyut dap é yhangmoq é mebu lé chaq nyi keq.

Hkya-on Kungtôn Dang

* 1:11 Ka-in gi, yhanggu lé sat sù nghut lhê. Apùn 4:1-8 † 1:11 Balam gi, myiqhtoi nghut lhê, nghut kôlhang, ngunzè lé myoqnoq mù, Garai lé shut sù nghut lhê. Gyung So 22:1-35 ‡ 1:11 Kora gi, Garai byù nghut é hkyô-u shê sù Mosheq lé gumlau toq é hkyangjong nghut lhê. Gyung So 16:1-33

24-25 Nungmoq lé, a lingbat shoq wó upzúng lui, nungmoq lé, mara hùn râ hkyô a bo é za, gabú dik é dông mai Yhang é hpungwup shing kang bo é myoq hí má wó shuí shít é, nga-nhùng é hkyi yù Sû, rayuq za nghut é Garai Gasâng chyáng, hpungwup shing kang, hkikhkam hkyô, hpungwup a-tsam eq ahkáng ayá gi, nga-nhùng é Yhumsing Yesuq Hkrisduq dông mai, lai lò bê ipyat pé má le, ahkuí pyat má le, pyat dedu ahtum abyuq má le, rujoq nyí sháng gaq ô! Amen.

YOHAN É SHING-RÁN Laiká (Revelation)

Dang-hi Hpóng

¹ Yesuq Hkrisduq é shing-rán shí gi, adê myáng má dut lò rà hkyô pé lé, Yhâng é dui-nhâng zoshâng wui lé tún shit nhâng rà matú, Garai Gasâng èq Yesuq Hkrisduq Yhang lé byî tô é nghut lhê. Yhang gi, Yhâng é maumang lagyo lé nhang kat luí, Yhâng é dui-nhâng zoshâng Yohan lé, shing-rán haú sé nhang ri.

² Yohan gi, Garai Gasâng é mungdang eq Yesuq Hkrisduq é saksé lé, yhang myang é gũ banshoq eq rajung za saksé hkâm kyô é nghut ri.

³ Haú ahkyíng gi, chyâng lò bè nghut é yanmai, myiqhtoi dang shí pé lé, nghap kyô é sù eq, gyô yù luí, haú má kê tô é gũ lé châng kut é bang gi, hkungsó wó nyi akô.

Noqkuq Hpúng Nyhit Lhum Lé Dang Kyô Kat É Hkyô

⁴ Ngò Yohan gi, Asia mau mà é noqkuq hpúng nyhit lhum lé dang kyô kat lhê. Ahkui pyat le, a-nham pyat le, htang pyat má le rû nyi nyi é Su chyáng mai le, Yhâng é hkohkâm-tanghkuq hí mà é nyhit woi-nyí chyáng mai le,

⁵ lhumzúí é saksé nghut sù, shí byuq é mai sâng-hi dui toq é zomún dut sù, myidàm htoq mà é hkohkam pé lé up sù, Yesuq Hkrisduq chyáng mai le, jeju eq nguóngón hkyô gi, nungmoq chyáng joq nyí sháng gaq.

Nga-nhúng lé chyitdap luí, Yhâng é suí eq, nga-nhúng lé, nga-nhúng é mara pé mai lhoq lhut byí é eq,

⁶ Yhâng é Garai Gasang eq Îwa lé dojaú rà matú, nga-nhúng lé, mingdán byu pé eq hkyangjông pé* dut nhang é Su chyáng, duqwup shingkang eq hpungwup a-tsam gi, pyat dedu ahtum abyuq ru joq nyí sháng gaq ô! Amen.

⁷ Wú keq, Yhang gi, mhut mai lé lo nyi é nghut luí, myoqjí hkangmó gi, Yhang lé myàng kó rà nghut lhê;

haú Yhang lé htaú rot bang† lhâng, myàng kó rà nghut lhê;

haú myidàm htoq mà é byù lhunghhâng bang gi, Yhâng é yanmai, yón ngau é hui zo kó rà nghut lhê.

Haú đông nghut sháng gaq! Amen.

⁸ "Ngò gi, Alhpa eq Omega‡ nghut lhê. Ahkui pyat le, a-nham pyat le, htang pyat má le rû nyi nyi é, wum-o a-tsam dik shoq bò Sù nghut lhê." ga, haú Yhumsíng Garai Gasang tai ri.

Byu Yhangzo Su Dut Su É Hkyô

⁹ Yesuq é, wuihke jamjau hkyô má le, mingdán má le, jân shirang é hkyô má le, nungmoq é byinzùm nghut sù, ngò nungmoq é gumang hpó, Yohan gi, Garai Gasâng é mungdang eq Yesuq é saksé é yanmai, Patmo zinlóng má nyi nyi é nghut lhê.

* **1:6** Htoq Ló 19:6 † **1:7** Htaú rot bang gâ é gi, Yesuq tapzng má jén to hui é hkún, Yhâng é namcham má lham èq htaú é bang lé gâ lhê. ‡ **1:8** Alhpa eq Omega gi, Grik laiká myhi mà é sâng-hí cham eq lò htâng cham nghut lhê; haú tái nau é gi, rû dui nyi sù gâ é nghut lhê.

¹⁰ Haû Yhumsing é BuinyiS má, ngò gi, Woi-nyí eq shuí moq byuq ló é nghut mù, "Nàng myang é eq rajung za, chyúmding ralhum má ká luí, Ehpesu, Samurna, Pergamu, Htuatira, Sardi, Hpiladehpi eq Ladoki wà pé má joq é,

¹¹ noqkuq hpúng nyhit lhúm chyáng hun kat aq." ga, tut htê su gâ é htê mó, ngá é nunghtáng má mying é lé, ngò wó gyô ri.

¹² Haû ngo lé nyo nyí é htê yhumsing lé wú rã matú, ngò, gùng lhing kat é nghut lhê. Ngò gi, gùng lhing kat é hkún, hîng myi-kok tsungjang nyhit lhum lé le,

¹³ myi-kok tsungjang haû pé é agùng má, byu yhangzo su dut é Sû rayuq nyi tô é lé le, myang kat ri; haû yuq gi, hkyigoq htoq jé é buhîng wut to luí, wànggàng má hîng wànggò le wut tô ri.

¹⁴ Yhâng é ulhum eq xãm gi, sau hpyú maú eq gyo su hpyu zan tô ri; Yhâng é myoqjí gi, myishâm su duq nyi ri.

¹⁵ Yhâng é hkyí gi, myi bungghyûng má jên yu é jet é gyi su dut ri; Yhâng é htê gi, wui myo myo mying hûm é htê su gâ ri.

¹⁶ Yhâng é loqyo loq má gi, kyí nyhit cham chung tô ri; Yhâng é nhut mai gi, shamsó í shut dap é shâm htoq lo ri. Yhâng é myoqdong gi, htan dik é nyí gûng bui su tso nyi ri.

¹⁷ Yhang lé myang é hkún, ngò gi, shí gùng su, Yhâng é hkyí wang má lêng leq tô é nghut lhê. Haû hkún, Yhang gi, Yhâng é loqyo loq ngá ahtoq má ke byi mù, taí é gi, "Hkâgyuq, Ngò gi, Sâng-hi eq Jihtúm nghut lhê.

¹⁸ Ngò gi, dui nyí Sû le nghut lhê; Ngò gi, shí bê nghut kôle, wú keq, pyat dedu ahtum abyuq dui nyí é nghut lhê! Hau htoq agó, Ngò gi, shí hkyô eq momîng é zoqshi pé lé chúng Su nghut lhê.

¹⁹ Haû mù, nàng myang é lé le, ahkui dut é hkyô eq htângnùng le dut lò rã hkyô lé le, kã to aq.

²⁰ Nàng myang é, Ngá é loqyo loq mã é kyí nyhit cham eq hîng myi-kok tsungjang nyhit lhúm é zaú tô é hkyo é lichyúm gi, isu nghut lhê. Kyí nyhit cham gi, noqkuq hpúng nyhit lhúm é maumang lagyo nyhit yuq nghut ri; myi-kok tsungjang nyhit lhum gi, noqkuq hpúng nyhit lhum nghut ri.

2

Ehpesu Myuq Mã É Noqkuq Hpúng Lé Kã Kat É Laiká

¹ Ehpesu myuq mã é noqkuq hpúng é maumang lagyo lé isu nghú kã kat aq:

Haû yhâng é loqyo loq mã kyí nyhit cham chúng luí, hîng myi-kok tsungjang nyhit lhúm é gyoro mã sô nyí Su é dang gi,

² Ngò gi, náng é a-kyang, nàng shikut é hkyô, nàng hkam jãn é hkyô pé lé, sê lhê. Agé ashop é byu pé lé, nàng a jãn pyâm é hkyô lé le, haû lagyo a nghut kôlhang, lagyo pé nghut lhê gâ é bang lé, nàng chyam wú mù, yhangmoq lagyo apyoq pé nghut é lé wó sê yù kó é hkyô lé le, Ngò sê lhê.

³ Nàng gi, shikut shirâng bê nghut é htoq agó, Ngá mying é yanmai, wuîhke hkyô lé hkam jan bê nghut kôle, nú byuq é hkyô a bò nghut ri.

⁴ Nghut kôlhâng, nàng gi, náng é sâng-hi lhê é chyitdap myit lé tô pyâm é yanmai, ngò, nang lé mara hûn rã hkyô joq ri.

⁵ Nàng hká mai byit gyó é lé, myit bun aq! Myit lhîng luí, sâng-hi nàng kut é muzó pé lé, kut aq. Nàng myit a lhîng é nghut jáng, ngò, náng chyáng lé jé mù, náng é myi-kok tsungjang lé, hau é jowò mai huí pyám byi rã nghut lhê.

⁶ Nghut kôlhang, Ngò a jú é, Nikola é chángzô pé kut é hkyô lé, nàng le a jú kut é yanmai, náng chyáng ge é hkyô ralhum bo ashí nghut ri.

⁷ Gyo rá nohkyap dap sù gi, haù Woi-nyí mai noqkuq hpúng pé lé taí é hkyô lé, gyô yù sháng gaq. Wó ung é sù lé gi, haù Garai Gasâng é hparadisu má joq é asak sikgâm má é ashí zo rá ahkáng, Ngò byi rá nghut lhê.' gâ ri.

Samurna Myuq Mâ É Noqkuq Hpúng Lé Kâ Kat É Laiká

⁸ Samurna myuq mâ é noqkuq hpúng é maumang lagyo lé isu nghû kâ kat aq:

Haù Sâng-hi eq Jihtùm nghut é eq, shi byuq luí, asak dum dui Su é dang gi,

⁹ Nàng hui zô é wuìhke jamjau hkyô eq nàng myung é hkyô lé, Ngò sê lhê; nghut kôlhang, nàng gi, wó sù nghut ri! Tsadán é tarajong bang nghut to luí, Yudaq byu pé a nghut kôlhang, Yudaq byù nghut lhê gâ é bang taí hpoi é hkyô lé le, Ngò sê lhê.

¹⁰ Nàng hui zo rá nghut é wuìhke hkyô lé, hkâgyuq. Ngò, nungmoq lé taí kyo kôlé, haù nat Tsadán gi, nungmoq lé chyam wú é dông, nungmoq chyáng má é ra-am lé, htóng má hkyô pyám rá nghut lhê; hau htàng, nungmoq gi, raxé nyí tup zing-rí é hui zo kó rá nghut lhê. Shí shoq lhumzúi nyi aq, haù hkûn, Ngò, nang lé, asak janmaù byi rá nghut lhê.

¹¹ Gyo rá nohkyap dap sù gi, haù Woi-nyí mai noqkuq hpúng pé lé taí é hkyô lé, gyô yù sháng gaq. Í dâm nghû rá shi é hkyô* gi, wó ung é sù lé, wó záng htung rá a nghut.' gâ ri.

Pergamu Myuq Mâ É Noqkuq Hpúng Lé Kâ Kat É Laiká

¹² Pergamu myuq mâ é noqkuq hpúng é maumang lagyo lé isu nghû kâ kat aq:

Haù shamsó í shut dap é shâm wó Su é dang gi,

¹³ Nàng nyi é jowò lé, Ngò sê lhê; haù gi, Tsadán é hkohkâm-tanghkuq joq é jang nghut ri. Nghut kôlhang, nàng gi, Ngá myíng má lumhkau nyi é nghut luí, Tsadán nyi é jang nghut é nungmoq é myuq má, Ngá é lhumzúi é saksé hpó Antipa sat huí é hkûn lhang, nàng Ngo lé lumjíng é hkyô lé, a he-ngik pyám nghut ri.

¹⁴ Nghut kôlhang, Ngò, nang lé mara hùn rá hkyô ratsuí joq ashí; hkâsu mù gâ le, hparà lhô pé lé títg byí é zoshuq zô é eq, ashop é dông gungsho zùm yap é mara kut shut rá matú, Israelaq byu pé lé mhoq hpyoq rá hpaqchyí, Balak lé mhoq byí é Balam é mhoqshit hkyô lé myhik zing é byu pé, náng chyáng nyi ri.

¹⁵ Haù eq rajung za, haù Nikola é chángzô pé mhoqshit é hkyô lé myhik zing é byu pé le, náng chyáng nyi ri.

¹⁶ Haù mù luí, myit lhang aq! Haù a nghut jáng, Ngò gi, náng chyáng hân jé lé mù, haù Nghut má htoq é sham eq yhangmoq lé zan rá nghut lhê.

¹⁷ Gyo rá nohkyap dap sù gi, haù Woi-nyí mai noqkuq hpúng pé lé taí é hkyô lé, gyô yù sháng gaq. Wó ung é sù lé gi, haq tô é mannaq muk lé le, myíng asik kâ tô é luqgok hpyù racham lé le, Ngò byi rá nghut lhê, lhom hap yu é sù za sheq, myíng haù lé sé rá nghut lhê.' gâ ri.

Htuatira Myuq Mâ É Noqkuq Hpúng Lé Kâ Kat É Laiká

* 2:11 Í dâm nghû rá shi é hkyô gâ é gi, ngaraí ming wang é lé gâ lhê.

18 Htuatira myuq mâ é noqkuq hpûng é maumang lagyo lé isu nghû kê kat aq:

Haû myishâm su duq nyi é myoqjí eq jet é gyi su dut é hkyí dap é Sû, Garai Gasâng é Yhangzô é dang gi,

19 'Náng é a-kyang, chyitdap myit, lumjîng myit, dojaú é hkyô, hkam jân é hkyô pé lé le, nâng gi, hí lhê htoq má ahkuí je myô zui sai é hkyô lé le, Ngò sê lhê.

20 Nghut kôlhâng, yhumsing gûng yhumsîng myiqhtoi myhí nghut lhê gâ é myiwe Yezebulaq lé, nâng nyi nhâng tô é yanmai, Ngò, nang lé mara hûn râ hkyô shoq ri. Yhang gi, Ngá é dui-nhâng zoshâng wui lé, ashop é dông gungsho zùm yap râ eq hparâ lhô pé lé tûng byí é zoshuq zo râ hkyô lé mhoqshit luí, yhangmoq lé hkyô shuí nghoq ri.

21 Ngò gi, yhang lé, ashop é dông gungsho zùm yap é hkyô mai myit lhîng râ ahkyîng byi kôlhâng, yhang gi, a myit lhîng naù nghut ri.

22 Haû mù, Ngò gi, yhang lé, jamjau hui râ yhupchong má dú lheq pyám râ nghut é htoq agó, yhang eq su-myi sulàng lú hkyô kut é bang, yhangmoq kut é hkyô lé myit lhîng kô é za a nghut jáng, wuîhke jamjau mó hui zo nhâng râ nghut lhê.

23 Ngò gi, yhang zô pé lé sat pyám râ nghut lhê; haû hkûn, Ngò gi, myit nhiklhum eq myit é hkyô lé sé Sû nghut é lé le, nungmoq kut é muzô eq rajung za, nungmoq yuq hkangmó lé, Ngò tau byi râ nghut é lé le, haû noqkuq hpûng pé banshoq wó sé kó râ nghut lhê.

24 Mhoqshit hkyô haû lé a châng é eq Tsadán é nik é hkyô lhaq gâ é lé a mhoq yu é, Htuatira myuq má myit gyó tô é bang nungmoq lé, Ngò taí kôlé, nungmoq lé gotú wôlai Ngò jat byi râ a nghut.

25 Ngò jé lé é jé shoq, nungmoq wó tô é lé za myhik zîng nyi keq.

26-27 Wó ung é eq Ngò ô nau é hkyô lé jîhtûm jé shoq châng é sù lé gi,

"Yhang gi, yhangmoq lé, shamtoq dumbáng eq up† râ nghut lhê;

Yhang gi, tso-au hkoq pé lé su, yhangmoq lé bat hkyop pyám râ nghut lhê.*

gâ tô é eq rajung za, Ngò, Ngá Wâ chyáng mai ahko ahkáng wó yu é su, mingdán pé lé up râ ahko ahkáng, Ngò byi râ nghut lhê.

28 Ngò gi, yhang lé, haû bó-myhû byi râ nghut lhê.

29 Gyo râ nohkyap dap sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

3

Sardi Myuq Mâ É Noqkuq Hpûng Lé Kâ Kat É Laiká

1 Sardi myuq mâ é noqkuq hpûng é maumang lagyo lé isu nghû kê kat aq:

Haû Garai Gasâng é woi-nyí nyhit woi-nyí eq kyí nyhit cham lé chûng Su é dang gi, 'Ngò gi, nâng é a-kyang lé sê lhê; nâng gi, asak dui nyi sù ga kôlhâng, shi byuq sù nghut ri.

2 Gyîng lò aq! Myit gyó tô é, shi byuq râ za nghut é pé lé, wum-o lhoq kîng yù aq; hkâsu mù gâ le, Ngá é Garai Gasâng é hí má, nâng é a-kyang a gumjup é hkyô lé, Ngò myang ri.

† 2:26-27 Shamtoq dumbáng eq up gâ é gi, ahko ahkáng banshoq wó luí, up é lé gâ lhê. * 2:26-27 Hkya-on 2:9

³ Haù mù, nàng hkâsu kut wó hap yu é eq wó gyô yu é hkyô lé, myit bun aq; haù dông cháng luí, myit lêng aq. Nàng a bûn gyíng é nghut le gi, Ngò hkau sú su lé râ nghut luí, nàng gi, Ngò hká u lé râ lé, sé râ a nghut.

⁴ Nghut kôhlang, Sardi myuq má, yhumsing é mebu lé agot a-û a kut é byù ra-am nyi akô. Haù bang gi, hpyu é mebu wut luí, Ngò eq rahá sô wún kô râ nghut lhê; hkâsu mù gâ le, yhangmoq gi, gíngdán é bang nghut akô.

⁵ Wó ung é sù gi, haù bang su, hpyu é mebu myang wut râ nghut lhê. Ngò gi, haù yuq é myíng lé, hkâ-nhám le, asak jihpán laiká buk mai yu pyám râ a nghut; hau htoq agó, Ngá Wá é hí má le, Yhâng é maumang lagyo pé é hí má le, haù yuq é myíng lé, Ngò yín yù râ nghut lhê.

⁶ Gyo râ nohkyap dap sù gi, haù Woi-nyí mai noqkuq hpûng pé lé taí é hkyô lé, gyô yù sháng gaq. gâ ri.

Hpiladehpi Myuq Mã É Noqkuq Hpûng Lé Kâ Kat É Laiká

⁷ Hpiladehpi myuq mã é noqkuq hpûng é maumang lagyo lé isu nghû kâ kat aq:

Haù chyoiyúng é eq tengmán é, Dawiq hkohkam é zoqshi chung é, ó yuq le a wó myhi loshoq hpông é eq, ó yuq le a wó hpông loshoq myhi é Su é dang gi,

⁸ Nàng kut é muzó pé lé, Ngò sê lhê. Wú aq, ó yuq le a wó myhi é hkum ralhum, Ngò náng hí má hpông to byí lhê. Nàng gi, wum-o ratsuí za bò kôhlang, Ngá é dang gyo luí, Ngá é myíng lé a he-ngik pyám é hkyô lé, Ngò sê lhê.

⁹ Haù tarajong má noqkuq kôhlang, Tsadán lé dojaú bang nghut é, Yudaq byù a nghut kôhlang, nghut lhê gâ é byù mhaù pé lé, Ngò, nàng é hkyi wang má, lé paí gop nhâng luí, Ngò, nàng lé chyitdap é hkyô, yhangmoq lé sé nhâng râ nghut lhê.

¹⁰ Nàng gi, myit hîng hîng hkam jan râ é Ngá é hkunmó lé châng nyi bê nghut é yanmai, myidàm htoq má nyi é bang lé chyam lik wú râ matú, mîngkan gón má jé râ nghut é wuîhke jamjau ahkyíng mai, Ngò, nang lé lhoq lhut yù râ nghut lhê.

¹¹ Ngò gi, a myáng má jé lé lô râ nghut lhê. Náng é janmaù lé, ó yuq èq le a wó yu pyám byi sháng gaq, nàng wó tô é pé lé myhik zing nyi aq.

¹² Wó ung é sù lé gi, Ngá é Garai Gasâng é noqkuq yhùm mã é hkungzing mó dut nhâng râ nghut lhê. Haù yuq gi, hkâ-nhám le haù mai dum htoq ló râ a nghut. Ngò gi, Ngá é Garai Gasâng é myíng lé le, Ngá é Garai Gasâng chyáng mai htoq luí, mauhkûng mai gyó lé lo é, Yerusalem wà mó Asik ga é, Ngá é Garai Gasâng é myuq myíng lé le, Ngá é myíng sik lé le, yhâng chyáng kâ tap byi râ nghut lhê.

¹³ Gyo râ nohkyap dap sù gi, haù Woi-nyí mai noqkuq hpûng pé lé taí é hkyô lé, gyô yù sháng gaq. gâ ri.

Ladoki Myuq Mã É Noqkuq Hpûng Lé Kâ Kat É Laiká

¹⁴ Ladoki wà mó mã é noqkuq hpûng é maumang lagyo lé isu nghû kâ kat aq:

Haù lhumzuí é eq tengmán é saksé nghut é, Garai Gasang hpan tô é lé up é, Amen gá Su é dang gi,

¹⁵ Ngò gi, nàng kut é muzó lé sê lhê; nàng gi, gú le a nghut, nye le a nghut dut ri. Nàng gi, gú jáng jâng gú, nye jáng jâng nye dut râ lé, Ngò ô nau ri.

¹⁶ Nghut kôhlang, nàng gi, gú le a nghut, nye lé a nghut, lumnye nghut é yanmai, Ngò gi, nang lé, Ngá é nhut mai byé htoq pyám râ za nghut bê.

17 "Ngò gi, wó sù nghut lhê; ngò gi, sutzè gyai wó bê nghut luí, hái lhang a ra lo." ga nàng tái ri. Nghut kôlhang, nàng gi, wuîhke jamjau hui sù, asho awui dut sù, myùng sù, myoqjit sù eq achîn dut sù nghut é lé, nàng a sé myhi-nhung.

18 Haù mù luí, nàng gi, wó sù sùt sù wó dut sháng gaq, myi má jên yu é hîng lé le, nàng achîn dut é hoq hpu hkyô lé, wó nghop pyám sháng gaq, wut râ matú, mebu hpyú lé le, nàng myoq wó myâng sháng gaq, nàng é myoqjí má kat râ matú, myoq chí lé le, nàng, Ngá chyáng mai wui yù râ matú, Ngò, nàng lé hpaqchyî byî lhê.

19 Ngò chytidap é bang lé gi, tan luí, mhoqshit lhê. Haù mù, nàng gi, hàn bún gying luí, myit lhang aq.

20 Wú aq! Ngò gi, hkum yâm má yap to luí, hkum lé kok nyi lhê. Rayuq yuq, Ngá é htê lé wó gyo luí, hkum hpóng byî é nghut jáng, Ngò gi, wàng mù, haù yuq eq rahá zo shuq râ nghut lhê; haù yuq le, Ngò eq rahá zo shuq râ nghut lhê.

21 Ngò gi, ùng luí, Ngá Wa eq rahá Yhâng é hkohkâm-tanghkuq má zung é eq rajung za, wó ung é sù lé gi, Ngò eq rahá Ngá é hkohkâm-tanghkuq má zùng râ ahkáng, Ngò byi râ nghut lhê.

22 Gyo râ nohkyap dap é sù gi, haù Woi-nyí mai noqkuq hpûng pé lé tái é hkyô lé, gyô yù sháng gaq.' gâ é nghut ri." gâ ri.

4

Mauhkûng Htoq Má Hkohkâm-tanghkuq Joq É Hkyô

1 Hau htâng má, ngò wú kat le, mauhkûng má hkum ralhum bóng tô é lé myang ri. Ngò sâng-hî dàm wó gyô é tut htê su gâ é danghtê ngo lé tái é gi, "Shí má doq lò aq, htângnùng má dut lò râ hkyô pé lé, Ngò, nàng lé tún shit bá." gâ ri.

2 Haù hkûn jáng yhang, ngò gi, Woi-nyí má moq byuq ló luí, mauhkûng htoq má hkohkâm-tanghkuq ralhum joq é lé myàng ri; tanghkuq haù má, byù rayuq zung tô ri.

3 Haù má zung to Su é isâm gi, huhpé eq ne yúng lungsêng su dut ri. Hui nyui lungsêng su dut é woqgan sîng-yang gi, haù hkohkâm-tanghkuq má hkông lhang tô ri.

4 Hkohkâm-tanghkuq hau é lhanghkyuq má, hkohkâm-tanghkuq gotú í xe myi lhum le joq to luí, hpyu é mebu wut mù, ulhum má hîng janmaú tsùng tô é suwún í xe myi yuq gi, haù má zung tô bum akô.

5 Haù hkohkâm-tanghkuq mai, lhap hpyat é, mying hûm é eq maugum gûm é pé dut htoq lo ri. Haù hkohkâm-tanghkuq hí má, myi-kok nyhit lhum le duq tô ri; haù pé gi, Garai Gasâng é woi-nyí nyhit woi-nyí nghut ri.

6 Hau htoq agó, san zâ é myoqjàm su dut má é wui-nhông le, haù hkohkâm-tanghkuq hí má dîng tô ri.

Haù hkohkâm-tanghkuq agùng má le, lhanghkyuq má le, hî-u nunghtáng lhanghkyuq myoqjí dap é dui é dusak myi du nyi tô ri.

7 Dui é dusak sâng-hî du gi, hkanghkyi su dut ri; í du nghû râ du gi, nohtó su dut ri; sùm du nghû râ dù é myoqdong gi, byu myoqdong su dut ri; myi du nghû râ du gi, dâng wún é zunbung su dut ri.

8 Dui é dusak myi du haù gi, du hkgamó dùng hkyuq lhum lhum dap é htoq agó, lhanghkyuq má myoqjí kôm dap luí, dùng hkaù má lhang dap ri. Yhangmoq, nyí myín hkâ-nhám a no loshoq tái nyi kô é gi,

"A-nham pyat le, ahkuí pyat le, htang pyat má le, rû nyi nyi é, haû wum-o a-tsam dik shoq bò Sû Yhumsing Garai Gasang gi,

chyoiyúng, chyoiyúng, chyoiyúng nyi ri."

gâ akô.

⁹ Haû dui é dusak myí du gi, hkohkâm-tanghkuq má zung é, pyat dedu ahtum abyuq dui nyi Su chyáng, hpungwup shing kang, aróng eq jeju bun hkyô byí é hkangmó,

¹⁰ haû suwún í xe myi yuq gi, hkohkâm-tanghkuq má zung é, pyat dedu ahtum abyuq dui nyi Su é hí má, ngóm gop luí, Yhang lé noqkuq akô. Yhangmoq gi, yhangmoq é hkohkâm-janmaú lé, haû hkohkâm-tanghkuq hí má hkyut to mù, tai kô é gi,

¹¹ "Ngamoq é Yhumsing eq Garai Gasang ê, nyi mi-nyí, joq mijoq lé, Nang hpan to bê nghut luí,

haú pé gi, Nang ô nau é dông hpan tô é hui bê nghut mù, nyi to joq tô bùm bê nghut é yanmai,

Nang gi, hpungwup shing kang, aróng eq hpungwup a-tsam lé, hap yù gíng Sû nghut ri."

gâ akô.

5

Chyúmding Eq Sauzo

¹ Hau htâng, ngò gi, hkohkâm-tanghkuq má zung to Su é loqyo loq má, í shut é laiká kâ to é, dizik nyhit lhum tap tô é chyúmding le myang ri.

² Hau htoq agó, a-tsam mó bo é maumang lagyo rayuq gi, "Haû dizik pé lé hí pyám râ eq chyúmding lé hpóng râ gi, ó yuq wá gingdán lhê lhu?" ga luí, hté mó eq wut tai nyi é lé le, ngò myang ri.

³ Nghut kôlhang, mauhkúng htoq má le, myigùng htoq má le, myigùng ô má le, haû chyúmding lé wó hpóng râ eq ahkaú má wó wú râ byù rayuq lhang a nyi nghut ri.

⁴ Haû chyúmding lé hpóng mù, ahkaú má wú râ gingdán é byù rayuq hkâlháng a nyi é yanmai, ngò gyai yhang ngau pyâm é nghut lhê.

⁵ Haú hkún, haû suwún wui má é rayuq, ngo lé tai é gi, "Hkâ-ngaú! Wú aq, haû Yudaq byuhú má é Hkanghkyi nghu é, haû Dawiq é Amyit nghut Sû gi, ung bê nghut luí, haû chyúmding eq haú má é dizik nyhit lhum lé wó hpóng lhê." gâ ri.

⁶ Hau htâng, haû dui é dusak myí du eq suwún wui é agùng má é, hkohkâm-tanghkuq agùng má, sat hui bê su dut é Sauzo radu yap tô é lé, ngò myang ri. Sauzo haú gi, hkyuí nyhit lhum eq myojjí nyhit lhum dap ri. Myojjí haû nyhit lhum gi, myidám htoq gón má nhang htoq kat é, Garai Gasang é woi-nyí nyhit woi-nyí nghut ri.

⁷ Haû Sauzo gi, lé mù, hkohkâm-tanghkuq má zung to Su é loqyò má é chyúmding lé yu ri.

⁸ Haû chyúmding lé yu é hkún jáng, haû dui é dusak myí du eq suwún í xe myi yuq gi, Sauzô é hí má ngóm gop akô. Yhangmoq yuq hkangmó gi, ting eq sân-yúng bâng é kyûdung dang gâ é namngón jung byíng mui tô é hng góm pé le chung bum akô nghut ri.

⁹ Yhangmoq gi,

"Nàng gi, haù chyúmding lé yù râ eq hau é dizik pé lé hpông râ gingdán Sù nghut ri.

Haí mù gâ le, Nàng gi, sat hui bê nghut luí, byuhú hkangmó mai le, myíng hkangmó mai le,

byù myú hkangmó mai le, mingdán hkangmó mai le, Garai Gasâng é matú,

Náng é suí eq byù pé lé wui hpyit yú bê nghut ri.

10 Nga-nhúng é Garai Gasang lé dojaú râ matú, Nàng gi, yhangmoq lé, mingdán byu pé eq hkyangjông pé dut nhâng bê nghut luí, yhangmoq gi, myidàm htoq má up kó râ nghut lhê."

ga luí, mahkôn sik ralhum hkôn nghut ri.

11 Haù hkûn, ngò wú kat le, haù hkohkâm-tanghkuq lhinghkyuq má le, dui é dusak pé eq suwún wui é lhinghkyuq má le, nyí tô bum é maumang lagyo ajùm ayò mun mun sen sên é htê lé wó gyô ri.

12 Yhangmoq gi,

"Haù sat hui bê Sauzo gi, hpungwup a-tsam, sutzè, hpaqchyí byéng-yá, wum-o, aróng sitang,

hpungwup shing kang eq hkya-on kungtôn hkyô lé, hap yù gíng ri."

ga luí, htê mó eq ton bum akò nghut ri.

13 Hau htoq agó, mauhkûng htoq má nyí é, myigùng htoq má nyí é, myigùng ô má nyí é, wuiming má nyí é, hpan to huí é lhunglháng gi,

"Hkya-on kungtôn hkyô, aróng sitang, hpungwup shing kang eq hpungwup a-tsam gi,

haù hkohkâm-tanghkuq má zung tô é Sù eq Sauzô chyáng,

pyat dedu ahtum abyuq ru joq nyí sháng gaq ô!"

ga luí, ton nyí bùm kô é lé, ngò wó gyô ri.

14 Haù dui é dusak myí du gi, "Amen" ga taí jang, haù suwún wui gi, ngóm gop luí noqkuq akò nghut ri.

6

Dizik Nyhit Lhum É Hkyô

1 Haù Sauzo gi, dizik nyhit lhum má é sâng-hí lhum lé hpông kat é hkûn, ngò myang é nghut lhê. Hau htâng, haù dui é dusak myí du má é radu gi, maugum su gâ é htê mó eq, "Lé aq." gâ é lé, ngò wó gyô ri.

2 Ngò wú kat é hkûn, ngá é myoq hí má myang hpyú radu nyí tô é lé myang ri! Haù má jì to sù gi, lai rahpu chung tô é htoq agó, yhang lé, janmaú ralhum tsùng to byí luí, ùng budang wó râ matú ùng sù rayuq dòng htoq ló ri.

3 Haù Sauzo gi, í lhum nghú râ dizik lé hpông kat é hkûn, haù í du nghú râ dui é dusak gi, "Lé aq." ga taí é lé, ngò wó gyô ri.

4 Hau htâng, myang nè radu htoq lo ri; haù má jì tô é sù gi, myidàm htoq má é nguingón simsaq hkyô lé wup yù râ eq, byù yhangchang rayuq eq rayuq sat lhum nhâng râ a-tsam byí é hui sù nghut luí, yhang lé shâm mó rahkyam le byí to bê nghut ri.

5 Haù Sauzo gi, sùm lhum nghú râ dizik lé hpông kat é hkûn, haù sùm du nghú râ dui é dusak gi, "Lé aq." ga taí é lé, ngò wó gyô ri. Ngò wú kat le, myang noq radu ngá myoq hí má nyí tô é lé myang ri! Haù má jì tô é sù gi, yhâng é loq má jàng rahpu chung to ri.

6 Haù hkûn, "Ra-nyí é zuihpau gi, sungsô rabyé, ra-nyí é zuihpau gi, muk-guq sum byé nghut lhê; haù tsanlun xù eq tsibiyiq wing lé kúm gi, hkálhoq

hten kó." gâ é htê, haû dui é dusak myî du hkaû mai htoq lô é su gâ é lé, ngò wó gyô ri.

⁷ Haû Sauzo gi, myî lhum nghû râ dizik lé hpông kat é hkûn, haû myî du nghû râ dui é dusak gi, "Lé aq." ga tai é lé, ngò wó gyô ri.

⁸ Ngò wú kat é hkûn, ngá é myoq hí má, myang muí radu nyi tô é lé myang ri! Haû má jî to su é mying gi, Shí hkyô gâ ri; Moming le, yhâng é htâng má châng tô ri; yhangnhik gi, sham êq, mutmó gyó é êq, wúm gyó é êq, tân é yosô-ze êq, myidàm htoq myi tú mâ é ratú má nyi é bang lé sat pyám râ ahkáng wó yu to bekô nghut ri.

⁹ Sauzo gi, ngo lhum nghû râ dizik lé hpông kat é hkûn, Garai Gasâng é mungdâng é yanmai le, yhumsing hkâm é saksê é yanmai le, sat hui bâng é sobyô pé gi, hkungga gyap a-ô má nyi tô bùm kô é lé, ngò myang ri.

¹⁰ Yhangmoq gi, "Chyoiyúng é eq tengmán é, ahko ahkáng lhunglháng wó é Yhumsing ê, myidàm htoq má nyi é byu pé lé, ngamoq é sui manglat dam a byi é eq tará a jéyáng é za, hkâ-myháng jé shoq nyi nyi râ lúh?" ga, htê mó êq garu bum akô.

¹¹ Haû hkûn, yhangmoq yuq hkangmó gi, bu hpyû hîng radung dung hut é hui luí, yhangmoq su sat hui râ bang, yhangmoq é byinzùm dui-nhâng zoshâng wuì nghut é gumang wuì sat hui ngap é hkûn jé shoq, razup zim za nyi shi keq ga tai é lé wó gyô akô nghut ri.

¹² Hkyuq lhum nghû râ dizik lé, Yhang hpông kat é hkûn, ngò myang ri; haû u lé, layàng mó le nún lo ri; haû bui gi, saumaú noq êq woq é pán su noq byuq ri; haû lhamó lhum gón gi, sui su ne byuq ri;

¹³ maihpáng gâm lé, lai mó êq lo mut nhûn kat é hkûn, a myhíng shí é maihpáng-shi yoq gyó é su, mauhkûng má é kyî pé gi, myidàm htoq má byit gyó lo bum ri.

¹⁴ Haû mauhkûng gi, laiká lé dîng lhûm é su htot pyâm é hui luí, bùm hking bùm mó eq zínlong lhumjup pé gi, yhâng é jowò mai huí pyâm é huí ri.

¹⁵ Haû hkûn, haû myidàm htoq mâ é hkohkam pé, uphkâng bang, gyezaú pé, sut wó bang, wum-o a-tsam bò bang, jun pé eq luthkyô wó é lhunglhâng bang gi, bùm dong pé eq bùm pé mâ é luqgok gyoro pé má haq tô bùm uchyang.

¹⁶ haû bùm pé eq luqgok pé lé, "Ngamoq é gùng htoq má gyó ke kó laq! Haû hkohkâm-tanghkuq má zung to Su é myoq hí mai le, haû Sauzô é nhikmoyô é hkyô mai le, ngamoq lé haq pyám kó laq.

¹⁷ Hkâsu mù gâ le, haû Yhangnhik nhikmoyô é buinyi mó gi, jé bê nghut ri; ó yuq wá wó jân yap nyi râ lúh?" ga garú tai bum akô nghut ri.

7

144,000 Yuq Masat Lhô Tap Hui Kô É Hkyô

¹ Hau htâng má, maumang lagyo myi yuq gi, maumyi myi chyûn má yap to mù, myigùng htoq má le, wuì ming htoq má le, sigâm pé má le, lai a hik sháng gaq ga, myi shut mâ é lai lé zuí zing to kô é lé, ngò myang ri.

² Haû hkûn, haû dui nyi é Garai Gasâng é masat lhô chung é maumang lagyo gotú rayuq gi, buihtoq hkyam mai htoq lé lo é lé, ngò dum myang ri. Yhang gi, haû myigùng eq wuì ming lé lhoq hten râ ahkáng wó tô é maumang lagyo myi yuq haû lé,

³ "Nga-nhông é Garai Gasâng dui-nhông zoshâng wui é ngelang má, ngamoq mai masat lô a tap byi byi gi, haù myigùng, wui ming eq siggâm pé lé hkálhoq hten shi kó." ga htê mó eq wut tai kat ri.

⁴ Haù hkûn, masat lô tap huí é bang byù hkâ-myhó yuq nghut é lé, ngò wó gyô ri. Israelaq byuhú banshoq mâ é 144,000 yuq nghut ri.

⁵ Masat lô tap huí yu é,
Yudaq up mâ é bang gi, 12,000 yuq,
Rubin up mâ é bang gi, 12,000 yuq,
Gat up mâ é bang gi, 12,000 yuq,
⁶ Ashe up mâ é bang gi, 12,000 yuq,
Nahtali up mâ é bang gi, 12,000 yuq,
Manase up mâ é bang gi, 12,000 yuq,
⁷ Simeon up mâ é bang gi, 12,000 yuq,
Lewiq up mâ é bang gi, 12,000 yuq,
Yishahka up mâ é bang gi, 12,000 yuq,
⁸ Zebulun up mâ é bang gi, 12,000 yuq,
Yosep up mâ é bang gi, 12,000 yuq,
Ben-yamyin up mâ é bang gi, 12,000 yuq,
nghut bum akô.

Bu Hpyû Hîng Wut Bâng É Hkyô

⁹ Hau htâng, ngò wú kat é hkûn, mingdán hkgangmó mai le, byuhú hkgangmó mai le, byù myú hkgangmó mai le, myíng chângjup mai le, lé é bang, ó yuq lhâng a ung nghap é byù moq mó gi, haù hkohkâm-tanghkuq é hí má le, Sauzô é hí má le, yap nyi bùm kô é lé myang ri; yhangmoq gi, bu hpyû hîng wut luí, yhangmoq é loq má byùm-haq chung tô bùm kômù,

¹⁰ "Hkyi yù hkyô gi, haù hkohkâm-tanghkuq má zung tô é nga-nhông é Garai Gasang eq Sauzo chyáng mâ é nghut ri ô!"
ga luí, htê mó eq garû bum akô nghut ri.

¹¹ Haù maumang lagyo lhunglhâng bang gi, haù hkohkâm-tanghkuq é lhíngghyuuq má le, suwún wui eq dui é dusak myí du é lhíngghyuuq má le, yap tô akô nghut ri. Yhangmoq gi, hkohkâm-tanghkuq hí má myoqdong ngóm gop mù, Garai Gasang lé noqkuq uchyang,

¹² "Amen! Hkya-on kungton hkyô eq hpungwup shing kang,
hpaqchyí byéng-yá eq jeju bun hkyô,
aróng, hpungwup a-tsam eq wum-o gi,
nga-nhông é Garai Gasâng chyáng pyat dedu ahtum abyuq ru joq nyí sháng
gaq ô!

Amen!"
ga tai bum akô.

¹³ Haù hkûn, suwún wui mâ é rayuq gi, "Shi bu hpyû hîng wut é bang gi, ô pé lú? Yhangmoq gi, hkâmai lé é bang nghut akô lú?" ga ngo lé myí ri.

¹⁴ Ngó gi, "Suwún hpó ê, nàng sê lhê." nghù tú tai jáng, yhang gi, "Shi bang gi, haù wuihke jamjau mó mai wó lut htoq lô luí, yhangmoq é bu hîng lé, haù Sauzô é sui má chí hpyû yù bê bang nghut akô.

¹⁵ Haù mù, yhangmoq gi, Garai Gasâng é hkohkâm-tanghkuq hí má nyi mù, Yhâng é noqkuq yhùm má, nyí, myín Yhang lé dojaú nyí kô é nghut lhê; haù

hkohkâm-tanghkuq má zùng Sû gi, Yhâng é jonghpang lé, yhangmoq é ahtoq má nghop byi râ* nghut lhê.

¹⁶ Yhangmoq gi, hkâ-nhám le, zòmut wuìshit hui râ a nghut lo; bui lhap é le, hkyíng hkyíng nyé é le, yhangmoq lé wó záng rà a nghut.

¹⁷ Hkâsu mù gâ le, haù hkohkâm-tanghkuq agùng mã é Sauzo gi, yhangmoq é sau-rém sù dut râ nghut luí, Yhang gi, yhangmoq lé, asak wuìbúm jé shoq shuí é rà nghut lhê. Hau htoq agó, Garai Gasang gi, yhangmoq é ngaubyi sháng shoq sut pyám byi râ nghut lhê." ga tai ri.

8

Nyhit Lhum Nghû Râ Dizik Eq Namngón Jung Nyhê É Hing Góm

¹ Haù Sauzo gi, nyhit lhum nghû râ dizik lé hpông kat é hkûn, mauhkúng htoq má hkyíng hkum rawuí kò zím byuq ri.

² Haù hkûn, Garai Gasâng é hí má yap tô é maumang lagyo nyhit yuq lé, ngò myang ri; yhangmoq lé, tut nyhit lhum byi tô ri.

³ Namngón jung nyhê é hing góm chung é maumang lagyo gotú rayuq gi, haù hkungga gyap yàm má lé yap tô ri. Haù hkohkâm-tanghkuq hí mã é hing hkungga gyap má, sân-yúng bang banshoq é kyúdung dang eq rahá nhông byi râ matú, namngón jung gyai myo shoq, yhang lé byi tô ri.

⁴ Haù namngón jùng é myihkau gi, sân-yúng bâng é kyúdung danghtê eq rahá, maumang lagyo haù yuq é loq mai Garai Gasâng chyáng hkyang rot ló bê nghut ri.

⁵ Hau htâng, maumang lagyo haù yuq gi, góm lé yù mù, hkungga gyap mã é myi lhoq pyíng yù luí, myidàm htoq má dú hkyô kat é hkûn, maugum mó gùm é, myíng hùm é, lhap hpyat é eq layàng nún é pé dut htoq lo ri.

Tut Mut É Hkyô

⁶ Hau htâng, tut nyhit lhum wó é maumang lagyo nyhit yuq gi, tut mut râ hen akò nghut ri.

⁷ Sâng-hí yuq nghû râ maumang lagyo gi, yhâng é tut lé mut kat ri; haù hkûn, sui nyó é likwò eq myi htoq lô mù, haù lé myidàm htoq má lhoq hkyô kat jáng, maumyí sum tú mã é ratú eq siggâm sum tú mã é ratú nyé gyó byuq é htoq agó, wàhu mhanzo banshoq le nyé gyó byuq bê nghut ri.

⁸ Í yuq nghû râ maumang lagyo gi, yhâng é tut lé mut kat ri; haù hkûn, myi dap tô é bùm mó su é lé, wuìshuq lung-aù má dú hkyô kat ri. Wuìshuq lung-aù sum tú mã é ratú gi, sui dut byuq bê nghut ri;

⁹ wuìshuq lung-aù mã é dui jung sum tú mã é ratú gi, shi byuq luí, wuì-sanghpo pé sum tú mã é ratú gi, htên byuq bê nghut ri.

¹⁰ Sum yuq nghû râ maumang lagyo gi, yhâng é tut lé mut kat ri; haù hkûn, myihu dùm su dùq é kyí mó racham gi, mauhkúng mai byit gyó lô mù, wuìlàng sum tú mã é ratú eq wuìbúm pé htoq má lo gyó záng ri.

¹¹ Kyí hau é myíng gi, Kyí Kyí Hko gâ é nghut ri. Wuìlàng sum tú mã é ratú hkò byuq luí, wuì haù hkò byuq é yanmai byù myo myo shi byuq bekò nghut ri.

¹² Myi yuq nghû râ maumang lagyo gi, yhâng é tut lé mut kat ri; haù hkûn, bui sum tú ratú, lhamó sum tú ratú, kyí sum tú ratú gi, hten luí, haù pé é sum

* **7:15** Yhâng é jonghpang lé, yhangmoq é ahtoq má nghop byi râ, gâ é gi, yhangmoq eq rahá nyi mù, yhangmoq lé upzúng nyí râ gâ é nghut lhê.

tú ratú gi, mauchut byuq bê nghut ri. Hau htoq agó, nyí sum tú mâ é ratú le, myín sum tú mâ é ratú le, maubó a joq dut byuq ri.

¹³ Ngò wú nyi le, zunbung radu gi, maulat má dâng wún mù, "Gotú maumang lagyo sum yuq eq mut râ nghut é, tut hte é yanmai, myidàm htoq má nyi bâng é matú, dingnyé, dingnyé, dingnyé nghut ri." ga luí, htê mó èq garú taí ri.

9

¹ Ngo yuq nghû râ maumang lagyo gi, yhâng é tut mut kat é hkún, mauhkúng mai myidàm htoq má byit gyó tô é kyí racham lé, ngò myang ri. Háu nik dik htúm é Lasang-dông é zoqshi gi, kyí haú lé byí tô ri.

² Kyí haú gi, nik dik htúm é Lasang-dong lé hpông kat é hkún, myi bunghkyúng mó mai htoq lo é myihkau dùm sù é myihkau gi, dong haú mai htoq lo ri. Nik dik htúm é Lasang-dong haú mâ é myihkau dum é yanmai, bui eq maulat gi, mauchut byuq bê nghut ri.

³ Myihkau dùm haú mai dinggám pé htoq lô mù, myidàm htoq má gyó lé akô; myidàm htoq mâ é gogok é a-tsam sù é a-tsam le, yhangmoq lé byí to bê nghut ri.

⁴ Myidàm htoq mâ é wàhu pé lé le, mhan-haq hpoqnoq pé lé le, siggám pé lé le a lhoq htên é za, yhumsing é ngelang má Garai Gasâng é masat lhô a dap é byu pé lé baú zing-ri râ matú, yhangmoq lé taí tô ri.

⁵ Nghut kôlhang, haú bang lé sat pyám râ ahkáng kúm gi, yhangmoq a wó e za, lhamó ngo hkyap tup haú bang lé zing-ri râ ahkáng za ru wó akô nghut ri. Háu bang hui zô é shí-nò jamjau gi, gogok eq pat hkún no hpù é su yhang nghut ri.

⁶ Háu buinyi pé má, byu pé gi, shí hkyô hô kôlhang, myàng kó rá a nghut; shí nau dik kôlhang, haú shí hkyô gi, yhangmoq chyáng mai hpang byuq râ nghut lhê.

⁷ Dinggám haú pé gi, majan zan râ matú buí tô é myang pé su dut akô. Yhangmoq é ulhum má gi, hîng janmaú sù é tsúng tô é htoq agó, yhangmoq é myoqdong gi, byu myoqdong su dut bum akô nghut ri.

⁸ Yhangmoq é xâm gi, myiwe wui é xâm su dut luí, yhangmoq é zui gi, hkanghkyi zui su dut ri.

⁹ Yhangmoq é wànggò-long gi, joqtoq wànggò-long su dut ri; yhangmoq é dùng mying é htê gi, majan pá shut din yán wang ló é myang jùm eq myanglhêng pé mying hùm é htê su gâ ri.

¹⁰ Yhangmoq é sho-myi gi, nyin dap é gogok é sho-myi su dut ri; yhangmoq é sho-myi má, lhamó ngo hkyap tup byu pé lé zing-ri râ a-tsam bo ri.

¹¹ Yhangmoq é hkohkâm gi, nik dik htúm é Lasang-dong mâ é maumang nghut ri; haú é mying gi, Hebre myíng dong Abadon ga, Grik myíng dông Apolion* gâ ri.

¹² Sâng-hí lhum dingnyé gi, lai ló byuq bê nghut ri; nghut kôlhang, dingnyé í lhum jé lô shirá nghut lhê.

¹³ Háu hkyuq yuq nghû râ maumang lagyo gi, yhâng é tut mut kat ri. Háu hkún, Garai Gasâng é hí má joq é hîng hkungga gyap é hkyuí myí lhum mai htê htoq lo é gi,

* 9:11 Apolion gâ é lichyúm gi, lhoq hten lhoq hpyoq sù gâ é nghut ri.

14 "Uhprat wui mó lãng má tuí lhung tô é maumang myi yuq lé, nhang pyám aq." ga tut chung tô é hkyuq yuq nghû râ maumang lagyo lé tai é lé, ngò wó gyô ri.

15 Haú hkûn, xângzo byù sum tú mâ é ratú lé sat pyám râ matú, ahkyíng, buinyi, lhôhkyap, zanwut lé, rì rì hen to bê nghut é haú maumang myi yuq lé nhang kat bê nghut ri.

16 Myang ji ji é gyè jum gi, byù du sen í hkyíng bo é hkyô lé, ngò wó gyô ri.

17 Ngò, shing-rán myang é má, myang jùm eq haú pé má ji bãng é wànggò-long pé gi, myi su ne é, shing shing nyui é eq hang su hui é nghut ri. Myáng jum é ulhum gi, hkanghkyi pé é ulhum su dut lui, yhangmoq é nhut mai, myi, myihkau eq hang pé htoq lo ri.

18 Haú yhangmoq é nhut mai htoq lo é myi, myihkau eq hang gâ é wúm ihkyup sùm jùng é yanmai, xângzo byù sum tú ratú gi, sat hui bekô nghut ri.

19 Myang haú jum é sho-myi gi, lhangmui su dut lui, ulhum dap mù, hte sè é yanmai, yhangmoq é a-tsam gi, nhut eq sho-myi pé má nghut ri.

20 Wúm ihkyup haú sùm jung mai wó lut lui, myit gyó tô é xângzo byu pé gi, yhangmoq é loq pé eq zui sai é muzó mai, myit a lhung shi kô é htoq agó, nat gâng pé lé le, a wó myàng, a wó gyo, a wó sô é, hìng, ngùn, gyi, luqgok, sik pé é alhô lé le, noqkuq é hkyô lé a tô pyám shi kó nghut ri.

21 Hau htoq agó, yhangmoq gi, byù sat é mù mai le, myoqheq hpaqchyí mù mai le, ashop é dõng gungsho zùm yap é hkyô mai le, hkaú é mai le, myit a lhung shi kó nghut ri.

10

Maumang Eq Laiká Ding É Hkyô

1 Hau htâng, ngò gi, wum-o bo é maumang lagyo gotú rayuq, mauhkung mai gyó lé lo é lé myang é nghut lhê. Yhang lé gi, mhut eq htup yup to lui, yhâng é u htoq má woqgan sîng-yang gyân tô ri; yhâng é myoqdong gi, bui su dut lui, yhâng é hkyi gi, myi zing su dut ri.

2 Yhâng é loq má gi, hpông tô é laiká ding zo ralhum chung tô ri; yhâng é loqyo hkyi gi, wuishuq lung-aú má nang, yhâng é loqpaí hkyi gi, myigùng htoq má nãng to lui,

3 hkanghkyi mying é htê su ga, htê mó eq garû kat ri. Yhang garu kat jáng, maugum htê nyhit lhum tú gûm kat ri.

4 Haú maugum htê nyhit lhum tú gûm kat é hkûn, ngò ká râ da jáng, "Haú maugum htê nyhit lhum tú gûm é hkyô lé zaú pyám aq; haú pé lé hkâkâ to." ga, mauhkung mai danghtê htoq lo é lé ngò wó gyô kat ri.

5 Haú hkûn, wuishuq lung-aú eq myigùng htoq má nãng yap tô é lé, ngò myang é maumang lagyo haú gi, yhâng é loqyo loq lé mauhkung shut tu toq kat ri.

6 Haú mù, yhang gi, mauhkung eq haú má nyi é lhunglhang lé le, myidàm htoq eq haú má nyi é lhunglhang lé le, wuishuq lung-aú eq haú má nyi é lhunglhang lé le, hpan tô é, pyat dedu ahtum abyuq dui nyi Su é myìng lé lang lui, dakam é gi, "Ahkyíng ratsuí le, lhoq myáng nyi lo râ a nghut!

7 Nghut kôlhang, Garai Gasang mai Yhâng é dui-nhâng zoshâng wui nghut é myightoi pé lé tai to bê é dangluz eq rajung za, Yhâng é zaú tô é hkyô gi, nyhit yuq nghû râ maumang lagyo eq yhâng é tut lé mut myhîng é buinyi pé má, shit râ nghut lhê." gâ ri.

⁸ Hau htoq agó, ngò wó gyô wú bê mauhkûng mâ é htê, ngo lé dum tai é gi, "Hau wuishuq lung-au eq myidàm htoq má nâng yap tô é maumang lagyô loq má hpông tô é laiká ding lé, ê yù aq." gâ ri.

⁹ Hau mù, ngò gi, ê lui, laiká ding zo hau, ngo lé byi râ matú maumang lagyo hau lé é dung le, yang gi, "Shí lé yù mù, zo kat aq. Náng é wam má hko râ nghut lhê; nghut kôle, náng é nhut má gi, byo-î su yang chui râ nghut lhê." gâ ri.

¹⁰ Hau mù, ngò gi, laiká ding zo hau lé, maumang lagyô é loq mai yù mù, zô é nghut lhê; hau hkûn, ngá é nhut má gi, byo-î su yang chui nghâm ri; nghut kôle, bàn zô kat é hkûn, ngá é wam hkaù má hkô bê nghut ri.

¹¹ Hau hkûn, "Nàng gi, byù myû myo myo eq séng lui le, mingdán myo myo eq séng lui le, myíng ahú hú eq séng lui le, hkohkam pé myo myo eq séng lui le, myiqhtoi dum htoi ra râ nghut lhê." ga, ngo lé tai kyô ri.

11

Saksé Í Yuq É Hkyô

¹ Ké râ jung dumbáng su dut é jâm-yang rahkat ngo lé byi lui, ngo lé tai é gi, "Ê mù, hau Garai Gasâng é noqkuq yhûm lé le, hkungga gyap lé le, kê wú lui, hau má noqkuq é bang lé nghap wú aq.

² Nghut kôlhang, shinggan mâ é wâng lé gi, a kê é za lhai pyâm to aq; hkâsu mù gâ le, hau gi, tûngbau pé lé byi to bê nghut lhê. Yangmoq gi, hau choyiyúng myuq lé, lhamó myixe í hkyap tup chôm nang kó râ nghut lhê.

³ Hau htoq agó, ngò gi, ngá é saksé í yuq lé a-tsam byi râ nghut lui, yangnhik gi, ji mebu wut* mù, buinyi 1260 nyi tup myiqhtoi htoi kó râ nghut lhê." gâ ri.

⁴ Yangnhik gi, hau myidàm Yhumsing é hí má yuq tô é tsanlun gâm í gâm eq myibung tsungjang í lhum nghut ri.

⁵ Byù rayuq yuq, yangnhik lé zing-ri nau é nghut jáng, yangnhik é nhut mai myi htoq lô mù, yangnhik é gyê pé lé nyhê hkyô pyám râ nghut lhê. Yangnhik lé kâm zing-ri é sù gi, hau su kut sat pyâm é hui zo râ nghut lhê.

⁶ Yangnhik gi, yangnhik myiqhtoi htoi nyi é buinyi pé má mau a wò râ matú, mauhkûng lé myhi pyám râ a-tsam wó akò; hau htoq agó, wui pé lé sui dut nhâng râ eq, nau é hkûn, wúm ajung jûng eq myidàm htoq lé ihkyup hkyô byi râ a-tsam le, wó akò nghut ri.

⁷ Yangnhik gi, saksé ban hkâm é hkûn, hau nik dik htûm é Lasang-dong mai htoq lo é tân jung dusak gi, yangnhik lé htûm mù, ûng lui, sat pyám râ nghut lhê.

⁸ Yangnhik é mâng lé gi, danglêng dông Sodom eq Egotuq gâ é, yangnhik é Yhumsing lé le, tapzing má jên sat pyâm é myuq mó é hkyô gûng má, leq to râ nghut lhê.

⁹ Hau hkûn, byù myû hkangmó mâ é bang, byuhú hkangmó mâ é bang, myíng hkangmó mâ é bang, mingdán hkangmó mâ é bang gi, yangnhik é mâng lé myhup pyám râ matú a gyo kô é za, sum nyi éq rahkyuí tup chôm wú nyi kó râ nghut lhê.

¹⁰ Myidàm htoq má nyi é bang gi, yangnhik shi byuq é yanmai gabú nguínón lui, rayuq eq rayuq chyunghuq byi lhûm é dông ngón poi kut kó

* 11:3 Ji mebu wut gâ é gi, iyon yôn é lé gâ lhê.

râ nghut lâ. Hkâsu mù gâ le, myiqhtoi haú nhik gi, myidàm htoq má nyi nyi é bang lé, wuñke jamjau byi lai bê su nhik nghut akô.

¹¹ Nghut kôlhang, sum nyí eq rahkyuí tup lai é htâng má, Garai Gasâng chyáng má é asak soq gi, yhangnhik chyáng wàng mù, yhangnhik gi, toq yap tô kô é nghut lui, yhangnhik lé myang é bang gi, gyai yhang gyuq nán bùm bekô nghut ri.

¹² Haú hkûn, "Shí má doq lò keq." ga, mauhkûng mai yhangnhik lé wut é htê mó lé wó gyo kômù, yhangnhik é gye pé wú tô é u lé, mhut ji mù mauhkûng shut doq lò bekô nghut ri.

¹³ Haú u lé yhang, layàng mó nún lô lui, myuq hkaú raxê tú má é ratú gi, htên gyop byuq bê nghut ri. Hau htoq agó, byù nyhit hkyíng yuq shi byuq bê nghut lui, myit gyó tô é bang gi, gyai yhang gyuq nán bùm kômù, mauhkûng má é Garai Gasang lé hkya-on shigyaú bum akô nghut ri.

¹⁴ Í lhum nghû râ dingnyé gi, lai byuq bê nghut ri; sùm lhum nghû râ dingnyé gi, jé râ za nghut bê.

Nyhit Lhum Nghû Râ Tut Mut É Hkyô

¹⁵ Nyhit yuq nghû râ maumang lagyo gi, yhâng é tut mut kat ri; haú hkûn, mauhkûng htoq má htê mó pé htoq lo é gi, "Míngkan htoq má é míngdán gi, nga-nhùng é Yhumsing eq Yhâng é Hkrisduq é míngdán dut bê nghut lui,

Yhang gi, pyat dedu ahtum abyuq up nyi râ nghut lâ."

gâ ri.

¹⁶ Haú hkûn, yhumsing é hkohkâm-tanghkuq má zùng mù, Garai Gasâng é hí má nyi tô é suwún í xe myi yuq gi, yhangmoq é myoqdong ngóm gop mù, Garai Gasang lé noqkuq uchyang tai kô é gi,

¹⁷ "Ahkuí pyat, a-nham pyat rû dui nyi é, wum-o a-tsam dik shoq bò Sù Yhumsing Garai Gasang é!

Nàng gi, hpungwup a-tsam mó chùng mù, up nyi bê nghut é yanmai, ngamoq, Nang lé jeju hkya-on lâ.

¹⁸ Byù myú pé gi, nhikjum yo bùm kôlui, Náng é nhikmo-yo hkyô gi, jé bê nghut ri.

Shí bê bang lé, tarâ jéyáng râ eq, Náng é dui-nhâng zoshâng myiqhtoi pé lé le, Náng é sân-yúng bang lé le, Náng é myíng lé gyuq hkunggá é tiq ko lé le, shigyaú chyunghuq byi râ eq, myidàm htoq lé lhoq hten bang lé lhoq hten râ, ahkyíng gi, jé bê nghut ri."

gâ akô.

¹⁹ Haú hkûn, mauhkûng htoq má, Garai Gasâng é noqkuq yhùm hpông to lui, Yhâng é noqkuq yhúmkaú má, Yhâng é dangshikaq eq sêng é saksé sidek lé byu-myang ri. Haú hkûn jáng, lhap hpyat é, myíng hùm é, maugum gùm é, layàng nún é, likwò mó gyó é pé dut htoq lo ri.

12

Myiwe Myhi Eq Manjung É Hkyô

¹ Hau htoq agó, mauhkûng má limik kumlhá mó htoq shit é gi: myiwe myhi rayuq gi, bui lé wut chùng mù, lhamó má hkyi ke lui, kyí raxe í cham dap é janmaú lé, yhâng é ulhum má tsung tô ri.

² Yhang gi, zogùng dut tô é nghut lui, zo hkû râ matú, zohkû-nò no nyi é yanmai, gyai yhang ngau garú nyi ri.

³ Hau htâng, mauhkûng má gotú kumlhá dum htoq shit é gi: gyai kô é manjung nè mó* radu gi, ulhum nyhit lhum eq hkyuî raxê lhum dap luî, yhâng é ulhum hkangmó má janmau tsûng tô ri.

⁴ Yhâng é sho-myi gi, mauhkûng má é kyî sum tú mâ é ratú lé shûm tsîng yù mù, myidàm htoq má he hpyit hkyô kat ri. Manjung haû gi, zoshâng hku htoq kat eq wó myui hâng kat shoq ga, haû myiwe myhî é hí má láng yap tô ri.

⁵ Myiwe myhî haû gi, mingdán banshoq lé shamtoq dumbáng eq up râ nghut é yuzzo rayuq lé hkû bê nghut ri; yhâng é zoshâng lé gi, Garai Gasâng é hí má le, Yhâng é hkohkâm-tanghkuq hí má le bún toq yû bê nghut ri.

⁶ Myiwe myhî haû gi, yhâng é matú Garai Gasang lajâng to byî é yoso hkaû má hpang wang é bê nghut ri; haû jowò má, yang gi, 1260 nyî tup lhom baú é hui râ nghut lhê.

⁷ Mauhkûng htoq má majan htoq bê nghut ri. Mihkaelaq eq yhâng é maumang lagyô pé gi, manjung lé majan é zan kôluî, haû manjung eq yhâng é maumâng pé le, tau zân akô.

⁸ Nghut kôlhâng, yangmoq gi, a ûng kômù, mauhkûng má é yangmoq nyî jowò lhoq hpyuq pyám bekô nghut ri.

⁹ Haû mingkan gón lé hkyô shuí nghoq é, natzau eq Tsadán ga é, a-nham lhê é lhangmuî nghut é manjung mó haû gi, yhâng é maumang pé eq rahá myidàm htoq má dú hkyô pyám é hui bê nghut ri.

¹⁰ Haû hkûn, mauhkûng htoq má htê mó đông taí é lé, ngò wó gyô é gi, "Ahkuî gi, nga-nhûng é Garai Gasâng é hkyi yù hkyô, hpungwup a-tsam eq mingdán le,

Yhâng é Hkrisduq é ahko ahkáng le, jé bê nghut ri.

Hkâsu mù gà le, nga-nhûng é Garai Gasâng é hí má, nga-nhûng é gumang wui lé,

nyî, myín mara hun nyi é sù gi, dú hkyô pyám é hui bê nghut ri.

¹¹ Yhangmoq gi, haû Sauzô é suí é yanmai le, yangmoq saksé hkâm é mungdâng é yanmai le,

yang lé ung pyám bekô nghut luî, shi byuq é jé shoq yhumsing asak lé a ha kó nghut ri.

¹² Haû mù luî, mauhkûng eq haû má nyi é bang ê, gabú nyî keq!

Nghut kôlhâng, myidàm htoq eq wuîshuq lung-aû gi, dingnyé wó ri;

hkâsu mù gà le, haû natzau gi, yhâng é ahkyíng yàm-yoq tot za ru joq alô nghut é lé sê é yanmai,

nhikmo-yô é eq, nungnhik chyáng gyó lé lô bê nghut ri."

gâ ri.

¹³ Haû manjung gi, myidàm htoq má dú hkyô kat huî é lé myàng luî, haû yuzzo hku é myiwe myhî lé zing-rî ri.

¹⁴ Myiwe myhî haû gi, lhangmuî chyáng mai wó lut luî, yang é matú lajâng tô é yoso má wó dang jé mù, ahkyíng ralhum, ahkyíng í lhum, ahkyíng rawui hkup† lhom baú nyi é hui sháng gaq ga, zùn mó é dùng í lhum byî é hui ri.

¹⁵ Haû hkûn, haû lhangmuî gi, myiwe myhî haû lé wó lhoq myhû pyám shoq ga, myiwe myhî é nunghtáng má, yhâng é nhut mai wui mó láng í é wui lhoq htoq kat ri.

* 12:3 Manjung nè mó gà é gi, Tsadán lé taí nau é nghut lhê. † 12:14 Ahkyíng ralhum, ahkyíng í lhum, ahkyíng rawui hkup gà é gi, "razàn, í zân, lhamó hkyuq hkyap" lé gà é nghut lhê; haû gi, 1260 nyî nghut ri.

¹⁶ Nghut kôlhang, manjung nhut mai lhoq htoq kat é wuì mó lâng haù lé, myigùng gi, yhâng é nhut há mù myui pyám byî é đông, myiwe myhí haù lé garúm yu ri.

¹⁷ Haù mù, manjung haù gi, myiwe myhí hau é yanmai, gyai yhang nhikmo-yo luí, Garaí Gasâng é jep é tará lé châng é bang eq Yesuq é saksé lé myhik zing nyi é bang nghut é, myit gyó tô é, myiwe myhí é awut ashín pé lé, majan zan rá matú htoq e ri.

¹⁸ Manjung haù gi, wuìshuq lung-aù yàm má yap tô ri.

13

Tân Jung Dusak Radu Wuìshuq Lung-aù Mai Htoq Lo É Hkyô

¹ Haù hkùn, haù wuìshuq lung-aù mai tân jung dusak radu htoq lo é lé, ngò myàng ri. Dusak haù má, hkyuì raxê lhum eq ulhum nyhit lhum dap to luí, yhâng é hkyuì pé má gi, janmaù raxê lhum tsúng to mù, ulhum hkangmó má gi, Garaí aróng lhoq hpoi é myìng dap tô bum ri.

² Ngò myang é tân jung dusak haù gi, bauze-lo su dut ri; nghut kôlhang, hkyí gi, wàm hkyí su dut luí, nhut gi, hkanghkyí nhut su dut ri. Haù manjung gi, yhâng é a-tsam eq yhâng é hkohkâm-tanghkuq lé le, ahko ahkáng mó lé le, tân jung dusak haù lé ap byî ri.

³ Tân jung dusak hau é ulhum ralhum gi, shí rá î é dàm dap huì é su dut kôlhang, damhkô haù gi, yá ge pyám bê nghut luí, mینگkan gón gi, mauhong byuq kômù, yhâng htâng châng bùm bekô nghut ri.

⁴ Manjung gi, tân jung dusak lé ahko ahkáng ap byî é yanmai, byu pé gi, manjung haù lé noqkuq é htoq agó, tân jung dusak haù lé le, noqkuq kômù, "Ó yuq wá, tân jung dusak shí du su dut ri lúh? Ó yuq wá, yhang lé wó zan ùng rá lúh?" ga bum akô.

⁵ Gyáng dang tái rá eq Garaí aróng lhoq hpoi dang tái rá nhut gi, tân jung dusak haù lé byi to bê nghut é htoq agó, lhamó myí xe í hkyap tup, yhâng é ahko ahkáng lé chùng rá ahkáng wó bê nghut ri.

⁶ Yhang gi, yhâng nhut hpóng mù, Garaí Gasâng aróng lé lhoq hpoi dang tái é htoq agó, Garaí Gasâng é myìng eq nyì jowò lé le, mauhkúng htoq má nyi é bang lé le, lumù gansang é sú nghut ri.

⁷ Haù sân-yúng bang lé majan zân ung yù rá a-tsam, yhang lé byi bê nghut ri. Hau htoq agó, byuhú hkangmó lé le, byù myú hkangmó lé le, myíng hkangmó lé le, mینگdán hkangmó lé le, up rá ahkáng, yhang lé byi bê nghut ri.

⁸ Haù sat hui bê Sauzo eq sêng é asak jihpán laiká buk má, mau htoq xâng hkun mai, myìng a kâ lhôm é, myidàm htoq má nyi é lhunglhang bang gi, haù tân jung dusak lé noqkuq kó rá nghut lhê.

⁹ Gyo rá nohkyap dap sú gi, gyò yù sháng gaq.

¹⁰ Shúm zung é hui rá sù gi, shúm zung é hui rá za nghut lhê.

Sham èq sat é hui rá sù gi, sham èq sat é hui rá za nghut lhê.*

Haù mù, sân-yúng bang gi, hkam jân é hkyô eq lhumzui hkyô bò kó rá nghut lhê.

Tân Jung Dusak Radu Myigùng Mai Htoq Lo É Hkyô

* **13:10** Chyúmding ra-am má gi, Byù rayuq yuq lé, shúm kut é sù gi, shúm zung é hui rá nghut lhê. Sham èq byù sat é sù gi, sham èq sat é hui rá nghut lhê, ga bo tô ri.

¹¹ Hau htâng, ngò gi, tân jung dusak gotû radu[†] myigùng mai htoq lo é lé myang ri. Yhang gi, sauzó é hkyuî su dut é hkyuî i lhum yuq ri; nghut kôlhang, yhang gi, manjung su ga dang nyo ri.

¹² Yhang gi, tân jung dusak hí lhê dû é ahko ahkáng lhunglhang lé, haú du é hí má chùng mù, shî râ í é damhkô ge byuq é tân jung dusak haú lé, haú mingkan eq mingkan htoq má nyi é bang lé noqkuq nhang ri.

¹³ Hau htoq agó, yhang gi, byu pê é myoq hí má, mauhkúng mai myigùng shut myi lé lhang wó lhoq hkyô é, limik kumlhá mó kut shit ri.

¹⁴ Yhang gi, tân jung dusak hí lhê dû é hí má, kumlhá haú pé kut râ ahkáng wó é yanmai, myidàm htoq má nyi é bang lé mhoq hpyoq yû luí, haú sâm damhkô dap kôlhang, dui nyi é tân jung dusak haú lé, hkunggâ é dông, yhangmoq lé, yhang é alhô saí nhang ri.

¹⁵ Yhang gi, haú tân jung dusak hí lhê dû é alhô lé, soq wó mut kat byi é a-tsam lé wó yû sù nghut ri; haú mù, alhô haú gi, dang wó tái luí, yhang lé a noqkuq é bang lé, sat hui nhang ri.

¹⁶ Hau htoq agó, yhang gi, byù mó byù zo, wó sù myùng sù, luthkyô wó bang eq jùn pê, yuq hkangmó lé, yhumsing é loqyo loq má nghut nghut, ngelang má nghut nghut, masat lô zik tap yû nhang ri.

¹⁷ Haú hkún, haú tân jung dusak é myiêng, a nghut jáng, yhang myiêng é masat námbat dap sù mai lai luí, ùng é, wui é hkyô, ó yuq le wó kut râ a nghut.

¹⁸ Hpaqchyí byéng-yá gi, shî má bo râ ri. Hpaqchyí bò sù gi, haú tân jung dusak é námbat lé sôn wú sháng gaq; hkâsu mù gâ le, haú gi, byù rayuq é námbat nghut lhê. Yhang é námbat gi, 666 nghut ri.

14

Sauzo Eq 144,000 Yuq É Hkyô

¹ Hau htâng, ngò wú kat le, haú Sauzo gi, Zi-un bùm má yap tô é lé myang ri; Yhang myiêng eq Yhang Wâ é myiêng lé, yhumsing é ngelang má kâ tap tô é byù 144,000 yuq le, Yhang eq rahá yap tô bùm ri.

² Haú hkún, ngò gi, wui pê myiêng hùm é htê eq maugum mó gùm é htê su gâ é htê, mauhkúng mai htoq lo é lé wó gyô ri. Ngò wó gyô é htê haú gi, títng bat bang, yhangmoq é títng lé bat myhíng é htê su gâ ri.

³ Yhangmoq gi, haú hkohkâm-tanghkuq é hí má le, dui é dusak myí du eq suwún wui pê hí má le, mahkôn sik lé hkon akô nghut ri. Haú myidàm htoq mai hkyi yû huí é byù 144,000 yuq mai lai luí, ó yuq le, mahkôn haú lé a wó mhoq sê yù kó nghut ri.

⁴ Haú bang gi, myiwe wui eq gungsho a zum é bang nghut luí, yhangmoq gi, zorâm jet pé nghut bum akô. Yhangmoq gi, haú Sauzo hká shut é le hká shut châng é bang nghut akô. Yhangmoq gi, byu pê chyáng mai wui yu é hui luí, sâng-hi myhíng é ashi lé su, haú Garai Gasang eq Sauzo lé ap byí é hui akô nghut ri.

⁵ Yhangmoq é nhut má, mhaú é hkyô hai le a tái kó; yhangmoq chyáng mara hún râ hkyô le a bò kó nghut ri.

Maumang Sum Yuq É Hkyô

⁶ Hau htâng, maumang lagyo gotû rayuq gi, maulat má dang wún é lé ngò myang ri; yhang gi, haú mingkan htoq má nyi é, mingdán hkangmó má é

[†] 13:11 Tân jung dusak gotû radu gâ é shí gi, myiqhtoi pyoq lé gâ nau é nghut lhê.

bang, byuhú hkangmó mâ é bang, myíng hkangmó mâ é bang, byù myú hkangmó mâ é bang lé, hko kyo rá ahtum abyuq é gabú danglù wó ri.

7 Yhang gi, "Garai Gasang, tará jéyáng rá ahkyíng jé bê nghut é yanmai, Yhang lé gyuq hkungga luí, Yhâng é hpungwup a-tsam lé shigyaú keq. Haú mauhkûng eq myigùng, wuìshuq lung-aú eq wuìbúm pé hpan tô é Sù lé, noqkuq keq." ga luí, htê mó èq taí ri.

8 Í yuq nghú rá maumang lagyo gi, htâng má châng lé mù, "Haú mingdán pé* lhunglháng lé, yhang kut shut é ashop é dông gungsho zùm yap é hkyô, nhik lhoq yô é tsibiyiq wing shuq nhang é, Babelon myuq mó gi, lêng gyop bê! Lêng gyop bê!" ga taí ri.

9 Sum yuq nghú rá maumang lagyo gi, yhangnhik é htâng má châng lé mù, "Haú tân jung dusak eq yhâng é alhò lé, noqkuq luí, yhumsing é ngelang má nghut nghut, loq má nghut nghut, yhâng é masat lhò lé tap yu é sù, ó yuq nghut kôle,

10 Garai Gasâng é nhikmo-yo nghu é góm má hut kat tô é, nhik-yô é tsibiyiq wing jet lé shuq rá nghut lhê. Hau htoq agó, haú chyoiyúng maumang lagyo pé hí má le, Sauzò é hí má le, yhang gi, duq nyi é myi eq hang èq zing-rí é hui zo rá nghut lhê.

11 Yhangmoq zing-ri huí é myihkau gi, pyat dedu ahtum abyuq htoq nyi rá nghut lhê. Haú tân jung dusak eq yhâng é alhò lé, noqkuq é bang eq yhâng mying é masat lhò tap yù sù é matú gi, nyí, myín, no rá ahkyíng wó rá a nghut." ga luí, htê mó èq taí ri.

12 Garai Gasâng é jep é tará cháng luí, Yesuq lé lhumzuí nyi é bang nghut é, sân-yúng bang gi, hkam shirang é hkyô bò rá lhê.

13 Hau htâng, "Ahkuí mai gi, haú Yhumsing má shí é sù, hkungsô wó nyi ri nghú kê to aq." gâ é htê, mauhkûng mai htoq lo é lé, ngò wó gyô ri.

Haú hkûn, haú Woi-nyí gi, "Nghut rô, yhangmoq kut é muzó é akyû gi, yhangmoq htâng cháng rá nghut é yanmai, yhangmoq gi, yhumsing zuí nguí é muzó mai myang hkying bekò rá nghut lhê." ga taí ri.

Myidàm Htoq Mã É Kyôshi Shù É Hkyô

14 Ngò dum wú kat le, mhut hpyû rahtu ngá hí má joq tô é lé myang ri; mhut hpyû htoq haú má Byu Yhangzo su dut é byù rayuq zung tô ri; Yhâng é ulhum má gi, hîng janmaú tsúng to luí, Yhâng é loq má gi, htoq é zaiyik ralhüm chung tô ri.

15 Haú hkûn, gotú maumang lagyo gi, noqkuq yhüm mai htoq lô mù, "Haú myidàm htoq mã é kyôshi gi, myhîng zan to bê nghut luí, kyôshu yoq jé bê nghut é yanmai, náng é zaiyik chûng mù, yik shù yù aq." ga, haú mhut htoq mã zung tô é Sù lé, htê mó èq taí garú kat ri.

16 Haú mù, mhut htoq mã zung tô é Sù gi, Yhâng é zaiyik lé, myigùng htoq mã dú hkyô kat luí, myidàm htoq mã é kyôshi lé, ban shù yù bê nghut ri.

17 Maumang lagyo gotú rayuq gi, mauhkûng htoq mã é noqkuq yhüm mai htoq lo ri; haú yuq le, htoq é zaiyik ralhüm chung tô ri.

18 Haú, myi lé up é maumang lagyo gotú rayuq gi, hkungga gyap mai htoq lô mù, htoq é zaiyik chûng sù lé, "Myidàm htoq mã é tsibiyiq shi gi, myhîng bê nghut é yanmai, náng é htoq é zaiyik yù mù, tsibiyiq shipaú haú pé lé, yâm tsing yù aq." ga, htê mó èq taí garú kat ri.

* 14:8 *Mingdán pé gâ é gi, a lumjîng bang lé gâ é nghut lhê.*

¹⁹ Maumang lagyo haú gi, yhâng é zaiyik lé, myidàm htoq má dú hkyô kat mù, haú má é tsibiyiq shi pé lé yâm tsing yù luí, Garai Gasang nhikmo-yô é tsibiyiq wing pyik jang mó má hut kat bê nghut ri.

²⁰ Myuq shinggan má é tsibiyiq wing pyik jang haú má, tsibiyiq shi haú pé lé nâng nyhoq luí, tsibiyiq wing pyik jang haú mai suí yui htoq lo é gi, myang lunghtúng myháng jé shoq jé lô mù, 180 dêng† kô we shoq yui lô bê nghut ri.

15

Ló Htâng É Wúm Nyhit Lhum Chung É Maumang Lagyo Nyhit Yuq É Hkyô

¹ Ngò gi, mauhkúng má gotú limik kumlhá joq é lé, dum byu-myang ri; haú gi, wúm nyhit lhum chung é maumang lagyo nyhit yuq nghut ri; wúm haú pé gi, lô htâng é wúm pé nghut ri; hkâsu mù gâ le, Garai Gasang nhikmo-yô é hkyô gi, haú gú mai bàn râ nghut lhé.

² Hau htoq agó, myi eq nyhò tò é myoqjâm wùi-nhông su dut é lé le, ngò myang ri; haú tân jung dusak eq yhâng é alhò lé le, yhâng mying é námbat lé le, wó ung pyám bê bang gi, wùi-nhông yàm haú má yap tô bum akô; yhangmoq gi, Garai Gasang byí é tít pé lé chung to kôluí,

³ Garai Gasâng é dui-nhâng zoshâng Mosheq é mahkôn eq haú Sauzô é mahkôn lé hkôn kô é gi,

"Wum-o a-tsam eq shoq bò Sù Yhumsing Garai Gasang ê, Nàng kut é muzó gi, hkik é eq mauhpo yhang nghut ri.

Pyat pyat zai zai é Hkohlkâm ê, Nàng é hkyô gi, dingmán é eq tengmán é nghut ri.

⁴ Yhumsing ê, Nàng lé a gyuq a hkungga râ eq Nàng mying lé a lhoq gyaú râ gi, ó yuq wá nyi râ lú?

Hkâsu mù gâ le, Nàng za chyoiyúng é Sù nghut ri.

Nàng kut é dingmán hkyô gi, tûn shit bê nghut é yanmai, byù myú lhunglhang gi, Nàng hí má lé noqkuq kó râ nghut lhé." gâ akô nghut ri.

⁵ Hau htâng, ngò wú kat le, mauhkúng má, saksé zúm joq é noqkuq yhúm bóng tò é lé, myang ri.

⁶ Haú wúm nyhit jung chung é maumang lagyo nyhit yuq gi, noqkuq yhúm haú mai htoq lo ri; yhangmoq gi, sân-yúng duqbó é nú nhám mebu wut luí, yhangmoq é wànggàng má hîng hpyihit baiyup tô akô nghut ri.

⁷ Haú hkûn, haú dui é dusak myí du má é radu gi, pyat dedu ahtum abyuq dui nyi é Garai Gasâng é nhikmo-yo hkyô bying tò é hîng góm nyhit lhum, haú maumang lagyo nyhit yuq lé byí ri.

⁸ Garai Gasâng é hpungwup shing kang eq hpungwup a-tsâm é yanmai, haú noqkuq yhúm gi, myihkau bying zan to bê nghut luí, haú maumang lagyo nyhit yuq é wúm nyhit jung za a bàn bàn gi, noqkuq yhúm haú má ó yuq le a wó wâng kó nghut ri.

16

Garai Gasâng É Nhikmo-yo Hkyô Bo É Góm Nyhit Lhum

¹ Hau htâng, maumang lagyo nyhit yuq lé, "Htoq ê mù, haú Garai Gasâng é nhikmo-yo hkyô bo é góm nyhit lhum lé, myigùng htoq má hut hkyô kat keq." ga, noqkuq yhúm mai htê mó eq taí é lé, ngò wó gyô ri.

† 14:20 180 dêng gi, Grik pé é stadia 1600 kô bo ri.

² Haú hkûn, sângh-hí yuq nghû râ maumang lagyo gi, htoq ê mù, yhâng é góm lé, myigùng htoq má hut hkyô kat jáng, haú tân jung dusak é masat lô dap é eq yhâng é alhô lé noqkuq é bâng chyáng, achay achyut é eq hkê-nho dik é, yapjeq ana dap tô bùm bê nghut ri.

³ Í yuq nghû râ maumang lagyo gi, yhâng é góm lé, wuìshuq lung-aú má hut hkyô kat ri; haú gi, shí bê byù rayuq é sui su dut byuq é htoq agó, haú má lúng é dui jung lunglhang gi, shi byuq bê nghut ri.

⁴ Sum yuq nghû râ maumang lagyo gi, yhâng é góm lé, wuìlàng pé eq wuìbùm pé má hut hkyô kat jáng, haú pé gi, sui dut byuq bê nghut ri.

⁵ Haú hkûn, haú wuì lé upzúng é maumang lagyo tai é lé, ngò wó gyô é gi, "A-nham pyat le, ahkui pyat le, rú nyi nyi é Chyoiyúng Sù é,

Nàng haú su kut jéyáng bê nghut é yanmai, Nàng gi, tengmán Sù nghut ri;

⁶ hkâsu mù gâ le, yhangmoq gi, Nàng é sân-yúng bang eq myiqhtoí pé é sui lé, lhoq htoq pyám bekô nghut luí,

Nàng gi, yhangmoq lé sui shuq nhang é nghut ri; haú gi, yhangmoq hui zo ging é hkyô nghut ri."

gâ ri.

⁷ Haú hkûn, haú hkungga gyap mai,

"Nghut rô! Wum-o a-tsam dik shoq bò Sù Yhumsing Garai Gasang é, Nàng jéyáng é hkyô pé gi, tengmán é eq dingmán é nghut ri."

ga le, tai kat é htê lé, ngò dum wó gyô ri.

⁸ Myi yuq nghû râ maumang lagyo gi, yhâng é góm lé, bui é ahtoq má hut hkyô kat é hkûn, bui gi, byu pé lé myí eq nyhê kyuq râ ahkáng wó bê nghut ri.

⁹ Haú mù, yhangmoq gi, nyé dik é eq nyhê kyuq é hui zo luí, wúm shí pé lé up nyi é Garai Gasang é mying lé nhing akô; haú-í yhang hpuzo kôlhang, yhangmoq gi, myit le a lhang kó, Garai Gasang lé le a shigyaú kó nghut ri.

¹⁰ Ngo yuq nghû râ maumang lagyo gi, yhâng é góm lé, tân jung dusak é hkohkâm-tanghkuq htoq má hut hkyô kat jáng, yhâng é mingdán gi, mauchut tuq dut byuq bê nghut ri. Mingbyú wui gi, yhumsing é shô lé lhang, ngat tân bùm shoq shí-nò jamjau hui zo kôluí,

¹¹ yhangmoq nô hpû é eq jeq é ana dap é yanmai, mauhkung má é Garai Gasang lé nhing akô; haú-í yhang hpuzo kôlhang, yhangmoq gi, yhangmoq kut é hkyô mai myit a lhang shi kó nghut ri.

¹² Hkyuq yuq nghû râ maumang lagyo gi, yhâng é góm lé, Uhprat wui mó lhang má hut hkyô kat jáng, wuìlàng haú gi, kân byuq luí, haú buihotoq hkyam má é hkohkam pé, lé lô râ hkyô dong bê nghut ri.

¹³ Haú hkûn, po su dut é, agé ashop é byò sum woi-nyí lé, ngò myang ri; haú pé gi, manjung, tân jung dusak, myiqhtoí pyoq pé é nhut mai htoq lô kô é bang nghut akô.

¹⁴ Woi-nyí haú pé gi, nat gâng pé é woi-nyí nghut luí, limik kumlhá pé kut shit kômù, haú wum-o a-tsam dik shoq bò Sù Garai Gasang é buinyi mó má majan zan râ matú, mingkan gón má é hkohkam pé lé lhoq tsing yù râ ga, htoq e lô akô nghut ri.

¹⁵ "Wú keq, Ngò gi, hkau sù su jé lé é nghut lhê! Su hí má gungchín a so râ eq hoq hpu hkyô a lhoq htoq shit sháng gaq ga, yhumsing é wutbu wutmlé, zúng nyí luí, gyng gyng kut nyi é sù gi, hkungsô wó nyi ri."*

* 16:15 Dang shí hkun gi, Yesuq tai é dang nghut lhê.

¹⁶ Haû mù, nat haû bang gi, hkohkam pé lé, Hebre myíng dông Armagedon gâ é jowò má, rahá ji tsíng tô akò nghut ri.

¹⁷ Nyhit yuq nghû râ maumang lagyo gi, yhâng é góm lé, maulat má hut hkyô kat ri; haû hkûn, haû noqkuq yhùm mã é hkohkâm-tanghkuq mai, "Bàn bê!" gâ é htê mó htoq lo ri.

¹⁸ Hau htoq agó, lhaphpyat é, mying hùm é, maugum gùm é eq layàng mó nún é pé dut htoq lo ri. Myidàm htoq mã, xângzo byù lé nyi é hkûn mai, layàng haû su nún é eq haû-í htan é gi, a joq wú shí é nghut lhê.

¹⁹ Haû mù, haû myuq mó gi, sùm hkyam byak goq byuq luí, mingdán pé mã é myuq pé le, gyop byuq bê nghut ri. Garai Gasang gi, Babelon myuq mó lé le myit bun luí, Yhâng é nhikmo-yô é tsibiyiq wing byíng shoq bo é góm lé shuq nhâng bê nghut ri.

²⁰ Zinlóng hkangmó gi, hpang byuq bê nghut luí, bùm pé le byuq byuq bê nghut ri.

²¹ Haû hkûn, myi xê joi kô lai é likwò mó gi, mauhkûng mai byu pé htoq mã wo gyó gyûn ri; likwò wúm gi, gyai yhang wuîhke jamjaû é wúm nghut é yanmai, byu pé gi, Garai Gasang lé nhíng bum akò nghut ri.

17

Shiwa Myhí Mó É Hkyô

¹ Haû góm nyhit lhum chung tô é maumang lagyo nyhit yuq mã é rayuq gi, lé lô mù, "Lé aq, haû wui myo myô pé htoq mã zung tô é shiwa myhí mó lé dam byi râ hkyô, ngò, nang lé tân shit bá.

² Myidàm htoq mã é hkohkam pé gi, yhang eq rahá ashop é dông gungsho zùm yap é hkyô kut shut kôluí, myidàm htoq mã nyi é bang gi, yhang kut shut é myiwe yuqgè nyi zô lhúm hkyô é tsibiyiq wing lé shuq wut bùm bekô nghut ri." ga luí, ngo lé tai ri.

³ Haû mù, maumang lagyo haû gi, Woi-nyí mã, ngo lé yoso shut shuí wang e ló ri. Haû ulhum nyhit lhum eq hkyuí raxê lhum dap luí, tai hpoi é myíng kôm dap tô é, zam zam ne é tân jung dusak htoq mã zung tô é myiwe myhí rayuq lé, ngò myang ri.

⁴ Myiwe myhí haû gi, me me dut é eq zam zam ne é mebu wut luí, hîng, lungsêng, palhé pé eq mhôn chung ri; yhâng é loq mã gi, yhâng é myiwe yuqgè nyi zô lhúm hkyô é agot a-û hkyô eq achayut é zè pé byíng tô é hîng góm ralhum chung tô ri.

⁵ NIK DIK É HKYÔ, MYIDÀM HTOQ MÃ É ACHAQ ACHYUT HKYÔ PÉ EQ

SHIWA MYHÍ PÊ É YHÂNGNU, BABELON MYUQ MÓ.

gâ é myíng gi, yhâng é ngelang mã kâ tap tô ri.

⁶ Myiwe myhí haû gi, sân-yúng bâng é sui eq Yesuq é saksé hkám bâng é sui shuq wut tô é lé, ngò myang ri.

Haû mù, ngò gi, gyai yhang maú byuq é nghut lhê.

⁷ Haû hkûn, maumang lagyo haû ngo lé tai é gi, "Nàng, haî mù maú lhê lú? Myiwe myhí haû eq, yhang jî tô é, ulhum nyhit lhum eq hkyuí raxê lhum dap é tân jung dusak é zâu tô é hkyô lé, ngò, nang lé tai kyo râ nghut lhê.

⁸ Nàng myàng é tân jung dusak haû gi, hí hkûn nyi wú bê, ahkuí a nyi lo, nghut kôhlang, nik dik htùm é Lasang-dong mai htoq lô mù, htên byoq é hui râ nghut lhê. Mau htoq xâng hkun mai, asak jihpán laiká buk mã myíng a kâ tô é, myidàm htoq mã nyi é bang gi, tân jung dusak haû lé myàng kô é hkûn,

maú byuq bùm kó rà nghut lê. Hkâsu mù gâ le, haú gi, nyi wú bê, ahkuí a nyi lo, nghut kôlhang, dum lé rà nghut é yanmai nghut ri.

⁹ Hpaqchyí byéng-yá bo é nyan gi, shí má rà ri. Haú ulhum nyhit lhum gi, myiwe myhi zung é bùm nyhit lhum nghut ri; hau htoq agó, hkohkâm nyhit lhum gi.

¹⁰ Ngo yuq gi, byit gyó byuq bê; rayuq gi, ahkuí nyi to ashí; myit tô é rayuq gi, a jé lé shí nghut ri; haú yuq jé lé é hkún, yhang gi, ahkyíng razup zo za wó nyí rà nghut lê.

¹¹ Hí hkún nyi wú bê, ahkuí a nyi lo dut é tân jung dusak haú gi, shit yuq nghú rà hkohkâm nghut ri. Yhang gi, haú nyhit yuq eq sèng é yanmai, yhâng é htên byoq hkyô shut e ló rà nghut lê.

¹² Haú nàng myàng é hkyuí raxê lhum gi, mingdán a myang yù shí é hkohkâm raxê yuq nghut ri; nghut kôlhang, yhangmoq gi, haú tân jung dusak eq rahá za, hkyíng hkum rahkum kô hkohkâm ayá lé wó yú kó rà nghut lê.

¹³ Yhangmoq gi, myit myoqbyù hkyô ralhum za nghut kômù, yhangmoq é a-tsam eq ahko ahkáng lé, haú tân jung dusak lé byi kó rà nghut lê.

¹⁴ Yhangmoq gi, haú Sauzo lé majan chôm zan kó rà nghut lê; nghut kôlhang, Sauzo haú gi, yhumsing pè é Yhumsing eq hkohkam pè é Hkohkâm nghut é yanmai, yhangmoq lé ung pyám rà nghut lê. Haú Sauzo eq rahá nghut é bang gi, ji yù huí é bang, hkyin yù huí é bang eq lhumzuí é bang nghut akô." gâ ri.

¹⁵ Hau htàng, maumang lagyo haú ngo lé dum tai é gi, "Nàng myang é, shiwa myhi zung tô é wui pé gi, byù myú pé, byù ajùm ayò pé, mingdán pé eq myíng lhumjup nghut ri.

¹⁶ Haú nàng myang é tân jung dusak eq hkyuí raxê lhum gi, shiwa myhi haú lé a jú kut kó rà nghut lui, yhâng é sutzè banshoq shang yu pyám byi mù, mebu lhang a dap loshoq achindum kut to kó rà nghut lê; hau htoq agó, yhâng é sho lé zo lui, myí èq nyhê hkyô pyám kó rà nghut lê.

¹⁷ Hkâsu mù gâ le, Garai Gasang gi, haú bang mai, i-myt rahkat zâ èq, yhumsing é a-tsam, haú tân jung dusak lé byi rà myit, yhangmoq lé kat byi Sù nghut ri. Haú mù, yhangmoq gi, Garai Gasang é mungdang lhoq dik é hkún jé shoq, haú su kut kó rà nghut lê.

¹⁸ Nàng myang é myiwe myhi haú gi, myidàm htoq mâ é hkohkam pé lé up zô é myuq mó nghut ri." gâ ri.

18

Babelon Lêng Gyop É Hkyô

¹ Hau htàng, maumang lagyo gotù rayuq mauhkûng mai gyó lo é lé, ngò myang ri. Yhang gi, ahko ahkáng mó wó é nghut lui, haú myidàm htoq lé, yhâng é hpungwup èq duqbó to byí ri.

² Yhang, htê mó o mó èq garú tai kat é gi, "Babelon myuq mó gi, lêng gyop bê, lêng gyop bê! Myuq haú gi, nat gâng pè é yhúm eq agè ashop é nat hkangmó é hkyûng dut byuq é htoq agó,

a sansèng é eq achayut é ngoq pé nyi é sùt dut byuq bê nghut ri.

³ Hkâsu mù gâ le, haú byù myú lunglhang gi, yhang kut shut é ashop é dòng gungsho zùm yap é hkyo é nhik lhoq yô é tsibiyiq wing shuq wut bùm bekò nghut ri.

Haù myidàm htoq mã é hkohkam pé gi, yhang eq myi shut làng shut hkyô kut bekô nghut é htoq agó,
myidàm htoq mã é hpugá wuiloq gá bang gi, yhâng é ladu lai shoq ngón kún é hkyô é yanmai, sutzè wó hòm bekô nghut ri."
gâ ri.

⁴ Hau htâng, mauhkúng mai htoq lo é htê gotú lé ngò dum wó gyô é gi, "Ngá é byu pé ê, myuq hau é mara pé mã nungmoq a bo lòm rà matú le, yhâng é wúm pé lé nungmoq a hui zo kó rà matú le, haù mai hân hpang htoq lò keq;

⁵ hkâsu mù gâ le, yhâng é mara gi, mauhkúng htung shoq bum zang to bê nghut luí,

Garai Gasang gi, Yhâng é a dingmán é hkyô lé myit bun bê nghut ri.

⁶ Yhang kut byí é eq rajung za, yhang lé tau kut byi keq; Yhang kut bê muzó eq rajung za, yhang lé í tú taù kut keq.

Yhang nyhó byí é góm má, í tú taù nyhó byi keq.

⁷ Yhang gi, yhumsing gùng lé yhumsing lhoq gyaù yú luí, ladu lai shoq ngón kún nhang é í,

wuìhke jamjau hkyô eq iyon hkyô myo myo, yhang lé taù byi keq.

Hkâsu mù gâ le, yhang gi, yhâng é myit má,

'Ngò gi, hkohkâm myhí nghut lhê; ngò gi, chuimó a nghut;

hkâ-nhám le iyon hui rà a nghut. ga gumrong nyi ri.

⁸ Haù mù luí, yhâng é wúm nghu é shí hkyô, iyon hkyô eq mutmó gyó hkyô gi,

ra-nyí bui má za, yhâng chyáng jé rà nghut lhê.

Hau htoq agó, yhang gi, myí eq nyhê hkyô pyâm é lé hui rà nghut lhê;

hkâsu mù gâ le, yhang lé jéyáng é, haù Yhumsing Garai Gasang gi, wum-o a-tsam bò Sú nghut ri.

⁹ Haù yhang eq rahá myiwe yuqgè nyi zô lhum hkyô kut shut é eq yhâng é ladu lai shoq ngón kún hkyô mã bo lom é, haù myidàm htoq mã é hkohkam pé gi, yhang lé nyhê hkyô é myihkau lé myàng kôjáng, ngaubyi ngau-nhap eq iyon yôn é huí bùm kó rà nghut lhê.

¹⁰ Yhangmoq gi, yhang no jamjaù nyi é lé wú gyuq kôluí, we we má yap to kômù,

'Hkik é myuq mó, a-tsam bo é Babelon gi, dingnyé wó ri-nhung!

Dingnyé wó ri-nhung! Hkyíng hkum ralhüm má za, dam byí é hkyô gi, náng chyáng jé bu-nhung!

ga luí, taí garu kó rà nghut lhê.

¹¹ Myidàm htoq mã é hpugá byu pé gi, yhang é yanmai, ngaubyi ngau-nhap é eq iyon yôn é hui kó rà nghut lhê; hkâsu mù gâ le, yhangmoq é gai zè lé, ó yuq le a wui byi lo kô é yanmai nghut ri.

¹² Gai zè haù pé gi, hîng, ngùn, lungsêng eq palhé, nú-nhâm é pán, me me dut é pán, lai hkyíng eq zam zam ne é pán; namngón jung sik ajung jung, maguí zui lé sai é, guloq hpaù jung sik lé sai é, gyi lé sai é, shamtoq lé sai é, luq hpyú lé sai é jung ajà jà nghut ri.

¹³ Hau htoq agó, changhpyik gâm, xunmân, namngón jung, mura, loban, tsibiyiq wîng, tsanlun xú, mún eq sungso, nojûng eq sau, myang eq myan-glhêng pé; byú é gungdu eq asak pé nghut ri.

¹⁴ Yhangmoq gi, 'Nàng myit ô nau nyi é hkyô pé gi, náng chyáng mai gâng ló byuq bê nghut ri. Nàng wó é sùt é hkyô eq hkikhkam é hkyô pé banshoq gi,

byuq byuq bê nghut lui, hkâ-nhám le dum wó taú yù rá a nghut.' ga taí kó rá nghut lhê.

¹⁵ Gai zè haú pé lé ung lui, yhang chyáng mai sutzè wó yu é byù pé gi, yhang hpuzô é jamjau hkyô lé wú gyuq kô é yanmai, we we má yap to kômù, ngaubyi ngau-nhap eq iyon yon uchyang,

¹⁶ 'Nú-nhâm é pán, me me dut é pán eq zam zam ne é mebu wut lui, hîng, lungsêng eq palhé pé lé
mhôn tô é myuq mó gi, dingnyé wó ri-nhung! Dingnyé wó ri-nhung!

¹⁷ Hkyíng hkum rahkum má za, haú-í yhang wó é sutzè pé htên byoq byuq bu-nhung!

ga taí kó rá nghut lhê.

Wui-sanghpo agyi yuq hkangmó eq wui-sanghpo mai jón wún é bang ban-shoq, wui-sanghpo hkâng bang eq wuìshuq lung-aú mai wam baú hkyô wó yu é bang banshoq gi, we we má yap to kômù,

¹⁸ myuq haú nyé gyó nyi é myihkau lé myàng kôjáng, 'Myuq mó shí eq pûng é myuq gi, hkâmá joq shirâ lhú?' ga taí garu kó rá nghut lhê.

¹⁹ Yhangmoq gi, yhumsing é ulhum má hpuilhup kyaq gyun mù, ngaubyi ngau-nhap eq iyon yon uchyang,

'Myuq mó gi, dingnyé wó ri-nhung! Dingnyé wó ri-nhung!

Wuìshuq lung-aú má wui-sanghpo pé wó é bang gi, yhang é sutzè pé é yanmai, sutzè wó bum akô.

Nghut kôlhang, hkyíng hkum rahkum má za, htên byoq hkyô gi, yhang chyáng jé bu-nhung!

²⁰ Mauhkûng ê, yhang é yanmai hkye gabú aq! Sân-yúng bang, lagyô pé eq myiqhtoí pé ê, hkye gabú keq!

Hkâsu mù gà le, yhang, nungmoq lé kut é eq rajung za, Garai Gasang gi, yhang lé jéyáng bê nghut ri.'

ga taí kó rá nghut lhê." gà ri.

²¹ Hau htâng, wum-o a-tsam mó bo é maumang lagyo rayuq gi, luqluí long mó sù é luqgok racham waq toq yú mù, wuìshuq lung-aú má dú hkyô kat lui, taí é gi,

"Haú Babelon myuq mó gi, haú su kut wum kat dú hkyô pyâm é hui rá nghut lui,

hkâ-nhám le dum myàng rá a nghut lo.

²² Haú tíng bat é bang, dat gó dat ye é bang, sampyí mut é bang eq tut mut é bâng é htê lé,

náng chyáng hkâ-nhám le dum wó gyo lo rá a nghut.

Loq hpaqchyí ajung jung kûng é byù lé, náng chyáng hkâ-nhám le dum myàng lo rá a nghut.

Luqluí lui é htê lé, náng chyáng hkâ-nhám le dum wó gyo lo rá a nghut.

²³ Haú myibung duq é myishâm lé, náng chyáng hkâ-nhám le dum wó duq lo rá a nghut.

Myisik lusik é htê lé, náng chyáng hkâ-nhám le dum wó gyo lo rá a nghut.

Náng é hpugá byù pé gi, mingkân é byù mó pé nghut ri.

Náng é myoqheq hpaqchyí eq mingdán banshoq mâ é bang lé, hkyô shuí nghoq bê nghut ri.

²⁴ Haú myiqhtoí pé é sui, sân-yúng bâng é sui eq myidàm htoq má sat hui bang banshoq é sui pé gi,

yhâng chyáng chyat byu-myàng bê nghut ri."

gâ ri.

19

Haleluya!

¹ Hau htâng, mauhkûng htoq má, byù ajùm ayò garû é htê mó su gâ é lé, ngò wó gyô é gi,

"Haleluya!"*

Hkyi yù hkyô eq hpungwup shingkang, a-tsam gi, nga-nhûng é Garai Gasang eq sêng é nghut lhê.

² Hkâsu mù gâ le, Yhang tarà jéyáng é hkyô gi, tengmán é eq dingmán é yanmai nghut ri.

Yhang gi, myidàm htoq mâ é bang lé, haù yhâng é ashop é dòng gungsho zùm yap é hkyo eq mara kut shut nhang é shiwa myhí mó lé, mara byi luí, Yhâng é dui-nhâng zoshâng wui é sui yuichyîn dam byi bu-nhung ô!"

gâ ri.

³ Dum radàm, yhangmoq taí garu kô é gi,

"Haleluya!"

Myuq hau é myihkau gi, pyat dedu ahtum abyuq ru ìng doq nyì sháng gaq ô!" gâ bum akô nghut ri.

⁴ Haù suwún í xe myi yuq eq dui é dusak myí du gi, haù hkohkâm-tanghkuq má zung tô é Garai Gasang lé paí gop luí, noqkuq uchyang,

"Amen, Haleluya!"

ga, taí garû bum akô.

⁵ Haù hkûn,

"Garai Gasâng é dui-nhâng zoshâng wui nghut é, yhang lé gyuq hkunggâ é tiq ko banshoq bang ê!"

Nga-nhûng é Garai Gasang lé, hky-a-on kungtôn keq ô."

gâ é htê, haù hkohkâm-tanghkuq mai htoq lo ri.

⁶ Hau htâng, byù ajùm ayo é htê su ga, wui myo myo mying hûm é htê su ga, maugum mó é htê su ga, taí garû é htê lé ngò wó gyô é gi,

"Haleluya!"

Hkâsu mù gâ le, wum-o a-tsam dik shoq bò Sù nga-nhûng é Yhumsing Garai Gasang gi, up nyi ri.

⁷ Nga-nhûng gi, ngón gabú luí, Yhâng é hpungwup shingkang lé lhoq gyaù sháng ô!

Hkâsu mù gâ le, haù Sauzo myiháng poí gi, jé bê nghut luí, Yhâng é myisik gi, rì rì mhôn to bê nghut ri.

⁸ Sân-yúng duq wik nú-nhâm é mebu le, wut râ matú, Yhang lé byì to bê nghut ri."

gâ ri. (Nú-nhâm é mebu haù gi, sân-yúng bang kut é dingmán é muzó nghut ri.)

⁹ Hau htâng, maumang lagyo gi, ngo lé, "'Haù Sauzô é myiháng zoshuq poí má ji yu é hui bang gi, hkungsó wó nyi ri.' nghû ká aq." ga taí luí, "Dang shí pé gi, Garai Gasâng é tengmán mungdang yhang nghut lhê." ga xoq taí ri.

¹⁰ Haù hkûn, ngò gi, yhang lé noqkuq râ nghû, yhâng é hkyí wang má paí gop kat é nghut lhê. Nghut kôlháng, yhang gi, "Haù su hkâkut! Ngò gi, nàng eq haù Yesuq é saksé lé hkâm é náng gumang wui eq rahá, byinzùm dui-nhâng

* **19:1** *Haleluya* gâ é gi, Hebre myíng dòng, "Yhumsing Garai Gasang lé hky-a-on kungton lhê" gâ é dang nghut ri.

zoshâng ru nghut lê. Garai Gasang lé noqkuq aq! Hkâsu mù gâ le, Yesuq é hkyô lé saksé hkâm é gi, myiqhtoi htoi é Woi-nyí é myit đông nghut ri." ga, ngo lé tai hkûm ri.

Myang Hpyû Jî To Su É Hkyô

¹¹ Hau htâng, ngò gi, mauhkûng bóng tô é lé le, ngá é myoq hí má myang hpyû radu nyi tô é lé le, myang ri. Myang hpyû haú má jî tô é gi, Lhumzui eq Tengmán gâ é Sû nghut ri. Yhang gi, tengmán é đông tarâ jéyáng luí, majan zan Sû nghut ri.

¹² Yhâng é myoqjí gi, myishâm su dut mù, Yhâng é ulhum má gi, janmaú myo myo tsúng tô ri. Yhang mai lai luí, ó yuq le a bo sé é mying, Yhâng chyáng kâ tap tô ri.

¹³ Yhang gi, sui má jum yù bê nghut é buhîng radung wut to luí, Yhâng é mying gi, Garai Gasâng é mungdang gâ ri.

¹⁴ Haú mauhkûng gyê pé gi, hpyu é eq sanséng nú-nhâm é mebu wut mù, myang hpyû jî kôluí, Yhâng htâng má châng bum akô nghut ri.

¹⁵ Byù myú haú pé lé zan râ matú, htoq é shâm gi, Yhâng é nhut mai htoq lo ri. Yhang gi, yhangmoq lé, shamtoq dumbáng eq up râ nghut lê. Yhang gi, wum-o a-tsam dik shoq bò Sû Garai Gasâng é nhikmo-yô é tsibiyiq shi pyik jang má, yhangmoq lé pyik rà nghut lê.

¹⁶ Hkohlkam pê é Hkohlkâm eq yhumsing pê é Yhumsing gâ é mying gi, Yhâng é buhîng eq Yhâng é tangbau má kâ tap tô ri.

¹⁷ Dum, maumang lagyo rayuq gi, bui má yap tô é lé ngò myang ri; yhang gi, maulat mã é nghoqzô pé banshoq lé, "Lé keq, Garai Gasâng é zoshuq poi mó matú, lé zup zing keq;

¹⁸ haú hkûn, nungmoq gi, hkoohlkam pê é, gyezaú pê é, wum-o a-tsam mó bò bâng é, myang jûm eq jî bâng é gungsho, luthkyô wó bang eq jùn pê é, byù mó byù zo pé lhunglhâng é gungsho pé lé, myàng zo kó râ nghut lê." ga, hê mó eq wut garú tai ri.

¹⁹ Hau htâng, haú tân jung dusak eq myidàm htoq mã é hkoohlkâm eq yhangmoq é gyezô pé gi, haú myang htoq má jî to Sû eq Yhâng é gyezô pé lé, majan zan râ matú chôm zîng bùm kô é lé, ngò myang ri.

²⁰ Nghut kôlhang, haú tân jung dusak gi, chyup yu é hui bekô nghut ri; hau htoq agó, haú tân jung dusak é masat lô lé hkam yù luí, yhâng é alhô lé noqkuq é bang lé, mhaú zo râ matú, tân jung dusak hau é gunglik đông limik kumhá pé kut shit é myiqhtoi pyoq le, chyup yu é hui bê nghut ri. Yhangnhik gi, hang myi duq nyi é myi nhông má ðui gù dú hkyô kat é hui bekô nghut ri.

²¹ Haú myit gyó tô é bang gi, myang gûng má jî to Su é nhut mai htoq lo é sham eq sat pyâm é hui bekô nghut luí, nghoq pé lhunglháng gi, haú bâng é gungsho lé, gyi gyi dau dau myàng zô bùm bekô nghut ri.

20

Rahkying Zàn

¹ Dum, maumang lagyo rayuq gi, nik dik htûm é Lasang-dông é zoqshi eq joqtoq tui mó lé, yhâng é loq má chùng mù, mauhkûng mai gyó lé lo é lé, ngò myang ri.

² Yhang gi, natzau eq Tsadán nghut é, a-nham lê é lhangmui gâ é manjung lé, zanwut rahkying lhûng to râ matú, chyup tui yù bê nghut ri.

³ Haú mù, maumang lagyo haú gi, rahkyíng zàn a byíng shî é gyoro má, manjung haú, byù myú pé lé a wó mhaú zo sháng gaq ga, nik dik htúm é Lasang-dong má yhang lé dú hkyô hâng kat luí, zoq myhî to mù, hau é ahtoq má dizik htúng tô ri. Haú rahkyíng zàn lai eq, yhang lé, ra yoq zo hpông htoq kat ra râ nghut lhê.

⁴ Ngò gi, haú tarâ jéyáng râ ahko ahkáng wó é bang zung tô bum é hkohkâm-tanghkuq pé lé, dum myang ri. Hau htoq agó, haú Yesuq é hkyô lé saksé hkâm é yanmai le, Garai Gasâng é mungdâng é yanmai le, ulhum hpyit hui bâng é sobyô pé lé, ngò myang ri. Haú bang gi, haú tân jung dusak eq yhâng é alhô lé a noqkuq é htoq agó, yhumsing é ngelang eq loq má hau é masat lhô lé a htúng tap yú bâng é sobyo pé nghut ri. Yhangmoq gi, dum dui toq mù, zanwut rahkyíng tup Hkrisduq eq rahá up nyi bekô nghut ri.

⁵ Haú gi, sâng-hî dâm dum dui toq é hkyô nghut ri. (Shi byuq bê myit gyó tô bang gi, rahkyíng zàn haú a byíng byíng wó dum dui toq kó rá a nghut.)

⁶ Sâng-hî dâm dum dui toq é hkyô má lom é bang gi, hkungsô wó bang eq choyoyúng bang nghut ri. Í dâm nghú râ shi é hkyô gi, haú bang lé up râ ahkáng wó é a nghut; haú bang gi, Garai Gasang eq Hkrisduq é hkyangjông pé dut râ nghut é htoq agó, Hkrisduq eq rahá zanwut rahkyíng tup up kó rá nghut lhê.

Tsadán Htên Byoq Huí É Hkyô

⁷ Rahkyíng zàn haú lai jáng, Tsadán gi, htóng mai nhang htoq kat é hui luí,

⁸ majan zan râ matú, myidâm htoq myi chyún má nyi é, Goga eq Magoga gá é byù myú pé lé mhaú shuí tsing yù rá ga, htoq é rá nghut lhê. Byù haú bang gi, wuìshuq lung-aú yàm mâ é semuí myhó myo kó rá nghut lhê.

⁹ Yhangmoq gi, maumyí htunghtáng hkap shoq chôm yán doq lò kômù, haú Garai Gasâng é byu pé nyi é dap nghut é, Garai Gasang chyitdap é myuq lhíngkyuq má, lé lóm tô bùm bekô. Nghut kôlhang, mauhkûng mai myi gyó lò luí, yhangmoq lé nyhê hkyô pyám bê nghut ri.

¹⁰ Haú tân jung dusak eq myiqhtoi pyoq pé lé dú hkyô kat jang nghut é, hang myi duq nyi é nhông má, yhangmoq lé mhoq hpyoq yu é natzau haú le dú hkyô pyám é hui bê nghut ri. Yhangmoq gi, nyi, myín, pyat dedu ahtum abyuq wuìhke jamjau hui zô nyi kó rá nghut lhê.

Ló Htâng É Tarâ Doqdan Hkyô

¹¹ Hau htâng, hkohkâm-tanghkuq hpyú mó ralhúum eq haú má zung tô é Sù lé, ngò myang ri. Haú mauhkûng eq myigùng gi, Yhâng é hí mai hpang lô bê nghut mù, yhangnhik é matú jowò a joq lo nghut ri.

¹² Hau htoq agó, shi byuq bê nghut é, tiq é kô é bang gi, hkohkâm-tanghkuq hí má yap tô bum é eq laiká buk pé hpông é lé, ngò myang ri. Asak jihpán laiká buk gá é gotú laiká buk le, hpông tô ri. Haú shi byuq bê bang gi, yhumsing kut é eq rajung za, laiká buk pé má kâ tô é dông, tarâ doqdan é hui bùm bekô nghut ri.

¹³ Haú hkûn, wuìshuq lung-aú gi, yhang má lúng tô é, shi byuq bê bang lé ap byi luí, haú shi é hkyô eq Moming le, yhangnhik chyáng lúng tô é, shi byuq bê bang lé ap byi akò nghut ri; yuq hkangmó gi, yhumsing kut é eq rajung za tarâ doqdan é hui bekô nghut ri.

¹⁴ Hau htâng, shi é hkyô eq Moming gi, myi nhông má dú hkyô kat é hui bekô nghut ri. Myi nhông haú gi, í dâm nghú râ shi é hkyô nghut lhê.

¹⁵ Asak jihpán laiká buk má, myìng a bo é sù ó yuq nghut kôle, myi nhông haú má dú hkyô kat é hui bekô nghut ri.

21

Yerusalem Asik

¹ Hau htâng, mauhkûng asik eq myigùng asik lé, ngò myang ri; hkâsu mù gà le, hí lhê é mauhkûng eq myigùng gi, lái lô byuq bê nghut lui, wuìshuq lung-aù le, dum joq rà a nghut lo.

² Haú hkûn, Chyoiyúng Myuq gà é Yerusalem asik gi, lusik é matú mhôn yúng tô é myisik su, hen lajâng yù lui, Garai Gasâng chyáng má é nghut mù, mauhkûng mai gyó lé lo é lé, ngò myang ri.

³ Hau htoq agó, hkohkâm-tanghkuq mai htoq lo é dangtê mó lé, ngò wó gyó é gi, "Ahkuí, Garai Gasâng é nyì jowò gi, xângzo byu pé eq rahá nghut lui, Yhang gi, yhangmoq eq rahá nyi nyi rà nghut lhê. Yhangmoq gi, Yhâng é byu pé dut rà nghut lui, Garai Gasang yhang, yhangmoq eq rahá nyi mù, yhangmoq é Garai Gasang dut rà nghut lhê.

⁴ Garai Gasang gi, yhangmoq é myoq má é ngaubyi lunglhang lé, sut pyám byi rà nghut lhê. Htângnùng má gi, shì-nò hkyô, iyon hkyô, ngaubyi ngau-nhap hkyô eq no hpu hkyô nghù é joq rà a nghut lo; hkâsu mù gà le, hí lhê é hkyô pé gi, lái lô byuq bê nghut ri." gà ri.

⁵ Haú hkohkâm-tanghkuq má zung to Sù gi, "Wú aq, jung hkgang mó lé, Ngò asik kut nyì bê nghut lhê." ga tái lui, "Shì lé kâ to aq, hkâsu mù gà le, dang shí pé gi, lumgíng é dang eq tengmán é dang nghut lhê." ga tái ri.

⁶ Hau htoq agó, Yhang gi, "Haú pé gi, ban kut bê. Ngò gi, Alhpa eq Omega nghut lhê; Sâng-hi Awang eq Ló Htâng Sù le nghut lhê. Wuìshit sù lé gi, ahpau a dúng é za, asak wuìbúm má é uchyam lé, Ngò byi huq rà nghut lhê.

⁷ Wó ung é sù ó yuq nghut kôle, Garaí é silí wunlí haú pé banshoq lé sîng rà nghut mù, Ngò gi, yhâng é Garaí Gasang dut lui, yhang gi, Ngá zo dut rà nghut lhê.

⁸ Nghut kôlhang, gyuq myit bò bang, a lumjíng bang, achag achyut dut bang, byù sat bang, ashop é đông gungsho zùm yap é hkyô shut é bang, myoqheq hpaqchyí kut é bang, hparà noq é bang eq mhaú bang lunglhang é jowò gi, haú hang myi duq nyi é nhông nghut rà nghut lhê. Haú gi, í dâm nghù rà shì é hkyô nghut ri." ga ngo lé tái ri.

⁹ Ló htâng é wúm nyhit jung byíng tô é góm nyhit lhum chung tô é maumang lagyo nyhit yuq má é rayuq gi, lé mù, "Lé aq, haú Sauzô é yhangmyi gà é myisik lé, ngò tún shit rà nghut lhê." ga ngo lé tái ri.

¹⁰ Hau htâng, yhang gi, ngo lé Woi-nyì mai bùm myhâng mó rallhum má shuí jé lui, Garaí Gasâng chyáng má é nghut mù, mauhkûng mai gyó lé lo é, haú Chyoiyúng Myuq gà é Yerusalem lé tún shit ri.

¹¹ Myuq haú gi, Garaí Gasâng é hpungwup shinggang hù é htoq agó, haú maubó gi, hpaú dik é huhpé lungsêng su dut lui, myoqjám su sân-yúng ri.

¹² Myuq xêwâm gi, kô myhang é htoq agó, hkum raxe í lhum hpông tô ri; hkum haú pé má, maumang lagyo raxe í yuq zúng tô ri. Hau htoq agó, Israelaq byù myú raxe í hu é myíng lé, hkum haú pé má kâ tap to bum ri.

¹³ Hkum haú pé gi, buìhtoq hkyam shut sùm lhum, buìwàng hkyam shut sùm lhum, maupyí shut sùm lhum, mautsùng shut sùm lhum kut hpông tô ri.

¹⁴ Myuq xêwâm haú gi, awang raxe í lhùm èq hi tô é nghut lui, awang haú pé má, Sauzô é lagyo raxe í yuq é myíng dap tô bum ri.

15 Haù ngo lé nyo é maumang lagyo gi, myuq lé le, hau é hkum pé lé le, xêwâm pé lé le, ké rà matú, kê é jung hîng jàm-yang ralhum chung tô ri.

16 Myuq haù gi, myi chyùn dut mã é nghut luí, hîng hpyang làm hpyang rawuí wuí za dut mã é nghut ri. Maumang haù gi, myuq lé jàm-yang hau èq kê wú é hkùn, hîng hpyang, làm hpyang, myhâng hpyang banshoq 1400 déng* kô bo ri;

17 yhang gi, haù byù kê é jung eq wuí é maumang lagyo é kê jung lé chûng mù, myuq xêwâm lé ké wú é hkùn, rasho myí xê myí dúng bo ri.

18 Myuq xêwâm haù gi, huhpé lungseng èq sai é nghut ri; myuq gi, hîng gyíng èq sai é nghut mù, myoqjâm su yhang sân-yúng ri.

19 Myuq xêwâm haù é awang pé gi, hpau jung lungsêng ajung jûng èq mhôn tô é nghut ri. Sâng-hî lhum gi, huhpé lungseng èq, í lhum nghû râ gi, nila (mauhkûng nyui su dut jung) lungseng èq, sùm lhum nghû râ gi, mahuya (noq é isâm myo jung) lungseng èq, myí lhum nghû râ gi, myaq (huí nyui nyui é jung) lungseng èq,

20 ngo lhum nghû râ gi, nyhaù myoqjí su dut jung lungseng èq, hkyuq lhum nghû râ gi, pate-mya (nè é jung) lungseng èq, nyhit lhum nghû râ gi, huí muí muí é su dut jung lungseng èq, shit lhum nghû râ gi, myek-yoi (wuimau nyui su dut jung) lungseng èq, gaù lhum nghû râ gi, utohpaya (bó huí huí é jung) lungseng èq, raxê lhum nghû râ gi, mahuya nyui lungsêng èq, raxe ralhum nghû râ gi, wakintu (mhan-haq nyui eq mauhkûng nyui nyhò tô é su dut é jung) lungsêng èq, raxe í lhum nghû râ gi, (me me dut é jung) htihtu-nila lungseng èq mhôn tô ri.

21 Haù myuq hkum raxe í lhum gi, palhé raxe í cham nghut ri; hkum ralhum gi, palhé rachâm èq sai é nghut ri. Haù myuq é hkyô mó gi, hîng jet èq sai é nghut luí, myoqjâm su duq san é hkyô nghut ri.

22 Ngò gi, myuq haù má noqkuq yhùm joq é lé a myàng, hkâsu mù gâ le, haù wum-o a-tsam dik shoq bò Sù Yhumsîng Garai Gasang eq Sauzo gi, myuq hau é noqkuq yhùm nghut nyi é yanmai nghut ri.

23 Haù Garai Gasâng é hpungwup shingkang gi, myuq haù má duqbó byí é htoq agó, Sauzo gi, myuq hau é myibung nghut é yanmai, myuq haù má gi, buí eq lhamó tsô byi a ra nghut ri.

24 Haù byù myú pé gi, myuq haù duqbó é hkaù má hkyô wó so kó râ nghut lhê; haù myidâm htoq mã é hkohkam pé gi, yhangmoq é hkikhkâm hkyô lé, myuq haù má yù lé kó râ nghut lhê.

25 Myuq haù má gi, myín nghû é a joq é yanmai, myuq hkum myhí é le joq râ a nghut lo.

26 Haù byù myú pé é hpungwup shingkang eq aróng lé, myuq haù má yù lé kó râ nghut lhê.

27 Myuq haù má, a sansêng é hkyô haí le wó wàng râ a nghut é htoq agó, hoq hpu hkyô eq mhaù zô é hkyô kut é sù ó yuq le wó wàng râ a nghut; haù Sauzô é asak jihpán laiká buk má myìng bo é bang za wó wàng râ nghut lhê.

22

Asak Wuí Mó Lâng

* 21:16 1400 déng gi, Grik pé é stadia 12000 kô nghut ri.

1 Hau htâng, Garai Gasang eq Sauzô é hkohkâm-tanghkuq mai yui htoq lô luí, myuq hkaú má é hkyô mó gûng dông yui lô é, myoqjâm su sân-yúng é asak wui mó lêng lé, maumang lagyo haú, ngo lé tûn shit ri.

2 Wuilàng í hpoq é má, ashí raxe í myú zuí é asak shigâm yuq tô é nghut luí, lhohkyap hkangmô ashí zuí ri. Hau htoq agó, shigâm haú pé má é ahaq pé gi, byù myú pé lé yá gè rà matú nghut ri.

3 Nhìng é hái le a joq lò rà nghut lhê. Garai Gasang eq Sauzô é hkohkâm-tanghkuq gi, myuq hkaú haú má joq nyí rà nghut mù, Yhâng é dui-nhâng zoshâng wui gi, Yhang lé noqkuq dojaú kó rà nghut lhê.

4 Yhangmoq gi, Yhâng é myoqdong lé myàng kó rà nghut é htoq agó, yhangmoq é ngelang má, Yhâng é myìng kâ tap é hui kó rà nghut lhê.

5 Myín nghù é le joq rà a nghut lo. Myibung duqbó byí é le, buí tsô byí é le, yhangmoq ra kó rà a nghut lo, hkâsu mù gâ le, haú Yhumsing Garai Gasang gi, yhangmoq lé duqbó byí nyí rà nghut lhê. Hau htoq agó, yhangmoq gi, pyat dedu ahtum abyuq up nyí kó rà nghut lhê.

6 Maumang haú gi, ngo lé, "Dang shí pé gi, lumgíng é dang eq tengmán é dang nghut lhê. Myiqhtoí pé é woi-nyí lé up é Yhumsing Garai Gasang gi, adé myáng má dut lò rà hkyô pé lé, Yhâng é dui-nhâng zoshâng wui lé tûn shit rà matú, Yhâng é maumang lagyo lé nhang kat é nghut ri." ga taí ri.

Yesuq Jé Lé Lô Râ Hkyô

7 "Wú keq, Ngò gi, a myáng má jé lé lô rà nghut lhê! Laiká shí má bo é myiqhtoí dang pé lé châng kut é sù gi, hkungsô wó nyí ri."* gâ é lé, ngò wó gyô ri.

8 Haú hkyô pé lé wó myáng wó gyô é sù gi, ngò Yohan nghut lhê. Ngò gi, haú hkyô pé lé wó myáng wó gyô é hkûn, ngo lé, shí hkyô pé tûn shit é maumang lagyo é hkyí wang má noqkuq rà matú paí gop é nghut lhê.

9 Nghut kôlhang, yhang gi, ngo lé, "Haú su hkâkut! Ngò gi, nàng eq le, náng é gumang myiqhtoí pé eq le, laiká shí má é mungdang pé lé châng kut é lhunglhang bang eq le rahá, byinzùm dui-nhâng zoshâng ru nghut lhê. Garai Gasang lé noqkuq aq!" ga taí ri.

10 Hau htâng, yhang gi, "Laiká shí má bo é myiqhtoí dang pé lé, hkâzaú to lo, hkâsu mù gâ le, haú ahkyíng gi, chyâng lò bè nghut ri.

11 A dingmán é sù gi, a dingmán é dông xoq kut nyí sháng gaq; a sansêng é sù gi, a sansêng é dông xoq dut nyí sháng gaq; dingmán é sù gi, dingmán é dông xoq kut nyí sháng gaq; chyoyúng é sù gi, xoq chyoyúng nyí sháng gaq." ga ngo lé taí kyô ri.

12 "Wú keq, ngò gi, a myáng má jé lé lô rà nghut lhê! Ngò gi, yuq hkangmô lé, yhumsing kut é eq rajung za byí rà shigyau chyunghuq chung tô lhê.

13 Ngò gi, Alpha eq Omega nghut lhê, Sâng-hi eq Jihtùm nghut lhê, Sâng-hi Awang eq Lô Htáng Sù le nghut lhê.

14 Asak shigâm má jé rà eq myuq hkaú shut hkúmdong mai wó wang jé rà ahkáng wó yù shoq, yhumsing é buhíng lé chí sán é bang gi, hkungsô wó nyí ri.

15 Shinggan má gi, hkui dông nyí é bang, myoqheq hpaqchyí kut é bang, ashop é dông gungsho zùm yap é hkyô shut é bang, byù sat é bang, hparà noq é bang eq mhaú é hkyô lé ô nàù luí châng kut é bang lhunglhang nyí bum akò nghut ri.

* 22:7 Dang shí hkun gi, Yesuq taí é nghut lhê.

¹⁶Ngò, Yesuq gi, haù noqkuq hpûng pé lé, shí hkyô pé saksé hkâm shit sháng gaq nghû, Ngá é maumang lagyo lé, nungmoq chyáng nhang kat bê nghut lhê. Ngò gi, Dawiq é Amyit eq Awut Ashín le, haù duqbó é Bó-myhû le nghut lhê."[†] gâ é lé, ngò wó gyô ri.

¹⁷Haù Woi-nyí eq myisik gi, "Lé aq!" gâ akô. Haù wó gyô é sù gi, "Lé aq!" ga sháng gaq. Wui shit sù ó yuq nghut kôle, lé sháng gaq; shuq nau é sù ó yuq nghut kôle, ahpau byi a ra é asak wui lé, shuq sháng gaq.

¹⁸Laiká shí má bo é myiqhtoi dang pé lé wó gyô é bang yuq hkangmó lé, ngò sidiq byí é gi: dang haù pé má, rajung jung kat jat é sù ó yuq chyáng nghut kôle, Garai Gasang gi, laiká shí má kâ tô é wum pé lé jé nhang rà nghut lhê.

¹⁹Myiqhtoi laiká shí má bo é dang pé lé, yu pyâm é sù ó yuq lé nghut kôle, Garai Gasang gi, laiká shí má kâ tô é asak shigâm eq chyoiyung myuq mâ é yhang eq sêng é gû lé, yu pyám byi rà nghut lhê.

²⁰Shí hkyô pé lé saksé hkâm byí é Sù gi, "Nghut bê, Ngò gi, a myáng má jé lé lô rà nghut lhê." ga taí ri.

Amen. Yhumsing Yesuq ê, lé lô aq ô!

²¹Haù Yhumsing Yesuq é jeju gi, Garai Gasâng é byu pé chyáng joq nyí sháng gaq ô! Amen.

[†] 22:16 Dang shí hkun gi, Yesuq taí é nghut lhê.